

Teoso Sãkire Amaneri

O Novo Testamento Em Apurinã

Brasil



O Novo Testamento Em Apurinã Brasil

© 2010, Wycliffe Bible Translators

Primeira Edição:

© 2004, Wycliffe Bible Translators

Creative Commons



Atribuição-Use Não-Comercial-Vedada a Criação de Obras Derivadas 3.0

Você pode: — copiar, distribuir, exibir e executar a obra

SOB AS SEGUINTE CONDICOES:

- **ATRIBUIÇÃO** — Você deve dar crédito ao autor original, da forma especificada pelo autor ou licenciante.
- **USO NÃO-COMERCIAL** — Você não pode utilizar esta obra com finalidades comerciais.
- **VEDADA A CRIAÇÃO DE OBRAS DERIVADAS** — Você não pode alterar, transformar ou criar outra obra com base nesta.

www.ScriptureEarth.org

Aãtsopaã Auakari

Apurinã	Português	Página
Xesosi Ìkorapokoriti Auakasaaki Sãpiretakiti		
Mateo.....	Mat.	1
Marko	Mar.	91
Arókasi	Luc.	148
Xoão.....	Joã.	251
Xesosi Iokanatakini Parĩka		
Átosi	Ats.	320

Paoro Iokanatsopatakiti

Homano	Rom.	406
1 Korĩto.....	1 Co.	446
2 Korĩto.....	2 Co.	480
Karásia.....	Gál.	504
Épeso	Efs.	520
Piriposi	Flp.	535
Koroso.....	Col.	545
1 Tesarónika	1 Ts.	555
2 Tesarónika	2 Ts.	562
1 Tximótxio	1 Tm.	567
2 Tximótxio	2 Tm.	579
Txito	Tit.	587
Piremõ	Flm.	592

Ãti Kãkiti Iokanatsopatakiti

Epireo	Heb.	595
Txiako.....	Tgo.	624
1 Petro	1 Pe.	634
2 Petro	2 Pe.	645
1 Xoão.....	1 Jo.	652
2 Xoão.....	2 Jo.	662
3 Xoão.....	3 Jo.	664
Xota	Jud.	666

Xesosi Kristo Iuaka Oerekiniua

Apokorípisi	Apo.	670
-------------------	-----------	-----

MATEO

Xesosí Nirimaneakori Iua Apisapanika Auakani

(Arókasi 3.23-38)

1 ¹Xesosí Teoso mereékiti itxaua. Uai aua Xesosí apika atokiriakorini uāka. Xosee inakori Xesosí iri atoko ïkorapokoriti. Apraãoni, Taviini pakini Xesosí apika atokiriakorini atoko. Ininiã Xesosí Taviini, Apraãoni pakini imi atoko itxa.

²Ininiã ia atoko itxa:

Kitxakapirĩka Apraão, Isaki iri.

Isaki, Xakoo iri.

Xakoo, Xotaa itariakorikata iri.

³Xotaa, Péresi, Sera pakini iri. Inorona Tamara.

Péresi, Ésirõ iri.

Ésirõ, Arão iri.

⁴Arão, Aminatapi iri.

Aminatapi, Nasoõ iri.

Nasoõ, Sáomõ iri.

⁵Sáomõ, Póasi iri. Póasi inoro Haapi.

Póasi, Opetxi iri. Opetxi inoro Hotxi.

Opetxi, Xesee iri.

⁶Xesee, Tavii iri. Tavii Isaeokini auĩte itxaua.

Tavii, Saromão iri. Saromão inoro mitxi Oria ïtanoro. Eereka

Tavii takaro oa.

⁷Saromão, Hopoão iri.

Hopoão, Apia iri.

Apia, Asa iri.

⁸Asa, Xosapaa iri.

Xosapaa, Xorão iri.

Xorão, Osia iri.

⁹ Osia, Xotão iri.

Xotão, Akasi iri.

Akasi, Esekia iri.

¹⁰ Esekia, Manasee iri.

Manasee, Amõ iri.

Amõ, Xosia iri.

¹¹ Xosia, Xekonia itariakorikata iri. Iuasaaki ìkorakanani kākiti
Isaeokini maïkaāka. Papirónia tixinimoni anikaākana.

¹² Papirónia anikikona atoko,

Xekonia, Saratxieo iri.

Saratxieo, Soropapeo iri.

¹³ Soropapeo, Apiotxi iri.

Apiotxi, Eriakiĩ iri.

Eriakiĩ, Asoo iri.

¹⁴ Asoo, Satoki iri.

Satoki, Akĩ iri.

Akĩ, Eriotxi iri.

¹⁵ Eriotxi, Ereasa iri.

Ereasa, Mataã iri.

Mataã, Xakoo iri.

¹⁶ Xakoo, Xosee iri. Iua Xosee, Maria ãtaniri. Xesosi, iuara Teoso
Mereēkiti itxaua. Inoro Maria.

¹⁷ Apraão, iua ākiri, imekaniri, apika mekaniri, apika mekaniri ākiri, apika mekaniri apika mekaniri, apiko itxaāpota. Tavii auakasaaki, katosipeka pakini ninoa uāka. Eereka aua Tavii, Tavii ākiri, imekaniri, apika mekaniri, apiko itxaāpota. Katosipeka pakini ninoa uāka. Iuasaakiika Xoteoakori anikaāka Papirónia tixinimoni. Ninoa mekaniriakori katosipeka inakasaaki, Xesosi iponaniāpeka.

Xesosi Iponaniini Pirena

(Arókasi 2.1-7)

¹⁸ Ia atoko itxapaniko Xesosi. Teoso mereēkiti iponaniākasaaki, Maria ominapatari Xosee. Oĩtaniriuatini apisapanika, omotokiāri amarini Erekarĩ Matamatakoti sikakiti. ¹⁹ Xosee uākatari Maria kamari maerekati ātikata. Atāo inakarĩnoka kamakari iua, ininiā kona inirekari kākiti imaropiretiniri oa kamixi onini. Kākiti sauaki osiniā, Xosee linirekaro opētauatini, kotxi erekari kamakari iua. Ininiā inirekari itakanapiniro oa, ixika kākiti mimarotakaniā. ²⁰ Ikara atoko inini ixiniremoni, Teoso nitiri iaxitikiri apoka itaponemoni. Ininiā itxa:

—Xosee, Taviini apika mekaniri pite. Kona pipĩkapero Maria papakapini pĩtanoro ĩkapani, kotxi Erekarı Matamatakoti, iuara kamixipeka txĩkitakaro. ²¹Auako oa ākiri. Pitakauākatariko Xesosi itxauako, kotxi imaktxakari kākiti maerekani —itxa Teoso nitiri.

“Xesosi” popĩkari sākireẽ, iuatxikana, “Kākiti Maerekani Makatxakakari,” itxa.

²²Apikomoni Teoso nitiri txari:

—Ikara atoko inakari auapeka, kotxi kitxakapirĩka Teoso sākire sãpiretakari sãpiretapekari ikara sākiretxi. ²³Kitxakapirĩka ia atoko itxa:

Hĩkenakotari. Sito kikikata masirĩkato mixiuatako. Auako oimi. Itakauākataāka Emanoeo inakori

—itxa Teoso nitiri Xoseemoni. “Emanoeo” popĩkari sākireẽ “Teoso atekata aua.”

²⁴Xosee merekasaaki, iua auikari Teoso nitiri sākire. Ininiã ĩtanorouata Mariakata. ²⁵Eereka amarini iponaniākasaaki, Xosee takauākatarı Xesosi itxaua. Amarini iponaniini apisa iua lisirĩka Mariakata.

Atokatxi Pokĩkinimoni Auakani

2 ¹Xesosi iponaniã Pereẽ inakori sitatxiti, Xotėia tōpa, Erotxi auĩtetxi inakasaakiua. Iuasaaki atokatxi pokĩkinimoni auakani sari Xerosareẽ sitatxitimoni Pereẽ takote. Iōriki imarotakani ninoa.

²Ininiã itxana kãkitimoni:

—Naniparari amarini Xoteo auĩte inakariua? Ate itikapekaro iōrikite atokatxi pokĩkinimoni. Oa iōriki oerekaua auĩtetxi Apiananiri iponaniãpeka. Ininiã ate apoka uai akapotoreẽkiniua iua apisatoõ, kotxi Apiananiri itxaua —itxana ninoa.

³Erotxi ikara ikenakoenetakasaaki, kona erekaxinireri. Kona inirekari āti auĩtetxi apokini. Ininiã ikinimane Xerosareẽ auakani kona erekaxinirena, kotxi ninoa pĩkari Erotxi. ⁴Ininiã iua apotiitana sasetotxi auĩteakori, kaiōkatsoparerini pakini. Ininiã Erotxi pimaãna:

—Nanipa Teoso Mereẽkiti iponaniãko? —itxa.

⁵Ninoa apakapapiretari:

—Pereẽ sitatxiti, Xotėia tōpa aua. Ia atoko itxapaniko Teoso sākire sãpiretakari iōkatsopatakiti kitxakapirĩka:

⁶Pereẽ sitatxiti auakani, Xotėia tōpa, hĩte sitatxine poiãori, iuaritika kona hĩpėtauatape, kotxi hĩte sitatxineẽ iponaniãko Isaeokini auĩte. Kākiti mĩkiikakari itxauako —itxa ninoa auĩtetxiakori Erotximoni.

⁷Ininiã Erotxi akiritana ninoa iōriki imarotakani, ninoanani imisākiretini ĩkapani. Ininiã ipimaãna:

—Mitsipitipanika kirisaakipa hĭtikataro oa iōriki? —itxa ninoamoni.

Ininiã ninoa sãpiretari. ⁸Iposo atoko iokanatana Pereẽmoni:

—Hĭsako Pereẽmoni amarini hinitini ĩkapani. Hãpokasaakiri, hĭsãpiretano. Ininiã nota apaka sako, iua apisatoõ nikapotoreẽkiniua ĩkapani —itxa Erotxi.

Txamari inirekari okiniri Xesosi, kotxi !inirekari āti auĭtetxi auini.

⁹Erotxi sãkire ikenakotakana atoko, ipotorikana. Iōriki atokatxi pokĭkinimoni itikakitona ĩkiika. Anikana Xesosi auinimoni.

Iuaãtaã oa iōriki iotoka. ¹⁰Ninoa atamatakasaakiro iōriki, iteene ipoxokoniuatana. ¹¹Ininiã apokana aapoko. ĩroãna. Apokarina amarini inoro Mariakata. Ininiã ikapotoreẽkauana Xesosi apisatoõ. Itxarina:

—Apiananiri pitxaua. Aãuĭte pitxaua —itxana.

Iposo atoko itiina imaktxakana. Ininiã imaktxakarina erekari imĭkitina auĭtetximoni isikakitina ĩkapani. Isikarina oro, ĩsẽso inakori, miha inakori pakini. ĩsẽso, miha pakini kamariãro peerekari.

¹²Ininiã eereka Teoso sãpiretana iōriki imarotakanimoni itaponeẽna:

—Kona hĭkanapiriãpe Erotximoni —itxa Teoso ninoa taponemoni.

Ininiã ninoa kanapiriãkasaaki auinimoni, āti kimaporitimoni isana.

Exitomoni Xosee, Maria Pakini Sini

¹³Iōriki imarotakani sipeka atoko, Teoso nitiri iaxitikiri sãpiretari Xosee itaponemoni:

—Paiamata. Põkitikaua. Panikari amarini, inoro apaka Exito tixinimoni. Himiteka. Kona hĭkanapiriãpe nota masãpiretakanisaakii, kotxi Erotxi nitari amarini okiniri ĩkapani —itxa Teoso Xoseemoni.

¹⁴Ininiã Xosee:

—Nisapitikako —itxa.

Ininiã iua ĩkanõkatika Xosee õkitikaua. Aiamata Exito tõpamoni isini, amarini anikini ĩkapani. Ininiã imimitekari amarini inorokata Exitomoni. ¹⁵Erotxi ipinakasaaki, iusaaki ikanapiriãko.

Kona ikanapiriã Erotxi ipinini apisa. Ia atoko itxapaniko kitzakapiriãka Teoso sãkire sãpiretakari sãpiretakiti:

Nakiritariko namarite Exito tixini itakanapini.

Amarini Okiko Pirena

¹⁶ Erotxi imarotakasaakiri iōriki imarotakani sipe inakasaaki, limisākiretaikarina iua, ininiã iua omanākarauata. Ininiã amarini ipikananipeka inakanuia, apaka axapitipanika inakanuia, imakinikana okākitaka Pereẽ sitatxitiã auakani. Ikara atoko itxa, kotxi iōriki imarotakani sãpiretari ipikananipeka oa iōriki tokiã. ¹⁷ Kitxakapirĩka Teoso sãkire sãpiretakari Xeremia inakori sãpiretakiti iaōka auape iusaaki. ¹⁸ Iua txari:

Hamaa sitatxiti ikenakotaãkako ätsaãtxi. Hakeo atoko sitoakoro txiapatako oimiakori matinani. !Onirekari kãkiti mĩkapiritiniro oa, kotxi oimiakori kona auaika.

Exito Tixini Ikanapiriinina

¹⁹ Erotxi ipinaka atoko, Xosee Exito tixini auakasaaki, Teoso nitiri misākiretari iua itaponemoni. ²⁰ Itxari:

—Pōkitikaua, pimikanapiriãri amarini, inorokata Isaeo tixinimoni. Amarini kinirão okaka inakani kona auaika —itxari.

²¹ Ininiã Xosee mikanapiriãri amarini, inorokata Xotéia tōpamoni, Isaeo tixinimoni. ²² Txamari imarotakasaakiri Akirao, Erotxi ãkiri auĩtetxi ininiua irini tikini, Xosee pĩkari Xotéia tōpa auini. Ininiã Teoso nitiri iuaĩkana itaponemoni sãpiretari ätiãtaã isini ĩkapani. Ininiã Xosee, Maria, Xesosi pakini sari Kariréia tōpamoni Isaeo tixini. ²³ Nasaree sitatxiti kaikota itxana. Ia atoko itxa kitxakapirĩka Teoso sãkire sãpiretakani sãpiretakiti iaōka inini. Ninoa txari: Nimereẽkiti, Nasareekiri itxauako.

Xoão Kapatxisareri Sãpiretakiti

(*Marko 1.1-8; Arókasi 3.1-20; Xoão 1.19-28*)

3 ¹ Eereka Xesosi aneẽpe. Iusaaki Xoão kapatxisareri, ãparaã makipakaniãtaã Xotéia tōpa aua. Iuaã iua oerekari Teoso sãkire kãkitimoni. ² Iua txa:

—Himaerekani hĩtakanapako, kotxi Teoso mereẽkiti paĩtiki apokako iua ikinipoko auĩte ininiua ĩkapani —itxari Xoão.

³ Kitxakapirĩka Isaía inakori, Teoso sãkire sãpiretakari, sãpiretapekari Xoão pirena. Itxari:

Auako kiki ãparaã makipakaniãtaã. Isãpirenauatako. Itxariko:

“Hõeretariko kimapori Apiananiri apokini apisapanika.

Itĩkaãpo erekari hĩkamako iua napini ĩkapani,”

itxa Isaía kitxakapirĩka.

⁴Xoão takari mākaxi kamero piti kamakori. Kamero kākiti pira. Ipakiotsere aamata kamakori. Inikari txitxiri. Itximari mapaã itopakero. ⁵Kākiti Xerosareēkini, ikinimane Xotéia tōpakini, ikinimane Xotão tinikata auakani pakini sari ikenakotinirina ikapani. ⁶Iuaã ninoa sãpiretari Teosomoni maerekati ikamakitina, imaerekani imaktxakini ikapani. Eereka iua patxisatana Xotão uiniti.

⁷Txama Xoão atapakasaakina pariseoakori, satoseoakori pakini apokini iuamoni ipatxisatikona ikapani, iua txana:

—Imini katsiiri anaakorirai hite. Teoso misiritapitikai himaerekani xika. Himitekini !uari. Hinirekari hīpatxisatiko, txamari !hinirekari hītakanapiniri himaerekani. ⁸Hinirekiniāri himaerekani hītakanapini, ininiā hīkamariko erekari. Ikara atoko ininiā, hōerekari Teoso atão hītakanapiniri himaerekani. ⁹Hākixiniremoni !hīxinikapiri: “Teoso apakapapitikuauako ate, kotxi ate atokirini Apraãoni txaua,” !hītxapeko. Ari, nota sãpiretai hite, Teoso nirekiniāri, iposotari ia kai soroã Apraãoni mekaniriakori ikamini. Kona Apraãoni posotari anikinii Teosomoni. ¹⁰Aamina maereka iriti atoko hītxa. Teoso iposopeka hite ixipokini. Kākiti auari ikitaita kauanari aamina maereka iriti itokini ikapani. Ikinika aamina maereka iriti tokaākako. Xaminaã oka inaākanako. Teoso kamakiti iua atokokana itxa. Ininiā Teoso kitaita kauanapeka, aamina kotsa sauakiko tīkane. Iua atokokana ininiā, Teoso aiamatapeka hite ixipokini ikapani.

¹¹—Hite nipatxisata āparaã. Hīpatxisatiko oerekari maerekati hīkamakiti hītakanapapeka. Nota tikini apoākari patxisataiko hite Erekari Matamatakotiã, xaminaã pakini. Apiatakari itxaua iua. !Apakata iua takote napokini ikiti mata nimaktxakini ikapani, kotxi iua apiata. Nota poiãoka. Imaktxakari himaerekani, itxiko metao āki auakari arikini atoko. ¹²Katakareri āpokari ahoisi otãta imaktxakini ikapani. Otãta arikaãka. Oki nīkataãka ikiena nīkatikoãtaã. Iua atokokana Teoso nīkatariko kākiti erekarini. Maerekati kamakani arikaãkako xamina maxipoãkatia —itxa Xoão.

Xesosi Patxisatiko Pirena
(*Marko 1.9-11; Arókasi 3.21-22*)

¹³Iusaaki Xesosi potorika Kariréia tōpa. Isari Xotão uinitimoni, Xoão patxisatiniri ikapani. ¹⁴Txamari Xoão txari Xesosi:

—Pite nirekatari nota patxisatinii? !Apakata, kotxi pitemoni maerekati !uari. Notara nirekari pite patxisatinino nota —itxa Xoão.

¹⁵Xesosi apakapapiretari:

—Apakatapitika pipatxisatinino. Uatxa akamariko ikinika Teoso nirekaãkiti —itxa.

Ininiã Xoão:

—Ateeneka.

¹⁶Eereka ipatxisataãka atoko ikanĩkiĩta imiriĩ. Iuasaakipeka iaxiti takaka. Ininiã kãkiti atapari Erekari Matamatakoti katxakaãpotini kamao atoko inakari. Xesosimoni oãpoka. ¹⁷Eereka Teoso sãkirauata iaxiti:

—Pite namarite, nitiretakiti, napokaerekatai, kotxi ninirekakiti pikama —itxa Teoso.

Satanasi Nirekari Xesosi Kaminiri Maerekati

(Marko 1.12-13; Arókasi 4.1-13)

4 ¹Erekari Matamatakoti anikari Xesosi ãparaã makipakaniãtaã Satanasi atamakaerekatini ĩkapani. ²Iuaã Xesosi takanapari inipokotini Teoso imisãkiretini ĩkapani. Koarëta pokamara, koarëta ĩkanõkati pakini itakanapari inipokotini. Ininiã inatxikatani iuani.

³Ininiã iuasaakiika Satanasi apoka Xesosimoni. Iua katamakaerekareri itxaua. Itxari:

—Pite Teoso ãkiri pininiãua, ininiã ere kai soro komiri pitxĩkitaka —Satanasi txari Xesosi.

⁴Xesosi apakapapiretari:

—Kona nikamari pite paniãtakiti, kotxi Teoso sãkire iõkatsopatakori txari: Kona komirinanini txĩkitakari kãkiti ãtipirika auini tĩkane.

Ikiniika Teoso sãkirera txĩkitakari kãkiti ãtipirika auini tĩkane —itxa Xesosi Satanasimoni.

⁵Eereka Satanasi anikari Xesosi Xerosareẽmoni. Iua sitatxi akiritaãka Teoso nakiti. Satanasi anikari Xesosi Teoso misãkiretiko aikotimoni apiata õtano tsokitiri nopini. ⁶Ininiã Satanasi txari Xesosi:

—Teoso ãkiri pininiãua, pokaua xiti. Ininiã ikinipoko kãkiti imarotariko Teoso ãkiri pininiãua, kotxi Teoso sãkire iõkatsopatakori txari:

Teoso iokanatanako initiriakori iaxitikini pite inĩkatinina tĩkane. Ninoa maĩkai pimapinakani tĩkane, ininiã pikarouatini !auari. Kona kai soro karotari pikiti,

—itxa Satanasi.

⁷Xesosi apakapapiretari:

—Teoso sãkire iõkatsopatakori apaka txari:

Kona patamakaerekatapiri Apiananiri piTeosone.

⁸Eereka Satanasi anikari Xesosi ãtiãtaã iuaĩkana. Itano xiratarimoni anikari. Iuaã Satanasi oerekari ikini itixiti, ikiniika tiitxiti iuaã auakari pakini. ⁹Ininiã itxa:

—Pikapotoreẽkiniãua nota apisatoõ piteosonetinino, ininiã ikinika nisikaiko —itxa Satanasi.

¹⁰Xesosi apakapapiretari:

—Konapitini. Pisipeka Satanasi. Teoso sãkire iõkatsopatakori txari:
Apiananiri piTeosone, iuanokara piteosoneta. Iua
ĩkapaninokara piparĩkauatako

—itxa Xesosi.

¹¹Ininiã Satanasi takanapa txari iua. Ininiã Teoso nitiriakori iaxitikini apoka Xesosimoni inikatinirina ĩkapani, kotxi itapara !auaika.

Xesosi Mipotorikari Iparĩka Kariréia Tõpa

(Marko 1.14-15; Arókasi 4.14-15)

¹²Xesosi kenakoenetakasaakiri Xoão kapatxisareri kateia åki takiko, isari Kariréia tõpamoni. Nasaree sitatxitimoni isa. ¹³Ininiã eereka itakanapari Nasaree sitatxiti. Kapanaoõ sitatxitipeka aua itxa. Kapanaoõ, Kariréia poa takote, apaka Seporõ, Natarii pakini tõpati takote. ¹⁴Kitxakapirĩka Isaía, Teoso sãkire sãpiretakari sãpiretpekari, iuaã Xesosi auako. Ia atoko Teoso sãkire txapeka:

¹⁵Seporõ, Natarii pakini tõpati ipoa mitari takote, Xotão uiniti ipiniã. Kãkiti takauãkatari iua itixi, Kariréia tõpa. Xoteo minakaniua tixine itxaua. Iuaã Erekarı apokako. ¹⁶Ninoa kãkiti, ipiã auakani, !imarotari Teoso. Ipiĩkaniãtaã ninoa auanãta. Ninoa atamatariko tirikapi. Ikamara mitari. Iua tirikapi iopinipokotako ipiã auakani sauaki.

Ikara atoko itxa Isaía kitxakapirĩka.

¹⁷Xesosi apokasaaki Kapanaoõ sitatxiti, imipotorikari oerekarauatini. Ia atoko itxa:

—Himaerekani hĩtakanapa, kotxi iposope Teoso hĩauĩte ininiua — Xesosi txana ikinipoko kãkiti.

Xesosi Akiritari Ipi Ipi Pakini Kokatsaãriti

(Marko 1.16-20; Arókasi 5.1-11)

¹⁸Xesosi Kariréia poa tiniã itĩpokotakasaaki, itikari ipi kiki, Simão Petro inakori, itari Åtree inakori pakini. Itakanãtarina hetxi. Kokatsaãriti itxauana. ¹⁹Ininiã Xesosi akiritana ninoa:

—Masa notakata. Hĩtakanapariko hõkatsaãtini parĩkatxiti. Noerekaiko hĩte Teoso sãkire hõerekini ĩkapani, kãkiti imarotini ĩkapani —itxa Xesosi.

²⁰Ininiã iuasaakiika ninoa takanapari okatsaãtinina. Xesosikata sa itxana.

²¹Apikomoni itĩpokotakasaaki, atamatana Txiako, Xoão pakini. Sepeteo anaakori itxauana. Ninoa irikata kanauã auanãta. Ihetxina iotsaãnãtana.

Ininiã Xesosi akiritana ninoa. ²²Iuasaakipeka itakanaparina iri, kanaua pakini. Xesosikata sa itxana imoianatinirina ikapani.

Xesosi Amianatakani Imakananitini

(Arókasi 6.17-19)

²³Xesosi sari ikini Kariréia tōpamoni. Aiko Xoteoakori apotiitiniãtaãua isa. Iuaã isãpiretana Teoso iokanapirena erekari, Teoso kãkiti auïte inini pirena. Apaka erekapeka itxikitakana amianatakani. ²⁴Xesosi kamakiti, apaka isãpiretakiti, iaripiretapeka ikinika Sírria tixini. Ininiã kãkiti minana itomaneri amianatakani iuamoni. Ikini sereti amianari auakini sari iuamoni. Kãkiti maerekati matamatakoti Satanasi nitiri auaitotakiti apoka iuamoni. Apaka kãkiti mapitxiritakani apoka. Apaka titinanakakari amianariti auakini apoka. Apaka kãkiti maposota tipokotakani pakini apoka Xesosimoni. Ikinikana erekape itxikitakana ninoa. ²⁵Itomaneri sari iua tikini. Kãkiti Kariréiakini, tesi pakini sitatxitikini, Xerosareëkini, kãkiti Xotéia tōpakini, Xotão uiniti ipiniãkini pakini sari iua tikini.

Xesosi Sãkirauata

Ixirata Auïte Nopini

(Kapítoro 5, 6, 7)

5 ¹Xesosi itomaneri kãkiti atapakasaaki, ixirata nopini isa, topãka itxa oerekarauatini ikapani. Imoianariakori apotiitaua iuamoni. ²Iuasaaki oerekana ia sãkiretxiti:

Kirimonipa Teoso Sikatari Erekarí?

(Arókasi 6.20-23)

³—Teoso takari erekari kãkitimoni, ia atoko inakanimoni. Ninoa nirekari Teoso nireëkiti ikaminina, iuaritika imarotarina !iposotarina Teoso nireëkiti ikaminina, ininiã amanaärina Teoso sikaposotiiretinina ninoa. Teoso takari erekari kãkiti ikara atoko inakanimoni. Ninoa sari Teoso auïtetxi ininiãtaãua.

⁴—Teoso takari erekari kãkitimoni, ia atoko inakanimoni. Mítxi ninoa txiapata imaerekanina xika. Ininiã eereka Teoso mĩkapiritana ninoa, amarini mĩkapiritiko atoko.

⁵—Teoso takari erekari kãkitimoni, ia atoko inakanimoni. Pataparaxinirena ninoa, iuaritika litxitarina ãti. Iamoníkarina ãti. Teoso sikapanikariko ikinika itixi ikara atoko inakanimoni.

⁶—Teoso takari erekari kãkitimoni, ia atoko inakanimoni. Ninoa iteene nirekari erekarinoka ikaminina. Nipokori inirekinina atoko,

ãparaã inirekinina atoko, ninoa iteene nirekari erekari ikaminina. Ininiã Teoso sikana ninoa ikinipoko erekari inirekakitina.

7—Teoso takari erekari kãkitimoni, ia atoko inakanimoni. Ninoa amonĩkari ninoa misiritakani, ininiã iua atokotxikana Teoso amonĩkanako ninoa kaamonĩkarerini.

8—Teoso takari erekari kãkitimoni, ia atoko inakanimoni. Ninoa kamari Teoso nireẽkitinoka, ininiã ninoa aõkitariko Teoso.

9—Teoso takari erekari kãkitimoni, ia atoko inakanimoni, kauaĩrerinimoni. Ninoa parĩkauata neenamatz xipokini ĩkapani. Ininiã ninoa akiritaãkako Teoso anaakori.

10—Teoso takari erekari kãkitimoni, ia atoko inakanimoni. Ninoa kamari erekari, ininiãkara apanakini kãkiti misiritana. Ninoa erekari kamakani auako Teoso auĩtetxi ininiãtaãua.

11—Teoso takari erekari hĩtemoni, apanakini misiritakasaakii, imisãkirepiretakasaakii, aãpirena ikamakasaaki hĩtemoni nota sãkire hãuikini xika. ¹²Poxokonoka hĩtxako, kotxi Teoso sikai hĩparĩka ĩki ito, itixine hãpokasaaki. Hĩte misiritiko atokokana Teoso sãkire sãpiretakani kitxakapirĩka misiritaãka, ininiã hĩpoxokoniuatako —itxa Xesosi.

Iõkira Pirena

(Marko 9.50; Arókasi 14.34-35)

¹³Iuaĩkana Xesosi sãkirauata:

—Iõkira erekaro atoko hĩtxaua ikinimane ĩkapani. Iõkira matxoatapeka onakasaaki, ininiã !apakata otxoa kanapiriini iuaĩkana. Ininiã oõkaãka. Kãkiti kitakaro, kotxi kona otxaika.

Tirikapi Pirena

14—Tirikapi atoko hĩtxaua ikinimane kãkiti ĩkapani. !Hĩposotari hĩkipatiniri sitatxi xirata nopini auakari, kotxi ikinimane atamatariri tirikapi. ¹⁵Kãkiti !itakari tirikapi kopiti ãki. Itakarina itano ikini aapokotxiti iopinikini ĩkapani. ¹⁶Iua atokokanera hĩtxako, kotxi erekari hĩkamakiti tirikapi kamara atoko itxa. Erekarinokara hĩkamako. Ininiã apanakini atamatariri erekari hĩkamakiti. Ininiãra itxarina aĩri iaxitikirimoni: “Peerekai pite.”

Teoso Sãkire Moisesi Apakapakiti

¹⁷Iuaĩkana Xesosi sãkirauata:

—Kona hĩtxape: “Xesosi xipokariko Teoso sãkire Moisesini apakapakiti,” kona hĩtxape. Apaka, “Kitxakapirĩka Teoso sãkire sãpiretakani sãpiretakiti Xesosi

xipokako,” kona hĩtxape. Kona ikara inakari !nixipoka. Nota ina ikinipoko ninoa sãpiretakiti nikamini ĩkapani. ¹⁸Atãopitika ikinika Teoso sãkire apokako. Kona xatiki Teoso sãkire iõkatsopatakori kona xipoka. Iaxiti, itixi pakini xipokini apisa Teoso sãkire lixipoka. Apokapitikako imakinika isãkire. ¹⁹Teoso sãkire ipaniãtakiti apiari aua, apaka poiãori aua. Kãkiti makamakaniãri ikinika Teoso sãkire, oerekiniãri apanakini ikinika Teoso sãkire imakamakani ĩkapani, poiãori itxaua Teoso auĩtetxi ininiãtaãua. ãti kãkitipekana, ikaminiãri ikinika Teoso sãkire, oerekiniãri apanakini ikinika Teoso sãkire ikamini ĩkapani, apiari itxaua Teoso auĩtetxi ininiãtaãua. ²⁰Ia nisãpiretai. Kaiõkatsopareriakori, pariseoakori pakini ĩkamari atão inakari Teoso nireẽkiti. Ininiã hĩte kaminiãri ninoa atokotxikana, !hãuiritãka hĩiroini Teoso auĩtetxi ininiãtaãua. Atão inakari Teoso nireẽkiti hĩkaminiã, hĩiroãpitika iuaã.

Omanãkaretxi Pirena

²¹—Hĩte imarotari kãkiti kitxakapirĩka sãpiretaãka. Ia atoko inaãka: “Kona apanakini hõkape. Kokaniri anikaãkako imisiritikomoni,” inaãka kitxakapirĩka. ²²Uatxa apikomoni nota sãpiretaiko hĩte. Maxikatĩka pomanatiniãri pitari, panikaãkako pimisiritikomoni. Pite napetiniãri pitari, ininiã auĩtetxiakori misiritapitikai. Pakiritiniãri pitari: “Kĩĩkitei,” ininiã pimisiritiko paĩtiki apokako. Nota txai hĩte, kona erekari kokaniri. Iua atokokana kona erekari hinaperauatini. Hinaperauatiniã, ininiã maerekani misiritikoãtaã hĩsapitikako.

²³—Ininiã hĩsikasaaiki Teoso apisatoõ hĩsikakiti hĩsikini ĩkapani, iuasaaki hĩxinikari hĩtari homanatakiti. ²⁴Iuasaakiika hĩtakanapariko hĩsikakiti iuaã hĩsikiniri apisa. Hĩsako katimaritika homanatakitemoni. Himisãkiretari, homanãkare hĩxipokini ĩkapani. Iposo atoko kanapiriã, hĩsikakiti tĩkane sika hĩtxako Teosomoni —itxa Xesosi.

²⁵Iuaĩkana Xesosi sãkirauata:

—Kãkiti kinirão apoĩtakiniãi, ininiã pimisiritiko mereẽkarimoni iua anikinii apisapanika, katimariã pisa iuamoni. Pimisãkiretari iua, kotxi pimisiritiko mereẽkari sikaiko pite pimisiritakirimoni. Ininiã eereka iua takai kateia ãki. Iuaã pikaikotako. Ininiã apisapanika pimisãkiretariko iua pomanatakiri. ²⁶Atão nisãpiretai, kona posipikari kateia ikinika pimisiritiko mereẽkari paniãtakiti pimiĩkitxitanisaaki —itxa Xesosi.

Kipa Txĩkitakai Maerekati Pikamini?

²⁷Xesosi apikomoni sãkirauata:

—Hĩte imarotapekari kitxakapirĩka sãpiretakori: “Pĩtanoro minakotokatika kona pisirĩkape.” ²⁸Kitxakapirĩka ikara atoko

itxama. Nota sãpiretaiko hĩte apikomoni. Sito atamatakari kinirão oakata sirĩkaka inakari, iuara kamapekari maerekati ãkixinireẽ. ²⁹Kona paunitapiri maerekati pikamini txĩkitaãkari pitekata ikaikotini. Patamatakiti txĩkitakiniãi maerekati pikamini, pimakatxakari poki, oka pitxari, kotxi maerekati pikaminiã, maerekani misiritikoãtaã pokaãkako. Apiaerekata Teosokata ãtipirika pauini ãti pokinoka pauini. ³⁰Piuako pikikomoni auakari txĩkitakiniãi maerekati pikamini, ininiã pisauaka, oka pitxa, kotxi maerekati pikaminiã, maerekani misiritikoãtaã pokaãkako. Apiaerekata mauakotikai pauini ãtipirika Teosokata. Kona paunitapiri maerekati kaikotini pitekata. Pitakanapariko maerekati.

Kiki Ītanorokata Itakanapakini

(Mateo 19.3-9; Marko 10.2-12; Arókasi 16.18)

³¹—Kitxakapirĩka ia atoko itxa sãkiretxi:

Pĩtanoro pitakanapiniã, aãtsopa pisika oamoni ĩtanorotxi takanapiko aãtsopati.

³²Iuaritika nota sãpiretaiko hĩte, !hĩtakanapaperoko pĩtanoro. Pitakanapiniãro, ininiã maerekati pikamapitika, kotxi eereka oa atxiĩti nirekakari ãti kiki. Ininiã iuasaaki oa kamari maerekati apaka pite xika. Apaka oa takakari kamari maerekati. Apakata pitakanapiniro pĩtanoro, ãtikata osirĩkiniã —itxa Xesosi sãkire.

Atãopitika Inakari Sãkiretxi

³³Iuaĩkana Xesosi sãkirauata:

—Hĩte imarotapekari kitxakapirĩka sãkiretxiti. Ia atoko itxapaniko: “Hĩkamariko imakinika hĩkamaenetakiti. Hĩkamariko hĩkamaenetakiti Teoso ĩkapani,” itxa. ³⁴Notara sãpiretai hĩte apikomoni: “Nikamapitikariko,” pinakasaaki, !pakiriũkatapiri Teoso tixine uãka, kotxi iuaã Teoso auĩtetxi ininiãtaãua. “Nikamapitikariko,” pinakasaaki, kona apikomoni pakiritape. ³⁵“Nikamapitikariko,” pinakasaaki, !pakiriũkatapiri itixi uãka, kotxi Teoso uai aua apaka. “Nikamapitikariko,” pinakasaaki, !pakiriũkatapiri Xerosareẽ uãka, kotxi auĩtetxi Apiananiri sitatxine itxa. ³⁶“Nikamapitikariko,” pinakasaaki, !pakiriũkatapiri pikii uãka, kotxi !apakata pitxĩkitakiniri piãko pomama inini, kasarori inini. Ātika piãko kona piposotari pitxĩkitakiniri kasarori inini, pomamari inini. ³⁷“Ari,” pinakasaaki, pikamapitikariko. “Kona,” pinakasaaki, kotxi kona piposotari pikaminiri. Kona ãti sãkiretxi !pikamape. Maxikatiũka kamakori sãkiretxiti Satanasi sãkire itxaua —itxa Xesosi.

Xikatxitakaniua Pirena

(Arókasi 6.29-30)

38 Xesosi oerekarauatapanika:

—Ia atoko kitxakapiríka sákiretxiti: “Neenamatzisaaki áti makatxakiniári poki, pixikatxitariko. Iuasaaki pimakatxakariko iua oki apaka. Pitsiríi pataka áti kákiti xika, pixikatxitariko. Iuasaaki iua tsiríi apaka pimapatakako,” itxa sákiretxi kitxakapiríka. ³⁹Txamari nota sápiretaiko híte apikomoni. Kona hīxikatxitapiri maerekati hītemoni auakasaaki. Áti aritiniári pitoō, ininiā pikirioka ipinitoō iaritini íkapani. ⁴⁰Atxiiti áti nirekari anikinii pimisiritiko mereēkarimoni, kotxi iua nirekari pite sikiniri pimāka iuamoni iua txineirote pimasikakani xika. Ininiā anikinii apisapanika, pisikariko pimāka inirekakiti, apaka apikomoni áti pimāka. Ikara atoko hīkamako. ⁴¹Ia áti sákiretxiti: Áti paniātiniāi itii panikini áti ōti, ininiā ipi ōti panikari itii. Poerekariko pitiraōki. ⁴²Atxiiti áti amanaāi pitii, ininiā pisikariko iuamoni inirekakiti. Iua amanainiāi pitii “Akamoni iuaíkana !nisikai,” ininiā iuasaaki pisikariko iuamoni —itxa Xesosi.

Pomanatakini Pitiretini

(Arókasi 6.27-28, 32-36)

43 Iuaíkana Xesosi sákirauata:

—Hīkenakotapekari ia sákiretxiti: “Hītiretariko hinirimane. Homanatariko himokaiakari.” Ikara atoko kitxakapiríka auari. ⁴⁴Ikara atoko itxama. Nota sápiretaiko híte ipinimoni. Kona homanatapiri himokaiakari. Hītiretariko iua apaka. Hamanaári Teoso híte omanatakani erekari isikini íkapani.

⁴⁵Apakatapitika amokaiakarimoni erekari akamini, kotxi Teoso kamari atokatxi kákiti erekarini auiniātaā iopinikini íkapani, apaka maerekani auiniātaā iopinikini íkapani. Iua iokanatarí āparaā atāo inakari kamakanimoni, apaka atāo minakati kamakanimoni. ⁴⁶Híte tirketakaninani hītiretiniā, kinirepa Teoso sikari erekari hītemoni hinirimanenokara hītiretakasaaki? Kotxi kákiti maerekati kamakani apaka tirtetari ninoa tirketakani. ⁴⁷Híte misákiretakaninani himisákiretiniā, kákiti Teoso mimarotakani atoko hītixa, kotxi ninoa misákiretakani imisákiretana. ⁴⁸Ikinipoko hīri iaxiti auakari kamakiti erekari, ininiā iua atokokana hītixikitakariko ikinipoko híte kamakiti erekari —itxa Xesosi.

Xesosi Oerekari Teoso Sikiko

6 ¹ Iuaíkana Xesosi sákirauata:

—Erepaniko. Erekari pikamakasaaki, kona pikamapiri piuikiniua íkapani, erekari pikamakiti apanakini imarotini íkapani. Pikaminiári erekari

apanakini apokaerekatini iċapani, kona papakapari piparċka ĩki iaxiti, aĩri iaxiti auakari sikakiti. ²Aua kãkiti ia atoko inakari. Ikamakiti atxiĩti erekari, txamari ixinikakiti kona erekari. Kãkiti ikara atoko inakari sikarauatakasaaki minakati matiitimoni aiko Xoteo apotiitiniãtaãua, apaka mapara kãkiti napiniãtaã, inirekarina ikinimane itikiniri erekari ikamakitina. Inirekarina kãkiti iuikinina. Ikara atoko !pitxape minakati matiitimoni pisikarauatakasaaki. Pixinikariko ia: Ninoa apakapapekari ikinika erekari kãkiti sikakiti, txamari !apakaparina erekari Teoso sikakiti. ³Pisikarauatakasaaki minakati matiitimoni, kona pauiritapiri piuako pisaneremoni auakari imarotiniri piuako pikikomoni auakari sikakiti. ⁴Ikara atoko ininiã, pitenani imarotari pisiãkiti. Piri iaxitikiri, ikinipoko atamatakari, iikitxitaiko kãkiti apisatoõ —itxa Xesosi.

Teoso Misãkiretiko Pirena

(*Arókasi 11.2-4*)

⁵Iuaĩkana Xesosi sãkirauata:

—Teoso himisãkiretakasaaki, kona hĩkamapiri kamisirienereri atoko hinini. Ninoa potxitari itiminina aiko Xoteo apotiitiniãtaãua, kimaporĩã apaka, Teoso imisãkiretini iċapani. Ininiã ikinimane itikana. Hĩxinikari. Ninoa apakapapekari poxokonitxi uai iċorapokoriti auakari. Txamari ninoamoni atão poxokonitxi !uari. ⁶Teoso pimisãkiretakasaaki, pisa pitenani auiniãtaã. Kona pauiritapiri ãti kaikotini pitekata Teoso pimisãkiretakasaaki. Iuaã pimisãkiretari piri matamatakoti. Iuaã iua atamataiko pite. Eereka isikaiko erekari iaxitikiri.

⁷—Teoso pimisãkiretakasaaki, pimixinikariko pisãkire. Maxikatĩika kona pisãkirauatape iuakata. Teoso sãkire mauiãkati xinikari Teoso kenakotiniri isãkire kotxi kaiãori isãkire. ⁸Ikara atoko !pikamape pimisãkiretakasaakiri iua, kotxi pisãkirauatini apisapanika Teoso imarotapekari pinirekakiti. ⁹Ia atoko hĩtxako Teoso himisãkiretakasaaki:

“Aĩri iaxiti auakari, ate nirekari piuãka paxitiko.

¹⁰Anirekari ikini itixiti auakani auĩtetinĩi pite. Pite tixine pinireẽkiti kamiko atokokana, anirekari pinireẽkiti kamiko iċorapokoriti,

¹¹Nipokori ikiniõtika pisikauako.

¹²Pimaxinĩkaretariko maerekati akamakiti. Maerekati atemoni kamakori amaxinĩkaretini atokokana pimaxinĩkaretariko.

¹³Kona panikapeua aãtaerekatikomoni. Pisikakauako ate, maerekati sauaki aãuakasaaki. Ikara atoko piposota, kotxi pitenanira auĩtetxi txaua. Pitenanira kaposotiire. Ætipirika peerekai pite. Ameẽ.”

Ikara atoko hĩtxako Teosomoni.

14—Pimaxinĩkaretiniãri maerekati ãti kamakiti pitemoni, ininiã piri iaxiti auakari maxinĩkaretari maerekati pite kamakiti apaka.

15Pimamaxinĩkaretakaniãri maerekati ãti kamakiti pitemoni, ininiã piri iaxitikiri kona maxinĩkaretari maerekati pite kamakiti apaka —itxa Xesosi.

Nipokori Takanapiko Pirena

16Iuaĩkana Xesosi sãkirauata:

—Aua kãkiti ia atoko inakari. Ikamakiti atxiĩti erekari, txamari ixinikakiti kona erekari. Kãkiti ikara atoko inakari takanapari inipokotini Teosokata isãkirauatini ĩkapani. Txamari ninoa nirekari ikinimane imarotniri itakanapinirina inipokotinina, kãkiti iuikinina ĩkapani. Ininiã ninoa matinaniuata itooãna ikara kãkiti imarotini ĩkapani. Atão nitxai, ninoa apakapapekari ikinika erekari kãkiti sikakiti, txamari !apakaparina erekari Teoso sikakiti. Kona ikara atoko !pitxape nipokori pitakanapakasaaki Teoso pimisãkiretini ĩkapani. 17Hĩte ikara atoko !hĩkamape. Hinipokotini hĩtakanapakasaaki Teoso himisãkiretini ĩkapani, hãrokatoõtaua. Hõeretari hiãko. 18Ininiãkara apanakini !imarotari hĩtakanapiniri hinikini. Ininiã hĩri matamatakoti, iuananira itikariko hĩkamakiti, apanakini mimarotakiniti, ininiã isikaiko hĩparĩka ĩki —itxa Xesosi.

Pitiretakiti

(Arókasi 12.33-34)

19Iuaĩkana Xesosi sãkirauata:

—Maxikatiĩka kona papotiitapiri pitiretakiti uai auakari, kotxi atxiĩti kamara nikari pitii. Atxiĩti oerẽkata. Atxiĩti kiĩtiriri ĩtirĩkari iua. 20Ikara atoko kona pikamape. Papotiitariko pitiretakiti Teoso tixineẽ, kotxi iuaã !auari kamara. Iuaã tiitxi !oerẽkata. Kona ixipoka. Kiĩtiriri !ĩtirĩkari iua. 21Pitiretakiti auiniãtaã, iuaã pixinikapika. Iuaã pinirekari pauini —itxa Xesosi.

Tirikapi ĩtotxiãkiri Pirena

(Arókasi 11.34-36)

22—Poki tirikapi atoko itxa piĩto ĩkapani. Poki ereka inakasaaki, ipinikare aua pãkixinireẽ, ininiã pinireẽkiti imakinika erekari. Erekarinokara patamatiniã, erekari pixinire. 23Txamari poki oerekasaakii maerekati pikamini, ipiã apoka pãkixiniremoni. Iuasaaki tirikapi kamara na xatiki !auari pitemoni —itxa Xesosi.

Ipi Auñtetxi Pirena
(*Arókasi 16.13; 12.22-31*)

24 Iuaĩkana Xesosi sākirauata:

—!Apakata kākiti parĩkauatini ipi iauñtena ĩkapani, kotxi atxiĩti ãti omanata, ãti itireta. Atxiĩti ãti apokaerekata, ãti inorita. Iua atokokana kākiti kona posotari iparĩkauatini tiĩtxi ikinipoko iamotini ĩkapani, Teoso ĩkapani iparĩkauatakasaaki. !Apakata piauñtetiniri Teoso, txineiro piauñtetakasaaki.

Teoso Nĩkatiniua Ate
(*Arókasi 12.22-31*)

25—Ininiã nitxai: Pinirekari nipokori, iãriã pakini auãki pinini ĩkapani. Apaka pinirekari mãkatxi piĩto ĩkapani. Ikara pinirekini xika maerekaxiniretika kona pitxape. Erekarĩ nipokori. Apiaerekata pixinire. Erekarĩ mãkatxi. Apiaerekata piĩto. Ininiã ãtipirika !pixinikapiri nipokori, mãkatxi pakini pinitini. 26 Kona pipĩkarauatape nipokori poião auakasaaki. Pixinikariko kotipiriki. Kona ninoa takarauata. Kona apotiitari ikiena. Kona ipotetari ikiena. Iuaritika piri iaxitikiri sikakienatana ninoa. Ininiã ninoamoni nipokori !ixipoka. Teoso apia xinikai hĩte. Ininiã kona pipĩkarauatape. 27 Kinirepa maerekaxiniretinoka pitxa? Pimaerekaxinirene litxĩkitakai apikomoni ãti oara pauini.

28—Kinirepa maerekaxiniretinoka pitxa pimãka pinirekini xika. Aãui pixinikako. Kona aãui parĩkauata. !Ikamari imãka, iuaritika aãui peereri. 29 Kitxakapirĩka auñtetxi Saromão inakori, iteene katiiri itxaua. Kaiãori imãka ereri, iuaritika apia ereri ikinika aãui. 30 Aãui !okanani aua. Uatxa aua. Katana ikatikata iotikaãka. Iuaritika Teoso nĩkatari aãui. Ininiã apiata inĩkatai hĩte. Ikamamãkatapitikai. Poiãonoka hĩte auikari Teoso sãkire. Ikara xika maerekaxiniretinoka hĩtxa.

31—Ininiã maerekaxiniretinoka kona hĩtxape. “Kipa ninika? Kipa niãta? Nãpa napokari mãkatxi?” kona hĩtxape. 32 Teoso sãkire mauĩãkani maerekaxiniretinoka itxana ikara atoko. Piri iaxiti auakari imarotari pinirekaãkiti. Ininiã maerekaxiniretika !pitxape. 33 Merepitipanika pinirekariko Teoso piauñte ininiãua. Iua nireẽkiti pinitako, ininiã atão inakarinoka pikamako. Ikara atoko inakari pikaminiã, pite nirekakiti apaka isikaiko. 34 Maerekaxiniretinoka kona pitxape katana pinirekakiti pixinikini xika. Pinirekakiti auapitikako katana, iuaritika mitxipanika kona pixinikapiri ikara maerekaxiniretika, kotxi ikiniõtika aua ikara atoko inakari —itxa Xesosi.

Apoïretxi Pirena

(Arókasi 6.37-38, 41-42)

7 ¹Iuaïkana Xesosi sákirauata:
 —“Kona erekari pikamakiti,” kona pitxape átimoni, ininiákará Teoso kona txai pite: “Kona erekari pite kamakiti,” !itxai, ²kotxi Teoso misiritai pimaerekani xika, áti pite misiritini atokokana. Iteene pimisiritiniári áti imaerekani xika, iteene Teoso misiritai pite, pite maerekani xika. ³Ikara ia atoko. Pisápiretari áti: “Aásoro aua poki áki,” txamari kona pimaákatari aátxirata pite oki áki auakari. Kinirepa ikara atoko inakari pikama? ⁴!Apakata pisákire pitarimoni: “Pauritano aásoro poki áki auakari nimaktxakini.” Ikara atoko pininiá !erekari, kotxi aátxirata aua pite oki áki. ⁵Maerekati kamakarii pite, kotxi pikamakiti erekari atxiíti, txamari maerekatínoka pixinikakiti. Pimaktxakariko aátxirata pite oki áki auakari merepanika, ininiá eereka apakata patamatiniri aásoro pitari oki áki auakari pimaktxakini. Ikara oerekaua piteka maerekani auakasaaki, pitakanapariko piteka maerekani, ininiá eereka apakata pimoianatiniri áti iua maerekani itakanapini íkapani.

⁶—Kákiti kona sikari Teoso nakiti anápanoni, kotxi atxiíti iua anápa kirioka, akatsata txai. Iua atokokana Teoso nakiti kona asika Teoso mapaxitakatimoni, kotxi iua anápa atoko. Eereka iua misiritapitikai.

—Apaka kona pinoakitsa ereri kona pisika irarimoni, kotxi iua katxaratarí. Iua atokokanera Teoso mapaxitakanimoni kona hisikari Teoso nakiti, kotxi eereka imisiritari Teoso nakiti noakitsatxi irari misiritini atoko —itxa Xesosi.

Kona Hítakanapiri Teoso Himisákiretini

(Arókasi 11.9-13)

⁷Iuaïkana Xesosi sákirauata:

—Teosomoni pamanarauatakasaaki, papakapariko pinirekakiti. Pinitarauatakasaaki, papokapitíkariko pinireékiti. Aíri iaxitíkirí pakiritiniá, iua apakapapiretai. Ia atoko itxako: “Pikanikauata. Píïroá,” itxako. ⁸Íkinika amanarauatakari apakapariko inirekakiti. Nitarauatakari apokariko inítakiti. Teoso akiritakari apakapaákapitíakako. ⁹Amarini amanainiári iri komiri, atauako kai sorokani isikatarí imi? ¹⁰Ximaki amanainiári, atauako iminikani isikari? Konapitini. Irítxi kona kamari ikara atoko inakari. ¹¹Kákiti maerekani apaka imarotari erekari isikini amaritenamoni. Aíri iaxitíkirí apiata imarotari isikiniri erekari iua anaakorimoni, ninoa amanaákasaakiri.

Ãti Pitiretini Pirena

12—Pixinikariko. Natokopa pinirekari apanakini tiretinii pite? Ininiã iua atokokana pitiretariko apanakini. Ikara atoko itxa ikinika Teoso paniãtakiti aãtsopaã auakari, apaka Teoso sãkire sãpiretakani sãpiretakiti kitxakapirĩka —itxa Xesosi.

Ipi Kimapori Pirena

(*Arókasi 13.24*)

13Iuaĩkana Xesosi sãkirauata:

—Teoso tixine hiĩroã axapitiri ãronakikoãtaã. Mitari ãronakikoãtaã sikari sari maerekani misiritikoãtaã. Iua kimapori mitari, kotxi itomaneri kãkiti sari iuaã. 14Axapitiri ãronakikoãtaã, kimapori axapitiri. Iua apo sari auapininiika inini tixinemoni. Iua kimaporiti axapitiki, kotxi poiãoka kãkiti sari iua kimaporiti —itxa Xesosi.

Omina, Ori Pakini Pirena

(*Arókasi 6.43-44*)

15Iuaĩkana Xesosi sãkirauata:

—Erepaniko. Auapitika Teoso sãkire sãpiretakari, txamari iua na atão isãpireta, kotxi isãpiretari iua sãkire Teoso sãkirekata. Ikoketari. Atão inakari ikoketa maerekatikata. Erepaniko. Pamonoãkoniri iua. Mapara patamatakasaakiri, soti auĩte atoko itxa. ãkixiniremoni ãkiti atoko itxa. 16Pimarotari kãkiti ikara atoko inakari, kotxi patamatari ninoa kamakiti maerekati. Inako mina kona iritari kĩpaima. Aanaia kona iritari pama. Iua atokotxikana kãkiti maerekati kamakani kona kamari erekari. 17Ikinika aamina erekari, erekari iri. Aamina maerekati, ininiã maerekati iri. 18Aamina erekari kona posotari maerekati iritini. Iua atokokana aamina maerekati kona posotari erekari iritini. 19Aamina maereka iriti itoãka, arika inaãka. 20Ininiã aamina iriãra kãkiti imarotari ereka inini. Iua atokokanera kãkiti imarotaãka —itxa Xesosi.

Kãkiti Teoso Tixine ãroãkani

(*Arókasi 13.25-27*)

21Iuaĩkana Xesosi sãkirauata:

—Apanakini txano nota: “Pite niauĩte” inakani, lisapanina Teoso auĩttxi ininiãtaãua. Niri iaxiti auakari nireẽkiti kamakarinanira sapaniko iuaã. 22Itixi xipokini õtisaaki, itomaneri kãkiti maxikatũka akiritano: “Pite aãuĩte apiatakari. Papakapaua. Aõerekapekari pisãkire apanakinimoni. Aõmitikapekari maerekati

matamatakoti piuãkaã. Akamapekari posotiiretxi kaiãopokori,” itxanako ninoa. ²³Txamari nitxanako: “Kona nimarotai hite. Hiãipiniikaua. Maerekatira hĩkama.” Ikara atoko nisãpiretanako ninoa, kotxi maerekati kamakani itxauana —itxa Xesosi.

Aapokotxi Kamakari

(Arókasi 6.46-49)

²⁴Iuaĩkana Xesosi sãkirauata:

—Nisãkire kenakotakari, nisãkire nĩkaenetakari, ia kiki kimaroreri atoko itxa. Ia kiki kamakasaakiri aapoko, iopitimita aapokotxi tsota. Otsomori ikama. ²⁵Ininiã ãparaã kipakasaaki, uini apoãtakasaaki, ĩtima apisatakasaaki, aapoko kona irika, kotxi iua tsota itakapekari otsomori. Nisãkire kenakotakani nisãkire nĩkaenetakani, iua kiki kimaroreri atoko itxana.

²⁶—Nisãkire kenakotakari, nisãkire miinĩkaenetakati, kãkiti miĩkiteti atoko itxa. Iua kamari aapoko ikipatxiteẽ. ²⁷Ikipakasaaki, uini apoãtakasaaki, ĩtima apisatakasaakiri, aapoko irika. Irika, kotxi aapokotxi !otsomori. Poião tsoimikari. Irikasaaki, ikinika xipoka. Ikara atoko itxa nisãkire miinĩkaenetakati. Iua imarotapitikamari, txamari !ikamari. Ikara atoko nisãkire mapaxitakani —itxa Xesosi.

Xesosi Posotiire Pirena

²⁸Xesosi oerekaruatini xipoka atoko, kãkiti xinikari: “Paimatireri Xesosi. Iua imarotari atão.” ²⁹Ikara atoko ixinikana, kotxi Xesosi imarotapitikari Teoso sãkire oerekini. Kaposotiireri iua isãkirauatakasaaki. Kaiõkatsoparerini atoko kona itxa. Ninoa kona imarotari Teoso sãkire Xesosi imarotiniri atoko.

Kiki Maere Matati

(Marko 1.40-45; Arókasi 5.12-16)

8 ¹Xesosi ixirata iokiriĩtaka atoko, itomaneri kãkiti sari iua tikini. ²Iuasaaki amianatakari maere matati apoka iuamoni. Ikapotoreẽkaua iua apisatoõ. Itxari:

—Nimarotari pinirekiniã, erekapeka pitxĩkitakano nota —itxa.

³Xesosi maãtakari iua. Ininiã itxa:

—Ari, ninirekapitikari. Erekapekai —itxari.

Iuasaakipeka erekapeka itxa. ⁴Ininiã Xesosi:

—Kona ikora !pisãpiretape apanakinimoni. Uatxa sasetotximoni pisa. Poerekaua iuamoni erekapeka pinini. Moisesini paniãtakiti atoko pikama. Pikaminiãri ipaniãtakiti atoko, ininiã ikinimane imarotari erekapeka pinini —itxa Xesosi.

Eereka isari Xesosi paniãtakiti ikamini ĩkapani.

Sotato Auíte Nitiri Makananitiko

(Arókasi 7.1-10)

⁵Kapanaoõ sitatxiti apokasaaki, sotatoakori auíte sari Xesosimoni. Homano itxaua. Iua iteene amanaãri Xesosi:

⁶—Xesosi, ninitiri iteene amianata naapoko. Ikikinanaka. !Itĩpokotaika. Inikoriãtsiitari —itxari Xesosi.

⁷Ininiã Xesosi:

—Iuaã nisako erekape inini ĩkapani —itxa Xesosi.

⁸Ininiã iua Homano:

—Konapitini. Pite auĩtetxi apiatakari pitxaua. Nota poiãorino. !Apakata naapoko piĩroini. Pisãkirenani piokanata. Ininiã erekapeka itxako ninitiri. ⁹Nimarotari ikananani apakatako, kotxi nota kamari nota auíte paniãtakiti. Apaka sotato auíte nitxaua nota. Nisãkirauatakasaaki, nisotatone kamapitikari nipaniãtakiti. Nota txari: “Pisa.” Iuasaakipeka isa. Nitxari ãti: “Pina.” Iuasaakipeka ina itxa. “Ia pikama,” nitxari ninitiri. Iuasaakipeka ikamari. Ininiã pisãkirenani apakatapitika —itxari Xesosi.

¹⁰Isãkire Xesosi kenakotakasaaki, iteene ipotxitari isãkire. Iposo atoko itxa:

—Atão nitxai. Isaeo auakani poião auikari nisãkire. Ia Homano itxaua, iuaritika apiata iua auikari nota posotiire. Kona nitikapanikari kãkiti Isaeo auakari auikiniri nisãkire ia kiki auikiniri atoko. ¹¹Nota sãpiretai hĩte, itomaneri kãkiti ãti uãka atokatxi pokĩkini tixinimoni auakani, atokatxi ereẽkokini tixinimoni auakani apaka, itomaneri itixi auakani kiiniritauatako Teoso auĩtetxi ininiãtaãua. Ninoa nipokotako anirimanekata kitxakapirĩka auakanikata. Apraão, Isaki, Xakoo pakinikata inipokotana. ¹²Iuasaaki apanakini Apraão apika mekaniriakori kona sari iua Teoso kiiniritemoni, kotxi ninoa !auikari Teoso sãkire. Piãkatximoni iokanataãkanako. Iuaã itxiapatanako, akatsakatsirĩtãuanako imisiritikona xika —itxa Xesosi sãkire.

¹³Ininiã Xesosi txari sotatoakori auíte:

—Pisa paapokomoni. Pite auikari niposotiire pinitiri erekape inini ĩkapani. Uatxa auape pinirekakiti —itxa Xesosi.

Ininiã initiri iuasaakipeka erekape itxa.

Simão Petro Imakiro Makananitiko

(Marko 1.29-34; Arókasi 4.38-41)

¹⁴Iposo atoko Xesosi sari Petro aapokomoni. Iuaã apokasaaki, atamataro Petro imakiro. Osirimata nopini osirĩkanãta. Oãpoomata.

¹⁵Ininiã Xesosi takapiotaua ouako nopini. Iuasaakipeka apoomari xipoka. Ininiã oõkitikaua. Osikakienatana ninoa.

Xesosi Makananitana Amianatakani

¹⁶Mapiãpeka inakasaaki, kãkiti anikana itomaneri maerekati matamatakoti auaiãtotakini iuamoni. Isãkireẽ omitikana maerekani matamatakoni. Imakananitana ikinikana amianatakani. ¹⁷Ikara atoko itxa Xesosi, kotxi inirekari Isaía sãkire iaõka apokini. Kitxakapirika Teoso sãkire sãpiretakari Isaía inakori txari:

Iua tiretariko amianatakari. Imakatzakariko aamianare.
Imakananitaua. Iuaka atatsiirauata ate ikapani.

Kãkiti Xesosi Imoianatinina Nireẽkani

(Arókasi 9.57-62)

¹⁸Itomaneri kãkiti iuakata auakasaaki, Xesosi txari imoianariakori:
—Masa ipiniãmoni —itxana.

¹⁹Iuasaakipeka ãti kaiõkatsopareri apoka Xesosimoni. Itxa:
—Koerekareri, nota iposope nisini pite nirekinimoni —itxa.

²⁰Ininiã Xesosi:

—Atauako pinirekatari pisini notakata? Aripa aua auini iriko. Araãkani auari ikoa. Txamari nota kãkiti itari iaxitikiri !auari nimakiniãtaã —itxa Xesosi.

²¹Ãtipekana apoka Xesosimoni. Xesosi moianari iua. Itxari:
—Niauĩte, paunitano niri nikatanapini merepanika, kotxi kiomãtxipekari iua. Eereka nisa pitekata —itxari.

Iteene iua !inirekari isini Xesosikata. ²²Xesosi apakapapiretari:
—Notakata pisa uatxa. Nisãkire mauĩãkani ipĩkani atoko itxana. Ininiã paunitana ipĩkani katiniri inirimane nisãkire mauĩãkani —itxa Xesosi.

Xesosi Iotokakiniri Ìtima Pirena

(Marko 4.35-41; Arókasi 8.22-25)

²³Iposo atoko, Xesosi imoianariakorikata iereẽtaua, ãpiriãtinina ikapani. ²⁴Mokatanitika ãtima kataparari apoãkata. Tsakati okari ãparaã kanaua ãki. Iuasaaki Xesosi imkanãta. ²⁵Imoianariakori sari iuamoni. Õpirĩkarina. Akiripoakatana:

—Apiananiri, !paunitapiri apinini. Apinanapanoka —itxana.

²⁶Ininiã Xesosi:

—Kinirepa hĩpĩkarauata? Poiãonoka hãuikari niposotiire —itxa.

Iposo atoko õkitikaua, pinita itxari ãtima, tsakati pakini. Iuasaakipeka ãtima, tsakati pakini iotoka. ²⁷Ininiã imoianariakori tsoriãkaãta. Itxana:

—Natokopa inakaripa ia kiki? Ìtima, tsakati pakini kenakotari isãkire —itxana imoianariakori.

Ipi Kiki Maerekani Matamatakoni Auaĩtotakini

(Marko 5.1-20; Arókasi 8.26-39)

²⁸Ipinĩã apokasaakina Xerasa tōpamoni, itaōkitarina ipi kiki itomane maerekani matamatakoni auaĩtotakini. Akauariã auanātana.

Paneenamana. Ikara xika kākiti pīkari akauarimoni isinina. ²⁹Xesosi inaãpotakasaaki, maerekani matamatakoni iitoãna auakani akiripoakata:

—Xesosi, Teoso ākiri pitxaua. Kiripa pinirekaka atemoni? Pite ina uaimoni amisiritiko ōti apisapanika pimisiritiniua ĩkapani atxiiti? —itxarina.

³⁰Ikara ininiãtaã takote auana itomane irariakori. Ikira atoko inipokonātana. ³¹Ininiã maerekani matamatakoni txari:

—Ate pomitikiniã, irariakorimoni piokanataua —itxarina.

³²Ininiã Xesosi:

—Hisipeka ninoamoni —itxa.

Iuusaakipeka irariakori ĩtoã ĩroãna. Ininiã imakinikana irariakori miteẽkata. Iokiriĩkatana. Ipoamoni isana. Iuaã ikomokana, axãpoãta itxana.

³³Ninoa irariakori nĩkatakani miteka sitatximoni. Iuaã ikinika isãpiretana irari ipinini pirena, kiki maerekani matamatakoni auaĩtotakini pirena apaka. ³⁴Ininiã ikinimane sitatxikini sari Xesosi itaōkitinina ĩkapani. Iua itaōkitakasaakina, amanaãrina ninoa tixine itakanapini ĩkapani.

Matĩpokotakati Pirena

(Marko 2.1-12; Arókasi 5.17-26)

9 ¹Ininiã Xesosi iereẽtaua kanauaã. Ikanapiriã iua auinimoni Kapanaoõ sitatxitimoni. ²Ātikaka kikiakori minari matĩpokotakati Xesosimoni. Xesosi imarotari ninoa auikiniri iua sãkire. Ininiã itxari:

—Namarite, pipoxokoniuatako. Pimaerekani makatxakapeẽkaika —itxa.

³Iuusaaki aua ātikaka kaiōkatsoparerini iuaã. Ninoa ākixinireẽ itxana: —Kona erekari isãkire. Teosonanira posotari kākiti maerekani imakatxakini —itxana ninoa.

⁴Xesosi imarotari maerekati ixinikakitina ākixinireẽna. Ininiã iua txa:

—Kinirepa hũuãkatari nisãkire maerekati inini? ⁵Nĩtxari iua imaerekani nimakatxakini, txamari !himarotari imaerekani atão nimakatxakini. “Põkitikaua. Pitĩpokota,” nininiã, himarotari nisãkire atão ininiãua, kotxi hĩtikari. Niposotiire imaerekani nimakatxakini ĩkapani, niposotiire iua nõkitikini ĩkapanĩtxikana.

⁶Ininiã uatxaika noerekai hĩte, Teoso iokanatano nota hĩtari iaxitikirĩ ĩkorapokoritimoni kākiti maerekani nimakatxakini ĩkapani —itxa Xesosi.

Ininiã itxari matĩpokotakatimoni:

—Põkitikaua. Pisirimata pikoseka, sipe pitxa paapokomoni —itxa Xesosi.
⁷Iuasaakipeka iua õkitikaua, aapokomoni sipe itxa. ⁸Ikara inakari apanakini itikasaaki, ipikarauatana.
 —Peerekari Teoso, kotxi iua oerekari iposotiire kãkitimoni —itxana.

Mateo Pirena

(Marko 2.13-17; Arókasi 5.27-32)

⁹Ikara inakari oereka atoko Xesosi sipeka. Isikasaaki, itaõkitari Mateo inakori. Auñtetxiakori txineirote apotiitakari iua. Xesosi napakasaaki, iitopãkanãta txineiro apakapiniãtaã. Ininiã Xesosi txari:
 —Masa notakata pimoianatinino ãkapani.

Ininiã Mateo õkitikaua, Xesosikata sa itxa. ¹⁰Eereka Xesosi imoianariakorikata nipokota Mateo aapoko. Txineiro apotiitakani, apanakini kãkiti maerekati kamakani pakini apoka Xesosikata inikinina ãkapani. Kãkiti kona potxitari txineiro apotiitakani, kotxi ninoa sikaro oa txineiro ãti uãka auñteakorimoni. !Neerekana ninoa. ¹¹Pariseoakori itikari ninoa nipokotini, ininiã itxana Xesosi moianariakorimoni:

—Kinirepa hãauñte nipokota txineiro apotiitakanikata, maerekanikata? —itxana.

¹²Ininiã Xesosi kenakotari ninoa sãkire. Itxa:

—Maerekati kamakari amianatakari atoko itxa. Ninoa nirekari erekape ininina. Kãkiti mamianatakani !nirekari ipini sikakarimoni isinina. Amianatakaninoka nirekari ipini sikakarimoni isinina. Hñte !nirekari nota makatxakiniri himaerekani, kotxi hñte uãkatari !auari himaerekani. ¹³Hñxinikariko ia Teoso sãkire iõkatsopatakori:

Hñsikarauata notamoni. Apiaerekata hiamonñkiniri apanakini. Nota ina ãkorapokoriti kona kãkiti “atão inakarinoka kamakarino nota” inakani ãkapanini, kotxi ninoa uãkatari erekarini ininiãuana, txamari kona erekana. Kãkiti maerekati kamakani ãkapanira nina nota uai imaerekanina itakanapinina ãkapani —itxa Xesosi.

Nipokori Takanapiko Teoso Misãkiretiko ãkapani

(Marko 2.18-22; Arókasi 5.33-39)

¹⁴Eereka Xoão kapatxisareri moianariakori apoka Xesosimoni. Itxana:

—Ate, pariseoakori pakini atakanapari anipokotini itokata Teoso amisãkiretini ãkapani. Kinirepa pite moianariakori !itakanapari inikinina Teoso imisãkiretinina ãkapani? —itxana.

¹⁵Ininiã Xesosi apakapapiretana:

—Nota kiiniri kamakari atoko nitxa. Kiki nirekiniã ĩtanorouatini, ikamari kiiniri. Iuasaaki imoianariakori kona nirekari imatinaniuatinina, iua ninoakata auakasaaki. Ininiã kona itakanaparina inikinina Teoso imisãkiretinina ĩkapani. Āti ōti nimaĩkaãkako. Nanikaãkako ninoa mauakaniãtaã. Iuasaakiko itakanaparina inikinina Teoso imisãkiretinina ĩkapani —itxa Xesosi.

Mãkatxi Tãpanatiko Pirena

16—Kiomãtxiakori kitxakapirĩka auakani sãkirekata kona hĩkoketapiri nota sãkire. Ikara hĩkaminiã, ininiã mãkatxi kitxakari amaneriã hĩtãpanatini atoko itxa. Mãkatxi kitxakari amaneriã kona hĩtãpanatape, kotxi parokasaakiri, amaneri txikika, ininiã ikatsorãkari mãkatxi kitxakari. Ininiã mitari itsorãkare. Mãkatxi amaneri nota oerekakiti atoko. Mãkatxi kitxakari, kãkiti kitxakapirĩka oerekakiti atoko itxa. Hĩkoketiniãri kitxakapirĩka oerekakiti, amaneri oerekakitikata, imakinika xipoka.

Sako Aamata Kamakori

17—Kitxakapirĩka kãkiti takari iãriã sako aamata kamakori ãki. Iuasaaki kona kãkiti takari amaneri iãriã kitxakari mata ãki, kotxi iãriã txiõkaãtakasaaki, itiãkaãpota. Ininiã omata kitxakari tsorakitako, kotxi paikori. Kona itiãka. Ininiã iãriã katxaka. Iãriã, aamata pakini xipoka. Amaneri matariã itakaãka iãriã amaneri. Ikara atoko ininiã, erekapitikari. Kona ixipokapaniko. Iua atokokana kona hĩkoketapiriko kiomãtxi kitxakapirĩka oerekakiti nota oerekakitikata —itxa Xesosi sãkire.

Xoteoakori Auĩte Pirena

(Marko 5.21-43; Arókasi 8.40-56)

18Xesosi sãkirauatapanika, inakasaaki Xoteoakori auĩte apoka iuamoni. Ikapotoreẽkaua Xesosi apisatoõ. Itxa:

—Namarite opinanapanoka. Masa. Piuako pitaka oa nopini, ininiã kona opina —itxari Xesosi.

19Ininiã Xesosi imoianariakorikata õkitikaua, iuakata sa itxana.

Xesosi Mãka Maãtakakaro

(Mateo 9.20-22; Arókasi 8.43-48)

20Isikasaakina, sito apoka iua porikimoni. Oamianare oãrẽka liotokiniãro. Tosikanani oamianatini. Oãpokasaaki, omaãtakari imãka imapotomatare. 21Oãkixinireẽ otxa:

—Imãka nimaãtakiniã, erekape nitxako —otxa.

Ininiã otikakari imãka. ²²Iuasaakipeka Xesosi kirioka, atamata itxaro:

—Namarite, kataparaxinire pitxako. Pauikari niposotiire, ininiã erekapekai —itxaro.

Iuasaakipeka oa erekape.

Xáiro Ākero Ōkitikiko Pirena

(Marko 5.35-43; Arókasi 8.49-56)

²³Iposo atoko Xesosi sari Xoteoakori auĩte aapokomoni. Iuaã apokasaaki, iĩroã. Itikari sokonaki xōkakani, itomaneri kãkiti txiapatakani apaka. ²⁴Ininiã Xesosi:

—Mapara hĩsa, kotxi oa amarini kona opina. Omakanãta —itxa Xesosi.

Ininiã ninoa napetari Xesosi:

—!Omakanãta. Opĩpe. Pite !imarotari —inapetarina.

²⁵Ikinimane mapara isikasaakina, Xesosi sari oa ãtokoromoni. Imaĩkaro ouako. Iuasaakipeka oōkitikaua. ²⁶Ikara ene iaripireta iua tōpa.

Xesosi Kōsiãrepeka Txĩkitakari Mōsiãreti

²⁷Iposo atoko Xesosi sipe. Iuasaaki ipi mōsiãreni sari iua tikini. Iuasaaki ninoa akiripoakata:

—Tavii apika mekanirii, piamonĩkaua ate —itxana.

²⁸Aapokotxi Xesosi iroãkasaaki, ninoa iroã apaka. Ininiã Xesosi:

—Hãuikatari niposotiniri erekapeka nitxĩkitakinii hĩte? —itxa Xesosi.

Ininiã ninoa:

—Ari, Apiananiri —itxana.

²⁹Ininiã itakapiotaua ninoa oki nopini. Ininiã itxa:

—Ari, hãuikakiti iaōka itxako —itxa Xesosi.

³⁰Iuasaakipeka ninoa kōsiãrepeka itxana. Ininiã Xesosi:

—Kona hĩsãpiretapiri nikamakiti apanakinimoni —itxa Xesosi.

³¹Eereka ninoa sipe. Txamari iaripiretarina ikamakiti ikinika iua tōpa.

Masãkireti Pirena

³²Ninoa kiki potorikasaaki, masãkireti anikaãka Xesosimoni. Iua kona kasãkireri, maerekati matamatakoti auaiãtotakiti xika. ³³Iuasaaki Xesosi omitikari iua maerekati matamatakoti. Iuasaakipeka iua kiki sãkirauata. Itomaneri kãkiti itikari. Iuasaakiika ninoa tikoka. Ininiã itxana:

—Ikinika Isaeo tixiniã auakani, mitxi !itikapanikari ãkora atoko inakari —itxana.

³⁴Txamari pariseoakori txari:

—Xesosi omitikari maerekati matamatakoti Satanasi posotiiireẽ —itxana. Na atão ninoa sãkire.

Xesosi Ikini Sitatxiti Sini

³⁵Ininiã Xesosi sari ikini sitatxiti tãpa. Aapokotxi auiniãtaã apaka isa. Oerekarauata aiko Xoteo apotiitiniãtaãua. Isãpiretari Teoso iokanapirena erekari, Teoso auõtetxi ininiãua pirena. Apaka erekapeka itxĩkitakana ikinipoko amianatakani. Ikini sereti amianari auã kãkitimoni. Ikinika imakananita. ³⁶Atamatakasaakina ninoa kãkitipokoni, iamoniãkana ninoa, kotxi soti auĩte minĩkatakoni atoko itxana, kotxi limarotarina isininimonina. Imaãkauana. ³⁷Ininiã itxari imoianariakori:

—Kaiãori kãkiti iposope auikiniri nisãkire, txamari !imarotarina nisãkire, kotxi likenakotapanirina. Ninoa kikio erekari atoko itxana. Imakinika iposope iuaã. Ininiã iposope auikinirina nisãkire. Txamari, poiãoka parĩkauatakani auã nisãkire isãpiretinina ãkapani. ³⁸Ininiãkara himisãkiretariko Apiananiri iaxitikiri iokanatinina parĩkauatakani iua sãkire auĩãkani apotiitinina ãkapani. Ikara atoko hĩtxako Teosomoni —itxa Xesosi.

Xesosi Mereẽna Tosi Imoianariakori

(Marko 3.13-19; Arókasi 6.12-16)

10 ¹Xesosi mereẽna tosi imoianariakori. Isikari iposotiire ninoamoni maerekati matamatakoti omitikinina ãkapani. Isikari iposotiire ninoamoni amianatakani imakananitinina ãkapani, ikinika amianari inokasaakina ninoa amianatakani. ²Naia imoianariakori uãka: Merepitipanika auari Simão Petro inakorima, apaka itari ãtree inakorima. Auari Txiakoma, apaka itari Xoãoma. Ninoa Sepeteo anaakori. ³Auari Piripima, Patoromeoma, Tomeema. Apaka auari Mateoma, txineiro apotiitakari. Apaka ãti Txiakoma, Aoepo ãkiri. Aua Tateoma. ⁴Aua Simãoma, Homano omanatakari. Apaka aua Xotasi Isikariotxi inakorima. Iua Xesosi miãkapiiritakari itxaua. Ninoa Xesosi moianariakori itxauana.

Xesosi Iokanatana Imoianariakori Kãkitimoni

(Marko 6.7-13; Arókasi 9.1-6)

⁵Ininiã Xesosi iokanatana ninoa isãkire isãpiretinina. Ia atoko õtãkikana: —Kona hĩsipeko Xoteo minakonimoni, apaka Samaria tãpa sitatxitimoni kona hĩsipeko. ⁶Hĩsako kãkiti Isaeo tixinikinimoni. Hinirimanemoni,

Xoteoakorimoni hīsako. Ninoa soti auīte pīpinanaākani atoko itxana. ⁷Hāpokasaaki kākitimoni, hītchariko: “Teoso ikinimane auīte ininiua manapi paitiki apokako.” ⁸Himakananitanako amianatakani. Maere matati erekapeka hītẋikitakako apaka. Ipīkani hōkitikako. Homitikariko maerekati matamatakoti kākiti auāītotakini. Ikara atoko hīkamako. Kona hīte īkitxitari Teoso hāpakapakiti īkapani. Ininiā ikara atokokana hītẋako. Kona hinirekapiri kākiti īkitxitini hīte, hīte sikakiti īkapani. ⁹Kona hanikapero txineiro oro kamakoro. Pirata kamakoro, ātiāo txineiro apaka, kona hanikape. ¹⁰Uatxa hianaxititakasaaki, sako mata !hanikape. Āti himāka !hanikape. Āti hīkiti mata kona hanikape. Hītsonere !hanikape. Kona himaākapeua, kotxi parīkauatakani apakapariko nipokori. Hinirekakiti apokapitikako.

¹¹—Sitatxi hāpokasaaki, hinitari kākiti Teoso sākire kenakotakani, hīte apakapakani. Hīkaikota ninoakata. Eereka kona hīsipe āti aapokomoni hīkaikotini īkapani. ¹²Aapokotxi āki hīiroākasaaki, hītẋako: “Erekari Teoso sikakiti kaikotako hītekata,” hītẋako. ¹³Kākiti ipoxokoniritika apakapiniāi, hītẋako: “Teoso takari erekari hītemoni,” hītẋako. Imanirekakaniāi, hītẋariko: “Teoso kona takari erekari hītemoni.” ¹⁴Atxiīti aapokotxi hāpokasaaki, kākiti iuaātaā !apakapai. Atxiīti !nirekarina hīsākire, ininiā iuasaaki hīsipeka. Hītakanapariko iuaātaā. Hīpotorikasaaki, himakatzakari kipatxi hīkiti mataā auakari. Ininiā iuasaaki ninoa imarotari Teoso kona apokaerekatana. ¹⁵Hīxinikariko ia nisākire. Kākiti misiritiko ōti apokasaaki, ninoa apiata misiritaāka. Sotoma sitatxiti auakani, Komoha sitatxiti auakani pakini misiritaāka poiāoka —itxa Xesosi.

Misirikaretxi Pirena

(Marko 13.9-13; Arókasi 21.12-19)

¹⁶Iuaīkana Xesosi sākirauata:

—Erepaniko, pamonōkoniri. Hīte soti auīte atoko hītẋa, kotxi !kaposotiirei hīte, iuaritika niokanatai kākitimoni. Ninoa ākiti atoko, ininiā erepaniko. Ininiā kimarorei hītẋako. Imini kimaroreri atoko hītẋako. Ininiā maerekati ninoa auakiti kona misiritai. Iuasaakiika kamo atoko hītẋako, kotxi kamo !imisiritari kākiti.

¹⁷—Erepaniko. Araōkire hītẋako. Auako kākiti kinirāo anikinii maxikatiīka kākiti misiritiko mereēkanimoni. Apanakini xirokaiko hīte maxikatiīka aiko āki Xoteo apotiitiniātaāua. ¹⁸Nota sākire hāuikini xika hanikaākako auītetxiakorimoni himisiritiko himarotini īkapani. Ikara atoko ininiā, iuasaaki erekapitikari, kotxi hīsāpiretariko nota sākire iuaā auakanimoni, Xoteo minakonimoni apaka.

19—Kākiti misiritiko mereēkarimoni hanikikosaaki, kona himaākapeua hīsākirauatini apisa. Teoso sikaiko hīsāpirena tīkane. 20Sākiretxi hīsāpiretakiti kona hīte sākireni. Erekarī Matamatakoti, iuarako sikariko sākiretxi hīsākirauatini īkapani iuasaaki.

21—Āti ōti hītari sikaiko hīte homanatakinimoni okinii īkapani, kotxi hīte auikari nota sākire. Iua atokokanerako irītxi sikariko imi ātimoni okiniri īkapani, kotxi imi auikari nota sākire. Auako apaka imi omanatinina iri, inoro pakini, kotxi inoro, iri pakini auikari nota sākire. Iua sikanako ātimoni okinina īkapani. 22Ikinimane omanataiko hīte nota sākire hāuikini xika, iuaritika hāuikiniāri nisākire ātipirika, nimakatsakai himapinakani īkapani. 23Sitatxiā hāuakasaaki, himisiritikosaaki, āti sitatxitimoni himitekako. Atāo nota sāpiretai hīte. Kona hīte xipokapaniri hīparīka ikini sitatxiti Isaeo tixini hītari iaxitikiri kanapiriini apisa —itxa Xesosi sākire.

Apiatakari, Poiāori Pakini

24Iuaīkana Xesosi sākirauata:

—Apaiaōkarauatakari poiāo. Koerekareri apiata. Apaka nitiritxi poiāo. Iauīte apiata. 25Apakatapitika apaiaōkarauatakari koerekareri imarotakiti iaōka imarotini. Iua atokokanera nitiritxi iua auīte atoko inini. Apanakini akiritano nota “Peosepoo,” Satanasi inakori. Ininiā itakauākatai hīte hīuāka apia maerekati, kotxi nota anaakorirai hīte —itxa Xesosi.

Kipatakori !Auari

(Arókasi 12.1-3)

26—Ininiā kona !hīpīkapena ninoa maerekati kamakani, kotxi nota kanapiriākasaaki, kona kipatakori auapanika. Ikinika imarotaākako. 27Hītemoni īkanōka nimaasakapiretakiti, ikara nisākire hākiripoakatako aapokotxi nopini imakinika kākiti imarotini īkapani. Uatxa hītemoninani nisāpiretakiti āti ōti ikinimanemoni hīsāpiretako.

Kipa Apīka?

(Arókasi 12.4-7)

28Kona hīpīkapena hīito okakani, kotxi !iposotarina hīxinire okinina. Hīpīkariko Teoso, kotxi iuanokara posotari iokanatinii hīte, hīito, hīxinire pakini maerekani misiritikoātaā. Iuara hīpīkako.

29—Ipi kotipiriki īki poiāo, ātika txineiro otanoka. Iuaritika hīri iaxiti auakari turetana ninoa. Imauiritakaniāri, kona ātika ipina. 30Kipakinipa piāko pikiiā auakari aua? !Pimarotari. Teoso imarotapitikari, kotxi iteene

inĩkakai, ininiākara hĩpĩkarauatape. ³¹Kotipiriki ĩki poião, iuaritika Teoso turetari kotipiriki. Ininiākara kona hĩpĩkarauatape. Kaiãopokori kotipiriki auiniã, iuaritika hĩte ĩki apiata, ininiã Teoso turetapiťikai hĩte —itxa Xesosi.

Xesosi Tiretakani, Xesosi Manirekakani Pakini

(Arókasi 12.8-9)

³²Xesosi sãkirauatapanika:

—Apanakini apisatoõ hĩsãpiretiniãri: “Xesosi nakiti nitxaua nota,” iua atokokanerako nitxariko niri iaxiti auakari apisatoõ: “Nota nakitipitikara iua,” nitxako —itxa Xesosi. ³³Hĩsãpiretiniãri apanakini: “Xesosi nakiti !nitxaua nota,” iuasaaki nisãpiretari niri iaxiti auakari: “Kona nota nakitini iua.”

Pinirekakiti Pirena

(Marko 8.34-35; Arókasi 12.49-53; 14.26-27)

³⁴—Kona hĩxinikapiri nota ĩkorapokoriti napokini neenamatchi nixipokini ĩkapani. Kotxi kãkiti auikari nisãkire, ininiã eereka apanakini omanatana. Kona neenamatchi xipokapanika, kotxi nota minari niposotiire maerekati nixipokini ĩkapani. ³⁵Nota apokini xika imi omanatana iri, inoro pakini, kotxi ninoa auikari nisãkire. Tĩrotxi omanataro oimakiro, kotxi ãto omanatano nota, ãto turetano nota. ³⁶Iuasaaki pinirimane pimokaiakarinarako itxauanako.

³⁷—Poiãoka pitiretiniãno nota, apiata pitiretiniãna pinoro, piri pakini, kona erekari nimoianari pininiua. Apiata pitiretiniãna pamariteakori, kona erekari nimoianari pininiua. ³⁸Nota kinirão moianataka hinakasaaki, notakata hĩsa. Himamĩteenekakanisaakiri himisiritiko nota ĩkapani, ininiã !apakata himoianatinino. ³⁹—Pite ãtipirika kaminiãri piteka nireẽkitinoka, ininiã pinireẽkiti xipokapitikako pitekata. Pite nireẽkiti xipokiniã, nota sãkire pauikini xika, pite auapininiika txako Teosokata —itxa Xesosi.

Hĩte Apakapakani Pirena

(Marko 9.41)

⁴⁰Iuaĩkana Xesosi sãkirauata:

—Kãkiti hĩte apakapakani, apakapano nota apaka. Nota apakapakari apakapari nota iokanatakari apaka. ⁴¹Papakapiniãri Teoso sãkire sãpiretakari, kotxi iua sãpiretari Teoso sãkire, ininiã papakapari erekari Teoso sikakiti iua apakapakiti iaõka. Papakapiniãri atão inakari kamakari, kotxi iua kamari atão inakari, ininiã papakapari erekari Teoso sikakiti iua apakapakiti iaõka. ⁴²Pisikiniãri ãparaã nimoianari poiãorimoni iãtini ĩkapani, kotxi nimoianari itxaua, Teoso ĩkitxitapitikai pite —itxa Xesosi.

Xoão Kapatxisareri Tikini Sikani

(Arókasi 7.18-35)

11 ¹Xesosi moianariakori tosi pakini isäkire oerekini xipoka atoko, Xesosi sipe. Isa äti sitatxitimoni, eereka äti sitatxitimoni Kariréia tōpa itxaãpota oerekarauatakasaaki. Teoso säkire isäpiretari kākiti.

²Xoão kapatxisareri, kateia äki auakasaaki, ikenakoenetari Xesosi kamakiti, ininiã iokanatarari ipi imoianariakori Xesosimonikari.

³Ininiã Xoão txari imoianariakori:

—Hípimaãri Xesosi: “Pitekani iaxiti ìkari, kākiti iätapakiti pitxataua? Ätikani atxiiti aiätapakiti pitxataua?” hïtxariko —itxa Xoão.

Ininiã ninoa sipe. Ipimaãrina Xesosi Xoão säkire iaõka. ⁴Ininiã Xesosi apakapapiretana:

—Hïkanapiriã Xoõmoni. Hïsäpiretari hïkenakotakiti, hätamatakiti pakini. ⁵Hïte atamatapekari mōsiãreti kōsiãrepeka inini. Matïpokotakati tïpokotapeka. Hätamatapekari maere matati erekapeka inini. Makenakokiti kakenakokipeka. Ipïkani òkitikapekauri. Teoso iokanapirena erekari säpiretapeëkaika minakati mauapikinitinimoni. Pakini hätamatapeka. Ikara hïsäpiretako Xoõmoni. ⁶Kākiti ìteene auikiniãri nota säkire, Teoso takari erekari iuamoni. Ikara nisäkire hïsäpiretari Xoão —itxa Xesosi.

⁷Ininiã ninoa sipe. Isikasaakina, Xesosi säpiretari Xoão pirena itomaneri kākitimoni. Ia atoko itxa:

—Kipa ìkai hïte, Xoão kapatxisarerimoni hïsikasaaki, äparaã makipakaniãtaã iua auakasaaki? Hïte sari iuamoni, kotxi ätixika isäkire aua. Teoso säkirenoka isäpireta. Ìtima äpokaxitikasaaki, katsotati ipinimoni ipapïka, iuaïkana ipinimoni ipapïka inini atoko kākiti, kotxi isäkire kita äti, isäkire uatxa ätiã, isäkire katana iuaïkana ätiã, itxaãpota isäkire. Ikara atoko !itxa Xoão.

⁸—Kipa ìkai hïte Xoõmoni hïsikasaaki? Hïte sari iuamoni, kotxi !inirekari tiitxi, txineiro pakini. !Kakaroneri imãka, kotxi !ikaikota auütetxi aapoko. Auütetxi aapoko peereri mākaxi.

⁹—Kipa ìkai hïte iuamoni hïsikasaaki? Hïte sari iuamoni, kotxi iua Teoso säkire säpiretakari itxaua. Atäopitika Teoso säkire säpiretakari itxaua. Iua Xoão Teoso säkire säpiretakari apiari.

¹⁰—Teoso säkire iökatsopatakori kitxakapiriãka txari:

Niokanatariko nisäkire säpiretakari kākitimoni pite apisa, papokini isäpiretini ìkapani, kākiti iposope inini ìkapani.

¹¹Atäopitikara. Ikinimane sauaki Xoão kapatxisareri apiatakari itxaua. Iuaritika Teoso auütetakarari poiãori inakari apiari imarotariko Teoso kamakiti tïkane. ¹²Xoão

auakasaaki Teoso auñtetakani misiritaãka, kotxi kãkiti kaneenamari naiatana ninoa. Ninoa nirekari ixipokinirina Teoso auñteti ininiua ãkorapokoriti. Uatxapiima auapanika ikara atoko inakari. ¹³Xoão apokini apisapanika, ikinika Teoso sãkire sãpiretakani, ikinika Teoso sãkire iokatsopatakani, sãpiretari Teoso auñteti ininiua pirena. Xoão apokasaaki, iua apaka oerekari Teoso auñteti ininiua pirena.

¹⁴—Kitxakapirika Teoso sãkire sãpiretakani sãpiretaua:

Ñti Teoso sãkire sãpiretakari Erãsi atoko inakari apokako, itxana. Iuakara Xoão. Hãuikiniãri nisãkire, hãuikariko iuara apokapeka. ¹⁵Kakenakokii, ininiã hikenakotariko nisãkire —itxa Xesosi.

¹⁶—Kanatokopa itxa kãkiti ãkorasaaki auakani? Amarini sarauatini atoko itxana ãkorasaaki auakani. Ninoa amarini topãka tiitxi amotikoãtaã. Apanakini amarini txitana apanakini amarini. Itxana: ¹⁷“Ate xikarauata hñte serenini ãkapani, txamari !hñserena. Kãkiti pãkasaaki xikariti axikareta, txamari !hñtxiapata.” Ninoa amarini sarauatini atoko itxana ãkorasaaki auakani, ¹⁸kotxi Xoão kapatxisareri apoka ãkorapokoriti. Itakanapari inikini Teoso imisãkiretini ãkapani. !lãtari ovaã. Iuaritika hñte txari: “Maerekati matamatakoti auaitotari Xoão,” hñtxari. ¹⁹Nota hñtari iaxitikiri apoka ãkorapokoriti. !Nitakanapari ninikini. Ikiniõtika ninipokota. Nñtari ovaã. Ininiã hñte txari: “Iua kiki ixori. Poãtakari iua. Iua moianatana txineiro apakapakani, kãkiti maerekati kamakani,” himisãkirepirenãtano. Kimaroreri atão inakari kamari erekarinani. Kãkiti atamatakasakiri ikamakiti, imarotari kimaroreri atão inakari ininiua —itxa Xesosi.

Sitatxi Auakani Teoso Sãkire Mauiãkani

(Arókasi 10.13-15)

²⁰Ininiã Xesosi pinitana Korasiã sitatxiti auakani, Petsãita sitatxiti auakani pakini, kotxi kaiãopokori iposotiire ikamapeka iuaãtaã, iuaritika kona itakanaparina maerekati. ²¹Xesosi txana ninoa:

—Kãkiti Korasiã auakani himisiritaãkako. Kãkiti Petsãita auakani hñte apaka misiritaãkako. Kitxakapirika Txiro, Sitoõ pakini sitatxitikini kamari maerekati, ininiã Teoso xipokana ninoa arikatxiã. Ninoa atamataãkamariko nota posotiire hñte atamatiniri atokokana, ininiã ninoa mãkatamariko sako mata. Itakamariko atapani iñoãna. Ikara atoko ininiã, ninoa oerekari maerekati itakanapinina. ²²Nisãpiretai hñte ia: “Kãkiti misiritiko õtisaaki, Txirokini, Sitoõkini pakini misiritaãka poião. Hñte apiata.” ²³Hñte Kapanaoõkinipekana, Teoso ãkiri aua hñtekata. Hñte itikapekari ito posotiiretxi iaxitikiri. Txamari hõkakatapeẽkako maerekani misiritikoãtaã. Nikamakiti hñtemoni Sotoma auakani sauaki nikamaãkamako, kona ninoa xipokamako. Auapanikamanako. ²⁴Ininiã nitxai hñte: “Himisiritikosaaki, apiata himisiritaãka. Poiãoka Sotomakini misiritaãka,” —itxa Xesosi.

Teoso Imarore Apakapakani

(Arókasi 10.21-22)

²⁵Iuasaaki Xesosi misākiretari iri:

—Niri, pitixine auakani auíte pitxaua. Uai ikini itixiti auakani auíte apaka pitxaua. Peerekai pite, kotxi na poerekari pimarore kākiti kimarorerinimoni, iuikakanimoni. Pite oerekari pimarore kākiti poiāorinimoni, miuikakanimoni.

²⁶Ari niri, ikara atoko pinireka. Ikara atoko papokaerekata —itxari iri.

²⁷Eereka imisākiretari kākiti:

—Niri sikapekano ikinika. Kākiti limarotano nota Teoso ākiri nininiua. Nirinokara atāo imarotano nota. Apaka kākiti na atāo imarotari niri. Notanokara imarotari niri, kotxi iua ākiri nitxaua. Kākiti nirekiniāri imarotiniri niri, nota oerekari niri iuamoni.

²⁸—Iteene minari atoko itxa himaerekani. Hinireka hītakanapiniri iua, txama lhīposota hītakanapiniri. Hīsāpakiniā himaerekani xika, hina notamoni hītomatini ikapani. Iuasaaki nimakatzakari himaerekani. ²⁹Hītakariko nipaniātakiti hākixinireē. Hāpaiaōkariko nota pirena. Erekapitikari hāpaiaōkiniri ninirekakiti, kotxi kona kaneenamano. Kona nota napetari kākiti. Niuikiniua lauari. Ikara atoko ininiā, hīxinire tomatapitika. ³⁰Hīposotapitikari nipaniātakiti hīkamini, notakata hīparīkauatiniā. Nipaniātakiti !kasāpaniri. Kona kamimari. Peerekari nipaniātakiti —itxa Xesosi.

Tomatiko Ōti Pirena

(Marko 2.23-28; Arókasi 6.1-5)

12 ¹Mapaōti atoko tomatiko ōtisaaki, Xesosi imoianariakorikata napaāpota triko takikoātaā. Inatxitana. Inapaāpotakasaakina, imakatzakarona triko iki mapaki inikinirona ikapani. ²Pariseokori ikara itikasaaki, itxarina Xesosi:

—Patamata. Pimoianariakori kamari ate mauiritakiniti. Ninoa parīkauata tomatiko ōtisaaki —itxana.

³Ininiā Xesosi:

—Atxiīti kona hātatsopatapanikari Taviini kamakiti imoianariakorikata kitxakapirīka inatxitakasaakina? ⁴Iua ĩroā Teoso misākiretikoātaā. Imoianariakorikata inikari komiri Teosomoni sikakori. Sasetotxinokara auiritaāka iua komiri inikinina. Apanakini !auiritaāka inikiniri. Iuaritika ninoa sasetotxiakori tiretari Taviini, imoianariakori pakini inatxitakasaakina. ⁵Atxiīti kona hātatsopatapanikari Moisesini iōkatsopatakiti. Iua auiritari sasetotxi parīkauatini tomatiko ōtisaaki, Teoso misākiretiko aikotiā. Iuasaaki ninoa !ikamari maerekati, kotxi iparīkauatana Teoso misākiretiko aikotiā. ⁶Atāo

nisãpiretai, hĩte paniãtakiti poiãori. Nota paniãtakiti apiari. ⁷Teoso sãkire iteene hãuikasaaki, kona hãpoĩtana kãkiti maxikatĩka, kotxi Teoso sãkire txari:

Nota nirekari apanakini hĩtoretini. Pimatiretakanisaakiri ãti, !apakata pisikarauatini notamoni. Iuasaaki kona ninirekari pisikakiti, itxa Teoso kitxakapirĩka.

⁸—Nota hĩtari iaxitikiri posotari ikinipoko ninireẽkiti nikamini tomatiko õtisaaki, kotxi Apiananiri nitxaua —itxa Xesosi.

Motĩkauakotakari Pirena
(*Marko 3.1-6; Arókasi 6.6-11*)

⁹Xesosi ikara inaãka atoko, isa aiko Xoteoakori apotiitiniãtaãua. ¹⁰Iuaã aua kiki motĩkauakotakari. Iuaã aua apaka pariseoakori Xesosi kinirão apoĩtaka inakani tomatiko õtisaaki iparĩkauatini xika. Ninoa amanaãri Xesosi:

—Atauako apakata atxiĩti tomatiko õtisaaki, erekape pitxĩkitakiniri kãkiti? —itxarina.

¹¹Ininiã Xesosi pimaãna:

—Hĩpira soti auĩte tomatiko õtisaaki aariko ãki irikiniã, himaktxakatari? Atãopitikara Teoso sãkire auiritapitikari kãkiti makatxakiniri ipira tomatiko õtisaaki. ¹²Soti auĩte poiãori, kãkiti apiari. Ininiã Teoso sãkire auiritapitikari tomatiko õti erekape nitxĩkitakiniri kãkiti —itxa Xesosi.

¹³Ininiã itxari kiki motĩkauakotakarimoni:

—Poerekauakotauako —itxa.

Oerekauakotakasaakiua, erekapeka itxa, ipini uako atokopeka itxa.

¹⁴Iuasaaki pariseoakori sipeka atoko, ninoakakarika misãkiretakakauana: —Natokopa atxatari Xesosi aõkini? —itxakakana.

Nitiritxi Teoso Mereẽkiti

¹⁵Xesosi imarotakasaakiri ninoa okaenetiniri iua, iuasaakipeka Xesosi sipeka. Itomaneri kãkiti sa iuakata. Ikinika amianatakani erekapeka itxĩkitaka. ¹⁶Xesosi !auiritana isãpiretinirina ikamakiti apanakinimoni. ¹⁷Ikara atoko itxa Xesosi, Teoso sãkire sãpiretakari Isaía inakori sãpiretakiti iaõka apokini ĩkapani. Ia atoko itxa Teoso Isaíamoni:

¹⁸Ia ninitiri nimereẽkiti. Ia nitiretakiti napokaerekatakiti. Nota sikariko Erekarĩ Matamatakoti iuamoni. Iua sãpiretariko nota sãkire Xoteo minakonimoni.

¹⁹!Kataparasãkireri ahoa kimaporiti ĩtiniãpo isãkirauatakasaaki. !Inenamauata. !Itxitakaka apanakinikata kãkiti napiniãtaã.

²⁰ Apanakini Teoso sākire auīākani oiōkapeta ākixinireēna. Itapara !auari. Ninoa aanaia katxitoākori atoko itxana. Iuaritika kona imapirinikari iua aanaia katxitoākori. Iua atokokana kona ixipokari iua sākire auīākani mataparani. Itiretana. Apanakini Teoso sākire auīākani, kona iteene aukari Teoso sākire. Ininiā ninoa tirikapi iopinikare xapitikiri atoko itxana, iuaritika kona iua oakari. Iua atokokana kona ixipokana Teoso sākire auīākani. Ikamaāpotari erekari, erekarinoka kāiatini ikapani.

²¹ Xoteo minakaniua auikariko iua sākire.
Itxa Isaía sāpirena kitxakapirīka.

Maerekani Matamatakoni Omitikiko

(Marko 3.20-30; Arókasi 11.14-23)

²² Iuasaaki kākiti anikari kiki maerekati matamatakoti auaitotakiti Xesosimoni. !sākirauata. Mōsiāreti itxaua iua, maerekati matamatakoti xika. Xesosi erekapeka txīkitakari iua. Iuasaaki kōsiārepeka, kasākirepeka itxa. ²³ Iuasaaki kaiāopokori kākiti iuaā tsorīkaāta. Ininiā ipimaākakauana: —Atuako ia kiki aūiūte Taviini apika mekanirikani? Atxiiti Teoso iokanatakitikani? —itxana.

²⁴ Pariseoakori ikara ikenakotakasaakina:

—Konapitini. Maerekati matamatakoti auite Peosepoo inakori sikari iposotiire Xesosimoni maerekati matamatakoti omitikini ikapani —itxana pariseoakori.

²⁵ Xesosi imarotari ikara ixinikakitina. Ininiā itxa Xesosi:

—Kākiti tixine auakani ninoakakarika inaiatakakiniūana, ixipokakakauana. Iarikapenako. Iua atokokana kākiti aapokoā auakani inaiatakakiniūana, ixipokakakauanako. ²⁶ Iua atokokana Satanasi nitiriakori, ninoakakarika inaiatakakiniūana, ixipokako Satanasi tapara. ²⁷ Hīte sākire, Peosepoo sikari iposotiire notamoni maerekati matamatakoti nomitikini ikapani. Ininiā nota pimaāi: “Kipa sikari posotiiretxi hīte moianariakorimoni, maerekati matamatakoti omitikinina ikapani?” Himoianariakori sāpiretai: “Teosonoka sikari posotiiretxi maerekati matamatakoti omitikanimoni.”

²⁸ Teoso posotiireē nomitikari maerekani matamatakoni. Ikara atoko ininiā, Teoso oerekai iua apokapeka hītemoni hīauite inini ikapani.

²⁹ —Kiki pataparari iua aapoko auiniā, kona kiitiriri iroā itiriatini ikapani. Kiitiriri iaxirikiniāri iua kiki pataparari, iuasaakiika apakata iitirīkiniri itii.

³⁰ —Notakata maparīkauatakani omanatano nota. Imamoianatakaniāno, inirekari niparīka ixipokini. ³¹ —Ininiā nisāpiretai. Apakata Teoso makatxakiniri ikinipoko maerekati kākiti kamakiti, imaerekani Teoso imisākirepiretini pakini. Txamari Erekari Matamatakoti misākirepiretakari

maerekani makatxakiko kona auari. ³²Kākiti misākirepiretiniāno nota hītari iaxitikiri, eereka amanainiāri Teoso ikara imaerekani imakatxakini, ininiā Teoso makatxakapitikari. Kākiti misākirepiretiniāri Erekar Matamatakoti, !kimakatxakikori ikara maerekati ikamakiti —itxa Xesosi.

Aamina Iri Pirena

(Arókasi 6.43-45)

³³Ininiā Xesosi sākirauata iuaĩkana pariseoakorimoni:

—Aamina atoko hītxa. Aamina erekari ininiā, iri erekari apaka. Aamina maerekati ininiā, iri apaka !erekari. Patamatiniāri amātiiri, pimarotari imina. ³⁴Nimarotai hīte. Imini katsiiri atoko hītxaaua hīte. Hīte maerekati kamakanii. Ininiā !hīposotari erekari hīsāpiretini, kotxi hākixinire !erekari. Hinamaā hīsāpiretakiti hākixinireē potoriākari itxaaua. ³⁵Kākiti erekari ininiā, erekarinoka isākire, kotxi iua ākixinireē erekarinoka aua. Kākiti maerekati ininiā, isākire maerekati apaka, kotxi maerekatinoka auari iua ākixinireē. ³⁶Atāo nisāpiretai hīte. Ikinipoko kākiti sākire Teoso atamakaerekata xipokatxi ōtisaaki. Iuasaaki Teoso mereēri kākiti misiritiko. Maxikatĩka hīsāpiretakiti kona apakata. Kona iua potxitari. Ininiā iuasaaki iua pimaāi: “Kinirepa ikara atoko pisākire?” itxako. ³⁷Pisākire ereka ininiā, ixika !auari Teoso misiritinii. Pisākire maerekati ininiā, pisākire maerekati xika Teoso misiritai —itxa Xesosi.

Pariseoakori Nirekari Xesosi Oerekiniri Iposotiire

(Marko 8.11-12; Arókasi 11.29-32)

³⁸Ātikaka kaiōkatsoparerini, pariseoakori pakini txari:

—Koerekareri, takaōtxikari Teoso posotiire poerekaua ate, aātamatiniri ĩkapani, Teoso iokanatinii ĩkorapokoriti aimarotini ĩkapani —itxarina.

³⁹Xesosi apakapapiretana:

—Kākiti uatxarini !erekana. Itakanaparina Teoso. Hīte nirekari noerekinii Teoso takaōtxikare, iposotiire. Konapitini. Kona noerekai hīte. Kitxakapirĩka Teoso sākire sāpiretakari Xonasini inakori auakasaaki, Teoso kamari posotiiretxi. Ikara atoko inakari posotiiretxi Xonasini auakasaaki, iuaĩkana ikamapanikariko. Iua posotiiretxi Teoso takaōtxikare itxapanikaua hīte ĩkapani. Iua takaōtxikarinoka Teoso takaōtxikare hīte ĩkapani. ⁴⁰Xonasi kaikota ximaki mitari tikako āki ipi āti pakini ōti. Iua atokokanerako hītari iaxitikiri napako ipi āti pakini ōti ipĩkani auiniātaā.

⁴¹—Itixi xipokini ōtisaaki, kākiti Nĩnivi sitatxiti auakani sākirauatapitikako. Ninoa txai hīte: “Kona erekai hīte, kotxi !hītakanapari himaerekani. Ate takanapari amaerekani Xonasi sākire

akenakotakasaaki,” itxanako ninoa. Uatxa uai aua hĩte apisatoõ Xonasi apiatakari. Imisäkiretai hĩte, iuaritika kona !hĩtakanapari himaerekani.

⁴²—Xipokatxi õtisaaki, sito Sapaa auakani auĩte sākirauatapitilkako. Oa õtakoxiti auakaro, iuaritika osari Saromãomoni imatire okenakotini ĩkapani. Uatxa apopeka Saromão apiatakari, iuaritika hĩte !auikari nota sākire —itxa Xesosi.

Maerekati Matamatakoti Kanapiriini Pirena

(Arókasi 11.24-26)

⁴³Iuaĩkana Xesosi sākirauata:

—Maerekati matamatakoti kiki auaiĩtotakiti takanapakasaakiri iua kiki, iua maerekati matamatakoti saãpota ãparaã makipakaniãtaã, ikaikotiniãtaã inítini ĩkapani, txamari !apokari. ⁴⁴Ininiã itxa: “Nikanapiriãpiriko mitxi nauinimoni nipotorikinimonikari,” itxa iua maerekati matamatakoti. Ininiã ikanapiriã. Apokasaaki, ãti iuaã auakari !auari. Oeretapeẽkaika. Iposope ãti auini ĩkapani. ⁴⁵Ininiã apana apikomoni setxi pakini maerekani matamatakoni apia maerekanitakani. Imakinikana aua iua kiki ĩtoã. Ininiã iua kiki mitxi poiãoka imaerekani, eereka apia maerekanita. Ikara atoko itxako kãkiti uatxarini maerekani —itxa Xesosi.

Xesosi Inoro, Itariakori Pakini

(Marko 3.31-35; Arókasi 8.19-21)

⁴⁶Xesosi sākirauata itomane kãkitimoni, inakasaaki oãpoka inoro, itariakorikata. Iporikiti auana. Ipĩkapiretarina. ⁴⁷Ininiã ãti txari Xesosi: —Pinoro, pitariakori ikiraã iporikiti auana. Inirekakarina imisäkiretinii pite —itxa.

⁴⁸Ininiã Xesosi:

—Keropa ninoro? Kiripa nitariakori? —itxa Xesosi.

⁴⁹Ininiã imioakari imoianariakori:

—Hãtamata. Uai aua ninoro, nitariakori pakini. ⁵⁰Niri iaxitikiri nirekaãkiti kamakanira, ninoara nitariakori, nitaroakoro, ninoro txaua —itxa Xesosi.

Katakareri Pirena

(Marko 4.1-9; Arókasi 8.4-8)

13 ¹Iua õtisaaki Xesosi takanapari iua aapokotxi. Ipoa tiniã isa. Iuaã ipoa tiniã iitopãka. ²Iuaã auana itomaneri kãkiti. Apotiitauana iua takote. Ininiã kanaua ãki iereẽtaua, topãka itxa oerekarauatini ĩkapani. Ninoa kaikota imiriĩ. ³Ininiã itori sãpirenatxi atão inakari oerekiko isãpiretana ninoa Teoso imarotinina ĩkapani.

Ia atoko itxa:

—Katakareri potorika itakarauatini ikapani. ⁴Takari iki itakaāpotakasaaki, okaāpotakasaaki, ātikaka irika kimapori tiniāpo. Kotipiriki apoka. Inikari imakinika. ⁵Apanakini irika kai auiniātaā. Poiōoka kipatxi auari, ininiā mokatanitika ipitxaka. ⁶Txamari, atokatxi papatakari inakasaaki, arikari iua takari. Otxiaroka, kotxi kona kakotsari. ⁷Apanakinipekana irika aanaia auiniātaā. Ininiā aanaia aneē takari takote. Aāpitsa iapinokari takari, oka txari. ⁸Apanakinipekana irika kipatxi erekariātaā. Ininiā iriuata. Ātiātaā āti takari iriuata seī oki pakini. Ātiātaā takari iriuata sesēta oki pakini. Ātiātaā āti takari iriuata trīta oki pakini. ⁹Kakenakokii, ininiā hīkenakotariko nisākire —itxa Xesosi.

Kākiti Mimarotakiniti Xesosi Sāpiretini Pirena

(Marko 4.10-12; Arókasi 8.9-10)

¹⁰Imoianariakori apoka Xesosimoni. Ipimaārina:

—Kinirepa sāpirenatxi atāo inakari oerekiko pisāpiretari kākiti? —itxarina.

¹¹Ininiā Xesosi:

—Kākiti xinikiniāri Teoso auītetxi ininiāua pirena, auapitika kaiāopokori ninoa mimarotakiniti, kotxi Teoso kona oerekana ninoa. Teoso oerekai hīte ninoa mimarotakiniti. ¹²Teoso sākire auakiti, iua sākire kīpitakari, Teoso sikari apikomoni imaroretxi iuamoni. Txamari Teoso sākire kenakotakari, isākire makīpitakati, imarore xapiti iuamoni auakari makatxakaānkako. ¹³Nisākirauatakasaaki kākitekata, nisāpiretana sāpirenatxi atāo inakari oerekiko, kotxi kokiri kākiti, iuaritika latamatari Teoso kamakiti. Kakenakokiri kākiti, iuaritika !imarotari Teoso sākire. ¹⁴Ininiā apokapeka Isafa sākire kitxakapirīka, kotxi iua sāpiretari Teoso sākire:

Hīkenakotapiikamari nisākire, iuaritika !himarotari.

Hītikapiikamari nikamakiti, iuaritika !himarotari,

¹⁵ kotxi !hinirekari himarotiniri atāo inakari. !Hinirekaikari nisākire hīkenakotini. !Hinirekaikari nikamakiti hātamatini. Hinirekaākamari, hātamatamariko nikamakiti. Hinirekaākamari, hīkenakotamariko nisākire. Hinirekaākamari, himarotamariko nisākire.

Hīkanapiriaākamako notamoni, nimaktxakamariko himaerekani, itxa Teoso.

¹⁶—Hītepekana, Teoso sikari erekari hītemoni, kotxi hōki atamatapitikari iua kamakiti. Hīkenakoki kenakotapitikari iua sākire.

¹⁷Atāo nisāpiretai. Itomaneri Teoso sākire sāpiretakani, apanakini kiki atāo inakari kamakani pakini kitxakapirīka nirekari atamatiniri hīte atamatakiti, txamari kona atamatarina. Inirekarina ikenakotinirina hīte kenakotakiti, txamari kona ikenakotarina —itxa Xesosi.

Katakareri Pirena Oerekiko
(Marko 4.13-20; Arókasi 8.11-15)

18 Xesosi sākiranātapanika:

—Hítakaōtxikari ikara sāpirenatxi atāo inakari oerekiko, katakareri pirena. Noerekai ikara. 19 Kākiti kenakotakasaakiri Teoso auītetxi ininiua pirena, imimarotakaniāri ikenakotakiti, kimapori kākiti katxaratakiti ikotaxiti atoko itxa iua ākixinire, kotxi Satanasi apoka iuamoni. Imaktxakari Teoso sākire iua ākixinireē apokakari. Teoso sākire takariki atoko itxa.

20—Takariki kai auiniātaā iriākari, Teoso sākire ipoxokoniritika apakapakari atoko itxa. 21 Itxama kona okanani aua, kotxi kona kakotsari. Omanatiko inakasaaki, inapetiko inakasaaki, Teoso sākire auikini xika, itakanapari Teoso sākire auikini.

22—Āti kākitipekana kenakotari Teoso sākire, txamari ixinikapikari tiitxi, nipokori, iparīka pakini. Ikinipoko ixinikapika, ininiā maerekaxiniretinoka itxa. Txineiro ipotxitini xika linirekaikari Teoso sākire. Takariki aanaia auiniātaā iriākari atoko itxa iua. Takari mariti atoko itxa iua ākixinire.

23—Āti kākitipekana ikenakotakasaakiri Teoso sākire, atāo iua auikari. Iua ākixinire kipatxi erekari atoko itxa. Takari mininiua atoko, iua kākiti minari atxiīti seī pakini kākiti Teosomoni isākire auikinina ĩkapani. Atxiīti iminari sesēta pakini kākiti. Atxiīti iminari trīta pakini kākiti Teosomoni isākire auikinina ĩkapani —itxa Xesosi.

Katsotati Ahoisi Atoko Inakaro

24 Iuaīkana Xesosi sāpiretari āti sāpirenatxi atāo inakari oerekiko. Ininiā ia atoko itxa:

—Teoso auītetxi ininiua ia atoko itxa. Teoso katakareri atoko itxa. Iua katakareri takari erekari takariki ikikioteē. 25 Āti ĩkanōkati ikinimane imakasaaki, imokaiakari apoka. Itakaro katsotati ahoisi atoko inakaro ahoisi sauaki. Kona !otxa. Iposo atoko ĩkorape itxa. 26 Takari aneēka atoko, oriua. Iuasaaki kākiti imarotapekari katsotati ahoisi atoko inakaro auapeka. Kona otxa. 27 Ininiā katakareri nitiriakori apoka iauītemonina. “Auītetxi, pite takaro takariki erekaro. Nanipa oina katsotati?” itxana ninoa.

28—“Amokaiakari takari,” itxa.

—“Pinirekatari amaporokiniri?” itxana initiriakori.

29—“Kona. Katsotati himaporokiniā, atxiīti himaporokaro nitakare apaka. 30 Hítakanapari imakinika aneinina ĩkapani. Oamikosaakirako, omaktxakaāka. Ininiā iuasaakiko nipaniātaiko hīte: ‘Merepanika

himakatzakaroko katsotati. Hāpotiitaro. Xaminamoni oka inaākako. Iposo atoko hāpotiitari ahoisi. Hītakari nikiena nīkatiko aikoti āki.”

Mostata Pirena

(Marko 4.30-32; Arókasi 13.18-19)

³¹Iuaīkana Xesosi oerekari āti sāpirenatxi atāo inakari oerekiko. Ininiā ia atoko itxa:

—Teoso auītetxi ininiua, kiki takiniro mostata iki ikikioteē atoko itxa. ³²Mostata iki axapitiki. Apanakini takariki apiata, iuaritika oaneēka atoko amananiikaro. Aamina otxaua. Ininiā kotipiriki ina. Ikamari ikoa okatiā —itxa Xesosi.

Tirekakari Pani

(Arókasi 13.20-21)

³³Xesosi iuaīkana sāpiretari sāpirenatxi atāo inakari oerekiko. Ininiā ia atoko itxa Xesosi:

—Teoso auītetxi ininiātaāua ĩkorapokoriti ia atokokana itxa. Sito kosekari tirekakari pani. Okoketari axapiti tirekakari pani kaiāopokori triko panikata, āparaākata. Eereka ikinika ipe tirekaāpota otxa.

Sākiretxi Atāo Inakari Oerekiko

(Marko 4.33-34)

³⁴Xesosi sākirauatakasaaki kākītikata, isāpiretari sāpirenatxi atāo inakari oerekiko. Ikara sāpirenatxinokara isāpiretari kākīti. ³⁵Ininiā kitxakapirīka Teoso sākire sāpiretakari sāpiretakiti apokapeka, kotxi iua txari:

Nisākirauatakasaaki kākītikata, nisāpiretari sāpirenatxi atāo inakari oerekiko. Itixi kamikosaakipanika aua kākīti mimarotakiniti. Ikara noerekako kākītimoni, itxa Teoso sākire.

Xesosi Sāpiretari Katsotati Pirena

³⁶Eereka Xesosi takanapana ninoa kākītipokoni. Iīroā aapokotxi. Imoianariakori apoka iuamoni. Itxana:

—Poerekaua ate ikara sāpirenatxi atāo inakari oerekiko, katsotati pirena, mixikanani pisāpiretakiti. Ate !imarotari —itxana.

³⁷Ininiā Xesosi:

—Hītari iaxitikiri, iua erekari oki taākari itxaua. ³⁸Itixi iua kikio atoko itxa. Teoso auītetakani takariki erekari atoko itxana. Kākīti Satanasi nakitiakori iua katsotati atoko itxana. ³⁹Katsotati takakari Teoso nakitiakori mokaiakari

itxaua. Satanasi itxaua. Itixi xipokini õti iua takari amiko õti atoko itxa. Teoso nitiriakori iaxitikini ninoa takari amakani atoko itxana. ⁴⁰Iua katsotati apotiitaäka, xaminamoni oka inaäka. Iua atokotxikana inaäka itixi xipokini õti. ⁴¹Hĩtari iaxitikiri iokanatanako initiriakori itiximoni. Apotiitarinako maerekati oerekakani. Apotiitarinako ikinimane maerekati kamakani. ⁴²Iposo atoko Teoso nitiriakori okana ninoa xaminamoni. Iuaã iteene itxiapatana. Akatsatsiriĩtauana. ⁴³Iuasaaki atão inakarínoka kamakani aua iotximerena Teoso auĩtetxi ininiãtaãua. Atokatxi iotximere atoko itxa ninoa iotximere. Kakenakokii, ininiã hĩkenakotariko nisäkire —itxa Xesosi.

Txineiro Kipatakoru Pirena

⁴⁴—Teoso auĩtetxi ininiua, txineiro itomanero kipatakoru atoko itxa. Oa txineiro kipataäka kikiu. Äti õti kiki napaãpotakasaaki, apokaru, ininiã iuaĩkana ikipataro. Iteene ipoxokoniua, ininiã ivẽtxitari ikinika itii, iua kikiu iamotini ikapani. Eereka sa itxa iua kikiu iamotini ikapani. Ikara atoko itxa Teoso auĩtetxi ininiua.

Pérora Inakori Pirena

⁴⁵—Teoso auĩtetxi ininiua, pérora iamotakari atoko itxa. Iua nitari pérora apia erekari. ⁴⁶Pérora iteene erekari apokiniã, ikinika itii ivẽtxita iua pérora iamotini ikapani.

Hetxi Pirena

⁴⁷—Teoso auĩtetxi ininiua hetxi ipoaã taãkari atoko itxa. Ikini sereti ximaki apotiita hetxi. ⁴⁸Ixãpokasaaki kaiotaroriti kosekaãpotari itakoãmoni. Iuaã kaiotaroriti iitopãka. Imereẽrina ximaki. Ximaki erekari kotariã itaka. Kãkiti maniãkiniti mapara oka. ⁴⁹Xipokatxi õtisaaki ikara atoko itxa. Teoso nitiriakori mereẽriko kãkiti. Mapara itakarina erekarini. Mapara itakarina maerekani. ⁵⁰Ininiã xaminamoni okanako kãkiti maerekati kamakani. Iuaã itxiĩtana. Akerakitatsiriĩtauana, kotxi patsiiri.

Kitxakapirĩka Oerekakori, Amaneri Oerekakori Pakini

⁵¹Xesosi pimaãna imoianariakori:

—Hĩte imarotatari ikara atoko inakari nisãpiretakiti? —itxa.

—Ari, aimarotapitikari —itxarina.

⁵²Ininiã Xesosi:

—Kaiõkatsopareri oerekikosaaki Teoso auĩtetxi ininiua imarotini ikapani, imarotari amaneri oerekakori, apaka kitxakari oerekakori. Kaapokori atoko itxa. Iua kaapokori makatxakari

apokaerekatakiti mareta ãki inĩkatakiti. Amaneri, kitxakari apaka imakatzaka.

Nasaree Auakani Kona Auakari Xesosi Sãkire

(Marko 6.1-6; Arókasi 4.16-30)

⁵³Ikara sãpirenatxi atão inakari oerekiko ixipokapiretaka atoko, Xesosi sipe. ⁵⁴Ikanapiriã Nasaree sitatxitimoni. Ininiã oerekarauata aiko Xoteoakori apotiitiniãtaãua. Ininiã kãkiti tsoriãkaãta isãkire ikenakotakasaakina. Itxana:

—Kiripa sikatari iua imarore? Kiripa sikaposotiiretari iua? ⁵⁵Aapokotxi kamakari ãkiri iua. Inoro Maria. Itariakori Txiako, Xoão, Simão, Xotasi pakini.

⁵⁶Itaroakoro uai apaka aua. Nanipa apaiaõkari ikinika imarore? —itxana.

⁵⁷Ininiã kona inirekarina iua. Ininiã Xesosi txari:

—Teoso sãkire sãpiretakari paxitaãka, txamari Teoso sãkire sãpiretakari itixineẽ auakasaaki, inirimane sauaki auakasaaki, lipaxitaãka. Isãkire !auikaãka —itxa Xesosi.

⁵⁸Ininiã Xesosi kona kamari itori Teoso posotiire iuaã Nasaree sitatxiti auakani ĩkapani, kotxi kãkiti iuaãkini !auikari isãkire.

Xoão Kapatxisareri Ipinini Pirena

(Marko 6.14-29; Arókasi 9.7-9)

14 ¹Iuasaaki Erotxi Kariréia auakani auĩte txaua. Iuasaaki ikenakopiretari Xesosi pirena. ²Iuasaaki itxana initiriakori:

—Iua Xoão kapatxisareri ipĩpekariika õkitapekaua. Iuakara Xesosi txaua. Ininiã uatxa apiata iposota ikamini —itxa Erotxi.

Txamari Xesosipitikara. Kona Xoãoni iua. ³Mitxi Erotxi paniãtari Xoão kapatxisareri iaxirikiko, itari Piripi ĩtanoro xika. Ouãka Erotxia. Oomanatari Xoão, ininiã itakaãka kateia ãki. ⁴Mitxi Xoão kapatxisareri txari Erotximoni:

—Kona erekari pitari ĩtanorokata pisiriĩkini. !Apakata pikamakiti —itxa.

⁵Ininiã Erotxi nirekamari okiniri Xoão, iuaritika kona okari, kotxi ipĩkana Xoão sãkire auĩãkani. Ninoa uãkatari Xoão, Teoso sãkire sãpiretakari ininiua. ⁶Erotxi kamari kiiniri auini õti pirena. Erotxia ãkero serena iua Erotxi apisatoõ, ikemaĩtxitakini apisatoõ pakini. Ininiã oserenini kamari ninoa poxokoniuatini. ⁷Ininiã Erotxi poxokoniuatakasaaki itxa:

—Nisikai imakinika pinireẽkiti pitemoni —itxaro oa.

Ininiã osari onoromoni. ⁸Onoro nirekari Xoão okiko, ininiãkara oamanaãri Xoão kii prato nopini. Ininiã otxari Erotximoni:

—Xoão kapatxisareri kii ninireka prato nopini.

⁹Ininiã Erotxi kona erekaxinireri. Kipa ikama? Kotxi ikinimane ikemaïtxitakini kenakotari isikaenetiniri oa nirekakiti oamoni. Ininiã iua paniãtari oa nirekakiti sikiko oamoni. ¹⁰Ininiã iua iokanatarari sotatoakori kateiamoni Xoão kii tsotakiko ïkapani. ¹¹Ininiã ninoa minari ikii prato nopini. Isikarina oamoni. Oa sikari onoromoni. ¹²Eereka Xoão moianariakori sari kateiamoni. Ninoa anikari ïito akauarimoni. Iuaã ikatarina. Eereka ninoa sari Xesosimoni. Isãpiretarina Xesosi Xoão ipinini pirena.

Sïko Mio Kãkiti Xesosi Sikakienatini

(Marko 6.30-44; Arókasi 9.10-17; Xoão 6.1-14)

¹³Xesosi kenakopiretakasaakiri Xoão okiko, ipotorika kanauaã. ãtiãtaã iuanani auini nire isa, txamari itomaneri kãkiti imarotari Xesosi sinimoni. Ininiã itakanaparina sitatxi. Isana imiriã iua sinimoni. ¹⁴Iua kanïkiïtakasaaki, atapari kãkiti apokaãpotini. Ininiã iua amonïkana ninoa. Imakananitana amianatakani.

¹⁵Mapiãpeka inakasaaki, imoianariakori apoka iuamoni. Itxarina:

—Mapiãpeka. Uai aapokotxi mauakaniãtaã, ininiã uai nipokori !auari. Piokanatarari kãkiti aapokotximoni, ininiã iamotarina nipokori iuaãtaã —itxana imoianariakori.

¹⁶Xesosi apakapapiretana:

—Nota kona iokanatanana isinina. Hïtekarako sikakienatana ninoa —itxa Xesosi.

¹⁷Ininiã ninoa:

—Komiri ipi ipi ãti pakininokara aua atemoni. Ipi ximaki apaka aua. !Apakata —itxana.

¹⁸Ininiã Xesosi:

—Himina uai notamoni —itxa.

Ininiã imoianariakori minari Xesosimoni. ¹⁹Eereka iua paniãtari kãkiti xiti topãkini. Eereka ikosekari komiri sïko, ximaki ipi pakini. Ininiã iua ionakaãta iaxiti. Itxari:

—Niri pisikakiti peerekari —itxa.

Ininiã imaxinïkaãpotari. Isikaãpotana imoianariakori. Ninoa sikaãpotana kãkiti. ²⁰Ikinikana nipokota. Ikinimane:

—Kamitopekaua ate —itxana.

Eereka imoianariakori apotiitari itetakori. Ininiã xãpokaka itxarina tosi kotari. ²¹Iuasaaki sïko mio kikiãkini nipokota. Sitoãkini, amarini pakini nipokota apaka.

Xesosi Ipoa Nopini It̄ipokotini

(Marko 6.45-52; Xoão 6.15-21)

²²Eereka ipaniātana imoianariakori kanauaã iereētiniua iua apisa ĩpiriāt̄inina ĩkapani. Ninoa sipeka. Iua kaikota kãkiti itakapiretini nire. ²³Kãkiti itakapiretanapaka atoko, Xesosi sari oxiratarimoni, Teoso imisãkiretini nire. ĩkanõkapeka inakasaaki, iuanani iuaã aua. ²⁴Iuasaaki kanaua ipoa apanĩkakiãpeka. ĩtima apiãkataro kanaua. Ininiã tsakati iteene apoãkata.

²⁵Imaropirĩkatapeka inakasaaki Xesosi sari ninoamoni. It̄ipokota ipoa nopini. ²⁶Imoianariakori atapakasaakiri Xesosi ipoa nopini it̄ipokotini, ninoa pĩkarauata.

—Kamiri napani —itxana.

Akiripoakatana. ²⁷Iuasaakipeka Xesosi:

—Kataparaxinire hĩtxako. Notara. Kona hĩpĩkarauatape —itxa.

²⁸Ininiã Petro sãkirauata:

—Apiananiri. Xesosi pininiãua, pipaniātano pitemoni napokini ipoa nopini —itxa Petro.

²⁹Ininiã Xesosi:

—Uai pina —itxari.

Ininiã Petro katxaka. Ipotorika ianini ipoa nopini Xesosimoni isini. ³⁰Txamari kataparari ĩtimati itikasaaki, ipĩkarauata, ininiã ipatapiã itairakaãpota. Ininiã iua akirikata:

—Apiananiri. Pimaĩkano.

³¹Iuasaakipeka Xesosi maĩkari iua. Itxari:

—Poiãoka pauikari niposotiire. Kinirepa kona atão pauikari? —itxa Xesosi.

³²Iuaĩkana morõkoka itxauana kanaua ãki. Iuasaaki ĩtima iotoka.

³³Imoianariakori kapotoreẽkaua Xesosi apisatoõ:

—Apiananiri pitxaua. Atãopitikara Teoso ãkiripitkarai —itxana.

Xesosi Makananitana Amianatakani Xenesareekini

(Marko 6.53-56)

³⁴Ipoa ĩpiriātana, Xenesaree tõpamoni apoka itxana. ³⁵Iuaã kãkiti imarotari Xesosi, ininiã iokanapireta kãkiti ninoa tixine takote auakanimoni:

—Amianatakani himina.

Ininiã kãkiti minari itomane amianatakani Xesosimoni.

³⁶Amianatakani amanaãri Xesosi:

—Pauritaua pimãka mapotomatare atakapiotini —itxana.

Ikinimane imãka takapiotakani makananitaãka.

Xoteoakori Iikite Pirena

(Marko 7.1-13)

15 ¹Iuasaaki pariseoakori, kaiökatsopareriakori pakini apoka Xesosimoni. Xerosareëkini ninoa. Ipimaärina Xesosi:

²—Kinirepa pimoianariakori kona kamari aätokiriakorini säkire iaöka, kotxi inipokotakasaakina, kona arokauakotauana —itxana.

³Ininiä Xesosi apakapapiretana:

—Hitepekana, kinirepa kona hite kamari Teoso säkire iaöka? Hite kamari hõereëkitinokara, ⁴kotxi Teoso txari: “Pipaxitariko piri. Pipaxitaroko pinoro.” Apaka Teoso txari: “Piri, pinoro pimisäkirepiretiniä, pokaäkako.” ⁵Txamari hite oerekari käkiti: “Käkiti auakiti iri, inoro pakini nirekiniä, iua manirekakaniäri isikiniri ninoamoni, isäpiretana: ‘Ia nota auakiti nisika Teosomoni.’” Ininiä !isikari ninoa nirekakiti ninoamoni. ⁶Ininiä hite oerekari käkiti mapaxitakanina iri, inoro pakini. Ininiäkara hite säkire hõereëkiti kipatari Teoso säkire. ⁷Hite txari: “Akamapitikari Teoso säkire iaöka,” txamari kona hite kamari. Atäopitikara Isaía säkire kitxakapirika. Iua säpiretari Teoso säkire hite pirena. Teoso txari:

⁸ Kamisirienererini ninoa käkiti. Ninoa säkireënanira ipaxitanona. Äkixinireëna !inirekanona.

⁹ Maxikatiika ninoa kapotoreëkaua nota apisatoö. Maxikatiika ninoa txano: “Ateosone pitxaua,” kotxi ninoa !oerekari nota säkire.

Ninoaka säkire oerekana, txamari “Teoso säkire asäpiretai” itxana.

Itxa Teoso Isaíamoni kitxakapirika —itxa Xesosi.

Äkixiniretxi Txiko Pirena

(Marko 7.14-23)

¹⁰Xesosi akiritana käkiti, ininiä itxana:

—Hikenakota himarotini !kapani. ¹¹Nipokori, piixiräkakiti kona kamatxikotari päkixinire. Pisäkire maerekati, pinamaä potoriäkari, iuara txikotapitikari päkixinire —itxa Xesosi.

¹²Iuasaaki Xesosi moianariakori apoka iuamoni. Itxarina:

—Pimarotatari pariseoakori !apokaarekatari ikara pisäkire ninoamoni?

¹³Ininiä Xesosi:

—Käkiti takari atoko itxa. Ininiä ikinika takari niri iaxitikiri mataäkiniti maporokaäkako. ¹⁴Kona himaäkatapena pariseoakori. !kiikakani mösiäreni atoko itxana. Mösiäreti mikiikiniäri mösiäreti, ikinipoko irikako aariko äki. Iua atokokana maerekati ötäkikiniäri maerekati, imakinika ninoa sari imisiritikoätaä —itxa Xesosi.

15Ininiã Petro:

—Poerekaua ate ikara sãpirenatxi atão inakari oerekiko. Ate limarotari —itxa.

16Ininiã Xesosi:

—Hite apanakini atoko hĩtxa atxiĩti? Kona himarotapanikari? **17**Himarotari. Nipokori hinamaã hĩxirãkakiti hĩtikakomoni isa. Eereka hĩtikatakasaaki, inapa. **18**Hisãkire hinamaã pokĩkakari potorika hãkixinireẽ. Iuara txikotari kãkiti ãkixinire. **19**Kotxi hãkixinireẽ hĩxinikakiti maerekati potorika. Okaniuatakatxi, ãti kãkiti ãtanorokata sirĩkiko nire, anokaretxi, ãtiriuatakatxi, misirieneretxi, ãti misãkirepiretiko pakini potorika hãkixinireẽ. **20**Ikara atoko inakarananira txikotari kãkiti ãkixinire. Kãkiti marokauakotakanuia kona txikotari ãkixinire —itxa Xesosi.

Xoteo Minakatoua Auikiniiri

Xesosi Sãkire

(Marko 7.24-30)

21Ikara atoko inaãka atoko Xesosi sipe. Isipeka Txiro, Sitoõ pakini tõpamoni. **22**Iuasaaki sito Kanaaãkero, iuaã auakaro, apoka Xesosimoni. Iteene oamanaãri: —Apiananiri, Tavii apika mekaniri, piamonĩkano. Maerekati matamatakoti auãtitaro namarite. Iua iteene misiritaro oa —otxari.

23Txamari Xesosi kona apakapapiretaro oa. Imoianariakori apoka Xesosimoni. Itxana:

—Piokanataro, osipekako. Atemoni ãtipirika oãkiripoanãta — itxana. **24**Xesosi apakapapiretaro oa:

—Niokanataãka Isaeokini ninĩkatini ĩkapani. Ninoa soti auĩte pĩpinanaãkani atoko itxana. Txamari pite kona Isaeokero. Pite ãto uãka —itxa.

25Iuaritika oa sito apoka iuamoni. Okapotoreẽkiau iua apisatoõ. Ininiã oa: —Apiananiri, pimakananitaro namarite —otxari.

26Ininiã Xesosi:

—Isaeokini amarini atoko. Nota ninoa iri atoko. Kona erekari amarini komirite nimixirikini, anãpamoni nisikini ĩkapani —itxaro.

27Ininiã oa:

—Ari, atãopitikara pisãkire. Anãpa atoko nitxaua, iuaritika anãpa nikari nipokori iriãkari kaapokori patapi koa —otxa.

28Ininiã Xesosi:

—Atãopitikara. Sito, pite iteene auikari niposotiire. Pinirekakiti nikamapitikako —itxaro.

Iuasaakipeka oimi erekapeka otxa.

Xesosi Erekapeka Txīkitakari Kākiti

²⁹Eereka Xesosi sari Kariréia poatimoni. Iuaã oxiratarini nopini topāka itxa. ³⁰Itomane kākiti iuamoni apoka. Ninoa minari iuamoni kākiti mōsiāreni, masākireni, matīpokotakani, apanakini amianatakani itomaneri pakini. Xesosi makananitana ninoa. ³¹Kākiti iuaã auakani tsorīkaāta, kotxi itikarina Xesosi makananitinina amianatakani. Kākiti masākireti sākirauatapeka. Kākiti matīpokotakati tīpokotapeka. Mōsiāreti, kōsiārepeka itxapeka. Ikinimane txari:

—Peerekari Teoso, Isaeo auakani Teosone —itxana.

Xesosi Sikakienatana Ipi Ipi Pakini Mio Kākiti

(Marko 8.1-10)

³²Xesosi akiritana imoianariakori. Itxana:

—Nota amonīkana naia kākiti. Ipi ōti, āti ōti pakini notakata auana. Uatxa kona minakati kona auari inikinina īkapani. Kona nota iokanatana ninoa natxiritika, kotxi arikama ipītāxititamana, irika itxamana —itxa Xesosi.

³³Ininiā imoianariakori txari:

—Nanipa ate apokari nipokori komiri naia kākiti asikakienatini? —itxana.

³⁴Ininiā Xesosi:

—Kipakinipa komiri aua hītemoni? —itxa Xesosi.

Ininiā ninoa:

—Setxi komiri, ātikaka ximaki axapitiri pakini —itxana.

³⁵Ininiā Xesosi:

—Hīpaniātana kākiti xiti topākini —itxa Xesosi.

³⁶Eereka imaīkari ninoa setxi komiri, ximaki pakini. Itxari Teoso:

—Erekapitikari ia komiri, ximaki pakini pite sikakiti.

Mapixinika itxari komiri, ximakikata. Eereka xanakaāpota itxari imoianariakorimoni. Ininiā ninoa xanakaāpotari kākitimoni. ³⁷Ikinika nipokota. Kamitopeka itxana. Imoianariakori xāpokakari setxi kotari nipokori itetakori. ³⁸Ipi ipi pakini mio kikiākini nipokotapeka, apaka sitoākini, amarini pakini. ³⁹Eereka Xesosi iokanatana kākiti aapokomonina. Iposo atoko iereētaua kanaua āki. Makataã tōpamoni isa.

Teoso Takaõtxikare

(Marko 8.11-13; Arókasi 12.54-56)

16 ¹Pariseoakori, satoseoakori pakini sari Xesosimoni. Inirekarina Xesosi kerokiniri, ininiã itxarina Xesosi: —Takaõtxikari, Teoso posotiire poerekaua ate, aãtamatiniri ìkapani, Teoso iokanatinii ìkorapokoriti aimarotini ìkapani —itxarina.

²Txamari Xesosi txana:

—Na noerekai. Mapiãnikata iaxiti pōkamarari inakasaaki: “Peereõtiri katana,” hìtxa. ³Iua atokokana ìkanōkapanika iaxiti pōkamarari, piākaxitita inakasaaki: “Āparaãnapani. Kataparari ìtimatipani,” hìtxa. Himarotapitikari takaõtxikari iaxiti auakari. Txamari kona himarotari Teoso kamanãtakiti ìkorakanani. Hìsãkirauatakasaaki, kãkiti erekarini atoko hìtxa, txamari maerekati hìkama. ⁴Kãkiti uatxarini !erekana. Itakanaparina Teoso. Hìte nirekari noerekinii Teoso takaõtxikare, iposotiire. Konapitini. Kona noerekai hìte. Kitxakapirika Teoso sãkire sãpiretakari Xonasi inakori auakasaaki, Teoso kamari posotiiretxi. Ikara atoko inakari posotiiretxi Xonasi auakasaaki, iuaìkana ikamapanikariko. Iua posotiiretxi Teoso takaõtxikare itxapanikaua hìte ìkapani. Iua takaõtxikarinoka Teoso takaõtxikare hìte ìkapani —itxa Xesosi. Iposo atoko Xesosi takanapana, sipe itxa.

Pão Tireẽkari Pirena

(Marko 8.14-21)

⁵Xesosi imoianariakorikata ìpiriãtari ipoa. Ipiniã apokasaakina, imoianariakori xinikaro pão imaxinĩkaretakitona. ⁶Iuasaaki Xesosi õtãkikana ninoa:

—Erepaniko. Pariseoakori, satoseoakori pakini pãote tireẽkari pamonõkoniri —itxana imoianariakori.

⁷Ininiã imoianariakori misãkiretakakaua:

—Pão amaxinĩkaretini xika Xesosi ikara atoko txaua ate —itxana imoianariakori.

⁸Xesosi imarotari imisãkiretakakiniuana, ininiã iua:

—Kinirepa himisãkiretakakaua, pão himaxinĩkaretini xika? Kona ìteene hãuikari ninikatini. ⁹Atauako kona kiĩkitepanikai hìte? Atauako himaxinĩkaretapekari pão sikonoka siko mio kãkiti nisikakienatini? Hìxinikariko kipakinipa kotari hìxãpokaka pão itetakoro? ¹⁰Atauako kona hìxinikatari ãti õti ipi ipi pakini mio kãkiti setxinoka pãoã nisikakienatini? Hìxinikariko kipakinipa

kotari hĩxãpokaka pão itetakoro? ¹¹Hĩte nõťãkikasaaki: “Erepaniko. Pariseoakori, satoseoakori pakini pãote tireẽkari pamonõkoniri,” ninakasaakii, kinirepa kona himarotatari kona pãoni ikara atoko nitxai hĩte? —itxa Xesosi ninoamoni.

¹²Iuasaakiika imarotarina kona pão tireẽkarini monõkori txaua. Imarotarina pariseoakori, satoseoakori pakini sãkirera, ninoa oereẽkitira, monõkori txaua.

Petro Auikari Xesosi Teoso Ākiri Ininiãua

(Marko 8.27-30; Arókasi 9.18-21)

¹³Xesosi sari Sesaréia-Piripi sitatxiti takote. Iuaã ipimaãna imoianariakori:

—Kipa kãkiti uãkatano nota hĩtari iaxitikiri?

¹⁴Ininiã imoianariakori:

—Ātikaka uãkatai Xoãoni kapatxisarerini iuaĩkana õkitikaua inakarii. Apanakini uãkatai Eríasini iuaĩkana õkitikaua inakarii. Apanakinipekana uãkatai Xeremiani iuaĩkana õkitikaua inakarii. Minakanisaaki ātikaka: “Āti Teoso sãkire sãpiretakarini iuaĩkana õkitikaua inakarii,” itxaina —itxarina.

¹⁵Ininiã Xesosi:

—Hĩtepekana, kipa hĩte uãkatano nota? —itxana ninoa.

¹⁶Simão Petro apakapapiretari:

—Teoso mereẽkitirai pite. Teoso mapĩkati ākirirai pite —itxari iua.

¹⁷Ininiã Xesosi:

—Simão Petro, Xoãõ ākiri, Teoso takari erekari pitemoni, kotxi kona kãkitini sãpiretai Teoso ākiri nininiua. Niri iaxitikirira sãpiretai. ¹⁸Nisãpirenauatapanika pitemoni. Piuãka Petro. Kai sorotxikana piuãka. Kai aapokotxiti kamakari mereẽri kai kaikori xiti itakini ĩkapani, aapokotxi iua kai nopini ikamini ĩkapani, ininiã aapokotxi ĩrika, kotxi kaikori nopini aua. Aapokotxi kamakari takari kai kaikori xiti. Iua kai atoko itxa ikara Teoso sãkire, isãpiretakiti pitemoni. Kãkiti nota nakitiakori naapoko atoko, ninoa sauaki nauini ĩkapani. Napotiinãtapanikari kãkiti naapoko ĩkapani. Satanasi tapara kona posotapaniri ixipokiniri ia naapoko. ¹⁹Nipaniãtai Teoso sãkire pisãpiretini kãkitimoni. Xavi nisikinii atoko itxa ikara, kotxi kãkiti auikasaakiri Teoso sãkire ĩroã Teoso auĩtetxi ininiãtaãua. Īkorapokoriti kãkiti kamakiti pimauritakaniã, Teoso tixine apaka !auritaãka. Īkorapokoriti kãkiti kamakiti pauiritiniã, apaka auiritaãka Teoso tixine —Xesosi txari Petro.

²⁰Iposo atoko Xesosi:

—Teoso mereẽkiti nininiua, apanakinimoni !kasãpirena hĩtxapeko —itxana imoianariakori.

Xesosi Săpiretari Ipinini

(Marko 8.31-9.1; Arókasi 9.22-27)

²¹Iua ôtisaaki Xesosi potorika isăpiretinina imoianariakori:
—Nisako Xerosareëmoni. Iuaã kiomătxiakori, kaiôkatsoparerini, sasetotxi auîteakori pakini misiritanoko. Iposo atoko oka ninaãkako. Ipi äti ôtisaaki iuaïkana nôkitikaãkako. Iuaïkana aua nitxako —itxana.

²²Ininiã Petro misăkiretari Xesosi iuanoka inakasaaki. Itapararitika itxari:
—Konapitini, kona ikara atoko inakari kona auapani pitemoni, Apiananiri. Kona Teoso auritapaniri ikara atoko piniko —itxari.

²³Ininiã Xesosi kirioka Petromoni.
—Pisipiniikaua Satanasi. Nikimapore katokapareri atoko pitxa, kotxi pite nireëkiti kăkiti nireëkiti atokotxikana. Pite nireëkiti kona Teoso nireëkiti atokoni —itxari.

Xesosi Moianari Atăo Inakari

(Marko 8.34-38; Arókasi 9.23-27)

²⁴Iposo atoko Xesosi misăkiretana imoianariakori:
—Notakata kinirăo sika pinakasaaki, piteka nireëkiti kona pinirekape. Notakata kinirăo sika pinakasaaki, nota misiritiko atokokana pimisiritaãkako. Ia atoko pinirekiniã, notakata pisapitikako. ²⁵Pite ätipirika kaminiãri pite nireëkitinoka, ininiã pinireëkiti xipokapitikako pitekata. Pite nireëkiti pimanirekakaniã, nota săkire pauikini xika, Teoso iokanapirena erekari pisăpiretini xika, pite auapininiika txako Teosokata. ²⁶Atxiiti papakapari ikinipoko tiitxi, ikini itixiti auakani tii, pinakiti ïkapani. Atxiiti iua tiitxi xika kona pikïpitari Teoso săkire, ininiã kona pikaikota ätipirika Teosokata. Ikara atoko ininiã, erekari atxiiti ikinipoko tiitxi auinii? Konapitini. Apiaerekata Teosokata ätipirika pikaikotini. !Apakata kăkiti ïkitxitiniri Teoso, iuamoni isini ïkapani. ²⁷Nota hitari iaxitikiri apokako ninitirikorikata. Iuasaaki niri iotximeretxikana nota iotximeretako. Iuasaakirako erekari isika erekari kamakanimoni. Iparïkana iki isika iparïkana iaôka. Txamari imisiritanako maerekati kamakani. ²⁸Atăopitikara nisăpiretai hïte. Uai uatxa aua kăkiti, ninoa imarotapanikariko nota hïtari iaxitikiri auïtetxi nininiu. Ikara imarotininina apisa kona ipinapanikana —itxa Xesosi.

Moisesi, Erăsi Pakini

(Marko 9.2-13; Arókasi 9.28-36)

17 ¹Seisi ôti napaka atoko Xesosi anikana Petro, Txiako, Xoão pakini. Xoão Txiako itari. Ikanïkana oxiratari nopinixiti. Ninoanani anika iuaã. ²Iuaã

ninoa atamatari iua. Ipinimonipo itxapeka. Itoõ iotximere atokatxi iotximere atoko itxa. Imäka serõka ipinikare atoko itxa. ³Iuasaakipeka Moisesi, Eríasi pakini tokiã iuaã, misäkireta itxarina Xesosi. ⁴Ininiã Petro akiritari Xesosi:

—Apiananiri, erekapitikari uai aãuini. Pinirekiniãri, nota kamari ipi ãti pakini papiri uai. Pite nakiti ìkapani, Moisesi nakiti ìkapani, Eríasi nakiti ìkapani nikama.

⁵Petro sãkirauanãtakasaaki, katxiãri pomẽkoriri ninoa nopini apoka. Katxiãri ãki Teoso txari:

—Ere namarite, nitiretakiti. Napokaerekatari iua, kotxi ikamari ninirekakiti. Hïkenakotariko iua sãkire.

⁶Xesosi moianariakori ikara atoko inakari ikenakotakasaakina, iteene ipïkarauatana, ininiã iriãkatana xitipe. Itoõna ikipatana. ⁷Xesosi sari ninoamoni. Itakauakotaua ninoa nopini. —Hõkitikaua. Kona hïpïkarauatape —itxana.

⁸Ininiã itikapokotana. Xesosinoka aua.

⁹Oxiratarari xirata iokiriãipotakasaakina, Xesosi txana ninoa:

—Kona hïsãpiretapiri apanakinimoni hïtikakiti. Nota hïtari iaxitikiri nipina iuaïkana naua ninaka atokoikarako hïtikakiti mixikanani hïsãpiretako —itxana.

—Ateeneka —itxarina.

¹⁰Xesosi moianariakori pimaãri iua:

—Kinirepa kaiõkatsoparerini oerekaua: “Eríasi apokako Teoso mereëkiti apokini apisa?”

¹¹Ininiã Xesosi apakapapiretana ninoa:

—Ari, atãopitikara ninoa sãkire. Merepitpanika Eríasi apokapitika. Iua kamari imakinika iposope inini ìkapani. ¹²Ari, nisãpiretai, Eríasi apokapeka. Txamari kãkiti limarotari iua. Imisiritarina iua inireëkitina iaõka. Iua atokotxikana itxanonako nota hïtari iaxitikiri. Imisiritanona —Xesosi txana Petro, Txiako, Xoão pakini.

¹³Ininiã imoianariakori imarotari Xesosi sãkire. Eríasi, Xoão kapatxisareri itxaua.

Amarini, Maerekati Matamatakoti Auaïtotakiti Pirena

(Marko 9.14-29; Arókasi 9.37-43)

¹⁴Ikanapiriãkana atoko, itomaneri kãkiti apotiitiniãtaãua apokasaakina, kiki apoka Xesosimoni. Ikapotoreëkaua iua apisatoõ. ¹⁵Itxari:

—Apiananiri, piamoniãkari namarite. Maerekati matamatakoti auaïtotari iua. Atatsirauata. Xaminaã irikapika. Kãuaãriã ikomokapika. ¹⁶Niminamari namarite pimoianariakorimoni. Ninoa kona posotari erekapeka itxïkitakinirina.

¹⁷Ininiã Xesosi txari:

—!Kauikarei hïte. Maerekati kamakanii hïte. Kipakinikananipa Teoso nirekatari hïtekata nauini? Kipakinikananipa Teoso nirekatari hïte nimïteenekini? Himinari amarini notamoni —itxana.

¹⁸Apokaãka atoko, Xesosi txitari iua maerekati matamatakoti:
—Pisipe.

Ininiã iua maerekati sipe. Iuasaakipeka iua amarini erekapeka itxa.

¹⁹Eereka imoianariakori apoka Xesosimoni. Iuasaaki ninoanoka aua iuakata. Imisãkiretarina:

—Kanatokopa ininiãpa ate kona posotari maerekati matamatakoti aomitikini?

²⁰Ininiã Xesosi:

—Kona atãoni hãuikari nisãkire, ininiã kona hĩposotari homitikiniri iua. Atãoenepitikara nisãpiretai hĩte. Mostata iki axapitikiri.

Axapitipitika nisãkire hãuikiniã, mostata iki atoko nisãkire hãuikiniã, hĩposotari ia õtanoxiratarari hĩpaniãtini: “Pite oxiratarari, uai posipika, ikaimoni pisa,” ininiã oxiratarari sapitikamako. Hĩte posotari ikinipoko hinireẽkiti hĩkamini. ²¹Txamari himamisãkiretakaniãri Teoso, hinipokotini himatakanapakaniã Teoso himisãkiretini ĩkapani, ininiãra kona hĩposotari maerekati matamatakoti homitikini —itxa Xesosi.

Xesosi Iuaĩkana Sãpiretari Ipinini

(Marko 9.30-32; Arókasi 9.43-45)

²²Kariréia tõpa apokasaakina, Xesosi misãkiretana imoianariakori:
—Nota, hĩtari iaxitikirino mĩkapiritaãkako. Nisikaãkako kikiakorimoni inirekaãkitina ikaminina tĩkane. ²³Ninoa okano nota. Ipi ãti pakini õtisaaki iuaĩkana nõkitikauako, iuaĩkana aua nitxako —itxana ninoa.

Ikara inakari ikenakotakasaakina, imatinaniuatana.

Txineiro Teoso Misãkiretiko

Aikoti ĩkapani

²⁴Kapanaoõ sitatxiti apokasaakina, kikiakori sari Petromoni. Ninoa kiki apakaparo txineiro Teoso misãkiretiko aikoti nĩkatakani amanaãkito. Iprimaãrina Petro:

—Hĩte oerekakari sikataro txineiro Teoso misãkiretiko aikoti nĩkatakani amanaãkito? —itxarina iua Petro.

²⁵Ininiã Petro:

—Ari, isikapitikaro —itxa.

Eereka Petro ĩroã aapokotxi ãki ikara sãkiretxiti Xesosi isãpiretini ĩkapani. Xesosi sãkirauata, Petro masãkirauatakani apisa:

—Petro, ikini itixiti kipa sikataro txineiro auñtetxiakorimoni? Atauako auñteti nirimane sikataro? Atauako kãkiti ãtiãtaã ãkanikani sikataro? —itxari.

²⁶—Kãkiti ãtiãtaã ãkani sikaro txineiro auñtetximoni —itxa Petro.

—Ari atãopitikara. Ininiã kona auñteti nirimani sikaro txineiro iuamoni. Iuaritika asikapitikaro. ²⁷Txineiro amasikakaniã, txineiro apotiitakani !apokaerekataua. !Anirekari ikara atoko inakari. Ininiã ipoa pisa. Pokatsaãta. Pimanamãkaro ximaki merepitipanika pimaãkakito. Onamaã papokaro txineiro ota aãkitxirauatini ãkapani. Oa txineiro ota apakata nota sikakito ãkapani, pite sikakito ãkapani apaka. Panika. Pisikaro oa txineiro Teoso misãkiretiko aikoti nãkatakanimoni —itxa Xesosi.

Ininiã Petro kamari Xesosi sãkire iaõka.

Kiripa Kãkiti Apiatakari Txataua?

(Marko 9.33-37; Arókasi 9.46-48)

18 ¹Iuasaaki Xesosi moianariakori apoka iuamoni.

—Teoso auñteti ininiãtaãua, kipa kãkiti apiatakari txataua? —itxana.

²Xesosi akiritari amarini axapitiri. Ninoa apisatoõ taka itxari.

³—Atãopitikara nota sãkire. Himaerekani himatakanapakanisaaki, Teoso nireẽkiti himakamakanisaaki, amarini axapitiri atoko himinakanisaaki, kona hãspani Teoso auñteti ininiãtaãua. ⁴Ia amarini axapitiri !iuikaua. Kãkiti ia amarini atoko inakarira, iuaka poiãotakiniãua, iuara apiatakari itxaua Teoso auñteti ininiãtaãua.

⁵Nota nireẽkiti pikamakasaaki, pipoxokoniritika papakapiniãri amarini ia atoko inakari pinakasaaki, papakapano nota apaka —itxa Xesosi.

Maerekati Oerekakari

(Marko 9.42-48; Arókasi 17.1-2)

⁶Xesosi sãpirenauatapanika:

—Kãkiti txãkitakiniãri amarini, nota sãkire auiãkari, maerekati ikamini, !apakata. Erekamariko kai mitari iua kãkiti maerekati oerekakari iaxirikanokitaãkamako, iposo atoko ipoa apanãkakiã okaãkamako ipinini ãkapani. ⁷Kãkiti ikini itixiti auakani misiritaãkako, kotxi auari kãkiti maerekati apanakini kamini txãkitakakani. Auapika kãkiti ikara atoko inakani. Ninoa misiritaãkako. ⁸Piuako txãkitakiniãri maerekati pikamini, ininiã pitsotakari, oka pitxariko. Pikiti txãkitakiniãri maerekati pikamini, ininiã pitsotakari, oka pitxariko.

Kotxi maerekati pikaminiã arikatxi maxipokatimoni pokaãkako. Apiaerekata mauakotikai pauini ãtipirika Teosokata. Apiaerekata makititikai pauini ãtipirika Teosokata. Pauritiniãri maerekati pikamini txíkitaãkari pitekata ikaikotiniã, ininiã pite kamari maerekati apaka, ininiã arikatxi maxipokatimoni pokaãkako. ⁹Iua atokokana poki txíkitaãkariã maerekati pikamini, pimaporoka, oka pitxariko. Kotxi maerekati pikaminiã, arikatximoni maerekani misiritikoãtaã pokaãkako. Apiaerekata Teosokata ãtipirika pauini ãti pokinoka pauini. Kona pauritapiri maerekati pikamini txíkitaãkari pitekata ikaikotini —itxa Xesosi sãkire.

Soti Auíte Pïpinanaãkari

(Arókasi 15.3-7)

¹⁰—Ikinipoko amarini pipaxitako, kotxi niri tixine aua niri nitiriakori. Ninoa nïkatari amarini. Niri apisatoõ ãtipirika initiriakori auapika, ininiã kãkiti mapaxitakaniãri amarini, isãpiretarina niri. ¹¹Nota hïtari iaxitikiri napoka ïkorapokoriti kãkiti pïpinanaãkani atoko inakani napokini ïkapani, kotxi ïmarotarina Teoso kimapore.

¹²—Kiãtokopa itxa hïxinikakiti? Kiki aua ipiraakori soti auíte seï pakini. Txamari ãtika pïpinanaka. Kiãtokopa itxa? Itakanapari ipiraakori novëta novi pakini. Isari oxiratarimoni. Initari iua pïpinanaãkari. ¹³Ipiraakori novëta novi na pïpinanaka, ininiã ipoxokoniuata. Apokasaakiri iua pïpinanaãkari, iteene ipoxokoniuata. ¹⁴Iua atokokana hïri iaxitikiri kona nirekari amarini ãtika pïpinanakini. Hïri nirekari imakinika amarini ïmarotini iuamoni sikari apo —itxa Xesosi sãkire.

Maerekati Pitemoni Kamakari

¹⁵—Pitari nisãkire auíãkari kaminiãri maerekati pitemoni, ininiã pisa iuamoni. Pitenoka pisa iuamoni. Iuanani pimisãkiretako. Põtãkikiniri ikïpitakasaaki, pimoianari iuaikana itxapekua. ¹⁶Põtãkikiniri imakïpitakanisaaki, ipi kãkiti panikako iuamoni. Ipi minakanisaaki ãtika panika iuamoni. Ininiã iuaikana põtãkikari iua maerekati kamakari. Iuasaaki pitekata sikani apaka õtãkikari. Kotxi Teoso sãkire iõkatsopatakori oerekaua kãkiti sãkire kenakotakani, kãkiti kamakiti itikakani ipi ãti pakini auiniã, apakata apanakini atão inakari ïmarotini ïkapani. Ipi ãti minakanisaaki, ipi apakata. ¹⁷Ninoa pitekata sikani sãkire imakïpitakanisaaki, pisãpiretana kãkiti Teoso misãkiretikoãtaã apotiitakaniua. Ninoa ikinipoko Teoso sãkire auíãkani õtãkikariko iua. Imakïpitakanisaakiri ninoa sãkire, himarotari atão maerekati kamakari itxaua iua. Teoso sãkire mauíãkati atoko itxaua iua, kotxi kona inirekari õtãkikiko. Ate mokaikari moianari atoko itxaua —itxa Xesosi sãkire.

Pauiritakiti, Pimauritakiniti Pakini

18—Atāopitikara nitxai hīte. Īkorapokoriti kākiti kamakiti himauritakiniti, Teoso tixine apaka lauritaāka. Īkorapokoriti kākiti kamakiti hāuiritakiti, apaka auiritaāka Teoso tixineē.

19—Apikomoni ia nisāpiretai. Pite xinikakitixikana āti xinikiniā apaka, hinirekakiti hamanainiāri Teoso, niri iaxitikiri sikapitikai hamanaākiti.

20Kākiti apotiitakasaakiua nota ixinikinina ĩkapani, nota ninoakata aua. Atxiīti ipi ātinoka aua. Atxiīti ipinoka aua. Iuaritika nota aua ninoakata —itxa Xesosi.

Nitiritxi Āti Matiretakati

21Petro sari Xesosimoni, pimaā itxari Xesosi:

—Apiananiri, kipakinikatapa napakapari nitari, maerekati ikaminano ātipirika inakasaaki? Setxikata atxiīti?

22Ininiā Xesosi:

—Kona, kona setxikatani papakapari iua. Setxikata setēta papakapari iua, ininiā ātipirika papakapariko.

23—Apikomoni noerekai papakapiniri kākiti, maerekati ikamakasaaki pitemoni. Teoso auītetxi ininiua patrão ia atoko inakari itxa. Ia patrão nirekari initiriakori iĩkitxitiniri iua. 24Ininiā iua iaōtaro txineiro isikakitopeka. Iuasaaki initiri minaāka iuamoni. Mitxipeka iua patrão sikari tesi mirão txineiro ota iua initirimoni. Txineiropokoni. Oa txineiro isikasaaki, itxari initiri: “Āti ōti iuaīkana pisikano oia nitxineirote,” itxari initirimoni. Txamari, lisikaro, kotxi loāuaika. 25Kona katxineiroteri. Ininiā ipatrãoite paniātari ivētxitiko iua, ĩtanoro, imiakori, itii ikinipoko, ipatrãoite iĩkitxitini ĩkapani. 26Iua initiri ikara inakari sākiiretxiti ikenakotakasaaki, ipatrãoite apisatoō ikapotoreēkaua. Itxari iua: “Piātaparoko. Ikinika pitxineirote nisikaiko,” itxari ipatrãoitemoni.

27—Ininiā ipatrãoite amonīkari. “Kona ninirekaikaro nitxineirote pisikinino.” Ininiā auiritari isini.

28—Ininiā sipe itxa. Iua nitiritxi mitxi sikapekaro txineiro iua inakito seī ota āti ipatrãoite nitirimoni. Poiāonoka oa txineiro. Iuasaaki, aapokomoni isikasaaki, aōkitari iua āti nitiritxi ipatrãoite nitiri. Imaīkari inoakiā. “Uatxa pisikano nitxineirote,” itxari.

29—Ininiā imoianari kapotoreēkaua iua apisatoō. “Piātaparoko. Ikinika pitxineirote nisikaiko,” itxari.

30—Txamari mitxiri nitiritxi: “!Niātapaikaroko,” itxari. Ininiā kateiamoni ieretakakitākari imoianari txineiro xika. “Ikinika nitxineirote pisikasaakiikanoko, pikatxakako,” itxari. 31Ikara inakari ene apanakini

iua patrão nitiriakori kenakotakasaaki, ninoa naiataua. Ininiã isana ipatrãotemonina. Isãpiretarina initiri iokanatiniri äti initiri kateiamoni. ³²Ininiã iua patrão akiritari iua initiri: “Pite maerekati pitxaua, kotxi kita pite amanaãno nota niamonikinii, ininiã piikitxitinino !nirekaika. ³³Kinirepa kona pite amonikari pimoianari nota amonikinii atokokana? Kona erekai,” itxari.

³⁴—Ininiã ipatrãote iteene naiataua. Iokanatarari iua kateiamoni imisiritikomoni ipatrãote txineirote okinika imasikakanisaaki.

³⁵Ininiã Xesosi xipokapiretari ia isãpirena:

—Niri iaxitikiri iua atokokana txaike hïte, maerekati äti kamakasaakii hïtemoni himamaxinikaretakaniã hãkixinireẽ —itxa Xesosi.

Kiki Ìtanorokata Itakanapakakini

(Mateo 5.31-32; Marko 10.1-12; Arókasi 16.18)

19 ¹Ikara inaka atoko Xesosi potorika Kariréia tōpa. Isa Xotéia tōpamoni uini Xotão ipiniã. ²Iuaã itomaneri kãkiti sari iuamoni. Erekapeka itxikitakana amianatakani.

³Pariseoakori apaka sari iuamoni. Inirekarina Xesosi kerokiniri isãkire. Ininiã ipimaãrina Xesosi:

—Auiritaãka atxiiti kiki takanapiniro ìtanoro, itakanapiniro inirekasaaki? —itxarina.

⁴Ininiã Xesosi:

—Hïte imarotapekari ia Teoso sãkire iökatsopatakori:

Kitxakapirika merepitipanika ikinipoko Kamakari kamari kãkiti, kiki inini, sito onini apaka ikamari kãkiti.

⁵Ikara atoko ininiã, kiki takanapari iri, inoro pakini, ìtanorokata auini ìkapani, ininiã ninoa ätika atoko itxauana, itxa Teoso sãkire iökatsopatakori. ⁶Ininiã kona ipi !itxaikauana. Ätika itxauana. Ikara atoko ininiã, !erekari kãkiti kaiarikiniri Teoso apotiitakini —Xesosi txana ninoa.

⁷Ininiã ninoa pariseoakori pimaãri:

—Ikara atoko ininiã, kinirepa Moisesi paniätari kiki iökatsopatiniri aãtsopa, ìtanoro itakanapini aãtsopate, ininiã eereka auiritari iua iokanatiniro oa?

⁸Ininiã Xesosi apakapiretana:

—Moisesi auiritai hïtanoro hïtakanapini, kotxi paikori hïxinire. Teoso nireëkiti himanirekakani xikara, Moisesi auiritai hïtanoro hïtakanapini. Txamari kitxakapirika merepitipanika kona kiki takanaparo ìtanoro. ⁹Ininiã nitxai hïte, kiki takanapiniãro ìtanoro, ätikata masirikatoka, iua kamari maerekati.

Itakiniãro ãto sito, maerekati apiata ikama, kotxi !imaãkatari Teoso paniãtakiti. Oa itakanapakito taãkari apaka kamari maerekati —Xesosi txana ninoa.

¹⁰Ininiã imoianariakori ikara ikenakotakasaakina, itxarina Xesosi: —Ïtaniritxi, ïtanorotxi !auritaãka itakanapakakinina, ininiã erekapiimana imïtaniriuatakanina —itxarina.

¹¹Ininiã Xesosi:

—Erekapitikari kãkiti ïtanorouatini. Ætikakanoka Teoso kona nirekari ïtanorouatinina. ¹²Ixika auapitika kãkiti mïtanorouatakani. Kotxi ãtikaka kiki auakasaaki, iïtona kona apakata ninoa takiniro sito. Apanakinipekana ikisauakatsikitiko xika kona ninoa posota itakinirona sito. Apanakinipekana kona nirekari ïtanorouatini Teoso auïtetxi ininiãua ãtipirika isãpiretini ïkapani. Teoso manirekakaniãri pite ïtanorouatini, ininiã kona pïtanorouatape —itxa Xesosi.

Xesosimoni Amarini Apokini

(Marko 10.13-16; Arókasi 18.15-17)

¹³Iposo atoko kãkiti minana amarini Xesosimoni. Inirekarina ninoa kii nopini iuako itakini. Inirekarina Xesosi misãkiretiniri Teoso amarini ïkapani. Txamari imoianariakori txitana. !Auiritana amarini anikinina Xesosimoni. ¹⁴Ininiã Xesosi txana imoianariakori: —Hãuiritanako amarini notamoni apokini. Kona hïotokakapena notamoni apokinina. Kotxi kãkiti Teoso auïtetakani amarini atoko itxauana —itxana.

¹⁵Ininiã iuako itaka ninoa kii nopini. Iposo atoko ïkorape itxa.

Ætokori Ito Txineiroteri

(Marko 10.17-31; Arókasi 18.18-30)

¹⁶Ætokori apoka Xesosimoni.

—Koerekereri erekarii, kiripa erekari nikama ãtipirika Teosokata nauini ïkapani? —itxari.

¹⁷Ininiã Xesosi:

—Kininiãpa “erekari” pitxano? Kãkiti erekari !uari. Teosonanira erekari. Teosokata ãtipirika pauini pinirekiniã, pikamariko Teoso paniãtakiti.

¹⁸—Ïkiripa? —itxa.

Ininiã Xesosi:

—!Pokaniuatape. !Pisirïkape ãti ïtanorokata. !Pïitiriuatape. Poxiene !pikamape. ¹⁹Piri, pinoro pakini pipaxitako. Pitiretanako apanakini, piteka pitiretiniua atokokana, pitxapaniko —itxari.

²⁰—Nikamapitikari ikara atoko pinakiti. Kiripa apikomoni nikamaã Teosokata ãtipirika nauini ïkapani? —itxari.

21—Ikinika kinirão kamaka pinakasaaki, ikinika pitii pivētxitako. Txineiro papakapakito pisika kākiti matxineirotenimoni. Ikara atoko inakari pikaminiã, Teoso tixine papokasaaki ikinipoko erekari auiniiko pite. Pitii pivētxitaka atoko, notakata sa pitxako —Xesosi txari.

22Iua ātokori ikara ikenakotakasaaki, isipe. Imatinaninoka itxari ātokori, kotxi kaiãori itii. !Inirekari itii ivētxitini. 23Ininiã Xesosi txana imoianariakori:

—Atãopitikara ia nitxai hĩte. Pamimari katxineiroterini auĩtetiniri Teoso. 24Apikomoni nisãpiretai. Atauako kamero napatari ākorike sonakiã? Apia mimari kākiti katxineiroterini auĩtetiniri Teoso —itxana.

25Xesosi moianariakori ikara ikenakotakasaakina, itsorĩkaātana. Ninoa uãkatari katxineiroterinimoni txineiro aua, kotxi Teoso apokaerekatana ninoa, ininiã txineiro isika ninoamoni, ninoa uãkatakiti. Ininiã ninoa pimaãri:

—Katxineiroteri maposotakaniãri Teoso tixinemoni isini, kipa posotari iuaã isini? —itxanãtana.

26Xesosi atamatana. Apakapapiretana:

—Kãkitika kona posotari. Teoso posotari ikinipoko ikamini.

27Petro misãkiretari Xesosi:

—Atepekana, ate takanapapekari ikinipoko pitekata asini ĩkapani. Ikara atoko aniniã, kiripa ate apakapako? —itxari.

28Ininiã Xesosi:

—Atãopitikara nitxai hĩte. Nota, hĩtari iaxitikiri niitopãkako auĩtetxi itopanere nopini. Iuasaaki ikini itixiti amaneri itxauako. Ikinipoko atamatanoko nota hĩtari iaxitikiri iotximere. Iuasaaki hĩte nisãkire kĩpitakanii apaka topãkako auĩtetxi itopanere nopini. Iua iitopaneretxi tosi pakini. Tosi nirimanetxi Isaeo tixine auakani auĩteakori hĩtxauako. 29Atxiĩti nota ĩkapani pitakanapari paapoko, pitariakori, pitaroakoro. Atxiĩti nota ĩkapani pitakanapari piri, pinoro, pamarite. Atxiĩti pitakanapari pikikiote nota ĩkapani. Ikara pitakanapakasaaki nota ĩkapani, apiata papakapariko. Itori papakapariko. Ikara atoko pininiã nota ĩkapani, ātipirika paua Teosokata. 30Itori kākiti apiarini uatxa, itixi xipokini õtisaaki poiãorini itxapekauana. Uatxa itori kākiti poiãorini, apiarini itxapekauana itixi xipokini õtisaaki —itxa Xesosi sãkire.

Ova Takakoriãtaã Parĩkauatakani

20 ¹Xesosi txari:

—Teoso auĩtetxi ininiua ia kakikioteri atoko itxa. Ia kakikioteri takapekari txipokori ova inakoro ikikioteẽ. Ovanoka itaka. Oiõpeka

onakasaaki, iua kakikioteri potorika ìkanõkapanika. Initari parĩkauatakani ova amakani ìkapani. ²Aõkitakasaakina, ipimaãna: “Hinirekatari parĩkatxi?” itxa.

—“Ari, anirekapitikari,” itxana.

—“Atauako ãtoka txineiro ota pirata kamakori apakata ãti õti pokamara piparĩka ìki ìkapani?” itxana.

—“Ari, apakatapitika,” itxana. Kotxi ãtoka ota pirata kamakori iuasaaki atão parĩkatxi ìki ãti õti pokamara kãkiti parĩkauatini ìki. Ininiã itakaremoni iokanatana iparĩkauatinina ìkapani.

³—Novi oarape inakasaaki iuaĩkana ipotorika. Nipokori vëtxitikoãtaãmoni isa. Iuaã atamatana kãkiti maparĩkauatakani. ⁴Ininiã imisãkiretana: “Hĩte apaka atxiĩti nirekatari hĩparĩkauatini nitakareãtaã, ininiã niĩkitxitai atão inakari hĩparĩka ìki,” itxa. Ininiã ninoa apaka sari.

⁵—Apaniãxitipeka inakasaaki iuaĩkana iokanatana apanakini parĩkauatakani itakaremoni. Itinĩtikitakasaaki iuaĩkana iokanatana apanakini parĩkauatakani itakaremoni. Mitxi isãkire atokokana itxa isãkire ninoamoni. ⁶Mapiãnikata takotepeka inakasaaki iuaĩkana isa parĩkauatakani initini. Apokapanikana maparĩkauatakani. Ipimaãna: “Kinirepa ia õti maparĩkauatakanika hĩtxa?” itxana.

⁷—“Kotxi kona kãkiti sikaua parĩkatxi,” itxarina.

—“Nitakareãtaã hĩsa. Iuaã hĩparĩkauata. Hĩte apakapariko hĩparĩka ìki erekari,” itxana.

⁸—Ìkanõkapeka inakasaaki kakikioteri akiritari initiri apiari: “Parĩkauatakani pakirita. Piĩkitxitana. Merepanika piĩkitxitana kikata parĩkauatakani. Eereka piĩkitxitana tinĩtikita parĩkauatakani, pitxaãpotako,” itxari.

⁹—Kikata parĩkauatakani imakinikana apakapari ãtoka txineiro ota pirata kamakori. ¹⁰Kikiãkini ìkanõkapanika parĩkauatakani ikara itikasaakina, oãkatarina: “Ate apakaparoko apiatako aparĩka ìki,” itxamana. ãtoka txineiro ota pirata kamakoro imakinikana apakapana. ¹¹Txineiro apakapakana atoko, omanãkarauatana. “!Erekari kakikioteri,” itxanãtana. ¹²Ininiã ninoa txari iua: “Naia kikata parĩkauatakani poiãoka iparĩkauatana. ãto oaranoka iparĩkauanãtana. Ate parĩkauata ikiniõtika kapatakariã. Ate parĩkauatapitipo, txamari pite ìkitxitaua ate naia piĩkitxitini atokokana. Kona erekai,” itxarina.

¹³—Iua kakikioteri apakapapiretana: “Nitiretakini, kona nota misirienetai hĩte. Ìkanõkapanika nipimaã: ‘Atauako ãtoka txineiro ota pirata kamakori apakata ãti õti pokamara piparĩka ìki ìkapani?’ nitxai mixikanani. Ininiã hĩte: ‘Ari, apakatapitika,’ hĩtxa. Ininiã na nimisirienetai hĩte. ¹⁴Ininiã txineiro nisikakito hanikaika. Haãpokomoni hĩsipeka. Nota nirekari niĩkitxitinina hĩte tikini parĩkauatakani hĩte niĩkitxitini iaõka. ¹⁵Atauako kona erekari nota txineirote ninirekakitimoni nisikini? Hĩte xikotano, erekari nikamini xika,” itxana ninoa.

¹⁶Xesosi xipokari isãpirena:

—Itori kãkiti apiarini uatxa, itixi xipokini õtisaaki poiãorini itxapekauana. Uatxa itori kãkiti poiãorini, apiarini itxapekauana itixi xipokini õtisaaki. Teoso aiatana kaiãopokori kãkiti itixine isinina ãkapani, txamari poiãonoka iua mereẽ —itxa Xesosi.

Iuaãkana Xesosi Sãpiretari Ipinini

(Marko 10.32-34; Arókasi 18.31-34)

¹⁷Xesosi Xerosareẽmoni ikimaporitakasaaki, akiritana imoianariakori. Ninoanoka imisãkireta.

¹⁸—Hĩkenakotari nisãkire. Xerosareẽmoni asako. Iuaã nota hĩtari iaxitikiri mĩkapiritaãkako. Sasetotxi auĩteakori, kaiõkatsoparerini pakinimoni nisikaãkako, ininiã ninoa apotiãtaua. Iuasaakiko ninoa txari: “Okaãkapitikako.” ¹⁹Eereka ninoa sikano Xoteo minakonimoni. Ninoa napetano. Ixirokítatanona aãpitsaã. Ipošo atoko aamina ãpiriãmitakariã tokakita ninaãkako, oka itxanonako. Ipi ãti õtisaaki nõkitikauako, iuaãkana aua nitxako —itxa imoianariakorimoni.

Txiako, Xoão Pakini Amanaãkiti

(Marko 10.35-45)

²⁰Eereka Sepeteo ãtanoro apoka Xesosimoni. Ominana imi Txiako, Xoão pakini. Ninoa Txiako, Xoão pakini Xesosi moianariakori. Okapotoreẽkaua iua apisatoõ.

—Atauako ninirekakiti pikaminano? —otxari.

²¹—Kipa pinireka? —itxaro.

—Ikinimane auĩte pinakasaakiaua, ninirekari naia ipi namariteni auĩtetxiakori ininiãuana pitekata. Pauiritatana pitekata iitopãkinina, ãti pikikomoni inini, ãti pisaneremoni inini? —otxari.

²²Ininiã Xesosi apakapapiretana ninoa:

—!Himarotari hamanaãkiti. Mapaõti napa atoko iteene nimisiritaãkako. Atauako híposotatari hãtatsiitineri notakata? —itxana ninoa.

—Aposotapitika —itxarina.

²³—Atãopitikara hãtatsiirauata notakata, txamari kona notani mereẽna kãkiti nikikomoni, nisanaremoni topãkakani ãkapani. Nirira mereẽpekana ninoa kãkiti notakata topãkini ãkapani —itxana.

²⁴Apanakini Xesosi moianariakori kenakoenetari Txiako, Xoão pakini amanaãri Xesosi auĩtetxi ininiuana ãkapani, ininiã omanatana. ²⁵Ininiã Xesosi akiritana ninoa imakinikana iuamoni.

—Himarotari Xoteo minakanua auĩteakori paniãtari kãkiti ikinika auĩteakori nireẽkiti ikaminina ãkapani. Kona atão itiretana kãkiti. Kãkiti kona

kamari auñtetxiakori mauritakinini. ²⁶Kona ninoa auñtetxiakori atoko lhĩtxape. Atão apiari pininiua pinirekiniã, pimoianatariko apanakini. ²⁷Apanakini auñte pininiã pinirekiniã, nitiritxi pitxauako merepanika. ²⁸Ikara atoko nitxa nota hĩtari iaxitikiri ãkorapokoriti napokasaaki. Ninitiri lauari. ãkorapokoriti napoka, kãkiti nitiri nininiua ãkapani, kãkiti nitiretini ãkapani. ãkorapokoriti napoka nipinini ãkapani, kaiãopokori kãkiti mapinakani ãkapani, kotxi nota ãkitxirauata ninoa mapinakani ãkapani —itxana ninoa.

Ipi Mõsiãreni Xesosi Makananitinini

(Marko 10.46-52; Arókasi 18.35-43)

²⁹Xerikoo sitatxiti ipotorikasaakina, itomaneri kãkiti sari Xesosikata, imoianariakori pakinikata. ³⁰Iuasaaki ipi mõsiãreni topãkanãta kimapori tiniãpo. Xesosi napaãpotini ikenakotakasaakina, akiritana:
—Apiananiri, aãuñte Taviini apika mekanirii, piamonĩkaua ate —itxarina.

³¹Kãkiti iuaã pinitana:

—Himaãtako —itxana.

Txamari apiata akirikatana:

—Apiananiri, aãuñte Taviini apika mekanirii, piamonĩkaua ate —itxarina.

³²Ininiã Xesosi iotoka. Akiritana ninoa mõsiãreni. Apokana iuamoni.

—Kipa hinireka nikaminii hĩte? —itxa.

³³—Apiananiri, aĩtikapokotini anireka.

³⁴Ininiã Xesosi amonĩkana. Okina nopini itakari iuako. Iuasaakipeka kõiãrepekana, sa itxana Xesosikata.

Xesosi Xerosareẽ Apokaãpotini

(Marko 11.1-11; Arókasi 19.28-40; Xoão 12.12-19)

21 ¹Xesosi imoianariakorikata imatokoãpotari Xerosareẽ. Apokana Petxipaxee inakori aapokotxiti, õtanoxiratari takote Oriva inakori xiratamoni. Iuaã Xesosi iokanatana ipi imoianariakori aapokotximoni.

²—Hĩsa ikiraã kaixiti auakari aapokotxitiã. Iuaxiti hãpokasaaki, hãpokaroko xomẽta iaxiriãkoro oimikata. Hĩkoxirikana. Uaimoni mina hĩtxanako. ³Ãti misãkiretakasaakii: “Kinirepa hĩkaxirikatari pirãtxi?” Ininiã hĩte: “Apiananiri nirekana,” hĩtxako. Ininiã iua auiritai himininina —itxana ninoa.

⁴Kitxakapirĩka Teoso sãkire sãpiretakari sãpiretapekari ikara atoko inakari. Ininiã iua sãpiretakiti kitxakapirĩka atão inakari apokapeka. ⁵Iua txari:

Hĩtxariko Xerosareẽ auakanimoni: “Hãtamata. Hĩauĩte apokaãpota hĩtemoni. !Kaneenamari. Xomẽta nopini iitopãkanãta. Xomẽta ãkiri nopini isaãpota,” hĩtxako ninoamoni, itxa Teoso sãkire sãpiretakari kitxakapirĩkapeka.

⁶Ininiã Xesosi moianariakori sari. Ipaniãtakiti iaõka ikamana. ⁷Ininiã iminaro xomẽta oimikata. Itakarina imãkana inopinina Xesosi topãkini ikapani. Ininiã Xesosi topãka xomẽta ãkiri nopini. ⁸Itomaneri kãkiti katamẽkari imãkana kimapori ãpo. Apanakini sauakari aãxike. Ikasirĩkaxikeãpotarina aãxike kimapori ãpo. Ikara atoko ikamana, Xesosi paxitiko oerekinina ikapani. Imãkana nopini, aãxike nopini, xomẽta napaãpota. ⁹Kãkitipokoni ikiikakani. Kãkitipokoni Xesosi tikini ikani. Imakinika sããpotakasaakina, akirikatana:

—Peerekari Tavii apika mekaniri. Teoso posotiirekata ikari, Teoso nireẽkiti kamakari iua. Teoso sikariko erekari iuamoni. Peerekari Teoso, iaxiti apiko nopinixiti auakari. Apiananiri itxaua —itxaãpokatana.

¹⁰Ininiã Xesosi apokapeka Xerosareẽ. Iuusaaki ikinimane Xerosareẽ auakani tsorĩkaãta.

—Kirinapanipa ikira kiki inatari? —itxanãtakakana.

¹¹Kãkiti Xesosikata ikani sãpiretana:

—Xesosikara ikira. Teoso sãkire sãpiretakari, ikira. Nasaree sitatxitikiri, Karirẽia tãpa auakari ikira —itxana.

Pirãtxi Vẽtxitakani Omitikiko

(Marko 11.15-19; Arókasi 19.45-48; Xoão 2.13-22)

¹²Xesosi iroã aiko ãki Teoso misãkiretikoãtaã. Omitikenatana tiitxi vẽtxitakani. Amotiitakani Teoso misãkiretikoãtaã auakani omitikenata. Ikitakari txineiro vẽtxitakani mesate. Kamoã vẽtxitakani topãkini apaka ikitaka. ¹³Xesosi misãkiretana:

—Teoso sãkire iõkatsopatakori txari:

Ia naapoko, “Teoso misãkiretiko aikoti” akiritaãkako, itxa. Txamari hĩte txikitakari ia aiko kiĩtiririni iomaãtiniãtaã ininiua —itxa Xesosi.

¹⁴Mokirini, kãkiti matĩpokotakani pakini apoka Xesosimoni Teoso misãkiretiko aikotiã. Erekapeka itxĩkitakana ninoã.

¹⁵Iuusaaki amarini Teoso misãkiretikoã auakani iteene akirikata:

—Peerekari aãuĩte Taviini apika mekaniri —itxanãtana.

Sasetotxi auĩteakori, kaiõkatsoparerini pakini itikari Xesosi posotiire, kãkiti erekapeka itxĩkitakini. Ninoã kenakotari amarini akiritakiti:

—Peerekari aãuĩte Taviini apika mekaniri.

Ininiākara ninoa omanākarauata. ¹⁶Ininiā imisākiretarina Xesosi: —Pikenakotatari ikara amarini akiritakiti? —itxana.

—Nikenakotapitikari. Hīte atatsopatapekari ia Teoso sākire iōkatsopatakori: Ātokoriakori, amarini pakini, ninoapeka apaka txariko:

“Peerekari iua,” itxanako,

itxa Teoso sākire iōkatsopatakori. Ininiā Teoso sākire iaōka ninoa kamanāta. Ininiā erekapitikari ninoa akiritakiti —itxa Xesosi.

¹⁷Iposo atoko itakanapana. Īkorape itxa. Itakanapari Xerosareē. Isa aapokotximoni Petánia inakorimoni. Iuaā itxiaka.

Piko Mina Marito Pirena

(Marko 11.12-14, 20-25)

¹⁸Katimatinīkata iuaīkana Xesosi sari sitatximoni. Ipixinipokoriti inatxita. ¹⁹Atamataro piko mina kimapori ĩtiniāpo. Isa oamoni txipokori itximini ĩkapani. Txamari otsopanani auaro. Iuasaaki itxa:

—Kona kariikaiko —itxaro.

Iuasaakipeka otxiaroka.

²⁰Imoianariakori ikara itikasaakina, itsorikitaātana.

—Ii natokopa otxape katimari otxiarokini? —itxanātana ninoa.

²¹Ininiā Xesosi:

—Atāo nisāpiretai. Teoso sākire hāuikiniā, hīte posotari hīkaminiri mixikanani nikamakiti atoko inakari. Piko mina txiarokini nitxīkitakini atoko, hīposota hīkamini. Teoso sākire iteene hāuikiniā, apiata hīkamako. Hīposotamariko hīpaniātiniiri ikira ixirata: “Pōkitikaua. Ipoamoni oka pitxaua.” Iuasaakipekamako ixirata ipoamoni oka itxamauako. ²²Pite atāo pauikiniāri Teoso sākire, iua pimisākiretakasaaki, ikinipoko pamanaākiti Teoso sikai —itxa Xesosi.

Xesosi Paniātakari Moerekakoni

(Marko 11.27-33; Arókasi 20.1-8)

²³Xesosi ĩroā Teoso misākiretiko aikotiā. Kākiti oerekasaaki, sasetotxi auīteakori, kiomātxiakori pakini apoka iuaā. Ipimaārina Xesosi:

—Kipaniāpa pikamari ĩkora pikamakiti? Kipa paniātai? —itxarina.

²⁴Ininiā Xesosi:

—Nota apaka pimarauatako hītemoni. Ātinoka nipimaāiko hīte. Nota pimaākitiko hītemoni hīsāpiretiniāno, nota apaka sāpiretai hīte hīpimaākiti notamoni, ininiā nisāpiretai nota paniātakari uāka apaka. ²⁵Ia nipimaāi hīte: “Kipa paniātari Xoāoni ipatxisarauatini? Teosokani paniātari Xoāo? Kākitikani paniātari Xoāo?” —itxana.

Ininiã ninoa misākiretakakaua:

—“Teoso paniātari,” aniniã, “Kinirepa kona hāuikatari isākire?” Xesosi txamaua eereka. ²⁶“Kākitira paniātari Xoão,” aniniã, apanakini omanatamaua, kotxi ninoa uākatari Xoão Teoso sākire sāpiretakari ininiua.

Ikara atoko itxana imisākiretakakiniuana. ²⁷Ininiã apakapapiretana: —!Aimarotari iua paniātakari.

Ininiã Xesosi:

—Nota apaka kona sāpiretai nota paniātakari uāka.

Iri Sākire Kīpitakari, Iri Sākire Makīpitakati Pakini

²⁸—Hīxinikariko ia nisāpiretakitiko: Kiki auari ipi imi. Akiritari anekari. “Namarite uatxa piparīkauata nitakare ova auiniātaã,” itxari imi.

²⁹—Ininiã imi anekari: “!Nisapani. !Ninirekari niparīkauatini,” itxari. Eereka ixinikaxitināta. “Ari, nisapitikako,” ininiã isa iri takaremoni.

³⁰—Iua kiki akiritari imi maneritakari. Ipaniātari iua atokokana. Iua imi: “Ari, nisapitikako.” Txamari, !isari.

³¹—Ininiã ikiripa kamataririri iri paniātakiti? —itxa Xesosi.

Ininiã ninoa kiomātxiakori, sasetotxi auīteakori pakini apakapapiretari: —Anekarira.

Ininiã Xesosi:

—Atāopitika nisāpiretai hīte. Kiītiriri apokako Teoso auītetxi ininiātaāua hīte apisapanika. Kanokarero apokako Teoso auītetxi ininiātaāua hīte apisapanika. ³²Kotxi Xoão kapatxisarerini apoka hītemoni. Oerekai erekari kimaporiti. Txamari kona hīte auikari isākire. Kiītiriri, kanokarero pakini auikari isākire. Iuasaaki himarotari ninoa maerekati kamakani takanapiniri imaerekanina. Ikamarina erekarinoka. Hīte itikapekari. Txamari hīte kona takanapari himaerekani. Kona hāuikari Xoão sākire, ininiã iua kiki sākire makīpitakati atoko hītixa, kotxi hīsākire: “Akīpitapitikari Teoso sākire,” txamari kona hīkīpitari —itxa Xesosi.

Parīkauatakani Maerekani

(Marko 12.1-12; Arókasi 20.9-19)

³³—Āti sāpirenatxi atāo inakari oerekiko nisāpiretai. Hīkenakota —Xesosi txana.

—Kiki kakikioteri takaro txipokori ova inakoro. Ovanoka itaka. Iposo atoko ipiriketaro. Eereka iuaātaã ikamari ova katsonakiko. Iposo atoko

ikamari aapokotxi õtanori, ikinipoko itakare atamatini ïkapani. Iposo atoko ïkitxitana kikiãkini itakare nïkatakani ïkapani. Ininiã ninoa nïkatari itakare. Eereka kakikioteri sari ãti itixiti. ³⁴Ova manapi inakasaaki, iokanatana initiriakori itakare nïkatakanimoni, ova apakapinina ïkapani.

³⁵—Txamari, ninoa maïkapena initiriakori. Ixirokítatarina ãti. Okapirina ãti. ãti kai soroã ikiporonakana. ³⁶Iuaïkana iua kakikioteri iokanatana initiriakori. Iuasaaki ito iokanata. Mitxirini atokokana itakare nïkatakani txapena ninoani. ³⁷Eereka imapotökire iokanatarimi imi ninoamoni. Iuãkatari: “Namarite iua, ininiã ninoa paxitari iua,” itxa.

³⁸—Txamari, imi atapakasaakina, imisãkiretakakana: “Erepani imi. Maõkari, ininiã okinika itakare kaikotinua atemoni.” ³⁹Ininiã imaïkarina imi. Kikio xiripirexiti anikarina. Iuaã oka itxapirina.

Ininiã Xesosi pimaãri kãkiti iua takote auakani:

⁴⁰—Ininiã iua kakikioteri ïkasaaki, kiãtokopa itxatanako ninoa kikiãkini? —itxa Xesosi.

⁴¹Ininiã ninoa iua takote auakani apakapapiretari:

—Kakikioteri okanako ninoa maerekati kamakani. Iïkitxitanako apanakini itakare nïkatakani ïkapani, ininiã ninoa sikapitikaroko ova oiõkasaaki —itxarina Xesosi.

⁴²Ininiã Xesosi:

—Hïte atatsopatapekari ia iõkatsopatakori Teoso sãkire:

Kai aapokotxi kamakani kona nirekari ãti kai soro. Iua kai imanirekakiniti kai apiari itxapekaua. Apanakini kai soro maïkakari itxaua. Teosokara txïkitakari ikara atoko inini. Ikara peerekari atemoni.

Nota hïtari iaxitikiri iua kai atoko nitxaua. Peerekari Teoso, kotxi nota hïtari iaxitikiri kãkiti manirekakiniti. Teoso txïkitakano nota apiananiri nininiãua.

⁴³—Ininiã nisãpiretai hïte, Teoso kona hïauïte !itxaikauako.

Iua mereëriko apanakini kãkiti inakitiakori ïkapani. Ninoa kamapitikari Teoso nireëkiti. ⁴⁴Apikomoni Teoso sãkire iõkatsopatakori sãpiretaua iua kai apiari atoko inakari. Itxari:

Kãkiti iua kai nopini irikasaaki, ikarouata iua. Kai kãkiti nopini irikiniã, !auaika kãkiti,

—Xesosi txana ninoa.

⁴⁵Sasetotxi auïteakori, pariseoakori pakini kenakotakasaakiri ikara sãpirenaxi atão inakari oerekiko Xesosi sãpiretakiti, ninoa lapokaarekatarina isãpirena, kotxi imarotarina ninoa takari nïkatakani maerekani atoko inakani itxauana. ⁴⁶Ininiã ia xika inirekarina imaïkinirina. Txamari !imaïkarina, kotxi ipïkarina kãkiti iuaã apotiitakaniua. Kãkitimoni Xesosi atão Teoso sãkire sãpiretakari itxaua.

Kiiniri Ìtanorouatiko Pirena
(*Arókasi 14.15-24*)

22 ¹Iuaĩkana Xesosi sãkirauatakasaaki kãkitikata, isãpiretari sãpirenatxi atão inakari oerekiko. Itxari:

²—Teoso auĩtetxi ininiãua ia auĩtetxi atokokana. Ia auĩtetxi kamari kiiniri imi ìtanorouatini ìkapani. ³Ipaniãtari initiriakori akiritinina ikemaĩtxitakini kiiniriã ininina ìkapani. Txamari ikemaĩtxitakini ìnirikari ikiiniriteẽ isinina. ⁴Iuaĩkana iokanatarari apanakini initiriakori ikemaĩtxitakinimoni. “Hĩtxanako: ‘Nipokori iposopeka. Nokapekari kema auĩte, kema auĩte ãkiri pakini. Paĩpepokori. Imakinika niposotapekari. Hĩsapoka kiinirimoni,’ hĩtxanako.” Ininiã ninoa kamari isãkire iaõka.

⁵—Txamari ikemaĩtxitakini limaãkapiretarina. Iparĩkamoni isana. ãtikaka sari kikiomoni. Apanakini sari ãtiãtaã tiĩtxi ivẽtxitinimoni. ⁶Apanakinipekana maĩkapena initiriakori, noropata, oka itxapena. ⁷Iua auĩtetxi ikara inakariene ikenakotakasaaki, iteene inaiataua. Iokanatarari isotatoneakori ninoamoni. Ininiã okapena ninoa kokanirini. Iotikapirina ninoa aapoko.

⁸—Eereka iua auĩtetxi akiritana apanakini initiriakori: “Kiiniri namarite ìtanorouatini pirena iposopeka. Txamari merepitipanika nikemaĩtxitakini !erekana. ⁹Iua atoko ininiã, hĩsa ahoaãtaã, kãkiti napanakiniãtaã. Hĩkemaĩtxitana ikinimane haõkitakini,” itxana ninoa.

¹⁰—Ininiã isana ahoaãtaã. Ikemaĩtxitana ikinimane aõkitakini. Apotiitarina kãkiti itanapoko. Maerekani, erekarini pakini apotiitana. Anikana kiinirimoni, ininiã kãkitipokoni xãpoãkata.

¹¹—Iua auĩtetxi atamatana ikemaĩtxitakini. Atamatari kiki mãkatxi ìtanorouatikosaaki ieretaãkari mieretaãkati. ¹²Ininiã akiritari iua: “Nimoianari, kiãtokopa piĩroã naapoko, kotxi mãkatxi ìtanorouatikosaaki ieretaãkari kona pieretaka?” Iua kona kasãkireri.

¹³—Ininiã iua auĩtetxi paniãtari initiriakori: “Himaĩkariko. Hĩaxirikariko iuako, ikitinota pakini, anika hĩtxariko mapara. Piãkatximoni hõkariko,” itxana initiriakori. Iuaãtaã kãkiti txiapatiniãtaã, kãkiti akerakitatsiriĩtiniãtaã.

¹⁴Xesosi xipokapiretari isãpirena.

—Itomaneri kemaĩtxitakoni. Txamari poiãoka mereẽkoni —itxana ninoamoni.

Homano Auĩte Ìkitxitiko Pirena
(*Marko 12.13-17; Arókasi 20.19-26*)

¹⁵Ninoa pariseoakori sipeka. Eereka apotiitauana. Imisãkiretakakana. Ixinikaxitinãtarina:

—Anirekari Xesosi kerokiniri isäkire, aãpoitiniri ïkapani. Ininiã kiãtokopa atxatari apimainiri ikerokiniri ïkapani? —itxanãtakakana.

¹⁶Ininiã ninoa pariseokori paniãtana ãtikaka ninoa oerekakini, apaka ãtikaka Erotxi sãkire auĩakani, Xesosimoni isinina ïkapani. Ininiã isana iuamoni. Imisãkiretarina. Pariseo sãkire iaõka isãpiretana.

—Koerekareri, aimarotari atãoenepitikara pisãkire. Atãoenepitikara pisãpiretari Teoso nireẽkiti akamini ïkapani. Pite na pĩkarauata xatiki kãkiti sãkire xika. ãtinoka pisãkire pisãpireta ikinakariti kãkitimoni. Apanakinimoni pisãpiretakiti iuatxikana pisãpiretari apanakininapemoni. ¹⁷Ininiã pisãpiretaua. Atãokani txineiro asikini Homanoakori auĩtemoni, Sesa inakorimoni? Apakata amasikakaniri iuamoni? —itxarina iua.

¹⁸Xesosi imarotari ninoa nirekari ikerokiniri isäkire. Ininiãkara itxana:

—Kinirepa hinirekari nikerokiniri nisãkire? Kona erekai hĩte. Hĩsãkirauatakasaaki, kãkiti erekarini atoko hĩtxa, txamari maerekati hĩkama. ¹⁹Hõerekano txineiro ota Homano auĩte asikini ïkapani.

Ininiã iminarona txineiro ota.

²⁰—Kisanõkapa ia? Kiuãkapa aua uai? —itxana ninoa.

²¹—Ari, Homano auĩte —itxana.

—Ininiãkara hĩsìkariko Sesamoni iua nakiti. Hĩsìkariko Teosomoni iua nakiti —Xesosi txana ninoa.

²²Ikara apakapapirenatxi ikenakotakasaakina itsorĩkaãtana.

—Paimatireri iua —itxanãtakakana.

Ininiã itakanaparina, sipeka itxana.

Ipĩkari Õkitikiniua Mauikakoni

(Marko 12.18-27; Arókasi 20.27-40)

²³Iua õtisaakipeka ãtikaka satoseo apoka Xesosimoni. Satoseo inakoni !auikari ipĩkani iuaĩkana õkitikiniua.

²⁴—Koerekareri, Moisesinira oerekari ia sãkiretxiti: “Kiki meenetipanika ipininiã, iua itari takaroko tikinitakoro. Iua itari keene ininiã, itakauãkatari amarini iua itarini ipĩpekarini uãka,” itxa Moisesini. ²⁵Setxi itaritxiakori aua mitxi ïkorapokoriti. Apia anekatakari ïtaniriuata. Eereka ipĩpe meenetika, ininiã itari takaro iuani tikinitakito. ²⁶Iua atokokana iua itari ipĩpe meenetika. Ati itari iuaĩkana takaro iuani tikinitakito. Txamari iua atokokana ipĩpe meenetika. Iua atokokana txaãpota ikinika itariakori. ²⁷Eereka oa sito apaka opĩpe. ²⁸Ininiã ipĩkani iuaĩkana õkitikasaakia iuaĩkana auãki ininina, ïkiripa oĩtaniri aua oakata iuaasaaki? Kotxi ikinimane ninoa setxi itariakori takapekaro oa —itxarina iua.

²⁹Ininiã Xesosi:

—Híte kerokari, kotxi !himarotari Teoso sãkire iõkatsopatakori. !Himarotari Teoso posotiire apaka. ³⁰Ipĩkani iuaĩkana aua inakasaaki, kona ninoa itaniriuataika. Teoso nitiriakori iaxitikini atokopeka itxanako. ³¹Híte !auikari ipĩkani õkitikiniua iuaĩkana auãki inini. Atauako kona hãtatsopatapanikari Teoso sãpiretakiti hĩtemoni? Iara isãpiretai:

³²Apraõ, Isaki, Xakoo pakini Teosonekarano nota, itxa Teoso. Ininiã Apraõ, Isaki, Xakoo pakini auãkipanika itxana, kotxi auãki inakani Teosonera iua. Ninoa uatxa auãki inakani, kotxi kona ipĩkani Teosoneni Teoso —itxa Xesosi.

Iuasaaki kãkitipokoni kenakotari ikara Xesosi sãkire. ³³Xesosi sãkire ikenakotakasaakina, itsorĩkaãtana, kotxi paimatireri Xesosi apakapapiretakiti satoseoakorimoni.

Teoso Paniãtakiti Apiari Akamini

(Marko 12.28-34)

³⁴Xesosi iũkiteritika apakapapiretari satoseo pimainiri, ininiã satoseo lipimarauataika. Pariseokori kenakotari ikara, ininiã apotiitauana. ³⁵Pariseo, Moisesi sãkire oerekakari, iua nirekamari Xesosi kerokiniri isãkire. Ininiã ipimaãri:

³⁶—Koerekareri, ĩkiripa Teoso paniãtakiti apiari txataua? Kipa apiaerekata Teoso nireẽkiti akamini? —itxa.

³⁷Ininiã Xesosi apakapapiretari:

—“Pitiretariko Apiananiri piTeosone, ikinipoko pinireẽkitiã, ikini pãkixinireẽ, ikinipoko pixinikakitiã pakini.” ³⁸Ikara atoko inakari Teoso merepitipanika paniãtaua akamini. Ia ipaniãtakiti akamini apiari itxaua. ³⁹Iuaĩkana Teoso paniãtaua. Ia ipaniãtakiti apaka apiari. Merepanika ipaniãtakiti akamini atoko itxa. “Piteka pitiretiniãua atokotxikana, pitiretariko ãti.” ⁴⁰Iteene atiretiniãri Teoso, iteene atiretiniãri ãti, ininiã akamapitikari apanakini Teoso paniãtakiti, Moisesinimoni isãpiretakiti. Itene atiretiniãri Teoso, itene atiretiniãri ãti, ininiã akamapitikari Teoso sãkire sãpiretakani paniãtakiti apaka —Xesosi txari iua.

Teoso Mereẽkiti Tavii Apika Mekaniri

(Marko 12.35-37; Arõkasi 20.41-44)

⁴¹Pariseokori apotiitapanikaua inakasaaki, Xesosi pimaãna ninoa: ⁴²—Teoso mereẽkiti pisãpiretano. Kiripa apika mekaniripa iua? —itxana ninoa.

Ninoa apakapapireta:

—Ari, Taviini apika mekanirira —itxana.

⁴³Ininiã Xesosi:

—Ikara atoko ininiã, kinirepa Erekarî Matamatakoti kamasãkiretari Tavii: “Teoso mereẽkiti niauũte itxaua,” ina sãkiretini? ⁴⁴Kotxi Tavii txari: Apiananiri misãkiretari niauũte: “Nota kikomoni piitopãkiniritika nixipokariko pimokaiakariakori. Nikamariko ninoa pikiti pitakiniãtaã atoko ininiua,” Apiananiri txari niauũte, itxa Taviini. ⁴⁵Ininiã Tavii akiritari Teoso mereẽkiti “niauũte.” Ikara atoko ininiã, kiãtokopa itxa Teoso mereẽkiti Taviini apika mekaniri ininiãua? —Xesosi txari pariseoakori.

⁴⁶Kona imarotarina, ininiã kona kasãkirena ninoa. Ikara eereka kona kãkiti pimarauataika Xesosimoni, kotxi ipĩkarina Xesosi imarore.

Xoteo Auũteakori Maerekani

(Marko 12.38-40; Arókasi 11.37-54; 20.45-46)

23 ¹Ininiã Xesosi misãkiretana imoianariakori, itomaneri kãkiti iuaã auakani apaka. ²Ia atoko isãpiretana:

—Kaiõkatsoparerini, pariseoakori pakini, Moisesini sãkire oerekakani itxauana. ³Ininiãra ikinika kaiõkatsoparerini, pariseoakori pakini paniãtakiti hĩkamako, kotxi ninoa sãpiretari Moisesini sãkire Teoso oerekakiti. Ikara erekari. Txamari kona ninoa kamari Moisesini paniãtakiti. Ikara !erekari. Ininiã ninoa kamakiti atoko !hĩkamape. Kotxi isãkirena erekari, txamari ikamakitina !erekari. ⁴Ninoa kaiõkatsoparerini, pariseoakori pakini, kiki ia atoko inakari ninoa. Ia kiki takari iminani imoianariakori porikiã, txamari iuaka na xatiki nirekari iporikitiniri. Kaiõkatsoparerini, pariseoakori pakini, ikara kiki atoko itxana. Ninoa paniãtakiti iua iminani atoko itxa.

⁵—Pariseoakori kamari erekari apanakini atamatini ãkapaninoka, eereka ininina apanakini uãkatini ãkapaninoka. Himarotari kãkiti ieretakari Teoso sãkire iõkatsopatakori aãkoana xapitikiri ãki. Eereka iaxirikarina iteẽtaãna, iuakonotaãna pakini. Ninoa kaiõkatsoparerini, pariseoakori pakini takari aãkoana mitari apanakini atamatini ãkapaninoka. Paĩtanori itsarãpe imãkana apanakini atamatini ãkapani. ⁶Kiinirisaaiki ninoa nirekari kãkiti potxitiniãtaã iitopãkinina. Aiko ãki Xoteoakori apotiitiniãtaãua inirekarina kãkiti potxitiniãtaã iitopãkinina. ⁷Apokaerekatarina okapiretikona ipaxitikona kienatxi vẽtxitikoãtaã. Apokaerekatarina kãkiti akiritinina: “Koerekareri” inikona.

⁸—Txamari, ãtinani hĩte oereẽkari txaua, Teoso mereẽkitira iua. Koerekareri hiniko !hãuiritapeko, kotxi himakinikara hĩtaritakakaua. ⁹Kona ãkorapokoriti auakari “niri,” !hĩtxape, kotxi ãtinani aĩri auari iaxiti auakari. ¹⁰Apaka apanakini akiritinii “aãũte,” !hãuiritapeko, kotxi ãtinani hĩauũte.

Teoso mereẽkiti itxaua. ¹¹ Auĩtetxi pininiua pinirekiniã, apanakini nitiri atoko pitxauako. ¹² Iua “Auĩtetxi nitxaua,” inakari, Teoso txĩkitakariko nitiritxi itxauako. Iua “Nitiritxi nitxaua,” inakari, Teoso txĩkitakariko auĩtetxi itxauako.

Xoteo Auĩteakori Misiritaãkako

(*Marko 12.40; Arókasi 11.37-44,52; 20.47*)

¹³ Iuaĩkana Xesosi sãkirauata:

—Erepaniko hĩte kaiõkatsoparerinii, pariseoakorii pakini. Hĩsãkire atxiĩti erekari, txamari kona hĩkamari hĩsãkire iaõka. Kinirão ãroãkari apisapanika aapokotxi tore totakani atoko hĩtxa, kotxi hĩte iotokakari kãkiti Teoso sãkire atão auikini, ininiãkara hĩte iotokakari kãkiti ãroini Teoso auĩtetxi ininiãtaãua. Hĩte kona ãroã. Apaka kona hĩte auiritana kinirão ãroãkani. ¹⁴ Erepaniko hĩte kaiõkatsoparerinii, pariseoakorii pakini. Hĩsãkire atxiĩti erekari, txamari kona hĩkamari hĩsãkire iaõka. Hĩte mixirikari tikinitakoro aapoko. Himisirienetana. Teosokata hĩsãkirauatakasaaki, itori sãkiretxi hĩkama apanakini, “paimatirena” inini ãkapaninokara. Ikara xika himisiritiko apiatako.

¹⁵—Erepaniko hĩte kaiõkatsoparerinii, pariseoakorii pakini. Hĩsãkire atxiĩti erekari, txamari kona hĩkamari hĩsãkire iaõka. Hĩte sari õtakoxiti. Hĩpiriãtari kãuaãri. Imiriĩ õtakoxiti hĩsa, hĩsãkire auikakari hinitini ãkapani. Atinoka hĩsãkire auikakari auiniã, iuaritika hĩsa iuaxiti. Eereka hõerekari iua ikinipoko himarotakiti. Eereka hĩte maerekani xika, iua kiki maerekani apiatako. Isapitika hĩtekata maerekani misiritikoãtaã.

¹⁶—Erepaniko hĩte. Mõsiãreni atoko hĩtxa, iuaritika hinirekari hõerekiniiri Teoso kimapore apanakinimoni. !Hĩposotari. Hĩte oerekari apanakini ia hĩsãkire: “‘Ia nikamapitikako’ pinakasaaki, Teoso misãkiretiko aikoti pakiriuãkatakasaaki, pimakamakaniãri, kona pimisiritaãkako,” itxa hĩte sãkire. Iuaĩkana hĩte sãkire: “‘Nikamapitikariko,’ pinakasaaki, Teoso misãkiretiko aikoti ãki auakaro oro pakiriuãkatakasaaki, pikamapitikariko pikamaenetakiti. Ikara pimakamakanisaaki, pimisiritaãkako,” itxa hĩte sãkire.

¹⁷—Hĩte mõsiãreni atoko. Kona kiĩkitei hĩte. ãkiripa apiari? Orokani? Teoso misãkiretiko aikotikani? Teoso misãkiretiko aikoti apiari, kotxi oa oro aiko ãki aua, ininiã aiko txĩkitakaro oro Teoso nakito oniniãua.

¹⁸—Hĩte oerekari apanakini ia hĩsãkire apaka: “‘Nikamapitikariko’ pinakasaaki, Teosomoni sikakori takikoãtaã pakiriuãkatakasaaki, pikamaenetakiti pimakamakaniã, kona pimisiritaãkako. ‘Nikamapitikako,’ pinakasaaki, Teosomoni sikakori takikoãtaã nopini takakori pakiriuãkatakasaaki, pikamapitikariko pikamaenetakiti. Pimakamakanisaakiri, pimisiritaãkako,” itxa hĩte sãkire.

¹⁹Híte mōsiāreni atoko hītxa. !Kiikitei híte. !kiripa apiata? Sikakorikani? Sikakori takikoātaākani? Sikakori takikoātaā apiata, kotxi sikakori inopini takikosaaki, iusaakipeka Teoso nakitipeka. Ininiā sikakori takikoātaā txikitakari sikakori Teoso nakiti ininiāua. ²⁰Ininiā pisāpiretakasaakiri Teoso pikamaenetakiti, Teoso sikakori takikoātaā pakiriuākatiniā, iuatxikana iua nopini auakari pakiriuākata. ²¹Pakiriuākatakasaakiri Teoso misākiretiko aikoti, iua atokotxikana pakiriuākatari Teoso, kotxi iua aiko āki aua. ²²Pakiriuākatakasaakiri Teoso tixine, ininiā iua atokotxikana pakiriuākatari Teoso topākini. Iua atokotxikana pakiriuākatari Teoso, kotxi Teoso topākini nopini iitopāka Teoso.

²³—Erepaniko híte kaiōkatsoparerinii, pariseoakorii pakini. Hīsākire atxiiti erekari, txamari kona hīkamari hīsākire iaōka. Ipixini hinakiti hīsikari Teosomoni. Tesi hīti auiniāi, hīsikari āti Teosomoni. Tesi txineiro ota auiniāi, hīsikari āto Teosomoni, hītxaāpota. Ikara hīkamakiti erekari. Nipokori koke, oteraā, erva tosi, komínio, axapitkiri inakari, iuaritika ipixini hīsika Teosomoni. Ikara Teoso paniātakiti hīkamapitika. Txamari, Teoso paniātakiti apiari !hīkama, kotxi !hīkamari atāo apanakinimoni. !Hiamonīkana apanakini. Hīkamaenetakiti !hīkama. Ikinika Teoso paniātakiti hīkamako. ²⁴Mōsiāreni atoko hītxa, iuaritika hinirekari hōerekiniri Teoso kimapore apanakinimoni. !Hīposotari. Himaktxakaro xikiri iāriā āki komokakaro, txamari hūixirapoataro kamero, kotxi Teoso paniātakiti poiāori hīkama, txamari ipaniātakiti apiari kona hīkama.

²⁵—Erepaniko híte kaiōkatsoparerinii, pariseoakorii pakini. Hīsākire atxiiti erekari, txamari kona hīkamari hīsākire iaōka. Hōeretari hīto maparakiri, txamari hākixinireē !erekari. Papotxinanii, patirenanii, paītirii. ²⁶Híte pariseoakorii, mōsiāreni atoko hītxa. Merepitipanika himaktxakariko maerekati hākixinire auakari, ininiā hīto erektxikana. Hākixinire ereka ininiā, hīkamakiti ereka apaka.

²⁷—Erepaniko híte kaiōkatsoparerinii, pariseoakorii pakini. Hīsākire atxiiti erekari, txamari kona hīkamari hīsākire iaōka. Kai auite iriko, ipikari takikoātaā atoko hītxa. Mapara txīta kasarori minapaākapeka, ininiā mapara peerekari. Txamari, iriko āki ipinakari api, arakapoakatakari aua. ²⁸Iua atokokanera hītxa. Kākiti uākatai híte atāo inakaranoka kamakani hininiua, kotxi hinopini ererini hītxa. Txamari, hākixinire lereri, kotxi maerekatnoka hīkama. Hīsākire atxiiti erekari, txamari kona hīkamari hīsākire iaōka —itxa Xesosi sākire.

Xoteo Auīteakori Misiritiko

(Arókasi 11.47-51)

²⁹Iuaīkana Xesosi sākirauata:

—Erepaniko híte kaiōkatsoparerinii, pariseoakorii pakini. Hīsākire atxiiti erekari, txamari kona hīkamari hīsākire iaōka. Hīkamari akauari Teoso sākire

sãpiretakanini ìkapani. Peereri akauari hìkama. Hìkamari akauari ipìkani atão inakarinoka kamakani ìkapani. Txita himinapa akauariã. Aãui hìtaka iuaãtaã. ³⁰Hìtxari: “Kitxakapirìka aãtokiriakorini okana Teoso sãkire sãpiretakani. Atepitika auaãkamako iusaaki, konimako ate okana ninoo,” hìtxa. ³¹Teoso sãkire sãpiretakanini okakani mekaniriakori hìtxaua hìte. Kotxi hìtekara txari: “Aãtokiriakorini okana Teoso sãkire sãpiretakani.” Hìte maerekati kamakani ninoo atokokana hìtxa. ³²Hãtokiriakorini mipotorikari Teoso sãkire sãpiretakani okinina. Hìte xipokapanikanako ãtikaka kaikotakani Teoso sãkire sãpiretakani.

³³—Imini atoko hìtxa. Imini anaakori atoko hìtxa hìte. Himisritaãkapitìkako maerekani misiritikoãtaã. Himitekini !auari. ³⁴Ininiã nisãpiretai hìte. Niokanatanipani hìtemoni Teoso sãkire sãpiretakani, Teoso iokanapirena imarotakani, koerekarerini pakini niokanata hìtemoni. Txamari ãtikaka hõka, aamina ipiriãmitakari nopini hìtokakitana apanakini. Apanakinipekana hìxirokìtata aiko Xoteo apotiitiniãtaãua. Eereka hãsikatikinitana ninoo ãti sitatxitimoni sikani, eereka ãti sitatxitimoni, eereka ãti sitatxitimoni hìtxaãponãta ninoo hãsikatikinitini. ³⁵Ininiã hìte misiritaãkako ikinika atão inakari kamakani okiko xika. Kitxakapirìka Apeo inakorini okapeẽka. Atão inakari kamakari iua. Ikinimane okapekoni tikinimoni okapeẽka Sakariani, Parakia ãkiri. Iua Sakariani okapeẽka sikakori takikoãtaã takote Teoso misãkiretiko aikoti ãki. ³⁶Atãopitikara nisãpiretai hìte. Kãkiti uatxa auakani apakapariko misirikaretxi ninoo erekarini okapekoni xika —itxa Xesosi sãkire.

Xerosareẽ Xesosi Tìretini

(*Arókasi 13.31-35*)

³⁷Iuaìkana Xesosi sãkirauata:

—Xerosareẽ auakanii, Xerosareẽ auakanii, hìte okapekana Teoso sãkire sãpiretakani. Kai soroã hìkiporonakana ninoo hìtemoni Teoso iokanatakini. Kaiõokatani ninirekamari ninìkatini, patari oimiakori omìkita patapi otakini atokokana nitxanakamaiko hìte. Txamari !hãuiritano nota nìkatini. ³⁸Ikara atoko inakari xika haãpoko asikaãkako. Teoso !auaika hìtekata. ³⁹Nisãpiretai. Ia õti hãtamatanano, eereka !hãtamataikano. “Teoso takari erekari uaimoni ìkarimoni, Apiananiri posotiireẽ ìkarimoni,” hinakasaaki, iusaakinanirako hãtamatanoko nota —itxa Xesosi.

Teoso Misãkiretiko Aikoti Irikiko

(*Marko 13.1-2; Arókasi 21.5-6*)

24 ¹Teoso misãkiretiko aikoti Xesosi potorikasaakipeka, imoianariakori apoka iuamoni.

—Patamata. Peerepokori aikoniri —itxarina.

²Ininiã Xesosi:

—Ari, hãtamatatari ere aikoniri? Atãopitikara nisãpiretai hïte. Koniko kai kaikotapani ãti kai nopini. Imakinika kai irikaãkako —itxana.

Misirikaretxi Apokaenetini

(Marko 13.3-13; Arókasi 21.7-19)

³Iposo atoko Xesosi sari oxiratarimoni, Oriva inakorimoni. Iuaã topãka itxa. Imoianariakori sari iuamoni. Ninoanoka auari iuaãtaã.

—Pisãpiretaua kirisaakiparako aiko Teoso misãkiretiko irikataãkako. Natokopa ininiãparako ate imarotatari pite kaiama kanapirikape pinini? Natokopa ininiãparako aimarotatari itixi xipokini õti kaiamapeka inini õti? —itxarina Xesosi.

⁴Ininiã Xesosi:

—Erepaniko. !Hãuiritapena apanakini misirienetini. ⁵Kotxi apokako kãkiti itomaneri “Teoso mereẽkiti nitxaua nota,” inakani. Ninoa misirienetana itomaneri. ⁶Hïkenakopiretariko neenamatzixi ene uaimoni, õtakoxiti apaka. Iuaritika !hïpïkarauatape. Kotxi auapitikako neenamatzixi. Txamari itixi xipokini õti !apokapanika. ⁷Ikara inakari apisapanika, ãti uãka neenamauatako ãti uãkakata. Apanakini auïte inirimanekata neenamauatako apanakini auïtekata inirimane pakinikata. ãtiãtaã kãkiti inikoriãriko natxi. ãtiãtaã amianari inokanako kãkiti. ãtiãtaã itixi iakeẽkatakako. ⁸Ikara atoko itxako misirikaretxi potorikini. Sito amarini tsii atoko itxako iusaaki.

⁹—Iusaaki hïte maïkaãkako, himisiritiko ïkapani. Iposo atoko oka hinaãkako. Nisãkire hãuikini xika ikinimane omanataiko hïte. ¹⁰Iusaaki itomaneri !auikaikari Teoso sãkire. Itakanapapekarina Teoso kimapore. Imïkapiritakakanako. Omanatakakanako. ¹¹Apokako kãkiti “Nota Teoso sãkire sãpiretakari nitxaua,” inakari. Txamari kona atão. Ninoa misirienetanako itomaneri kãkiti. ¹²Kãkiti tiretiko poiãotako, kotxi maerekanitxi iarikako ikini itixitimoni. ¹³Iusaaki kãkiti mïteenekiniãri misirikaretxi, imatakanapanianiãri Teoso sãkire, auapikako ãtipirika Teosokata. ¹⁴Teoso iokanapirena erekari, Teoso auïtetxi ininiãua, sãpiretaãkako ikini itixiti auakani, ikini kãkititi imarotiniãri ïkapani. Ikara inakari auãka atokoïkarako itixi xipokini õti apokako.

Iteene Maerekanitxi Apokini

(Marko 13.14-23; Arókasi 21.20-24)

¹⁵Xesosi sãpirenauatapanika:

—Hïte itikariko iteene maerekati kamakari timini aiko Teoso misãkiretiko ãki. Kitxakapirïka Tanieo inakori, Teoso sãkire sãpiretakari, sãpiretapekari ikara ene.

Híte ia atatsopatakani, himarotariko ikara. ¹⁶Ikara atoko inakari hītikasaaki hīte īkorapokoriti Xotéia auakani, oxiratarimoni himitekako. ¹⁷Ikara ōti apokasaaki haāpoko nopini hāuiniā, katima hītxako himitekini. !Apakata haāpoko āki hīti himakatzakini. ¹⁸Kikio hīparīkauanātakasaaki, hāapokomoni !hīkanapiripe himāka hāpini īkapani. ¹⁹Ikara ōti apokasaaki, kamixironi, kaxitakareroni pakini iteene atatsiitariko. Pasāpaniri ninoa mitekini. ²⁰Hamanaāriko Teoso katxīkareri mauakani himitekini ōtisaaki. Hamanaāriko tomatiko ōtisaaki ikara inakari mauakani īkapani. ²¹Kotxi ikara mitekaxi ōtisaaki kākiti iteene atatsiitariko imisiritiko. Ikara ōti apisa kākiti !imarotari iteene imisiritiko. Itixi kamikosaakipanika !auari ikara atoko inakari misirikaretxi. Ikara mitekaxi ōti napaāka atoko kākiti !imarotaikari iteene imisiritiko. Ikara ōti apiatako kākiti misiritiko. ²²Teoso poiāotakari iua ōti ikinipoko kākiti mapinakani īkapani. Ito ōti ininiā, kākiti !auaika. Ipoiāotakari iua ōti, kotxi itiretana kākiti imereēkini.

²³—Iuasaakiko āti: “Ia kiki Teoso mereēkiti aiātapakiti inakari,” inakasaakii, !hāuikapiri. Ātipekana: “Ikira Teoso mereēkiti inakari,” inakasaakii, !hāuikapiri. ²⁴Kotxi apokako kākiti paxirari kamakari, “Teoso mereēkiti hiātapakitino nota,” inakari, “Teoso sākire sāpiretakari nitxaua nota,” inakari. Ninoa kamariko posotiiretxi kākiti tsorikitaātini īkapani. Inirekarina kākiti Teoso mereēkini imisirienetinina. ²⁵Hīkenakota. Nōtākikai hīte ikara inakari apokini ōti apisa.

²⁶—Híte sāpiretikosaaki: “Hīkenakota. Teoso mereēkiti aiātapakiti āparaā makipakaniātaāpekarari,” hinikosaaki, !hīsipe iuaā. Hīsāpiretikosaaki: “Iriko ākirari iua,” hinikosaaki, kona hāuikapiri. ²⁷Kotxi nota hītari iaxitikiri nikanapiriākasaaki, !ikara atokoni nitxa. Mēkokari atoko itxa nota hītari iaxitikiri nikanapiriākasaaki, kotxi mēkokari atokatxi pokīkinimoni imēkoka, isapitipo atokatxi ereēkokinimoni, ininiā ikinimane itikariko. Iua atokokana nota hītari iaxitikiri napokini. Ikinimane itikanoko nota. ²⁸Aātamatakasaakiri maiori apotiitiniua, aimarotari ipīkari iuaātaā auini. Iua atokokana nota kanapiriākasaaki, ikinimane imarotari napokini.

Kākiti Itari Iaxitikiri Kanapiriini

(Marko 13.24-27; Arókasi 21.25-28)

²⁹Xesosi sāpirenauatapanika:

—Apikomoni nisāpiretai nikanapiriini pirena. Iua inikoriākori napaka atoko, atokatxi piākako. Kasiri kona ponikaikako. Iōriki iaxitikero irikako. Iaxiti iōriki auiniātaā auakari iakeēkatako. ³⁰Iuasaaki Teoso takaōtxikare auako iaxiti, nota hītari iaxitikiri kaiamapeka uai nikanapiriini himarotini īkapani. Ikara atoko inakasaaki, ikini kākititi itixi auakani txiapatako, kotxi ninoa atapanoko nota kākiti itari iaxitikiri katxiāri āki nikatxakaāpotini. Nitapararitika napoākatako, kotxi ikinimane auīte nitxauako iuasaaki.

Niotximerekata nikatxakaãpota. ³¹Okenakotaãkako koitxi mitaro, trõpeta inakoro. Iuasaakipekako niokanatana ninitiriakori itixi iaõka kãkiti Teoso mereẽkini apotiitakani ìkapani.

Piko Mina Pirena

(*Marko 13.28-31; Arókasi 21.29-33*)

³²Xesosi sãpirenauatapanika:

—Nisãpiretai sãpirenatxi atão inakari oerekiko, piko mina pirena, nikanapiriini apiata himarotini ìkapani. Pooïoporipeka onakasaaki, otomorekasaaki, “Kamoï apokanapanoka,” hïtxa. ³³Iua atokokana, ikara misirikaretxi mixikanani nisãpiretakiti hïtikasaaki, himarotapekariko nota kaiama kanapirikapeka ninini. ³⁴Ia nisãkire atão. Itixi auakani !ixipoka ikinipoko nisãpiretakiti mapokakani apisa. ³⁵Iaxiti xipokapitikako. Ìkoraxiti apaka xipokapitikako. Iuaritika nota sãkire lixipoka.

Kãkiti !Imarotari Xesosi

Apokini Manapi

(*Marko 13.32-37; Arókasi 17.20-37*)

³⁶Xesosi sãpirenauatapanika:

—Kãkiti !imarotari ikara õti, nota hïtari iaxitikiri nikanapiriini õti. Teoso nitiriakori iaxitikini apaka !imarotari ikara õti. Nirinanira imarotari. ³⁷Nota hïtari iaxitikiri nikanapiriãkasaaki, kitxakapirika Noee auakasaaki atoko itxako. ³⁸Xirataãtxi apisa ikinimane nipokota, iãta itxa. Kiki, sito ìtaniriuata. Ikara atokokanera itxa Noee maporo ãki iereẽtini õti. ³⁹Ikara apisa !imarotarina ipininina tïkane. Mokatanitika xirataãtxi apoka, ikinikana xipoka itxana. Nota hïtari iaxitikiri nikanapiriãkasaaki, iua atokokanerako itxa, ininiã iposope hïtxako.

⁴⁰—Iuasaaki nikanapiriini õtisaaki, ipi kiki parïkauanãta kikio. Teoso nitiri iaxitikiri anikariko ãti, ãti kaikota itxako. ⁴¹Ipi sito atarokiri kamakani, ãto anikaãkako, ãto takanapaãkako. ⁴²Ininiã iposope hïtxako, kotxi kona himarotari hïauïte kanapiriini õti. ⁴³Hïxinikariko. Kaapokori imarotaãkamariko kïtiriri apokini õti, !imakamako. !Auiritamariko kïtiriri anikiniri itii. ⁴⁴Kïtiriri apoka kãkiti miãtapakinitipanika. Iua atokokanerako nota apokako himimarotakinitipanikarako. Ininiã iposope hïtxako nota hïtari iaxitikiri hiãtapini —itxa Xesosi sãkire.

Nitiritxi Erekar, Nitiritxi

Maerekati Pakini (Arókasi 12.41-48)

45—Ininiã Teoso nitiriakori erekarini hĩtxauako. Nisãpiretai nitiritxi kimaroreri inakari, kotxi iua kípitari ipatrãote sãkire. Iuakara ipatrãote paniãta, apanakini initiriakori inikatini ikapani. Isikakienatana ipatrãote nitiriakori, nipokori sikiko manapi. 46Iua initiri poxokoniuata ipatrãote paniãtakiti iaõka ikaminiã, ipatrãote apokasaaki iposope itxa. 47Atãopitikara nitxai hĩte. Iua patrão paniãtariko iua initiri ikinika inakiti inikatini ikapani. 48Nitiritxi maerekatipekana xinikari: “!Katimari ikanapiriã nipatrãote,” itxa. 49Ininiã apanakini nitiritxi ixiroka. Inipokota, iãta poãtakanikata. 50Ininiã ipatrãote kanapiriãko imiãtapakinitipanika. Ikanapiriãko initiri mimarotakinitipanika. 51Ininiã ipatrãote xirokitatariko aãpitsaã. Iposo atoko imisiritaãkako maerekanikata, “Erekapitikaua ate,” inakanikata. Iuaã kãkiti txiapata, akatsatsiriũtaua ãtipirika. Ininiã ikara nitiritxi maerekati atoko kona hĩtxape —itxa Xesosi sãkire.

Tesi ãtokoroakoro Pirena

25 ¹Xesosi sãpirenauatapanika:

—Ia nisãpirena oerekai Teoso auĩtetxi ininiãua. Tesi ãtokoroakoro kosekari tirikapi. Isana kimaporiã. Iãtaparina ipatrãotena. Iua inapanikako kiinirimoni ãtanorouatini ikapani. ²Siko ãtokoro kiikiterini, siko miikiteni. ³Miikiteni anikari tirikapi koana, txamari !anikarina tirikapiã. ⁴Kiikiterini anikari tirikapi koana. Apaka anikarina tirikapiã. ⁵Ipatrãotena !katimari apokini. Ininiã itaponoka ininiãna, imakanãtana. ⁶—Apanĩkanõka ikenakotarina: “Apokanapanoka. Hĩsapoka. Hãpiãkatari.” ⁷—Ininiã ãtokoroakoro õkitikaua, tirikapi iopotokaka, sa itxana. ⁸Ninoa miikiteni amanaãri kiikiterini tirikapiãte, kotxi miikiteni tirikapite oakaarita. ⁹—Kiikiterini apakapiretana: “Kona. Tirikapiã ate nakiti !apakata hĩte ikapani. Ate ikapaninokara apakata. Hĩsa tirikapiã vëxtitarimoni. Hiamotariko.” ¹⁰—Ininiã ninoa miikiteni sari tirikapiã iamotinina. Ninoa sikasaaki, ipatrãotena apoka. ãtokoroakoro iposope inakani iroã iuakata aapokotxi ãki ãtanorouatakari kiiniritiã. Itore totaãka. ¹¹—Eereka ãtokoroakoro tirikapiã amotakani kanapiriã. Ninoa akirita: “Patrão, patrão, pimatakakinoua itore aĩroini ikapani,” itxana. ¹²—Ipatrãotena apakapireta: “Hĩsipeka. Atão nisãpiretai. !Nimarotai hĩte.” ¹³Xesosi sãkirauata:

—Erepaniko. Iposope hĩtxako, kotxi !himarotari nota hĩtari iaxitikiri kanapiriini õti. !Himarotari amonikitaauako napokini —itxa Xesosi.

Ipi Āti Pakini Nitiritxiakori

(Arókasi 19.11-27)

14 Xesosi sãpirenauatapanika:

—Nikanapiriini ia atoko itxapaniko. Kiki aiamatapeka õtakoxiti āti itixitimoni isini ĩkapani. Ininiã akiritari initiriakori. “Hinĩkatariko ikini nitii,” itxana. 15 Isikari initiri apia imaroretakari txineiro ota siko mio. Āti initiri isika txineiro ota ipi mio. Āti initiri poiãoka imarotakari ātika mio txineiro ota isikari iua. Eereka sipe itxa.

16—Siko mio apakapakari amotari tiitxi, eereka vẽtxita itxari. Ikara atoko ininiã apakaparo txineiro ota tesi mio. 17 Iua ipi āti mio apakapakari iua atokokana itxa. Iua apakaparo ipi ipi pakini mio txineiro ota. 18 Iua ātika mio txineiro ota apakapakari, ikisakari kipatxi, taka itxaro txineiro iua aariko āki. Ikataro ipatrãote txineirote.

19—Eereka okanaxixiti inaka atoko ipatrãotena kanapiriã. Akiritana: “Kiãtokopa hĩtxataro nitxineirote?” itxana. 20 Iua siko mio apakapakari minari tesi mio. Iua sãpiretari ipatrãote: “Patrão, pite sikano siko mio txineiro ota. Patamata. Napakapari apikomoni siko mio txineiro ota pite ĩkapani,” itxa.

21—Ipatrãote apakapapiretari: “Erekapitikai pite. Erekarini nitiritxi pitxaua. Erekarini pinĩkatiniro nitxineirote. Erekapitikari pinĩkatiniro poiãoka nisikini. Ininiã nauritaiko itomaneri pinĩkatini. Ininiã pipoxokoniuatako notakata,” itxa.

22—Iua ipi mio ota apakapakari apoka. Iminaro ipi ipi pakini mio. Isãpiretari ipatrãote: “Patrão, pite sikano ipi mio txineiro ota. Patamata. Apikomoni nota apakaparo ipi mio txineiro ota pite ĩkapani,” itxa.

23—“Erekapitikai pite. Erekarini nitiritxi pitxaua. Erekapitikari nitxineirote pinĩkatini. Erekarini poiãoka pinĩkatini. Ininiã itomane nitakanapako pinĩkatini ĩkapani. Ininiã pipoxokoniuatako notakata,” itxa.

24—Eereka iua ātika mio txineiro ota apakapakari apoka. Iua sãpiretari ipatrãote: “Patrão, nimarotai pite. Pataparaxinirei pite. Pite amotari pikiena, kotxi kona pite takarauata. Pite avari pikiena pimaparĩkauatakaniãtaã. 25 Nipĩkarauatiniã, nikipataro pitxineirote kipatxi āki. Patamata. Oia pitxineirote,” itxa.

26—“Nitiritxi maerekati iareri pitxaua pite. Pimarotari niamotiniri nikiena, kotxi !nitakarauata. Pimarotari nota avari nikiena nimaparĩkauatakaniãtaã.

27 Ikara atoko ininiã, pimanirekakaniãri piparĩkauatini, kinirepa kona pisikatari nitxineirote pãkomoni? Pisikaãkamaroko, napakapamaroko apikomoni nitxineirote nikanapiriãkasaaki,” itxa.

28 Ininiã āti ipaniãta:

—“Pimakatzakariko iua mio ãtika mio auakiti. Tesi mio txineiro ota auakitimoni pisika. ²⁹Kotxi apikomoni isiãkako iua itomaneri auakiti, ininiã apiata auinariko iua. Iua poiãoka auakiti, inakito mixirikaãkako. ³⁰Ia ninitiri iareri hõka mapara piãkatximoni. Iuaã kãkiti txiapata. Akerakitatsiriũta itsii xika.”

Ikinimane Apotiitaãkako

Xesosi Apisatoõ

³¹Apikomoni Xesosi sãpirenauata:

—Nota hõtari iaxitikiri nikanapiriãkasaaki auõtetxi ninakasaakiaua, ikinika Teoso nitiriakorikata, niitopãkako auõtetxi itopanere nopini. Peerekari iusaaki. Ikinimane paxitanoko nota. ³²Ikini uãkati kãkiti apotiitaãkako nota apisatoõ. Iusaaki nikaiarikitanako ninoa. Soti auĩte, kapra pakini piratakari ipiraakori koketakaniaua ikaiarikitatini atokokanera, nota hõtari iaxitikiri kaiarikitatana ikinimane kãkiti. ³³Pirãtxi piratakari takiniri soti auĩte ikikomoni, itakiniri kapra isanaremoni, iua atokokanera nota hõtari iaxitikiri takari kãkiti erekarini nikikomoni. Kãkiti maerekani nitaka nisanaremoni.

³⁴—Eereka nota kãkiti auĩte txanako ninoa kãkiti erekarini nikikomoni auakani: “Niri sikari erekari hitemoni. Hina. Hĩroã auõtetxi nininiãtaãua. Ia auõtetxi nininiãtaãua maiamatapeẽkaika hĩte ãkapani itixi kamikosaakipeka. ³⁵Mitxipeka ninatxitakasaaki, hĩte sikakienatapekano nota. Niposonatakasaaki, ãparaã hĩsikapekano. ãti itixiti nĩkasaaki, hĩte apakapapekano nota. ³⁶Nimamãkanisaaki, mãkatxi hĩsikapekano. Namianatakasaaki, hinĩkatapekano. Kateia ãki nauakasaaki, himotikaẽtapekano. Ininiã hĩroã,” nota kãkiti auĩte txanako kãkiti erekarini.

³⁷—Ininiã kãkiti atão inakari kamakani apakapapiretariko: “Apiananiri, kirisaakipa pinatxitakasaaki, asikakienatai? Kirisaakipa piposonatakasaaki, ãparaã asikai? ³⁸Kirisaakipa ãti itixiti pĩkasaaki, aãpakapai? Kirisaakipa pimamãkanisaaki, mãkatxi asikai? ³⁹Kirisaakipa pamianatakasaaki, anĩkatai? Kirisaakipa kateia ãki pauakasaaki, amotikaẽtai?” itxanonako nota.

⁴⁰—Ininiã nota kãkiti auĩte apakapapiretanako: “Atãopitikara nitxai hĩte. Kãkiti poiãori, nisãkire auĩãkari, hĩtiretiniã, iusaaki nota hĩtiretini atokokana hĩtiretari,” nitxanako ninoa.

⁴¹—Iusaaki nitxanako nisanaremoni auakani: “Hĩsipeka. Teoso misiritaiiko hĩte, kotxi !hĩkĩpitari iua sãkire. Hĩsipeka arikatxi maxipokatimoni. Teoso kamari iua arikatxi, Satanasi misiritikoãtaã tĩkane, Satanasi nitiriakori misiritikoãtaã tĩkane. Hĩsipeka iuamoni. ⁴²Kotxi ninatxitakasaaki nipokori !hĩsikano. Niposonatakasaaki, ãparaã !hĩsikano. ⁴³ãti itixiti nĩkasaaki, !hinirekano haãpoko

napokini. Nimamākanisaaki, kona mākatxi !h̄isikano. Namianatakasaaki, !hinīkatano. Kateia āki nauakasaaki, !himotikaētano,” itxanako kākiti maerekani.

44—Ininiā ninoa apakapapiretariko: “Apiananiri, pinatxitakasaaki, piposonatakasaaki, pamianatakasaaki, pimamākanisaaki, kateia āki pauakasaaki, āti itixiti p̄kasaaki, kirisaakipa ate lapakapai?” maerekani txanoko nota.

45—Ininiā nota kākiti auīte apakapapiretanako ninoa: “Atāopitikara nitxai h̄ite. Himanirekakanisaakiri h̄itiretiniri kākiti poiāori nisākire auīākari, iusaaki !hinirekari nota h̄itiretini,” nitxanako ninoa.

46—Ininiā Teoso iokanatanako ninoa maerekani kamakani misiritikoātaā. Iuaātaā ninoa misiritaākapikako. Imisiritikona kona xipokaikako. Kākiti atāo inakarínoka kamakani auapininiika imaxipopekaniika Teosokata —itxa Xesosi.

Xesosi Okaenetiko Pirena

(Marko 14.1-2; Arókasi 22.1-2; Xoão 11.45-57)

26 ¹Ikara inakari is̄apiretaka atoko, Xesosi misākiretana imoianariakori: ²H̄ite imarotari ipi ōti napaka atoko aua Páskoa inakori kiiniriti. Iua kiiniriti auakasaaki nota h̄itari iaxitikiri nisikaākako nimokaiakariakorimoni. Aamina ĩpiriāmitakari nopini nitakaākako. Iua atoko ipina nitxako —Xesosi txana imoianariakori.

³Iusaaki sasetotxi auīteakori, kaiōkatsopareriakori, kiomātxiakori pakini apotiitaua. Sasetotxi auīte apiatakari Kaipasi inakori aapoko āki apotiitauana.

⁴Imapapiretarina Xesosi imaīkinina ĩkapani. Inirekarina Xesosi imaīkinina apanakini mimarotakinitika. Imisākiretakakana Xesosi okinina ĩkapani.

⁵—Kiinirisaaki !amaīkapaniri. Amaīkiniāri, apanakini kākiti niaitamaua ate —itxakakana.

Sito Kamariāro Mīkaro

(Marko 14.3-9; Xoão 12.1-8)

⁶Xesosi auanāta aapokotxi Petánia inakoriātaā. Isari Simão inakori aapokomoni. Iua Simão mitxi amianatakari, maere matati. Eereka erekapekari. ⁷Simão aapoko Xesosi auakasaaki, sito apoka iuamoni. Ominari kopitipaki kai kamakori, kai arapástiro inakori. Kopitipaki x̄apoka kamariāro. Oa pakaronero. Xesosi nipokonātakasaaki, oa sito kitakaro kamariāro ikiīā.

⁸Imoianariakori itikari Xesosi kiiā okitakiniro, ininiā ninoa naiataua:

—Kinirepa oa ioanataro kamariāro? ⁹Kinirepa kona ov̄txitataro? Ov̄txitaākamaroko oāpakapamaroko txineiro ito, matxineirotenimonikari osikini ĩkapani —itxakakana.

¹⁰Xesosi imarotari ninoa ikara atoko ininina.

—Kinirepa homanatataro oia sito? Erekaru okaminano notamoni.
 11 Auapikanako matxineiroteni hītekata. Kona nota auapani hītekata.
 12 Oia kitakaro kamariāro nikiiā, nota iposope ninini nikatiko apisa.
 13 Atāo nisāpiretai hīte. Teoso iokanapirena erekaru sāpiretikoātaā
 ikini itixiti, isāpiretaākako apaka oia sito kitakiniro kamariāro nikiiā,
 ininiā kākiti ikini itixiti auakani xinikapikaro oa —Xesosi txana ninoā.

Xotasi Sari Sasetotxi Auīteakorimoni

(Marko 14.10-11; Arókasi 22.3-6)

14 Eereka Xesosi moianari Xotasi Isikariotxi inakori sari sasetotxi auīteakorimoni.
 15 —Xesosi nisikiniāi hītemoni, kiripa hīte sikano nota? —itxana ninoā.
 Ininiā ninoā:
 —Asikaiko trīta txineiro ota pirata kamakoro —itxana ninoā.
 Ininiā iikitxitarina. 16 Eereka Xotasi iātapari Xesosi poiāonoka
 kākitikata auakasaaki, imīkapiritiniri īkapani.

Páskoa Kiiniriti Kamiko

(Marko 14.12-21; Arókasi 22.7-13)

17 Pāo miātiākati nikiko kiiniriti potorikini ōti, Xesosi
 moianariakori apoka iuamoni.
 —Namonipa ate maiamatari Páskoa kiiniriti pite īkapani? —itxarina iua.
 18 —Hīsa sitatximoni. Nisāpiretakiti iaōka hinitari kiki. Hāpokasaakiri,
 hītxariko iua: “Koerekareri txai, ipinini tīkane kaiamapeka. Ikamariko
 kiiniri Páskoa inakori pite aapoko imoianariakorikata,” hītxako.
 19 Ininiā imoianariakori kamari Xesosi paniātakiti iaōka.
 Imaiamatari ikinika kiiniri īkapani.
 20 Ūkanōkapeka inakasaaki, Xesosi imoianariakorikata topāka
 inipokotinina īkapani. 21 Inipokotakasaakina, Xesosi txana:
 —Atāo nisāpiretai hīte. Ātika hīte sauaki mīkapiritanoko nota.
 22 Ininiā imoianariakori tsorīkaāta. Iteene imatinaniuatana. Āti pimaāri:
 —Apiananiri, atauako notakani?
 Iua atokokana ātipekana:
 —Apiananiri, atauako notakani?
 Ikara atoko itxanātana ikinikana, ipimaaāpotinirina Xesosi.
 23 Ininiā Xesosi apakapapiretana:
 —Ia tiitxiā notakata nikakari mīkapiritanoko. 24 Nota hītari iaxitikiri okaākako.
 Teoso sākire iōkatsopatakori sāpiretapekari nipinini tīkane. Nota hītari iaxitikiri
 mīkapiritakari iteene misiritaākako. Erekariko maponaniākatika inaākamako.

²⁵Ininiã Xotasi kamĩkapirireri misãkiretari Xesosi:

—Koerekareri, atauako notakani?

Xesosi apakapapiretari:

—Ari, pitepitikara.

Xesosi Ìto, Iarēka Pakini

(Marko 14.22-26; Arókasi 22.14-23; 1 Korĩto 11.23-25)

²⁶Inipokonãtakasaakina, Xesosi kosekari komiri. Imisãkiretari Teoso:

—Erekapitikari ia komiri pisikakiti atemoni —itxa.

Eereka imaxinĩkitari, sika itxari imoianariakorimoni.

—Apakapa, nika hĩtxako. Ia niĩto —itxana.

²⁷Eereka ikosekari iãkoanatxi iãriã auini. Imisãkiretari Teoso:

—Erekapitikari ia iãriã pisikakiti atemoni —itxa.

Eereka sika itxari iãkoanatxi ninoamoni:

—Hĩkinika hiatariko. ²⁸Ia niarēka xiketakari makatxakariko kaiãopokori kãkiti maerekani. Teoso sãpiretapekari kãkiti ikamaenetakiti amaneri kãkiti ĩkapani.

Ia niarēka oerekari kãkiti, Teoso kamapekari ikamaenetakiti. ²⁹Atão nisãpiretai.

!Niãtaikaroko ovapeẽ, Teoso auĩtetxi ininiãtaãua nimapokakanisaaki. Iuaã napokasaaki niãtari. Amaneri iãriãti niãtako hĩtekata —itxana imoianariakori.

³⁰Xipoka atoko ixikaretarina xikari Teoso ĩkapani. Eereka isana oxiratarimoni Oriva inakorimoni.

Xesosi Sãpiretari Petro

Kipatiniri Iua

(Marko 14.27-31; Arókasi 22.31-34; Xoão 13.36-38)

³¹Iuaã Xesosi misãkiretana imoianariakori:

—Ia ĩkanõkati hĩkinika hĩte takanapanoko nota, kotxi Teoso sãkire iõkatsopatakori sãpiretapekari ikara atoko inakari. Itxari:

Nokariko soti auĩte piratakari, ininiã ikinika ipiraakori iarikitatoko, itxa Teoso sãkire iõkatsopatakori. ³²Ininiã eereka nota nipinaãka atoko, iuaĩkana nõkitikaãkaua atoko, nisako hĩte apisa Karirėiamoni —itxa.

³³Ininiã Petro apakapapiretari:

—Nota !nitakanapai pite. Atxiĩti ikinimane takanapai, iuaritika kona nota takanapai —itxa.

³⁴Ininiã Xesosi:

—Atão nisãpiretai. Ia ĩkanõkati patari sãkirauatini apisapanikako, “!Nimarotari iua,” pitxanoko ipi ãti pakinikata.

³⁵Ininiã Petro:

—Ikara atoko Inixapanii pite. Nikipatinii apisapanikamako, nipinamako. Ikinika Xesosi moianariakori ikara atoko itxana.

Xesosi Misäkiretiniri Teoso Xetsémani Inakoriätaã

(Marko 14.32-42; Arókasi 22.39-46)

³⁶Eereka Xesosi sari imoianariakorikata Xetsémani inakoriätaã. Xesosi: —Uai hii-topäka. Ikiraã nisako Teoso nimisäkiretini ikapani —itxa Xesosi.

³⁷Anikari Petro, Sepeteo anaakori ipi pakini iuakata isinina. Iuaã Xesosi tsoríkaänäta, imaromaxiretari. ³⁸Imisäkiretana ninoa: —Nixinire imaromaxiretari. Iteene nimaxire, ininiã okaaritano. Uai hikaikota. Araökire hitxako —itxana ninoa.

³⁹Apikomoni isa, pamaka itxa, misäkireta itxari Teoso:

—Niri, atauako apakata pimakatxakiniri nimisiritiko akamoni ikari? Kona ninirekari natatsiirauatini. Iuaritika pite nirekiniäri, ininiã nota apaka nirekari —itxari Teoso.

⁴⁰Iuasaaki ikanapiriã ipi äti imoianariakori auiniätaã. Ninoa imakanäta: —Petro, atauako kona hite miteenekari hitikapokotini äto oaranoka?

⁴¹Erepaniko. Hinirekasaakiri maerekati hïkamini, !hïkamapiri. Araökire hitxako. Himisäkiretariko Teoso, ininiã !hïkamari maerekati. Käkiti xinire atxiiti linirekari maerekati ikamini. Txamari käkiti ito tapara poiäoka, ininiã ikamari maerekati. Ininiã erepaniko —Xesosi txari Petro.

⁴²Iuaïkana isa apikomoni Teoso imisäkiretini ikapani:

—Niri, pinirekiniäri natatsiitiniri nimisiritiko akamoni ikari, ininiã nikamapitikariko pinirekakiti —itxari Teoso.

⁴³Iuaïkana ikanapiriã imoianariakorimoni. Imakanätapanikana. Itaponoka itxana. Kona iposotarina ikoatinina. ⁴⁴Iuaïkana Xesosi takanapana, iuaïkana ikanapiriã iuaätaäkana. Iuaïkana misäkireta itxari Teoso. Mitxi atokokana itxa isäkire.

⁴⁵Iuaïkana ikanapiriã imoianariakorimoni:

—Himakanätapanika? Hitomanätapanika? Nisikiko manapi apopeka. Nota hitari iaxitikiri nimïkapiritaãka maerekanimoni nisikiko, inireëkitina ikaminina ikapani.

⁴⁶Hökitikaua. Masipeka. Hätapa. Ikiraã ina nota mikapiritakari —itxana ninoa.

Xesosi Maïkiko Pirena

(Marko 14.43-50; Arókasi 22.47-53; Xoão 18.1-11)

⁴⁷Xesosi säkirauanätapanika inakasaaki, Xotasi, Xesosi mitxi moianari, apoka. Iuakata ina itomaneri käkiti, saasara mïkani,

piriri mĩkani pakini. Sasetotxi auĩteakori, kiomãtxiakori pakini iokanatana ninoa. ⁴⁸Iua Xotasi kamĩkapirireri sãpiretapekana ninoa:

—Iuapitipanikarako napitxokapaniko. Himaĩkariko iua napitxokakiti.

⁴⁹Xotasi apoka. Xesosimonipitipo isa.

—Ereẽkai koerekareri.

Eereka apitxoka itxari. ⁵⁰Ininiã Xesosi txari Xotasi:

—Nitiretakiti, pikamariko pinirekakiti. Nauiritai —itxari.

Iuasaakipeka Xotasikata sikani sakata Xesosimoni, maĩka itxarina. ⁵¹Ãti Xesosi moianari kosekaro saasara. Isuaaãkatari sasetotxi auĩte apiatakari nitiri. Itsotakãpititari.

⁵²Ininiã Xesosi txari:

—Pitaka saasara mitxi oãuiniãtaã. !Pineenamauatape. Ikeekotxi himaĩkiniã, ãti õti hĩpinako ikeekotxi xika. ⁵³!Pimarotari niposotiire. Nota nirekiniãri, nakiritari niri moianatinino nota. Nakiritiniãri, iuasaakipeka iua iokanatarikari seĩ mio iniritari nota imaktxakinina ĩkapani. ⁵⁴Kona nakiritari niri, kotxi Teoso sãkire iõkatsopatakori sãpiretapekari nimaĩkiko tĩkane ia atoko inakari.

⁵⁵Iuasaaki Xesosi misãkiretana iuamoni ĩkani:

—Kinirepa himinari saasara, piriri pakini himaĩkinino ĩkapani?

!Kĩtirino nota. !Kikeekono nota. Ikiniõtika niitopãka Teoso misãkiretiko aikoti ãki noerekini hĩte. Iuasaaki kona himaĩkano. ⁵⁶Ia atoko himaĩkano, kotxi kitxakapirĩka Teoso sãkire sãpiretakani iõkatsopatapekari ia atoko himaĩkinino. Ininiã Teoso sãkire iõkatsopatakori iaõka uatxa apokapeka — itxa Xesosi. Iuasaakipeka Xesosi moianariakori asikari iua, miteka itxana.

Xesosi Xoteo Auĩteakori Apisatoõ

(Marko 14.53-65; Arókasi 22.66-71; Xoão 18.12-14, 19-24)

⁵⁷Ninoa Xesosi maĩkakani anikari Xesosi Kaipasi aapokomoni. Iua Kaipasi sasetotxi auĩte apiatakari itxaua. Iuaãtaã kaiõkatsopareriakori, kiomãtxiakori pakini apotiĩtapekaua iuasaaki. ⁵⁸Ninoa anikasaakiri Xesosi, Petro sari Xesosi tikini. Ikira atoko auaãponãta. Sasetotxi auĩte apiatakari aapoko takote isa. Iĩroã pirikere ãki. Iitopãka Kaipasi nitiriakorikata. Kiatokopa inaãkapani Xesosi, ininiãra isa Xesosi tikini imarotiniri ĩkapani.

⁵⁹Kaipasi aapoko ãki Sasetotxi auĩteakori, kiomãtxiakori, ikinika Xoteo auĩteakori pakini nitana kãkiti aãpirena kamakani Xesosi okinina ĩkapani. ⁶⁰Itori kãkiti sãpiretari aãpirena Xesosi ikamapiretinina. Txamari ixika !auari Xesosi okinina ĩkapani.

Eereka apokana ipi aãpirena kamakani. ⁶¹Ninoa txari:

—Ia kiki txari: “Nota posotari aiko Teoso misākiretiko nirikini. Ipi āti ōtisaaki niposotari iuaīkana nōkitikiniri,” itxa isākire.

Kona atāo ninoa sākire. ⁶²Sasetotxi auīte apiatakari ōkitikaua.

—Kona papakapapiretatari pitemoni apoīrauatakani? Atāokani piposotatari ikara atoko pikamini? —itxari Xesosi.

⁶³Xesosi !kasākireri. Ininiā sasetotxi auīte apiatakari iuaīkana misākiretari Xesosi:

—Uatxa nipimaāi Teoso mipīkati apisatoō. Atāonani pisāpiretaua. Pite, Teoso mereēkiti pitxataua? Teoso ākirikai pite? —itxari Xesosi, kotxi inirekari Xesosi kerokiniri isākire.

⁶⁴—Ari, iuapitikanano. Nisāpiretaiko hīte hīkinika. Hātamariko kākiti itari iaxitikiri topākini Kaposotiireri kikomoni. Hātapariko kākiti itari iaxitikiri uai apokaāpotini katxiāri āki —Xesosi txana ninoa.

⁶⁵Sasetotxi auīte apiatakari kenakotari ikara Xesosi sākire. Iuasaakipeka iua matsorākari imāka, kotxi kona xatiki ipotxitari Xesosi sākire.

—Maerekati isākire: “Teoso ākirirano,” itxa. !Anirekaikari apanakini kamapiretiniri Xesosi. Uatxaika hīkenakotapekari isākire maerekati. ⁶⁶Kiātokopa atxatari Xesosi? —itxana ninoa.

—Ixika auapeka ipinini ikapani ininiā uatxa okaākapitikako —ninoa txari iua.

⁶⁷Eereka ikiisokatoōtarina. Iāsokarina. Apanakini aritoōtari Xesosi.

⁶⁸—Pite Teoso mereēkiti pininiāua, pisāpiretaua, kipa aritai? —itxarina iua.

Inapetarina.

Petro Kipatari Xesosi Imarotini

(Marko 14.66-72; Arókasi 22.54-62; Xoāo 18.15-18, 25-27)

⁶⁹Iuasaaki Petro topākanāta mapara pirikeri āki. Ātokoro Kaipasi nitero sari iuamoni.

—Pite Xesosi Kariréiakiri moianaripitikarai —otxari iua.

⁷⁰Txamari iua kipatari ikinimane apisatoō.

—!Nimarotari ikara atoko pinanātakiti.

⁷¹Ininiā isa pirikeri iroānakikomoni. Iuaā āto ātokoropekana Kaipasi nitero atamatari iua. Ininiā osāpiretana kākiti iuaā auakani:

—Xesosi Nasareekiri moianaripitikara ikira —otxa.

⁷²Iuaīkana ikipatari:

—Teoso imarotari iua kiki nimimarotakani —itxa.

⁷³Eereka paītiki atoko kikiākini iuaā auakani sari Petromoni:

—Pite atãopitika iua moianaripitkarai, kotxi pisãkire ipinimoni. Kãkiti Kariréiakiri sãkire atokokana, Xesosi sãkire atokokana pitxa pite sãkire —ninoa txari Petro.

⁷⁴Ininiã Petro apakapapiretana:

—Atão nisãkire minakaniãua Teoso misiritanoko. Nisãkire atãopitika. !Nimarotari iua kiki —itxama.

Iuasaakipeka patari sãkirauata. ⁷⁵Ikara ikenakotakasaaki, Petro xinikari Xesosi sãkire, kotxi mitxipe Xesosi txari iua: “Patari sãkirauatini apisapanikako, ipi ãti pakinikata, ‘!Nimarotari iua,’ pitxanoko.” Ininiã Petro sipeka. Itxiapakata.

Xesosi Pirato Apisatoõ

(Marko 15.1; Arókasi 23.1-2; Xoão 18.28-32)

27 ¹Katimatinĩkata sasetotxi auĩteakori, kiomãtxiakori pakini apotiitaua. Imisãkiretakakana:

—Kiãtokopa atxatari Xesosi aõkini? —itxana.

²Eereka iaxirikãkitakarina Xesosi, anika itxarina Homano auĩte Põsio Pirato inakorimoni, sikanapa itxarina.

Xotasi Ipinini

(Átosi 1.15-19)

³Xotasi, Xesosi mĩkapiritakari, kenakoenetakasaakiri Xesosi ipinini tĩkane, maerekaxiniretinoka itxa, kotxi iuaka sikari Xesosi imokaiakariakorimoni okiko tĩkane. Iuaĩkana isipikaro trĩta txineiro ota pirata kamakoro sasetotxi auĩteakori, kiomãtxiakori pakinimoni.

⁴—Nota kamari maerekati. Nimĩkapiritari Xesosi. Ixika !auari iua ipinini ĩkapani —itxana ninoa.

Ininiã ninoa:

—Pite kamakiti xikakara. Pitekara sikaua ate Xesosi.

⁵Ininiã Xotasi okaro txineiro ota Teoso misãkiretiko aikoti ãki, eereka isipe ãtiãtaã. Iuaãtaã iuaka iaxirinkanokitapeua, aamina porĩã iaxirikaua, arõka, ipĩpe itxa.

⁶Teoso misãkiretiko aikoti ãki sasetotxi auĩteakori kosekaro oa txineiro.

—Oia txineiro kiki okiko ĩki. Ia xika ate !auritaãka aãpotiitiniro oia txineiro ãto txineirotikata Teoso misãkiretiko aikotiãkero.

⁷Kiãtokopa atxataro oia txineiro? —itxakakana.

Eereka ninoa imarotape. Iamotarina kikio, tiitxi kamakari kikiote, Xoteo minakaniua ikatiko tĩkane. ⁸Oa txineiro kiki okiko ĩki xika, Xesosi okiko ĩki xika, iua akauari takauãkatakãka “Arẽkatxi Akauariti” inaãka. Uatxa akiritaãkapanika iuaãtaã “Arẽkatxi Akauariti.” ⁹Iua atoko

ininiã, kitxakapirĩka Teoso sãkire sãpiretakari Xeremia inakori atão txari:

Isaero auakani iĩkitxitari trĩta ota pirata kamakoro Teoso mereẽkiti okiko ĩkapani.

¹⁰ Eereka isikarona oa txineiro ota tiitxi kamakarimoni, ikikiote iamotinina ĩkapani, kotxi Teoso nirekari ia atoko ikaminina, itxa Xeremia kitxakapirĩka. Ininiã Xeremia sãkire iaõka apopeka iuasaaki.

Xesosi Pirato Apisatoõ

(Marko 15.1-5; Arókasi 23.1-5; Xoão 18.28-38)

¹¹ Iuasaaki Xesosi tima Homano auĩte Pirato inakori apisatoõ. Pirato pimaãri Xesosi:

—Pitekani Xoteoakori auĩte txataua?

—Ari, iuapitikarano —itxari.

¹² Eereka sasetotxi auĩteakori, kiomãtxiakori pakini apoĩtari Xesosi. !Kasãkireri Xesosi iuasaaki. ¹³ Ininiã Pirato txari:

—Atauako kona pikenakotatari apoĩtiniina?

¹⁴ Xesosi !kasãkireri, ininiã Pirato tsorĩkaãta. ãkixinireẽ iua:

—Kininiãpa !kasãkireri?

Xesosi Okiko Nirekiko

(Marko 15.6-15; Arókasi 23.13-25; Xoão 18.38-19.16)

¹⁵ Ikini kiiniriti Pãskoa inakori, Homano auĩte sikakari ãtika kateia ãki auakari kãkiti nirekakiti. ¹⁶ Iuasaaki aua kateia ãki auakari Pahapasi inakori. Ikinimane imarotari iua. ¹⁷ Itomaneri kãkiti apotiitakasaakiaua, Pirato pimaãna ninoa:

—Ĩkiripa kateia ãki auakari hinireka nisikakini? Pahapasikani? Xesosi Teoso mereẽkiti inakorikani? —itxana ninoa.

¹⁸ Pirato imarotari Xesosi isikinina iuamoni ixikotinirina xika.

¹⁹ Iuasaaki Pirato topãkanãta kãkiti misiritiko isãpiretini pakita ãki. Iuasaaki ĩtanoro iokanapireta iuamoni.

—Maerekati !pikamape iua kikimoni, kotxi ixika !auari pokiniri. Erekari iua. Minipani nitaponetari iua kiki, ininiã maerekaxiniretinoka nitxa —otxari.

²⁰ Mapara sasetotxi auĩteakori, kiomãtxiakori pakini misãkiretana kãkiti iuaãtaã apotiitakaniaua:

—Piratomoni hĩtxako: “Pisikakariko Pahapasi. Pokãkitakariko Xesosi,” hĩtxariko —itxana kãkiti.

Ininiã ninoa auikari isãkirena. ²¹ Eereka Pirato pimaãna kãkiti iuaã apotiitakaniaua:

—Īkiripa kateia āki auakari hinireka nisikakini?

Ininiā ninoa akirikata:

—Pahapasira.

²²—Kiātokopa nitxtari Xesosi, Teoso mereēkiti inakorima? —itxa Pirato.

Ikinikana apakapapiretana:

—Aamina ĩpiriāmitakari nopini pitokakitariko.

²³Ininiā Pirato:

—Kixikapa? Maerekati !ikama —itxa.

Iuasaakipeka ninoa iteene akiripoakatana:

—Aamina ĩpiriāmitakari nopini pitokakitariko.

²⁴Ininiā Pirato kona sāpiretaikari Xesosi isikakini, kotxi ninoa neenamauatanapanoka. Ikosekari āparaā. Arokauakotaua ninoa apisatoō.

—Na nota xikani ia kiki ipinako. Hite xikakara ia kiki ipina —Pirato txana ninoa.

²⁵Ikinimane apakapapiretari:

—Atāopitikara. Misirikaretxi auiniā okiko xika, ate, aamariteni pakini apakapariko iua misirikaretxi —itxana.

²⁶Iuasaakipeka Pirato sikakari Pahapasi. Eereka ipaniātari Xesosi xirokitatiko aāpitsaā. Eereka isikari Xesosi isotonemoni aamina ĩpiriāmitakari nopini itokakitinirina tīkane.

Sotatoakori Napetiniri Xesosi

(Marko 15.16-20; Arókasi 22. 63-65; Xoāo 19.2-3)

²⁷Ininiā sotatoakori anikari Xesosi ninoa auite aapokomoni. Iuaā akiritarina apanakini sotatoakori, ininiā ikinimane sotatoakori ākitari Xesosi. Inapetarina. ²⁸Imaktxakarina Xesosi māka. Mākatxi pōkamarari ieretaka itxarina. ²⁹Eereka itakarina saporīeta kotipiaro kamakori ikiīā. Iuako ikikomoni taka itxari aāke. Ininiā itxīkitakarina Xesosi auitetxi atoko ininiāua. Eereka ikapotreēkauana iua apisatoō, napeta itxarina Xesosi:

—Aāuīte —itxarina Xesosi inapetinina.

—Xoteo auītekai pite —itxarina.

³⁰Ikiisokarina. Iua aāke ikosekana, arikiita itxapikarina. ³¹Inapetarina, eereka imaktxakarina mākatxi pōkamarari. Iua nakiti imāka iuaīkana ieretaka itxarina. Eereka mapara anika itxarina, aamina ĩpiriāmitakari nopini itokakitinirina ikapani.

Xesosi Tokakitaāka Aamina ĩpiriāmitakari Nopini

(Marko 15.21-32; Arókasi 23.26-43; Xoāo 19.17-27)

³²Xesosi anikaāpotakasaakina, aōkitarina Sireni sitatxitikiri, Simāo inakori. Ninoa paniātari iua, Xesosi anikakiti aamina ĩpiriāmitakari, anikini

ĭkapani, kotxi Xesosi ĭposotaikari anikiniri. Ininiã Simão anikari. ³³Apokana Kóokota inakoriãtaã. Apanakini akiritari “Kiitãtãtxi” inaãka akiritiko. ³⁴Iuaã ĭãriãmoni ikoketarina pinĩtxi kipixiãri, sika itxarina Xesosimoni, Xesosi ĭãtini ĭkapani, imakini ĭkapani. Atapixiãtaãka atoko, ĭãtari. ³⁵Ininiã itokakitarina Xesosi aamina ĭpiriãmitakari nopini. Inaãka atoko ikamarina sarauatxi kai soroã. Sarauatxi kãiatakani apakapari Xesosi mãka. Kitxakapirĩka Teoso sãkire sãpiretakari sãpiretapekari ikara atoko inini tĩkane. Iua txari:

Ixanakarina nimãka. Sarauatxi ikamana nimãka apakapakani imarotinina ĭkapani.

Itxa Teoso sãkire sãpiretakari kitxakapirĩka. ³⁶Sarauatxi xipoka atoko ĭitopãkana. Imoiaãrina Xesosi, kãkiti manikakaniri ĭkapani. ³⁷Aamina ĭpiriãmitakariã ikii nopini itakarina iõkatsopatakori: “Xesosi, Xoteoakori Auĩte,” itxa iõkatsopatakori. Ikara xika okaãka Xesosi.

³⁸Xesosi takote itokakitarina ĭpi kiĩtiririni aamina ĭpiriãmitakari nopini, ãti Xesosi kikomoni, ãti Xesosi sanaremoni. ³⁹Kãkiti iuaã napakani napetari, nokonoko itxa kiitana. Maerekaeneti isãkirepiretarina Xesosi:

40—Pite txari: “Aiko Teoso misãkiretiko niriãka atoko, ĭpi ãti õtisaaki iuaĩkana nõkitikari,” pitxa. Piteka pimakatxakaua. Pite Teoso ãkiri pinakasaakiaua, pikatxaka. Ikara atoko itxa sãkiretana kãkiti iuaã napakani. ⁴¹Iua atokotxikana itxana sasetotxi auĩteakori, kaiõkatsoparerini, kiomãtxiakori pakini ikara atoko inapetarina Xesosi:

42—Iua makananitapekari apanakini. Txamari iuaka ĭposotari imakananitiniua. Iua Isaeo auakani auĩte ininiãua, iuaka imakatxakamauako. Ikatxakiniã, ate auikari iua sãkire. ⁴³Iua auikari Teoso sãkire. Maiãtapari. Atauako Teoso nirekari imakatxakiniri iua uatxa, kotxi iua txari: “Teoso ãkirirano nota,” itxa —itxana.

44Kiĩtiririni iuakata tokakitakoni apaka maerekaeneti isãkirepiretarina Xesosimoni.

Xesosi ĭpinini Pirena

(Marko 15.33-41; Arókasi 23.44-49; Xoão 19.28-30)

⁴⁵Apaniãxiti itixi piãka. ĭpi ãti pakini oara ĭpiãka. ⁴⁶ĭpi ãti pakini oarape kikatamonipeka Xesosi iteene akirikata:

—Erii, Erii, aremaa sapakatanii.

Ikara Epireo sãkire. Ia atatsopatakari sãkireẽ, “NiTeosone, niTeosone, kinirepa pitakanapano?”

⁴⁷Kãkiti iuaã auakani kenakotari Xesosi sãkire. Ninoa uãkatari akirinãtiniri Erãsi.

48Ininiã äti miteka, mapoa atoko inakari iãka itxari iãriã katxioãrimoni. Aãke mapotökire taka, isirĩka itxamari Xesosi iãtini ĩkapani. 49Txamari apanakini:

—Kona pisikapiri. Atxiĩti Erĩasi makatxakari iua —itxana.

50Iuaĩkana Xesosi iteene akirikata. Eereka iokanataru ixinire Teosomoni, eereka ipĩpe.

51Iuasaakipeka mãkatxi mata Teoso misãkiretiko aikoti ãki arõkakari tsorakita. Itano itsorakita. Ixitepeka apoka. Mitxi iua mãkatxi mata !auritari kãkiti ĩroini Teosonani Auini Pakitaãtaã. Itsorakitakasaaki, itixi iakeẽkata. Kai mitari xoreka iuasaaki. 52Apanakini akauari xoreka. Itomaneri kãkiti ipĩkani Teoso nakitiakori iuaĩkana õkitikapekaua. 53Osipikarina akauari. Xesosi iuaĩkana õkitikaãkaua atoko, isana Xerosareẽmoni, Teoso nakiti sitatxitimoni. Iuaã itomaneri kãkiti itikana ninoa iuaĩkana õkitikakaniua.

54Sotato auĩte, sotatoakori Xesosi moiaãkani apaka, itikarina Xesosi ipinini. Imarotarina itixi iakeẽkatini, ininiã iteene ipĩkarauatana.

—Atãopitikara Teoso ãkiri itxaua —itxana.

55Itoro sitoãkini ikira atoko atamanãtari Xesosi. Karirẽia tõpa Xesosi potarikasaaki ninoa sitoãkini moianataru iua. 56Maria Matarena inakoro iuaã aamina ĩpiriãmitakari ikira atoko auanãta apaka. Txiako, Xosee pakini inoro, Maria inakoro iuaã aua. Sepeteo anaakori inoro iuaã auanãta apaka.

Xesosi Ikatiko Pirena

(Marko 15.42-47; Arõkasi 23.50-56; Xoão 19.38-42)

57Ĩkanõka katxineiroteri Xosee inakori, Arimateia sitatxitikiri, apoka. Iua apaka Xesosi sãkire auĩãkari itxaua. 58Isa Piratomoni. Xesosi ĩto amanaã. Ininiã Pirato paniãtari isikiko. 59Ininiã Xosee anikari Xesosi ĩto. Mãkatxi mataã iapirika itxari. Mãkatxi mata amaneri arĩnio inakoriã iapirikari. 60Eereka taka itxari akauari ãki. Iua akauari amaneri, Xosee kisakakiti kai auĩte iriko. Ikamari iua akauari ipĩkasaaki ikatiko ĩkapani. Xesosi ĩto iriko ãki itaka atoko ikakanapiritari kai meraminapoari, itota itxari akauari iriko, sipe itxa. 61Iuasaaki Maria Matarena inakoro, ãto Maria inakoro apaka topãkanãta akauari apisatoõ.

Imoiaãrina Xesosi Akauari

62Iua õti sesta veira, tomatiko õti apisa. Iua õti Xoteoakori parĩkauatapitipo, tomatiko õti imaparĩkauatakani ĩkapani. Katimatinĩkata sasetotxi auĩteakori, pariseoakori pakini sari Piratomoni. 63Ninoa txari:

—Ate xinikari iua kamisirienereri sākire. Iua txari: “Nipīkasaaki eereka ipi āti pakini ōtisaaki iuaīkana nōkitikauako.”

⁶⁴Pipaniātana pisetatoneakori ipi āti pakini ōti akauari imoiainina. Imamoiaākaniārina, imoianariakori īkanōka sari iuaā iīto iītirīkinina. Ininiā eereka isāpiretarina kākiti: “Teoso ōkitikapekari iua. Iuaīkana auāki itxapeka,” itxamana ninoa imoianariakori. Ininiā ikara misirieneretxi apiatama eereka. Mitxiri misirieneretxi poiāoka —itxarina Pirato.

⁶⁵—Ininiā hanikari sotatoakori akauari moiaākani tīkane. Hīsa. Hītotariko akauari sona —Pirato txana.

⁶⁶Ininiā isana iuaā. Akauari sona iteene itotinina īkapani. Itakarina Pirato takaōtxikare itore nopini. Sotatoakori iuaā kaikota. Imoiaārina akauari.

Xesosi Iuaīkana Auāki Inini

(*Marko 16.1-8; Arókasi 24.1-12; Xoão 20.1-10*)

28 ¹Tomatiko ōti xipoka atoko, tomīko īkanōkapanika Maria Matarena, oa āto Maria pakini sari akauarimoni.

²Ninoa saāpotakasaaki, katimaritika itixi iakeēkata itapararitika. Iuaaaki Teoso nitiri iaxitikiri katxaka. Ikatapakiritari kai akauari tore, topāka itxa iua kai nopini. ³Itoō atokatxi iotximere atoko itxa. Imāka mapoa saro atoko itxa. ⁴Sotatoakori, akauari moiaākani, kikinanaākata, ipīkarauatinina. Irikana xitipeka. Ipīkani atokopeka itxana.

⁵Eereka ninoa sitoakoro apoka akauari. Teoso nitiri misākiretana: —!Hīpīkarauatape. Nimarotari hīte nitanātiniri Xesosi, aamina ĩpiriāmitakari nopini tokakitakori. ⁶!Auaika uai. Teoso ōkitikapekari iua. Ikara iua sāpiretapekai hīte. Uai hina. Hātamatari iīto mitxi auiniātaā.

Ininiā ninoa atamatari.

⁷—Katima hītxako imoianariakorimoni hīsini īkapani. Hīsāpiretana: “Iuaīkana auapeka itxa Xesosi. Teoso ōkitikapekari iua. Iua sari hīte apisapanika Kariréiamoni. Iuaā haōkitariko iua,” hītxako ninoamoni. Ikara atoko nitxa nisāpirena hītemoni —itxa Teoso nitiri.

⁸Ininiā ninoa takanapari akauari. Ipīkareritikana, ieneniritikana isana. Imitekana Xesosi moianariakorimoni ōkitikiniua isāpiretini tīkane.

⁹Ninoa mitekaāpotakasaaki, ipixinipokoriti Xesosi tokiā ninoamoni: —Hītepinini ina —itxana.

Ininiã ninoa kapotoreêkauan iua apisatoõ, maĩkakitita itxarina.

—Peerekai. Apiananiri pitxaua —itxanãtana.

¹⁰Ininiã Xesosi:

—Kona hĩpĩkarauatape. Nitariakorimoni hĩsa. Hĩsãpiretana Karirėiamoni isinina. Iuaã aõkitanonako nota —Xesosi txana ninoa Mariaakoro.

Ininiã ninoa sipe.

Sotatoakori Xesosi Akauare Moiaãkani

¹¹Sitoãkini sikasaaki, ãtikaka sotatoakori akauari moiaãkani kanapiriã sitatximoni. Isãpiretarina itikakitina sasetotxi auĩteakorimoni. ¹²Ininiã sasetotxi auĩteakori, kiomãtxiakori pakini apotiitaua ikara ene ixinikinina ĩkapani. Eereka isikarina itoro txineiro sotatomoni, atão imasãpiretakanina ĩkapani apanakinimoni.

¹³Ininiã sasetotxi auĩteakori, kiomãtxiakori pakini txana:

—Hĩtxariko apanakinimoni: “Xesosi moianariakori apoka ĩkanõka aimakasaaki. Iĩtirĩkarina Xesosi ĩto,” hĩtxako. ¹⁴Hĩauĩte Pirato imarotakasaakiri himakini, ininiã ate misãkiretariko iua, ininiã kona himisiritaãka himakini xika —itxarina sotatoakorimoni.

¹⁵Ininiã sotatoakori apakaparo txineiro, sãpireta itxarina kãkiti Xesosi moianariakori ĩtirĩkiniri Xesosi ĩto. Ikara aãpirena iaripireta Xoteoakorimoni. Uatxa apaka ikara aãpirena auiãkapanika.

Xesosi Apoka Imoianariakorimoni

(*Marko 16.14-18; Arókasi 24.36-49; Xoão 20.19-23; Átosi 1.6-8*)

¹⁶Õsi pakini Xesosi moianariakori sari oxiratarimoni Xesosi paniãtinimoni Karirėia tõpamoni. ¹⁷Ninoa atamatari Xesosi. Ikapotoreêkauana iua apisatoõ.

—Peerekai. Apiananiri pitxaua —itxanãtana.

Txamari ãtikaka kona iteene auikari iua Xesosi ininiãua.

¹⁸Xesosi apoka ninoa takote, misãkireta itxana ninoa:

—Teoso txĩkitakano itixine auakani auĩte nininiãua. Itxĩkitakano ĩkoraxiti auakani auĩte apaka nininiãua. Ininiã ikinika posotĩiretxi aua notamoni. ¹⁹Ininiã nipaniãtai. Hĩsako ikini uãkati kãkitimoni ikini itixitika. Hõerekana ninoa nisãkire. Hĩpatxisatana nisãkire kĩpitakani niri uãkaã, imi uãkaã, Erekari Matamatakoti uãkaã pakini hĩpatxisatanako. ²⁰Hõerekanako ninoa ikinika nipaniãtakiti ikaminina ĩkapani. Hĩxinikariko ia. Nota ãtipirika auako hĩtekata. Hĩtekata nauiniritika itixi xipokako —itxa Xesosi sãkire.

MARKO

Xoão Kapatxisareri Sāpiretakiti

(Mateo 3.1-12, Arókasi 3.1-20, Xoão 1.19-28)

1 ¹Ia Xesosi Kristo iokanapirena erekari. Teoso ākiri itxaua Xesosi.

²Teoso sākire sāpiretakani iōkatsopataria ia:

Niokanatariko niokanapirena aniākari kākitemoni kimapori oeretini īkapani pite uai apokini apisa.

³Iua auako āparaā makipakaniātaā. Isāpirenauatako:

“Hōeretariko kimapori Apiananiri apokini apisapanika.

Itīkaāpo erekari hīkamako iua napini īkapani,” itxa iua.

Itxa Teoso sākire iōkatsopatakori kitxakapirīka.

⁴Ikara atoko Xoão kapatxisareri āparaā makipakaniātaā aua. Ipatxisatakasaakiri kākiti, isāpiretari ia pirena:

—Hītakanapariko maerekati hīkamakiti. Hīpatxisataākako.

Ininiā Teoso makatxakariko maerekati hīkamakiti —itxa Xoão kapatxisareri.

⁵Ikinimane kākiti Xotéia auakani Xerosareē sitatxiti auakani pakini sari Xoāomoni isākire ikenakotinina īkapani. Ninoa sāpiretakasaakiri maerekati ikamakitina, ipatxisatana uini Xotão inakoriātaā.

⁶Xoão takari imāka kamero piti kamakori. Itakari ipakiomatare pirātxi mata kamakori. Inikari txītxiri. Mapaā itxima. ⁷Iua txari kākitemoni:

—Nota poiāori. Nota tikini apokako apiatakari. !Apakata nikapotoreēkiniua iua takote ikiti mata nimakatkakini īkapani, kotxi nota poiāoka. Iua apiata. ⁸Nota patxisatai āparaānokara. Iua

patxisataiko Erekar Matamatakotiã. Iuasaaki hĩte apakapariko Erekar Matamatakoti.

Xesosi Patxisatiko Pirena

(Mateo 3.13-17, Arókasi 3.21-22)

⁹Iuasaaki Xesosi apoka Nasaree sitatxiti, Kariréia tōpamoni. Iuasaaki Xoão kapatxisareri patxisatari iua uini Xotão inakoriãtaã. ¹⁰Xesosi kanĩkiitakasaaki, iua itikari iaxiti takakini. Iuasaaki Erekar Matamatakoti katxaka kamoã katxakini atoko. Iua nopini apoka. ¹¹Iuasaakipeka Teoso iaxitikiri txari:

—Pite namarite, nitiretakiti, napokaerekatai, kotxi ninirekakiti pikama.

Satanasi Atamakaerekatini Xesosi

(Mateo 4.1-11, Arókasi 4.1-13)

¹²Iuasaaki Erekar Matamatakoti iokanatar Xesosi ãparaã makipakaniãtaã. ¹³Iuaãtaã ikaikota koarẽta õti. Iuasaaki Satanasi atamakaerekatari iua. Iuaãtaã auari kaxipirini kaneenamarini. Ininiã Teoso nitiriakori iaxitikini nĩkatari Xesosi.

Xesosi Mipotorikiniri Iparĩka Kariréia Tōpa

(Mateo 4.12-22, Arókasi 4.14-15)

¹⁴Xoão kateia ãki takikosaaki, Xesosi sari Kariréia tōpamoni. Iuaãtaã isãpiretari Teoso iokanapirena erekar, Teoso auĩtetxi ininiãua pirena. ¹⁵Itxari:

—Teoso keto apopeka. Iua auĩtetxi ininiua apokaãpotapeka. Ininiã hĩtakanapariko himaerekani. Hãuikariko Teoso iokanapirena erekar —itxa Xesosi.

¹⁶Xesosi tĩpokota Kariréia poati tĩniã. Iuasaaki atamatana ipi hetxi takakani, Simão Petro, itari Átree pakini. Iua atamatana itakinirina hetxi. ¹⁷Ininiã Xesosi txana:

—Uatxa masa notakata. !Himaĩkaikariko ximaki. Átiã hĩparĩka auako. Nisãkire hĩsãpiretako kãkitimoni —itxa.

¹⁸Ininiã iuasaaki ninoã takanapari hetxi, sa itxana Xesosikata.

¹⁹Apikomoni ninoã saãpota. Itikana Txiako, itari Xoão pakini. Ninoã Sepeteo anaakori. Kanauã miramaneri ãki auanãtana iuasaaki. Hetxi iotsaãnãtana. ²⁰Iuasaaki iua akiritana ninoã. Ininiã

ninoa takanapari iri, iri nitiriakori pakini kanaua āki. Eereka isana Xesosikata.

Kiki Maerekati Matamatakoti Auaītotakiti

(Arókasi 4.31-37)

²¹Xesosi imoianariakorikata apoka Kapanaoō sitatxiti. Ininiā tomatiko ōtisaaki Xesosi sari aiko Xoteo apotiitiniātaāua oerekarauatini ĩkapani. ²²Iua sākire kenakotakani tsorĩkaāta, kotxi kona kaiōkatsoparerini atokoni !itxa. Iua oerekakiti sākiretxiti pataparari, kotxi !isāpiretari āti koerekareri sākire apanakini kaiōkatsoparerini atoko. Iuaka sākirekara isāpireta.

²³Iuasaaki aiko āki Xoteo apotiitiniātaāua aua kiki maerekati matamatakoti auakiti. Iua akiripoakata:

²⁴—Xesosi Nasaree sitatxitikiri. Kipa pinireka atemoni? Pite ina ate pixipokini ĩkapanikani? Erekarinoka kamakarii. Teoso nakiti pitxaua —itxa.

Ikara atoko iua akiripoakata, kotxi iua maerekati matamatakoti pĩkari Xesosi.

²⁵Ininiā Xesosi itapararitika txari:

—Piotoka. Pitakanapariko ere kiki ĩto.

²⁶Iuasaaki maerekati matamatakoti iōkokaītotari. Ikatxakasaaki, akiripoakata.

²⁷Kākiti iuaātaā auakani tsorĩkaāta. Iuasaaki imisākiretakakauana:

—Kiripa? Atxiīti oerekakori sākiretxiti amaneri apopeka? Iua sākire kaposotiireri. Ipaniātakiti maerekati matamatakoti kamapeka —itxanātana.

²⁸Ininiā ikara pirena iaripireta ikini Kariréia tōpati.

Xesosi Makananitiniro Simão Petro Imakiro

(Mateo 8.14-15; Arókasi 4.38-39)

²⁹Ininiā Xesosi, Txiako, Xoão pakini takanapakasaakiri aiko Xoteo apotiitiniātaāua, isana Simão, Ātree pakini aapokomoni.

³⁰Iuasaaki Simão imakiro apoomata. Osirĩkanāta. Ininiā ninoa sāpiretari Xesosi oamianare. ³¹Ininiā Xesosi sari oamoni. Imaĩkaro ouako. Ōkitikaro. Iuasaakipeka oāpoomare !auaika. Ininiā opotorika oparĩkauatini, ninoa kiena okamini ĩkapani.

Xesosi Makananitinina Amianatakani

(Mateo 8.16-17; Arókasi 4.40-41)

³²Ininiã mapiãnikata kãkiti minana ikinipoko amianatakani, maerekati matamatakoti auaĩtotakini pakini iuamoni. ³³Ininiã ikinimane iua sitatxi auakani apotiitaua aapokotxi tore takote. ³⁴Ininiã Xesosi makananitana itomaneri amianatakani. Kaiãopokori amianari auakini imakananita. Apaka omitikana itomaneri maerekani matamatakoni. Iuasaaki !auiritana ninoa sãkirauatini, kotxi ninoa imarotari Teoso ãkiri ininiua Xesosi.

Xesosi Sãpiretiniri Teoso Sãkire

(Arókasi 4.42-44)

³⁵Íkanõkapanika mapiãpanika Xesosi õkitikaua. Itakanapari aapokotxi. Iuanoka sari kãkiti mauakaniãtaã iri iaxitikiri imisãkiretini íkapani. ³⁶Eereka Simão imoianariakorikata sari Xesosi initinina íkapani. ³⁷Ninoa apokasaakiri, itxana:

—Ikinimane nitai —itxarina.

³⁸Xesosi apakapapiretana:

—Masa ãtiãtaã kãkiti aapokomoni. Iuaã nisãpiretariko Teoso sãkire, kotxi ikara atoko itxa nipařka kãkitimoni. ³⁹Xesosi sari ikini Kariréia tõpa. Aiko Xoteo apotiitiniãtaãua isãpiretari Teoso sãkire. Apaka omitikana maerekani matamatakoni kãkiti ãtoã auakani.

Kiki Maere Matati

(Mateo 8.1-4, Arókasi 5.12-16)

⁴⁰Amianatakari maere matati apoka Xesosimoni. Ikapotoreẽkaua iua apisatoõ. Iua iteene amanaãri:

—Nimarotari, pinirekiniãri piposotari erekape pitxĩkitakinino —itxa.

⁴¹Ininiã iuasaaki Xesosi iteene tiretari iua. Itakari iuako iua nopini. Itxari:

—Ari, ninirekapitikari. Erekapekai uatxa.

⁴²Iuasaakipeka amianari !auaika. Erekapekari iua.

⁴³Xesosi iokanatarari iua. Iuasaaki isãpiretari iua:

⁴⁴—Kona pisãpiretapiri apanakini pitemoni nikamakiti. Uatxa merepanika pisa sasetotxiakorimoni. Poerekari piĩto ninoamoni. Eereka pikamariko Moisesini paniãtakiti. Ikara atoko oerekari kãkiti atõ erekapeka pinini —itxari.

45 Iuaritika isãpiretapikari Xesosi kamakiti. Ininiã iaripireta ikara pïrena. Ikara xika Xesosi !liposotaika isini aapokotximoni. Ikaikota kãkiti mauakaniãtaã. Iuaritika kãkiti sari iuamoni.

Matïpokotakati Pirena

(Mateo 9.1-8; Arókasi 5.17-26)

2 ¹Eereka mapaõtipeka inaka atoko iuaïkana Xesosi Kapanaoõ sitatxiti apoka itxa. Iaripireta Xesosi inirimane aapoko apokini. ²Iuasaakipeka mirikiniti kãkiti apoka iuamoni, ininiã iua aapokotxi xãpoka. Apotiitauana ïronakikoãtaã apaka. Ininiã !apakata apanakini kãkiti ïroini aapokotxi ãki. Iuasaaki Xesosi sãpiretari Teoso sãkire kãkitimoni. ³Iuasaaki ipi ipi pakini kikiakori minari matïpokotakati. ⁴Kãkiti itomaneri ïronakikoãtaã aua, ininiã kona iposotarina Xesosi takote apokinina. Ininiã aapokotxi nopini, Xesosi manapi ninoa sonatari iua matïpokotakati iokatxakinina tïkane Xesosimonikari. Iposo atoko isikakaãpotarina iua manapi. ⁵Xesosi imarotari ninoa atão auikiniri iua sãkire. Ininiã Xesosi txari matïpokotakatimoni:

—Namarite, pimaerekani makatxakapeẽkaika —itxa.

⁶Iuasaaki ãtikaka kaiõkatsopareriakori topãkanãta iuaã. Ixirikaãnãtana. Ixiniiremoninani:

⁷—Kinirepa ia kiki ikara atoko itxa? Maerekati isãpiretakiti, kotxi Teosonanira posotari imakatxakiniri kãkiti maerekani —itxa ninoa sãkire.

⁸Iuasaakipeka Xesosi imarotari ninoa xinikakiti ãkixiniireãna. Ininiã Xesosi txana ninoa:

—Kininiãpa ikara atoko hïtxa xinireta? ⁹Nitxari iua imaerekani nimakatxakini, txamari !himarotari imaerekani atão nimakatxakini. “Põkitikaua. Pisirimata pikoseka, sipe pitxa,” nininiã, iuasaaki himarotari nisãkire atão ininiãua, kotxi hïtikari. Niposotiire imaerekani nimakatxakini ïkapani, niposotiire iua nõkitikini ïkapanitxikana. ¹⁰Ininiã uatxaika noerekai hïte, Teoso iokanatano nota hïtari iaxitikiri ïkorapokoritimoni kãkiti maerekani nimakatxakini ïkapani —itxana kaiõkatsopareriakori.

¹¹Ininiã matïpokotakatimoni itxa:

—Põkitikaua. Pisirimata pikoseka, sipe pitxa paapokomoni —itxa.

¹²Iuasaakipeka iua õkitikaua. Ikosekari isirimata. ïkorape itxa ikinimane okiãtaã. Imakinika kãkiti tikoka.

—Peerekari Teoso kamakiti. Kona mitxi ate itikari ĩkora atoko inakari —itxanātana kākiti.

Mateo Pirena

(Mateo 9.9-13; Arókasi 5.27-32)

¹³Ininiã iuaĩkana isari ipoamoni. Kaiãopokori kākiti apotiitaua iuakata. Iuasaaki oerekana ninoa. ¹⁴Isaãpotakasaaki, atamatori Arevii inakori. Āti iuãka Mateo inaãka. Aopeo inakori ākiri itxaua iua. Iitopãkanãta auĩtetxiakori txineirote apakapiniãtaã. Ininiã Xesosi txari:

—Masa notakata.

Iuasaakipeka õkitikaua, Xesosikata sa itxa.

¹⁵Eereka Xesosi nipokota Arevii aapoko. Itori auĩtetxiakori txineirote apakapakani, itori apanakini maerekani, topãkanãta Xesosi takote, imoianariakori takote pakini. Kaiãopokori kākiti aua iuasaaki, kotxi kaiãopokori kākiti Xesosikata sikani. ¹⁶Pariseoakori, kaiõkatsopareriakori pakini itikari Xesosi auĩtetxiakori txineirote apakapakanikata, apanakini maerekanikata pakini inipokotini. Ininiã kaiõkatsopareriakori, pariseoakori pakini pimaãna Xesosi moianariakori:

—Kinirepa hinipokota auĩtetxiakori txineirote apakapakanikata, maerekanikata? —itxana.

¹⁷Xesosi ikara ikenakotakasaaki, itxana:

—Kākiti mamianatakani kona nirekari kākiti pinĩtxi imarotakari. Amianatakaninokara nirekari pinĩtxi imarotakari. Nota uai apoka maerekani nakiritini ĩkapani, imaerekanina itakanapinina ĩkapani. Kona nakiritari kākiti “atão inakari kamakani” uãkatakaniua — itxa Xesosi.

Nipokori Takanapiko Teoso Misãkiretiko ĩkapani

(Mateo 9.14-17; Arókasi 5.33-39)

¹⁸Āti õti Xoão moianariakori, pariseoakori pakini takanapari inikinina Teoso imisãkiretinina ĩkapani. Iuasaaki kākiti pimaãri Xesosi:

—Kinirepa Xoão moianariakori, pariseoakori pakini takanapari inikinina Teoso imisãkiretinina ĩkapani, txamari pite moianariakori kona ikara atoko !itxana.

¹⁹Ininiã Xesosi:

—Kiiniri kākiti ãtanorouatakasaaki, ãtanorouatakari aua iuaã, ininiã kona kākiti takanapari inikini iusaaki. Kona iua ãtanorouatakari nirekari kākiti natxiti. Ininiã iua auakasaaki ninoakata, ikinimane nipokota.

²⁰Ininiã nota ãtanorouatakari atoko nitxa. Nota auakasaaki nimoianariakorikata, kona itakanaparina inikinina Teoso imisäkiretinina ãkapani. ãTi õti nota !auaika nimoianariakorikata. Iusaakiikarako itakanaparina inipokotinina Teoso imisäkiretinina ãkapani.

Amaneri Mākatxi Pirena

²¹Kona kākiti tãpanetari mākaxi kitxakari mākaxi mata amaneriã. Mākaxi mata amaneri itxikika, ininiã kitxakari tsorakita.

Amaneri Sako Aamata Kamakori

²²Kona kākiti takari iãriã amaneri sako kitxakari aamata kamakori ãki. Itakiniãri, koanaxi kitxakari aamata kamakori tsorakita, ininiã iãriã xikepoata, ininiã koanaxi !kikeikari. Sako amaneri ãki itakaãka iãriã amaneri. Iua atokokana kona hãkoketari kitxakari sãkiretxiti amaneri sãkiretxitikata.

Tomatiko Õti Pirena

(Mateo 12.1-8; Arókasi 6.1-5)

²³Tomatiko õti Xesosi imoianariakorikata napaãpota kikio triko takikoãtaã. Ininiã ninoa makatxakaro triko iki mapaki inikinirona ãkapani. ²⁴Pariseoakori atamatana, ininiã itxarina:

—Kinirepa ninoa parĩkauata tomatiko õtisaaki? —itxana.

²⁵Ininiã Xesosi apakapapiretana:

—Kona hãtatsopatapanikari Taviini kamakiti? Iua, imoianariakorikata natxitakasaaki, kona himarotatari ikamakiti? ²⁶Iua ãroã Teoso misäkiretikoãtaã. Apiataa inakori sasetotxi auĩte apiatakari iusaaki. Iuaã Tavii nikari komiri Teosomoni sikakori. Sasetotxinokara auiritaãka iua komiri inikinina. Apanakini !auiritaãka inikiniri. Txamari Tavii sikari imoianariakori inikinina ãkapani.

²⁷—Tomatiko õti kamaãka, kākiti ãto ereka inini ãkapani. Kona kākiti kamaãka tomatiko õti auini ãkapani. ²⁸Nota hĩtari iaxitikiri posotari ikinipoko ninireẽkiti nikamini tomatiko õtisaaki, kotxi Apiananiri nitxaua —itxa Xesosi.

Motĩkauakotakari Pirena
(*Mateo 12.9-14; Arókasi 6.6-11*)

3 ¹Iuaĩkana Xesosi imoianariakorikata ĩroã aiko Xoteoakori apotiitiniãtaãua. Iuaã apokari kiki motĩkauakotakari. ²Ininiã iuaã auakani txari

—Atxiĩti iua erekapeka txĩkitakari motĩkauakotakari uatxa tomatiko õtisaaki?

Ninoa xinikari ikara atoko inini, kotxi ninoa kinirão apoĩtaka txari Xesosi. ³Ininiã Xesosi akiritari iua motĩkauakotakari:

—Uaimoni pina —itxari.

⁴Iposo atoko ipimaãna iuaã auakani:

—Kipa atão Teoso paniãtaua akamini tomatiko õtisaaki?

Maerekati akaminikani? Erekari akaminikani? Ipaniãtataua ãti amakananitini? Ipaniãtataua ãti aõkini?

Txamari ninoa !kasãkirena. ⁵Xesosi atamatana. Iuasaaki inaiataua, iuaritika imatinaniuata, kotxi ninoa !nirekari atão imarotinina. Ininiã Xesosi txari iua motĩkauakotakari:

—Pisirĩkauakota —itxari.

Ininiã itamẽkauakota. Erekape itxa iuako. ⁶Ininiã pariseoakori potorika iuaã. Isana Erotxi sãkire auiãkanimoni. Iuaãtaã ninoa xinikari Xesosi okaenetinina.

Itori Amianatakani Sari Xesosimoni

⁷Ininiã Xesosi sari Kariréia poamoni. Iuasaaki itori kãkiti Kariréia tixinikini, Xotéia tixinikini pakini sari iuamoni.

⁸Xerosareẽ sitatxitikini, Itoméiakini, Xotão ipiniãkini, Txirokini, Sitoõkini pakini sari iuamoni. Ninoa kenakoenetari ikamakiti, ininiã iuamoni isana. ⁹Ininiã ipaniãtana imoianariakori:

—Kanaua himina, kotxi kaiãopokori kãkiti katikaãpotano. Ininiã kanaua ãki niereẽtaua —itxa Xesosi.

¹⁰Iuasaaki kaiãopokori kãkiti erekapeka itxĩkitakapeka. Apanakini amianatakani nirekakari imaãtakinirina Xesosi, erekapeka ininina ĩkapani. Ininiã ikatikaãpotarina Xesosi, kotxi kaiãori kãkiti. ¹¹Maerekati matamatakoti auakini atamatakasaakiri Xesosi, irikana Xesosi apisatoõ. Akiripoatana:

—Teoso ãkiripitikai pite.

¹²Ininiã Xesosi kona auiritana ninoa: “Teoso ãkiripitikai,” ininina.

Xesosi Mereëna Tosi Imoianariakori

(Mateo 10.1-4; Arókasi 6.12-16)

¹³Iposo atoko Xesosi sari õtanoxiratarimoni, akirita itxana inirekaãkini. Ininiã ninoa sari iuamoni. ¹⁴Ininiã iua mereëna tosi kikiakori iuakata kaikotakani tĩkane, Teoso sãkire sãpiretakani ĩkapani. ¹⁵Iua sikari iposotiire ninoamoni, amianatakani erekapeka itxĩkitakinina ĩkapani, apaka maerekati matamatakoti omitikinina ĩkapani. ¹⁶Ininiã akiritari Simão. Xesosi takauãkatari Simão ãti iuãka. Petro itxaua. ¹⁷Akiritana Txiako, itari Xoão pakini. Sepeteo anaakori itxauana. Xesosi takauãkatana ninoa Poanexi. Poanexi Popĩkari sãkireẽ “Ikarokirauari anaakori.” ¹⁸Akiritana ãtree, Piripi, Patoromeo, Mateo, Tomee, Txiako pakini. Aopeco ãkiri itxaua iua Txiako. Akiritana Tateo, Simão pakini. Homano omanatakari iua Simão. ¹⁹Akiritari Xotasi Isikariotxi inakori apaka. Xesosi mĩkapiritakari itxaua iua Xotasi Isikariotxi. Pakini Xesosi akiritakini imoianariakori ininiuana ĩkapani.

Maerekani Matamatakoni Omitikiko

(Mateo 12.22-32; Arókasi 11.14-23; 12.10)

²⁰Iuaĩkana ãti aapokotxitimoni isa Xesosi, imoianariakorikata. Iuasaaki mirikiniti kãkiti iuaĩkana apotiitaua. Ikara atoko ininiã kona ninoa nipokota. !Apakata inipokotinina, kotxi mirikiniti kãkiti aua iuaã. ²¹Xesosi nirimane kenakotari kãkiti apotiitiniua iuakata. Ininiã isana iua apinina ĩkapani.

—Imapitxiritapeka —itxana.

²²Kaiõkatsopareriakori Xerosareẽ ĩkani apoĩtari Xesosi maerekati ikamini. Ninoa sãkire:

—Peosepoo inakori auaitotari iua. Ininiã Peosepoora omitikari maerekati matamatakoti —itxana.

Peosepoo Satanasi itxaua. Apanakini sãkire:

—Maerekani matamatakoni auĩte sikaposotiiretari Xesosi maerekati matamatakoti omitikini.

²³Ininiã Xesosi akiritari kãkiti isãkire ikenakotinina ĩkapani. Sãpirenatxi atão inakari oerekiko isãpiretana ninoa. Ipimaãna:

—Natokopa itxa Satanasika omitikiniua? ²⁴Auĩtetxi tixine auakani naiatakakiniãua, ixipokaãkanako. ²⁵Kãkiti aapoko ãki auakani ninoakakarika neenamauatiniã, ixipokaãkanako

apaka. ²⁶Iua atokokana, Satanasi nitiriakori, ninoakakarika naiatakakiniāua, Satanasi tapara xipokako.

²⁷—Kona kākiti iroā kiki mitapoari aapoko āki iitiriuatini iġapani. Kinirāo iitiriuatata, ininiā iaxirikari mitari mitxi. Iposo atoko inirekaākiti iitiriġka.

²⁸—Ari, atāopitikara nota txai hġte. Apakata Teoso makatxakiniri ikinipoko maerekati kākiti kamakiti, imaerekani Teoso imisākirepiretini pakini. ²⁹Txamari ātipekana maerekati kamakari aua. Erekari Matamatakoti misākirepiretakari maerekani makatxakiko kona auari. Ikara atoko inakani inikoriāriko imisiritiko maerekani misiritikoātaā —itxa Xesosi.

³⁰Xesosi ikara atoko itxa, kotxi pariseoakori txari: “Iua auari maerekati matamatakoti.”

Xesosi Inoro, Itariakori Pakini
(*Mateo 12.46-50; Arókasi 8.19-21*)

³¹Iuasaaki itariakori inorokata apoka porikiti. Ipaniātarina āti akiritiniri Xesosi. ³²Iuasaaki itori kākiti topākakani ākitari Xesosi. Isāpiretarina:

—Pitariakori, pinoro apaka porikiti aua. Initanātai —itxarina.

³³Ininiā Xesosi apakapapireta:

—Kiripa nitariakori, ninoro pakini?

³⁴Iua atamatana itakote topākakani:

—Hātamata, uai aua ninoro, nitariakori pakini. ³⁵Teoso nireġkiti kamakani nitariakori, nitaroakoro, ninoro pakini itxauana —itxa Xesosi.

Katakareri Pirena
(*Mateo 13.1-9; Arókasi 8.4-8*)

4 ¹Iuaġkana Xesosi oerekarauata ipoa takote. Kākiti mirikiniti, ininiā imorōkokaua kanaua āki. Iitopāka. Ninoa aua imiriġ, ininiā iua kanauaā oerekarauata. ²Itori Teoso sākire oerekana ninoa sāpirenatxi atāo inakari oerekikoā. Itxana:

³—Hġkenakota. Katakareri takarauata. ⁴Itakarauatakasaaki itakareki irika kimapori tiniāpo. Ininiā kotipiriki nikari itakareki.

⁵—Apanakini itakareki irika kai auiniātaā, kipatxi mauakaniātaā. Atāoka ipitxaka. ⁶Kipatxi poiāoka auiniā atokatxi pataka apokasaaki itxarika. Omakotsani xika osonāka. ⁷Apanakini irika inako sauaki. Inako aneġkasaaki, okari takari. !Iriuata. Ipinā.

8—Apanakini irika kipatxi auiniãtaã. Ininiã iriuata. ãti poiãoka iriuata, trítakata. ãti apiata iriuata, sesëtakata. ãti kaiãopoko iriuata, seĩkata.

9—Kakenakokii, ininiã hĩkenakotariko nisãkire —itxa Xesosi.

Kãkiti Mimarotakiniti Xesosi Sãpiretini Pirena

(Mateo 13.10-23; Arókasi 8.9-15)

10Iuanani imoianariakorikata auakasaaki, ipimaãrina Xesosi: —Poerekaua mixikanani sãpirenatxi atão inakari oerekiko pisãpiretakiti? —itxarina.

11Ininiã isãpiretana:

—Teoso sãkire mauĩãkani !imarotari Teoso auĩtetxi ininiua. Teoso oerekai hĩte ninoa mimarotakiniti. Teoso oerekana ninoa isãkire sãpirenatxi atão inakari oerekikoã. 12Atxiĩti ninoa iteene atamatarari Teoso oerekakiti, iuaritika !imarotarina atamatakitina. Atxiĩti iteene ikenakotarina Teoso sãkire, iuaritika !imarotarina ikenakotakitina. Imarotaãkamariko, akiritaãkamariko Teoso, ininiã Teoso makatxakamariko ninoa maerekani.

13Ininiã Xesosi txari:

—Himarotatarari ikara sãpirenatxi atão inakari oerekiko?

—!Aimarotari —itxana.

—Ininiã natokopa ininiãparako himarotatarari apanakini sãpirenatxi atão inakari oerekiko?

14Ininiã imimarotakininitina oerekana:

—Iua takarauatakarari takari Teoso sãkire. 15Aua kãkiti kimapori tiniãpo takarekitxi irikiniãtaã atoko inakani. Ininiã Teoso sãkire ikenakotakasaaki Satanasi apoka. Ininiã imakatxakari Teoso sãkire ãkixinireãna apokakari.

16—Aua kãkiti kai auiniãtaã atoko inakani. Ninoa kenakotakasaakiri Teoso sãkire, iusaakipeka apakaparina ipoxokoniritikana. 17Itxamana, kona kakotsari. Imaxikiko apokiniã, imisiritiko Teoso sãkire auikinina xika apokiniã, iusaaki itakanaparina Teoso sãkire.

18—Aua kãkiti aanaia auiniãtaã atoko inakani. Ninoa kenakotapitikari Teoso sãkire. 19Txamari maerekaxiniretinoka itxana. Txineironoka inirekana, ininiã ikara misirienetana ninoa. Kaiãopokori inireëkitina, Teoso manirekakiniti. Maerekaxiniretinoka ininina, txineiro, inireëkitina pakini inako atoko itxa, ininiã !ixinikaikarina Teoso sãkire, ininiã kona iriuata.

²⁰Aua kākiti kipatxi erekari auiniātaã atoko inakani. Ninoa auikari Teoso sākire. Iriuatana. Āti iriuata poiãoka, trítakata. Āti iriuata apiata, sesêtakata. Āti iriuata ito, seĩkata.

Tirikapi Pirena

(Arókasi 8.16-18)

²¹Xesosi pimaãna ninoa:

—Nanipa hítakari tirikapi? Kopiti ákikani hítakatari? Amesa patapikani hítakatari? Konapitini. Hítakari itano imakinika iopinikini ĩkapani. ²²Iomaãtakori áti ôti oerekaãkako. Kipatakori oerekaãkako, kotxi nota imarotapitikari hĩkamakiti. ²³Kakenakokii, ininiã hĩkenakotariko nisákire —itxa Xesosi.

²⁴Xesosi sákirauatapanika:

—Hítakaõtxikariko nisákire. Imakinika hĩkenakotako. Erepaniko pikamakiti átimoni, kotxi pite kamakititxikana kamaãka pitemoni. Erepaniko, kotxi apiata ikamaãka pitemoni. ²⁵Teoso sákire auakiti, iua sákire kĩpitakari, Teoso sikari apikomoni imaroretxi iuamoni. Txamari Teoso sákire kenakotakari, isákire makĩpitakati, imarore xapiti iuamoni auakari makatxakaãkako.

Takariki Pirena

²⁶Apikomoni Xesosi txari:

—Teoso auĩtetxi ininiãua kiki takariki taãkari atoko itxa. ²⁷Itakarauata. Imaka ĩkanõka. Āti iparĩka ikama pokamara. Iusaaki itakare pitxakapeka. Kona iua imarotari otomorekini. ²⁸Merepanika otomoreka. Iposo atoko opitxaka. Eereka opa aua. ²⁹Oaneẽpeka onakasaaki katakareri makoapataro, kotxi oamiko manapipeka itxa. Ikara atoko itxa Teoso auĩtetxi ininiãua.

Mostata Pirena

(Mateo 13.31-32; Arókasi 13.18-19)

³⁰Xesosi sákirauatapanika. Itxari:

—Natokopa itxa Teoso auĩtetxi ininiãua? Īkiripa sãpirenatxi atão inakari oerekiko oerekaua? Ia atoko itxa: ³¹Teoso auĩtetxi ininiãua mostata oki atoko itxa. Axapitikiro oa. Apanakini iki apiata. ³²Otakaãka atoko opitxaka. Eereka oaneẽ. Apanakini takari ĩtano apiata oa. Amaripokoro okati. Kotipiriki takari okoa okatiã. Iua atokotxikana Teoso auĩtetxi ininiãtaãua.

Merepanika poião kākiti. Eereka apiata. Eereka kaiāopokori kākiti auītetari Teoso. Txamari iuasaaki Satanasi apoka ninoamoni kotipiriki apokini atokokana.

³³Kaiāopokori sāpirenatxi atão inakari oerekiko isāpiretana, Teoso sākire imarotinina ĩkapani. Ninoa imarotakasaakiri isākire, apiata isāpiretana. Imimarotakanisaakiri isākire, poiāonoka isāpiretana. ³⁴Teoso sākire oerekasaakina ninoa, sāpirenatxi atão inakari oerekikonoka isāpireta. Eereka imoianariakorinoka auakasaaki iuakata, oerekana ikara imarotinina ĩkapani.

Xesosi Iotokakiniri Ītima

(Mateo 8.23-27; Arókasi 8.22-25)

³⁵Iua ōtipanika mapiānikata itxana imoianariakori:

—Maĩpiriāta ipoa. Ipiniāmoni masa —itxana.

³⁶Ininiā itakanapana itomaneri kākiti. Iuasaaki imoianariakori anikari Xesosi kanauaã. Apanakini kanaua axapitiri apaka sari ninoakata. ³⁷Īpiriātakasaakina ĩtima kataparari apoka ninoamoni. Tsakati kataparari, ininiā āparaã ierepeēpokataua kanaua āki. Kanaua sakikaariāpotape.

³⁸Iuasaaki Xesosi ikapokiāmoni imakanāta. Isirimata nopini imakanāta. Ninoa ōpirĩkari iua:

—Kona pimaākataua ate. Kona pitiretataua? Apinanapanoka —itxana.

³⁹Ininiā imereka. Ipinitari ĩtima:

—Piotoka. Auapika pitxako —itxari ipoa.

Ininiā itsorĩkaxitita. Ītima iotoka. Tsakati iotoka apaka. ⁴⁰Ininiā Xesosi:

—Natokopa ininiāpa kapĩkarei hĩte? Kinirepa hĩte kona auikano nota? —itxana ninoa.

⁴¹Apiapĩkareta ninoa. Ininiā ninoa:

—Kinakaripa ia kiki, kotxi ĩtima, tsakati pakini auikari iua sākire —itxana.

Kiki Maerekani Matamatakoni Auaitotakiti

(Mateo 8.28-34; Arókasi 8.26-39)

5 ¹Xesosi imoianariakorikata apoka ātiātaã Xerasa tōpa, Kariréia poa ipiniā. ²Xesosi kanĩkiitakasaaki, kiki ina iuamoni. Iua akauariātaã auakari. ³Iuaātaã iua auanāta. Kākiti ĩliposotari iĩtxikiniri iua. Iĩtxikare metao kamakori karakitapekata.

⁴Kaiōokatani kākiti itxikari iuako, ikiti pakini metaoã, txamari ikakarakitsatari metao. !Apakata kākiti nīkatiniri iua. ⁵Īkanōka, pokamara pakini ixirataãtaã akiripoanãta akauari auiniãtaã. Kai soroã iuaka ikisauakitataua. ⁶Ōtakopanika atapari Xesosi inini. Ininiã imiteẽkata iuamoni. Ikapotoreẽkaua iua apisatoõ.

—Apiananiri pitxaua —itxa.

⁷Akiripoakata:

—Xesosi, Teoso ãkiri pitxaua. Apiananiri ãkiri pitxaua. Kipa pinireka nota ĩkapani? Teoso uãkaã namanaãi pite, kona pimisiritapeno —itxa maerekati matamatakoti. ⁸Ikara atoko itxa kotxi Xesosi paniãtari:

—Maerekati matamatakoti pisipeka. Pitakanapari ere kiki —itxari.

⁹Xesosi pimaãri:

—Kipa piuãka? —itxari.

Iua apakapapiretari:

—“Itori” ninaãka niuãka. Kotxi itori maerekani matamatakoni ate.

¹⁰Iteene iua amanaããpotari Xesosi:

—Kona piokanatapeua ãtiãtaã.

¹¹Iuasaaki auari kaiãopokori irari ixiratamoni nipokonãtakani.

¹²Maerekati matamatakoni iteene amanaãri Xesosi:

—Piokanataua ate irarimoni. Pauiritaua ate sini ninoamoni —itxanãtana.

¹³Ininiã Xesosi iokanatana. Iuasaakipeka maerekani matamatakoni takanapari iua kiki, ĩroã itxana irari ĩtomoni. Iuaãtaã auari ipi mio irari. Ninoa ĩroãkasaaki, irari miteẽkata oiokiriĩtini ipoamoni. Komoka, axãpoãta itxana iuasaaki.

¹⁴Irari nĩkatakani miteka sitatximoni, aapokotxi poião auinimoni pakini. Isãpiretana kākiti itikakitina. ¹⁵Eereka isana Xesosimoni. Iuasaaki atamatarina kiki mitxi maerekati auaitotakiti. Iitopãkanãta. Mãkatxi auapekari. Atão ĩkitapeka auari. Iuaritika ninoa pĩkarauata. ¹⁶Itikakani sãpiretari apanakini iua kiki pirena, irari pirena pakini.

¹⁷Kākiti iuaãtaã auakani paniãtari Xesosi osipikiniri iuaãtaã.

¹⁸Xesosi iereẽtakasaakiua kanaua ãki, iua kiki amanaãri iuakata isini ĩkapani. ¹⁹Xesosi !auritari. Itxari:

—Pisa pinirimanemoni. Pisãpiretana Apiananiri kamakiti pite ĩkapani. Pisãpiretana iua iteene iamoniĩkai pite. ²⁰Ininiã iua sipe. Iuaãtaã auari sitatxi tesi pakini. Iua kiki sari ninoa tesi sitatxitimoni. Isãpiretari kākiti Xesosi kamakiti iua ĩkapani. Iuaãtaã auakani tsoriãkaãta:

—Anekani, peerekari Teoso —itxana.

Xáiro Amanaãkiti Pirena

(Mateo 9.18-19, Arókasi 8.40-42)

²¹Ininiã eereka Xesosi ñpiriãta ipoa. Ininiã ipoa itiniã kaiãopokori kãkiti apotiitaua iuakata. ²²Aiko Xoteo apotiitiniãtaãua sikani auite apoka iuamoni. Akiritaãka Xáiro iua. Iua kapotoreẽkaua Xesosi apisatoõ. ²³Iua iteene amanaãri Xesosi: —Namarite opinanapanoka. Masa notakata. Pitakari piuako oa nopini erekape onini ñkapani.

²⁴Ininiã Xesosi sari iuakata. Kãkiti kinapokope itxakata isinina.

Xesosi Mãka Maãtakakaro

(Mateo 9.20-22, Arókasi 8.43-48)

²⁵Iusaaki sito amianatakaro apoka. Tosikanani oa arẽka liotoka. ²⁶Okinika otxineiroteẽ oïkitxitapekari oamianare imarotakani. Kaiãopokori ipitamaro. Txamari ninoa !iposotari imaktxakinirina oamianare. Kona erekaro. Apiata oamianare. ²⁷Okenakoenetakasaakiri Xesosi napini, osari iuamoni. Omaãtakari imãka, ²⁸kotxi oamoni: “Nimaãtakiniãri imãka, iusaakiika erekapekano,” otxanãta oxinikakiti. ²⁹Ininiã omaãtakasaakiri, oarẽka iotoka. Iusaakipeka oimarotari erekape onini.

³⁰Iusaakiika Xesosi posotiire sari oamoni. Ininiã ikirioka kãkiti sauaki. Eereka ipimaãna:

—Kipa maãtakatari nimãka? —itxa.

³¹Iusaaki imoianariakori apakapapiretari:

—Apiananiri, patamata. Itomaneri kãkiti kinapokopeka, iuaritika pite pimaãri kãkiti: “Kipa maãtakatano?” pitxa —itxana.

³²Iuaritika Xesosi nitari imãka maãtakakari. ³³Iusaaki oa sito imarotari erekape onini, ininiã okapotoreẽkaua iuamoni. Opïkarauata. Okikinanaka. Eereka osãpiretari ikinika oamianare iuamoni. ³⁴Ininiã Xesosi txaro:

—Namarite, pite erekapekai uatxa, kotxi pauikari niposotiire. Pispiniikaua, erekaxinirepekai —itxa Xesosi.

Xáiro Ñkero Õkitikiko

(Mateo 9.23-26, Arókasi 8.49-56)

³⁵Xesosi sãkirauatakasaaki oakata, apanakini Xáiro nitiriakori apoka. Itxari:

—Pamarite !auaika. Opĩpeka. Pauiritari Xesosi kanapiriini.

³⁶Ininiã Xesosi !imaãkatari ikara pirena. Itxari Xáiro:

—Kona pipĩkarauatape. Pauikano —itxari.

Ininiã ninoa sari Xáiro aapokomoni. ³⁷Xesosi auiritana Petro, Txiako, Txiako itari Xoão pakini sini iuakata. !Auiritana apanakini sini iuakata. ³⁸Ninoa apokasaaki Xáiro aapoko, kãkiti iuaãtaã auakani !imarotarina ikamakitina. Ikinipoko kãkiti txiapanãta, akiripoakanãtana. ³⁹Xesosi iroã. Itxana:

—Kinirepa iteene hĩtxiapanãta? Kinirepa hãkiripoanãta? Amarini !ipina. Oimakanãta —itxa.

⁴⁰Ininiã inapetarina iua. Ininiã iokanatana ninoa mapara. Oĩri, onoro, Xesosi moianariakori pakini iroã amarini auiniãtaã.

⁴¹Imaĩkarouako. Iuasaaki isãpiretaro oa isãkire:

—Taritaa komii.

Popĩkari sãkireẽ: “Amarini põkitikaua.” ⁴²Iuasaakipeka oõkitikaua. Otĩpokota. Oa amarini aua tosi anokanani. Iuasaaki ninoa iteene tsorĩkaãta. ⁴³Ininiã Xesosi paniãtana:

—!Hĩsãpiretapiri apanakini nimakananitiniro oa.

Apaka ipaniãtana isikakienatiniro oa.

Nasaree Auakani Kona Auikari Xesosi Sãkire

(Mateo 13.53-58, Arókasi 4.16-30)

6 ¹Xesosi imoianariakorikata potorika iuaã. Nasaree sitatxitimoni isana. Iuaãtaã mitxi Xesosi aneẽ. ²Tomatiko õtisaaki iua oerekari kãkiti aiko Xoteo apotiitiniãtaãua. Xesosi sãkire kenakotakani tsorĩkaãta. Itxana:

—Nanipa apaiaõkarauata, ikara atoko imarotini? Kipa oerekari imarore? Ikamakiti oerekari apiata imarore aua. Kininiãpa ĩkora atoko itxa posotiireta? ³Ate imarotari iua, kotxi aapokotxi kamakari itxaua iua. Maria ãkiri iua. Iua itariakori Txiako, Xosee, Xota, Simão pakini itariakori itxauana. Itaroakoro apaka aua uai, ininiã ate imarotari iua —itxana.

Ikara xika kona ninoa auikari isãkire.

⁴Ininiã Xesosi txana ninoa:

—Teoso sãkire sãpiretakari paxitaãka, txamari Teoso sãkire sãpiretakari itixineẽ auakasaaki, iuaã auakani, inirimane, iua aapoko ãki auakani pakini !ipaxitari. !Auikarina iua sãkire —itxa.

⁵Ininiã iuaã kona ikamari iposotiire apiari. Iuako itaka ãtikaka amianatakani nopini, ininiã amianatakani erekapeka itxĩkitaka. ⁶Itsorĩkaãta, kotxi iuaã auakani !auikari isãkire. Ininiã iua tãpa isari aapokotximoni. Oerekarauata iuaã. Eereka isari apanakini aapokotxitimoni. Iuaĩkana oerekarauata. Itxaãpota iuaãtaã.

Xesosi Iokanataka Imoianariakori Kãkitimoni.

(Mateo 10.5-15; Arókasi 9.1-6)

⁷Xesosi akiritana imoianariakori tosi pakini. Ipi iokanata ãtiãtaã, iuaĩkana ãtiãtaã iokanataka ipi. Ikara atoko iokanaãpotana imoianariakori. Iposotiire isikana ninoa maerekani matamatakoni omitikinina ĩkapani.

⁸Itxana:

—Kona minakati hanikape. Hĩtsonerenoka hanika. Kona hĩtij, kona auatxi, kona txineiro !hanikape. ⁹Hĩkiti mata hĩeretaka. ãtika kasipiri himãka hanika. ¹⁰Sitatxi hãpokasaaki, ãtika aapokotxinanirako hãua. Iua sitatxi hãuakasaaki, hĩkaikota iua kãkiti aapoko. Kona hãuape ãti kãkiti aapoko. ¹¹Kãkiti mapakapanisaakii, hĩsãkire imakenakotakanisaakina, ininiã hĩtakanapana. Hĩpotorikasaaki, hĩkaxipokari kipatxi hĩkiti mataã auakari, ininiã ikara atoko hõerekana ninoa maerekani ininiuana. Kãkiti misiritiko sãpiretiko õti apokasaaki, Sotoma sitatxiti auakani misiritiko auapitika. Iuasaaki Komoha sitatxiti auakani misiritiko auapitika. Iuaritika sitatxi auakani hĩte mapakapakani misiritaãkako apiata iuasaaki.

¹²Ininiã isana. Isãpiretari kãkiti imaerekani itakanapini.

¹³Mirikiniti maerekati matamatakoti iokanataka. Iĩtxiã itakana amianatakani nopini. Ininiã erekapeka itxĩkitakana amianatakani.

Xoão Kapatxisareri Ipinini

(Mateo 14.1-12; Arókasi 9.7-9)

¹⁴Auĩtetxi Erotxi inakori kenakopiretari Xesosi pirena. Xesosi uãka iaripireta ikini tãpati. Ininiã Erotxi xinikanãta:

—Ikara Xesosi, Xoão kapatxisareri itxaua. Uatxa iua õkitikapekava. Iuakara Xesosi itxa. Ininiãkara iposotiire auu iuamoni.

¹⁵ãtikaka uãkatari Xesosi Erĩasi ininiuua. ãtikaka uãkatari Xesosi Teoso sãkire sãpiretakari kitxakapirĩka ininiuua.

¹⁶Ikara Erotxi kenakopiretakasaaki, itxari: —Xoãokara nitsotakakiitakitikara iua Xesosi txa. Ip̄pekarriika iuaĩkana òkitikapekaua —itxa.

¹⁷Mitxi Erotxi takaro itari Piripi ìtanoro. Ouãka Erotxia inakoro. Oa xika Erotxi maĩkari Xoão. Iaxiriĩtotari, kateia ãki taka itxari.

¹⁸Xoão takaãka kateia ãki, kotxi itxari Erotximoni:

—!Erekari pitari ìtanoro pitakini —itxari.

¹⁹Ikara xika Erotxia apaka omanatari Xoão. Oa iteene kinirão okaka otxamari Xoão. Kona oposotari oòkiniri iua, ²⁰kotxi Erotxi p̄ikari Xoão. Iua imarotari, atão inakarínoka kamakari, erekarínoka kamakari ininiua Xoão. Xoão sãkire ikenakotakasaaki, ìteene ìmarotari isãkire, iuaritika iua apokaerekatari ikenakotiniri isãkire.

²¹Erotxi kamari isaiã kiiniriti. Iua kemaĩtxitana sotato auĩteakori, Kariréia auakani auĩteakori, apanakini auĩteakori pakini. ²²Ininiã Erotxia ãkero apoka iua kiiniritiã. Iuasaaki oserenapirĩkata Erotxi apisatoõ, ikemaĩtxitakini apisatoõ pakini. Ninoa potxitari oserenini. Ininiã Erotxi txaro oa ãtokoro:

—Pinirekakiti pamanaãno, ininiã nisikai. ²³Atãopitikara nisikai pamanaãkiti. Nitixine pinirekiniã, ipixini nisikai —itxaro.

²⁴Ininiã oa miteka onoromoni. Oa pimaã txaro onoro:

—Kiripa namanaãtari? —otxaro.

Ininiã onoro txaro:

—“Xoão Kapatxisareri kii prato nopini ninireka,” pitxari. Ikara atoko pamanaãri iua —otxaro.

²⁵Ininiã katimariã okanapiriã kiiniri auiniãtaã iuaĩkana. Katimariã auĩtetximoni osa. Oamanaãri iua:

—Ninirekari Xoão kapatxisareri kii prato nopini —otxa.

²⁶Ininiã Erotxi maerekaxiniretinoka itxa, kotxi mitxi iua sãpiretaro oa amanaãkiti isikiniro oa ikemaĩtxitakini apisatoõ. Ininiã ìpakata imasikakaniãri isikaenetakiti. ²⁷Ininiã katimariã ipaniãtari sotatoakori okiniri Xoão:

—Ikii himina —itxa.

Ininiã isana kateiamoni. Itsotakakiitarina Xoão. ²⁸Pirato nopini itakarina ikii, sika itxarona ãtokoro. Ininiã oa sikari onoromoni.

²⁹Ininiã Xoão moianariakori kenakopiretakasaakiri Xoão okiko pirena, isana kateiamoni. Aparina iĩto. Itakarina iĩto kai iriko ãki.

Sīko Mio Kākiti Xesosi Sikakienatini

(Mateo 14.13-21; Arókasi 9.10-17; Xoão 6.1-14)

³⁰Ininiã Xesosi iokanatakini kanapiriã iuamoni. Apoka itxana Xesosimoni. Isãpiretarina ikamakitina, oerekakitina pakini. ³¹Iuasaaki kaiãopokori kākiti aua iuaãtaã, ininiã !apakata inipokotinina. Ininiã:

—Amasipeka kākiti mauakaniãtaã atomatini ãkapani —itxana.

³²Ininiã kanauaã iereëtauana. Ìpiriãtarina ipoa. Isana kākiti mauakaniãtaã. ³³Kākiti itikari Xesosi inapaãpotini, ininiã ninoa miteka. Iopiriãrina ipoa koropoa, apoka itxana Xesosi apisapanika.

³⁴Iua kanĩkiĩtakasaaki apisamoni mirikiniti kākiti, ininiã iamoniãkana, kotxi soti auĩte ipitikiri mauakinini atoko itxana. Iuasaaki Xesosi oerekana kaiãori Teoso sãpiretakiti.

³⁵Ininiã mapiãpeka inaãpotiniã, Xesosi moianariakori iuamoni apoka. Itxarina:

—Kona kākiti aapoko auari uai. Uatxa mapiaãpopeka. ³⁶Ininiã pipaniãtana kākiti isinina ãkapani nipokori iamotinina tĩkane.

³⁷Ininiã Xesosi:

—Hĩtekarako sikakienatana ninoa —itxana.

Ininiã ninoa:

—Pinirekatari asini komiri aamotini ãkapani? Oito kasiriti kākiti parĩkauatini ãki anireka komiri ãki naia kākiti nikini ãkapani —itxana.

³⁸Ininiã Xesosi pimaãna ninoa:

—Kipakinipa komiri katari aua? Hãtariko —itxa.

Ninoa imarotakasaakiri, apoka iuamoni. Itxana:

—Sĩko pakini komiri katari, ipi ximaki pakini aua —itxarina.

³⁹Xesosi paniãtana ikinika kākiti topãkini katsotati nopini. ⁴⁰Ãtiãtaã iitopãkana sĩkoëta, ipinimoni iitopãkana seĩ. Imaikinikana ikara atoko itxaãpotana iitopãkinina.

⁴¹Ininiã Xesosi kosekari sĩko pakini komiri, ipi ximaki pakini. Iuasaaki ionakaãta iaxiti:

—Erekapitikari pisikakiti —itxa.

Eereka imaxiõpekarĩ komiri. Isikari imoianariakori. Imoianariakoripekana sikaãpotana apanakini. Iuaĩkana imapirinikari ximaki, xanaka itxari imakinikana. ⁴²Ikinimanekana nipokota, kamitopeka itxana. ⁴³Ininiã imoianariakori apotiĩtari ximaki itetakori, komiri itetakori pakini. Tosi pakini kotari xãpoka itetakori. ⁴⁴Iuasaaki sĩko mio kikiakori nipokotakani.

Xesosi Ipoa Nopini Itĩpokotini

(Mateo 14.22-33; Xoão 6.15-21)

⁴⁵Xesosi takapiretakasaakiri kãkiti, iuasaaki iokanatana imoianariakori ĩpiriãtinina iua apisa, Petsãita tixinimoni isinina ĩkapani. ⁴⁶Xesosi takapiretanapaka atoko, mitaxiratarari nopini isa Teoso imisãkiretini ĩkapani. ⁴⁷Mapiãpe inakasaaki kanaua ipoa apanĩkakiãxitipeka aua. Iuasaaki Xesosi imiriĩpanika aua.

⁴⁸Xesosi atamatana ninoa, itaparanoka itxana imekoãtinina, kotxi ĩtima, tsakati pakini anikaãpotana ninoa. Ininiã ikatimaãpotakasaaki, Xesosi apokaãpota ninoamoni. Itĩpokota ipoa nopini. Inapaãpoaritana imoianariakori. ⁴⁹Ininiã ninoa atapakasaakiri ipoa nopini itĩpokotini, ninoa uãkatari kamiri. Ininiã ninoa akiripoakata. ⁵⁰Ininiã iua misãkiretana:

—Kataparaxinire hĩtxako. Notakara. Na !hĩpĩkarauatape —itxana imoianariakori.

⁵¹Eereka kanauaã iereẽtaua. Iuasaaki ĩtima iotoka itxa. Ininiã itikokitatana ninoa. Itsoriãkaãtana:

—Kiripa atxiĩti? —itxana.

⁵²Ikara atoko isãkirena, kotxi kona ixinikaikarina Xesosi posotiire komiri ixanakasaaki. Paikoxinirena ninoa iuasaaki.

Xesosi Makananitana Amianatakani Xenesareekini

(Mateo 14.34-36)

⁵³Xesosi imoianariakorikata ĩpiriãtari ipoa. Isari Xenesaree tixinimoni. ⁵⁴Ikanĩkiĩtakasaakina apanakini itikari Xesosi.

—Xesosira —itxana.

⁵⁵Ininiã imitekana kãkiti auinimoni amianatakani apinina ĩkapani. Anikana isirimatana nopini Xesosimoni. ⁵⁶Ikini sitatxiti kãkiti amianatakani sirĩka kimapori tiniãpo. Amanaãrina Xesosi auiritinina ninoa imãka itikakinina. Ikinikana imãka tikakakani erekapeka itxĩkitaka.

Xoteoakori Iikite Pirena

(Mateo 15.1-9)

7 ¹Ininiã pariseoakori, kaiõkatsopareriakori pakini, Xerosareẽ ĩkani, apotiitaua Xesosikata. ²Iuasaaki itikarina Xesosi moianariakori marokapiotakanuia nipokori inikinina apisa. Ininiã itxana:

—!Erekari imarokapiotakaniuana —itxana.

³Pariseoakori, imakinikana Xoteoakori apaka kamari ikiomaneakori kitxakapirīkarini sākire iaōka. Inipokotinina apisapanika arokapiotauana.

⁴Nipokori amotikoātaā Xoteoakori sikasaaki, eereka apokasaakina aapokona imarokapiotakaniāuana kona inipokotana. Tiitxi iākoanatxi, kopiti, apanakini itiina pakini arokasaakina ikiomaneakorini oerekakiti iaōka arokana.

⁵Ininiā pariseoakori, kaiōkatsopareriakori pakini pimaāri Xesosi:

—Kinirepa pimoianariakori kona kamatari kitxakapirīka atoko ininina? Kinirepa marokapiotakanikaua inikarina nipokori? —itxarina.

⁶Ininiā Xesosi apakapapireta:

—Mitxipitipanika Isaía sāpiretai hīte. Atāo iua sākire, kotxi hīsākire atxiīti erekari, txamari kona hīkamari hīsākire iaōka. Iua txari:

Kamisirienererini ninoa kākiti. Ninoa sākireēnanira ipaxitanona. Ākixinireēna !inirekanona.

⁷Maxikatiīka ninoa kapotoreēkaua nota apisatoō. Maxikatiīka ninoa txano: “Ateosone pitxaua,” kotxi ninoa !oerekari nota sākire. Ninoaka sākire oerekana, txamari “Teoso sākire asāpiretai” itxana.

Ikara atoko Isaía iōkatsopatakiti Teoso sākire.

⁸—Ininiā hītakanapapekari Teoso sākire, kākiti oereēkiti hīkamini īkapani. ⁹Hītakanapapikari Teoso paniātakiti, hinirekaākiti hīkamini īkapani. ¹⁰Kitxakapirīka Moisesi txari:

Pipaxitariko piri. Pipaxitaroko pinoro. Piri, pinoro pimisākirepiretiniā, pokaākako,

itxa Moisesi sākire. ¹¹Txamari hīte oerekari kākiti: “Kākiti auakiti iri, inoro pakini nirekiniā, iua manirekakaniāri isikiniri ninoamoni, isāpiretana: ‘Ia nota auakiti nisika Teosomoni.’” Ininiā !isikari ninoa nirekakiti ninoamoni. Ikara atoko inakari kākiti sikakiti Teosomoni, hīte takauākatari “Kopaā.” ¹²Ininiākara hōerekari kākiti imatiretakanina iri, inoro pakini. !Apakata hōerekakiti. ¹³Ikara hōerekakiti xika kona hīte maākatari Teoso sākire. Apiata hinirekari kākiti oereēkiti. Auapanika itori hōereēkiti sākiretxiti ikara atoko inakari —itxa Xesosi.

Ākixiniretxi Txiko Pirena

(Mateo 15.10-20)

¹⁴Xesosi iuaĩkana akiritana ikinimane kākiti. Itxana:
—Hikinika hīkenakota. Hītakaōtxikariko nisākire. ¹⁵Imakinika hinikakiti, mapara auakari. !Ikamari ate maerekani. Hīxinireē potoriākarira kamari maerekanitxi. ¹⁶Kakenakokii, ininiā hīkenakotariko nisākire —itxa Xesosi.

¹⁷Ikinimane kākiti itakanapaka atoko, aapokotxi āki ĩroā. Iuasaaki imoianariakori pimaāri:

—Pisāpiretaua mixikanani pisāpiretakiti —itxana.

¹⁸Ininiā iua txari:

—!Kiikitei hīte. Kona hīte imarotatari hinamaā ĩroākari kona kamari maerekanitxi. ¹⁹Kotxi ĩroākari !isari hīxiniremoni. Hītikako āki isa. Iposo atoko hītikatakasaaki inapa. Ikara atoko ininiā, erekari ikinipoko kākiti niākiti.

²⁰—!xinireē potoriākaru iuara kamari kākiti maerekani.

²¹Kākiti ākixinire ipotorika ixinikakiti maerekati, anokaretxi, ĩtiruatakatxi, okaniuatakatxi, āti kākiti ĩtanorokata isirĩkini nire pakini. ²²Kākiti ākixinireē ipotorika itirenani, maerekati Satanasi oerekakiti, misirieneretxi, pētauatakatxi kamakari, xikotakatxi, āti misākirepiretiko, iuikiniua, miikiteti inini pakini. ²³Ikinika ikara maerekati kākiti ākixinire auakari txikotari kākiti xinire —itxa Xesosi.

Xoteo Minakatoua Auikiniri

Xesosi Sākire

(Mateo 15.21-28)

²⁴Xenesaree tixini Xesosi potorika. Txiro sitatxiti tōpa, Sitoō tixini pakinimoni isa. Iuaā kākiti aapoko ĩroā. Kona inirekari kākiti imarotiniri iua auiniātaā. Txamari !iposotari iomaātiniua. Kākiti imaroāpotari iua auiniātaā. ²⁵Sito apoka Xesosimoni, kotxi oa kenakopiretari Xesosi pirena. Maerekati matamatakoti auaiōtaro oimi. Oāpokasaaki Xesosimoni, okapotoreēkaua iua apisatoō.

²⁶Oa sito sākiretari Kreko sākire. Āto uāka oa. Siropenísia tixinikero oa. Okapotoreēkasaakiua Xesosi apisatoō, oamanaāri Xesosi:

—Pomitikenatariko maerekati matamatakoti namarite ĩtoā auakari —otxari.

27 Ininiã Xesosi:

—Xoteo !pitxaua. Maparakerorai. Pite nirekakari nisikinii Xoteoakori nakiti. Amarini mitxi nikini atão. !Erekari nokiniri amarini kiena anãpamoni —itxaro oa.

28 Oa apakapapireta:

—Atãopitikara ikara atoko pitxa, kotxi nota maparakero, anãpa atoko Xoteoakorimoni. Iuaritika kãkiti auiritari anãpapiki nikiniri nipokori katxakakari amarini nipokotiniãtaã patapi —otxari Xesosi.

29 Ininiã Xesosi apakapapireta:

—Erekari papakapapiretini, ininiã paapokomoni pisa. Maerekati matamatakoti !auaika pamarite ãtoã —itxaro.

30 Oaãpoko oãpokasaaki, oãpokaro oamarite sirĩkanãta. Erekapekaro oa. Maerekati matamatakoti asikapekaro.

Makenakoreti Pirena

31 Eereka Xesosi takanapari Txiro sitatxiti tõpa. Ìpirixititari Sitoõ tixini. Sitatxi tõpa tesi pakini ìpirixitita. Apoka Kariréia poamoni.

32 ãtikaka kãkiti minari makenakoreti Xesosimoni. !Iposota atão isãkirauatini. Ninoa iteene amanaãri Xesosi:

—Piuako pitaka iua nopini kakenakorepeka inini ìkapani —itxana.

33 Xesosi anikari iua kiki kãkiti mauakaniãtaã. Itakari iuakoki ikĩpita ãki. Eereka ikiisoka, taka itxari ienemaã masãkireti nini nopini. 34 Eereka ionakaãta iaxiti, oõka itxa:

—Epataa —itxa.

Popĩkari sãkireẽ, “Piauãka.” 35 Iuusaakipeka ikenakoki auãka, ininiã kakenakorepeka itxa. Iuusaaki inini poiõpeka apaka. Eereka erekapeka itxa isãkirauatini. 36 Ininiã Xesosi txana ninoa:

—Kona hĩsãpiretapiri apanakini nimakananitiniri iua.

Txamari apiata ninoa sãpirenauata. 37 Kãkiti tsorĩkaãta:

—Ikinika ikamakiti peerekari. Makenakoreti kakenakorepeka itxa. Mimatasaãkiretakati, kasãkirepeka itxa —itxana.

Xesosi Sikakienatana Ipi Ipi Pakini Mio Kãkiti

(Mateo 15.32-39)

8 1 Eereka mapaõti itomaneri kãkiti apotiitaua Xesosimoni. Nipokori xipokapeka, ininiã Xesosi akiritana imoianariakori. Itxana ninoa:

2 —Nota amonĩkana naia kãkiti, kotxi ipi õti, ãti õti pakini õtipeka auana notakata. Ininiã uatxa nipokori !auaika.

³Niokanatiniãna auinimoni manipokotakatipanikana, ininiã ipixiniãpo iõkapetana. Irikana. Ætikaka õtako ãkani kona apakata manipokotakanika isinina —Xesosi txana imoianariakori.

⁴Imoianariakori apakapapireta:

—Uai aapokotxi mauakaniãtaã, ininiãkara nãpa aãpokari nipokori ito naia kãkiti asikakienatini ãkapani? —itxana.

⁵Ininiã Xesosi:

—Kipakinipa komiri katari hitemoni aua?

—Setxinokara komiri aua atemoni —itxana.

⁶Ipaniãtari kãkiti topãkini ixiti. Imaãkari iua komiri setxi.

—Erekari pisiãkiti —itxari Teoso.

Iposo atoko imaxiõpekari komiri, sika itxana imoianariakori.

Imoianariakori sika itxana apanakinimoni. ⁷Ninoamoni aua ãtikaka ximaki axapitiri. Ininiã Xesosi txari:

—Ia erekari —itxa Teosomoni.

Eereka ipaniãtana imoianariakori sikiniri kãkitimoni. ⁸Ininiã ikinipoko kamitopeka itxana. Iposo atoko apotiita itxarina itetakori. Xãpokaka itxarina setxi kotarina. ⁹Ninoa komiri nikakani ipi ipi pakini mio kãkiti. Kamitopeka itxana.

Ininiã itakapiretanapana ninoa. ¹⁰Iposo atoko imoianariakorikata iereẽtaua kanaua ãki. Taomanota tõpamoni isana.

Pariseoakori Nirekari Xesosi Oerekiniri Iposotiire

(Mateo 12.38-42; 16.1-4; Arõkasi 11.29-32)

¹¹Pariseoakori apoka Xesosimoni. Inirekarina Xesosi kerokiniri, ininiã itxarina Xesosi:

—Takaõtxikari, Teoso posotiire poerekaua ate, aãtamatiniri ãkapani, Teoso iokanatinii ãkorapokoriti aimarotini ãkapani — itxarina. ¹²Ininiã Xesosi oõka. Itxari:

—Kinirepa kãkiti uatxarini nirekari noerekiniri Teoso takaõtxikare, iposotiire? Atãõpitikara nota txai hite, kona noerekai hite.

¹³Ininiã itakanapana. Iereẽtaua kanaua ãki. Ikanapiriã ipoa ipiniãmoni iuaãkana.

Pão Tireẽkari Pirena

(Mateo 16.5-12)

¹⁴Xesosi moianariakori maxinãkaretari pão. Ætika pão porii kanaua ãki aua. ¹⁵Ininiã Xesosi õtãkikana:

—Erepaniko, pamonõkoniri pariseoakori, Erotxi pakini pãote tireẽkari —itxa Xesosi.

¹⁶Xesosi moianariakori misãkiretakakaua:

—Ikara atoko itxaua, kotxi amaxinĩkaretari pão.

¹⁷Xesosi imarotari ninoa sãkire, ininiã itxana:

—Kinirepa hĩsãkirauanãta pão mauakani xika? Kona himarotatapanikari niposotiire? Kona hiĩkitetapanikari? Kona hinirekatari hãuikiniri nisãkire? ¹⁸Kokimai, txamari, !hãtamatarari. Kakenakokimai, txamari !hĩkenakotari nisãkire. ¹⁹Kona hĩxinikapanikari iuasaaki nimaxiõpekitakiti sĩko komiri, sĩko mio kãkiti nisikakienatini? Kipakinipa kotari itetakori hĩxãpokaka? —ipimaãna.

Ininiã ninoa apakapapireta:

—Tosi kotari axãpokaka.

²⁰Xesosi txana ninoa:

—Eereka ãti õti nimaxiõpekari setxi komiri porii. Nisikari ipi ipi pakini mio kãkiti. Itetakori hãpotiitakiti, kipakinipa kotari hĩxãpokaka? —ipimaãna.

Ininiã ninoa:

—Setxi kotari axãpokaka.

²¹Ininiã Xesosi:

—Ininiã kinirepa kona hiĩkitetapanikari?

Mõsiãreti Petsáita Aapokotxitikiri

²²Xesosi Petsáita aapokotxitimoni apoka. Iuasaaki kãkiti minari mõsiãreti iuamoni. Amanaãrina Xesosi maãtakiniri iua mõsiãreti.

²³Ininiã iua anikaãpotari iuakoã kãkiti mauakanimoni. Iuaã iminapari ienemaã mõsiãreti okiã. Eereka taka itxari iuako iĩtoã. Ipimaãri iua:

—Kõsiãrepekai? —itxari.

²⁴Ininiã iua atamata.

—Nota itikapokotapeka, txamari nitikari kãkiti tĩpokotakari aamina atoko —itxa.

²⁵Iposo atoko Xesosi iuaĩkana takari iuako mõsiãreti nopini. Eereka mõsiãreti atão itikapokotapeka. Ikinipoko atamata. ²⁶Ininiã Xesosi iokanatarari:

—Pisipeka paapokomoni. Kona pisipe Petsáita aapokotxitimoni, kotxi kona ninirekari pisãpiretiniri nikamakiti kãkitimoni —itxa Xesosi.

Petro Auikari Xesosi Teoso Mereëkiti Ininiãua

(Mateo 16.13-20; Arókasi 9.18-20)

²⁷Eereka Xesosi imoianariakorikata sari kãkiti poiãoka auinimoni, Sesaréia-Piripi sitatxiti takote isana. Ipixiniãpo Xesosi pimaãna imoianariakori:

—Kiripa kãkiti uãkatano nota? —itxa.

²⁸Ninoa apakapapireta:

—Xoão kapatxisareri iuãkataina. Apanakini “Eríasi inakori” iuãkataina. Ininiã apanakini “Teoso sãkire sãpiretakari” iuãkataina —itxana Xesosi moianariakori.

²⁹Iuaĩkana Xesosi pimaãna:

—Hitepekana, kipa hite uãkatano? —itxana.

Ininiã Petro apakapapiretari:

—Teoso mereëkiti, kãkiti iãtapanãtakiti pitxaua —itxari.

³⁰Ininiã Xesosi txana imoianariakori:

—Teoso mereëkiti nininiu !hísãpiretapiri apanakini —itxa.

Xesosi Sãpiretari Ipinini

(Mateo 16.21-28; Arókasi 9.22-27)

³¹Ininiã ia atoko oerekarauata:

—Nota hĩtari iaxitikiri iteene atatsiirauatako. Kiomãtxiakori, sasetotxi auĩteakori, kaiõkatsoparerini pakini kona nirekapanino nota. Nokaãkako. Eereka ipi ãti pakini õtisaaki iuaĩkana nõkitikauako.

³²Ikara isãpireta ikinimane kãkitimoni. Ininiã Petro anikari iua maparamoni. Itxari:

—Kona ikara atoko !pitxape. Kona erekari pisãkire ikara atoko pinini —itxa Petro.

³³Ininiã Xesosi kirioka imoianariakorimoni. Iua txitari Petro:

—Pisipiniikaua Satanasi. Pite nireëkiti kãkiti nireëkiti atokotxikana. Pite nireëkiti kona Teoso nireëkiti atokoni —itxa Xesosi.

Xesosi Moianari Atão Inakari

(Mateo 16.24-28; Arókasi 9.23-27)

³⁴Xesosi akiritana kãkiti imoianariakori apaka. Itxana ninoa:

—Notakata kinirão sika pinakasaaki, piteka pinireëkiti kona pixinikape. Notakata kinirão sika pinakasaaki, nota misiritiko atokokana pimisiritaãkako. Ia atoko pinirekiniã, notakata

pisapitikako. ³⁵Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, Teoso iokanapirena erekari pisāpiretini xika, pite auapininiika txako Teosokata.

³⁶Atxiīti papakapari ikinipoko tiitxi, ikini itixiti auakani tii, pinakiti ikapani. Atxiīti iua tiitxi xika kona pikīpitari Teoso sākire, ininiā kona pikaikota ātipirika Teosokata. Ikara atoko ininiā, erekari atxiīti ikinipoko tiitxi auinii? Konapitini. Apiaerekata Teosokata ātipirika pikaikotini, kotxi tiitxi iki poiāoka, pixinine karone apiata. ³⁷!Apakata kākiti iīkitxitiniri Teoso, iuamoni isini ikapani.

³⁸Ikorsaaki kākiti linirekari Teoso. Inirekari maerekatinoka. Ikorsaaki pipētatiniano nota, pipētatiniani nota sākire, ininiākara nota kākiti itari iaxitikirino pētataiko pite, uai nikanapiriākasaaki. Nikanapiriākasaaki, niri iotximere aua notamoni. Nina niri nitiriakorikata, erekarinikata.

9 ¹Xesosi txana nino: —Hīxinikariko ia nisākire. Apanakini hīte uatxa uai auakanii, hīpinini apisapanika himarotari Teoso auītetxi ininiāua. Auītetxi kaposotiireri itxaua —itxa Xesosi.

Moisesi, Eríasi Pakini

(Mateo 17.1-13; Arókasi 9.28-36)

²Seisi pakini ōti napaka atoko Xesosi anikana Petro, Txiako, Xoão pakini oxiratarimoni, mitaxiratarimoni. Iuasaaki ninoanani aua iuaā. Iuaā auakasaakina, Xesosi ito ipinipo itxa.

³Imāka kasarori itxaua. Iotximere apaka auari. Ikara imāka saro atoko inakari, !auari. Kākiti iteene arokiniāri mākatxi, iuaritika ikara isaro atoko !auari. ⁴Iuasaaki Eríasi, Moisesi pakini tokiā iuaā. Isākirauatana Xesosikata. ⁵Ininiā Petro txari Xesosi:

—Koerekareri, erekapitikari uai aūuini. Makamari papiri ipi āti pakini, pite ikapani, Moisesi ikapani, Eríasi ikapani —itxa.

⁶Ikara atoko itxa Petro, kotxi !imarotaikari isākire, iteene ipīkarauatiniā.

⁷Iuasaaki katxiāri apoka ninoamoni. Katxiāri āki auana. Katxiāri āki Teoso txari:

—Ere namarite, nitiretakiti. Hīkenakotariko iua sākire —itxa.

⁸Katimaritika Xesosi moianariakori sapotorika. Itikapokotana. Mitxi Xesosikata sākirauatakani !auaika iuaā. Xesosinokara kaikota ninoakata.

⁹Otanoxiratarari iokiriiāpotakasaakina, Xesosi txana:

—Mixikanani hītikakiti !hīsāpiretapiri apanakini. Nota hītari iaxitikiri nipinaka atoko iuaīkana nōkitikaākaua atokoikarako, hīsāpiretariko mixikanani hītikakiti —itxana.

¹⁰Ininiā !isāpiretarina apanakinimoni. Ninoanoka isākirauanātana:

—Natokopa itxa kākiti ipīkaripeka iuaīkana ōkitikiniāua —itxanātana.

¹¹Ipimaārina Xesosi:

—Kinirepa kaiōkatsoparerini sākire: “Teoso mereēkiti apokini apisapanikarako Eríasi apokako.” Kinirepa ikara atoko itxana?

¹²Ininiā Xesosi:

—Inipitikara Eríasi apoka merepanika, kākiti iposope inini īkapani. Teoso sākire iōkatsopatakori txari: “Kākiti itari iaxitikiri iteene atatsiirauatako. !nirekaākako.” Kinirepa ikara atoko itxa Teoso sākire iōkatsopatakori? ¹³Nisāpiretaiko Eríasi apokapekaka. Kākiti misiritapekari iuani. Inireēka iaōka imisiritarina. Teoso sākire iōkatsopatakori sāpiretapekari ikara ene —itxa Xesosi.

Amarini Maerekati Matamatakoti Auaītotakiti

(Mateo 17.14-21; Arókasi 9.37-43a)

¹⁴Ninoa apokaāpotakasaaki apanakini imoianariakorimoni, atamatana kākitiipokoni. Ninoa ākitana Xesosi moianariakori. Iuasaaki kaiōkatsoparerini kākítikata itaparakienetakakaua.

¹⁵Iuasaaki kākiti atapari Xesosi. Ipoxoniritikana itxana:

—Xesosi napani.

Ininiā imitekana iuamoni, okapireta itxarina:

—Piteni?

¹⁶Ininiā Xesosi:

—Ari, notara.

Ipimaāna:

—Kininiāpa hītxitakakaua? —itxa.

¹⁷Ininiā kiki kākiti sauaki auakari apakapapiretari:

—Nota minamari namarite pitemoni. Maerekati matamatakoti auaītotari iua. !Auiritari namarite sākirauatini. ¹⁸Iua maīkasaakiri, okaītotari iua xiti. Iuasaaki namarite sorikipeta. Akatsakatsiriītaua. Itorōkaītota. Ininiā nimisākiretamana pimoianariakori omitikiniri maerekati matamatakoti, txamari ninoa !iposotari.

¹⁹Xesosi txari:

—!Kauikarei hïte. Maerekati kamakanii hïte. Kipakinikananipa Teoso nirekatari hïtekata nauini? Kipakinikananipa Teoso nirekatari hïte nimïteenekini? Himinari amarini notamoni —itxana.

²⁰Ininiã ninoa anikari iua amarini Xesosimoni. Iuasaakipeka maerekati matamatakoti atamatari Xesosi. Iuasaakipeka maerekati matamatakoti txïkitakari amarini okaratiniua. Ininiã iua amarini iriãkata. Ikanapirikata, isorikipekata, itxïkitakari amarini. ²¹Xesosi pimaãri iri:

—Kirisaakipa ipotorika ïkora atoko inini?

—Axapitipanikara ipotorika ïkora atoko inini. ²²Itokata maerekati matamatakoti okaïtotari xaminamoni. Itokata okaïtotari kãuaãrimoni. Inirekari okiniri iua. Piposotiniãri, pomitikariko maerekati matamatakoti. Piamonïkauako atepaniko —itxa iri sãkire.

²³Ininiã Xesosi:

—Nota posotatari? Teoso sãkire auiãkari posotari ikaminiri ikinika —itxari.

²⁴Iuasaaki iua kiki apakapapiretari iãtsaritika:

—Nauikapitikari piposotiire. Axapitikinoka !nauikari, ininiã pisikaposotiiretano iteene pisãkire nauikini ïkapani.

²⁵Isãkirauanãtakasaakina, kãkitipokoni miteëkata ninoamoni Xesosi kamakiti imarotina ïkapani. Ininiã Xesosi itapararitika txitari maerekati matamatakoti:

—Pite maerekati matamatakoti. Pitxïkitakari kãkiti masãkireti inini. Pitxïkitakari kãkiti makenakokiti inini. Nota omitikai pite. Pipokïka. Iuaïkana !piïroãpinikako iua ïtoã —itxa Xesosi.

²⁶Iua maerekati matamatakoti akiripoakata. Okaraïtokatari atoko, sipe itxa. Iua amarini ipïkari ïto atokopeka itxa. Ininiã apanakini kãkiti: —Ipipeka —itxarina.

²⁷Ininiã Xesosi maïkauakotari. Ökitikari iua, ininiã itima.

²⁸Xesosi aapokotxi ãki auakasaaki, iuanoka inakasaaki, imoianariakori pimaãri:

—Natokopa ininiãpa kona ate posotatari maerekati matamatakoti aomitikini? —itxana iuamoni.

²⁹Ininiã Xesosi:

—Teoso pimisãkiretakasaaki, iuasaaki pimanipokotakaniãra, iuasaaki piposotari ikara atoko inakari maerekati matamatakoti pomitikini —itxa Xesosi.

Xesosi Iuaĩkana Sãpiretari Ipinini

(Mateo 17.22-23; Arókasi 9.43b-45)

³⁰Iuaã ipotorikana. Īpirixititarina Kariréia tōpa. Xesosi !nirekari apanakini kenakoenetiniri iua auiniãtaã. ³¹Kotxi inirekari oerekinina imoianariakorinoka ipinini pirena. Ininiã Xesosi:

—Nota hĩtari iaxitikiri mĩkapiritaãkako. Nisikaãkako kikiakorimoni inirekaãkitina ikaminina tĩkane. Ninoa okano nota. Ipi õti ãti õti inakasaaki iuaĩkana nõkitikauako —itxa.

³²Ninoa !imarotari Xesosi sãkire. Ninoa pĩkari ipimainirina iua.

Kiripa Kãkiti Apiatakari Txataua?

(Mateo 18.1-5; Arókasi 9.46-48)

³³Kapanaoõ sitatxiti apokana. Aapokotxi ãki auakasaakina, Xesosi pimaãna ninoa:

—Natokopa itxa hĩsãkire, uaimoni aĩkasaaki hĩtaparakienatakakasaakiua? —itxa.

³⁴Masãkirenika itxana, kotxi kimaporiãpo ninoa sãkire: “Īkiripa ate apiatakari?” itxana. ³⁵Xesosi, iitopãka atoko, akirita itxana imoianariakori tosi pakini.

—Hĩkinika uaimoni hĩitopãka. Apiatakari pininiãua pinirekiniã, piteka poiãotakaua. Ikinimane nitiri pitxauako.

³⁶Xesosi kosekari amarini, mina itxari imoianariakori sauaki, katarata itxari.

³⁷—Papakapiniãri amarini pipoxokoniritika, papakapano nota apaka. Papakapiniãno nota, na notananini papakapa. Iuasaaki papakapari iua uaimoni niokanatakiri —itxa Xesosi.

Maerekani Matamatakoni Omitiãkari

(Arókasi 9.49-50)

³⁸Xoão sãpiretari Xesosi:

—Koerekareri, ate kenakotari kiki omitikinina maerekani matamatakoni pite uãkaã. Kona pimoianarini iua. Ininiã ate: “Ikara atoko !pitxape,” atxari.

³⁹Ininiã Xesosi:

—!Hĩotokakapiri ikara ikamini. Kãkiti nota uãkaã maerekati matamatakoti omitiãkari, kona imisãkirepiretano. ⁴⁰Iua ate mokaiakari minakatiua. Atiretakiri itxaua. ⁴¹Nota atãopitikara nitxai

hĩte. Atxiĩti kãkiti sikai ãparaã, kotxi Teoso mereẽkiti nakiti pitxaua. Iua kamakiti erekari, ininiã apakapapitikariko ikamakiti ĩki.

Maerekati Oerekakari

(Mateo 18.6-9; Arókasi 17.1-2)

42!Erekari kãkiti mitari oerekiniãri amarini nota sãkire auiãkari maerekati ikamini. !Erekari. Erekamariko kai mitari iaxirikaãkamako iua kãkiti mitari nokiã, eereka okaãkamako ipoamoni ipinini ĩkapani. 43Piuako maerekati ikamãkitakiniãi, pitsotakari. Erekamariko ãtinani piuako Teosokata ãtipirika pauini ĩkapani, kotxi maerekati pikaminiã, pisa maerekani misiritikoãtaã. Iuaã xamina tirinapika. !Oakaãka. Atxiĩti piuako ipi aua, txamari pite sari iuaãtaã. !Erekari. 44Iuaã kĩtxi piĩtoã auakaro !opina. Xamina !oakaãka. 45Pikiti maerekati ikamãkitakiniãi, pitsotakari. Erekamariko ãtinani pikiti Teosokata ãtipirika pauini ĩkapani, kotxi maerekati pikaminiã, pisa maerekani misiritikoãtaã. Iuaã xamina tirinapika. !Oakaãka. Atxiĩti pikiti ipi aua, txamari pite sari iuaã. !Erekari. 46Iuaã kĩtxi piĩtoã auakaro !opina. Xamina !oakaãka. 47Poki maerekati ikamãkitakiniãi, pimakatxakari. Erekamariko ãtinoka poki auini Teoso auĩtetxi ininiãtaãua pisini ĩkapani, kotxi maerekati pikaminiã pisa maerekani misiritikoãtaã. Iuaã xamina tirinapika. !Oakaãka. Atxiĩti poki ipi aua, txamari pite sari iuaã. !Erekari. 48Iuaã kĩtxi piĩtoã auakaro !opina. Xamina !oakaãka.

49Iõkira nipokorimoni takiko atokokana xamina tirinakari takaãkako ikinimane kãkitimoni. Ikara atokokana ikinimane ataerekataãkako. 50Iõkira erekaro. Txamari iõkira koketikosaaki kipatxikata, !erekaikaro. !Apakata xinitxi piõkiratini ĩkapani. Atão iõkira atoko hĩtxako. !Hĩtxitakakapeua.

Kiki ĩtanorokata Itakanapakakini

(Mateo 5.31-32; 19.1-12; Arókasi 16.18)

10 1Xesosi potorika iuaã. Xotéia tõpa isa. ĩpiriãkitari Xotão kãuaãriti. Iuaĩkana kãkiti apotiĩtaua iuamoni. Kaiõpopokori kãkiti, ininiã oerekarauata, mitxi oerekarauanãtini atokokana.

2Kikiakori, pariseo inakanuia, apoka Xesosimoni. Ninoa nirekari Xesosi kerokiniri isãkire, ininiã ipimaãrina:

—Atãokani erekari kiki takanapiniro ĩtanoro?

3Ininiã Xesosi:

—Kiatokopa itxa Moisesi paniãtakiti?

⁴Ininiã ninoa:

—Moisesi paniātari kiki iōkatsopatiniri aātsopa, ĩtanoro itakanapini aātsopate, ininiã eereka auiritari iua iokanatiniro oa —itxana.

⁵Ininiã Xesosi:

—Moisesi auiritai hĩtanoro hĩtakanapini, kotxi paikori hĩxinire. Teoso nireēkiti himanirekakani xikara, Moisesi auiritai hĩtanoro hĩtakanapini.

⁶Kotxi merepitipanika Teoso ikinipoko ikamakasaaki, ikamari kiki, sito pakini. ⁷Ikara atoko ininiāpitikara, kiki takanapari iri, inoro pakini, ĩtanorokata auini ĩkapani. ⁸Ininiã ātika atoko itxauana. Ininiã ipi kākiti litxaikauana. Ātinokara itxapekauana. ⁹Ikara atoko ininiã, !erekari kākiti kaiarikiniri Teoso apotiitakini —itxa Xesosi.

¹⁰Eereka Xesosi imoianariakorikata kanapiriã aapokomonina. Iuaã apokasaakina, imoianariakori pimaāri iua ikara sākiretxiti iuaĩkana oerekinina ĩkapani. ¹¹Ininiã isāpiretana:

—Kiki ĩtanoro takanapakari, āto sito itaka inakari, maerekati ikaminaro ĩtanoro. ¹²Iua atokokana sito ōtaniri takanapakaro, āti ōtanirita inakaro maerekati okaminiri ōtaniri —itxa Xesosi.

Xesosimoni Amarini Apokini

(Mateo 19.13-15; Arókasi 18.15-17)

¹³Iposo atoko ātikaka kākiti anikari amarini Xesosimoni. Inirekarina Xesosi misākiretiniri Teoso ninoa amarini ĩkapani. Txamari imoianariakori txitana. !Auiritana amarini anikinina Xesosimoni.

¹⁴Xesosi ikara ikenakotakasaaki, !apokaerekatari. Ininiã iua:

—Hāuiritariko amarini notamoni apokini. !Hĩotokakapiri, kotxi kākiti Teoso auĩtetakani amarini atoko itxauana. ¹⁵Ia atāo: Kākiti mapakapakaniāri Teoso, amarini apakapiniri atoko iminakaniã, kona isa Teoso auĩtetxi ininiãtaãua —itxa Xesosi.

¹⁶Ininiã Xesosi kataratari amarini. Itakari iuako ikiina nopini. Amanaāri Teoso erekari itakini amarinimoni.

Ātokori Ito Txineiroteri

(Mateo 19.16-30; Arókasi 18.18-30)

¹⁷Xesosi iuaĩkana potorika. Iuasaaki ātokori miteka iuamoni. Ikapotoreēkaua Xesosi apisatoō.

—Koerekareri erekari, kiripa nikama Teosokata ātipirika nauini ĩkapani? —itxa.

¹⁸Ininiã Xesosi:

—Kininiāpa “erekari” pitxano? Teosonanira erekari. ¹⁹Pite imarotari Teoso paniātakiti. !Pokaniuatape. !Pisirīkape āti ūtanorokata. !Pīitiriuatape. Poxiene !pikamape. Apanakini !pimisirienetape. Piri, pinoro pakini pipaxitako —itxa Xesosi.

²⁰Iua ātokori txari:

—Noereēkiri, axapitipanikara ninakasaaki, nikīpitari ikara Teoso paniātakiti —itxari.

²¹Ininiā Xesosi apokaerekatari iua.

—Auapanika ātinoka pikamini tīkane. Pisa. Tiitxi ikinika pinakiti pivētxitako. Txineiro papakapakito pisikako matxineirotenimoni. Eereka pimoianatanoko nota. Ikara atoko inakari pikaminiā, Teoso tixine papokasaaki ikinipoko erekari auiniiko pite —itxari iua.

²²Ikara Xesosi sākire ikenakotakasaaki, imatinaniuata. Isipe. Maerekaxiniretinoka itxa, kotxi kaiāori itii.

²³Xesosi sapotorika, misākireta itxana imoianariakori:

—Pamimapaniri katxineiroteri sini Teoso auītetxi ininiātaāua —itxa.

²⁴Imoianariakori:

—Anekani? —itxana.

Iuaīkana Xesosi txari:

—Pamimapaniri katxineiroteri sini Teoso auītetxi ininiātaāua.

²⁵Atauako kamero napatari ākorike sonakiā? Apia mimari kākiti katxineiroterini auītetiniri Teoso —itxana.

²⁶Imoianariakori iteene tsorīkaānāta.

—Ininiā kipa sari Teoso auītetxi ininiātaāua? —itxana imoianariakori.

²⁷Ininiā Xesosi apakapapiretana:

—Teoso posotari ikinipoko ikamini. Kākiti !liposotari. Teoso posotari anikiniri katxineiroteri itixinemoni —itxa.

²⁸Petro txari:

—Ate takanapapekari ikinipoko pite amoianatini īkapani —itxari Xesosi.

²⁹Ininiā Xesosi:

—Atāo nitxai. Paapoko pitakanapiniā, pitariakori, pitaroakoro, piri, pinoro, pītanoro, pamariteni, pikikiote, pitakanapiniā notakata pisini īkapani, Teoso iokanapirena erekari pisāpiretini īkapani, ³⁰pitakanapakiti iua apiata nisikaiko. Īkorsaaki nisikaiko itomaneri aapokotxi, itomaneri pitariakori, itomanero pitaroakoro, itomanero pinoroakoro, itomaneri pamariteni, itomaneri pikikiote, nisikaiko. Txamari iusaaki patatsiitari pimisiritiko. Iuaritika eereka Teosokata

pauapika ātipirika. ³¹Uatxa apiari inakari, iusaakiko minakati itxauako. Uatxa minakati inakari, iusaakiko apiari itxauako —itxa Xesosi sākire.

Iuaĩkana Xesosi Sāpiretari Ipinini

(Mateo 20.17-19; Arókasi 18.31-34)

³²Xesosi imoianariakorikata Xerosareẽ kimaporite iāpotakasaakina, Xesosi ĩkiika. Iusaaki ninoa maerekaxiniretinoka itxana. Apanakini ninoa tikini sikani pĩkarauata. Ininiã Xesosi iotoka. Akiritana imoianariakori tosi pakini. Isāpiretana paĩtiki kākiti kamakiti iuamoni tĩkane. ³³Ininiã iua:

—Hikenakota. Xerosareẽmoni asa uatxa. Iuaã nota hĩtari iaxitikiri sikaākako sasetotxi auĩteakorimoni, kaiōkatsopareriakorimoni pakini. Ninoa paniātariko nota okiko. Iposo atoko Xoteo minakonimoni sika ninaākako. ³⁴Inapetanonako. Inoropatanonako aāpitsaã. Ikiisokanonako. Iposo atoko oka ninaākako. Ipi āti pakini ōti inakasaaki iuaĩkana nōkitikauako — itxa imoianariakorimoni.

Txiako Xoão Pakini Amanaākiti

(Mateo 20.20-28)

³⁵Iposo atoko Txiako, Xoão pakini sari Xesosimoni. Ninoa Sepeteo anaakori.

—Koerekareri, ate nirekari aamanaākiti pikamini —itxana.

³⁶Ininiã Xesosi pimaãna:

—Kipa hinireka nikaminii hĩte? —itxana.

³⁷—Pite ikinimane auĩte pinakasaakiua, pauiritaua pitekata aĩtopākini, pikikomoni, pisaneremoni aĩtopākini —itxana.

³⁸Ininiã Xesosi:

—!Himarotari hamanaākiti, kotxi mapaõti napa atoko nota apakapariko iātatxi tsiĩtxiã niātini ĩkapani. Hĩposotatari ikara hiātini? Nipatxisataākako tsiĩtxiã. Hĩposotatari ikara atoko hĩpatxisatiko?

³⁹—Aposotapitika —itxana ninoa.

Xesosi txana ninoa:

—Inipitikara hiātariko nota iātakiti. Inipitikara hĩpatxisataākako nota patxisatiko atokokana. ⁴⁰Txamari !niposotari nauiritinii hĩte nikikomoni, nisanaremoni hiĩtopākini, kotxi Teoso mereẽpekana kākiti nikikomoni, nisanaremoni topākakani tĩkane —itxa Xesosi.

⁴¹Xesosi moianariakori tesi pakini kenakopiretakasaakiri Txiako, Xoão pakini amanaãkiti, ininiã ninoa omanatana. ⁴²Ininiã Xesosi akirita txana imoianariakori:

—Uaimoni hina. Hiitopãka notakata —itxana ninoa.

—Híte imarotari Xoteo minakanua auíteakori pataparana. Ninoa auiritari kãkiti kaminiri ninoa paniãtakitinoka. ⁴³Ninoa atoko !hĩtxape. Apiari pininiua pinirekiniã, pimoianatana apanakini.

⁴⁴Apanakini auíte pininiã pinirekiniã, nitiritxi pitxauako merepanika. ⁴⁵Ikara atoko nitxa nota hĩtari iaxitikiri ïkorapokoriti napokasaaki. Ninitiri !auari. ïkorapokoriti napoka, kãkiti nitiri nininiua ïkapani, kãkiti nitiretini ïkapani. ïkorapokoriti napoka nipinini ïkapani, kaiãopokori kãkiti mapinakani ïkapani, kotxi nota ïkixirauata ninoa mapinakani ïkapani —itxa Xesosi.

Mõsiãreti Patximeo Inakori

(Mateo 20.29-34; Arókasi 18.35-43)

⁴⁶Xesosi imoianariakorikata apoka Xerikoo sitatxiti. Eereka ipotorikasaaki imoianariakorikata itomaneri kãkitikata, iusaaki mõsiãreti Patximeo inakori kimapori ïtiniãpo iitopãkanãta. Tximeo inakori ãkiri iua. Iua mõsiãreti amanaãnãtaro txineiro. ⁴⁷Iua kenakotari Xesosi Nasareekiri inapãenetini, ininiã akirinãta:

—Xesosi, Taviini apika mekanirii, piamonĩkanoko —itxa.

⁴⁸Ininiã apanakini kãkiti pinitari:

—Maãtako. !Pakirinãtape —itxarina mõsiãreti.

Iuaritika apiata akirinãnikata:

—Taviini apika mekani. Piamonĩkanoko nota —itxanãta.

⁴⁹Ininiã Xesosi iotoka itxa.

—Hãkiritari iua mõsiãreti —itxa.

Ininiã ninoa:

—Pipoxokoniuatoko. Põkitikaua. Akiritapekai —itxarina iua mõsiãreti.

⁵⁰Ininiã Patximeo okanapari imãka inopini auakari. Pakoteri õkitikaua, sa itxa Xesosi akiritiniri manapi.

⁵¹Ininiã Xesosi:

—Kipa pinireka nota kaminii pite? —itxari.

—Apiananiri, nõsiãrera ninireka —itxari.

⁵²Ininiã Xesosi:

—Pisa. Erekapekai, kotxi pite auikari niposotiire —itxari.

Iuusaakipeka Patximeo kōsiärepeka itxa. Xesosikata sa itxa kimaporiã.

Xesosi Xerosareë Apokaãpotini

(Mateo 21.1-11; Arókasi 19.28-40; Xoão 12.12-19)

11 ¹Xesosi imoianariakorikata imatokoãpotari Xerosareë. Ōtanoxiratarari, oriva mina takikoãtaã takote apokana. Iuaã aua aapokotxi Petxipaxee inakori, Petánia inakori apaka. Iuaã Xesosi iokanatanana ipi imoianariakori.

²—Hĩsa ikiraã kaixiti auakari aapokotxiã. Iuaã hãpokasaaki, hãpokari xomëta ãkiri iaxiriãkori. Kãkiti !iitopãkapanika iua nopini. Hĩkoxirikari. Uaimoni mina hĩtxari. ³Kãkiti pimaãkasaakii hĩte: “Kinirepa hĩkoxirikatarari xomëta ãkiri?” hinikosaakiko: “Apiananiri nirekari iua. Iuaĩkana akamoni aminariko,” hĩtxako.

⁴Ininiã eereka isana. Apokarina iua xomëta ãkiri iaxiriãkori kimaporiã aapokotxi tore takote. Ininiã ikoxirikarina. ⁵Ãtikaka kãkiti iuaã auakani:

—Kinirepa hĩkoxirikatarari xomëta ãkiri? —itxana Xesosi moianariakorimoni.

⁶Ininiã Xesosi paniãtini iaõka apakapapiretana. Ininiã kãkiti iuaã auakani:

—Ininiã hanikaikari —itxana.

⁷Ninoa anikari xomëta ãkiri Xesosimoni. Ininiã imãkana ãti imãkana nopini auakari itakarina xomëta ãkiri nopini Xesosi topãkini ĩkapani. ⁸Apanakini kãkiti matameëkari imãkana ãti imãkana nopini auakari kimaporiã Xesosi napini tĩkane. Apanakinipekana sauakari aãxike. Kimaporiã itakaãpotarina.

⁹Ninoa Xesosi tikini ĩkani, iua apisa sikani pakini akiriãpokatanana ipoxokoniritikana imakinikana:

—Peerekari Teoso, Apiananiri. Iua iokanatai pite atemoni. Anirekari erekari isikinii pite. ¹⁰Peerekari Teoso, aãtokirini Tavii aãũite ininiua atokokana iuaĩkana apoka. Peerekari Teoso, iaxiti apiko nopinixiti auakari. Apiananiri itxaua —itxaãpokatanana.

¹¹Xesosi apoka Xerosareë. Teoso misãkiretiko aikotimoni isa. Iuaã ĩroã itxa. Ikinika iroko ãki itikapokota. Iua atoko mapiãpe, ininiã isari Petánia aapokotxitimoni tosi imoianariakorikata.

Piko Mina Marito Pirena

(Mateo 21.18-19)

¹²Ikatimatakasaaki ipotorikana Petánia. Iuusaaki Xesosi natxita. ¹³Ikira atoko atamataro piko mina. Ito otsopa aua. Isari oamoni kariro iuākatiniāro, kotxi piko mina tsopa auakasaaki, ori auapitika. Txamari apokasaaki, otsopanani auari, kotxi kona ori manapini. ¹⁴Ininiā Xesosi: —Kākiti !itximaikaiko piri —itxari piko mina. Imoianariakori kenakotari isākire.

Pirātxi Vētxitakani Omitikiko

(Mateo 21.12-17; 20-22; Arókasi 19.45-48; Xoão 2.13-22)

¹⁵Xesosi imoianariakorikata apoka Xerosareē. Xesosi iroã Teoso misākiretiko aikotiā. Omitikana kākiti iuaātaā amotiitakani, sikatiitakani. Ikapakitikari amesa ninoa txineiro apakapakani amesane. Ikapakitikari kamoā vētxitakani topākini apaka. ¹⁶Iua !auritana kākiti anikiniri tiitxi aiko ipirikoatinina. ¹⁷Xesosi oerekana kākiti iuaā auakani:

—Teoso sākire iōkatsopatakori txari:

Ia naapoko. “Teoso misākiretiko aikoti” akiritaākako, ikini itixiti auakani misākiretinino iġapani, itxa. Txamari hīte txīkitakari ia aiko kiītiririni iomaātiniātaā ininiua —itxa Xesosi.

¹⁸Sasetotxi auīteakori, kaiōkatsoparerini pakini kenakotari Xesosi sākire. Ininiā ninoa tsoriġkaāta. Ixinikaxititana.

—Kanatokopa atxatari Xesosi aōkini? —itxanātana.

Ikinimane iteene apokaerekatari Xesosi sākire, ininiākara sasetotxi auīteakori, kaiōkatsoparerini pakini pīkari Xesosi.

¹⁹Ipiākapokotapeka Xesosi takanapari sitatxi imoianariakorikata.

²⁰Katimatiniġkata kimaporiā isaāpotakasaakina, atamatarona oa piko mina. Opīpe. Okotsapekara ipinakepeta apaka. ²¹Petro xinikari iua apisapanika Xesosi sākire, ininiā akiritari Xesosi:

—Koerekareri, patamataro piko mina. “Kākiti !itximaikaiko piri,” pinakito. Oa piko mina ipīpeka —itxari.

²²Ininiā Xesosi:

—Pauikapiretariko Teoso sākire. ²³Atāoenekara nisāpiretai.

Pauikiniāri Teoso sākire, piposotari pipaniātiniġri ikira ōtanoxiratari: “Pōkitikaua. Pokakataua potxoari uinitimoni.” Pākixinireē iteene

pauikiniári pisākire iaōka apokini, ininiā apokapitikako pamanaākiti.

²⁴Ikara atoko ininiā nota txai hīte, Teoso pimisākiretakasaaki, pamanaākasaakiri pinirekakiti, pauikariko iposope Teoso sikinii, ininiā papakapapanikariko. ²⁵Teoso pimisākiretakasaaki, āti pomanatiniā, pitakanapariko pomanākare. Pimaxinīkaretiniári maerekati ikaminii, ininiā piri iaxitikiri maxinīkaretari maerekati pite kamakiti. ²⁶Pimamaxinīkaretakaniári maerekati āti kamakiti pitemoni, ininiā piri iaxitikiri kona maxinīkaretari maerekati pite kamakiti apaka.

Xesosi Paniātakari Moerekakoni

(Mateo 21.23-27; Arókasi 20.1-8)

²⁷Iuaīkana apokana Xerosareē. Xesosi tīpokota aiko Teoso misākiretiko pirikere āki tinikata. Itīpokonātakasaaki, sasetotxi auīteakori, kaiōkatsoparerini, kiomātxiakori pakini apoka iuamoni.

²⁸Ininiā ninoa txari:

—Kipaniāpa pikamari īkora pikamakiti? Kipa paniātai? — itxarina Xesosi.

²⁹Ininiā Xesosi apakapapiretana:

—Nota apaka pimarauatako hītemoni. Ātinoka nipimaāiko hīte. Hīsāpiretiniāno, nota sāpiretai hīte niokanatakiri uāka apaka.

³⁰Kipa paniātari Xoōni ipatxisarauatini? Teosokani paniātari Xoō? Kākitikani paniātari Xoō? Hīsāpiretano —itxana.

³¹Ininiā ninoa xinikaxitināta. Imisākiretakakana. Ipimaākakana:

—Natokopa itxa aāpakapapiretiniri iua? Aāpakapapiretiniári: “Teoso paniātari iua,” ininiā iua: “Kinirepa kona hāuikatari iuani sākire?” itxapemaua. ³²Aāpakapapiretiniári: “Kākiti paniātari iua,” ikinimane omanataua —itxanātana.

Ninoa pīkari kākiti kotxi ikinimane auikari Xoōni atāo Teoso sākire sāpiretakari ininiua. ³³Ikara atoko ininiā ninoa apakapapiretari Xesosi:

—Ate !imarotari.

Ininiā Xesosi:

—Ikara atoko ininiā, nota !nisāpiretai hīte nipaniātakiri uāka.

Parīkauatakani Maerekani

(Mateo 21.33-46; Arókasi 20.9-19)

12 ¹Eereka Xesosi sāpiretana ninoa sāpirenatxi atāo inakari oerekiko. Itxari:

—Kiki takarauata. Txipokori ova inakoronoka itaka. Ipiriketari. Ikamari ova maōkiko. Iposo atoko itakare apanīkakixitika ikamari aapokotxi axapitiri ōtanori ikikiote imakinetini īkapani. Iposo atoko ipaniātana ātikaka kikiakori itakare inīkatinina īkapani, kotxi iua sariko ōtakoxiti. Ninoa apakapamaroko ipixini ova iparīkana īki. Iposo atoko katakareri sipe. ²Ova manapi, iua katakareri iokanitari initiri ninoa kikiakorimoni ova ipixini apakapini īkapani. ³Txamari iua apokasaaki ninoa maīkari iua. Ixirokitatarina. “Pisipeka,” itxarina. Miketika ikanapiripe.

⁴—Iuaīkana katakareri iokanitari āti initiri ninoamonikana. Txamari ninoa kikiakori misiritari iua. Kai soroā ikiporonakarina, karota itxapirina ikiiā. ⁵Iuaīkana katakareri iokanitari āti ninoamonikana, txamari ninoa okapiri iuani. Kaiāopokori initiriakori iokanata ninoamoni. Apanakini inoropatana. Apanakini okana. Itxaāpotana.

⁶—Iua katakareri auapanika ātinoka iokanadini īkapani, imi iteene itiretakiti. Imapotōkire iokanadari imi ninoamonikana. “Notamoni ninoa paxitariko namarite” itxa. Ininiā imi apoka ninoamoni. ⁷“Katakareri ākiri napani. Maōkari. Aōkiniāri, itakare imakinika kaikotinaua ate,” itxakakana kikiakori.

⁸—Ininiā ninoa maīkari katakareri ākiri, oka itxapirina, kikio xiripire oka itxarina iito.

⁹—Ininiā kiripa ikama katakareri? —itxa Xesosi.

—Iua kanapiriā. Okanako ninoa kikiakori. Ipaniātana apanakini itakare imakinetinina īkapani —itxa Xesosi.

¹⁰Hīte atatsopatapekari ia Teoso sākire iōkatsopatakori:

Aapokotxi kamakani kona nirekari ātika kai soro. Iua kai imanirekakiniti kai apiari itxapekaua. Apanakini kai soro maīkakari itxaua.

¹¹Teosokara txīkitakari ikara atoko inini. Ikara peerekari atemoni, itxa Teoso sākire iōkatsopatakori.

¹²Xoteo auīteakori imarotarina Xesosi sākire. Ninoa imarotari ikamakitina takari makinetakani kamakiti atokokana, ininiā ninoa omanākarauata Xesosi sāpiretakiti xika. Ninoa kinirāo maīkaka itxarina Xesosi, txamari !imaīkarina iua, kotxi ipīkarina kākiti. Ininiā itakanaparina Xesosi, sipe itxana.

Homano Auíte Īkitxitiko

(Mateo 22.15-22; Arókasi 20.19-26)

¹³Eereka Xoteo auíteakori iokanatana ātikaka Erotxi sākire auiaġkani, ātikaka pariseoakori pakini Xesosimoni. Inirekarina Xesosi kerokiniri isākire, kotxi ninoa nirekari Xesosi kaminiri maerekati imaġkinirina ġkapani. ¹⁴Ninoa apokasaaki, imisākiretarina Xesosi:

—Koerekareri, ate imarotari pite sākire atāonani ininiāua. Poerekari atāonani Teoso nireēkiti kākiti kamini ġkapani. !Pipġkari kākiti. Kākiti poiāori pimisākiretini atokokana kākiti apiari pimisākireta apaka. Ikara atoko ininiā, pisāpiretaua. Atāokani txineiro asikini Homanoakori auġtemoni, Sesa inakorimoni? ¹⁵Atāokani asikiniri iuamoni? Apakata amasġkakaniri iuamoni? —itxana.

Xesosi imarotari isākirena. Imarotari ninoa pimarauatini isākire ikerokini ġkapani. !Inirekarina atāo inakari imarotinina. Ininiā Xesosi txana ninoa:

—Kinirepa hātamakaerekatano nota? Himinaro txineirota. Ninirekari natamatiniro —itxa.

¹⁶Ininiā iminarona.

—Kisanōkapa ia? Kiuākapa aua uai? —itxana.

Ininiā ninoa:

—Sesa sanōka, iuāka pakini —itxana.

¹⁷Ininiā Xesosi:

—Ikara atoko ininiā, hġsġkariko Sesamoni iua nakiti. Hġsġkariko Teosomoni iua nakiti —itxana.

Ininiā kasākirena ninoa, kotxi peerekari Xesosi apakapapiretakiti.

Ipġkari Ōkitikiniua Mauġkakoni

(Mateo 22.23-33; Arókasi 20.27-40)

¹⁸Kġkiakori satoseo inakoni, !auġkari kākiti ipġkaripeka iuaġkana ōkitikiniua iuaġkana auāki inini ġkapani. Ninoa satoseo apoka Xesosimoni.

¹⁹—Koerekareri, Moisesini iōkatsopatari ia ipaniātakiti: “Kġki meenetipanika ipininiā, iua itari takaroko tikinitakoro. Iua itari keene ininiā, itakauākatari amarini iua itarini ipġpekarini uāka,” itxa Moisesi. ²⁰Setxi itaritxiakori aua ġkorapokoriti. Apia kiomanetakari takaro sito. Txamari ipġkasaaki meenetopanika itikinitaro. ²¹Ininiā āti itari takaro oakana. Ipġkasaaki !keenepanikaro oa. Iua atokokana

itxape ãti itari. ²²Ininiã imakinikana ninoa takapiimaro oa. Ikinikana ninoa meenenipanika ipïpena. Eereka oanipekana apaka opïpe. ²³Ipïkani ôkitikasaakiua, kiriïtanoropa otxatauako? Kotxi ikinikana setxi takapekaro oa —itxana.

²⁴Ininiã Xesosi:

—Hïte kerokari, kotxi !himarotari Teoso sãkire iôkatsopatakori. Teoso posotiire apaka !himarota. ²⁵Ipïkani iuaïkana ôkitikasaakiua, Teoso nitiriakori iaxitikini atoko itxapekauana. !ïtanorouataikako. ²⁶Hïte !auikari ipïkani ôkitikiniua. Hïte atatsopatapekari Moisesi iôkatsopatakiti aanaia tirinakari pirena. Iuasaaki Teoso misãkiretari Moisesi: “Apraõ, Isaki, Xakoo pakini Teosonekarano nota,” itxari Moisesimoni. ²⁷Ikara atoko ininiã Apraõ, Isaki, Xakoo pakini ôkitikapekua iuaïkana, kotxi auãki inakani Teosonera iua. Kona ipïkani Teosoneni itxaua Teoso. Amananini hïkerokari —itxa Xesosi satoseoakorimoni.

Teoso Paniãtakiti Apiari Akamini

(Mateo 22.34-40)

²⁸Iuaãtaã aua kaiôkatsoparereri. Ikenakotana ninoa misãkiretakiniua. Ikenakotari Xesosi apakapapiretakiti erekari ene. Ininiã iua pimaãri Xesosi:

—Ïkiripa Teoso paniãtakiti apiari txataua? Kipa apiaerekata Teoso nireëkiti akamini?

²⁹Xesosi apakapapiretari:

—Teoso paniãtakiti apiari ia: “Isaeo tïpa auakani, hïkenakota. Ateosone Apiananiri iua. Iuananira Teoso txaua. ³⁰Pitiretariko Apiananiri piTeosone, ikinipoko pinireëkitiã, ikini pãkixinireë, ikinipoko pixinikakitiã, ikini pitaparaxinireë pakini.” ³¹ãTipekana Teoso paniãtakiti apiari ia: “Piteka pitiretiniãua atokotxikana, pitiretariko ãti.” Iuananira Teoso paniãtakiti ipi apiari txaua —itxa Xesosi.

³²Ininiã iua kaiôkatsoparereri apakapapiretari Xesosi:

—Inipitikara pisãkire, koerekareri. !Auari ãti Teoso. Iuanokara auari. ³³Ininiã atiretamariko Teoso ikinipoko anireëkitiã, ikinipoko axinikakitiã, ikini ataparaxinireë. Atiretamanako apanakini aïtoka atiretini atokokana. Ikara Teoso paniãtakiti ipi apiari txaua. Teoso paniãtakiti pirãtxi aïkini iua ïkapani poiãori —itxa Xesosimoni.

³⁴Xesosi kenakotakasaakiri isãkire ereka inini, itxari iua:

—Pite auïtearitari Teoso.

Iposo atoko apanakini !kataparaxinireika apikomoni ipimainirina.

Teoso Mereëkiti Tavii Apika Mekaniri

(Mateo 22.41-46; Arókasi 20.41-44)

³⁵Xesosi Teoso misäkiretiko aikoti oerekaruanätakasaaki, ipimaãri: —Kinirepa kaiökatsoparerini säkire: “Tavii apika mekanirako Teoso mereëkiti txauako?” itxana. ³⁶Erekari Matamatakoti kamasâpirenatakari Tavii:

Apiananiri misäkiretari niauïte: “Nota kikomoni piitopâkiniritika nixipokariko pimokaiakariakori. Nikamariko ninoa pikiti pitakiniätaã atoko ininiua,” Apiananiri txari niauïte, itxa Taviini. ³⁷Tavii akiritari iua Teoso mereëkiti “Niauïte.” Ikara atoko ininiã, natokopa itxa iua Tavii apika mekani ininiua? —itxa Xesosi.

Iuasaaki ikinimane kãkiti iuaã apitiitakaniua potxitari Xesosi säkire.

Kaiökatsoparerini Maerekani Pirena

(Mateo 23.1-36; Arókasi 20.45-47)

³⁸Xesosi oerekaruanätakasaaki, õtäkikana kãkiti:

—Kaiökatsoparerini moianari !hïtxapeua. Ninoa potxitari mäkatxi ereri ieretakinina kãkiti apisatoõ inapinina ïkapani, kãkiti atamatinina ïkapani. Ninoa apokaerekatari imisäkiretikona ipaxitikona nipokori sikikoãtaã inapaãpotakasaakina. ³⁹Ninoa potxitari kãkiti topãkini apiaerekatakari nopini iitopãkinina aiko Xoteo apotiitiniätaãua. Kiiniriã ninoa potxitari kakiiniriteri topãkinimoni iitopãkinina. ⁴⁰Ninoa mixirikari tikinitakoni aapoko, iuaritika okanani imisäkiretarina Teoso kãkiti apisatoõ, ininiã kãkiti uãkatari ninoa erekarini atoko ininiãuana. Teoso iteene misiritanako kãkiti ikara atoko inakani.

Tikinitakoro Matxineiroteto Sikakito

(Arókasi 21.1-4)

⁴¹Xesosi topãka txineiro Teoso ïkapani apakapikoãtaã. Xesosi itikari kãkiti ieretakiniro txineiro kaixa ãki. Itori katxineiroterini okaro txineiro mirikinito kaixa ãki. ⁴²Eereka tikinitakoro matxineiroteto apoka iuaã. Otakaro ipi txineiro otaki kaixa ãki. Poiãonoka txineiro. ⁴³Ininiã Xesosi akiritana imoianariakori.

—Inipitikara nisâpiretai hïte. Õkora tikinitakoro matxineiroteto sikakito apiata. Apanakini sikakito poiãoka. ⁴⁴Kotxi ninoa sikaro

txineiro itetakoro. Oa matxineiro teto sikari okinika onakito —itxa Xesosi.

Teoso Misākiretiko Aikoti Irikiko

(Mateo 24.1-2; Arókasi 21.5-6)

13 ¹Teoso misākiretiko aikoti Xesosi pokĩkasaaki, imoianari misākiretari iua:

—Koerekareri, patamata ia kai aapokotxiti itomaneri. Amaripokori. Ia aiko Teoso misākiretiko peerekari.

²Ininiã Xesosi:

—Hãtamatarari ia aiko mitari. ãti õti imakinika irikaãkako. Kona kai kaikotaikako ãti kai nopini —itxa Xesosi.

Misirikaretxi Apokaenetini

(Mateo 24.3-14; Arókasi 21.7-19)

³Xesosi topãka oxiratari nopini Teoso misākiretiko aikoti apisatoõ. Iuaã aua oriva minanape. Iuasaaki Petro, Txiako, Xoã, ãtree pakini apoka iuamoni. Ninoanoka aua iuaã. ⁴Ipimaãrina Xesosi:

—Kirisaakipa aiko Teoso misākiretiko irikaãka? Natokopa itxa aimarotini ikara õti apisapanika?

⁵Ininiã Xesosi:

—Erepaniko. !Hãuiritapiri apanakini misirienetini hĩte. ⁶Itoipaniriko kãkiti, “Xesosikarano,” inakanipaniko. Ninoa misirienetari kaiãopokori kãkiti. ⁷Neenamatzhi hĩkenakoenetakasaaki, neenamatzhi ene hĩkenakoenetakasaaki, !hĩpĩkarauatape. Ikara auapitikako, iuaritika kona xipokatxi õtipanikani. ⁸ãti uãka neenamauata ãti uãkakata. ãti tixini auakani neenamauatako ãti tixini auakanikata. ãtikaka itixi iakeẽkatakako. Kaiãopokopaniri natxi. Amarini auini tsi atoko itxapaniko.

⁹—Erepaniko hĩte. Himaĩkaãkako, auĩtetximoni hĩsiãkako. Hinoropataãkako aãpitsaã aiko ãki Xoteo apotiitiniãtaãua. Nota sãkire hãuikini xika hĩte anikaãkako poiãori auĩtetximoni. Apiari auĩtetximoni apaka hanikaãkako. Iuasaaki hĩte sãpiretanako ninoa Teoso iokanapirena erekari. ¹⁰Itixi xipokini apisapanika Teoso iokanapirena erekari sãpiretaãkako ikinimanemoni ikini itixitikinimoni. ¹¹Kãkiti maĩkasaakii hĩte, anikasaakii hĩte auĩtetxiakorimoni, !hĩxinikapiri hĩsãkire tĩkane hĩsãkirauatini apisapanika. Hĩsãkirauatakasaaki, iuasaakipeka himarotari hĩsãkire. Erekarari Matamatakoti txĩkitakai iuasaaki hĩsãkire himarotini.

¹²Kākiti sikanapariko atão itariakori auĩtetximoni okiko tĩkane. Iriakoritxi sikanapanako imiakori auĩtetximoni okiko tĩkane. Eenetxiakori omanatana iriakori, inoroakoro pakini. Eenetxiakori xika ninoa okapeẽka. ¹³Nota sãkire hãuikini xika, ikinimane omanatai hĩte, iuaritika himatakanapakaniãri nisãkire hãuikini, hanikaãkako Teoso tixinemoni —itxa Xesosi imoianariakorimoni.

Iteene Maerekanitxi Apokini

(Mateo 24.15-28; Arókasi 21.20-24)

¹⁴Iuaĩkana Xesosi sãpiretana:

—Hĩtikariko Maerekati Apiatakari Teoso misãkiretiko aikoti ãki. Kitxakapirĩka Teoso sãkire sãpiretakari Tanieo inakori sãpiretapekari ikara pirena. (Ininiã hĩte ia atatsopanãtakanii, hĩkenakotariko Xesosi õtãkikiniua.) Maerekati Apiatakari Teoso misãkiretiko aikoti ãki hĩtikasaaki, hĩte Xotẽia tõpa auakanii, himitekapoka mitaxiratarimoni. ¹⁵Iuasaaki hĩte haãpoko nopini auakanii, katima hĩtxako hĩkatxakini. Haãpoko !hĩĩroãpe hĩtii himakatzakini ĩkapani. ¹⁶Hĩte kikio auakanii, !hĩkanapiripe haãpokomoni himãka hãpini ĩkapani. ¹⁷Ikarasaaki !erekapaniri sito kamixiromoni, sito kaxitakakareromoni. ¹⁸Teoso hamanaã himitekini kamoĩsaaki, kotxi himitekini mitaãsaaki !erekari. ¹⁹Iuasaaki atatsiiri auakatapitikako. Ia atatsiiri apiata atatsiitaãkako. Kitxakapirĩka itixi Teoso kamakasaaki kãkiti atatsiirauata poiãoka. Ikara atatsiiri õti apisa kãkiti atatsiirauata poiãoka. Ikara atatsiiri õti napa atoko !ikara atoko inakari atatsiiri !auaikako. ²⁰Teoso mapoiãotakaniãri iua õti kãkiti atatsiirauatini õti, !auaikamako kãkiti. Ikinipekamako ipĩpemanako. Teoso iotokakariko ĩkora atatsiiretxi, imereẽkini mapinakanii ĩkapani.

²¹—Apanakini sãpiretiniãri hĩte: “Xesosi Teoso mereẽkiti ia,” hinikosaaki, !hãuikapiri. “Xesosi Teoso mereẽkiti ikiraãtaã,” hinikosaaki, !hãuikapiri. ²²Kotxi Teoso mereẽkiti minakaniiua apokapitikako, “Xesosikarano nota,” inakari. Apaka apanakini apokapitikako, “Teoso sãkire sãpiretakarikarano nota,” inakari. Paxirari ninoa sãkire. Kãkiti ikara atoko inakanii kamariko posotiiiretxi, kãkiti itikiniri ĩkapani. Ninoa nirekamari Teoso mereẽkini imisirienetinina. ²³Erepaniko. Ikara õti apokini apisapanika nõtãkikai hĩte —itxa Xesosi imoianariakorimoni.

Kākiti Itari Iaxitikiri Kanapiriini

(Mateo 24.29-31; Arókasi 21.25-28)

²⁴—Iua misirikaretxi napa atoko atokatxi iuakapeka. Kasiri liponikaika. ²⁵Iōriki iaxitikero irikako. Ikinipoko kaikori iaxiti auakari ioĩketaākako. ²⁶Iuasaakipekako ikinimane atapariko kākiti itari iaxitikiri apokaāpotini katxiāri āki. Itapararitika apoka. Kaiotximereri itxaua iuasaaki. ²⁷Iuasaaki iokanatana initiriakori iaxitikini itinixitimoni, ipinimoni itinixitimoni, atokatxi pokĩkinimoni, atokatxi ereēkokinimoni. Iokanatana initiriakori ikini itixitimoni kākiti imereēkini apitiitinina ikapani —itxa Xesosi imoianariakorimoni.

Piko Mina Pirena

(Mateo 24.32-35; Arókasi 21.29-33)

²⁸Iuaĩkana Xesosi sākirauata.

—Nisāpiretai sāpirenatxi atāo inakari oerekiko, piko mina pirena, nikanapiriini apiata himarotini ikapani. Pooĩoporipeka onakasaaki, otomorekasaaki, “Kamoĩ apokanapanoka,” hĩtxa. ²⁹Iua atokokana ikara misirikaretxi mixikanani nisāpiretakiti hĩtikasaaki, himarotapekariko nota kaiama kanapirikapeka ninini. ³⁰Ia nisākire atāo. Itixi auakani !ixipoka ikinipoko nisāpiretakiti mapokakani apisa. ³¹Iaxiti xipokapitikako. Īkoraxiti apaka xipokapitikako. Iuaritika nota sākire lixipoka —itxa Xesosi imoianariakorimoni.

Kākiti !Imarotari Xesosi

Apokini Manapi

(Mateo 24.36-44)

³²Iuaĩkana Xesosi sākirauata:

—Kākiti !imarotari ikara ōti manapi apokini. Teoso nitiriakori iaxitikini apaka !imarotari ikara ōti. Nota Teoso ākirikanera !imarotari ikara ōti. Nirinanira, Teosonanira, imarotari.

³³Hĩtapapikariko. Hĩkoatapikako. Teoso himisākiretapikako. Kotxi !himarotari ikara ōti apokini.

³⁴—Nikanapiriākasaaki, kiki ōtako sikari kanapiriini atoko nitxa. Iua kiki potorikasaaki, ipaniātana initiriakori aapoko inĩkatinina. Ikininape isikanapana parĩkatxi ikaminina. Ipaniātari initiri aapoko toreātaā kaikotakari, “Araōkire pitxako,” itxari. ³⁵Nota hĩtari iaxitikiri

iua kiki õtako sikari atoko nitxako. ãtipirika hiãtapapikanoko, kotxi !himarotari nota apokini õti. !Himarotari mapiãtikikauako napoka. !Himarotari apanãkanõkauako napoka. Imaropirãkatauako napoka. ãkanõkapanikauako napoka !himarotapaniri. ³⁶Atxiiti patimari napokini, ininiã hãkoatapikako, mimakatika hinini ãkapani nota apokasaaki. ³⁷Ininiã ãtipirika hiãtapapikanoko. Ikininapemoni apaka ikara nitxa —itxa Xesosi imoianariakorimoni.

Xesosi Okaenetiko Pirena

(Mateo 26.1-5; Arókasi 22.1-2; Xoão 11.45-53)

14 ¹Iuasaaki kãkiti apotiitaua ipi kiiniriti auakasaaki. Pãskoã kiiniriti, pão miãtiãkati nikiko kiiniriti pakini aua. Ipi õti kiiniri potorikini apisapanika sasetotxi auãteakori, kaiõkatsoparerini pakini xinikaxitita:
—Natokopa atxatariko Xesosi amaãkini aõkini ãkapani?
²!Amaãkapaniri kiinirisaaki, kotxi amaãkiniãri, kãkiti naiatamaua eereka —itxanãtana.

Sito Kamariãro Mãkaro

(Mateo 26.6-13; Xoão 12.1-8)

³Xesosi auanãta Petãnia aapokotxiti Simão inakori aapoko. Iua Simão akiritaãka “Maere Matati.” Simão aapoko Xesosi nipokonãtakasaaki, sito apoka. Oa minari kopitipaki kai kamakori, kai arapãstiro inakoro. Kopitipaki ãki aua kamariãro, nato inakoro. Pakaronepokoro. Oãpokasaaki Xesosimoni, opakauanakari kopitipaki. Okitakaro kamariãro Xesosi kiiã. ⁴Iuasaakipeka apanakini iuaã auakani omanãkarauata.

—Kinirepa oioanataãka kamariãro? ⁵Ovẽtxitamaroko, ininiã kaiãopokomaniko txineiro oãpakapamako. Tresẽtosi txineiro ota prata kamakori oãpakamako. Txineiro mauakinitimoni osikiniã erekamariko —itxana.

Iteene ikapatitana. ⁶Ininiã Xesosi:

—Ikara atoko !hãtxapero. !Homanatapero. Erekarì okaminano. ⁷Kãkiti matxineiroteni auapikako hãtekata. Hinirekasaakiriko hãsikaro txineiro ninoamoni. Nota !auari ãtipirika hãtekata. ⁸Oia sito kamari ikinipoko oimarotakiti nota ãkapani. Nipinini apisapanika oina notamoni. Omaritari niõto, niõto iposope inini nikatiko ãkapani. ⁹Atão nisãpiretai hãte. Teoso iokanapirena erekari sãpiretikoãtaã

ikini itixiti, osãpiretaãkako apaka oia sito kitakiniro kamariãro nikiiã, ininiã kãkiti ikini itixiti auakani xinikapikaro oa —itxa Xesosi.

Xotasi Mĩkapiritiniri Xesosi

(Mateo 26.14-16; Arókasi 22.7-16, 21-23; Xoão 13.21-30)

¹⁰Tosi pakini Xesosi moianariakori. Imoianari Xotasi inakori sari sasetotxi auĩteakorimoni. Imisãkiretana ninoa Xesosi imĩkapiritini ĩkapani, ninoamoni isikiniri ĩkapani. ¹¹Ikenakotakasaakirina Xotasi sãkire, ipoxokoniuatana. Isikaenetarona txineiro iuamoni. Eereka Xotasi iãtapari Xesosi imĩkapiritini õti.

Pãskoa Kiiniriti Kamiko

(Mateo 26.17-25; Arókasi 22.7-13)

¹²Pãskoa kiiniriti potorikini õti, soti auĩte anaakori okiko õti, Xesosi moianariakori misãkiretari iua:

—Namonipa pinirekatari Pãskoa kiiniriti akamini?

¹³Ininiã Xesosi iokanatana imoianariakori ipi.

—Hĩsa sitatximoni. Iuaã kiki ãparaã kopitiã anikakari hãpiãkata. Iua kikikata hĩsa. ¹⁴Iua sinimoni kaapokori himisãkireta. Hĩtxariko iua: “Koerekareri nirekari imarotiniri, namonipa erekari imoianariakorikata inipokotini Pãskoa kiiniriti ikamakasaakina?” hĩtxariko. ¹⁵Ininiã iua oerekaiko hĩte itanokiri koa mitapoari. Auapeka kãkiti topãkini. Imakinika oeretapeẽkaika —itxana.

¹⁶Ininiã imoianariakori sari. Sitatxi apokasaakina Xesosi sãkire iaõka aua. Ininiã ninoa kamari nipokori Pãskoa kiiniriti ĩkapani.

¹⁷Ĩkanõkapeka inakasaaki Xesosi apoka tosi imoianariakorikata.

¹⁸Inipokonãtakasaakina, Xesosi txana:

—Atão nisãpiretai. ãti hĩte notakata nipokotakari mĩkapiritanoko nota —itxa.

¹⁹Ininiãkara Xesosi moianariakori matinaniuata. Ipimaãrina Xesosi:

—Notakani atxiĩti?

ãtipekana:

—Notakani atxiĩti?

Ininiã imakinikana ikara atoko itxana. ²⁰Ininiã Xesosi:

—ãtika hĩte notakata auakari mĩkapiritano. Notakata komiri iopitiãtakarikarako sikano nimokaiakariakorimoni. ²¹Nota hĩtari iaxitikiri okaãkako. Teoso sãkire iõkatsopatakori sãpiretpekari

nipinini tīkane. Nota hītari iaxitikiri mīkapiritakari iteene misiritaākako. Erekarariko maponaniākatika inaākamako.

Xesosi Īto, Iarēka Pakini

(Mateo 26.26-30; Arókasi 22.14-23; 1 Korīto 11.23-25)

²²Xesosi imoianariakorikata nipokonātakasaaki, Xesosi kosekari komiri. Imisākiretari Teoso:

—Erekapitikari ia komiri pisikakiti atemoni —itxari.

Imapopeēri komiri, xanaka itxari imoianariakorimoni.

—Apakapa, nika hītako. Ia niīto —itxana.

²³Iposo atoko koseka itxaro iākoanatchi. Imisākiretari Teoso:

—Erekapitikari ia iāriā pisikakiti atemoni.

Ininiā iākoanatchi isikana imoianariakori. Ikinikana iātarina iāriā.

²⁴Ininiā Xesosi:

—Ia niarēka xiketakariko makatxakariko kaiōpokori kākiti maerekani. Teoso sāpiretapekari kākiti ikamaenetakiti amaneri kākiti īkapani. Ia niarēka oerekari kākiti, Teoso kamapekari ikamaenetakiti. ²⁵Atāo nisāpiretai. !Niātaikaroko ovapeē, Teoso auītetxi ininiātaāua nimapokakanisaaki. Iuaā napokasaaki niātari. Amaneri iāriāti niātako —itxa Xesosi.

²⁶Eereka ninoa xikarauata Teoso īkapani. Iua atoko isana oriva mina auiniātaā, oxiratari nopini.

Xesosi Sāpiretari Petro

Kipatiniri Iua

(Mateo 26.31-35; Arókasi 22.31-34; Xoāo 13.36-38)

²⁷Xesosi misākiretana imoianariakori:

—Ia īkanōkati hīkinika hīte takanapanoko nota, kotxi Teoso sākire iōkatsopatakori sāpiretapekari ikara atoko inakari. Itxari:

Nokariko soti auīte piratakari, ininiā ikinika ipiraakori iarikitatoko, itxa Teoso sākire iōkatsopatakori. ²⁸Ininiā eereka nota nipinaāka atoko, iuaīkana nōkitikaākaua atoko, nisako hīte apisa Kariréiamoni —itxa Xesosi.

²⁹Ininiā Petro:

—Nota !nitakanapai pite. Atxiīti ikinimane takanapai, iuaritika kona nota takanapai.

³⁰Ininiā Xesosi:

—Atão nisāpiretai. Ia īkanōkati patari ipikata sākirauatini apisapanikako, ipi āti pakinikata, “!Nimarotari iua,” pitxanoko — itxari Petro.

³¹Petro apakapapiretari itaparaxinireritika:

—Atxiīti pitekata nokaāka, iuaritika kona nota sāpiretari apanakini nimimarotakanii pite.

Ikininape Xesosi moianariakori Petro sākire iaōka ikamana.

Xesosi Misākiretiniri Teoso Xetsémani Inakoriātaā

(Mateo 26.36-46; Arókasi 22.39-46)

³²Xesosi imoianariakorikata apoka ātiātaā kākiti akiritakiti Xetsémani inakoriātaā. Iuaā Xesosi paniātana imoianariakori:

—Uai hītopāka. Teoso nimisākiretako —itxa.

³³Anikari Petro, Txiako, Xoão pakini iuakata apikomoni. Iuaā Xesosi iteene matinaniuata. Maerekaxiniretinoka itxa. ³⁴Ininiā iua:

—Nixinire imaromaxiretari. Iteene nimaxire, ininiā okaaritano.

Uai hīkaikota. Araōkire hītxako —itxana.

³⁵Apikomoni isa. Ipamaka xitimoni, misākireta itxari Teoso.

³⁶Itxari iri:

—Papai, pite posotari ikinipoko pikamini. !Pauritapeno paītiki natatsiirauatini, iuaritika ninirekari pite nirekakiti nikamini. Nota nirekakiti nikamini kona ninireka —itxari iri.

³⁷Eereka ikanapiriā Petro, Txiako, Xoão pakinimoni, txamari ninoa imakanāta. Xesosi akiritari Petro:

—Simão, himakanāta? Kona hīposotatari āti oaranoka hīkoatini?

³⁸Erepaniko. Hinirekasaakiri maerekati hīkamini, !hīkamapiri.

Araōkire hītxako. Himisākiretariko Teoso, ininiā !hīkamari maerekati. Kākiti xinire atxiīti !nirekari maerekati ikamini.

Txamari kākiti īto tapara poiāoka, ininiā ikamari maerekati. Ininiā erepaniko —itxana ninoa.

³⁹Iuaīkana isa Teoso imisākiretini īkapani. Teoso imisākireta, mitxi isākire atokokana itxa. ⁴⁰Iposo atoko ikanapiriā. Txamari iuaīkana ninoa imakanātapanika. !Iposotarina ikoatinina.

Ipētauatana, ininiā !kasākirena.

⁴¹Iuaīkana ikanapiriā Petro, Txiako, Xoão pakinimoni.

—Himakanātapanika? Hītomanātapanika? Iaōpe. Hātapana. Hītari iaxitikiri uatxa sikaākako maerekati kamakanimoni. ⁴²Hōkitikaua.

Masa. Hātapana. Apokaāpota kiki nimīkapiritakiri —itxana.

Xesosi Maïkiko Pirena

(Mateo 26.47-56; Arókasi 22.47-53; Xoão 18.1-11)

43 Xesosi sãkirauanãtakasaaki, Xotasi apoka. Iua Xotasi Xesosi moianarikamara. Iminana ito kiki, saasara mïkani, piriri mïkani. Sasetotxi auïteakori, kaiökatsoparerini, kiomãtxiakori pakini iokanataro Xotasi kikiakorikata Xesosi imaïkinina ïkapani. 44 Xotasi mitxipeka säpiretari kikiakori:

—Nota apitxokakiti Xesosipitkarako iua. Iuasaaki himaïkapekariko. Erepaniko hanikasaakiri, imamitekakani ïkapani —itxa.

45 Xotasi apokasaaki, isakatapitipori Xesosimoni. Akiritari:

—Koerekareri.

Inakasaakipeka apitxoka itxari.

46 Inakasaakipeka kikiakori maïka, anika itxarina Xesosi. 47 Kiki iuasaaki iuaã auakari kosekaro saasara. Iua sauaãkatari sasetotxi auïte apiatakari nitiri. Itsotakakïpitari. 48 Iuasaakipeka Xesosi:

—Hïte ina himaïkinino ïkapani, saasarakata, piririkata. Kiïtiriri atoko hïtxapeno nota himaïkinino. 49 Ikiniötika nota auanãtari hïtekata Teoso misãkiretiko aikoti äki, noerekarauatakasaaki. Iuaã hïte !imaïkano nota, kotxi Teoso sãkire iökatsopatapeëkaika hïte maïkinino kiïtiriri himaïkini atoko —itxana ninoa.

50 Iuasaakipeka ikinika Xesosi moianariakori miteka, asika itxarina iua. 51 Iuasaaki ätokori sari Xesosi tikini. Iua mäka ätinoka aua iïtoã pirikakari. Kikiakori maïkamari iua. 52 Imãkanoka kaikota iuakoãna. Kasarapeka imiteka iua ätokori.

Xesosi Xoteo Auïteakori Apisatoö

(Mateo 26.57-68; Arókasi 22.54a; 63-71; Xoão 18.12-14, 19-24)

53 Ninoa anikari Xesosi sasetotxi auïte apiatakari aapokomoni. Iuaã ikinika sasetotxi auïteakori, kiomãtxiakori, kaiökatsoparerini pakini apotiitaua. 54 Petro ikira atoko isaãpota Xesosi anikakani tikini. Ìroã sasetotxi auïte aapoko piriketakorikä. Iuaã iitopãka sasetotxi auïte apiatakari nitiriakorikata. Iroka xamina tinipoki.

55 Aapokotxi äki sasetotxi auïteakori, ikinika Xoteo auïteakori pakini pimaãna kãkiti:

—Kipa imarotataro maerekati Xesosi kamini?

Ninoa nirekari Xesosi okiko imaerekani xika. Txamari !apokarina imaerekani imarotakani, kotxi !ikamari maerekati. 56 Kaiãopokori kãkiti

sāpiretari maerekati Xesosi kamakiti, txamari paxirari ninoa sākire, kotxi āti sāpiretakiti ipinimoni, āti sāpiretakiti ipinimoni, itxaāpotana.

⁵⁷Apanakini kiki ōkitikaua, sāpireta itxarina ia aāpirena Xesosi ikamapiretinina. ⁵⁸Ninoa:

—Ate kenakotari isāpiretiniri: “Nirikariko ia aiko Teoso misākiretiko aikoti kākiti kamakiti. Ipi āti pakini ōti inakasaaki nikamariko āti aiko kākiti makamakiniti,” itxa isākire.

⁵⁹Txamari ikara sākiretxi āti sāpiretakiti ipinimoni, āti sāpiretakiti ipinimoni, itxaāpota.

⁶⁰Iposo atoko sasetotxi auīte apiatakari tima ikinimane apisatoō. Iua pimaāri Xesosi:

—Kininiāpa na papakapapiretari ninoa sākire? Kixikapa ninoa ikara atoko txanātai? —itxari.

⁶¹Txamari !kasākireri Xesosi. !Apakapapiretari. Ininiā sasetotxi auīte apiatakari iuaīkana pimaāri:

—Pitekani Teoso mereēkiti txataua? Pitekani Teoso ākiri txataua? —itxari.

⁶²Ininiā Xesosi:

—Ari, iua ākiripitikarano. Hātamariko kākiti itari iaxitikiri topākini Kaposotiireri kikomoni. Hātapariko kākiti itari iaxitikiri uai apokaāpotini katxiāri āki —itxa.

⁶³Iuasaakipeka sasetotxi auīte apiatakari matsorākari imāka, kotxi iuākatari Xesosi sākire maerekati ininiua.

—!Anirekaikari Xesosi kamakiti sāpiretakani. Atokopeka. ⁶⁴Kotxi hīte kenakotapekari isākire maerekati, “Teoso ākirirano” inini. Natokopa atxatari iua? —itxana.

Ininiā ninoa apakapapiretari:

—Okaākapitikako —itxarina.

⁶⁵Apanakini kiisokari Xesosi. Mākatxi mataā iapirikarina ikiiā oki manapi imatamatakani ikapani. Iposo atoko iāsokarina.

—Pisāpiretaua, kipa āsokai? —itxarina.

Sasetotxi auīte nitiriakori apaka āsokari iua iuakoāna.

Petro Kipatari Xesosi Imarotini

(Mateo 26.69-75; Arókasi 22.54b-62; Xoão 18.15-18, 25-27)

⁶⁶Iuasaaki Petro ixiti aua aapokotxi piriketakoriki āki. Sasetotxi auīte apiatakari nitero ātokoro apoka iuaā. ⁶⁷Oātamatariki Petro irokanātini xamina tinipoki. Oa mixinitari iua. Ininiā oa:

—Xesosi Nasareekiri moianarikai pite apaka —otxa.

⁶⁸Ininiã:

—Kona, nota !imarotari pisãkire —itxaro.

Iuasaaki pirikere ãronakikoãtaã isari. Iuasaakipeka patari sãkirauata. ⁶⁹Oa sasetotxi auïte nitero atamatari iua iuaã.

—Ere kiki iua moianaripitikara —otxana ninoa Petro takote auakani.

⁷⁰—Kona iuano nota —itxa.

Païtiki ninoa iuaã auakani:

—Iua moianaripitikarai. Pite Kariréiakirikarai. Pisãkireëra ate imarotai —itxarina.

⁷¹Ininiã Petro:

—Nota !imarotari kiki ikara atoko hinanãtakiti. Atãoene nimasãpiretakaniã, Teoso misiritamanoko. Teoso imarotari nota sãkire atãoka nisãpiretinii —itxana.

⁷²Ikara atoko Petro inakasaaki, iuaïkana patari sãkirauata. Ininiã Petro xinikari Xesosi sãpiretakiti iuamoni. “Ipikata patari sãkirauatini apisapanikako, ipi ãti pakinikata, ‘!Nimarotari iua,’ pïtxanoko.” Ikara inakari ixinikasaaki, itxiapata.

Xesosi Pirato Apisatoõ

(Mateo 27.1-2, 11-14; Arókasi 23.1-5; Xoão 18.28-38a)

15 ¹Katimatiníkata sasetotxi auïteakori, kiomãtxiakori, kaiõkatsoparerini, ikinimane Xoteo auïteakorikata xinikaxitinãta. Ipaniãtarina Xesosi iaxirikiko. Iposo atoko anika, sika itxarina Piratomoni. ²Pirato pimaãri Xesosi:

—Pitekani Xoteoakori auïte txataua? —itxari.

Ininiã Xesosi:

—Ari, pisãkire atãopitikara.

³Sasetotxi auïteakori apoiãpotari Xesosi, txamari Xesosi !kasãkireri. ⁴Ininiã Pirato:

—Na papakapapiretari? Ninoa iteene misãkirepiretai —itxari.

⁵Iuaritika Xesosi !apakapapiretari. Ininiã Pirato ãkixinireë:

—Kinirepa kona apakapapiretari? —itxa.

Xesosi Okiko Nirekiko

(Mateo 27.15-26; Arókasi 23.13-25; Xoão 18.38b-19.16)

⁶Pãskoa kiiniriti auakasaaki, Pirato itotari isikakiniri kateia ãki auakari kãkiti nireëkiti. ⁷Iuasaaki Xesosi maïkikosaaki,

Pahapasi inakori aua kateia āki. Iua Pahapasi apanakini kateia āki auakanikata okaniuatapeka Homanoakori inaiatakasaakina. ⁸Pirato sākirauatakasaaki Xesosikata, kākitipokoni apoka Piratomoni.

—Kateia āki auakari pisikaka —itxarina.

⁹Ininiā Pirato pimaāna:

—Hinarekatari nisikakiniri Xoteo auīte hīte īkapani? —itxana.

¹⁰Pirato iteene imarotari sasetotxi auīteakori sikari Xesosi iuamoni Xesosi ixikotinina xika. ¹¹Sasetotxi auīteakori maasakana ninoa iuaā apotiitakaniua:

—Hamanaāri Pirato Pahapasi isikakini īkapani —itxana kākitimoni.

¹²Pirato iuaīkana pimaāna:

—Natokopa nitxtari ia kiki Xoteo auīte inakori? —itxa.

¹³Akiripoakatana:

—Aamina ĩpiriāmitakari nopini hītokakitari —itxana.

¹⁴Ininiā Pirato:

—Kixikapa? Maerekati !ikama —itxa.

Apiata akiripoakatana:

—Aamina ĩpiriāmitakari nopini hītokakitari —itxakatana.

¹⁵Ininiā Pirato sikakari Pahapasi ninoa īkapani, kotxi inirekari ikamapoxokonitina ninoa kākiti. Eereka ipaniātari Xesosi xirokitatiko aāpitsaā. Eereka Pirato paniātari sotatoakori tokakitiniri Xesosi aamina ĩpiriāmitakari nopini.

Sotatoakori Napetiniri Xesosi

(Mateo 27.27-31; Arókasi 22.63-65; Xoão 19.1-3)

¹⁶Ininiā sotatoakori anikari Xesosi Pirato aapoko āki. Akiritarina ikinika sotato. ¹⁷Iposo atoko ieretakarina mākatxi pōkamarari Xesosi ĩtoā. Ikamarina saporīēta kotipiaro kamakori, taka itxarina Xesosi kiiā.

¹⁸—Aāuīte —itxarina Xesosi inapetinina.

—Xoteo auītekai pite —itxarina.

¹⁹Iaritakiitarina aākeē. Ikiisokarina. Ikapotoreēkauana Xesosi apisatoō.

—Aāuīte —itxarina Xesosi inapetinina.

²⁰Inapetakarina atoko imakatzakarina mākatxi pōkamarari. Xesosi māka iuaīkana ieretaka. Eereka anikarina Xesosi aamina ĩpiriāmitakari nopini itokakitinirina īkapani.

Xesosi Tokakitaãka Aamina Īpiriãmitakari Nopini

(Mateo 27.32-44; Arókasi 23.26-43; Xoão 19.17-27)

²¹ Īpixinipokoriti itaõkitarina kiki Simão inakori. Sireni sitatxitikiri iua. Iua anaakori Arexãtri, Hopo pakini. Iuasaaki Simão apoka Xerosareẽ. Sotatoakori paniãtari iua:

—Ia aamina Īpiriãmitakari panikinari —itxana.

²² Anikarina Xesosi ixirataã, Kóokota inakoriãtaã. Xoteo sãkire “Kóokota.” Apanakini akiritari iua oxiratari uãka “Kiitãtãtxi,” inaãka akiritiko. Iuaã apokana. ²³ Isikamarina iãriã pinĩtxikata, miha inakorokata, Xesosi iãtini ĩkapani, itsii imimarotakani ĩkapani, txamari !nirekaro iãtiniro. ²⁴ Ininiã itokakitarina aamina Īpiriãmitakari nopini. Eereka ikamarina sarauatxi, Xesosi mãka apakapakani imarotininina ĩkapani. Ikara atoko apanakini anikari Xesosi mãka. ²⁵ Īkanõkapanika novi oara itokakitapeẽka Xesosi aamina Īpiriãmitakari nopini. ²⁶ Aaminaã auari iõkatakítina, apoĩtiko pirena, “Xoteoakori Auĩte” itxa. ²⁷ Ninoa tokakitana ipi kiĩtiririni apaka aamina Īpiriãmitakari nopini, ikikomoni ãti, isanaremoni ãti. ²⁸ Kitxakapirĩka Teoso sãkire iõkatsopatakori txari:

Okapeẽkako iua, kokaniri okiko atoko inapeẽkako.

Ininiã Xesosi okikosaaki ia Teoso sãkire iõkatsopatakori iaõka auapeka iuasaaki.

²⁹ Ninoa iuaã napakani misãkirepiretapikari Xesosi:

—Kiĩkitei. Pite sãkire: “Nirikariko Teoso misãkiretiko aikoti. Ipi ãti pakini õti inakasaaki nikamari iuaĩkana,” pitxama. ³⁰ Ikara atoko piposotiniã, piteka pimakatxakauako, ininiã pikatxaka aamina Īpiriãmitakariã —itxarina Xesosi inapetinina.

³¹ Sasetotxi auĩteakori, kaiõkatsoparerini pakini napetari Xesosi:

—Iua makananitapekari apanakini. Txamari iuaka !iposotari imkananitinia —itxakakana.

³² —Ikatxakiniãrako ate auikari Teoso mereẽkiti ininiãua.

Ikatxakiniã, aãuikari Isaeo auakani auĩte ininiãua —itxakakana.

Kiĩtiririni iuakata tokakitakoni apaka misãkirepiretari.

Xesosi Īpinini Pirena

(Mateo 27.45-56; Arókasi 23.44-49; Xoão 19.28-30)

³³ Iuasaaki apaniãxiti ipiãka. Ikini itixitika piãka. Ipi ãti pakini oara ipiãka. ³⁴ Ipi ãti pakini oara napa atoko Xesosi akiripoakata:

—Erii, Erii, aremaa sapatatanii —itxa.

Ia atatsopatakari sākireē: “NiTeosone, niTeosone, kinirepa pítakanapano?” itxa.

³⁵Kākiti iuaã auakani kenakotari akirinātini.

—Hikenakota. Akirinātari Eríasi —itxana.

³⁶Iuusaakipeka kiki ina katimariã. Iãkari mapoa atoko inakari iãriã katxioãrimoni, aãke mapotökire taka itxari, sika itxari Xesosi iãtini ikapani.

—Mitxipanikako. Maiãtapari. Atauako Eríasi makatxakatapaniri Xesosi —itxana.

³⁷Xesosi itapararitika akiripoakata, eereka ipípe itxa. ³⁸Iuusaakipeka mãkatxi mata Teoso misãkiretiko aikoti ãki arökakari tsorakita. Itano itsorakita. Ixitipecta apoka. Mitxi iua mãkatxi mata !auritari kãkiti ãroini Teosonani Auini Pakitaãtaã. ³⁹Sotatoakori auíte aua aamina ipiriãmitakari apisatoõ. Ikenakotari Xesosi akiritini. Itikari ipinini.

—Atãopitikara Teoso ãkiri itxaua ia kiki —itxa.

⁴⁰ãTokaka sitoakoro ikira atoko atamanãtarina Xesosi, Maria Matarenama, Saromeema, ãto Mariama, apanakini sitoakorokata. Xosesi, Txiako pakini inoro oa Maria. Iua Txiako maneripanika inakari. ⁴¹Xesosi Kariréia auakasaaki, ninoa sitoakoro moianatari iua. Imiparĩkatarina. Xesosi ipĩkasaakikanera apanakini sitoakoro kaiãopokoro aua iuaãtaã. Ninoa apoka Xerosareẽ Xesosikata.

Xesosi Ikatiko Pirena

(Mateo 27.57-61; Arökasi 23.50-56; Xoão 19.38-42)

⁴²Ikara õti, Xesosi ipinini õti, kãkiti parĩkauatini õti, kãkiti tomatini õti apisapanika, iuusaaki kikatatikipeka. ⁴³Iuusaaki Xosee inakori, Arimateia sitatxitikiri, sari Piratomoni. Iua Xosee Xoteo auíte apanakinikata. Ikinimane paxitari iua. Iua apaka iãtapari Teoso ikinimane auíte ininiua õti apokini. Itaparaxinireritika Piratomoni isa, amanaã itxari Xesosi ãto. ⁴⁴Ininiã Pirato ãkixinireẽ:

—Atauako patimari Xesosi ipinini? —itxa.

Ininiã ipĩkapiretari sotatoakori auíte. Iua apokasaaki Pirato pimaãri:

—Atauako Xesosi ipĩpeka? —itxa.

⁴⁵Ininiã iua:

—Ari, ipinapitipeka —itxari.

Ininiã Pirato:

—Panikaikari iito —itxari Xoseemoni.

⁴⁶Iuasaaki Xosee amotari mākatxi mata erekari, arínio inakori. Eereka imaktxakari Xesosi ito. Iapirikari iito mākatxi mataã, anika itxari akauari irikomoni. Kai kisakakori āki ieretakari Xesosi ito. Eereka kai mitapoari ikatika, tota itxari iriko. ⁴⁷Ipi Maria itikanātari Xesosi ito takikoãtaã, Maria Matarenama, Maria, Xosesi inakori inoroma pakini.

Xesosi Iuaĩkana Auāki Inini

(Mateo 28.1-8; Arókasi 24.1-12; Xoão 20.1-10)

16 ¹Tomatiko õti xipoka atoko mapiānikata, ipi āto pakini sito amotaro kamariāro, Xesosi ito ikamamaritinina ĩkapani, Maria Matarenama, Saromeema, Maria Txiako inoroma pakini. ²Katimatinĩkata, tomĩkosaaki, ĩkanõkapanika, atokatxi pokĩkasaaki, ninoa sari akauarimoni. ³Kimaporiā isikasaakina, isākirauaāpotana: —Kipa makatxakinaua kai auĩte iriko tore? —itxaāpotana. Amaripokori iua kai. ⁴Iuaã apokasaakina, atamatarina. Kai maktxakapeẽkaika. ⁵Ininiã ĩroãna iriko āki. Atamatarina ātokori topākanāta ikikomoni. Imāka ĩtanori, kasarori. Ininiã ninoa tikoka.

⁶Ininiã iua:

—!Hĩtikokape. Hĩte nitanātari Xesosi Nasareekiri, aamina ĩpiriāmitakari nopini tokakitakori. Ōkitikapekua iua. !Auaika uai. Hātamata. Mitxi itakarina iito uai. ⁷Hĩsipeka. Hĩsāpiretari Petro, apanakini Xesosi moianariakori pakini: “Xesosi sapanikako hĩte apisa Kariréiamoni. Iuaã hĩte aõkitari iua, kotxi ipinaka apisapanika isāpiretapekari ikara hĩtemoni,” —itxana ninoa.

⁸Itimaritikana ninoa pokĩka. Imitekana. Ikikinanakana, ipĩkarena xika. !Isāpiretarina apanakini, kotxi ipĩkarauatana.

Xesosi Oerekaua Maria Matarenamoni

(Mateo 28.9-10; Xoão 20.11-18)

⁹Xesosi õkitikasaakia ipinaka atoko ĩkanõkapanika semana potorikini õti, tomĩkosaaki, oerekaua merepitipanika Maria Matarenamoni. Mitxipe Xesosi aõkitakasaakiro oa Maria, omitikari maerekani matamatakoni setxi pakini oa itoã auakani.

¹⁰Xesosi õkitikasaakia, iua oaõkitaka atoko, osari merepanika Xesosi moianariakorimoni. Iuasaaki iteene imatinaniuatana. Itxiapanātana. Osāpiretana ninoa:

¹¹—Xesosi iuaĩkana auāki itxapeka. Nota aõkitari iua —otxana. Txamari ninoa kona auikari osākire.

Xesosi Oerekaua Ipi Imoianariakorimoni

(Arókasi 24.13-35)

¹²Eereka iuaka oerekaua ipi imoianariakorimoni, kimaporiã isikasaakina aapokotxi mauakaniãtaã. Iuasaaki itoõ ipinipo itxa.
¹³Eereka ninoa kanapiriã. Isãpiretana apanakini imoianariakori, txamari !auikarina isãkirena.

Xesosi Oerekaua Imoianariakorimoni

(Mateo 28.16-20; Arókasi 24.36-49; Xoão 20.19-23)

¹⁴Eereka Xesosi oerekaua õsi imoianariakorimoni inipokotakasaakina. Xesosi õtãkikana:

—Kinirepa hïte !auikatari nota iuaïkana auãki ninini? Kinirepa !hãuikatari nota aõkitakani sãkire? !Kaiokakarekii —itxa.

¹⁵Iposo atoko Xesosi txana:

—Ikini itixiti hïsako. Hïsapiretariko Teoso iokanapirena erekari ikinimanemoni. ¹⁶Teoso sãkire auiaãkari patxisatakori, iuarako sari Teoso tixinemoni. Teoso sãkire mauikakati, Teoso misiritapikariko. ¹⁷Teoso sikaposotiiretanako isãkire auiaãkani, ininiã apanakini imarotari Teosokara sikari iposotiire ninoamoni. Ia atoko Teoso sikaposotiiretana. Omitikarina maerekani matamatakoni nota uãkaã. Isãkirauatana imimarotakinitina sãkiretxitiã.

¹⁸Imaïkiniãrina imini, !lipinana. Iãtiniãrina ikianari, !amianatana. !Ipinana. Itakauakotaua amianatakani nopini, ininiã amianatakani makananitaãka —itxa Xesosi sãkire.

Xesosi Anikaãka Teoso Tixinemoni

(Arókasi 24.50-53; Átosi 1.6-11)

¹⁹Imoianariakori imisãkiretanapaka atoko, Xesosi anikaãka Teoso tixinemoni. Iuaã iua topãka Teoso kikomoni. ²⁰Xesosi moianariakori eereka isipekana, Teoso sãkire ikini aapokotxiti auakani isãpiretinina ïkapani. Apiananiri moianatana. Apiananiri sikaposotiiretana ninoa, ininiã apanakini imarotari ninoa sãpiretakiti atão inini. Ameẽ.

ARÓKASI

Arókasi Iőkatsopata Teópiromoni

1 ¹Nota Arókasi iőkatsopata pite Teópiromoni. Iteene nipaxitai. Kákiti ito iőkatsopatapekari ikinipoko Xesosi kamakiti Xoteoakori sauaki auakasaaki. ²Ninoa, nota pakini imarotari ikinipoko Xesosi kamakiti, kotxi Xesosi kamakiti atamatakani, isákire oerekakani, sápiretapekaua ate. ³Nota apaka apaiaőkapekari ikinipoko Xesosi sákire, ikamakiti pakini. Ininiã nota apokaerekatari ikinipoko Xesosi pirena niőkatsopatini pite Teópiromoni. Merepitipanika ikamakiti nisápiretai. Ininiã eereka ikamakiti nisápiretai. Ininiã eereka ikamakiti nisápiretai, nitxaãpotako. ⁴Koerekarerini oerekapekai Xesosi pirena, ininiã uatxa pimarotari ninoa oerekakiti atão inini.

Xoão Kapatxisareri Iponaniini Sápiretiko

⁵Errotxi inakori Xoteoakori auíte inakasaakiua Xotéia tōpa, iuasaaki auanãta sasetotxi Sakaria inakori. Sakaria auíte, apanakini sasetotxiakori auíte apaka, Apia inakori. Sakaria tanoro ouãka Isapeo otxaua. Oĩri, oãtokiri, oãtokiri iri imakinikana sasetotxi itxauana. Oãtokiri kitxakapirĩkari Moisesi itari Arão inakori. Iua apaka sasetotxi itxaua. ⁶Teoso nirekaãkitinanira ikamana Sakaria, Isapeo pakini. Ninoa kamari ikinipoko iua paniãtakiti, Apiananiri paniãtakiti. Atão inakarinoka ikamana. !Ikerokarina ikamakitina. ⁷Txamari !keenena. Isapeo !oposotari kamixi onini. Iuasaaki ikiomaneẽpekana. ⁸Áti õti Sakaria, apanakini sasetotxiakorikata, parĩkauanãta Teoso misákiretiko aikoti ãki. Iuasaaki ninoatene iuaã parĩkauata. ⁹Sasetotxiakori itotari sasetotxi imereinina Apiananiri misákiretiko

aikoti ñroini kamariãro arikini ñkapani, ininiã iuasaaki ninoa mereëri Sakaria. Ininiã iua ñroã. ¹⁰Sakaria aiko ãki kamariãro arikanãtakasaaki, mapara kãkiti apotiitakaniua misãkiretari Teoso.

¹¹Iuasaakipeka Teoso nitiri iaxitikiri tokiã Sakariamoni kamariãro arikikoãtaã takote. ¹²Sakaria atamatakasaakiri, itikoãkata, pñkarauata itxa. ¹³Teoso nitiri misãkiretari iua:

—Sakaria, kona pipñkarauatape. Teoso sikapitikaiko pamanaãkiti. Ininiã pñtanoro Isapeo keenepitikaroko. Pitakauãkatariko pamarite Xoão. ¹⁴Iua auakasaaki ikamapoxokonitaiko pite, itori kãkiti apaka. ¹⁵Apiananirimoni apiari itxauako iua Xoão. Kona Xoão iãtapaniroko kapoãro. Erekar Matamatakoti auariko iua ãkixinireë. Inoro irokota ãkipanika auakasaaki, Erekar Matamatakoti auako iua ãkixinireë. ¹⁶Iua Xoão anikanako itomaneri kãkiti Isaeo auakani Teosomoni. Apiananirimoni iua anikana. Ininiã iuaikana ninoa kanapiriã iTeosonemonina, isãkire auikinina ñkapani. ¹⁷Xoão apokako Apiananiri apokini apisapanika. Erekar Matamatakoti sikataparatarari Erãsi kitxakapiriãka. Iuatxikana Erekar Matamatakoti sikataparatariko Xoão. Ikara atoko ininiã, iua oerekariko irñxi iuaikana amaritena itiretinina ñkapani. Iua Xoão oerekariko kãkiti Teoso paniãtakiti makamakani, imaerekanina itakanapinina, erekarinoka ikaminina ñkapani. Paimatirenako ninoa iuasaakiko. Iua Xoão oerekariko kãkiti iposope ininina Apiananiri apokini apisapanika —itxa Teoso nitiri Sakariamoni.

¹⁸Ininiã Sakaria pimaãri:

—Kiãtokopa nitxa uatxa keenepeka ninini, kotxi nota, nñtanoro apaka kiomaneëpeka —itxa.

¹⁹Teoso nitiri apakapipireta:

—Niuãka Kapirio. Nota auari Teosokata ipaniãtakiti nikamini ñkapani. Teoso iokanatanano pitemoni pite nimisãkiretini ñkapani, ia erekar piarena nimanapiretini ñkapani. ²⁰Txamari na pauikari nisãpiretakiti. Ia xika !kasãkireikaiko, kotxi nisãpiretakiti atãopitika. Teoso sikaenetakiti apokapitikako. Apokasaaki, pimarotariko nisãkire atão ininiua. Iuasaakiikarako piposotari pisãkirauatini —itxa Teoso nitiri Sakariamoni.

²¹Iuasaaki kãkiti mapara auakani iãtapanãtari Sakaria.

—Kiripa ikamanãta Sakaria aiko ãki? !Katimari —itxanãtana.

²²Ipokĩkasaaki !kasãkireikari. Ninoa kãkiti imarotari Teoso misãkiretiniri iua aiko ãki itaponeë, kotxi !kasãkireikari. Iuakoãnokara imisãkiretana ninoa.

23 Mapaõti iparĩka xipoka atoko aapokomoni isipeka. 24 Eereka Isapeo kamixipeka otxa. Onapari ipi ipi ãti pakini kasiriti oaãpoko. !Osari ãtiãtaã.

25—Apiananiri sikano namarite. Erekarı ikaminano notamoni. Uatxa !nipẽtauataıka kãkiti apisatoõ. Keenepekano —otxa.

Kapirıeo İokanataãka Mariamoni

26 Isapeo seisi pakini kasiriti kamixi onakasaaki Teoso İokanatarı inıtiri İaxıtıkiri Kapirıeo Nasaree sıtatxıtımonı, Karırıea tãpamoni. 27 İuaã İokanatarı İua ãtokoromoni Maria İnakoromoni. Oa kona sırĩkapanıka kıkıkata. Osãpiretapekarı ãtokori Xosee İnakori İuakata oĩtanırıuatını İkapanı. Xosee atokiri kıtıxakapırĩka Xoteoakori auĩte Tavii İnakori. 28 Teoso nitiri apokasaaki oamoni, akıritaro Maria: —Ereẽkai. Apiananiri pitekata aua. İua mereẽi pite. İtoro sıtoakoro İkini İtıxıtı aua, İuarıtıka pıtenanırako Teoso sıka İteene erekarı —İtxaro oa.

29 Maria pĩkarauata Teoso nitiri sãkire okenakotakasaaki.

—Kınırepa İkara atoko İtxa sãkireta? —otxa oãkıxınıreẽ.

30 Teoso nitiri txaro:

—!Pıpĩkarauatape, Maria. Teoso apokaerekataı pite.

31 Pımıxıuatako, keene pıtıxako. Pıtakauãkatarıko pamarıte Xesosi. 32 İua Apıatakari İtxauako. Apiananiri ãkiri akırıtãkako. Teoso Apiananiri kamarıko İua auĩtetxı İnıniãua. Kıtıxakapırĩka Xoteoakori auĩte Tavııni. Tavııni auĩtetxı İnıniua atokokana, Teoso txıkitakarıko Xesosi Xoteoakori auĩte İnıniua. 33 ãtıpirıka Xoteoakori auĩte, Xakoonı apıko mekanırıakori auĩte, İtxauako. İua auĩtetxı İnıniua İxıpoka —İtxaro oa.

34 İnıniã oa:

—Kıãtokopa nıtıxa kıkıkata masırĩkatokano, keenepe nınını? —otxa.

35 Teoso nitiri apakapıretaro:

—Erekarı Matamatakoti apokako pãkıxınıreẽ. Apiananiri posotııre ãkıtãıko pite, İnıniã amarını auakarı Teoso ãkiri akırıtãkako.

36 Pınoromane Isapeo kıomãtxıpe, İuarıtıka kamıxıro oa. Kãkıtı sãkırıema: “!Oposotaıkarı kamıxı onını” İuarıtıka seisi pakını kasırıtıpe kamıxı onını. 37 Kotxı Teoso posotarı İkınıpoko İkamını —İtxaro oa.

38—Nıkamapıtıkarıko Apiananiri nırekaãkıtı. Pısãpiretakıtı İaõka nınırekapıtıka —otxa Maria.

İuasaakıpeka Teoso nitiri sıpeka.

Maria Isapeomoni Motikini

³⁹Mapaõti napa atoko Maria katimariã sari oxiratarimoni, Xotéia tõpamoni. Iuaã osari sitatximoni. ⁴⁰Oïroã Sakaria aapoko. Oãkiritaro Isapeo:

—Ereëkai —otxa.

⁴¹Isapeo kenakotakasaakiri Maria akiritiniro oa, iusaaki amarini otikakoãkiri oãkika. Iusaakipeka Erekar Matamatakoti itapararitika apoka Isapeo ãkixinireë. ⁴²Iusaaki otapararitika otxaro Maria:

—Kaiãopokoro sito itixi auakani, uaritika pitenokara Teoso sika apia erekari. Apaka Teoso sikariko erekari pamaritemoni.

⁴³Erekar Teoso kaminano nota, kotxi niauïte inoro motikaëitano. Kinirepa ia erekari Teoso kaminano, kotxi nota minakato nitxaua.

⁴⁴Nikenakotakasaakiri “Ereëkai” pininino, namarite nitikakoãkiri oãkika, ipoxokoniuatiniã. ⁴⁵Teoso sikari erekari pitemoni, kotxi pite auikari isãkire. Pite auikari isikaenetakiti atão isikinii —otxa Isapeo Mariamoni.

Maria Xikaretakiti

⁴⁶Maria txari:

“Erekapitikari Apiananiri notamonikari.

⁴⁷Nipoxokoniuaata, kotxi Teoso nimaerekani makatxaãkari itxaua.

⁴⁸Nipoxokoniuaata, kotxi ixinikano nota. Initero poiãoro nitxaua. Ìkorakanani eereka auakani kãkiti txanoko: “Teoso kamapoxokonitaro, erekari isikiniro,” txanoko nota.

⁴⁹Nipoxokoniuaata, kotxi Teoso Apiananiri kaminano posotiiretxi. Maerekati !uari iuamoni.

⁵⁰Iua amonikari kãkiti iua paxitakani, kitxakapirĩkarini, ìkorakanani auakani, eereka auakani apaka iamoniãka.

⁵¹Pataparari iua, ininiã ikamari posotiiretxi. Teoso txĩkitakana kãkiti iuikakaniua minakani ininiãuana, kotxi ãkixinireë iuikauana.

⁵²Teoso makatxakapekari auïtetxi pataparari inakaniua. Eereka auïtetxi !itxaikauana ninoa. Kãkiti poiãorini inakaniua Teoso kamari auïtetxi ininiãuana.

⁵³Isikakienatari natxitakani. Iokanatari katxineiroteri sini. Kona xatiki isikari iuamoni.

⁵⁴Imoianatapekana Xoteoakori, iua ĩkapani parĩkauatakani.
!Imaxinĩkaretari iamoniĩkinina ninoa.

⁵⁵Kitxakapirĩka Teoso xinikari Apraãoni iamoniĩkini. Apaka
iua tikini auakani ātipirika iamoniĩka, kotxi: ‘Nimoianataiko
hĩte,’ itxa anirimanemoni kitxakapirĩkarinimoni,”

otxa Maria.

⁵⁶Okaikota ipi, āti pakini kasiriti Isapeokata. Eereka
oaãpokomoni kanapiriã otxa Maria.

Hoão Kapatxisareri Iponaniini

⁵⁷Amarini auini õti apopeka. Isapeo auãkitakari amarini kiki.

⁵⁸Oaãpoko takote auakani, onirimane pakini kenakotari erekari Teoso
kaminaro oa, ininiã ninoa, Isapeo pakini poxokopeka itxana ninoa.

⁵⁹Oito õtisaaki, onirimane motika oamoni, Teoso takaõtxikare
amarinimoni itakinina ĩkapani. Inirekarina iuãka Sakaria
itakauãkatinirina, kotxi iri uãkatxikana ninoa nireka
itakauãkatinirina. ⁶⁰Txamari inoro:

—Kona Sakariani iuãka. Hoãorako akiritaãkako —otxa.

⁶¹Ininiã ninoa txaro:

—Pinirimane ātika kona Hoão txa uãkataua.

⁶²Ninoa pimaãri amarini iri Sakaria iuakoãna amarini uãka
inirekaãkiti. ⁶³Ininiã Sakaria amanaãri iõkatsopatiko. Iõkatari:

“Imi uãka Hoão.” Ininiã ikinimane tsoriĩkaãta. ⁶⁴Iuasaakipeka Teoso
sikaposotiiretari isãkirauatini:

—Peerekari Teoso —itxa Sakaria.

⁶⁵Kãkiti iua aapoko takote auakani pĩkarauata. Teoso posotiire
ipĩkana. Ikara inakariene Sakaria, Hoão pakini pirena iaripireta
oxirataru Xotẽia tõpa, ininiã kãkiti iuaãtaã sãpirenauanãta ikara
pirena. ⁶⁶Kãkiti ikara inakariene kenakotakani tsoriĩkaãta:

—Kanatokopa inakaripa itxatapaniua ia amarini? —itxana.

Ikinimane imarotari Apiananiri nĩkatiniri iua amarini.

Sakaria Xikaretakiti

⁶⁷Iuasaaki Erekari Matamatakoti sikaposotiiretari Hoão iri
Sakaria, ininiã Sakaria sãpiretari Teoso sãkire:

⁶⁸“Peerekari Apiananiri aTeosone, ikinimane Xoteoakori
Teosone, kotxi iua apoka inakitiakorimoni imakatzakinina
ĩkapani, imapinakanina ĩkapani.

- 69 Teoso iokanatari kākiti maerekani makatxakakari kaposotiireri atemoni. Teoso nitiri Taviini mekanirira iua.
- 70 Kitxakapirīka Teoso sākire sāpiretakani erekarini sāpiretari ikara Teoso sākire.
- 71 Teoso txari: ‘Nimakatxakaiko hīte himokaiakari mokakanii tīkane, homanatakini mokakanii tīkane.’
- 72 Isāpiretari aātokiriakorini kitxakapirīkarini: ‘Niamonīkai. Nikamariko nikamaenetakiti hīte īkapani,’ itxa ninoamoni. Ikara Teoso kamaenetakiti erekari.
- 73 Kitxakapirīka Teoso txari aātokiri Apraāoni: ‘Kona nimaxinīkaretari nisikaenetakiti.
- 74 Nimakatxakapitikaiko hīte himokaiakari mokakanii tīkane, ininiā hīparīkauata nota īkapani mapīkaretika.
- 75 Ininiā hīte auini erekari. Kona hīkamari maerekati hāuapanika hinakasaaki,’ Teoso txari Apraāoni.
- 76 Pitepekana namarite Xoão, Teoso sākire sāpiretakari pitxauako. Teoso Apiananiri iaxitikiri sākire sāpiretakari pitxauako. Pite sari Apiananiri apisa. Ikinika pimaiamatako iua apokini apisa, ikinika iposope inini īkapani.
- 77 Pisāpiretariko kākiti Teoso nakitiakori, Teoso makatxakiniri maerekanitxi kākiti kamakiti. Ininiā ninoa imarotariko ikara.
- 78 Katiraōkiri aTeosone. Kaamonīkareri iua. Ininiā iua tixinekiri apokako atemoni. Atokatxi pokīkini atoko itxako. Iuasaaki ipiā !auaika, kotxi iua makatxakari amaerekani.
- 79 Ininiā iua iopinikari kākiti xinire, ipinini pīkakani xinire. Ipiaā auakani atoko ninoa. Ininiā iua iopinikari axinire Teoso kimapore aimarotini īkapani, aūuni ereka inini īkapani.”

Itxa Sakaria xikare.

80 Iua amarini aneē. Teoso sākire iaōka ikamapika. Teoso sākire Xoteoakorimoni imasāpiretakani apisapanika āparaā makipakaniātaā aua Xoão.

Xesosi Iponaniini Pirena

(Mateo 1.1-25)

2 1 Iuasaaki Homanoakori auīte Sesa Akósito inakori. Iua paniātana initiriakori iaōtiniri ikininape kākiti iua auītetxi ininiātaāua tōpa auakani, ikini aapokotxitikini uāka imakatxakini

ĭkapani. ²Mitxi Sesa Akósito !ikamapanikari kākiti iaōtiko. Iuasaaki Sória tixini auakani auíte Sirénio inakori. ³Iuasaaki ikinimane sari sitatximoni iponaniiniātaāna. Iuaā isikarina iuākana.

⁴Ininiā Xosee apaka sari iuāka isikini ĭkapani. Ininiā ipotorika Nasaree sitatxiti Kariréia tōpa. Xotéia tōpamoni isa, Pereē sitatxitimoni. Iuaā isa, kotxi iuaā auítetxi Taviini kitxakapirĭka aua. Taviini nirimane itxaua Xosee. ⁵Isa Mariakata. Ĩtanoro tĭkane oa. Iuasaaki !itakapanikaro. Kamixipeka otxa iuasaaki. ⁶Pereē apoka itxana. Iuaā auakasaakina, aua itxa amarini. ⁷Oāuākitakari merepitipanika oimi kiki. Ininiā mākatxi mataā oiapirikari, pirātxi nipokotini tiitxitiā taka otxari amarini, kotxi kākiti imakanakiniātaā imakinika xāpokapeka, ininiā ninoa auanāta pirātxi auiniātaā.

Soti Auíte Piratakani Pirena

⁸Iuaātaā Pereē sitatxiti mapotōkire ĭkanōka kikiakori soti auíte piratakani nĭkanātari ipiraakorina. ⁹Iuasaaki katimaritika Apiananiri nitiri iaxitikiri tokiā ninoamoni. Iuasaaki Apiananiri iotximere iopinikari ninoa auiniātaā, ininiā imarotarina Teoso apokini iuaātaā. Ininiā iteene ipĭkarauatana ninoa. ¹⁰Ininiā Teoso nitiri txana ninoa:

—!Hĭpĭkarauatape. Nota minapiretari erekari pirena ikinimane kākiti enenĭkini ĭkapani, ¹¹kotxi ia ōti kākiti maerekani makatxaākari iponaniāpeka Taviini auini sitatxitiā. Iua Teoso mereĕkiti. Apiananiri iua. ¹²Himarotariko nisākire atāo inini, kotxi hāpokariko ia amarini mākatxi mataā iapirikiko pirātxi nikini tiitxitiā —Teoso nitiri txana ninoa.

¹³Iuasaakipeka itomaneri Teoso nitiriakori iaxitikini tokiā iuaātaā. Ninoa xikarauata Teoso ĭkapani. ¹⁴Ixikaretarina:

—Peerekari Teoso, iaxiti apiko nopinixiti auakari. Iua kamaerekaxiniretari kākiti iua apokaerekatakini —itxana ixikarena.

¹⁵Teoso nitiriakori kanapiriā itxana Teoso tixinemoni. Iuasaaki ninoa pirātxi nĭkatakani misākiretakakaua:

—Masa Pereēmoni. Maātamatari ikara Apiananiri sāpiretakiti —itxana.

¹⁶Ininiā katimaritika isana Pereēmoni. Iuaā apokasaakina, initarina amarini. Apokana Xosee, Maria pakini. Ininiā atamatarina amarini pirātxi nikini tiitxitiā. ¹⁷Ikara atamataākana atoko, isāpirenātarina Teoso nitiri sāpiretakiti amarini pirena ikinimanemoni. ¹⁸Kākiti kenakotakasaakiri soti auíte nĭkatakani sāpiretakiti, ikinimane tsorĭkaāta iuasaaki. ¹⁹Maria kenakotakasaakiri soti auíte nĭkatakani

sāpiretakiti, oa ākixinireē onīkatari ikara ene. !Omaxinīkaretari ninoa sāpiretakiti. Oxinīkapikari. ²⁰Eereka pirātxi nīkatakani kanapiriā ipiraakori auinimoni. Imisākiretakakana:

—Peerekari Teoso. Apiananiri iua, kotxi erekapitikari aītikakiti. Erekapitikari initiri iaxitikiri sāpiretakiti. Isāpiretakiti atāopitika, kotxi aātamatarī isāpiretakiti iaōka —itxanātana ninoa soti auīte nīkatakani.

Xesosi Takauākatiko

²¹Xesosi oito ōti auakasaaki, inirimane kamari Teoso takaōtxikare iītoā. Iuasaaki inirimane takauākatari Xesosi, kotxi iua iaōka Teoso nitiri iaxitikiri sāpiretapekaro Maria oa kamixi oinini apisapanika.

Xesosi Anikiko Teoso Misākiretiko Aikotimoni

²²Moisesini ketotiniri manapi Xosee, Maria pakini kamari Moisesini paniātakiti iaōka amarini auakasaaki, Xosee, Maria pakini maerekani Teoso makatxakini īkapani. Ikara xipoka atoko anikarina Xesosi Xerosareē sitatxītīmōni Apiananirīmōni isikinirina īkapani, ²³kotxi Apiananiri paniātakiti iōkatsopatakori txari:

Merepitipanika iponaniākari sikaākako Teosomoni, kotxi Teoso nakiti iua.

²⁴Apaka Apiananiri paniātakiti iōkatsopatakori txari:

Amarini iponaniākasaaki, ipi kamoā pisika Teosomoni.

Iminakaniā, ipi kamoā ākiri pisika Teosomoni, itxa Teoso. Ininiā Xosee, Maria pakini sari Xerosareē kamoā isikinina īkapani.

²⁵Iuasaaki kiki Simiāo inakori aua Xerosareē. Iua erekari kamakari. Ikinipoko Teoso paniātakiti ikama. Erekari Matamatakoti auari ākixinireē. Ākixinireē iātapanātapikari Teoso Mereēkiti apokini, kotxi Isaeo auakani maerekani makatxaākari itxaua. ²⁶Erekari Matamatakoti sāpiretapekari iua: “Pipinini apisa paōkitapanikariko Apiananiri Mereēkiti,” itxari Simiāo. ²⁷Erekari Matamatakoti sikanireōtari Simiāo aiko Teoso misākiretiko aikoti iroini. Iuasaaki Xosee, Maria pakini iroā iuaātaā, Apiananirīmōni Xesosi isikinina īkapani, Teoso paniātakiti ikaminina īkapani.

²⁸Iuasaakipeka Simiāo apakapari Xesosi:

—Peerekari Teoso. ²⁹Niauīte Apiananiri, uatxa apokapeka ia amarini pisikaenetakiti. Nota pite īkapani parīkauatarino. Uatxa niposotari nipinini erekaxinirepeka ninini, ³⁰kotxi nota atamatarī ia amarini

piokanatakiti atemoni, amaerekani imaktxakini ĩkapani, amapinakani ĩkapani. ³¹Pite iokanatapekari ia ĩkorapokoriti ikini itixiti auakani maerekani imaktxakini ĩkapani. ³²Ia amarini tirikapi atoko, kotxi iopinikariko pikimapore, pisãkire Xoteo minakaniua imarotini ĩkapani. Ia amarini tirikapi apiatakari atoko Xoteoakorimoni pinakitiakorimoni, kotxi oerekai pite ninoamoni —itxa Simião sãkire Teosomoni.

³³Xosee, Xesosi inoro apaka tsorĩkaãnãta ikara Simião sãkire ikenakotakasaakina. ³⁴Simião amanaãri Teoso ikinipoko erekari ninoamoni isikini ĩkapani. Eereka imisãkiretaro Maria, Xesosi inoro:

—Teoso mereãri ia amarini Xoteoakorimoni iokanatiniri ĩkapani. Ia apakapakari Teoso apakapa apaka. Ia mapakapakati Teoso !apakapari. Imisiritaãkako. Ia amarini oerekari Teoso kãkitimoni, txamari itori kãkiti !auikari isãkire. ³⁵Ikara atoko ininiã, itori kãkiti xiniãkiti kipatakori ãkixinireẽ, imarotaãkako. Pitepekana pite matinaniuatako. Pãkipa iouata iorotini tsii atoko itxako —itxa Simião sãkire Mariamoni.

³⁶Iuusaaki oãua sito Teoso sãkire sãpiretakaro Ana inakoro. Panoeo ãkero oa. Oãtokiri kitxakapirĩka Asee inakori. Iuusaaki kiomãtxipekaro oa. Oãua setxi ano õtanirikata. Eereka ipĩpe. ³⁷!Oĩtaniriuataika. Oitẽta koatrokananipeka oãuini. Oa auapika Teoso misãkiretiko aikoti ãki. Iuaã ikini õti, ikini ĩkanõkati pakini omisãkiretapikari Teoso. Itokata otakanapari onipokotini Teoso omisãkiretini ĩkapani. ³⁸Xosee, Maria pakini Simião misãkiretaka atoko Ana apoka. Omisãkiretari Teoso:

—Erekapitikari ia amarini pimereẽkiti kãkiti iãtapakiti piokanatinini atemoni —otxa.

Eereka osãpirenauata Xesosi apokini pirena Xerosareẽ auakanimoni kãkiti maerekani makatxaãkari iãtapakanimoni.

Nasaree Sitatxitimoni Ikanapiriinina

³⁹Xosee, Maria pakini Apiananiri paniãtakiti iõkatsopatakori imakinika ikamaãkana atoko, kanapiriã itxana Karirẽia tõpamoni. Iuaã isana aapokomonina Nasaree sitatxitiã. ⁴⁰Iua amarini aneẽ. Itapara auaãpotari. Kimaroreri itxaua. Teoso iteene turetari iua Xesosi.

Xesosi Misãkirenãtari Koerekarerini

⁴¹Ikinikanani Xosee, Maria pakini sari Pãskoã kiiniritimoni Xerosareẽ sitatxitimoni. ⁴²Xesosi tosi anopeka inakasaaki, isana Xerosareẽ auakari kiiniritimoni mitxi isanãtinina atokokana. ⁴³Kiiniri

xipoka atoko Xosee, Maria pakini potorika aapokomonina isinina ĩkapani. Iuasaaki Xesosi kaikota Xerosareẽ. Txamari ninoa !imarotari ikaikotini. ⁴⁴Ninoa uãkatamari apanakini inirimanekata isini. Ikara atoko ininiã, ikimaporitana ãti õtipeka. Mapiãnikata ipixinipokoriti initamarina inirimanemoni, aõkimaneremoni. !Apokarina. ⁴⁵Ininiã ikanapiriãna Xerosareẽmoni iuaĩkana initinirina ĩkapani. ⁴⁶Ipi, ãti pakini õti initapiimarina. !Apokarina Xesosi. Eereka apokarina Teoso misãkiretiko aikoti ãki. Moisesi sãkire oerekakanikata iitopãkanãta. Xesosi kenakonãtari ninoa sãkire. Apaka ipimarauata. ⁴⁷Ninoa Xesosi sãkire kenakotakani tsorĩkaãnãta, kotxi paimatireri iua. ⁴⁸Xosee, Maria pakini apokasaakiri iua, kona imarotarina Xesosi parĩka. Inoro txari: —Namarite, kinirepa pimisiritaua ate? Piri, nota pakini pikamamaxirexiniretaua ate. Anitapiimai. Kona aãpokai —otxari Xesosi.

⁴⁹Ininiã Xesosi:

—Kinirepa hinitanãtano? Kona himarotatari uai niri aapoko ninirekari nauini, ipaniãtakiti nikamini ĩkapani —itxa.

⁵⁰Txamari ninoa !imarotari Xesosi sãkire.

⁵¹Ikara atoko ininiã, Xesosi kanapiriã ninoakata Nasaree sitatxitimoni. Ikinika Xosee, Maria pakini sãkire ikĩpita. Inoro xinikapikari Xesosi sãkire oãkixinireẽ. Opotxitari oxinikiniri Xesosi sãkire. ⁵²Xesosi aneẽ. Imatire apaka aneẽ. Teoso apokaerekatari Xesosi. Kãkiti apaka apokaerekatari Xesosi.

Hoão Kapatxisareri Sãpiretakiti

(Mateo 3.1-12; Marko 1.1-8; Hoão 1.19-28)

3 ¹Homa sitatxitiã Homanoakori auĩte Txipério inakori iua. Kĩsi anokananipeka iua auĩtetxi ininiua iuasaaki. Iuasaaki Xotéia tõpa auakani auĩte Põsio Pirato inakori. Kariréia tõpa auakani auĩte Erotxi inakori. Erotxi itari Piripi inakori. Itoreia tixini auakani auĩte, Takonitxi tixini auakani auĩte apaka itxaua Piripi. Iuasaaki Apireni auakani auĩte Arisãnia inakori. ²Iuasaaki Anasi inakori, Kaipasi inakori pakini sasetotxi auĩteakori apiatakani itxauana ninoa. Iuasaaki Teoso sãpiretari isãkire Hoãomoni Sakaria ãkirimoni, ãparaã makipakaniãtaã auakasaaki. ³Ininiã Hoão sari ikininape kãkitimoni, uini Xotão takote auakanimoni. Isãpiretari Teoso sãkire: —Hitakanapariko himaerekani. Eereka patxisata hinaãkako. Ikara atoko hininiã, Teoso makatxakinii himaerekani —itxanãta Hoão ikininape kãkitimoni.

⁴Kitxakapiríka Teoso sákiŕe sápiretakari Isaía inakori iókatsopatari:
 Auako kiki áparaã makipakaniátaã. Isápirenauatako. Itxariko:
 “Höeretariko kimapori Apiananiri apokini apisapanika.
 Itíkaãpo erekari híkamako iua napini íkapani.

⁵Kipatxiã ixápokakaãkako ikini isauana. Ixirata mirií oerekataãkako.
 Kimapori ikitokare oerekataãkako. Kimapori pakota totaãkako.

⁶Ikinimane kákiti itixi auakani imarotariko Teoso makatxakiniri
 kákiti maerekani imapinakani íkapani,” itxanáta.

Ikara atoko itxa Isaía iókatsopatakiti Xoão pirena. Kimapori
 kákiti oerekatini atokokana, auítetxi apokini apisa, iua atokokana
 Xoão nirekari kákiti iposope inini Apiananiri apokini apisa,
 imaerekanina itakanapinina íkapani.

⁷Itomaneri kákiti sari Xoãomoni ipatxisatikona íkapani. Ininiã Xoão:
 —Imini katsiiri anaakorirai híte. Teoso misiritapitikai himaerekani
 xika. Himitekini !auari. Hinirekari hípatxisatiko, txamari !hinirekari
 hítakanapiniri himaerekani. ⁸Hinirekiniári himaerekani hítakanapini,
 ininiã híkamariko erekari. Ikara atoko ininiã, höerekari Teoso atão
 hítakanapiniri himaerekani. Hákixiniremoni !híxinikapiri: “Teoso
 apakapapitikauako ate, kotxi ate atokirini Apraãoni txaua,” !hítxapeko.
 Ari, nota sápiretai híte, Teoso nirekiniári, iposotari ia kai soroã
 Apraãoni mekaniriakori ikamini. Kona Apraãoni posotari anikini
 Teosomoni. ⁹Aamina maereka iriti atoko hítxa. Teoso iposopeka híte
 ixipokini. Kákiti auari ikitaite kauanari aamina maereka iriti itokini
 íkapani. Ikinika aamina maereka iriti tokaãkako. Xaminaã oka
 inaãkanako. Teoso kamakiti iua atokokana itxa. Ininiã Teoso kitaite
 kauanapeka, aamina kotsa sauakiko tíkane. Iua atokokana ininiã,
 Teoso aiamatapeka híte ixipokini íkapani —itxa Xoão ninoamoni.

¹⁰—Ikara atoko ininiã, kipa akama Teoso mamisiritakaniua
 íkapani? —itxarina.

¹¹Ininiã Xoão apakapapireta:

—Pimãka kauanata ipi auiniãi, áti pisika mākatchi kauanata
 mauakinitimoni. Nipokori auiniãi, pisikari nipokori
 mauakinitimoni —itxa Xoão sákiŕe.

¹²Kikiãkini, txineiro apakapakani Homano auíte nitiriakori,
 apoka apaka ipatxisatikona íkapani.

—Koerekareri, atepekana, kipa ate kama Teoso mamisiritakaniua
 íkapani? —itxarina.

¹³Ininiã Xoão:

—Kākiti txineirote himakatzakakito, Homano auíte nireẽkito iaõka himakatzakako. Apikomoni !himakatzakapero —itxana.

¹⁴Átikaka sotatoakori apaka pimaãri:

—Atepekana, kipa ate kama amaerekani atakanapini ìkapani? Ininiã Xoão:

—!Himaĩkapiri kākiti, itxineirote himixirikini ìkapani. Kona áti maxikatiika !hãpoĩtape. Hìpoxokoniuatoko txineiro hãpakapakitoã hĩparĩka ìki. !Hinirekapero apikomoni —itxa sotatoakorimoni.

¹⁵Iuusaaki kākiti iãtapanãtari Teoso mereẽkiti apokini. Ininiã Xoão sãpiretakiti ikenakotakasaakina, ãkixinireẽna ixinikarina:

—Xoãokani Teoso mereẽkiti txataua atxiĩti? —itxanãtana ixinikanãtakitina.

¹⁶Ininiã Xoão:

—Ãparaaãnokara nipatxisatai hĩte. Nota tikini apoãkari patxisataiko hĩte Erekarì Matamatakotiã, xaminaã pakini. Apiatakari itxaua iua. !Apakata iua takote napokini ikiti mata nimakatzakini ìkapani, kotxi iua apiata. Nota poiãoka. Imakatzakari himaerekani, itxiko metao ãki auakari arikini atoko. ¹⁷Katakareri ãpokari ahoisi otãta imakatzakini ìkapani. Otãta arikaãka. Oki nĩkataãka ikiena nĩkatikoãtaã. Iua atokokana Teoso nĩkatariko kākiti erekarini. Maerekati kamakani arikaãkako xamina maxipoãkatiã.

¹⁸Ikara atokora itxa Xoão sãpirena õtãkikinina kākiti. Isãpiretari erekarì pìrena Teoso pìrena kãkitimoni. ¹⁹Áti õti Xoão pinitari Erotxi, Karirẽia auakani auíte:

—Pitakiniãro pitari Piripi ìtanoro Erotxia inakoro, maerekati pikama. Apaka apikomoni maerekati pikamapitipo —itxa Xoão.

²⁰Ininiã iuusaaki iuaĩkana Erotxi kamari maerekati, kotxi itakari Xoão kateia ãki isãkire imapokaerekatakani xika.

Xesosi Patxisatiko Pirena

(Mateo 3.13-17; Marko 1.9-11)

²¹Xoão Erotxi maĩkini apisapanika ikinimane kākiti ipatxisatakasaaki, Xesosi apaka patxisataãka. Iuusaaki Xesosi sãkirauatakasaaki Teosokata, iaxiti takaka. ²²Erekarì Matamatakoti katxaka Xesosi nopini. Kamoã katxakini atoko itxa ikatzakini. Iuusaaki ikenakotaãka iaxitikiri sãkire:

—Pite namarite, nitiretakiti, napokaerekatai, kotxi ninirekakiti pikama —itxa.

Xesosi Nirimaneakori Iua Apisapanika Auakani

(Mateo 1.1-17)

23 Iuasaaki Xesosi potorika iparĩkauatini Teoso ĩkapani. Trĩta anokananipeka itxaua iuasaaki Xesosi. Kãkiti uãkatari iua Xosee ãkiri ininiãua.

Xosee iri Erii.

24 Erii iri Matatxi.

Matatxi iri Arevii.

Arevii iri Meokii.

Meokii iri Xanai.

Xanai iri Xosee.

25 Xosee iri Matatxia.

Matatxia iri Amosi.

Amosi iri Naoõ.

Naoõ iri Esirii.

Esirii iri Nakai.

26 Nakai iri Maatxi.

Maatxi iri Matatxia.

Matatxia iri Semei.

Semei iri Xosee.

Xosee iri Xota.

27 Xota iri Xoanaã.

Xoanaã iri Hesa.

Hesa iri Soropapeo.

Soropapeo iri Saratxieo.

Saratxieo iri Nerii.

28 Nerii iri Meokii.

Meokii iri Atxii.

Atxii iri Kosaã.

Kosaã iri Eomataã.

Eomataã iri Eri.

29 Eri iri Xosoee.

Xosoee iri Eriesa.

Eriesa iri Xoriĩ.

Xoriĩ iri Matatxi.

Matatxi iri Arevii.

30 Arevii iri Simião.

- Simião iri Xotaa.
 Xotaa iri Xosee.
 Xosee iri Xonaã.
 Xonaã iri Eriakiĩ.
 31 Eriakiĩ iri Mereaa.
 Mereaa iri Mena.
 Mena iri Matata.
 Matata iri Nataã.
 Nataã iri Tavii.
 32 Tavii iri Xesee.
 Xesee iri Opetxi.
 Opetxi iri Póasi.
 Póasi iri Sáomõ.
 Sáomõ iri Nasoõ.
 33 Nasoõ iri Aminatapi.
 Aminatapi iri Átximĩ.
 Átximĩ iri Anii.
 Anii iri Ésirõ.
 Ésirõ iri Péresi.
 Péresi iri Xotaa.
 34 Xotaa iri Xakoo.
 Xakoo iri Isaki.
 Isaki iri Apraão.
 Apraão iri Tera.
 Tera iri Nakoo.
 35 Nakoo iri Seroki.
 Seroki iri Hakaoo.
 Hakaoo iri Pareki.
 Pareki iri Epi.
 Epi iri Sara.
 36 Sara iri Kainaã.
 Kainaã iri Apaxatxi.
 Apaxatxi iri Seĩ.
 Seĩ iri Noee.
 Noee iri Arameki.
 37 Arameki iri Metosareẽ.
 Metosareẽ iri Enoki.
 Enoki iri Xaretxi.

Xaretxi iri Marereo.

Marereo iri Kainaã.

³⁸ Kainaã iri Enosi.

Enosi iri Setxi.

Setxi iri Adã.

Adã iri Teoso. Imapotõkirepe.

Satanasi Nirekari Xesosi Kaminiri Maerekati

(Mateo 4.1-11; Marko 1.12-13)

4 ¹Xesosi ipatxisatiko atoko, Erekarí Matamatakoti iteene sikaposotiiretari iua. Erekarí Matamatakoti txíkitakari Xesosi uini Xotão itakanapini, ãparaã makipakaniãtaã isini íkapani. ²Iuaã koarêta õti auakasaaki, Satanasi atamakaerekatari Xesosi. Koarêta õti manipokotakatinoka itxa Xesosi. Ininiã natxinoka itxa Xesosi.

³Ininiã Satanasi txari:

—Pite Teoso ãkiri pitxaua, ininiã ia kai soro komiri pitxíkitaka — itxari Xesosi.

⁴Ininiã Xesosi apakapapiretari:

—Kona, kotxi Teoso sãkire iõkatsopatakori txari:

Kona komirinanini txíkitakari kãkiti ãtipirika auini tíkane.

Íkinika Teoso sãkirera txíkitakari kãkiti ãtipirika auini tíkane.

⁵Ininiã iuasaaki Satanasi anikari Xesosi ixirata nopinixiti. Iuaã pakoteri oerekiniri ikinimane tixine. ⁶Ininiã Satanasi:

—Nota posotari nisikinii ikinimane auítetxiakori posotiire.

Íkinipoko ninoa txineirote apaka niposotari nisikinii.

Merepitipanika notamoni isikaãka ia posotiiretxi, ininiã nota sikari ninirekaãkitimoni. ⁷Ikara atoko ininiã, piteosonetiniãno, ia posotiiretxi nisikai pite —Satanasi txari Xesosi.

⁸Ininiã Xesosi:

—Konapitini. Pisipeka Satanasi. Teoso sãkire iõkatsopatakori txari:

Apiananiri píTeosone. Iuanokara piteosoneta. Iua

íkananinokara piparíkauatako.

⁹Eereka Satanasi anikari Xesosi Xerosareẽmoni, aiko Teoso misãkiretiko nopinixiti. Itanoxiti paítanori. Pamonõkoniri. Iuaã itxari:

—Teoso ãkiri pininiãua, pokaua xiti. Ininiã íkinipoko kãkiti imarotariko Teoso ãkiri pininiãua, ¹⁰kotxi Teoso sãkire iõkatsopatakori txari:

Teoso iokanatanako initiriakori iaxitikini pite inĩkatinina tĩkane.

¹¹ Ninoa maĩkai pimapinakani tĩkane, ininiã pikarouatini !auari.

Kona kai soro karotari pikiti,

itxa Teoso sãkire —Satanasi txari Xesosi.

¹² Ininiã Xesosi:

—Teoso sãkire iõkatsopatakori apaka txari:

Kona patamakaerekatapiri Apiananiri piTeosone,

—itxari.

¹³ Iuusaakipeka Satanasi atamakaerekatini Xesosi xipope. Ininiã itakanapari Xesosi äti õti uuaĩkana ikanapiriini uamoni ĩkapani.

Xesosi Mipotorikari Iparĩka Kariréia Tõpa

(Mateo 4.12-17; Marko 1.14-15)

¹⁴ Ikara inaãka atoko Xesosi kanapiriã Kariréia tõpa auakanimoni. Paposotiireri, kotxi Erekar Matamatakoti auari iuakata. Iua pirenaiaripireta ikini Kariréia tõpa auakanimoni. ¹⁵ Iua oerekarauata aiko äki Xoteo apotiitiniãtaãua. Ininiã ikinimane txari:

—Peerekari iua, kotxi erekapitikari iua sãpiretakiti —itxana.

Nasaree Auakani Kona Auikari Xesosi Sãkire

(Mateo 13.53-58; Marko 6.1-6)

¹⁶ Eereka Xesosi sari Nasaree sitatxitimoni. Iuaã Xesosi aneẽ mitxi. Xoteo tomatini õtisaaki Xesosi itotapekari aiko Xoteo apotiitiniãtaãua isini. Ininiã iuusaaki, Xoteo tomatini õtisaaki isari iuaã. Iuaãtaã itima Teoso sãkire iõkatsopatakori atatsopatini ĩkapani.

¹⁷ Teoso sãkire sãpiretakari Isaía iõkatsopatakiti tsopa isikaãka. Ininiã imatakireẽri aãtsopa. Ia Teoso sãkire inita, atatsopata itxa:

¹⁸ —Erekar Matamatakoti notakata aua, ininiã Apiananiri mereẽno nota matxineirotenimonikari erekari pirenaiaripiretini ĩkapani. Iokanatanano kateia äki auakani nisikakini ĩkapani. Iokanatanano mõsiãrenimoni uuaĩkana atamarauatinina ĩkapani. Iokanatanano misiritakonimoni, ninoa misiritakani nixipokini ĩkapani.

¹⁹ Ipaniãtano kãkiti nisãpiretini: “Ĩkorakanani Teoso apokapeka kãkiti maerekani imaktxakini ĩkapani, imapinakanina tĩkane.”

Ikara atatsopata Xesosi.

²⁰ Aãtsopa iapirikaãka atoko, sika itxari sasetotxi nitirimoni. Ikara inaãka atoko Xesosi topãka. Imakinika kãkiti aiko Xoteo

apotiitiniãtaãua âki auakani, imakinikana atamatari Xesosi, isãpiretakiti kinirão kenakotaka inakani. ²¹Ininiã Xesosi sãpiretana: —Ikara Teoso sãkire hïkenakotakiti apokapeka uatxa —itxa ninoamoni.

²²Ikinimane kãkiti sãpirenauata Xesosi ereka inini. Itsorïkaãnãtana isãkire erekari ikenakotakasaakina: —Kiãtokopa ininiãpa imarotatari ikara atoko inakari isãpiretini? Kotxi Xosee ãkirira iua, minakati ãkirira iua —itxanãtana.

²³Ininiã Xesosi txana ninoa: —Atxiiti hïte txanoko nota imatiretxi kitxakapirïka kiomãtxiakori sãkire. Ninoa txari: “Pinïtxi imarotakari pininiãua, piteka pipitaua.” Atxiiti hïxinikanãtari: Kapanaoõ sitatxiti nauakasaaki, nikamari posotiiretxi iuaãtaã. Kinirepa na nikamatari posotiiretxi uai nauiniãtaã? Ikara atoko atxiiti hïxinikanãta. ²⁴Atão nisãpiretai, kãkiti Teoso sãkire sãpiretakari inirimane sauaki auakasaaki, inirimane !auikari isãkire. Ia xika kona nikamari posotiiretxi uai. ²⁵Atãopitika nisãpiretai hïte. Kitxakapirïka Teoso sãkire sãpiretakari Eríasi inakori auakasaaki, ipi ãti pakini ano ipixini ano pakini ãparaã !ikipa. Iuaã Isaeo tixini natxinoka aua. Iuasaaki kaiãopokoro sitoakoro tikinitakoro auari iuaãtaã. ²⁶Iuaritika Teoso !iokanatarari Eríasi ninoa ikininapemoni. Iokanatarari ãtoka sitomoni tikinitakoromoni, nipokori isikiniro ïkapani. Oa sito aua Sarepita sitatxiti Sitoõ tãpa, Isaeo tixini takote. Xoteo !otxaua oa.

²⁷—Ikara atokotxikana itxa Teoso sãkire sãpiretakari Eriseo inakori. Iua auakasaaki, kaiãopokori amianatakani maere matati Isaeo tixini auakani aua. Kona imakinikani erekapeka inaãkana. Kiki Naamaã inakori Síria tixini auakari, iuanokara erekapeka itxïkitakaãka. Iua Naamaã kona Xoteo !itxaua iua —itxa Xesosi ninoamoni.

²⁸Ikinimane aiko âki apotiitakaniaua, ikara ikenakotakasaakina, ãtene inaiatauana. ²⁹Ininiã ikosekaïtotarina Xesosi sitatxi mapotãkiremoni. Anikarina ixirata nopini sitatxi auiniãtaã. Iuaã inirekarina Xesosi okinina ixiratamoni ipinini ïkapani. ³⁰Txamari Xesosi napari ninoa sauaki, ïkorape itxa.

Kiki Maerekati Matamatakoti Auaïtotakiti

(Marko 1.21-28)

³¹Eereka Xesosi sari Kapanaoõ sitatxitimoni Kariréia tãpa. Iuaã tomatiko õtisaaki oerekana kãkiti Teoso sãkire. ³²Kãkiti iuaã auakani tsorïkaãnãta oerekakiti ikenakotakasaakina, kotxi

paimatireri iua. Isāpiretakiti atāonoka itxa isākire. ³³Iuasaaki aiko āki kākiti apotiitiniātaāua, aua kiki maerekati matamatakoti auaitotakiti.

³⁴Iua kiki ākixinire auakari akiripoakata:

—Xesosi Nasareekiri, kipa ĩkai uai? Kiātokopa pitxataua ate? Atxiiti papoka ate pixipokini ĩkapani? Nota imarotai pite. Pite maerekati mauakinini pite. Teoso nakiti pitxaua pite —itxa maerekati matamatakoti Xesosimoni.

³⁵Ininiā Xesosi txitari iua. !Auiritari isākirauatini:

—Maātako. Posipikari ere kiki —itxari.

Ininiā maerekati matamatakoti iriākatari iua kiki ikinimane okiātaā. Ininiā itakanapari iua, makarotika itxa kiki. ³⁶Kākiti iuaātaā tsorīkaānāta. Imisākiretakakauana:

—Īkora kiki paposotiireri isākire. Itapararitika ipaniātari maerekati matamatakoti sini, ininiā nākorape itxapena maerekani matamatakoni.

³⁷Ininiā Xesosi pirena iua tōpa iaripireta.

Xesosi Makananitaro Simão Petro Imakiro

(Mateo 8.14-17; Marko 1.29-34)

³⁸Eereka Xesosi potorika aiko Xoteoakori apotiitiniātaāua. Simão aapokomoni isa. Iuasaaki Simão imakiro iteene oāpoomata. Ininiā amanaārina Xesosi oa erekape inīkitakini. ³⁹Ininiā ipapīka oamoni:

—Nipaniātari apoomari iotokini —itxa.

Ininiā apoomari iotoka. Iuasaakipeka oa ōkitikaua, nipokori osikana ninoa.

Xesosi Makananitana Amianatakani

(Mateo 8.16-17; Marko 1.32-34)

⁴⁰Atokatxi ereēkokaāpotapeka inakasaaki, kākiti anikana amianatakani ikinipoko amianari auakini, Xesosimoni. Itakari iuako amianatakani nopini. Iuasaakipeka ninoa erekapeka itxana.

⁴¹Omitikari maerekati matamatakoti kākiti ĩtoā auakari apaka. Osipikasaakina, akiripoakatana:

—Pite Teoso ākiri pitxaua.

Ininiā Xesosi txitana ninoa. !Auiritaikana akiritinina, kotxi ninoa imarotari Teoso mereēkiti ininiāua Xesosi.

Xesosi Sãpiretari Erekarî Pirena*(Marko 1.35-39)*

⁴²Katimatinĩkata Xesosi sari kãkiti mauakaniãtaã. Iuusaaki kãkiti nitanãtari iua. Apokasaakirina, amanaãrina Xesosi:

—Pikaikota atekata —itxarina.

⁴³Txamari Xesosi txari:

—!Apakata uai nikaikotini, kotxi ãtiãtaã apaka nisãpiretariko erekari pirena Teoso auĩtetxi ininiãua pirena. Ikinimanemoni ikara nisãpiretini ãkapanira, Teoso iokanatano kãkitimoni.

⁴⁴Ikara atoko ininiãra, isãpirenauata ikininape aiko ãki Xoteoakori apotiitiniãtaãua ikinipoko Xoteoakori tixine.

Merepitipanika Xesosi Moianariakori*(Mateo 4.18-22; Marko 1.16-20)*

5 ¹Ãti õti Xesosi auanãta Xenesaree inakori poa tinikata. Xenesareetxikana Kariréia poa. Ipi iuãka aua. Iuusaaki kãkitipokoni ãkitari iua Teoso sãkire ikenakotinina ãkapani. Iukatapeka xãpoka itxana. ²Iuusaaki Xesosi atamatari ipi kanaua ioporoko. Kokatsaãriti kanauate. Ninoa imiriĩ arokanãtari hetxi.

³Xesosi iereãtaua Simão kanauate ãki:

—Pikatika pikanauate amaãtiki apanĩkakiã —itxa Simãomoni.

Eereka iitopãka kanaua ãki. Iuaãtaã isãpiretari Teoso sãkire kãkitimoni imiriĩ apotiitakanimoni.

⁴Isãpirenauataka atoko itxari:

—Apanĩkakiã pimekota. Iuaãtaã pitakari hetxi kãuaãriã —Xesosi txari Simão.

⁵Ininiã Simão:

—Koerekareri, hetxi atakapikama ãkanõka. Iteene aõkatsaãkatapiikama. Txamari na xatiki ximaki amaĩka. Kona ãtika amaĩka. Iuaritika pite paniãtiniãno, iuaritika nitakapitikariko hetxi —itxa Simão.

⁶Hetxi ninoa takasaaki kãuaãriã, ximakipokoni imaĩkana, ininiã hetxi tsorakiarita. ⁷Ikara xika akiritana imoianariakori ãti kanauate ãki auakani:

—Ãpina. Himoianataua ate. Hetxi tsorakiãpotanapanoka.

Ininiã ninoa ina. Ikinimane kosekari hetxi. Ximakipokoni. Ipi kanaua xãpoãkata ximakinoka. Ximaki xika kanaua sakikaarita. ⁸Simão Petro atamatakasaakiri ximakipokoni, ikapotoreëkaua Xesosi apisatoõ:

—!Pikaikotape nota takote, kotxi erekai pite. Maerekati kamakarino nota —itxa.

⁹Ikara atoko itxa Simão sãkire, kotxi iua, imoianariakori apaka tsorĩkaãta kaiãopokori ximaki ninoa maĩkakiti xika. ¹⁰Simão moianariakori Txiako, Xoão pakini, ninoa apaka tsorĩkaãta. Txiako, Xoão pakini Sepeteo anaakori. Ininiã Xesosi txari Simão:

—!Pipĩkarauatape. !Pimaĩkaikari ximaki. Ātião piparĩka auako. Nisãkire pisãpiretako kãkitimoni —itxa.

¹¹Eereka ninoa apokitaãka atoko, ikinika itiina itakanapana, Xesosikata sa itxana imiparĩkatinirina ĩkapani.

Kiki Maere Matati

(Mateo 8.1-4; Marko 1.40-45)

¹²Āti õti Xesosi auanãta āti sitatxitiã. Iuaã auakasaaki, aua kiki maere matati. Atamatakasaakiri Xesosi, ikapotoreëkaua, iãka Xesosi apisatoõ. Iteene amanaãri Xesosi:

—Apiananiri, pinirekiniãri, piposotari nota ereka pitxĩkitakini —itxari.

¹³Ininiã Xesosi maãtakari iua:

—Ari ninirekapitikari. Erekapekai —itxari.

Iuasaakipeka erekapeka itxa. ¹⁴Ininiã Xesosi paniãtari:

—!Pisãpiretapiri apanakini ereka nitxĩkitakinii. Pisa sasetotximoni.

Poerekari piĩto iuamoni, ininiãkara itxai: “Atãopitika erekapekai pite.” Eereka pisikari Teosomoni Moisesi paniãtakiti iaõka. Ikara atoko pikaminiã, ikinimane imarotari pite atão ereka pininiãua —itxa Xesosi.

¹⁵Xesosi paniãtari iua apanakini imasãpiretakani, iuaritika Xesosi pirena apikomoni iaripireta. Ininiã kãkitipokoni sari iuamoni isãkire ikenakotinina ĩkapani, amianari imaktxakini ĩkapani. ¹⁶Ininiãkara Xesosi itotapekari iuanoka isini kãkiti mauakaniãtaã Teosokata isãkirauatini ĩkapani.

Matĩpokotakati Pirena

(Mateo 9.1-8; Marko 2.1-12)

¹⁷Āti õti Xesosi sãpirenauata. Iua takote pariseoakori, kaiõkatsoparerini apaka topãkanãta. Ninoa Kariréia tõpakini, Xotéia tõpakini, Xerosareẽ sitatxitikini pakini. Iuasaaki Xesosi

sāpirenauatakasaaki, Apiananiri sikaposotiiretari Xesosi amianatakani erekapeka itxīkitakini ĩkapani.

¹⁸Iuasaaki kikiakori apoka iuaã. Iminarina kiki matĭpokotakatinoka inakari. Isirimata nopini iminarina. Inirekarina aapokotxi āki ĩroinina, Xesosi apisatoõ iua matĭpokotakati itakinina ĩkapani. ¹⁹Txamari !apakata ninoa ĩroini, kotxi kăkitipokoni xăpoka. Ininiã ikanĭkana kanikoatxiã aapokotxi nopini. Imaktxakarina itano auakari kipatxi kai kamakori, eereka isikakaãpotarina iua matĭpokotakati isirimata nopini Xesosi manapi kăkiti sauaki. Xesosi apisatoõ apoka. ²⁰Ininiã Xesosi imarotari ninoa auikiniri iua posotiire. Ininiã itxari matĭpokotakati:

—Namarite, pimaerekani makatxakapeẽkaika.

²¹Iuasaaki pariseokori, kaiõkatsoparerini pakini tsorĭkaãnãta. Ākixinireẽna ninoa:

—Teosonokara posotari amaerekani imaktxakini. Maerekati Xesosi kama Teosomoni —itxana.

²²Xesosi imarotari ninoa xinikakiti ākixinireẽna, ininiã Xesosi txana:

—!Erekari hăkixinireẽ ikara hĭxinikakiti. ²³Nitxari iua imaerekani nimaktxakini, txamari !himarotari imaerekani atão nimaktxakini. “Põkitikaua. Pitĭpokota,” nininiã, ininiã himarotari nisăkire atão ininiãua, kotxi hĭtikari. Niposotiire imaerekani nimaktxakini ĩkapani, niposotiire iua nõkitikini ĩkapanitxikana. ²⁴Ininiã uatxaika noerekai hĭte. Teoso iokanatano nota hĭtari iaxitikirino ĩkorapokoritimoni kăkiti maerekani nimaktxakini ĩkapani.

Ininiã ipaniãtari matĭpokotakati:

—Põkitikaua. Pisirimata pikoseka, sipe pitxa paapokomoni —itxari.

²⁵Iuasaakipeka õkitikaua. Ikinimane kăkiti okiãtaã õkitikaua. Ikosekari isirimata, sipe itxa aapokomoni. Isikasaaki ipoxokoniuata.

—Peerekari Teoso —itxaãpota iua.

²⁶Ikinimane kăkiti tsorĭkaãta. Ipĭkarauatana.

—Peerekari Teoso. Mitxi !aĭtikari matĭpokotakati erekapeka txĭkitaãkari. Peerekari uatxa aĭtikakiti —itxanãtana ninoa.

Mateo Pirena

(Mateo 9.9-13; Marko 2.13-17)

²⁷Eereka Xesosi tĭpokoãponãtakasaaki, atamatari kiki Arevii inakori. Iitopăkanãta iparĭkauatiniãtaã. Iuaã apakapari txineiro Homanoakori auĭte paniãtakiti kăkiti aĭtiãtaã tiitxi anikini ĩkapani. Xesosi akiritari Arevii:

—Ăpina, uatxa nimoianari pitxaua —itxari.

²⁸Iuasaakipeka Arevii ōkitikaua. Ikinika itii itakanapa, Xesosikata sa itxa, Xesosi imiparīkatini ĩkapani. ²⁹Eereka Arevii kamari kiiniri aapokoã Xesosi ĩkapani. Kiinirisaaki aua ĩkamanere kaiãopokori. Txineiro apakapakani aua kiiniriã. Ninoa apanakinikata nipokota Xesosikata Arevii aapokoã. ³⁰Pariseoakori, ninoakata parīkauatakani, kaiōkatsoparerini pakini txitana Xesosi moianariakori, Xesosi txineiro apakapakanikata nipokotini xika. Ininiã ninoa txari:

—Kinirepa hĭte nipokota txineiro apakapakanikata, maerekati kamakanikata? —itxana.

³¹Xesosi apakapapiretana:

—Kăkiti mamianatakani ĩnirekari pinĭtxi siăkarimoni isinina. Amianatarinoka nirekari pinĭtxi siăkarimoni isini. ³²Iua atokokana, nota ina ĩkorapokoriti kona kăkiti “Atăo inakarınoka kamakarino” ĩkapanini, kotxi ninoa uăkatari atăo inakarınoka ĩkaminina, txamari !ikamarina atăo. Kăkiti maerekati kamakani ĩkapanira nina nota uai imaerekani itakanapini ĩkapani. Nota pinĭtxi siăkari atoko inakarino nota —itxa Xesosi săkire iuasaaki.

Nipokori Takanapiko Teoso Misăkiretiko ĩkapani

(Mateo 9.14-17; Marko 2.18-22)

³³Kăkiti txari Xesosi:

—Xoăo kapatxisareri moianariakori itokata takanapari inikinina Teoso imisăkiretinina ĩkapani. Iua atokotxikana itxa pariseoakori moianariakori. Txamari pite moianariakori !itakanapari nipokori, iăriã, Teoso imisăkiretinina ĩkapani. Kinirepa? —itxana kăkiti.

³⁴Ininiã Xesosi apakapapiretana:

—Kiki ĩtaniriuatini pirenasaaki erekari atxiĭti kemaĭtxitakoni manikakaniãri nipokori? !Erekari. Ninoa poxokoniuaata imoianari ĩtanirauatini, ininiã inipokotapitikana. ³⁵Txamari âti ōti ninoa moianari maĭkaăkako, oka inaăkako. Iuasaakiko ninoa takanapari inipokotini, kotxi imatinaniuatana. Iua atokotxikana nota. Nota auapanika nimoianariakorikata. Ăti ōti nokaăkako. Iuasaakiko ninoa takanapari inipokotini Teoso imisăkiretinina ĩkapani —itxa Xesosi.

³⁶Eereka Xesosi săpiretari săpirenatxi, atăo inakari oerekiko.

—!Pikitsorăkitari măkatxi amaneri, kitxakari pităpanetini ĩkapani. Ikara atoko pikaminiã, măkatxi amaneri pioanata. Măkatxi mata

amaneri ãsapekata piotsainiã, mãkatxi kitxakari tsorakita iuaĩkana. ³⁷Kãkiti kitakari ovaã sako aamata kamakori ãki. Ovaã amanero auiniã, !otakaãka aamata kitxakari ãki. Pitakiniãro aamata kitxakari ãki, aamata tsorakita. Ovaã xikepoatamako. Sako !otxaika. ³⁸Ovaã amanero pikitakako aamata amanero ãki. ³⁹Ovaã kitxakaro auiniã, kãkiti !inirekaro amanero, kotxi: “Ovaã kitxakaro apiaerekata,” itxa.

Ikara atoko Xesosi txari kãkitimoni. Ikara sãkiretxiti Xesosi sãpireta, kotxi apanakini kãkiti itotapekari Moisesini sãkire, Teoso sãkire kitxakapirĩka isãpiretakiti, ininiã !inirekari Xesosi sãkire amaneri inakari. Ninoa mãkatxi kitxakari atoko. Sako kitxakari atoko ninoa. Ovaã kitxakaro atoko ninoa. Xesosi sãkire mãkatxi amaneri atoko. Ovaã amanero atoko itxa Xesosi sãkire.

Tomatiko Ôti Pirena

(Mateo 12. 1-8; Marko 2.23-28)

6 ¹Xoteoakori tomatini ôtisaaki Xesosi imoianariakorikata motipetari kikio takari triko auiniãtaã. Īpiripetakasaakirina, imoianariakori makatxakaãpotari triko oki. Iuakoã ikotxokarona, ixõka itxarona otãta katxakini ĩkapani, okinoka nika itxana.

²Ãtikaka pariseoakori itikana imakatxakinirona:

—Kinirepa triko hĩkotxoka tomatiko ôtisaaki? !Auiritaãka tomatiko ôtisaaki parĩkauatiko —itxana.

³Ininiã Xesosi apakapapiretana:

—Himarotari Taviini kamakiti kitxakapirĩka, iua imoianariakorikata natxitakasaaki. ⁴Iua ĩroã Teoso misãkiretikoãtaã. Iuasaaki imakatxakari komiri Teosomoni sikakori. Inikari, sika itxari imoianariakorimoni. Ninoa nikari apaka. Sasetotxinokara auiritaãka iua komiri inikinina. Apanakini !auiritaãka inikiniri. Iuaritika iua Taviini nikari. ⁵Nota hĩtari iaxitikiri posotari ikinipoko ninireẽkiti nikamini tomatiko ôtisaaki, kotxi Apiananiri nitxaua —Xesosi txana ninoa pariseoakori.

Motĩkauakotakari Pirena

(Mateo 12.9-14; Marko 3.1-6)

⁶Ãti tomatiko ôtisaaki Xesosi ĩroã aiko ãki Xoteoakori apotiĩtiniãtaãua. Oerekarauata. Iuasaaki iuaãtaã aua kiki iuako ikikomoni motĩkauakotakari. ⁷Kaiõkatsoparerini, pariseoakori apaka aua iuaã. Atamatapikarina Xesosi, atauako erekapeka itxĩkitakapaniri motĩkauakotakari tomatiko ôtisaaki. Inirekarina Xesosi kerokiniri.

Tomatiko õtisaaki iparĩkauatiniã, ninoa apoĩtari iua. ⁸Xesosi imarotari ãkixinireẽna ixinikakitina, ininiã ipaniãtari kiki motĩkauakotakari:

—Põkitikaua. Apina ikinimane okiãtaã.

Ininiã iua kiki õkitikaua, sa itxa Xesosimoni. ⁹Ininiã Xesosi pimaãna kaiõkatsoparerini, pariseoakori pakini:

—Natokopa itxa Moisesini paniãtakiti iõkatsopatakiti tomatiko õtisaaki atão akamini? Ipaniãtataua maerekati akamini tomatiko õtisaaki? Ipaniãtataua erekari akamini tomatiko õtisaaki? Inirekatari amoianatiniri ãti imapinakani ĩkapani tomatiko õtisaaki? Inirekatari aõkaniuatini tomatiko õtisaaki? —itxa Xesosi ninoamoni.

¹⁰!Kasãkirena ninoa kaiõkatsoparerini, pariseoakori pakini. Xesosi atamatana ikinimane.

—Piuako poerekata —itxari iua kiki.

Oerekatari iuako. Iuasaakipeka iuako erekapeka itxa. ¹¹Pariseoakori, kaiõkatsoparerini pakini omanãkarauata. Imisãkiretakauana Xesosi okinina ĩkapani.

Xesosi Mereẽna Tosi Imoianariakori

(Mateo 10.1-4; Marko 3.13-19)

¹²Ãti õti Xesosi kanĩka oxiratari nopini, Teoso imisãkiretini ĩkapani. ĩkanõka ikaikota iuaãtaã Teosokata isãkirauatini ĩkapani.

¹³Katimatiniãkata akiritana itomaneri imoianariakori iuamoni apokinina ĩkapani. Apokasaakina, imereẽna kikiakori tosi pakini kãkitimoni iokanatakini tĩkane. ¹⁴Imereẽna

Simãoma, (Iuãka Petro apaka.)

Ãtreema, (Simão itari)

Txiakoma,

Xoãoma,

Piripima,

Patoromeoma,

¹⁵Mateoma,

Tomeema,

Txiakoma, (Aopeo ãkiri)

Simãoma, (Homano omanatakari)

¹⁶Xotasima, (Txiako ãkiri, ãti Txiakoti)

Xotasi Isikariotxima (Xesosi mĩkapiritakari tĩkane) pakinima.

Ninoa kikiakori tosi pakini Xesosi mereẽkini imoianariakori ĩkapani.

Xesosi Amianatakani Imakananitini

(Mateo 4.23-25)

¹⁷Eereka oxiratari iokiriiāpotana. Ipitexitimoni apokana. Iuaã aua kaiāopokori imoianariakori. Apanakini kākiti iuaãtaã aua apaka. Xotéia tōpa ĩkani, Xerosareẽ sitatxiti ĩkani pakini auari iuaã. Apaka auari Txiro sitatxiti ĩkani, Sitoõ sitatxiti ĩkani apaka. Txiro, Sitoõ pakini potxoari uiniti ĩtinikata aua. ¹⁸Ninoa kākítipokoni sari Xesosimoni isākire ikenakotinina ĩkapani, amianarena imaktxakini ĩkapani. Ninoa maerekati matamatakoti auaĩtotakini sari Xesosimoni maerekati imaktxakini ĩkapani. ¹⁹Ikinimane nirekari imaãtakiniri Xesosi, kotxi imaãtakinĩarina, apakapari Xesosi tapara amianarena sini ĩkapani. Ininiã ikinimane amianatakani Xesosi maãtakakani iuaĩkana erekape itxana.

Kirimonipa Teoso Sikatari Erekari?

(Mateo 5.1-12)

²⁰Eereka Xesosi misākiretana imoianariakori:

—Hĩte matxineiroteni Teoso sikai erekari. Teoso hĩauĩte itxaua. Iua nakitiakori hĩtxaua.

²¹—Hĩte ĩkorapokoriti natxitakani Teoso sikai erekari. Himitouatapanikako.

—Hĩte ĩkorapokoriti txiapatakani Teoso sikai erekari. Hãpiapoxokonitapanikako. Hĩsiroatapanikako.

²²—Apanakini omanatiniãĩ hĩte, hĩtari iaxitikiri sākire hãuikini xika, Teoso sikai erekari. Atxiĩti apanakini !nirekai. Atxiĩti apanakini misākirepiretai. Atxiĩti ninoa akiritai “maerekati kamakari” nota hĩtari iaxitikiri sākire hãuikini xika. Ikara atoko hinaãkako.

²³—Ninoa misiriāpotakasaakii, hĩpoxokoniuatoko. Himĩteenekariko hĩpoxokoniritika, kotxi erekari Teoso nĩkatinii iaxiti itixine. Inĩkatakiti hĩte ĩkapani peerekari. Apanakini misiritinii atokokanera, ninoa atokiriakorini misiritari Teoso sākire sãpiretakani kitxakapirĩka.

²⁴—Hĩte ĩkorapokoriti katxineiroterini misiritaãkako. Mitxi papoxokonii hĩte. Uatxa hĩpoxokoni !auaika.

²⁵—Hĩte ĩkorapokoriti ikiniõtika mitouanãtakanii misiritaãkako. Hinatxitapanikako.

—Hĩte ĩkorapokoriti siroatakanii misiritaãkako. Himatinaniuatapanikako. Hĩtxiapatapanikako.

26—Ikinimane: “Peerekai pite,” ininiã, himisiritaãkako, kotxi ninoa nirimane kitxakapirĩkarini sãpiretari ikara atoko inakari Teoso sãkire atão masãpiretakanimoni —itxa Xesosi.

Kãkiti Mokaiakari Tiretiko

(Mateo 5.38-48)

27Iuaĩkana Xesosi sãpirenauata:

—Nõtãkikai hĩte nisãkire kenakotakanii. Hĩtiretanako himokaiakari. Erekarĩ hĩkaminana hĩte omanatakani. 28Himisãkiretariko Teoso erekari hĩte misãkirepiretakani isikini ĩkapani. Himisãkiretariko Teoso hĩte misiritakani ĩkapani. 29Kãkiti aritiniãĩ pikakota, ipinimoni pikakota iuaĩkana pisikana. Kãkiti anikiniãri pimãka õtanominari, pauiritari iua pimãka kauanata apaka anikini. 30Pitii amanaãkarimoni pisika inirekakiti. Kãkiti anikiniãri pitii, !pamanaãpiri iuaĩkana imikanapiriiniri. 31Ãti tiretiniĩ pinirekini atokotxikana, pitiretari ãti.

32—Pite tiretakaninani pitiretiniã, kinirepa Teoso sikari erekari pitemoni, pinirimanenokara pitiretakasaaki? Kotxi kãkiti maerekati kamakani apaka tiretari ninoa tiretakani. 33Pimoianatiniãna pite moianatakaninani, !apakata, kotxi iua atokotxikana maerekati kamakari moianatana iua moianatakaninani. 34Pisikiniãro pitxineirote, pitxineirote mikanapiriãkarimoninani, !apakata, kotxi iua atokotxikana maerekati kamakani sikaro itxineirotena apanakini maerekati kamakanimoni ãti õti iuaĩkana imikanapiriiniro ĩkapani. 35Iua atokokana na pitxape. Pitiretariko pimokaiakari. Erekarĩ pikaminariko. Inirekiniãri pitii iparĩkauatini ĩkapani, pisika iuamoni. !Pimaãkapeua, pitii iuaĩkana imasikakaniãi. Iua atokokana hĩkaminiã, Teoso sikai hĩte iteene erekari. Iua atokokana hĩkaminiã, Apiananiri iaxitikiri anaakori hĩtxauako, kotxi iua amonĩkari kãkiti maerekati kamakani. Ninoa !isãpiretari Teoso iua ereka inini, iuaritika Teoso amonĩkana. 36Piamonĩkariko ãti, aĩri Teoso amonĩkarauatini atokokana —itxa Xesosi.

Apoĩretxi Pirena

(Mateo 7.1-5)

37—!Papoĩtapiri ãti. Papoĩtiniãri ãti, ininiã pite apaka apoĩtaãkako. !Pisãpiretapiri ãti ikamakiti maerekati inini, ininiãkara Teoso !isãpiretai pite pikamakiti maerekati inini. !Pixinikapinikari maerekati ãti kamakiti pitemoni, ininiã Teoso !ixinikaikari maerekati pite kamakiti.

³⁸Pisikarauatako ātimoni, ininiā Teoso sikarauata ito pitemoni. Kaiāopokori papakapa. Atarokiri arata āki takakori atokokana papakapa. Atarokiri iōkokakori, kaiākakori kinapakopeka iuaīkana atarokiri inopini takaāka. Xāpoākata, ininiā katxapoaāpota. Iua atokotxikana Teoso sikai kaiāopokori, ātimoni pisikarauatiniā. Ātimoni pisikarauatini atokotxikana, Teoso sikarauata pitemoni —itxa Xesosi.

³⁹Xesosi sāpiretari ia sāpirenatxi atāo inakari oerekiko:

—Apakata āti mōsiāreti anikiniri āti mōsiāreti? !Apakata. Ninoa ipi irikako aariko āki. Ininiā nota sākire himimarotakanisaaki, kona apakata hōerekiniri āti. Hōerekiniāri āti, hīkerokari. Ninoa mōsiāreni aariko āki irikakani atoko hītxa. ⁴⁰Apaiāōkarauatakari !imarotari koerekareri imarotakiti atoko. Poiāonoka imarota. Apaiāōkarauatini ixipokasaaki, iusaaki koerekareri imarotakiti atoko imarotape.

⁴¹—Pisāpiretari āti: “Aāsoro aua poki āki,” txamari kona pimaākatari aātxirata pite oki āki auakari. Kinirepa ikara atoko inakari pikama?

⁴²Kinirepa pitxari pitari? “Nitari, nota makatxakinii aāsoro pokiā auakari,” kotxi !pivosotari patamatiniri aātxirata piteka pokiā auakari. Pisākire atxiiti erekari, txamari pikamakiti kona erekari. Merepitipanika pimakatxakari aātxirata piteka pokiā auakari. Eereka pivosotari patamatiniri aāsoro pitari okiā auakari pimakatxakini. Maerekati pite kamakiti apiata atxiiti iua aātxirata atoko. Maerekati āti kamakiti poiāoka atxiiti iua aāsoro atoko. Iuaritika !pimaākatari maerekati piteka kamakiti. Pōtākikari āti imaerekani itakanapini. Ikara atoko !apakata. Merepitipanika pite takanapariko pite maerekani, eereka pōtākikari āti imaerekani itakanapini —itxa Xesosi sākire.

Amātiiri Pirena

(Mateo 7.15-20; 12.33-35)

⁴³—Amātiiri erekari kona iritari matximakoti. Amātiiri matximakoti kona iritari erekari. ⁴⁴Patamatiniāri amātiiri, pimarotari imina. Txipokori piko inakoro pinirekiniā, kona pisa inakomoni. Ova pinirekiniā, kona pisa inakomoni. ⁴⁵Kākiti erekari amātiiri erekari atokokana itxa. Iua erekari, ininiā erekarinoka ikama, kotxi iua ākixinireē erekarinoka aua. Kākiti maerekati amātiiri matximakoti atoko itxa. Iua maerekati, ininiā ikamakiti maerekati apaka, kotxi maerekatinoka auari iua ākixinireē. Iua ākixinire ereka, ininiā isākire ereka apaka. Iua ākixinire maerekati, ininiā isākire maerekati apaka, kotxi isākire potorika ākixinireē —itxa Xesosi sākire.

Aapokotxi Kamakari

(Mateo 7.24-27)

⁴⁶Xesosi sākirauatapanika:

—Kinirepa pakiritano nota “Apiananiri,” nipaniātakiti pimakamakanisaaki? ⁴⁷Kākiti notamoni ĩkari, nisākire kenakotakari, nisākire kīpitakari, aapokotxi kamakari atoko itxa. ⁴⁸Iua kamari aapokotxi. Ikisakari kipatxi. Otsomori aapoko tsota ikama. Iua apokari kai, ininiã iopitĩkari aapoko tsota iua kai nopini. Ininiã aapokotxi ikamakiti paikori. Āparaã apoãtakasaaki, itorõkani inokasaakiri iua aapoko, !iakeka, kotxi iua kiki atão ikamari aapoko. Iua kiki atoko kãkiti nisākire kīpitakari.

⁴⁹—Āti kiki aapokotxi kamakari, iua iopitĩkari aapoko tsota motsomotika popaiape ininiãtaã. Āparaã apoãtakasaaki, itorõkani inokasaakiri iua aapoko pakitika. Xipoka itxa. Iua kiki atoko kãkiti nisākire kenakotakari, nisākire mauĩakati —itxa Xesosi.

Xesosi Makananitiniri Sotato

Auĩte Nitiri

(Mateo 8.5-13)

7 ¹Ikara sãkiretxiti isãpiretaka atoko, Kapanaoõ sitatxitimoni isa Xesosi. Iuaãtaã apoka. ²Kapanaoõ auari kiki ãti uãka Homano inakori. Sotatoakori auĩte itxaua iua Homano. Ipaniãtana sotatoakori seĩ pakini inireẽkiti ikaminina. Xesosi apokasaaki Kapanaoõ, iua Homano nitiri iteene itiretakiti amianata. Ipinanapanoka.

³Iua Homano kenakopiretari Xesosi. Ininiã ipaniãtari Xoteoakori kiomãtxiakori Xesosimoni isinina.

—Hĩtxariko: “Homano nirekai iuamoni pisini, initiri pimakananitini ĩkapani.”

⁴Ininiã ninoa sa itxana Xesosimoni, aõkita itxarina.

—Masa sotatoakori auĩtemoni. Initiri amianata. Masa, pimakananitiniri ĩkapani. Iua Homano erekari itxaua, ininiã erekapitikari pimoianatiniri iua. ⁵Itiretari Xoteoakori. Aiko aãpotiitiniãtaãua ikaminaua ate, ininiã iua Homano erekari itxaua —itxana ninoa.

⁶Ininiã Xesosi sari ninoakata. Iua Homano aapoko takote apokasaaki, iua Homano iokanatarari imoianariakori Xesosimoni, isãpiretinirina ïkapani:

—Apiananiri, apikomoni !pisipe, kotxi minakati nota. Pite Apiananiri txaua. Nota apakapiniã naapoko ãki !apakata. ⁷Nota pitemoni napokini !apakata, kotxi pite Apiananiri, nota poiãori. Ininiãkara ereẽ piotoka. Ereẽkarako pitxïkitakariko ninitiri ereka inini. ⁸Nota auĩte paniãtiniãno nota ipaniãtakiti nikamini ïkapani, ininiã nikamapitikariko. Nota auĩtetxi nitxaua apaka. Nota paniãtakiti sotatoakori kamapitika. ãti nipaniãta: “Pisa,” ininiã iua sa. ãti nipaniãta: “Uai pina,” ininiã iua ina. Ninitiri nipaniãta: “Ia pikama,” ininiã iua kamari. Ininiã nimarotarari ereẽ pite paniãtiniãri ninitiri ereka inini, ereẽkarako erekapeka pitxïkitakari ninitiri —itxa Homano sãkire Xesosimoni.

⁹Iua Homano sãkire ikenakotakasaaki, Xesosi tsoriãkaãta. Isapotorika, misãkireta itxana kãkiti iuakata sikani.

—Iua Homano iteene auikari nisãkire. Peerekari. Mitxi Inaõkitari nisãkire auĩãkari iua Homano atoko inakari. Na naõkitapanikari Xoteo iua Homano atoko inakari —itxa.

¹⁰Eereka ninoa Homano iokanatakini kanapiriã Homano aapokomoni. Iuaã apokasaakina, atamatarina Homano nitiri. Erekepeka itxa.

Xesosi Txïkitakari Ipïkari Iuaĩkana Auãki Inini

¹¹Mapaõti napaãka atoko Xesosi sari Naiĩ sitatxitimoni. Imoianariakori, kãkitipokoni apaka sari iuakata.

¹²Imatokoãpotakasaakiri sitatxi pirikere tore kãkiti ïronakikoãtaã, ipïkari imipokĩkaãka sitatxi mapara. Sito imatonõkari oimi ipĩpe. Oa sito tikinitakoro. Kaiãopokori kãkiti sitatxi auakani pokĩka oakata sikani. ¹³Apiananiri atamatakasaakiro, iamoniãkaro oa, ininiã:

—!Pitxiapatape —itxaro.

¹⁴Isa ipïkarimoni. Imaãtakari ipïkari auini kaixati, ininiã iua kaixa anikakani iotoka. Iuasaaki iua akiritari:

—ãtokori, nipaniãtai põkitikaua —itxa Xesosi.

¹⁵Iuasaakipeka iua ãtokori topãka, sãkirauata itxa. Ininiã Xesosi sikari iua inoromoni.

¹⁶Ikinimane pïkarauata.

—Peerekari Teoso. Teoso iokanatarari isãkire sãpiretakari apiatakari atemoni. Teoso apokapeka ïkorapokoriti ate inakitiakori imoianatini ïkapani —itxanãtana ninoa.

17Ia Xesosi pirena iaripireta ikini tōpati Xotéia tōpa. Apaka apikoxiti Xesosi pirena kenakopiretaāka.

Xoão Kapatxisareri Pimaākiti Sākiretxiti

(Mateo 11.2-19)

18Xoão kapatxisareri moianariakori minapiretari Xesosi pirena Xoãomoni. Eereka Xoão akiritari imoianariakori ipi:

19—Hisa Xesosimoni. Hīpimaāri: “Teoso mereēkitikai pite? Kākiti iāpapanātakitikai pite? Kākiti iāpapanātakiti ātikani atxiīti?” Ikara atoko hītxako Xesosimoni —Xoão txana ninoa.

20Ininiā ninoa ipi sari Xesosimoni. Iuamoni apoka itxana.

—Xoão kapatxisareri iokanataua ate pitemoni. Ipimaāi: “Teoso mereēkitikai pite? Kākiti iāpapanātakitikai pite? Kākiti iāpapanātakiti ātikani atxiīti?” itxai —itxana.

21Iuasaaki ninoa Xesosimoni apokasaaki, amianatakani kaiāopoko erekapeka itxīkitaka Xesosi. Iua omitikari maerekani matamatakoni kākiti itotaā auakani. Mōsiāreni kōsiārepeka itxīkitaka. 22Ininiā Xesosi apakapapiretana Xoão moianariakori: —Hīkanapiriā Xoãomoni. Hīsāpiretari mixikanani uai hītikakiti, hīkenakotakiti pakini. Hīsāpiretari mitxi mōsiāreni uatxa kōsiārepeka nitxīkitakapeka. Hīsāpiretari mitxi matīpokotakani tīpokotapeka uatxa. Mitxi maere matati erekapeka uatxa. Mitxi makenakokini uatxa kakenakokipeka. Mitxi ipīkani iuaīkana auāki itxapekana. Hīsāpiretari Xoão, nota sāpiretari Teoso iokanapirena erekari minakati mauakinimoni. 23Kākiti iteene auikiniāri nota sākire, Teoso takari erekari iuamoni. Ikara nisākire hīsāpiretari Xoão —itxa Xesosi.

Xoão Kapatxisareri Pirena

24Ininiā ninoa Xoão moianariakori sipe. Eereka Xesosi sāpiretari Xoão pirena kākiti iuamoni apotiitakaniua.

—Kipa īkai hīte Xoão kapatxisarerimoni hīsikasaaki āparaā makipakaniātaā iua auakasaaki? Hīte sari iuamoni, kotxi isākire ātinoka, Teoso sākirenoka. Kākiti katsotati itima anikakiti atoko itxa. Isākire kita āti, isākire uatxa ātiāo, isākire katana iuaīkana ātiāo, itxaāpota isākire. Ikara atoko !itxa Xoão. 25Kipa īkai hīte Xoãomoni hīsikasaaki? Hīte sari iuamoni, kotxi !nirekari tiitxi, txineiro pakini. !Kakaroneri imāka, kotxi !likaikota auītetxi aapoko. Auītetxi auiniātaā kākiti māka peereri. 26Kipa īkai hīte iuamoni hīsikasaaki? Hīte sari

iuamoni, kotxi iua Teoso sãkire sãpiretakari itxaua. Atão inakari Teoso sãkire sãpiretakari itxaua. Apiata iua Xoão. ²⁷Apiata iua, kotxi kitxakapirĩka Teoso sãkire iøkatsopatakori sãpiretapekari Xoão pirena:

Ia kiki nisãkire sãpiretakari. Niokanatarari iua kãkitimoni, pite nimerẽekiti sini apisa, papokini isãpiretini ãkapani, kãkiti iposope inini ãkapani,

itxa Teoso sãkire iøkatsopatakori.

²⁸Iuaĩkana Xesosi txana kãkiti:

—Atão nisãpiretai, ãti Xoão atoko inakari !auari. Xoão apiata. Iuaritika kãkiti Teoso auĩtetakari poiãori inakari apia imarotariko Teoso kamakiti tĩkane —itxa Xesosi.

²⁹Ikinimane kãkiti, txineiro apakapakani apaka kenakotakasaakiri Xesosi sãkire, imarotarina Teoso nireẽkiti kãkiti kamini ãkapani atão inini, kotxi ninoa sari Xoãomoni ipatxisatikona ãkapani. ³⁰Txamari pariseoakori, Teoso paniãtakiti oerekakani pakini !inirekari Xoão patxisatinina ninoa, ininiãkara Teoso nireẽkiti iaõka !inirekana ikaminina.

Kãkiti ãkorasaaki Auakani

³¹Xesosi sãpirenauatapanika:

—Kiãtokopa itxana kãkiti ãkorasaaki auakani? ³²Amarini sarauatini atoko itxana ãkorasaaki auakani. Ninoa amarini topãkanãta tiitxi amotikoãtaã. Ipixini amarini tsoanãta. Itxana apanakinimoni: “Ate xikarauata hĩte serenini ãkapani, txamari !hĩserena. Kãkiti ipĩkasaaki xikariti axikareta, txamari !hĩtxiapata.” Ninoa amarini sarauatini atoko itxana ãkorasaaki auakani, ³³kotxi Xoão kapatxisareri apoka ãkorapokoriti. Itakanapari inikini Teoso imisãkiretini ãkapani. !ãtari ovaã. Iuaritika hĩte txari: “Maerekati matamatakoti auãĩtotari Xoão,” hĩtxari. ³⁴Nota hĩtari iaxitikiri apoka ãkorapokoriti. !Nitakanapari ninikini. Ikinioĩtika ninipokota. Niãtari ovaã. Ininiã hĩte txari: “Iua kiki ixori. Poãtakari iua. Iua moianatana txineiro apakapakani, kãkiti maerekati kamakani,” himisãkirepiretano. ³⁵Paimatireri Teoso. Iua nakitiakori imarotari isãkire atão ininiua —itxa Xesosi.

Sito Arokari Xesosi Kiti Oãtsã

³⁶ãti õti pariseo Simão inakori aiatari Xesosi inipokotini iuakata, ininiã Xesosi sari iua aapoko. Iuaã apoka atoko iitopãka inipokotini ãkapani. ³⁷Simão auini sitatxiti oãua sito kanokarero.

Oa kenakopiretari Xesosi iua pariseo aapoko inipokotini, ininiã oa anikaro kamariãro iuamoni. Kopitipaki kai arapástiro kamakori âki oãua kamariãro. Xãpoka. ³⁸Otima Xesosi kiti takote. Otxiapanãta. Oãtsaã oãrokari ikiti. Okaxipokari oiãkoã. Ikiti oãpítxoka. Eereka okitakari kamariãro ikiti nopini.

³⁹Iua Simão atamatakasaakiro Xesosi kiti oãrokini, ãkixinireẽ ixinikari:

—Xesosi atão Teoso sãkire sãpiretakari inaãkamako, imarotamaroko oa sito iua maãtakakaro. Imarotamaroko maerekati kamakaro oa —itxa ãkixinireẽ.

⁴⁰Ininiã Xesosi:

—Simão, ninirekari nimisãkiretinii —itxa.

—Ei, koerekareri, pisãkirauata —itxa Simão.

⁴¹Ininiã Xesosi:

—Ipi kiki apakapari txineiro sikakari txineirote.

Imikanapiriãpanikaroko txineiro isikakito. ãti apakapari isikakito txineiro kaiãopokoro, kiëtosi txineirota. ãtipekana apakapari isikakito poiãonoka, síkoëta txineirota. ⁴²Ninoa ipi !liposotaikarina iuaãkana txineiro isikinirina txineiro sikakarimoni, kotxi !oãuaika. Iuaritika iua xipokari ninoa kõtane. !nirekaikaro itxineirote. Ininiãkara !kiripa ninoa kiki ipi apia apokaerekatari iua txineiro sikakari? —Xesosi pimaãri Simão.

⁴³Ininiã Simão:

—Niuãkatari kiëtosi txineirota apakapakari. Iua apia apokaerekatari txineiro sikakari, kotxi iua apakaparo kaiãopokoro txineiro —itxa.

—Iuapitikara —itxa Xesosi.

⁴⁴Iuasaaki Xesosi sapotorika sitomoni. Itxari Simãomoni:

—Patamatataro oia sito? Nĩroã pite aapoko, txamari kona pite sikano áparaã nikiti narokini !kapani. Oia arokapakari nikiti oãtsaã. Oiãkoã okaxipokari. ⁴⁵Uai napokasaaki kona pite apítxokano. Oia !iotoka nikiti oãpítxokini. ⁴⁶Pite na takari !itxi nikiã. Oia kitakari kamariãro nikitiã. ⁴⁷Oia iteene tirtano, ininiã aimarotari omaerekani kaiãopokori makatxakaãkapeka. Kãkiti poiãonoka tirtakasaakino, aimarotari imaerekani poião inakari makatxakaãkapeka —itxa Xesosi.

⁴⁸Iuasaaki Xesosi sãpiretaro:

—Nimakatxakapekari pimaerekani —itxaro oa sito.

⁴⁹Xesosikata nipokonãtakani ãkixinireẽna ixinikanãtarina:

—Kiritipita ia kiki atxiíti? Iua makatxakatari kākiti maerekani?
—itxanātana ninoa.

⁵⁰Iuasaaki Xesosi txaro oa sito:

—Atão pauikari nisākire, ininiākara pimaerekani makatxakaãkapeka. Pisipiniikaua erekaxinirepeka pinini —itxaro oa.

Sitoãkini Xesosi Moianatakani

8 ¹Mapaōti napaãka atoko Xesosi sari āti sitatxitimoni, ininiã eereka āti sitatxitimoni isa, itxaãpota. Isãpiretari erekari pirena Teoso auítetxi ininiãua. Imoianariakori tosi pakini sari iuakata. ²Sitoakoro apaka sari iuakata. Mitxipe Xesosi erekapeka txíkitakana ninoa sito. Mitxipe ātikaka amianata. Mitxipe maerekati matamatakoti auaitotana ātikaka. Maria Matarena inakoro sari iuakata. Mitxipe Xesosi omitikana maerekani matamatakoni setxi pakini oïtoã auakani. ³Xoana inakoro, Kosa inakori tanoro, oa apaka sari Xesosikata. Kosa paríkauata auítetxi Erotxi inakorikata. Erotxi paniãtakiti ikama. Sosana inakoro apaka sari Xesosikata. Apanakini sitoakoro apaka sari iuakata. Ninoa sikari itxineirotena Xesosimoni, imoianariakori pakinimoni nipokori iamotinina íkapani.

Katakareri Pirena

(Mateo 13.1-9; Marko 4.1-9)

⁴Kākitipokoni apokaãpota Xesosimoni, āti sitatxitikini, iuaíkana āti sitatxitikini, iuaíkana āti sitatxitikini txaãpota apokinina Xesosimoni. Kākitipokoni apotiitakasaakiua Xesosikata, Xesosi sãpiretana ninoa sãpirenatxi atão inakari oerekiko.

⁵—Kiki sari ikikiote itakarauatini íkapani. Triko oki itaka. Okaãpotari. Okaãpotakasaakiro, kimaporíã apaka oãpoka oki okakiti. Eereka oki katxarataãka. Apanakini kotipiriki nika. ⁶Oki apoka kai nopini. Kai auiniãtaã kipatxi poiãonoka auari. Eereka ipitxaka, txamari pitxakakaro kotsa imiti masikaniã, ãparaã mauakaniã, opina. ⁷Triko oki apoka inako sauaki apaka. Eereka inako aneẽ takarikata, txamari inako matxorotakaro takari, ininiã opina. ⁸Oki apoka kipatxi erekari nopini apaka. Eereka takari pitxaka, aneẽ otxa. Eereka ominaua kaiãopokori. Triko katiã seĩ oki aua.

Xesosi sãkirauata iuaíkana:

—Kakenakokii, ininiã híkenakotariko nisākire —itxa Xesosi.

Kākiti Mimarotakiniti Xesosi Sāpiretini Pirena

(Mateo 13.10-23; Marko 4.10-20)

⁹Xesosi moianariakori pimaāri iua:

—Poerekaua ikara sāpirenatxi atāo inakari oerekiko pisāpiretakiti. !Aimarotari mixikanani pisāpiretakiti.

¹⁰Ininiā Xesosi:

—Nisāpiretapitikaiko hīte Teoso auītetxi ininiāua, ininiā hīte imarotari. Apanakini !imarotari hīte imarotakiti Teoso auītetxi ininiāua. Ninoa apanakinimoni nisāpiretari sāpirenatxi atāo inakari oerekiko. Ninoa kenakotari, txamari !imarotarina nisāpiretakiti sākiretxiti, kotxi kitxakapirīka Teoso sākire sāpiretakani sāpiretari:

Kokiri kākiti, txamari !atamatari Teoso kamakiti.

Karokokenakokiri kākiti, txamari !ikenakotari Teoso sākire.

¹¹—Noerekai hīte ikara sāpirenatxi atāo inakari oerekiko, kiki takarauatini pirena. Triko oki atoko itxa Teoso sākire.

¹²Apanakini kākiti kimapori atoko itxa. Ninoa kenakotari Teoso sākire, kimapori nopini oki apokini atoko itxa. Txamari Satanasi apoka kotipiriki apokini atoko. Imaktxakari Teoso sākire ākixinireēna apokakari, ininiā ninoa !auikaikari Teoso sākire, ininiā Teoso !imaktxakari ninoa maerekani.

¹³—Apanakini kākiti kai auiniātaā atoko itxa. Ninoa kenakotari Teoso sākire, ininiā ipotxtarina. Txamari oki kipatxi poiāo nopini apokini atoko, Teoso sākire !īroā ninoa ākixinireē. Mapa kasiriti ninoa auikari Teoso sākire atxiīti. Eereka imisiritaākana Teoso sākire auikinina xika, ininiā itakanaparina Teoso sākire.

¹⁴—Apanakini kākiti inako auiniātaā atoko itxa. Ninoa kenakotari Teoso sākire. Eereka ninoa maerekaxinirenoka itxana. Inirekarina txineiro, tiitxi pakini. Inirekarina isarauatinina. Inako atoko itxa txineiro, tiitxi, isarauatinina, maerekaxinirenoka ininina pakini. Ininiā !ixinikaikarina Teoso. Oki inako sauaki pitxakakaro !ominaua. Iua atokokana, ninoa kākiti !ikamari erekari Teoso !kapani.

¹⁵—Apanakini kākiti kipatxi erekari atoko itxa. Ninoa kenakotari Teoso sākire. Teoso sākire !īroā ninoa ākixinireē ikaikotini !kapani. Erekari ninoa ākixinire. Ninoa nirekari Teoso paniātakiti ikaminina ikiniōtika. Eereka ninoa kamapitikari erekari Teoso !kapani.

Tirikapi Pirena*(Marko 4.21-25)*

16—Tirikapi iopotokaãkari iomaãtatari tirikapi kopiti áki atxiíti? Isĩkatatxi patapi itakatari atxiíti? Konapitini. Itano itakari tirikapi, ininiã iopinikari aapokotxi áki ãroãkani atamarauatini ãkapani.
17Ikinika iomaãtakori atamataãkako. Ikinika ipatakori apokaãkako, iopinikaremoni anikaãkako.

18—Erepaniko. Iteene pikenakotariko Teoso sãkire, kotxi isãkire auakiti, Teoso sãkire kãpitakari, Teoso sikari apikomoni imaroretxi iuamoni. Txamari Teoso sãkire kenakotakari, isãkire makãpitakati, imarore xapiti iuamoni auakari makatxakaãkako —itxa Xesosi.

Xesosi Inoro, Itariakori Pakini*(Mateo 12.46; Marko 3.31-35)*

19Xesosi sãpirenauanãtakasaaki, inoro, itariakori pakini apoka iuaãtaã. Inirekamarina Xesosimoni apokinina, txamari kãkitipokoni ákitari iua. 20Iusaaki kãkiti txari Xesosi:

—Pinoro, pitariakori porikiti auanãta. Inirekarina imisãkiretinii —itxana.

21Ininiã Xesosi sãpiretari ikinimane:

—Teoso sãkire kenakotakani, isãkire kãpitakani, ninoro atoko itxauana. Nitariakori atoko itxauana —itxa Xesosi.

Xesosi Iotokakiniri Ìtima*(Mateo 8.23-27; Marko 4.35-41)*

22Ãti õti Xesosi iereẽtaua kanaua áki imoianariakorikata. Aiatana: —Masa ipoa ipiniã —itxana imoianariakori.

Ininiã ãpiriãtana. 23ãpiriãtakasaakina, Xesosi imaka. Mokatanitika ãtima inataparata. Kataparari ãtima apokasaaki, tsakati kataparari apaka, ininiã ierepeẽpokataua. Iusaaki kanaua áki ãparaã xãpokaãpokata. Pamonõkoniri. 24Xesosi moianariakori õpiriãkari.

—Apiananiri, Apiananiri, pimereka. Apinanapanoka.

Ininiã Xesosi õkitikaua. Ipaniãtari ãtima, tsakati pakini iotokini: —Hiotokako —itxa.

Iusaakipeka ãtima, tsakati pakini iotoka. Itsoriãkaãta. 25Iusaaki Xesosi txari imoianariakori:

—Kinirepa hĩte !auikano nota?

Itsorĩkaãkatana, ipĩkarauakatana. Ninoakakarika isãkirauatana:
—Kinakaripa ia kiki? Iua paniãtari ãtima, tsakati pakini iotokini,
ininiã ninoa kĩpitari isãkire —itxakakana.

Kiki Maerekani Matamatakoni Auaĩtotakiti

(Mateo 8.28-34; Marko 5.1-20)

²⁶Eereka ipoa ipiniã apokana Xesosi imoianariakorikata. Ninoa potorikiniãtaã Kariréia tōpa. Ninoa apokiniãtaã Xerasa tōpa.
²⁷Xesosi kanĩkiitakasaaki, kiki apoka iuamoni. Xerasa sitatxitikiri iua. Maerekani matamatakoni auaĩtotari iua. Okananipe !itakaikari imãka. !Inirekari aapoko ãki ikaikotini. Akauariã auanãta.
²⁸Atamatakasaakiri Xesosi, akiripoakata. Iriãkata Xesosi apisatoõ. Maerekati matamatakoti akiritari Xesosi:

—Xesosi, Teoso ãkiri, Apiananiri ãkiri, kiatokopa pitxanoko?
Namanaã !pimisiritapeno —itxa.

²⁹Ikara atoko itxa isãkire, kotxi Xesosi paniãtana maerekani matamatakoni takanapiniri iua kiki. Mitxi inirimane iĩtxikapiimari iĩto imasikani ãkapani. Iĩtxikarina iuako, ikiti kohẽtxiã. Txamari maerekati matamatakoti itotapekari imaĩkiniri, ininiã iua kiki kapatakari kohẽtxi. Maerekati matamatakoti txĩkitakari iua kiki mitekini kãkiti mauakaniãtaã.

³⁰Xesosi aõkitakasaakiri iua kiki, ipimaãri:

—Kipa piuãka?

Ininiã maerekati matamatakoti txari:

—Nota uãka “Itori,” ninaãka —itxa.

Ikara atoko iuãka, kotxi itori maerekani matamatakoni auaĩtotari iua kiki. ³¹Maerekati matamatakoti amanaãri Xesosi:

—Aariko mamapotõkire irikotimoni !piokanatapeua ate —itxa.

³²Iuaãtaã auari kaiãopokori irariakori piratakoni. Inipokonãtana oxiratarari nopini. Maerekati matamatakoni amanaãri Xesosi:

—Pauritaua irariakori ãki aĩroini —itxana.

Ininiã Xesosi auiritana. ³³Ininiã ninoa takanapari iua kiki. Irariakori ãto ãki ãroãna. Iuasaakipeka ikinika irari miteẽkata. Iokiriĩkatana oxiratarari. Kãuaãriãmoni ikomoãkatana, ipĩpe itxana irariakori.

³⁴Kikiakori irari piratakani itikari irari mitekini, ininiã imitekana sitatximoni. Anikapiretarina itikakitina sitatxi auakanimoni, sitatxi mapara auakanimoni apaka. ³⁵Ininiãkara kãkiti sari Xesosimoni ikamakiti imarotinina ãkapani. Ninoa apoka iuamoni. Atamatarina

iuu kiki mitxi maerekani matamatakoni auaĩtotakiti. Iitopãkanãta Xesosi apisatoõ. Kamãkapekari. Kiikitepekari apaka. Ininiã iuusaaki ninoa kãkiti pĩkari Xesosi posotiire. ³⁶Xesosi kamakiti itikakani sãpiretari ninoa kãkiti, Xesosi erekapeka itxĩkitakiniri iua kiki. ³⁷Eereka ikinimane kãkiti Xerasa tõpa auakani paniãtari Xesosi ãtiãtaã isini ipĩkarena xika. Ininiã Xesosi iereẽtaua kanaua ãki ipoa iuaĩkana ipiriãtini ĩkapani. ³⁸Iua kiki mitxi maerekani matamatakoni auaĩtotakiti amanaãri Xesosi:

—Pauiritano pitekata nisini.

Txamari Xesosi iokanatarari aapokomoni.

³⁹—Pikanapiriã paapokomoni. Pisãpiretari kãkiti Teoso kamakiti pitemoni —itxa Xesosi.

Ininiã iua sari ikini aapokotxitimoni. Isãpiretari ikinimane kãkiti Xesosi kaminiri iua erekapeka inini.

Xáiro Amanaãkiti Pirena

(Mateo 9.18-19; Marko 5.25-34)

⁴⁰Xesosi kanapiripe, ipoa ipiriãtini. Apokitakasaaki, kãkitipokoni apakapari Xesosi ipoxokoniritikana. Ninoa iãtapanãtari iua, ipiniã iua auakasaaki. ⁴¹Iuusaaki kiki Xáiro inakori apoka iuaã. Iua auĩtetxi itxaua aiko Xoteo apotiitiniãtaãua. Apoka Xesosimoni. Ikapotoreẽkaua Xesosi apisatoõ.

—Masa naapoko. ⁴²Nota ãkero imatonõkaro, tosi ano auakaro, opinanapanoka —itxari Xesosi.

Iuakata Xesosi sikasaaki, kãkitipokoni ãkitari iua, ininiã ikaiarikaãpotana kãkiti.

Xesosi Mãka Maãtakararo

(Mateo 9.20-22; Marko 5.25-34)

⁴³Kãkiti sauaki oãua sito amianatakaro. Tosi ano oamianata oãrẽka !iotokinaro. Otxineirote !auaika, kotxi okinika otxineiroteẽ oĩkitxitapekari pinĩtxi siãkani, txamari erekapeka otxĩkitakakiri !uari. ⁴⁴Kãkiti sauaki oãpoka Xesosi porikimoni. Omaãtakari imãka mapotomatare. Omaãtakasaakipeka, oãrẽka iotoka. ⁴⁵Ininiã Xesosi pimaãri kãkiti:

—Kipa maãtakano?

Ikinimane kãkiti:

—!Ateni —itxana.

Ininiã Petro:

—Apiananiri, kãkitipokoni ãkitai. Ikinimane kãkiti tikakai.

⁴⁶Txamari Xesosi:

—Kãkiti maãtakapitikano, kotxi iuusaaki nitapara sari iuamoni.

⁴⁷Iuusaaki oa sito imarotari Xesosi imarotiniro oa maãtakiniri.

Ininiã osa Xesosimoni otitinanakiniritika. Okapotoreẽkaua iua apisatoõ. Ikinimane okiãtaã osãpiretari Xesosi:

—Notara maãtakai namianatiniã. Nimaãtakasaakii, iuusaakipeka erekapekano —otxari.

⁴⁸Ininiã Xesosi:

—Namarite, pauikari niposotiire, ininiãkara erekapekai.

Pisipiniikaua erekaxinirepeka pinini —itxaro.

Xáiro ãkero Õkitikiko

(Mateo 9.23-26; Marko 5.35-43)

⁴⁹Xesosi sãkirauanãtakasaaki, Xáiro aapoko potoriãkari apoka Xáiromoni.

—Pamarite !oãuaika. Pauiritari Xesosi kanapiriini —itxa.

⁵⁰Xesosi kenakotari iminapiretakiti, ininiã Xesosi txari:

—!Pipĩkarauatape. Pauikari nisãkire, ininiã iuaĩkana oãuapanikako pamarite —Xesosi txari Xáiro.

⁵¹Xesosi apokasaaki Xáiro aapoko, auiritana Petro, Xoão, Txiako, Xáiro, Xáiro ïtanoro pakini ïroini iuakata.

⁵²Iuaãtaã ikinimane kãkiti txiapanãta. Imatinaniuatana amarini ipinini xika. Ininiã Xesosi:

—!Hĩtxiapatape. !Opina. Oimakanãta —itxa.

⁵³Ininiã ninoa napetari Xesosi, kotxi imarotarina amarini ipinini.

⁵⁴Ininiã Xesosi paniãtana ninoa porikiti ipokĩkinina. Eereka Xesosi maĩkaro oa ãtokoro uako, akirita itxaro:

—Ãtokoro, põkitikaua.

⁵⁵Iuusaakipeka iuaĩkana oa auãkipeka otxa. Oõkitikaua. Xesosi paniãtana oĩri, onoro pakini nipokori isikinirona. ⁵⁶Oĩri, onoro pakini tsorĩkaãta. Xesosi sãpiretana apanakini imasãpiretakanina ïkapani.

Xesosi Iokanatana Imoianariakori Kãkitimoni

(Mateo 10.5-15; Marko 6.6-13)

9 ¹Xesosi akiritana imoianariakori tosi apotiitiniuana ïkapani. Iuusaaki isikataparatanã. Isikaposotiiretana maerekani

matamatakoni iokanatinina ĩkapani, amianari imaktxakinina ĩkapani. ²Eereka iokanatana imoianariakori kãkitimoni Teoso auĩtetxi ininiãua isãpiretinina ĩkapani, amianatakani erekapeka itxĩkitakinina ĩkapani. ³Xesosi txana ninoa:

—Hĩsikasaaki, !hanikapiri hĩtii. Na hĩtsonere !hanikape. Na sakora, na nipokori, na txineiro, na ãti himãka, !hanikape. ⁴Kãkiti apakapakasaakii, iuaã ninoa aapoko hĩkaikota iua sitatxiti hãuakasaaki. ⁵Kãkiti mapakapakaniãi, hĩtakanapari iua sitatxiti. Hõsipikasaakiri, hĩkaxipokariko kipatxi hĩkitiãkiri. Ikara oerekana iua sitatxiti auakani Teoso misiritanako ninoa, kotxi !nirekarina ikenakotinirina Teoso sãkire —itxa Xesosi imoianariakorimoni.

⁶Eereka imoianariakori potorika. Ninoa sari ikinipoko aapokotxiti. Isãpiretarina Teoso iokanapirena erekari aapokotxiã auakanimoni. Erekapeka itxĩkitakana amianatakani ikini aapokotxiti auakani.

Erotxi Nirekari Xesosi Aõkitini

(Mateo 14.1-12; Marko 6.14-29)

⁷Erotxi Kariréia tõpa auakani auĩte kenakopiretari Xesosi pirena. Maerekaxiniretinoka itxa, kotxi kãkiti sãpiretari:

—Xoão kapatxisareri iuaĩkana auãki itxapekava. Iuara Xesosi txava —itxana.

⁸Apanakini sãpiretari:

—Eríasi iuaĩkana uatxa auãki itxapekava. Iuara Xesosi txava —itxana. Apanakinipekana:

—Teoso sãkire sãpiretakari kitxakapirĩka auakari iuaĩkana uatxa auãki itxapekava. Iuara Xesosi txava —itxana.

⁹Erotxi txari:

—Notara paniãtari Xoão nopi tsoatakiko, ininiã Xesosi kona Xoãoni. Kiripitipa Xesosi? ãtipirika nikenakopiretari iposotiire —itxa Erotxi. Kinirão aõkitaka itxari Xesosi.

Sĩko Mio Kãkiti Xesosi Sikakienatini

(Mateo 14.13-21; Marko 6.30-44; Xoão 6.1-14)

¹⁰Ninoa Xesosi iokanatakini kanapiripeka iuamoni. Ikinika ikamakitina isãpiretarina Xesosi. Eereka Xesosi anikana ninoa kãkiti mauakaniãtaã, Petsáita sitatxiti takote. Ninoanoka sari iuaã. ¹¹Txamari apanakini kenakopiretari Xesosi sinimoni, ininiã kãkitipokoni sari iua tikini. Ninoa apokasaaki Xesosimoni, Xesosi

apakapana ipoxokoniritika. Isãpiretana Teoso auĩtetxi ininiãua. Erekapeka itxĩkitakana amianatakani.

¹²Tinĩtikita imoianariakori tosi pakini apoka iuamoni:

—Piokanatanana kãkiti aapokotxi imatokotinimoni inipokotinina ĩkapani, imakinina ĩkapani, kotxi uai aapokotxi mauakaniãtaã — itxarina Xesosi.

¹³Txamari Xesosi txana:

—Hĩtekarako sikakienatana ninoa.

Ininiã ninoa:

—Poiãonoka nipokori aua atemoni, sĩkonoka komiri, ipinoka ximaki pakininokara aua. !Apakata aiamotiniri nipokori kaiãopokori kãkiti asikakienatini ĩkapani —itxarina Xesosi.

¹⁴Iuaãtaã kikiakorinoka sĩko mio auakata. Xesosi paniãtana imoianariakori:

—Hĩpaniãtari kãkiti topãkini, uai sĩkoẽta, apikomoni iuaĩkana sĩkoẽta, apikomoni iuaĩkana sĩkoẽta, txaãpokata kãkiti —itxa.

¹⁵Ininiã imoianariakori paniãtari kãkiti ikara atoko iitopãkinina. Ininiã ninoa topãka. ¹⁶Iuasaaki Xesosi kosekari komiri sĩko, ximaki ipi pakini. Iaxiti ionakaãta, misãkireta itxari Teoso:

—Peerekari ia nipokori pisikakiti —itxa.

Iuasaaki ixanakari komiri, ximaki pakini, sika itxari imoianariakorimoni, ininiã ninoa sikari kãkitimoni. ¹⁷Ikinimane nikari, kamitopeka itxana. Eereka Xesosi moianariakori amari nipokori itetakori. Ixãpokakarina kotari tosi pakini.

Petro Auikari Xesosi Teoso Mereẽkiti Ininiãua

(Mateo 16.13-20; Marko 8.27-30)

¹⁸Ãti õti Xesosi iuanani misãkiretari Teoso. Eereka imoianariakori apoka iuamoni. Ipimaãna:

—Kiripa kãkiti uãkatano nota? —itxa.

¹⁹Ininiã ninoa:

—Apanakini xinikakiti pite Xoão kapatxisareri pitxaua. Apanakinipekana xinikakiti pite Erãsi pitxaua. Apanakinipekana xinikakiti pite Teoso sãkire sãpiretakari kitxakapirĩka auakari iuaĩkana auãki inakari pitxaua —itxarina Xesosi.

²⁰Ininiã Xesosi:

—Hĩtepekana, kipa hĩte uãkatano nota? —itxa.

Petro apakapapiretari:

—Pite Teoso mereẽkiti kãkiti iãtapanãtakiti pitxaua —itxa.

²¹Ininiã Xesosi iteene pinitari ikara apanakinimoni imasãpiretakani.

Xesosi Sãpiretari Ipinini

(Mateo 16.21-28; Marko 8.31-9.1)

²²Ininiã Xesosi:

—Nota hĩtari iaxitikiri iteene natatsiitariko nimisiritiko.

Kiomãtxiakori, sasetotxi auĩteakori, kaiõkatsoparerini pakini linirekano nota, ininiã nokaãkako. Ipi ãti õtisaaki Teoso õkitikanoko nota iuaĩkana auãki ninini ãkapani —itxari imoianariakori.

Xesosi Moianari Atão Inakari

(Mateo 16.24-28; Marko 8.34-38)

²³Eereka isãpiretari ikinimane:

—Notakata kinirão sika pinakasaaki, piteka pinireẽkiti kona pixinikape. Notakata kinirão sika pinakasaaki, nota misiritiko atokokana pimisiritaãkako. Ia atoko pinirekiniã ikiniõtika, notakata pisapitikako. ²⁴Pite ãtipirika kaminiãri piteka nireẽkitinoka, ininiã pinireẽkiti xipokapitikako pitekata. Pite nireẽkiti xipokiniã, nota sãkire pauikini xika, Teoso iokanapirena erekari pisãpiretini xika, pite auapininiika txako Teosokata. ²⁵Atxiĩti papakapari ikinipoko tiitxi, ikini itixiti auakani tii, pinakiti ãkapani. Atxiĩti iua tiitxi xika kona pikĩpitari Teoso sãkire, ininiã kona pikaikota ãtipirika Teosokata. Ikara atoko ininiã, erekari atxiĩti ikinipoko tiitxi auinii? Konapitini. Apiaerekata Teosokata ãtipirika pikaikotini. ²⁶Pipẽtatiniãno nota, pipẽtatiniãri nisãkire, nota kãkiti itari iaxitikiri pẽtataiko pite uai nikanapiriãkasaaki. Peerekari iuasaaki uai nikanapiriini õti. Iuasaaki kãkiti imarotariko niposotiire, niri posotiire, initiriakori iaxitikini posotiire apaka. Teoso nitiriakori erekarini itxauana. ²⁷Atão nisãpiretai, apanakini hite uatxa uai auakanii, hĩpinini apisapanika himarotari Teoso auĩtetxi ininiãua —itxa Xesosi.

Moisesi, Erãsi Pakini

Xesosi Aõkitini

(Mateo 17.1-3; Marko 9.2-13)

²⁸Ãti semanati napaka atoko, Xesosi anikana Petro, Xoão, Txiako pakini. Ikanĩkana oxiratari nopini Teoso imisãkiretini ãkapani.

²⁹Teosokata isãkirauanãtakasaaki, itoõ ipinipo itxa, imãka ponika, kasarori. ³⁰Iuasaaki ipi kiki tokiã iuaã, Moisesi, Eríasi pakini. Isãkirauatana Xesosikata. ³¹Ninoa iotximere aua, kotxi ipotorikana Teoso tixine. Isãkirauatana Xesosikata, Xesosi ipinini pirena, mapa semanati napaka atoko Xerosareẽ ipinini Teoso paniãtakiti ikamini ìkapani. ³²Iuasaaki Petro, Xoõo, Txiako pakini imakanãta. Eereka imerekana. Atamatarina Xesosi iotximere. Atamatarina ninoa ipi kiki iuakata itiminina. ³³Moisesi, Eríasi, takapiretakasaakiri Xesosi, Petro akiritari Xesosi:

—Koerekareri, erekari uai akaikotini. Makamari papiri ipi ãti pakini, pite ìkapani, Moisesi ìkapani, Eríasi ìkapani —itxa.

Txamari maxikatiika isãkirauata. !Imarotari amanaãkiti.

³⁴Petro sãkirauanãtakasaaki, katxiãri apoka. Xesosi moianariakori pïkarauata katxiãri ãki auakasaakina. Katxiãri ãkitana. ³⁵Katxiãri ãki ikenakotaãka sãkiretxi:

—Ere namarite, nitiretakiti. Hïkenakotariko iua sãkire —itxa.

³⁶Isãkirauataka atoko Xesosi moianariakori atamatari Xesosinani. Eereka lisãpiretarina itikakitina apanakinimoni. Masãkirenika itxana.

Amarini Maerekati Matamatakoti Auaãtotakiti

(Mateo 17.14-20; Marko 9.14-29)

³⁷Katimatinãkata iokiriãtana. Iuasaaki kãkitipokoni apoka Xesosimoni. ³⁸Ninoa sauaki kiki akiritari Xesosi:

—Koerekareri, patamatari nota ãkiri imatonõkari namarite.

³⁹Ãtipirika maerekati matamatakoti maïkari iua. Iuasaaki akiripoakata, okarakataua. Isorikipekata inamamoni. Maerekati matamatakoti kamatsiitari namarite. Poiãonoka itakanapari. ⁴⁰Iteene namanaãpekarì pimoianariakori omitikiniri, txamari !iposotarina —itxa Xesosimoni.

⁴¹Ininiã Xesosi txari kãkitimoni:

—!Kauikarei hïte. Maerekati kamakanii hïte. Kipakinikananipa Teoso nirekatari hïtekata nauini? Kipakinikananipa Teoso nirekatari hïte nimïteenekini? —itxa.

Eereka ipaniãtari iua kiki:

—Pamarite pimina uai.

⁴²Iua amarini apokaãpotakasaaki, maerekati matamatakoti irikari ixiti. Amarini okarakataua. Xesosi paniãtari maerekati takanapiniri amarini. Erekapeka itxïkitakari amarini, ininiã isika iua iuaïkana irimoni. ⁴³Ikinimane tsorïkaãta Teoso posotiire itikasaakina.

Xesosi Iuaĩkana Sāpiretari Ipinini*(Mateo 17.22-23; Marko 9.30-32)*

Ikinimane tsorĩkaātakasaaki, Xesosi misākiretari imoianariakori.

44—!Himaxinĩkaretapiri uatxa nisāpiretakiti. Nota hĩtari iaxitikiri mĩkapiritaãkako. Nisikaãkako kãkitimoni ninoaka nirekakiti ikaminina ĩkapani —Xesosi txana ninoa.

45Imoianariakori kenakotari Xesosi sãkire, txamari limarotarina isāpiretakiti. Teoso !nirekari ninoa imarotiniiri Xesosi sãpiretakiti iusaaki. Ninoa pĩkari Xesosi ipimainina isãkire oerekinina ĩkapani.

Kiripa Kãkiti Apiatakari Txataua?*(Mateo 18.1-5; Marko 9.33-37)*

46Āti ōti Xesosi moianariakori !auikakauana isãkirena, kotxi inirekarina imarotiniirina apiatakari ninoa sauaki auakari. 47Xesosi imarotari ninoa xinikakiti, ininiã iminari amarini ninoamoni.

Xesosikata tima itxa amarini. 48Iusaaki Xesosi txana:

—Papakapiniãri amarini ia atoko inakari, papakapano nota apaka. Papakapiniãno nota, papakapari niokanatakiri apaka. Iuaka poiãotakakariua hĩte sauaki, iuarako apiatakari txauako —itxa Xesosi.

Kiki Maerekani Matamatakoni Omitiãkari*(Marko 9.38-41)*

49Xoão sãpiretari Xesosi:

—Koerekareri, ate kenakotari kiki omitikinina maerekani matamatakoni pite uãkaã. Ate sãpiretari iua kiki ikara atoko inakari imakamakani, kotxi kona pimoianarini iua —itxa.

50Ininiã Xesosi:

—!Hĩotokakapiri ikara atoko inakari ikamini, kotxi iua kiki !omanataua ate. Iua apamonĩkaua ate —itxa.

Samaria Auakani !Apakapari Xesosi

51Teoso tixine iuaĩkana Xesosi kanapiriini ōti apokaãpota, ininiã Xesosi ãkixinireẽ txari:

—Nisapitikako Xerosareẽmoni.

52Iokanatarari kãkiti iua apisa, imakiniãtaã initinina ĩkapani. Ipixinipokoriti ninoa kãkiti nitari imakiniãtaã aapokotxi Samaria auakani auiniãtaã. 53Txamari kãkiti iuaãtaã !nirekarina Xesosi

apakapinina, kotxi iua nirekari Xerosareẽmoni isini. Samaria auakani omanatana Xerosareẽ auakani. ⁵⁴Txiako, Xoão pakini kenakopiretari ikara ene. Iuasaaki ipimaãrina Xesosi:

—Apiananiri, pinirekatari aamanainiri Teoso xamina iaxitikiri iokanatini ninoamoni ixipokinirina ìkapani?

⁵⁵Txamari Xesosi pinitana, isãkirena maerekani xika.

⁵⁶—Nota, hõtari iaxitikiri kona kãkiti nixipokini ìkapanini napoka uai. Kãkiti maerekani nimakatxakini ìkapanira uaimoni nina —Xesosi txari Txiako, Xoão pakini.

Eereka ninoa sari apikoxiti apanakini kãkiti auiniãtaãmoni.

Kãkiti Xesosi Imoianatinina Nireẽkani

(Mateo 8.18-22)

⁵⁷Xesosi imoianariakorikata saãpotakasaaki kimaporiã, kiki txari Xesosi:

—Apiananiri, pite sinimoni nota apaka sako.

⁵⁸Ininiã Xesosi:

—Karikori aripa auini. Kakoari kotipiriki auini, txamari nota hõtari iaxitikiri nimakiniãtaã !auari. Pimoianatiniãno, ikara atoko pimisiritiko pinireka atxiĩti? —itxa Xesosi.

⁵⁹Xesosi txari ãti kiki:

—Notakata pisako.

Txamari iua kiki:

—Koerekareri, merepanika ninirekari niãtapiniri niri ipinini —itxa.

⁶⁰Ininiã Xesosi:

—Ikara piparĩka pauiritari ãti kamini. Piparĩka apiari uatxa aua. Pite sari kãkitimoni. Pisãpiretanako Teoso auĩtetxi ininiãua —itxa Xesosi iuamoni.

⁶¹Ãti kikipekana txari Xesosi:

—Koerekareri, nota pimoianari nitxamauako. Mitxi pauiritano nikanapiriini nauinimoni. Nitakapiretanapana ninirimane —itxari.

⁶²Ininiã Xesosi:

—Teoso kimaporeẽ potoriãkari nirekiniãri mitxi ikamakiti iuaĩkana ikamini, !apakata iparĩkauatini aãuĩte Teoso ìkapani —itxa Xesosi.

Xesosi Iokanatana Setẽta Pakini Kãkiti

10 ¹Ikara inaãka atoko Apiananiri mereẽna setẽta pakini kãkiti. Iokanatana ipi, iuaĩkana ipi, iuaĩkana ipi,

itxaãpotana iokanatinina. Iokanatana iua sini apisapanika ikini aapokotxitimoni. Ninoa ìkiiika. Apokana Xesosi apisa. ²Xesosi txana ninoa:

—Kaiãori kãkiti iposope auikiniri nisãkire, txamari !imarotarina nisãkire, kotxi !ikenakotapanirina. Ninoa kikio erekari atoko itxana. Imakinika iposope iuaã. Txamari, poiãoka parĩkauatakani aua nisãkire isãpiretinina ìkapani. Ininiãkara himisãkiretariko Apiananiri kakikioteri iokanatinina parĩkauatakani iua sãkire auiãkani apotiitinina ìkapani. ³Hisa. Soti auĩte anaakori ãkitimoni iokanatiko atoko, niokanatai hĩte kãkitimoni, kotxi pamonõkonina ninoa. ⁴Txineiro !hanikape. Tiitxi !hanikape. ãti hĩkiti mata !hanikape. Kimaporiãpoã kãkiti akiritakasaakii, !hĩotokaãpotape kãkitikata hĩsãkirauatini ìkapani. Hĩsapitiporiko niokanatinimoni. ⁵Kãkiti aapoko hãpokasaaki, merepitipanika hĩtxariko: “Namanaãri Teoso, ikamaerekaxiniretinina kãkiti uai auakani,” hĩtxako. ⁶Kaapokori nirekiniãri Teoso ikara atoko inakari ikaminana ninoa, Teoso kamapitikari hamanaãkiti. Kaapokori manirekakaniãri, hĩsãpiretana Teoso kona kamaerekaxiniretana ninoa. ⁷Kaapokori apakapiniãi hĩte, hĩkaikotako iua aapokonoka. ãti aapoko, eereka ãti aapoko kona hĩtxaãpotapeko iua sitatxiti hãuakasaaki. Iuaã ninoa sikakiti hinikini ìkapani, hiãtini ìkapani hãpakapariko. !Hĩpẽtauatape hãpakapiniri, kotxi hĩte nota ìkapani parĩkauatakani hĩtxaua. Apakatapitika hãpakapiniri hĩparĩka ìki.

⁸—Aapokotxiãtaã hãpokasaaki hãpakapikoã, iuaã hĩsikiko hinikako, hiãta hĩtxaãpotako. !Hĩxinikapiri ninoa sikakiti mapitxiri ininiua. Hinikariko. ⁹Erekepeka hĩtxĩkitakanako amianatakani iuaã auakani. Hĩsãpiretana ninoa, kaiaampekari Teoso ninoa auĩte ininiua tĩkane. ¹⁰Aapokotxiãtaã himapakapakoniã, hĩsa kãkiti napaãporetxiã. Hĩsãpiretana kãkiti iuaã auakani: ¹¹“Hãuiniãkiri pani akitiãkiri akaxipoka, kotxi !erekari uai, kotxi maerekati hĩkama ate himapakapakaniã. Hĩxinikariko, ate apoka uai Teoso auĩtetxi ininiãua asãpiretinii ìkapani, txamari !hinirekari.” Ikara atoko hĩtxa sãkiretako ninoamoni. ¹²Kãkiti misiritiko õtisaaki Teoso misiritanako kãkiti Sotoma sitatxiti auakani ninoa maerekani xika, txamari Teoso apia misiritanako iua aapokotxiti auakani hĩte mapakapakani, kotxi hĩte sãpiretana Teoso sãkire, iuaritika !auikarina. Kitxakapirĩka Teoso sãkire sãpiretakani !isana Sotoma sitatxitimoni —itxa Xesosi.

Kākiti Sitatxi Auakani Maerekati Matakanapakani

(Mateo 11.20-24)

¹³—Hīte Korasiī sitatxiti auakani inipitika atatsiitariko misirikaretxi. Hītepekana Petsáita sitatxiti auakani apaka atatsiitariko misirikaretxi, kotxi nota kamapekari posotiiretxi hīte sauaki, txamari !hītakanapari himaerekani. Ikara posotiiretxi Sitoō sitatxiti, Txiro sitatxiti pakini auaākamako, kākiti iuaā auakani uatxakapokoikamani itakanapamarinako maerekati ikamakitina. Ninoa sako mata ieretakamanako, atapani iītoāna itakamanako, imaerekanina itakanapinina oerekinina. ¹⁴Kākiti misiritiko ōti apokasaaki, Teoso misiritariko Txiro sitatxiti auakani, Sitoō sitatxiti auakani pakini, txamari iua apia misiritaiko hīte Petsáita sitatxiti auakani, hīte Korasiī sitatxiti auakani apaka. ¹⁵Hītepekana Kapanaoō sitatxiti auakani apiarini hinireka hininiāua, txamari maerekani misiritikoātaā iuamonirako hōkapeēkako —itxa Xesosi.

¹⁶Xesosi misākiretana imoianariakori:

—Hīte sākire kenakotakani kenakotari nota sākire apaka. Hīte mapakapakani !apakapano nota apaka. Nota mapakapakani !apakapari nota uaimoni iokanatakari apaka —itxana imoianariakori.

Setēta Pakini Kākiti Kanapiriini

¹⁷Ninoa setēta pakini kākiti kanapiriā. Poxokonoka itxakatana.

—Apiananiri, maerekani matamatakoni apaka kīpitari asākire, pite uākaā aiokanatakasaakina —itxarina Xesosi.

¹⁸Ininiā Xesosi:

—Ari, nitikapekari Teoso patimari iokanatiniri Satanasi, okaratxirari patimari imēkokini atoko itxa. ¹⁹Hīkenakota. Nota sikaposotiiretai hīte imini, kaxipiro pakini hīkatxaratini. Kona ioākai hīte. Amokaiakari Satanasi pataparari, iuaritika hīposota hīokanatiniri iua, kotxi nota sikataparatai hīte. !Auari hīte karotakani. ²⁰Hīpoxokoniua, kotxi maerekani matamatakoni kamari hīpaniātakiti. Apia hīpoxokoniua, kotxi hīuāka Teoso tixine aātsopateē iōkatsopatapeēkaika iuaā hīsini ikapani —Xesosi txana ninoa.

Xesosi Iri*(Mateo 11.25-27; 13.16-17)*

²¹Iuasaaki Erekarí Matamatakoti kamapoxokonitari Xesosi, ininiã Xesosi misãkiretari Teoso:

—Niri, pitixine auakani auĩte pitxaua. Uai ikini itixiti auakani auĩte apaka pitxaua. Peerekai pite, kotxi kimarorerini, iuikakaniuua kona poereka pimarore. Poiãorini, miuikakaniuua poereka pimarore. Ari niri, ikara atoko pinireka. Ikara atoko papokaerekata —itxari iri.

²²Eereka imisãkiretari kãkiti:

—Niri sikapekano ikinika. Kãkiti !imarotano nota Teoso ãkiri nininiuua. Nirinokara atão imarotano nota. Apaka kãkiti na atão imarotari niri. Notanokara imarotari niri, kotxi iua ãkiri nitxaua. Kãkiti nirekiniãri imarotiniri niri, nota oerekari niri iuamoni —itxa Xesosi.

²³Eereka Xesosi aua imoianariakorikata. Ninoanani aua iuakata. Imisãkiretana:

—Teoso sikari erekari hĩtemoni, kotxi hĩte atamatari nota kamakiti, hĩte kenakotari nota sãpiretakiti. ²⁴Nota sãpiretai hĩte. Kitxakapirĩka Teoso sãkire sãpiretakani, auĩtetxiakori pakini kinirão atamataka txari hĩte atamatakiti, txamari ninoa !atamatari. Ninoa nirekari hĩte kenakotakiti ikenakotinina, txamari !ikenakotarina —Xesosi txari imoianariakori.

Kiki Karotakori Tiretakari

²⁵Kiki Moisesi sãkire oerekakari apoka Xesosimoni. Inirekamari Xesosi kerokiniri isãkire.

—Koerekareri, kiripa nikama Teosokata ãtipirika nauini ãkapani? —itxa.

²⁶Ininiã Xesosi:

—Kiripa patatsopata Teoso aãtsopateẽ? Pisãpiretano Teoso paniãtakiti —itxari.

²⁷Ininiã iua kiki apakapapireta:

—Teoso paniãtaua: “Pitiretariko Apiananiri piTeosone, ikinipoko pinireẽkitiã, ikini pãkixinireẽ, ikini pitaparaxinireẽ, ikinipoko pixinikakitiã pakini.” Apaka Teoso paniãtaua: “Piteka pitiretiniãua atokotxikana, pitiretariko ãti,” itxa.

²⁸—Atãopitikara papakapapiretano. Ikara pikaminiã, pauapika ãtipirika Teosokata —itxa Xesosi.

²⁹Txamari iua kiki !inirekari ikara atoko inakari ikamini, ininiã iua pimaãri Xesosi:

—Kiripa ãti nitiretini ïkapani?

³⁰Xesosi apakapapiretari, ia sãpirenatxi atão inakari oerekiko isãpiretini:

—Kiki potorika Xerosareẽ. Inirekari Xerikoo sitatxitimoni isini. Ipixinipokoriti kiïtiririni maïkari iua. Iïtirïkarina imãka, itii pakini, noropata, karota, itxarina. Mauãkixiniretinoka itakanaparina iua kiki. ³¹Iuusaaki sasetotxi iãpota iua kimaporiti. Iua atamatari iua kiki karotakori, txamari !imaãkatari. Iopiriãri, napa, ïkorape itxa. ³²Eereka kiki Arevii apika mekaniri, sasetotxiakori moianatakari apoka. Iua apaka atamatari iua kiki karotakori, txamari iua sasetotxi atokokana !imaãkatari. Iopiriãri, napa, ïkorape itxa. ³³Eereka kiki Samaria tãpakiri iãpota iua kimaporiti. Iua apoka iuaã. Atamatari iua kiki maïkapekori, ininiã iua amonïkari. ³⁴Iuamoni isa. Arokari ikaro ipiniã. Ipitari ikaro iïtxiã. Mãkatxi mataã iapirika itxari ikaro. Eereka õkitika itxari, ipira poho nopini taka itxari. Anikari kãkiti imakiniãtaã aikotimoni. Iuaã imoiaãri. ³⁵Katimatiniãkata isikari txineiro kaapokorimoni. Ipi ota pirata kamakori isika. “Nisipekako. Pite moiaãriko ia kiki. Apikomonipanika txineiro pinirekiniã ikiena ïkapani, nikanapiriãkasaaki niïkitxitai,” itxa Samariakiri, —itxa Xesosi Moisesi sãkire oerekakarimoni.

³⁶Xesosi pimaãri iua:

—Ipi ãti kikiakori iãpota iua kimapori. ïkiripa iua kiki kiïtiririni maïkakiti tiretakari? —itxa.

³⁷Ininiã iua Moisesi sãkire oerekakari:

—Ari, Samariakirinokara turetari iua —itxa.

Ininiã Xesosi:

—Pisipe. Samariakiri kamakiti atoko inakari pikamako, kotxi iua turetari ãti.

Xesosi Motikaẽtaro

Mata, Maria Pakini

³⁸Xesosi imoianariakorikata sipeka. Apokana aapokotxiãtaã. Iuaã sito Mata inakoro apakapana oaãpoko. ³⁹Oïtaro Maria inakoro topãka Apiananiri takote isãkire okenakotini ïkapani. ⁴⁰Mata maerekaxiniretonoka otxa oparïka ito inini xika. Ininiã osari Xesosimoni.

—Apiananiri, nitaro topãkanãta ereẽ. Notanani parĩkauanãta. Pitemoni erekari atxiĩti? Pipaniãtaroko notakata nipokori okamini —otxa.

⁴¹ Ininiã Xesosi:

—Mata, Mata, maerekaxiniretonokai pitxa, kotxi piparĩka ito inini xika. ⁴² ãTinoka pikamini tĩkane ninireka. Maria mereẽri ikara. Omereẽri nota sãkire okenakotini. Oa mereẽkiti apiaerekata, ininiã !niotokakaro oa nisãkire okenakotini —itxa Xesosi.

Teoso Misãkiretiko Pirena

(Mateo 6.5-15; 7.7-11)

11 ¹ ãTi õti Xesosi misãkiretari Teoso. Ixipoka atoko ãtika imoianari txari:

—Apiananiri, Xoão oerekari imoianariakori Teoso imisãkiretinina. Iua atokokana poerekaua ate Teoso amisãkiretini. Natokopa itxa Teoso amisãkiretini?

² Xesosi apakapapireta:

—Teoso himisãkiretakasaaki, ia atoko hĩtxako:

“Aĩri, iaxiti auakari, ate nirekari piuãka paxitiko. Anirekari ikini itixiti auakani auĩtetinii pite. Pite tixine pinireẽkiti kamiko atokokana, anirekari pinireẽkiti kamiko ĩkorapokoriti.

³ Nipokori ikiniõtika pisikauako.

⁴ Pimaxinĩkaretariko maerekati akamakiti. Maerekati atemoni kamakori amaxinĩkaretini atokokana, pimaxinĩkaretariko. Kona panikapeua aãtaerekatikomoni. Pisikakauako ate, maerekati sauaki aãuakasaaki.”

Ikara atoko hĩtxako Teoso himisãkiretini —itxa Xesosi.

⁵ Eereka Xesosi oerekana imoianariakori:

—Atxiĩti apanĩkanõka pisa pimoianari aapokomoni nipokori pamanaini ĩkapani. Ininiã pakiritari iua: “Nimoianari, ipi ãti pakini komiri psikano. ⁶ Naõkimanere iãpotakari uatxaika apoka naapoko. Natxinoka itxape. Nipokori !uari nisikiniri,” atxiĩti pitxari iua.

⁷ —Atxiĩti pimoianari iroko ãki apakapapiretai: “!Pakirinãtapeno. Naapoko tore katoreri. Nota, namariteni apaka imakanãtape. !Niposota nõkitikiniua, nipokori nisikinii.”

⁸ —Pimoianari itxaua iua, iuaritika atxiĩti !nirekari õkitikiniua. Iuaĩkana, iuaĩkana pakiritiniãri pimoianari, iua õkitikapitikaua. Ikini nipokoriti pinirekakiti isikaiko, iuaĩkana imakini ĩkapani.

Iua pimoianari na atoko itxa Teoso. ⁹Ininiākara pamanaāriko pinirekakiti, ininiā Teoso sikapitikai. Pinitariko pinirekakiti, ininiā papokapitikari. Pakiritariko Teoso, ininiā iua apakapapiretai. ¹⁰Amanarauatakari apakapapitikari amanaākiti. Nitarauatakari apokapitikari initakiti. Teoso akiritakari apakapapiretaākapitika.

¹¹—Hīte irītxiakori, hamariteni amanainiāi komiri, kaikani hīsikatana hamariteni? Ximaki amanainiāna, iminikani hīsikatana hamariteni? ¹²Patari naki amanainiāna, kaxipirokani hīsikatana hamariteni? Konapitini. ¹³Hīte maerekati kamakani hītxaaua, iuaritika himarotari erekari hamaritenimoni hīsikini, ininiā hīri iaxiti auakari, erekarinani kamakari, iua sikapitikariko Erekari Matamatakoti hītemoni hamanainiāri iua —itxa Xesosi.

Maerekani Matamatakoni Omitikiko

(Mateo 12.22-32; Marko 3.20-30)

¹⁴Āti ōti Xesosi omitikari maerekati matamatakoti masākireti. Iua maerekati matamatakoti sipeka atoko, iua kiki mitxi maerekati matamatakoti auaiťtotakiti posotari iuaīkana isākirauatini. Kākiti Xesosi kamakiti itikakani tsoriķaānāta. ¹⁵Ātikaka ninoa txari:

—Satanasi, maerekani matamatakoni auīte, iuakara sikataparatarari Xesosi maerekani matamatakoni omitikini.

¹⁶Apanakinipekana nirekari Xesosi kerokiniri, ininiā itxarina Xesosi: —Takaōtxikari, Teoso posotiire poerekaua ate, aātamatiniri īkapani, Teoso iokanatinii īkorapokoriti aimarotini īkapani —itxarina.

¹⁷Xesosi imarotari ninoa xinikanātakiti, ininiā iua txana: —Kākiti tixine auakani, ninoakakarika inaiatakakiniāuana, !apakata. Ixipokakakauana. Iua atokokana kākiti aapokoā auakani inaiatakakiniāuana, ninoakakarika ixipokakakauana. ¹⁸Iua atokokana Satanasi nitiriakori, ninoakakarika inaiatakakiniāuana, Satanasi tapara xipokako. Ikara atoko ininiā, kona atāo hīte sākire, nota iokanatinina Satanasi nitiriakori, maerekani matamatakoni, Satanasi taparaā. Ikara hīsākire kona atāoni. ¹⁹Hīte sāpiretano, maerekani matamatakoni Satanasi taparaā nomitika, ininiākara kitaparaāpa hīte moianariakori omitikana maerekani matamatakoni? Ninoa omitikana maerekani matamatakoni Teoso taparaā, ininiā ninoakara oerekari !atāo hīsākire nota pirena. ²⁰Teoso posotiireē nomitikari maerekani matamatakoni. Ikara atoko ininiā, Teoso oerekai iua apokapeka hītemoni hīauīte inini īkapani.

²¹—Kiki pataparari ikeeko iposope inakari moiainiári aapoko, kona kiitirikikori itii. ²²Txamari áti kiki apiataparata inaiatiniári, iriákata, ininiá anikapitikari kaapokori ikeeko. Mitxi iua kaapokori sákire: “Nikeeko auiniá, kona kamakatzakikori nitii,” itxama, iuaritika kiki apiataparatakari itiríkari itii. Eereka imoianariakorimoni ixanakari tiitxi.

²³—Notakata maparíkauatakani omanatano nota. Imamoianatakaniáno, inirekari niparíka ixipokini —itxa Xesosi.

Maerekati Matamatakoti Kanapiriini Pirena

(Mateo 12.43-45)

²⁴Iuaíkana Xesosi sápirenauata:

—Maerekati matamatakoti omitikikosaaki, kákiti itakanapakasaaki, isaápota áparaá makipakaniátaá auiniátaá inítini íkapani. Imapokakaniári, “Iuaíkana nikanapiriáko mitxi nauinimoni,” itxa.

²⁵Iuaã apoka. Iua aapoko mitxi inakari iusaaki peereri. Oeretapeêkaika.

²⁶Ininiá apana apikomoni setxi pakini maerekani matamatakoni, apia maerekanitakani. Ninoa íkinikana íroaítotari iua kiki. Iua ítoã aua itxana. Iusaaki oitope maerekani matamatakoni misiritari iua kiki, ininiá apiata itsii inikoriá. Mitxipe átinoka maerekati matamatakoti paniátari iua maerekati ikamini. Eereka oito paniátari iua —itxa Xesosi.

²⁷Xesosi sákirauataka atoko, sito iuaã kákiti sauaki auakaro txari Xesosi:

—Pite auákítakakaro, pite axitakakaro, poxokoniuata, kotxi Teoso sikari erekari oamoni —otxa.

²⁸Xesosi apakapapiretaro oa:

—Ari, inipitikara. Iuaritika Teoso sákire kenakotakani, isákire auiákani, apia poxokoniuatako, kotxi Teoso sikari apikomoni erekari ninoamoni —itxa Xesosi.

Xonasi Pirena

(Mateo 12.38-42; 16.1-4; Marko 8.11-13)

²⁹Kaiãopokori kákiti apokaápota Xesosi takote. Iusaaki Xesosi txari:

—Kákiti uatxarini !erekana. Híte nirekari noerekinii Teoso takaótxikare, iposotiire. Konapitini. Kona noerekai híte. Kitxakapiríka Teoso sákire sápiretakari Xonasini inakori auakasaaki, Teoso kamari posotiiretxi. Ikara atoko inakari posotiiretxi Xonasini auakasaaki, iuaíkana ikamapanikariko. Iua posotiiretxi Teoso takaótxikare

itxapanikaua hīte ĩkapani. Iua takaõtxikarinoka Teoso takaõtxikare hīte ĩkapani. ³⁰Kitxakapirĩka Nĩnivi sitatxiti auakani imarotari Teoso iokanatiniri Xonasi ninoamoni. Iua atokokana kākiti uatxa auakani imarotariko Teoso iokanatinino nota kākiti itari iaxitikiri ninoamoni.

³¹—Kitxakapirĩka sito Sapaa auakani auĩte sari õtakoxiti auĩtetxi Saromão inakorimoni imarore okenakotini ĩkapani. Kākiti misiritiko õti apokasaaki, oa sito txitanako kākiti uatxa auakani, kotxi uatxa uai aua Apiatakari. Iua Saromão auĩtetxi itxaua, iuaritika uatxa uai aua auĩtetxiakori auĩte. Txamari kākiti uatxa auakani !nirekari ikenakotinirina nota sākire.

³²—Kākiti misiritiko õti apokasaaki, kākiti Nĩnivi sitatxiti auakani txitaiko hīte ĩkorasaaki auakani, kotxi ninoa kenakotari Xonasi sākire. Iuasaaki itakanaparina maerekati ikamakitina. Uatxa uai aua Apiatakari. Xonasi poiãoka. Hīte kenakotapekari nota sākire, txamari himaerekani !hĩtakanapa —itxa Xesosi.

Tirikapi Ītotxiākiri Pirena

(Mateo 6.22-23)

³³Iuaĩkana Xesosi sãpirenauata:

—Kākiti iopotokakasaakiri tirikapi, itano itaka ikinimane ĩroākani atamarauatini ĩkapani. !kipatari tirikapi. !Iomaãtari tirikapi kopiti āki. ³⁴Poki tirikapi atoko itxa piĩto ĩkapani. Poki ereka inakasaaki ipinikare aua pãkixinireẽ. Poki maerekanisaaki, pãkixinireẽ mapiãriko. ³⁵Erepaniko. Atxiĩti piuãkatari ipinikare pãkixinireẽ auini, txamari atxiĩti ipiãnoka auari pãkixinireẽ. ³⁶Ipinikarenoka pãkixinireẽ auiniã, ipiã na xatiki auinii, tirikapi iopinikinii atoko itxa —itxa Xesosi.

Pariseoakori Maerekani

(Mateo 23.1-36; Marko 12.37-40)

³⁷Xesosi sãkirauataka atoko pariseo aiatari Xesosi:

—Manipokota naapoko —itxari.

Ininiã Xesosi sari iuakata. Apokaãka atoko, iitopãka inipokotini ĩkapani. ³⁸Iua pariseo tsorĩkaãnãta Xesosi marokauakotakaniãua inipokotini apisa, kotxi iuasaaki Xesosi !ikamari Xoteo ki maneakorini oerekakiti iaõka. ³⁹Ininiã Xesosi:

—Hīte pariseoakori arokari hiĩto, txamari hãkixinire patxikopiĩri, kotxi maerekatina hĩkama. Kapotxinaniri hĩtxaua. Iãkoanatxi inopininoka arokiko atoko hĩtxa. Pirato inopininoka arokiko atoko

hĩtxa. ⁴⁰!Kiĩkitei hĩte. Teoso hĩto kamakari kamari hãkixinire apaka. ⁴¹Iãkoanatxi ãki auakari iãriã hĩsikako matxineirotenimoni. Hĩpratone ãki auakari nipokori hĩsikako matxineirotenimoni. Hĩtiretariko apanakini. Ikara atoko hĩkaminiã, Teoso atamatari hãkixinire ereka inini.

⁴²—Hĩte pariseoakori misiritaãkako. Hĩte sikari ipixini hĩtakare kikiu auakari Teosomoni Moisesi paniãtakiti iaõka. Apikomoni hĩkama, kotxi ipixini takari kanaua ãki hĩtakakiti apaka hĩsika Teosomoni, oteraã, seporiã hĩsika. Erekapitikamari hĩte sikakiti Teosomoni, txamari himisirienetari kãkiti. Teoso !hĩtireta. Erekaripixini hĩtii hĩsikiniri Teoso. Iuakatikana erekaripixini atão hĩkaminari kãkiti. Erekaripixini atão hĩtiretiniri Teoso.

⁴³—Hĩte pariseoakori misiritaãkako. Hĩte potxitari hĩitopãkini kãkiti apisatoõ, aiko ãki Xoteo apotiitiniãtaãua kãkiti atamatinii ikapaninoka. Nipokori sikaretikoãtaã hãuakasaaki, hĩte apokaerekatari kãkitipokoni paxitinii hĩte koerekareri hininiãua.

⁴⁴—Hĩte pariseoakori misiritaãkako. Akauari matakaõtxiãkoti atoko hĩtxa. Iua nopini kãkiti napa imimarotakoniã, kotxi hĩto peerekari, txamari hãkixinire !erekari. Akauari ãki arakakari atoko itxa hãkixinire —itxa Xesosi.

Moisesi Paniãtakiti Oereẽkani Maerekani

⁴⁵Ikara sãkiretxiti kiki Moisesi paniãtakiti oereẽkari kenakotakasaaki, omanãkarauata. Itxari Xesosi:

—Koerekareri, ikara atoko pisãkirauatiniã, ate apaka “maerekati kamakani” pitxataua ate —itxari.

⁴⁶Ininiã Xesosi:

—Hĩte Moisesi paniãtakiti oereẽkanii hĩtekanerako misiritaãkako. Hĩte paniãtari kãkiti hĩteka paniãtakiti ikaminina. Ninoa !iposotari ikinika hĩpaniãtakiti ikaminina. Iminani ninoa porikiã hĩtakini atoko hĩkamanãta hĩte. !Iposotarina anikinirina. Hĩte apaka !hĩkamari hĩteka paniãtakiti. ⁴⁷Hĩte misiritaãkako. Hĩte kamari takaõtxikari peereri Teoso sãkire sãpiretakanini ikatikoãtaã hĩtakini. Txamari hĩte atokiriakorinikara okapena ninoa Teoso sãkire sãpiretakanini. ⁴⁸Iuaritika hĩte sãpiretari ikinimane hãpokaerekatiniri hĩte atokiriakorini kamakiti. Txamari ninoara okana Teoso sãkire sãpiretakanini. Hĩtera takari takaõtxikari peereri ninoa Teoso sãkire sãpiretakanini akauariãtaã, ininiã

kākiti uākatari hīpaxitinina ninoani, txamari !hīkamari ninoani paniātakiti.

⁴⁹—Paimatireri Teoso, kotxi mitxipe imarotari ninoa kamakiti tīkane. Mitxipe iua txari: “Nota iokanatanako nisākire sāpiretakani, niokanapirena aniākani pakini ninoamoni, txamari ninoa okapanikana apanakini. Imisiritapanikana apanakini,” itxa Teoso. ⁵⁰Kākiti uatxa auakani misiritaākako, Teoso sākire sāpiretakanini okiko xika. Teoso itixi ikamakasaakipeka ipotorika Teoso sākire sāpiretakani okiko. ⁵¹Merepitipanika Apeo inakori okapeēka. Eereka apanakini okaāpotapeēka. Imapotōkire okakori Sakaria inakori. Teosomoni sikakori takikoātaā takote, Teoso Auini Pakitaātaā takote apaka, iuaā okapeēka Sakaria. Inipitikara nota sāpiretai hīte, uatxa auakani misiritaākako ninoa Teoso sākire sāpiretakani okiko xika.

⁵²—Hīte Moisesi paniātakiti oereēkani misiritaākako. Hīte kipatari atāo inakari Teoso iokanapirena. Hīte apaka !auikari ikara. !Hāuiritari apanakini auikiniri —itxa Xesosi.

⁵³Ikara Xesosi sākire xika, Moisesi paniātakiti oereēkani, pariseoakori pakini tsoata, Xesosi omanatinina. Ātipirika ipimaānātapikarina Xesosi. ⁵⁴Inirekarina Xesosi kerokiniri isākire, imaikiko īkapani.

Kipatakori !Auari

(Mateo 10.26-27)

12 ¹Kākitipokoni apotiitaua kinapokopeka, ininiā ikatxarakititakakauana. Iuasaaki Xesosi merepanika otākikana imoianariakori:

—Erepaniko pariseoakori sākire. Pamonoākoniri isākirena, kotxi likamarina isākirena iaōka. Ikara imaerekanina kipataua pāo tireēkari pani koketakori atoko itxaua. Eereka imarotaāka imaerekani. ²Ikinika seretakori oerekaākako. Ikinika kipatakori imarotaākako. ³Ininiā ipiāpokoā pisāpiretakiti, pokamara imarotaākako. Aapokotxi katoreri āki pimaasakapiretakiti aapokotxi nopini akiritaākako ikinimane imarotiniiri īkapani.

Kipa Apīka?

(Mateo 10.28-31)

⁴—Nimoianariakori nōtākikapanikai hīte. !Hīpīkapiri hīte okakani tīkane. Hītonanira iposotana okinina. Hīxinire !iposotana okinina. ⁵Nisāpiretai hīpīkakiti tīkane. Teosora hīpīkako. Iuara

posotari hiito okini, eereka iposotari iokanatinii maerekani misiritikoãtaã. Ari, iuara hĩpĩkako.

6—Kiripa ipi ipi ãti pakini kotipiriki karone? Poiãonoka txineiro, ota ipinoka. Iuaritika Teoso !imaxinĩkaretari ãtika kotipiriki. 7Kipakinipa piãko pikiiã auakari aua? !Pimarotari. Teoso imarotapitikari, kotxi iteene inĩkatali, ininiãkara !hĩpĩkarauatape. Kotipiriki iki poião, iuaritika Teoso tiretari kotipiriki. Kaiãopokori kotipiriki auiniã, iuaritika hĩte iki apiata, ininiã Teoso tiretapitikai hĩte —itxa Xesosi.

Xesosi Nakitiakori

(Mateo 10.32-33; 12.31-32; 10.19-20)

8Xesosi sãpirenauatapanika:

—Apikomoni nisãpiretai. Kãkiti ikinimanemoni: “Xesosi nakiti nitxaua nota,” inakari, iua atokokana nota hĩtari iaxitikiri txako Teoso nitiriakorimoni: “Nota nakitipitikara iua,” nitxako. 9Kãkiti ikinimanemoni: “Xesosi nakiti !nitxaua nota,” inakari, iua atokokana nota hĩtari iaxitikiri txako Teoso nitiriakorimoni: “Kona nota nakitini iua,” nitxako.

10—Kãkiti misãkirepiretiniãno nota hĩtari iaxitikiri, eereka amanainiãri Teoso ikara imaerekani imaktxakini, ininiã Teoso makatxakapitikari. Kãkiti misãkirepiretiniãri Erekar Matamatakoti, !kimaktxakikori ikara maerekati ikamakiti.

11—Hanikikosaaki aiko Xoteo apotiitiniãtaãua hãpoĩtikoã, hanikikosaaki auĩtetxiakorimoni hãpoĩtikoã, mitxi !hĩxinikapiri hĩte apoĩtakani hãpakapapiretini. Maerekaxiniretinoka !hĩtxape. 12Iuasaaki ninoa apoĩtakasaakii, Erekar Matamatakoti sãpiretaiko hĩte hãpakapapiretini ĩkapani —itxa Xesosi sãkire.

Kiki Katxineiroteri Miĩkiteti

13Kiki kãkitipokoni sauaki misãkiretari Xesosi:

—Koerekareri, pipaniãtari nitari sikinino nota ipixini aĩrini tii ipĩkasaaki itakanapakiti —itxa.

14Ininiã Xesosi:

—Naõkimanere, kona nota parĩkani pirini tii nixanakini —itxa Xesosi.

15Ininiã Xesosi misãkiretana ikinimane:

—Erepaniko. !Erekar tiitxi iteene pinirekini. Kapotxinani !hĩtxape. Itomaneri tiitxi !itxĩkitakai okanani pauini —itxa Xesosi.

16Ininiã Xesosi sãpiretari ia sãpirenatxi atão inakari oerekiko:

—Kiki katxineiroteri aua kikio mitari. Itakare peerekari, kaiãopokori. ¹⁷Ixinikaxitita ãkixinireẽ: “Nãpa ninĩkatari nikiena? Nikiena nĩkatikoãtaã xapitikiri. !Apakata itomaneri nikiena ikapani. Kipa nikama? ¹⁸Ari, nimarotari nikamakiti tĩkane. Nõtikariko nikiena nĩkatikoãtaã. Iuaĩkana nikamari ãti mitari. Iuaã ikinika nikiena, nitii apaka ninĩkata. ¹⁹Eereka notaka nitxauako: ‘Peerekano nota. Kaiãopokori nikiena. Kaiãopokori nitii. Apakatapitikako kaiãopokori anokanani ikapani. Ininiã !niparĩkauataika. Ninipokotako, niãtako, nipoxokoniatako nitxako,’” itxa iua kiki. ²⁰Txamari Teoso misãkiretari iua: “Kiĩkitei pite. Uatxa ia ikanõkati pipinako, ininiã kipa apakapatari ikinipoko pikiena, pitii apaka?” itxa Teoso.

²¹—Ikara atoko itxa kãkiti tiitxinoka xinikakari, Teoso maxinikati —itxa Xesosi ikara sãkiretxiti ixipokini.

Teoso Nĩkatiniua Ate

(Mateo 6.25-34)

²²Ininiã Xesosi misãkiretari imoianariakori:

—Ininiãkara nota sãpiretai hĩte, maerekaxiniretinoka !hĩtxape, hiniãkiti nire, mãkatxi hĩeretaãkiti nire. ²³Nipokori, mãkatxi pakininoka kona txĩkitakari pauini ereka inini. Nipokori, mãkatxi pakini poiãoka. ²⁴Hãtamatarari kotipiriki. Ninoa !itakarauata. !Amarina ikiena. !ipotetarina ikiena. Iuaritika Teoso sikakienatana ninoa. Teoso nĩkatiniãri kotipiriki, inĩkatapitikai hĩte apaka. Hĩte iki apiata. ²⁵Kinirepa maerekaxiniretinoka pitxa? Pimaerekaxinirene !itxĩkitakai apikomoni ãti oara pauini. ²⁶Pimaerekaxinirene kona txĩkitakai axapitiki apikomoni pauini, ininiã kinirepa maerekaxiniretika pitxa?

²⁷—Aãui pixinikako. Kona aãui parĩkauata. !Ikamari imãka, iuaritika aãui peereri. Kitxakapirĩka auĩtetxi Saromão inakori, iteene katiiri itxaua. Kaiãori imãka ereri, iuaritika apia ereri ikinika aãui. ²⁸Aãui !okanani aua. Uatxa aua. Katana ikatikata iotikaãka. Iuaritika Teoso nĩkatari aãui. Ininiã apiata inĩkatai hĩte. Ikamamãkatapitikai. Poiãonoka hĩte auikari Teoso sãkire. Ikara xika maerekaxiniretinoka hĩtxa. ²⁹Ininiãkara maerekaxiniretinoka !hĩtxape. !Hĩxinikanãtapiri nipokori mauakanisaaki, iãriã mauakanisaaki. ³⁰Kãkiti Teoso sãkire mauĩãkani ikiniõtika maerekaxiniretinoka itxana imãkana ixinikinina xika, inipokore ixinikinina xika. Hĩri imarotari himãka hinirekini, hĩkiena hinirekini. ³¹Merepitipanika

pinirekariko Teoso piauĩte ininiãua. Iua nireẽkiti pikamako, ininiã, himãka, hĩkiena apaka Teoso sikaiko hĩte —itxa Xesosi sãkire.

Hĩparĩka Īki Nĩkatiko

(Mateo 6.19-21)

32—Ininiã hĩte ninakitiakori !hĩpĩkarauatape, kotxi hĩri apokaerekatari isikinii ikinipoko erekari iua auĩtetxi ininiãtaãuakiri. 33Ikinika hĩtii hĩvẽtxitako. Txineiro hĩsikako matxineirotenimoni. Ikara atoko hĩkaminiã, hĩparĩka ĩki auapitika Teoso tixine. Iuaã hĩparĩka ĩki !ixipoka. Kiĩtiriri !ĩtirĩkari. Kiĩriki !inikari. Iuaã hinĩkatari hĩparĩka ĩki. 34Erekari hĩparĩka ĩki Teoso tixine auiniã, ininiãkara iuaã pixinikapika. Iuaã pinirekari pauini —itxa Xesosi.

Nĩtiritxi Erekarini

35Xesosi sãpirenauatapanika:

—Himerekako, kamãka hĩtxako. Tirikapi hĩopotokakako. Iposope hĩtxako nĩparĩka hĩkamini ĩkapani. 36Nĩtiritxi ipatrãotena iãtapakani atoko hĩtxako. Ipatrãotena sari ĩtanorouatakari kiiniritemoni. Initiriakori iãtapari ikanapiriini. Apokasaaki, akiritakasaaki, pakoteri initiriakori matakakari itore ipatrãotena ĩroini ĩkapani. Ninoa nitiritxi atoko hĩtxako. 37Patrão apokasaaki initiriakori merekapanika inakasaaki, iãtapanãtakasaakiri iua, ininiãkara erekapitikari. Himarotatari patrão kamakiti? Iua ieretakari imãka iparĩkauatini ĩkapani. Ipaniãtana ninoa topãkini. Eereka isikakienatana initiriakori. 38Erekapitikari ipatrãotena apokasaaki imirekiniãna. Atxiĩti apanĩkanõka apoka ipatrãotena. Atxiĩti imaropirĩkata apoka ipatrãotena, iuaritika iposope itxana, ininiã erekapitikari.

39—Hĩxinikari ia. Kaapokori imarotaãkamariko kiĩtiriri apokini, !auritamariko iua aapoko ĩroini itii ĩtirĩkini ĩkapani. 40Hĩtepekana, hĩte apaka iposope hĩtxako, kotxi nota hĩtari iaxitikiri kanapiriãko. Iuasaaki, “!Apoka uatxa,” hinakasaaki, iua õtipitika nota kanapiriã uai —itxa Xesosi.

Nitiritxi Erekarí,

Nitiritxi Maerekati Pakini

(Mateo 24.45-51)

41 Petro misākiretari Xesosi:

—Apiananiri, ikara sãpirenatxi atão inakari oerekiko pisãpiretakiti, atenani poerekini ìkapanikani? Ikinimane poerekini ìkapanikani ikara pisãpireta? —itxa Petro Xesosimoni.

42 Ininiã Xesosi:

—Nitiritxi kimaroreri ipatrãote paniãtakiti kamakari ia atoko itxako. Iuara apanakini nitiritxi auĩte itxaua. Iuara sikakienatana apanakini nitiritxi nipokotiko manapi.

43 Nitiritxi ipatrãote paniãtakiti iaõka kamakari poxokoniuata ipatrãote apokasaaki, kotxi ipatrãote paniãtakiti iaõka ikama.

44 Ipatrãote auritariko iua ikinika itii, aapoko, ikikiote pakini inìkatini.

45 —Txamari atxiĩti ãti patrão nitiri !inirekari ipatrãote paniãtakiti iaõka ikamini, ipatrãote auapokotini xika. Atxiĩti inoropatari apanakini ipatrãote nitiriakori, apanakini ipatrãote niteroakoro apaka. Atxiĩti inipokota, kapoãro iãta, ipoãta.

46 Ipatrãote apoka initiri mimarotakanisaaki, ininiãkara initiri !iposopanika ipatrãote apakapini. Ikara xika ipatrãote misiritari iua. Eereka iokanataro iua Teoso sãkire mauĩãkani misiritikoãtaã.

47 —Nitiritxi ipatrãote nireẽkiti imarotakari makamakaniãri ipatrãote paniãtakiti iposope inini ìkapani, ixirokitataãkako aãpitsaã.

48 Nitiritxi ipatrãote nireẽkiti mimarotakati kaminiãri maerekati, ixirokitataãkako, txamari poiãonoka. Teoso sikari parĩkatxi, imaroretxi pakini kãkitimoni. Kaiãopokori parĩkatxi, kaiãopokori imaroretxi isikiniãi pitemoni, ininiã Teoso nirekari pite iteene parĩkauatini iua ìkapani. Apikomoni parĩkatxi, apikomoni imaroretxi isikiniãi pitemoni, ininiã Teoso nirekari pite apiata piparĩkauatini iua ìkapani —itxa Xesosi sãkire.

Neenamatzí Xesosi Sákire

Auikiko Xika

(Mateo 10.34-36)

⁴⁹Xesosi sákirauatapanika:

—Teoso misiritariko kákiti imaerekani xika. Xamina tirinini atoko itxa kákiti misiritiko. Ia itixi napoka ikara xamina tirinini nitxíkitakini íkapani. Ninirekari ikara niparíka nixipokini. ⁵⁰Nota atatsiirauatako. !Erekaxinireno. Ninirekakari natatsiirauatini katima xipokaka inini. ⁵¹Kona neenamatzí niotokakini íkapanini napoka íkorapokoriti. Nota sákire auikiko xika neenamatzí auapitikako. ⁵²Aapokotxi áki auakani síko. Atxiíti ipi áti pakini naiatari ipi, atxiíti ipi naiatari ipi áti pakini, nota sákire auikiko xika. ⁵³Irítxiakori omanatana ninoa ákiri nota sákire auikiko xika. Ninoa ákiri omanatana iriakori. Inorotxiakoro omanatana ninoa ákero. Ninoa ákero omanatana inoroakoro. Imakirotxiakoro omanatana otiiroakoro. Otiiroakoro omanatana oimakiroakoro nota sákire auikiko xika —itxa Xesosi sákire.

Iaxiti Imarotiko

(Mateo 16.1-4)

⁵⁴Xesosi iuaíkana misákiretari kákiti:

—Atokatxi ereékokinimoni ipiákaãpotakasaaki, “Áparaãnapani,” hítxa. Ari, ikipapitikako. ⁵⁵Ítima ikiítaã íkari apokasaaki íkorapokoriti, híte: “Kamoïpani,” hítxa. Ari, kapatakapitikariko. ⁵⁶Kamisirienererini hítxa. Hátamatari iaxiti, itixi pakini, ininiã himarotapitikari áparaã, kamoï pakini. Kinirepa kona hátamatano nota? Kinirepa kona híkenakotari nisákire Teoso kamaenetakiti himarotini íkapani? —itxa Xesosi sákire.

Pimisiritiko Mereëkarimoni Pimasikani Íkapani

(Mateo 5.25-26)

⁵⁷—Kinirepa híteka na xinikari atão inakari híkamini tíkane? ⁵⁸Maerekati pikamakasaaki, áti nirekari anikinii pimisiritiko mereëkarimoni. Iua anikinii apisapanika, písákirauata iuakata atão pikamini íkapani, ininiã iua !anikaikai pimisiritiko mereëkarimoni. Pimamisákiretakaniãri, iua anikaiko pimisiritiko mereëkarimoni. Eereka pimisiritiko mereëkari sikaiko sotatomoni. Eereka sotato takai kateia áki. ⁵⁹Atão nisãpiretai, kona posipikari kateia ikinika

pimisiritiko mereékari paniätakiti pimiïkitxitakanisaaki —itxa Xesosi.

Himatakanapakaniári

Himaerekani, Hïpinako

13 ¹Xesosi sãkirauatakasaaki, kãkiti iuaã auakani sãpiretari iua Kariréia auakani okiko pirena. Ninoa Teoso misãkiretiko aikotiã auakasaaki, ninoa okari ipirana imaerekanina Teoso makatxakini ïkapani. Ininiã iuasaaki Pirato sotatone apoka iuaã. Iuasaaki ninoa okana. ²Xesosi imarotari kãkiti ãkixinire xiniäkiti. Ininiã ia atoko itxa:

—Hïte uãkatari ninoa Kariréia auakani maerekani apiata. Ininiã, “Ikara atoko inapeékana ninoani,” hïtxa. ³Konapitini. Nota sãpiretai hïte, himaerekani himatakanapakanisaaki, hïpinako ninoa atokokana hinaãkako —itxa Xesosi.

⁴Ininiã Xesosi sãpiretana ninoa apanakini ipinini pirena: —Xerosareë aua Siroee inakori aapokotxiti. Iua aapokotxi ïtanori irika. Irikasaaki, tesoito kikiakorini ipïpe. Hïte uãkatana iuaã auakani apia maerekani itxauana? ⁵Konapitini. Hïtekanera himaerekani himatakanapakanisaaki, ninoa atokokanera hïpina — itxa Xesosi.

Piko Mina Mariti Pirena

⁶Ininiã Xesosi sãpiretari ãti sãpirenatxi atão inakari oerekiko: —Aua kiki. Initirikata isari ikikiote atini ïkapani. Iuaãtaã aua amãtiiri piko inakori mina. Iuaã apokasaaki, maritoka otxa itakare. ⁷Ininiã itxari: “Ipikanani ãtikanani pakini ninapiima. !Kariro. Ininiã erekari otokiko, kotxi kona oïriuata. Ininiã kona erekari uai okaikotini, kotxi oxipokari takari kiena kipatxi ãki auakari,” itxari initiri. ⁸Ininiã initiri: “Kona pitokapero. Nota oeretariko opatapi. ãti kipatxi erekari patari tikakata nitakapatapitaroko. ⁹ãtikanani inakasaakiua karipeka oniniã, ereë oãua. Erekari okaikotini. Omiriuatakanisaaki, iuasaaki erekapekari otokiko,” itxa initiri — itxa Xesosi.

Tomatiko Ōtisaaki Xesosi Makananitiniro Sito

10 Tomatiko ōtisaaki Xesosi auari aiko Xoteo apotiitiniātaāua.
 11 Iuasaaki sito apoka. Tesoito anokananipeka ina amianaretakaro. Ia atoko otxa amianareta. Okomīkaāpota, kotxi maerekati matamatakoti amianari kamakari ĩroaītotarō. Kona oposota oōkitikaītotiniāua. 12 Xesosi atamatakasaakiro, itxaro:

—Sito, erekapitikaiko uatxa —itxaro.

13 Ininiā itakari iuako onopini. Iuasaakipeka oōkitikaītotaaua. Ininiā iuasaaki otxa:

—Peerekari Teoso. Erekarī imakinika ikamakiti —otxa.

14 Iuasaakipeka Xoteo apotiitiniātaāua aikotiā auakani auīte naiataua, kotxi tomatiko ōtisaaki Xesosi makananitaro amianatakaro. Ininiā iua txitari kākiti:

—Auari seisi pakini ōti kākiti parīkauatini ĩkapani. Ininiā ĩkora seisi ōti hina iua makananitinii ĩkapani. Kona hinape tomatiko ōti erekapeka hītxīkitakiko ĩkapani —itxana.

15 Ininiā Xesosi txari iua:

—Hīsākire atxiīti erekari, txamari kona hīkamari hīsākire iaōka. Tomatiko ōtisaaki hīte tīretari hīpiraakori, kotxi hanikari hīpiraakori, kema auīte iaāmoni āparaā iātinina ĩkapani. 16 Oia sito Apraāoni apika mekaniro otxaua. Satanasi kamaamianaretaro oa tesoito anokananipeka. Iaōpe. Apakatapitika tomatiko ōtisaaki nitiretiniro oa, nimakananitiniro oa —itxa Xesosi.

17 Xesosi apakapapiretakasaakina, imokaiakariakori pētauata. Iuasaaki apanakini iuaā auakani poxokoniuaata, kotxi imarotarina erekari Xesosi kamakiti.

Mostata Pirena

(Mateo 13.31-32; Marko 4.30-32)

18 Ininiā Xesosi pimaāna:

—Natokopa itxa Teoso auītetxi ininiāua? Kiātokopa itxa axinikiniri?
 19 Teoso auītetxi ininiāua mostata iki atoko itxa. Kiki takaro mostata ikikioteē. Oa aneē. Mitape onakasaaki kotipiriki kamari ikoa okatiā. Ikara atoko itxa Teoso auītetxi ininiua —itxa Xesosi.

Merepanika poiāo kākiti auītetari Teoso. Eereka kaiāopokori kākiti auītetari iua. Txamari iuasaaki Satanasi apoka ninoamoni kotipiriki apokini atokokana.

Pão Tirekakari Pirena

(Mateo 13.33)

²⁰Iuaĩkana Xesosi pimaãna:

—Natokopa itxa ïkorapokoriti Teoso auĩtetxi ininiãua? ²¹Ia atokokana itxa: Sito kosekari pão tirekakari pani. Okoketari axapiti pão tirekakari pani kaiãopokori triko panikata, ãparaãkata. Eereka ikinika ipe tirekaãpota otxa.

Axapitiri Ironakikoãtaã

(Mateo 7.13-14; 21-23)

²²Ikara inaka atoko Xesosi potorika Xerosareẽ sitatxiti isini ïkapani. Isaãpotakasaaki, isãpiretari Teoso sãkire. Isãpiretari ãti sitatxitiã, ãti aapokotxitiã, ãti sitatxitiã, itxaãpota isãpiretiniri Teoso sãkire kãkitimoni. ²³Oerekaruanãtakasaaki, kiki pimaãri:

—Niauĩte, poiãokani satako Teoso auiniãtaã?

²⁴Ininiã Xesosi apakapapiretari:

—Teoso tixine ïronakikoãtaã axapitiri. Hinirekariko iuaã hĩiroini. Kaiãopokori kãkiti nirekari ïroinina. Txamari, !liposotarina. ²⁵Kaapokori totiniri aapoko tore atoko itxa. Itotakasaakiri, kãkiti iporikiti aritari itore: “Pimataakariko itore ate ïkapani.” Iuasaaki iua kaapokori txako: “Kona nimarotai hĩte,” itxanako ninoamoni. ²⁶Ininiã ninoa: “Ate nipokota pitekata. Sitatxi ate auiniãtaã pauakasaaki, pitekara oerekaua,” itxanako ninoa. ²⁷Ininiã iuaĩkana itxako ninoamoni: “!Nimarotai hĩte. Namonipa hãua hĩte? Hĩsipiniikaua. Imakinika hĩkamakiti !erekari.”

²⁸—Hãtamatakasaakina Apraão, Isaki, Xakoo, ikinimane Teoso sãkire sãpiretakani pakini Teoso auĩtetxi ininiãtaãua, iusaaki hĩtxiapatapitikako. Apanakini ïroãpeka. Txama hĩtenoka kaikotape iporikiti himaerekani xika. ²⁹Teoso auĩtetxi ininiãtaãua apokako kaiãopokori kãkiti, ikini itixiti ïkani. Atokatxi pokĩkinimoni ïkani, atokatxi ereẽkokinimoni ïkani, atokatxi pokĩkini sanaremoni ïkani, atokatxi pokĩkini kikomoni ïkani pakini apokako Teoso kiiniritimoni. ³⁰Merepitipanika Xoteoakori kenakotari Teoso sãkire, txamari !imaãkatari. Eereka Xoteo minakaniua kenakotari Teoso sãkire, ininiã auikarina. Ininiã Xoteo minakaniua apokako Teoso auĩtetxi ininiãtaãua Xoteoakori apokini apisa —itxa Xesosi sãkire.

Xesosi Tiretari Xerosareẽ Auakani

(Mateo 23.37-39)

³¹ Ikarasaakipeka átikaka pariseoakori apoka. Itxarina Xesosi:
—Pisipiniikaua, kotxi Erotxi okaenetai —itxarina.

³² Ininiã Xesosi apakapapiretana:

—Hisa iuamoni. Hĩtxariko iua aripa kamisirienereri: “Nota omitikari maerekati matamatakoti, apaka amianatakani erekapeka nitxĩkitaka. Uatxa, katana pakini niparĩkauatako. Ipi áti õtisaaki nixipokariko niparĩka ìkorapokoriti.” Ikara atoko hĩtxariko iua.
³³ Ininiã uatxa niparĩkauatako. Katana niparĩkauatako. Ininiã katana eereka nisa Xerosareẽmoni, kotxi átiãtaã Teoso sãkire sãpiretakani okikoãtaã !uari. Xerosareẽnanira ninoa ipina. Ininiã nota sako iuaã.

³⁴ —Xerosareẽ auakani, Xerosareẽ auakani, hĩte okapekana Teoso sãkire sãpiretakani. Kai soroã hĩkiporonakana ninoa hĩtemoni Teoso iokanatakini. Kaiãokatani ninirekamari ninĩkatini, patari oimiakori omĩkita patapi otakini atokokana nitxanakamaiko hĩte. Txamari !hãuiritano nota nĩkatini. ³⁵ Ikara atoko inakari xika haãpoko asikaãkako. Teoso !uaaika hĩtekata. Nisãpiretai. Ia õti hãtamatano, eereka !hãtamataikano. “Teoso takari erekari uaimoni ìkarimoni, Apiananiri posotiireẽ ìkarimoni,” hinakasaaki, iuasaakinanirako hãtamatanoko nota —itxa Xesosi.

Xesosi Erekapeka Txĩkitakari Amianatakari

14 ¹ Tomatiko õtisaaki Xesosi sari pariseoakori auĩtemoni, iuakata inipokotini ìkapani. Iuaã auakani mixinitari iua apoĩtinirina ìkapani. ² Iuasaakipeka apoka kiki amianatakari. Ikanoke, itapike, imakinika ananaĩtota. Iua apoka Xesosimoni. ³ Ininiã Xesosi pimaãna Moisesini sãkire oerekakani, pariseoakori pakini. Ipimaãna:
—Erekari atxiĩti tomatiko õtisaaki amianatakari erekapeka nitxĩkitakini? —itxa Xesosi.

⁴ Ininiã ninoa tsoĩkaãnãta. !Apakapapiretarina. Ininiã iuasaaki Xesosi erekapeka txĩkitakari iua amianatakari.

—Pisipeka paapokomoni —itxa Xesosi.

⁵ Eereka ipimaãna pariseoakori:

—Hĩpira kema auĩte, hĩpira poho apaka aariko áki irikiniã tomatiko õtisaaki, iuasaaki himakatzakatarĩ? Ari, himakatzakapitikari hĩpira tomatiko õtisaaki. Ininiã kinirepa

kona hinirekatari erekari nikamini tomatiko õtisaaki? —itxa Xesosi.

⁶Txamari kona ninoa apakapapiretari, kotxi atão Xesosi sãkire.

Kiiniri Kamakari Pirena

⁷Iuasaaki Xesosi itikana kãkiti. Apanakini mereẽri kãkiti apiatakari takote iitopãkini. Ininiã isãpiretari ia sãpirenatxi atão inakari oerekiko.

⁸Kãkiti ïtaniriuatini kiiniriti pirena isãpireta:

—Kiiniriã h̄síkasaaki, kona himereẽpiri kãkiti apiatakari topãkiniãtaã h̄itopãkini, kotxi atxiiti eereka kemaïtxitakori apiatakari apoka. ⁹Ininiã iua apiatakari apokasaaki, kakiiniriteri txaiko pite: “Ikiraã piitopãka. Ia kiki topãka nota takote.” Iuasaaki pipẽtauata. Ininiã pitakanapari iuaã. Maparapeka apanakinikata topãka pitxa. ¹⁰Kiiniriã h̄síkasaaki, apanakinikata h̄itopãka. Ikara atoko ininiã, kakiiniriteri akiritai: “Nitari uaimoni pina. Piitopãka uai. Uaira erekari.” Ikara atoko pininiã, apanakini iuaã auakani imarotariko pite apiatakari pininiãua. ¹¹Ãtikaka kãkiti txari: “Nota apiari nitxaua.” Txamari Teoso txariko: “Poiãori itxaua.” Ãtipekana txari: “Nota poiãori nitxaua.” Txamari Teoso txariko: “Iua apiari itxaua.”

¹²Xesosi txari ikemaïtxitakiri:

—Kiiniri pikamakasaaki, kona pikemaïtxitapiri pinirimane, pitariakori, paõkimaneri, paapoko takote auakani, katxineiroteni pakini, ninoa iuaïkana kemaïtxitinii pite ïkapani. Ininiã ikara atoko ninoa iïkitxitai. ¹³Apiaerekata kiiniri pikamakasaaki, pikemaïtxitari kãkiti minakati mauakiniti, mokirini, matïpokotakati pakini. ¹⁴Ikara atoko pininiã, Teoso sikari erekari pitemoni, kotxi ninoa !iposotari kiiniri ikaminina, iuaritika kãkiti erekarini iuaïkana õkitikasaakia, iuasaaki Teoso ïkitxitaiko pite —itxa Xesosi sãkire.

Kiiniri Mítari Pirena

(Mateo 22.1-14)

¹⁵Ininiã ãti Xesosikata nipokotakari kenakotari ikara Xesosi sãkire. Ininiã iua txari:

—Teoso auïtetxi ininiãtaãua sikani nipokotako iuaã. Ininiã iuasaaki Teoso sipapoxokonitana —itxari.

¹⁶Ininiã Xesosi apakapapireta. Ia atoko itxa:

—Kiki kiiniri kamakari kemaĩtxitari itomaneri kãkiti. ¹⁷Nipokori iposopeka inakasaaki, iokanataro iniriti ikemaĩtxitakinimoni: “Masa kiinirimoni. Iposopekari imakinika nipokori,” itxa.

¹⁸—Txamari ikemaĩtxitakini kamari ãti sãkiretxi kiinirimoni imasikanana ikapani. Ininiã kemaĩtxitakori txari: “Nota amotari itixi. Iua ninireka natini. Ininiã !nuposotari nisini kiiniriã,” itxa.

¹⁹—Ininiã ãti: “Nota amotari tesi kema auĩte parĩkauatakani. Ininiã nota sari ninoamoni. Ninireka nimarotiniri ninoã parĩka. Pauiritano nisini ninoamoni,” itxa.

²⁰—Ãtipekana: “Nota itanorouatape. Nĩtanoro auano nota. Ininiã kona nuposota nisini pikiiniritemoni,” itxa.

²¹—Ininiã iniriti kanapiriã iauĩtemoni. Ikinipoko ikemaĩtxitakini sãkire isãpireta iuamoni. Ininiã iuasaaki iua auĩtetxi naiataua. Ininiã ipaniãtari iniriti: “Sitatxi auakari kimaporitiã pisa. Katima pitxako. Piminana kãkiti minakati mauakini, matĩpokotakani, mokirini pakini pimina,” itxari. ²²Ininiã katimaritika ikamari ikinika auĩtetxi paniãtakiti. “Nikamapekari ikinika pipaniãtakiti, txamari auapanika nipokori. Apakatapanika kãkiti nikini ikapani,” itxa.

²³—Ininiã iuaikana, iua auĩtetxi paniãtari sitatxi mapara õtako isini. “Iuaã pakiritana kãkiti inini, naapoko kãkiti xãpokini ikapani. ²⁴Atãõpitikara nitxai: ‘Mĩtxi nikemaĩtxitakini !inikapaniri nikiena,’” itxa.

Xesosi Moianari Pininiua

(Mateo 10.37-39)

²⁵Ãti õti itomaneri kãkiti moianataro Xesosi. Ininiã ikirioka sãpireta itxana ia sãkiretxiti:

²⁶—Nota kinirão moianataka hinakasaaki, apiata hĩtiretanoko nota. Merepanika hĩtiretanoko nota, eereka hĩtiretanoko hĩri, hinoro, hĩtaniri, hĩtanoro, hĩtari, hĩtaro, hamarite pakini. Hĩteka apaka poião hĩtiretauako. ²⁷Nota kinirão moianataka hinakasaaki, notakata hĩsa. Himamĩteenekakanisaakiri himisiritiko nota ikapani, ininiã !apakata himoianatinino.

²⁸—Hinirekiniãri aapokotxi mitari sitatxi auakari atoko hĩkamini, merepanika hĩxinikaroko txineiro aapokotxi kamiko karone. Atxiĩti !apakata hĩtxineirote. Atxiĩti apakata. Ikara atoko hĩxinika merepanika. ²⁹Ikara maxinikati merepanika !ixinikari, ininiã atxiĩti itakari itsota, ininiã eereka txineiro !auaika, ininiã kona apakata imakinika ikamini. Ininiã apanakini napetari iua. ³⁰Ininiã ninoã

txari: “Hātamatariko ikamakiti. Iua kiki potorikamari ikora aapoko, txamari liposotari imakinika ikamini.” Ikara atoko itxanako. Ininiã pikamakiti apisapanika iteene hixinikariko.

³¹ Ininiã eereka Xesosi sãpiretari äti sãkiretxi:

—Auñtetxi auari tesi mio sotato. Iua nirekari neenamatzxi ikamini äti auñtetxikata. Txamari äti auñtetxi auari vñtxi mio sotato. Iua tesi mio sotato auakiti merepanika xinikari, atxiiti iposota ineenamauatini vñtxi mio sotatokata? Atxiiti auñtetxi vñtxi mio sotato auakiti xipokari iua? Ininiã apisapanika ixinikari. ³² Imaposotakaniãri, vñtxi mio sotato õtakopanika auakasaaki, iua auñtetxi tesi mio auakiti iokanapireta äti auñtetximoni isãkirauatinina ikapani, neenamatzxi xipokini ikapani.

³³—Erekari iua auñtetxi neenamatzxi takanapakari atoko hinini. Ininiã merepanika hãkixinireẽ hixinikariko: “Nota nirekatari nimoianatiniri Xesosi, kotxi pasãpaniri?” hñtxa. Atão hinirekiniãri himoianatinino, ininiã imakinika hñtakanapako notakata hñsini ikapani. Himanirekakaniãri hñtakanapiniri imakinika, ininiã !apakata himoianatinino. Ininiã hixinikariko merepanika —itxa Xesosi.

Iõkira Matxoato Pirena

(Mateo 5.13; Marko 9.50)

³⁴—Iõkira peerekaro. Omatxoaniã, !otxaika. Aua kãkiti iõkira potxoaro atoko inakani, ininiã erekapitikana ninoa. Apanakini kãkiti iõkira matxoato atoko itxana. !Kakamarena ninoa. ³⁵ Iõkira matxoato ininiã, !apakata takari sikakienatiko ikapani. !Apakata hñkoketiniri kipatxikata, pirãtxi tikakata takari sikakienatiko ikapani. Kona erekaro. Maparamoni oõkapeẽkaika. Ikara atoko itxa apanakini, kotxi ninoa !kakamarena.

—Kakenakokii hñte, ininiã hñkenakotariko ia nisãkire.

Soti Auñte Ereëkokakari

(Mateo 18.10-14)

15 ¹ Äti õti auñtetxiakori txineirote apakapakani, apanakini maerekati kamakani apaka apotiitaua Xesosi sãkire ikenakotinina ikapani. Ninoa kaiãopoko. ² Iuusaaki pariseokori, kaiõkatsopareriakori pakini misãkirepiretari Xesosi. Itxana:

—Iua apakapari maerekani. Maerekanikata inipokota —itxana.

³ Ikara isãkirena xika Xesosi sãpiretari ipi, äti pakini sãpirenatxi atão inakari oerekiko. ⁴ Ia atoko itxa Xesosi:

—Atxiíti pite aua seĩ soti auĩte. Ǻti pĩpinanakiniã, kipa pikama? Pitakanapari apanakini mapara inipokotiniãtaã apanakini nĩkatini ĩkapani. Ininiã eereka pisari pĩpinanakakari pinitini ĩkapani. ⁵Papokasaakiri iua pĩpinanakakari, pipoxokoniuaata. Piporikiãpotari pipira paapokomoni. ⁶Papokaãka atoko pakiritana paõkimaneriakori, apanakini kãkiti pakini. Pitxana ninoa: “Hĩpoxokoniuaatako notakata, kotxi napokapekari nipira pĩpinanakakari,” itxa soti auĩte pitikiri.

⁷—Nisãpiretai hĩte, ãtika maerekati kamakari takanapakasaakiri imaerekani, iaxiti Teoso auiniãtaã auakani poxokoniuatapitikako. Atxiíti novẽta novi kãkiti iuikakaniua txari: “Peerekaua ate. !Akamari maerekati,” itxana. Txama kona atão isãkirena. Ninoa sãkire kona kamari iaxitikini poxokoniuatini —itxa Xesosi.

Ota Pirata Kamakoro Ereẽkokakaro

⁸Apikomoni Xesosi txari:

—Sito aua tesi ota pirata kamakoro. Pakaronero. Ǻto ereẽkokiniã, ininiã onitakasaakiro oiopotokakari tirikapĩ. Oiatĩkaãpotari oaãpoko ota onitaãpotini ĩkapani. ⁹Oa apokasaakiro, apanakini oaãkiritã: “Hĩpoxokonauatako notakata. Napokapekaro ota ereẽkokakaro,” otxa.

¹⁰—Kãkiti poxokoniuaata ota pirata kamakoro apokikosaaki. Nisãpiretai, iaxiti Teoso nitiriakori apiapoxokoniuaata, ãti maerekati kamakari imaerekani itakanapakasaaki —itxa Xesosi.

Imi Ereẽkokakari Pirena

¹¹Apikomoni Xesosi txari:

—Aua kiki. Ipi imiakori. ¹²Maneri takari amanaãri iri. Itxari: “Ninirekari pitakanapakito pipĩkasaaki pisikini notamoni uatxa,” itxa. Ininiã iri xanakari inakiti imiakorimoni. ¹³Eereka mapaõti inaka atoko, iua ãtokori apotiitari iri sikakiti. Ininiã eereka isipeka. Ǫtakoxiti ãti tixini isa. Iuaã maerekati ikama. Iuaã xipoka itxari iri sikiniri.

¹⁴—Ikinika ixipoka iuaã. Iuasaaki ãparaã !ikipa. Natxipokoni auari. Nipokori !auari. Ininiã iuasaaki iua minakati !auari. Imakinika xipope. ¹⁵Ininiã iuaxiti auakarimoni isa, parĩkatxi amanaini ĩkapani. Ininiã ipatrãote paniãtari iririakori isikakienatini. ¹⁶Iririakori isikakienatakasaaki, natxinoka itxa. Iuasaaki iua nirekari iririakori kiena inikini, kotxi iua sikakienatakari !auari.

17—Iuasaakiika ixinikari iri aapoko: “Niri nitiriakori aua nipokori. Nipokori itetakori auapitika. Uai natxinoka txapeno nota. 18Nikanapiriāko niri aapokomoni. Nitxariko niri: ‘Maerekati nikamapeka Teosomoni, pitemoni apaka. 19Kona pamarite na pitxaikanoko, kotxi !erekano. Pitxīkitakano pinitiri nininiua.’ Ikara atoko nitxariko niri,” itxa. 20Ininiā iua aiamaata, kanapiriā itxa iri aapokomoni. Iuasaaki iri iātapanātari iua ikiniōtika.

—Ininiā iua apokaāpotakasaaki, ōtakopanika, iri atapari iua. Ininiā iri miteēkata iuamoni. Ininiā iteene ipoxokoniuaata. 21Iuasaaki imi txari iri: “Niri, maerekati nikamapeka Teosomoni, pitemoni apaka. Kona pamarite na pitxaikanoko, kotxi !erekano.”

22—Iuasaakipeka iri akiritari initiriakori: “Katima hītxako, mākatxi ereri himinini. Aneo ereri hītakako iuakokimoni. Ikiti mata hītakako ikitiā. 23Kema auīte kiiri hōkako. Kiiniri makamako. Manipokota. Mapoxokoniuaata, 24kotxi ia namarite ipīkari atokopeka, uatxa iuaīkana ikanapiripeka. Mitxi pīpinanakakari atoko itxa, uatxa apokapeēkaika,” itxa.

—Ininiā iuasaaki ninoamoni ipoxokoniuatini apopeka.

25Ninoa kiiniritauatakasaaki, imi aneēkari tokoriā iparīkauanāta. Ikanapiriākasaaki aapokomoni, ikenakotari xikari, serēkatxi ene pakini. 26Ininiā akiritari iri nitiri: “Kiripa ikara?” itxari. 27Iri nitiri apakapapireta: “Pitari apoka. Ininiā piri paniātari kema auīte okiko, kotxi erekapanikari pitari. Kona monōkori apoka iuamoni. Erekarī ikanapiriini,” itxari.

28—Ininiā ikara ikenakotakasaaki, inaiataua. Kona inirekari ĩroini kiiniriā. Ininiā iri iuamoni sa itxa. Akiritari: “Pīroā,” itxari. 29Ininiā iua apakapapiretari: “Itori mitaāti niparīkauatinapekai. Txama kona nota sipikapiretari pisākire. Iuaritika kona pisikano potxi ākiri nimoianariakorikata kiiniri nikamini ĩkapani. 30Iua pamarite xipokari pitxineirote. Sitokata isirīka. Txama ikanapiriākasaaki, pokari kema auīte. Kiiniri pikama iua ĩkapani.” Ikara atoko itxitari iri.

31—Iri apakapapireta: “Namarite, ātipirika pauapika notakata. Ikinika nota nakiti pite nakiti txaua. 32Erekapitikari kiiniri nikamini apoxokoniuatini ĩkapani, kotxi pitari ipīkari atokopeka itxa. Uatxa auapanika. Pīpinanakakari uatxa apokapeka,” itxari.

Nitiritxi Kamisirienereri

- 16** ¹Xesosi sãpiretana imoianariakori:
 —Kiki ito tiitxi aua. Iua nitiri nĩkatari ikinika ipatrãote nakiti. Apanakini sãpiretari iua kiki, initiri iouanatiniri itxineirote. ²Ikara atoko ininiã, iua akiritari initiri: “Nikenakopiretari pite misirienetinino nota. Ininiã piminari tiitxi piamotiitini tsopa. Ikara pisikasaakino, niokanatai pisini. Kona apikomoni piparĩkauataika nota ĩkapani,” itxa.
- ³—Ininiã initiri ãkixinireẽ: “Kipa nikama uatxa, kotxi nipatrãote paĩtiki iokanatanano. !Kataparano nota, ininiã !niposotari atokatxi patapi niparĩkauatini. Nipẽtauata txineiro maxikatĩka namanainiri kãkiti. ⁴Uatxaika nimarotari nikamakiti tĩkane. Ininiã niparĩka xipokasaaki uai, kãkiti apakapapanikano nota ninoa aapokoã,” itxa.
- ⁵—Ininiã akiritana kãkiti ipatrãote maĩkitxitakani. Ininiã ipimaãri ãti: “Kipakinipa !pĩikitxitapanika nipatrãotemoni?”
- ⁶—“Seĩ kopiti iĩtxi auakiti kona niĩkitxitapanika,” itxari.
 —Ininiã iua nitiritxi txari: “Pikosekari pimaĩkitxitakiniti tsopa. Pitakari sĩkoẽta kopitinoka,” itxari.
- ⁷—Ininiã ãti ipatrãote maĩkitxitakari ipimaã: “Kipakinipa kona pĩikitxitapanika nipatrãote?”
 —Iua apakapapiretari: “Seĩ atarokiri kotarina,” itxa.
 —Itxari iua: “Pimaĩkitxitakiniti tsopa pikoseka. Oitẽta kotarinoka pitaka,” itxa. Ikara atoko ikama ninoa ĩkapani, ininiã iparĩka itakanapaka atoko, ninoa apakapari iua ninoa aapokoã.
- ⁸—Ininiã iua patrãote ikara imarotakasaaki, itsorĩkaãta: “Ari, ninitiri paimatireri. Maerekati ikama, iuaritika ikamakasaakiri, paimatireri iua,” itxa.
 —Teoso sãkire mauĩãkani imarotapitikari ixinikinirina parĩkatxi katana ikamakitina. Atxiĩti Teoso sãkire auĩãkani !imarotari ixinikinirina parĩkatxi katana ikamakitina. ⁹Nisãpiretai hĩte, ĩkorapokoriti hãuakasaaki, hĩxinikari ikara nitiritxi. Hĩsikari hĩtii, hĩtxineirote pakini Teoso parĩka ĩkapani, Teoso mimarotakani atão inakari imarotinina ĩkapani. Eereka atxiĩti Teoso mimarotakani moianatai. Eereka ninoa apaka imarotari aĩri iaxitikiri. Eereka ãti õti haõkitana ninoa iaxiti.
- ¹⁰—Axapitiki parĩkatxi atão pikaminiã, ininiã kãkiti auikariko piposotiniri parĩkatxi apiatakari pikamini apaka. Axapitiki piĩtiriuata mitxi, ininiã eereka kaiãori piĩtiriuata. ¹¹Txineiro

uaimonipokoriti auakari himimarotakaniári hinĩkatini, ininiã kona hĩposotari hinĩkatiniri erekari Teoso sikakiti. ¹²Apanakini tii pimanĩkatakaniã, ininiã kona kãkiti sikai tiitxi pinakiti inini ĩkapani.

¹³—!Apakata kãkiti parĩkauatini ipi iauĩtena ĩkapani, kotxi atxiĩti ãti omanata, ãti itireta. Atxiĩti ãti apokaerekata, ãti inorita. Iua atokokana kãkiti kona posotari iparĩkauatini tiitxi ikinipoko iamotini ĩkapani, Teoso ĩkapani iparĩkauatakasaaki. !Apakata piauiĩtetiniri Teoso, txineiro piauiĩtetakasaaki —itxa Xesosi.

Teoso Sãkire Maxipokakani

(Mateo 11.12-13; 5.31-32; Marko 10.11-12)

¹⁴Pariseoakori ikara ikenakotakasaakina, inapetarina Xesosi, kotxi ninoa iteene potxitaro txineiro. ¹⁵Ininiã Xesosi sãkirauata ninoamoni: —Hĩte txa apanakinimoni: “Ate !ikeroka. Peerekaua ate,” hĩtxa hĩsãkire. Txama Teoso imarotari hãkixinire. Kãkiti uãkatari erekari hĩkamini, txama Teoso omanatari hĩkamakiti.

¹⁶—Kitxakapirĩka kãkiti auikari Teoso sãkire Moisesimoni sikakori, Teoso sãkire sãpiretakani sãkire pakini. Xoão kapatxisareri apoka. Iuasaaki Teoso iokanapirena erekari auĩtetxi ininiãua sãpiretaãka. Itomaneri iteene nirekari isini Teoso auĩtetxi ininiãtaãua ĩroini.

¹⁷—Teoso sãkire !ixipoka. !Ixipoka axapiti. Auapika imakinika isãkire. Itixi, iaxiti pakini xipokapitikako, iuaritika Teoso sãkire !ixipoka.

¹⁸—Teoso sãkire iõkatakori kitxakapirĩkari auapanika uatxa. Ininiã ĩtanorotxi asikakari ãto itakini ĩkapani inakari, maerekati ikama. Apaka sito takanapakoro takakari maerekatikanera ikama. Ikara Teoso sãkire auapanika. Kona ixipoka ikara —itxa Xesosi.

Katiiri, Arásaro Pakini

¹⁹Xesosi sãkirauatapanika. Ia atoko itxa:

—Aua kiki katiiri. Peereri imãka. Põkamarari imãka. Apiaerekata imãka. Ikiniõtika peerekari ikiena. Imakinika iua auakiti peerekari. Iua aapoko ikiniõtika kiinirisaaki auakari atoko itxapika ikiena.

²⁰—Ãti kiki Arásaro inakori. Pamatinaniri. Minakati !auinari iua. Iua sirĩka katiiri aapoko patapi koa. Amianari aua iuamoni. Ininiã iĩto imakinika kakaro. ²¹Kinirão nika inakasaaki, ixiti okakorinoka inika. Iuaã anãpa amerokari ikaro.

22—Ikara atoko ininiã, eereka ipĩpe. Ininiã eereka Teoso nitiriakori iaxitikini anikari iua Teoso auinimoni. Kitxakapirĩka Apraão sari iuaã. Iuaã iua Arásaro aokitari Apraão.

—Eereka iua katiiri apaka ipĩpe. Ikataãka. Isari maerekani misiritikoãtaã. ²³Iuaã maerekani misiritikoãtaã auakasaaki, õtakoxiti atamatari Apraão, Arásaro pakini. ²⁴Ininiã akiritari Apraão: “Toti Apraão, piamonĩkano. Pipaniãtariko Arásaro iãkiniri iuakoki iaã, tapikaka itxa ninamamoni. Ia xamina sikatsiitapitipono,” itxa.

²⁵—Apraão apakapapireta: “Pixinikariko kãkitikata pauakasaaki, kaiãori pitii aua pitemoni. Arásaro auakasaaki, kona minakati auari iua. Arásaro auakasaaki, amianarinani, natxinani pakini auari. Uatxa iua poxokoniuãntakasaaki, pite atatsiitari pimisiritiko.

²⁶Patamata ereẽ sauana auĩte. Kona ate posotari hitemoni asini. Hĩte apaka kona posota uaimoni hãpokini,” itxa Apraão.

²⁷—Iuaĩkana katiiri: “Toti, pikenakotano. Pipaniãtariko Arásaro niri aapokomoni isini. ²⁸Iuaã aua sĩko nitiriakori maneripanika inakanuia. Isãpiretanako: ‘Kona erekari uai. Erekari ia misirikaretxi auiniãtaã imĩkanina. Ininiã uatxa ikamarinako Teoso sãkire paniãtakiti,’” itxa katiiri.

²⁹—Ininiã Apraão: “Ninoamoni auape Teoso sãkire, Moisesini sãpiretakiti, apanakini Teoso sãkire sãpiretakani sãpiretakiti apaka. Ininiã pitariakori posotari ikenakotininirina ninoa sãkire,” itxa Apraão.

³⁰—Ininiã katiiri txari: “Toti Apraão, ikara atokonani !apakata. Ipĩkari kanapiriiniã ninoamoni, iusaakiikarako itakanaparina imaerekanina.”

³¹—Ininiã Apraão: “Pitariakori !auikari Moisesini sãkire, apanakini Teoso sãkire sãpiretakani sãkire pakini. Ipĩkari kanapiriiniã ninoamoni, iuaritika ninoa !auikari Teoso sãkire. Ikara atoko ininiã, kona nipaniãtari Arásaro isini ninoamoni,” itxa Apraão.

Ikara atoko itxa Xesosi sãpiretakiti.

Maerekati Oerekakari

(Mateo 18.6-7; 21-35; Marko 9.42)

17 ¹Xesosi txari imoianariakorimoni:

—Aua maerekati oerekakani. Ninoa kãkiti kamari maerekati. Ikara atoko inakani apokapitikako. Ninoa xika kãkiti kamari maerekati. Maerekati oerekakari misiritaãkapitikako.

²Teoso omanatari kãkiti maerekati oerekakani. Kãkiti

txíkitakiniári amarini nota sãkire auiãkari maerekati ikamini !apakata. Erekariko iua kãkiti maerekati oerekakari kai mitariã iaxirikanokitaãkamako, ipoa apaníkakiã okaãkamako ipinini ãkapani. ³Erepaniko. !Pikamapiriko maerekati. Pitari Xesosi sãkire auiãkari kaminiári maerekati pitemoni, põtãkikariko, imaerekani itakanapini ãkapani. Itakanapiniári, !pixinikapinikari ikara maerekati ikamakiti. ⁴Atxiiti ãti õti iua kamari maerekati pitemoni. Eereka iua pitemoni apoka. “!Erekari nikamakiti pitemoni. Pimaxinĩkaretariko maerekati nikamakiti. !Nikamaikari,” itxa. Ininiã ãkora õti iuaĩkana maerekati ikama pitemoni. Iuaĩkana amanaãi imaerekani pimaxinĩkaretini tikane. Atxiiti ãkora õti setxikata ikara atoko ikama pitemoni, ininiã pimaxinĩkaretariko ikinika maerekati ikamakiti —itxa Xesosi.

Xesosi Sãkire Auiãkiko

⁵Xesosi iokanatakini txari Xesosi:

—Pitxíkitakaua ate apikomoni aũikiniri Teoso sãkire —itxana.

⁶Ininiã Xesosi txana:

—Mostata iki axapitiki. Mostata iki atokokana nisãkire poião hãuikiniã, uaritika hĩposotapitikari hĩpaniãtiniri ia uasini aamina: “Pikotsakatika pimaporokauako. Ipoamoni pitakauako.” Ininiã ikamapitikariko pisãkire iaõka —itxa Xesosi.

Nitiritxi Parĩka Pirena

⁷Xesosi txari:

—Pinitiri tokoriã parĩkauatakari, pipiraakori inĩkatakari, apokasaaki paapoko, kona pitxa: “Pinipokota, pitomata.” Kona ikaraatoko pitxa. ⁸Pitxari: “Auapanika parĩkatxi. Nipokori pikaminano. Xipoka atoko pisikakienatano. Piãtapari nota nipokotini, ininiã eereka pite nipokota.” Ikara atoko pitxa pinitiriakorimoni. ⁹Pipaniãtakitinanira ikama, ininiã kona pitxa: “Erekapitikari piparĩka,” kotxi pipaniãtakitinani ikama.

¹⁰—Ininiã iua atokokanera itxa ikinipoko Teoso paniãtakiti pikamakasaaki. Kona apakata: “Erekapitikano nota,” pinini. Ia atoko atão pinini: “Nitiritxinani nitxaua. Poiãori nitxaua, kotxi niauĩte paniãtakitinani nikama.”

Xesosi Makananitinina Paiaka Matatakani

¹¹Xerosareẽmoni Xesosi sikasaaki, inapari Samaria tōpa. Ipinimoni auari Kariréia tōpa. ¹²Áti aapokotxi apokaãpotakasaaki, aõkitana tesi kikiakori amianatakani paiaka matatakani. ¹³Ikira atoko akiritarina: —Xesosi, koerekareri, piamonĩkaua ate —itxana.

¹⁴Xesosi atamatakasaakina, ipaniãtana ninoa Moisesini paniãtakiti iaõka ikaminina, sasetotximoni isinina, iĩtona oerekinina iƙapani.

—Sasetotximoni hĩsako. Hõerekariko hiĩto iuamoni —itxa Xesosi.

Iuamoni isaãpotakasaakina, ikinipoko ninoa erekapeka itxana.

¹⁵Ninoa amianatakani erekapeka, txamari ãtinani kanapiriã Xesosimoni. Itapararitika akirita:

—Peerekari Teoso —itxa iua paiaka matatakari.

¹⁶Ininiã ikapotoreẽkaua Xesosi apisatoõ.

—Notamoni pikamakiti peerekari —itxa.

Samaria tōpakiri iua kiki. ¹⁷Ininiã Xesosi txari:

—Nota makananitana tesi kikiakori. Ìtapari apanakini?

Auapanika novi kikiakori nimakananitakini. ¹⁸Ìa kiki Samariakiri. Ianokara kanapiriã, “Peerekari Teoso,” inini iƙapani. Ninoa Xoteo iua atoko !itxana —itxa Xesosi sãkire.

¹⁹Ininiã itxari iua Samariakiri:

—Põkitikauako. Pisako. Pite auikari nisãkire, ininiãkara erekapekai —itxa Xesosi.

Kanatokopa Itxa Teoso Auĩtetxi Ininiãtaãua?

(Mateo 24.23-28, 35-44)

²⁰Áti õti pariseoakori pimaãri Xesosi:

—Kirisaaƙipa Teoso ikinimane auĩte inini õti apokatako? —itxana.

Ininiã Xesosi apakapapiretana:

—Teoso auĩtetxi inakasaakiua, kãkiti !atamatari iua apokini.

Teoso kãkiti auĩte inakasaaki, iua kãkiti ãkixinireẽ apoka.

²¹Iuasaaki kãkiti !akiritari: “Uaikarari Teoso auĩtetxi ininiãtaãua. Ikiraãrari Teoso auĩtetxi ininiãtaãua.” Ikara atoko !itxana, kotxi hĩxinire ãkirari Teoso auĩtetxi ininiãtaãua —itxa Xesosi.

²²Ininiã itxa imoianariakorimoni:

—Apokako ãti õti nota hĩtari iaxitikiri iteene kinirão hãtamadini.

Txamari !hãtamatano. ²³Apanakini sãpiretaiko hĩte: “Ikiraãrari iua.”

Áti sãpiretari: “Uaikarari iua.” Iuasaaki kona himaãkatapiri ikara atoko

inakari sākiretxiti. !Hāuikapiri ikara atoko inakari. ²⁴Hītari iaxitikiri kanapiriākasaaki, mēkokari ātiātaā potorikini, ātiātaā apokini, iua atokokana nikanapiriini. Katimaritika napokako. Mēkokari atoko nitxako napokini. Iuasaakiika ikinimane kākiti atamatano. ²⁵Nikanapiriini apisapanika, nota hītari iaxitikiri iteene ninikoriāriko nimisiritiko, kotxi kākiti uatxa auakani kona nirekano. ²⁶—Nota hītari iaxitikiri kanapiriākasaaki, Noee auakasaaki atokokana itxapaniko. ²⁷Noee auakasaaki, ikinimane nipokota. Iāta. Ītanorouata. Ikara atoko itxapikana. Āti ōti Noee, inirmanekata maporo āki iiroāna. Eereka imaiātapakinitipanika āparaā kipakata. Xāpoākata. Ininiā xirataātxi xipopena ikinimane. Ikara atokotxikana itxako nota kanapiriākasaaki.

²⁸—Aroo inakori auakasaaki atokokana itxako nota kanapiriākasaaki. Iuasaaki ikinimane nipokota. Iātana. Iamotiitana. Isikatiitana. Itakarauatana. Aapokona ikamana. ²⁹Sotoma sitatxiti Aroo potorikini ōti, iuasaakipeka xamina āparaā kipini atoko itxa ikatxakini. Xamina miniki katxaka. Ininiā ikinipoko iuaātaā ariākata.

³⁰—Iuasaaki kākiti !imarotari xamina katxakini ōti. Iua atokokana kākiti !imarotari nota hītari iaxitikiri apokini ōti.

³¹Napokini ōti haāpoko mapara hāuiniā, kona hīkanapiripe haāpokomoni hītii hāpini ĩkapani. Tokoriā hāuiniā, kona !hīkanapiripe haāpokomoni. !Apakata hīkanapiriini iuaā.

³²Hīxinikaroko Aroo ĩtanoro. Kona oa atoko hītcape, kotxi oa ipina, kotxi !onirekari otakanapiniri sitatxi maerekani auiniātaā.

³³—Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, pite auapininiika txako Teosokata.

³⁴—Nikanapiriākasaaki, ia atoko itxako. Nikanapiriini ĩkanōkati atxiīti ipi kākiti imakanāta imakiniātaāna. Iuasaaki Teoso sākire auīākari sari notakata. Teoso sākire mauīākati kaikota.

³⁵—Iuasaakiko atxiīti ipi sito kamanātari atarokiri. Teoso sākire auīākaro sari notakata. Teoso sākire mauīākato kaikota.

³⁶—Iuasaakiko atxiīti ipi kiki kikio parīkauata. Āti sa notakata, āti kaikota —itxa Xesosi.

³⁷Ininiā imoianariakori pimaāri:

—Namoniparako? —itxana.

Ininiā iua apakapapiretana:

—Aãtamatakasaakiri maiori apotiitiniãtaãua, ikinimane imarotari ipĩkari iuaãtaã auini. Iua atokokana ikinimane atamatariko kãkiti apotiitiniua notakata nikanapiriãkasaaki —itxa Xesosi.

Sito, Kãkiti Misiritiko

Mereẽkari Pakini

18 ¹Xesosi misãkiretari imoianariakori ãti sãpirenatxi atão inakari oerekiko, Teoso misãkiretiko pirena. Ikara inakari oerekari kãkiti ãtipirika imisãkiretiniri Teoso, Teoso misãkiretiko imatakanapakani ãkapani. ²Xesosi sãpiretari ia sãkiretxiti:

—Sitatxi auari kãkiti misiritiko mereẽkari. Iua kona paxitari Teoso. Kona ipaxitari kãkiti apaka. ³Iuaã sito apaka aua. Õtaniri ipĩpe. Tikinitakoro otxaua. Oa nirekari iua atão ikamini oa misiritakarimoni. Txamari iua kãkiti misiritiko mereẽkari lipotxitari omokaiakari pirena ikenakotini. Osãpiretapikari iuamoni: “Pikenakotariko nisãkire. Pikamariko atão nota misiritakarimoni. !Nimĩteenekaikari nota misiritakari apikomoni misiritinino,” otxa.

⁴—Isãpakapekari ãtipirika osãkire ikenakotini. Ininiã eereka ixinikari: “Atãopitikara, kona nota paxitari Teoso, kãkiti pakini. Iuaritika nikamariko onirekakiti, kotxi ⁵ãtipirika oa tikinitakoro amanaãnãtano, ininiã nikamaãkaretxitaro. Ininiã nikamariko onirekakiti, kotxi nisãpakapekaro osãkire. ãtipirika ikara atoko otxanãtapikano. !Nimĩteenekaikari,” itxa kãkiti misiritiko mereẽkari.

⁶Ininiã Xesosi txana imoianariakori:

—Ikara kãkiti misiritiko mereẽkari kona erekari, iuaritika ikamari osãkire iaõka. ⁷Teoso apiaerekata. Ininiã ikenakotapitikari imereẽkini sãkire pokamara, ãkanõka. Ninoa amanaãri Teoso imoianatinina. Ininiã apiata Teoso kenakotari isãkirena. Patimari Teoso kenakotiniri imereẽkini amanaãkiti. ⁸Nisãpiretai, patimari Teoso misiritinina ninoa misiritakani. Ia nipimaãi. Nota hĩtari iaxitikiri iuaĩkana nikanapiriãkasaaki, atxiĩti napokari nisãkire auiãkani ãkorapokoriti? —itxa Xesosi.

Pariseo, Txineiro

Apotiitakari Pakini

⁹Iuikakaniua !apokaerekatari apanakini. Ninoamoni, ninoanokara kamari atão. ˜Ati ˆoti Xesosi sãpiretari ia sãpirenatxi atão inakari oerekiko, kãkiti ikara atoko inakanimoni atão imarotinina ˆikapani:

¹⁰—Ipi kiki sari Teoso misãkiretiko aikotimoni. ˜Ati kiki pariseo itxaua. ˜Ati kiki auˆitetxiakori txineirote apakapakari itxaua. Iteene iua misiritari kãkiti, kotxi kãkitimoni imakatzakaro apikomoni txineiro. Kona atão imakatzaka. Imisiritari kãkiti. ¹¹Iuaã pariseo tima Teoso imisãkiretini ˆikapani. Txama iuaka imisãkiretaua. Ia atoko itxa isãkire: “Teoso, nota poxokopitikano, kotxi nota apanakini atoko kona nitxa. Kũtiriri !nitxaua. Kãkiti misiritakari kona nitxaua. Kona nota sirˆıka ˆati ˆitanorokata. Kona nota ia txineiro apakapakari atoko na nitxa. Konapitini. ¹²Ikini semanati, ipi ˆoti nitakanapari ninikini pite nimisãkiretini ˆikapani. Txineiro nisikai. Tesi txineirota auiniãno, ˆatoka nisikai, ininiã pipaniãtakiti iaõka nikama,” itxa iua pariseo.

¹³—Iusaaki txineiro apakapakari ikira atoko itima. Kona ionakaãta iaxiti. Iaritari itorota imaerekani oerekini ˆikapani, kotxi maerekati ikamapeka. Itxari Teosomoni: “Teoso, piamonˆıkanano. Kona erekano nota, kotxi maerekati kamakarino nota,” itxa txineiro apakapakari.

¹⁴Ininiã Xesosi txari:

—Atãopitikara nisãkire. Ikara inakari kiki Teoso kamaerekata. Isikasaaki iua aapokomoni, erekari itxapekaua. Iua pariseopekana, Teoso !ikamaerekatari iua.

—Iuikakariua, poiãori itxauako. Poiãoripekana, apiatakari itxauako —itxa Xesosi.

Amarini Apokini Xesosimoni

(Mateo 19.13-15; Marko 10.13-16)

¹⁵˜Ati ˆoti kãkiti minari amarini Xesosimoni erekari ninoamoni itakini ˆikapani. Txamari Xesosi moianariakori atapakasaakiri kãkiti imiakori mˆıkani, isipikapana.

—Hıkanapiripeka. Hısipeka —itxana.

¹⁶Txamari Xesosi txari imoianariakori:

—Hãuiritanako amarini notamoni apokini. !Hısipikapapena amarini, kotxi nitiretapitikana ninoa. Nisãkire auˆıakani auikari nisãkire amarini

auikini atoko. Kākiti nisākire amarini auikini atoko inakaninokara apoka Teoso auītetxi ininiātaāua. ¹⁷ Amarini auikari iri sākire. Ininiā hīxinikariko ia: Amarini atoko himinakaniā, Teoso sākire iteene himauikakaniā, ininiā Teoso auītetxi ininiātaāua !hīroā —itxa Xesosi.

Kiki Katiiri Pirena

(Mateo 19.16-30; Marko 10.17-31)

¹⁸Xoteo auīte pimaāri Xesosi:

—Koerekareri erekari, kiripa nikama Teosokata ātipirika nauini ĩkapani? —itxa.

¹⁹Xesosi txari iua:

—Kininiāpa “erekari,” pitxano? Kākiti erekari !auari. Teosonanira erekari. ²⁰Pite imarotapitikari Teoso paniātakiti: “!Pisirīkape āti ĩtanorokata. !Pokaniuatape. !Piītiriuatape. Apanakini !pimisirienetape. Piri, pinoro pakini pipaxitako.” Ikara atoko pimarotapeka —itxa Xesosi sākire.

²¹Ininiā iua kiki apakapapiretari:

—Nota axapitipanika ninakasaaki, nikīpitari ikara atoko inakari sākiretxiti Teoso paniātakiti —itxa.

²²Xesosi kenakotakasaakiri iua kiki sākire, itxari:

—Auapanika ātinoka pikamini tīkane. Ikinika pitii pivētxitako, eereka oa txineiro pisikanako minakati mauakinimoni. Eereka pisa notakata. Ikara atoko inakari pikaminiā, Teoso tixine papokasaaki ikinipoko erekari auiniiko pite —itxa Xesosi sākire.

²³Iua kiki ikara ikenakotakasaaki, imatinaniuata, kotxi iua iteene katiiri itxaua. ²⁴Xesosi atamatakasaakiri iua matinaniuatini, itxari:

—Pamimari katxineiroteri auītetiniri Teoso. ²⁵Atauako kamero napatari ākorike sonakiā? Apia mimari kākiti katxineiroterini auītetiniri Teoso —itxa Xesosi.

²⁶Ikara inakari kenakotakani txari:

—Pamimari pisākire. Ininiā kiripa apoka Teoso auiniātaā? —itxana.

²⁷Ininiā Xesosi txana:

—Kākiti maposotakiniti Teoso posota ikamini —itxa Xesosi.

²⁸Ininiā Petro txari:

—Ate takanapapekari ikinipoko pitekata asini ĩkapani —itxa.

²⁹Ininiā Xesosi txari:

—Atāopitikara, ininiā ia atoko nitxai hīte. Pauini pitakanapiniā, pītanoro, pitariakori, piri, pinoro, pamariteakori pakini

pitakanapiniã, Teoso auñtetxi ininiãua pirena pisãpiretini ìkapani,
³⁰ininiã ìkorasaaki apiata erekari papakapa. Ininiã ãti òti
 pipíkasaaki iaxiti papokasaaki, pauapininiika pitxako —itxa Xesosi.

Iuaĩkana Xesosi Sãpiretari Ipinini

(Mateo 20.17-19; Marko 10.32-34)

³¹Ãti òti Xesosi anikari imoianariakori ikira atoko, misãkireta itxana:
 —Uatxa Xerosareẽmoni asa. Kitxakapirĩka Teoso sãkire
 sãpiretakani sãpiretapekari nota hĩtari iaxitikiri pirena.
 Ninoa sãkire iòkatsopatakitina paĩtiki apokapitikako,
³²kotxi nisikaãkako Xoteo minakonimoni. Ninapetaãkako.
 Nimisãkirepiretaãkako. Nikiisokaãkako. ³³Niaritaãkako. Eereka
 nokaãkako. Ipi, ãti pakini òtisaaki iuaĩkana nõkitikaua —itxa
 Xesosi.

³⁴Xesosi moianariakori !imarotari isãkire. Ikara sãkiretxi
 kipatakori atoko itxa. Ininiã kona ninoa imarotari isãkire.

Mõsiãreti Xesosi Makananitini

(Mateo 20.29-34; Marko 10.46-52)

³⁵Xesosi apokaãpota Xerikoo sitatxiti takote. Mõsiãreti kimapori
 tiniãpo iitopãkanãta. Amanaãñataro txineiro. ³⁶Ikenakotari kãkiti
 kimaporiã napakani, ininiã:

—Kiripa ikara? —itxa.

³⁷—Xesosi Nasaree sitatxitikiri, iuara napaãpota —itxana
 apanakini.

³⁸Ininiã iua mõsiãreti akirikata:

—Xesosi, Taviini apika mekanirii, piamonĩkanoko —itxa.

³⁹Ninoa ìkiikakani txitari iua:

—!Pakiripoatape —itxana.

Txama iteene iua akirikata iuaĩkana:

—Taviini apika mekaniri, piamonĩkano —itxari.

⁴⁰Ininiã Xesosi iotoka. Amanaãna kãkiti:

—Ere kiki himina notamoni —itxa Xesosi.

⁴¹Xesosi takote apokasaaki, Xesosi pimaãri:

—Kipa pinireka nikaminii pitemoni?

—Kõsiãrepeka ninini ninireka —itxari.

⁴²Ininiã Xesosi txari:

—Kõsiãrepekai uatxa, kotxi pauikari nisãkire —itxa.

⁴³Iuasaakipeka iua kiki kōsiärepeka itxa. Ininiã iua saãpota Xesosi tikini. Teoso ereka inini pirena isãpireãpota. Ikinimane kãkiti itikasaakiri Xesosi kamakiti iuamoni.

—Peerekari Teoso —itxana.

Sakeo Pirena

19 ¹Xesosi Xerosareẽmoni isikasaaki, Xerikoo sitatxiti apanĩkaki inapaãpota. ²Iuaã aua kiki, Sakeo inakori. Iua katiiri. Iua kãkiti txineirote apotiitakari auĩtetxiakori ĩkapani. Apanakini txineiro apotiitakani auĩte itxaua. Iua misirienetari kãkiti. Imakatzakari txineiro auĩtetxiakori ĩkapani. Txamari apikomoni imakatzaka. Kona atão ikamakiti. !Erekari iua.

³Xesosi apokasaaki Xerikoo, iua Sakeo nirekari Xesosi atamatinì. !Apakata atamatinìri, kotxi paĩtiri iua. Itomaneri kãkiti Xesosi ĩtinikata auanãta. Ininiã !apakata mōtãnoti atamatinìri iua. ⁴Ininiã imiteka Xesosi apisa, aaminaã kanĩka itxa. Xesosi iuaã napakasaaki, iposotari itikinìri. ⁵Xesosi apoka iua aamina patapì. Ionakaãta itxa. Itxari:
—Sakeo pikatzaka, katima pitxa. Uatxa, paapokomoni nisako, nianapokotini ĩkapani —itxa Xesosi.

⁶Ininiã katzaka katimapeka itxa. Ipoxoniritika iua apakapari Xesosi. ⁷Ikinimane iuaã auakani misãkirepiretari Xesosi. Itxana:
—Xesosi sari maerekati kamakari aapokomoni. Kininiãpa iua sa iua aapokomoni? —itxana.

⁸Ininiã iua aapoko apoãka atoko, Sakeo tima isãkirauatini ĩkapani. Ininiã itxari Xesosi:

—Ipixini ninakiti nisika matiinimoni. Niĩtirĩkakiti iuaĩkana nisikanako kãkiti. Txineiro niĩtirĩkiniã, ininiã iuaĩkana ipi ipi pakinikata nisikariko nimisiritakinimoni —itxa Sakeo.

⁹Ininiã Xesosi:

—Ia kiki Apraão apika mekaniri apaka. Uatxa imaerekani makatzakaãka, kotxi itakanapari maerekati ikamakiti. ¹⁰Kãkiti itari iaxitikiri apoka ĩkorapokoriti kãkiti pĩpinanaãkani inìtini, imaerekani imakatzakini ĩkapani —itxa Xesosi.

Nitiritxi Erekarí,

Nitiritxi Maerekati Pakini

(Mateo 25.14-30)

¹¹Eereka Xesosi sãpiretari ia sãpirenatxi atão inakari oerekiko. Oerekari ia sãpirenatxi, kotxi Xerosareẽ ninoa apokaãpota. Kãkiti uãkatari paĩtiki Teoso ikinimane auĩte ininiua. ¹²Ia atoko itxa:

—Kiki aiamatapeka õtakoxiti isini, auĩtetxi ininiua ãkapani. Iua nirekari isini, ininiã eereka inirekari ikanapiriini. ¹³Ininiã isini apisapanika akiritari tesi initiriakori. Isikanapana txineiro tesi ota oro kamakoro. Ætoka isikaãpotana initiriakori. Itxa: “Nota ãtiãtaã nauakasaaki, hiamotari tiĩtxi. Eereka pivẽtxitari apikomoni txineiro hãpakapini ãkapani. Ikara atoko hitxako,” itxa.

¹⁴—Isipeka atoko kãkiti iuaã auakani linirekari iua auĩtetxi ininiua, kotxi omanatarina. Ininiã ninoa iokanapireta iuamoni: “Ate !nirekai pite aãuĩte pininiua,” itxana ninoa.

¹⁵—Iuasaaki iua ãtiãtaã auĩtetxipeka itxaua. Ikanapiriãkasaaki akiritana initiriakori, txineiro isikanapakini. Ininiã iua txana ninoa: “Hõerekano txineiro apikomoni hãpakapakito,” itxa. ¹⁶Ãti initiri apoka iuamoni. “Nipatrãote, pite sikanapano ãtoka ota. Uatxa tesipeka ota aua notamoni,” itxa.

¹⁷—Iuasaaki auĩtetxi txari iua: “Pite kamakiti peerekari. Pite ninitiri erekari. Ætonoka ota nisikapekai, iuaritika piparĩka peerekari. Uatxa tesi pakini sitatxiti auakani auĩte pitxauako,” itxa.

¹⁸—Ãtipekana apoka auĩtetximoni: “Ãti ota pisikanapano nota. Uatxa sĩkopeka ota aua notamoni,” itxa initiri.

¹⁹—Ininiã auĩtetxi txari: “Erekapitkari. Ininiã sĩko pakini sitatxiti auakani auĩte pitxauako,” itxari.

²⁰—Ãtipekana apoka auĩtetximoni: “Oniã pinakito txineiro. Mãkatxi mataã niapirikaro, poteta nitxaro pitxineirote. ²¹Nota pĩkai pite. Pataparaxinirei. Nĩmarotari pite amotari ãti kamakiti. Piamotari pikiena ãti kãkiti kiena,” itxa.

²²—Ininiã iua auĩtetxi apakapapiretari: “Pite ninitiri maerekati pitxaua. Pite txano nota kiki kataparaxinireri nitxaua. Pimarotari niamotiniri ãti kamakiti. Pimarotari niamotiniri ãti kãkiti kiena. ²³Ikara atoko ininiã, pimanirekakaniãri piparĩkauatini, kinirepa kona pisikataro nitxineirote pãkomoni? Pisikaãkamaroko,

napakapamaroko apikomoni nitxineirote nikanapiriãkasaaki,” itxa auítetxi.

24—Ininiã iua paniãtana iuaã auakani: “Himakatxakaroko nitxineirote iuamoni nisikakito. Hísikaro tesi ota auakitimoni,” itxa.

25—“Auapeka tesi ota iuamoni,” itxarina.

26—Ininiã auítetxi apakapapiretana: “Pipariãkauatiniã, ininiã pinakiti itori aua, ininiã apikomoni papakapa. Pite iarinouatiniã, ininiã ikara xika pinakito poião. ãti õti piarini xika ikara poiãori makatxakaãkako apaka. 27Uatxa himinana notamoni nimokaiakariakori, kotxi ninoa !nirekano nota iauítena nininiua. Hókana ninoa nota apisatoõ,” itxa auítetxi.

Xesosi Xerosareë Apokaãpotini

(Mateo 21.1-11; Marko 11.1-11; Xoão 12.12-19)

28Ikara inaãka atoko, Xesosi sari imoianariakori apisa Xerosareëmoni. 29Xerosareëmoni isikasaakina, apokaãpotana Petxipaxee, Petánia pakini aapokotxiti. Ninoa ipi aapokotxi Oriva inakori xirata takote. Iuaã auakasaaki, Xesosi iokanatanana ipi imoianariakori aapokotximoni.

30—Ikira aapokotximoni hísia. Iuaã hãpokariko xomëta ãkiri, iaxiriãkori. Iua xomëta ãkiri kãkiti maitopãkakotipanika inakori. Hĩkoxiripatakariko iua. Himinari notamoni. 31Ipitikiri akiritiniã: “Kinirepa hĩte koxiripatakarini nipira?” inakasaakii, ia atoko hĩtxariko: “Apiananiri nirekari iua,” hĩtxako —itxana.

32Iuaã apokasaakina, ikinika Xesosi sãkire iaõka auapeka.

33Ninoa koxiripatakasaakiri xomëta ãkiri, ipitikiri apoka.

—Kinirepa nipira hĩkoxirika? —itxa.

34Ininiã ninoa:

—Apiananiri nirekari iua —itxana.

35Ininiã anikarina xomëta ãkiri Xesosimoni. Imoianariakori takari imãkana xomëta nopini. Imoianatarina Xesosi xomëta nopini iitopãkini ãkapani.

36Xesosi saãpotakasaaki Xerosareëmoni, apanakini kãkiti matameëkari imãkana kimaporãpo Xesosi napini ãkapani.

37Õtanoxiratari Oriva inakori iokiriãtakasaaki, ninoa imakinika ipoxokoniritikana akiripoakatana, kotxi itikapekarina itori Teoso posotiire.

38—Peerekari auítetxi, Apiananiri iokanatakiti kãkitimoni. Teoso takari erekari iuamoni. Ininiã Teoso !omanataikari kãkiti.

Peerekari Teoso, iaxiti apiko nopinixiti auakari. Apiananiri itxaua —itxanātana ninoa iusaaki.

³⁹Iuaã kākiti itomaneri sauaki aua pariseoakori apaka. Ninoa txari Xesosi:

—Koerekareri, piotokakana pimoianariakori ikara isākirena.

⁴⁰Ininiã Xesosi:

—Atão ninoa akiritakiti. Ininiã !nipinitana iotokakiniri.

Nimauiritakaniãna isākirena nota Apiananiri nininiãua, ininiã Teoso txikitakari kai soro sākirauatini ikara sākire isāpiretini —itxa Xesosi.

Xesosi Txiapata

Xerosareēkini Itiretini

⁴¹Ninoa apokaãpotakasaaki Xerosareē, Xesosi Xerosareē atamatakasaaki, iua txiapata, kotxi iuaã aua mirikiniti kākiti isākire mauikakani. ⁴²Ixinikasaakina Xerosareē auakani itxa:

—!Himarotari hīkamakiti tīkane hāuini ereka inini ikapani, neenamtxi mauakani ikapani. Ninirekari himarotiniri, txamari uatxa ikara himarotini kipataãka himimarotakaniri ikapani.

⁴³Āti ōti himokaiakarini ākitai hīte. Ininiã kona kākiti pokīka sitatxi, kona ĩroã. Iusaaki himitekini !uari. Hākitapeēkaikako.

⁴⁴Himokaiakarini xipokariko ia sitatxi. Ikinimaneko okaãkako. Kai āti kai nopini auakari !ikaikotaika. Imakinika xipope. Iua atoko inakari auako, kotxi hīte !apakapari Teoso hītemoni apokasaaki.

Pirātxi Vētxitakani Omitikiko

(Mateo 21.12-17; Marko 11.15-19; Xoão 2.13-22)

⁴⁵Xesosi apokasaaki Xerosareē, isari Teoso misākiretiko aikotiã. Iuaã auari kākiti tiitxi vētxitakani, ininiã Xesosi omitikana.

⁴⁶Xesosi txana ninoa:

—Teoso sākire iōkatsopatakori txari:

Ia naapoko, “Teoso misākiretiko aikoti” akiritaãkako, itxa. Txamari hīte txikitakari ia aiko kiitiririni iomaãtiniãtaã ininiua —itxa Xesosi.

⁴⁷Teoso misākiretiko aikoti āki ikiniōtika oerekarauata. Iusaaki sasetotxi auiteakori, kaiōkatsopareriakori, kākiti auiteakori pakini kinirão okaka txari Xesosi. ⁴⁸Txamari itomaneri kākiti potxitari Xesosi oerekakiti sākiretxiti. Ininiã ninoa kaikotapika Xesosikata

ikinika isäkire imarotinina ìkapani. Ikara xika !iposotarina okiniri iua iuasaaki.

Xesosi Paniätakari Moerekakoni

(Mateo 21.23-27; Marko 11.27-33)

20 ¹Xesosi Teoso iokanapirena erekari isäpiretakasaaki Teoso misäkiretiko aikoti äki, iuasaaki sasetotxi auíteakori, kaiökatsopareriakori, käkiti auíteakori pakini apoka. ²Ninoa pimaári Xesosi:

—Pite omitikana tiitxi sikakani Teoso misäkiretiko aikotiä auakani. Kipaniäpa pikamari ìkora pikamakiti? Kipa paniätai? —itxana.

³Ininiä Xesosi txana:

—Nota apaka pimarauatako hitemoni. Ätinoka nipimaäiko híte. Ininiä häpakapapiretano. ⁴“Kipa paniätari Xoõoni ipatxisarauatini? Teosokani paniätari Xoõo? Käkitikani paniätari Xoõo?” —itxa Xesosi.

⁵Eereka ninoakakarini isäkirauatana:

—Kanatokopa atxa? “Teosora,” aniniä, ininiä ipaniätamaua eereka: “Kinirepa kona häuikatarì Xoõo säkire?” itxamaua ate. ⁶“Käkítira paniätari Xoõo,” aniniä, ininiä käkiti kiporonakauako ate kai soroä, kotxi ninoamoni Xoõo Teoso säkire säpiretakari itxaua. Ininiä kanatokopa atxa? —itxakakauana.

⁷Ininiä eereka ninoa apakapapiretari Xesosi:

—Kona ate imarotari —itxana.

⁸Eereka Xesosi txana:

—Ininiä nota apaka kona nisäpiretai nipaniätakiri uäka —itxa Xesosi.

Parìkauatakani Maerekani

(Mateo 21.33-46; Marko 12.1-12)

⁹Eereka Xesosi säpiretari käkiti ia säpirenatxi atão inakari oerekiko. Ia atoko itxa:

—Aua kiki. Itakari amätiiri ova inakoro. Ovanoka itaka ikikioteë. Eereka iikixitana käkiti itakare nìkatakani. Eereka isari äti tixini. Iuaä mapakanani ikaikota. ¹⁰Oamiko manapi iokanatarì inítiri apakapiniri ipixini amätiiri. Txamari amätiiri nìkatakani noropatari iua nitiri. Ininiä eereka iokanatarina iua. Kona axapiti amätiiri anika ipaträotemoni. ¹¹Ininiä iuaikana äti inítiri iokanata. Iuaikana ninoa noropatari iua inítiri. Imisiritarina. Eereka iokanatarì iua.

Kona axapiti amãtiiri anika ipatrãotemoni. ¹²Iuaĩkana ãti initiri iokanata ikikiotemoni. Iuaĩkana ikarotarina, iokanata itxarina. Kona anikari axapiti amãtiiri iuamoni. ¹³Iua katakareri txari: “Kipa nikamaã? Ari, uatxa nimarotapekari. Namarite nitiretakiti niokanatako ninoamoni. Ninoa paxitapitikariko iua,” itxama.

¹⁴—Amãtiiri nĩkatakani atapari amãtiiri takakari ãkiri apokaãpotini. Ininiã itxana: “Katakareri ãkiri ina. Katakareri ipĩkasaaki, iua ãkiri apakapari ikinika. Ininiã maõkari iua. Ininiã ikinika itakare aua atemoni,” itxana.

¹⁵—Ininiã ninoa kosekaĩtotari katakareri ãkiri, mapara okaĩtota itxarina. Ininiã okapirina.

Ininiã Xesosi pimaãri kãkiti iuaã auakani:

—Kiripa iua katakareri kamaã? ¹⁶Iua okanako ikinipoko ninoa. Itakare apanakinimoni sika itxako —itxa Xesosi.

Kãkiti kenakotakasaakiri ikara pirenã itxana:

—Ikara atoko inakari !anireka —itxana ninoa.

¹⁷Ininiã Xesosi iteene atamatana.

—Ininiãkara natokopa itxa Teoso sãkire iõkatsopatakori oerekiniua? Aapokotxi kamakani kona nirekari ãtika kai soro. Iua kai imanirekakiniti kai apiari itxapekãua. Apanakini kai soro maĩkakari itxãua.

Itxa Teoso sãkire iõkatsopatakori. ¹⁸Kãkiti mãkititiniã ãkora kai xika, ikarotaãka. ãkora kai irikiniã kãkiti nopini, pomaõpeka itxana. Ininiã eereka aãpani itxãua —itxa Xesosi.

Homano Auĩte Ìkitxitiko

(Mateo 22.15-22; Marko 12.13-17)

¹⁹Iuasaaki Xesosi sãkirauatakasaaki, sasetotxi auĩteakori, kaiõkatsopareriakori pakini, nirekari maĩkiniri Xesosi, okinirina ãkapani, kotxi ninoamoni ikara Xesosi sãpiretakiti oerekari kãkiti ninoa nirekiniri okiniri Xesosi. Txamari !imaĩkarina, kotxi ipĩkarina apanakini kãkiti. ²⁰Ikiniõtika ninoa itikapikarina Xesosi sinimoni imarotinina ãkapani. Ininiã ninoa ãkitxitari kamĩkapirirerini Xesosi imisãkiretinina ãkapani. Ninoa nirekari Xesosi kerokiniri isãkire. Ikerokiniãri, iposotarina anikiniri auĩtetxiakorimoni okinirina ãkapani. ²¹Ininiã ninoa kamĩkapirirerini apoka Xesosimoni.

—Koerekareri, ate imarotari atãopitikara pisãkire. Pite oerekari ikinipoko kãkiti atão Teoso nireẽkiti kamiko. Poerekakiti sãkiretxiti

kākiti apiarinimoni, iuatxikana poerekari kākiti poiāorini.

²²Atāokani txineiro asikini Homanoakori auītemoni, Sesa inakorimoni? Apakata amasikakaniro iuamoni? —itxana ninoa.

²³Xesosi imarotari ninoa nirekari ikerokiniri isākire, ininiā iua txana:

—Kinirepa hātamakaerekatano nota? ²⁴Poerekano txineiro ota. Kisanōkapa ia? Kiuākapa aua uai? —itxa.

Ininiā ninoa:

—Sesa sanōka, iuāka apaka aua —itxana.

²⁵Ininiā Xesosi:

—Hīsikariko Sesamoni iua nakiti. Hīsikariko Teosomoni iua nakiti —itxa Xesosi.

²⁶Ninoa nirekari Xesosi kerokiniri isākire kākiti apisatoō, txamari likerokari. Ininiā ninoa tsorīkaāta Xesosi apakapapiretakiti ikenakotakasaakina. Apikomoni isākirauataikana.

Ipīkari Ōkitikiniua Mauikakoni

(Mateo 22.23-33; Marko 12.18-27)

²⁷Ikara inaāka atoko, apoka satoseoakori inakoni. Satoseo kona auikari ipīkari iuaīkana ōkitikiniua. Ninoa misākiretari Xesosi. ²⁸Itxana:

—Koerekareri, kitxakapirīka Moisesini iōkatsopataria atoko inakari: “Kiki meenetipanika ipininiā, iua itari takaroko tikinitakoro. Iua itari keene ininiā, itakauākataria amarini iua itarini ipīpekarini uāka,” itxa Moisesini. ²⁹Setxi itaritxiakori aua mitxi īkorapokoriti. Apia kiomanetakari itaniriuata. Meenetipanika ipina. ³⁰Itari takaro iuani tikinitakito. Iua apaka ipina meenetipanika. ³¹Iuaīkana āti itari takaro oa. Iuaīkana ipina meenetipanika. Iua atokotxikana itxana imakinikana itariakori. ³²Eereka oanipekana opīpe apaka. ³³Ipīkani ōkitikasaakiaua, kiripa oītaniri? Kotxi ikinikana takapekaro oa —itxana.

³⁴Ininiā Xesosi:

—Uatxa īkorasaaki kākiti itaniriuata. ³⁵Teoso nakitiakori iuaīkana ōkitikasaakiaua, itaniriuataikana. ³⁶Ninoa lipinaika, kotxi Teoso nitiriakori iaxitikini atoko itxauanako. Iuasaaki Teoso anaakori atoko itxauana, kotxi Teoso ōkitikapekana ninoa. ³⁷Hīte kerokari hīsākire. Hīte sākire txari: “Ipīkani lōkitikaikaua.” Moisesini oerekaua ipīkani iuaīkana ōkitikapanikaua. Iua iōkatsopatakasaakiri aamina tirinakari pirena, isāpiretari Teoso sāpiretakiti. Ia atoko itxa Teoso iuasaaki: “Nota Apraño Teosone, Isaki Teosone, Xakoo Teosone

pakini nitxaua,” itxa Teoso. ³⁸Ininiã ninoa Apraão, Isaki, Xakoo auapanika, kotxi Teoso !ipĩkani Teosoneni. Auãki inakani Teosonera iua, kotxi iuamoni ikinimane auãkipanika —itxa Xesosi.

³⁹Eereka ãtikaka kaiõkatsopareriakori txari:

—Koerekareri, atãopitikara pisãkire —itxana.

⁴⁰Ikara inaãka atoko kãkiti pĩkarauata apikomoni ipimarauatini.

Teoso Mereẽkiti Tavii Apika Mekaniri Itxaua

(Mateo 22.41-46; Marko 12.35-37)

⁴¹Ininiã Xesosi pimaãna:

—Kinirepa isãpiretaãka Teoso mereẽkiti Taviini apika mekaniri ininiua? ⁴²Kotxi Taviini iõkatsopata Xikari aãtsoateẽ. Itxari:

Apiananiri txari niauĩtemoni: “Nota kikomoni piitopãka.

⁴³Piitopãkiniritika nixipokariko pimokaiakariakori. Nikamariko ninoa pikiti pitakiniãtaã atoko ininiua.”

Itxa Taviini xikare. ⁴⁴Taviini akiritari Teoso Mereẽkiti “Niauĩte.” Ininiãkara kanatokopa iua Tavii apika mekaniri? —itxa Xesosi.

Kaiõkatsoparerini Maerekani

(Mateo 23.1-36; Marko 12.38-40)

⁴⁵Eereka kãkiti apisatoõ Xesosi õtãkikana imoianariakori. ⁴⁶Ia atoko itxa:

—Erepaniko, kaiõkatsoparerini misirienetini. Ninoa ieretakari mãkatxi itanori, peereri, apanakini atamatinina ĩkapani. Tiitxi amotikoãtaã ninoa potxitari kãkiti ninoakata sãkirauatini apanakini atamatinina ĩkapani. Ninoa potxitari iitopãkinina auĩtetxi topãkiniãtaã aiko ãki Xoteo apotiitiniãtaãua. Kiinirisaaki ninoa nirekari apiari topãkiniãtaã iitopãkinina. ⁴⁷Kiki ipĩkasaaki, ninoa misiritaro tikinitakoro. Ninoa mixirikari oaãpoko, iuaritika imisãkiretarina Teoso. Teoso imisãkiretakasaakina, kaiõri sãkiretxi isãkiretana. Ininiã apanakini kenakotakasaakiri, ninoa xinikari: “Atão iua imarotari Teosokata isãkirauatini,” itxana. Txamari Teoso kamaãkaretxitana, ininiã apiata imisiritãkanako.

Tikinitakoro Matxineiroto Sikakito

(Marko 12.41-44)

21 ¹Xesosi sãkirauatakasaaki Teoso misãkiretiko aikoti ãki, itikari katiirini takiniro itxineirotena kaixa ãki Teoso

ĭkapani. ²Iuasaaki oãua tikinitakoro matiito. Ôtaniri !auaika. Oa sikaro ipi txineiro ota okinika oamoni auakaro. ³Ininiã Xesosi txa: —Atãopitikara, okira sito sikari apiata. ⁴Kotxi apanakini sikaro itxineirotena itetakito. Okira sikari okinika onakito —itxa Xesosi.

Teoso Misãkiretiko Aikoti Irikiko

(Mateo 24.1-2; Marko 13.1-2)

⁵Ãti ôti Teoso misãkiretiko aikoti ãki aua Xesosi imoianariakorikata. Aiko ereri pirena isãkirenãtana. —Uai peereri. Ere kai sorokiniri paretxiã auakari pakaronepokori. Patamatari kãkiti sikakiti Teosomoni —itxana.

⁶Ininiã Xesosi txana:

—Ari atãopitikara peerekari. Txamari apokapitikako ãti ôti ia aiko irikiko ĭkapani. Iuasaaki kai ãti kai nopini auakari !auaika. Ikinipoko irikaãkako —itxa Xesosi.

Misirikaretxi Apokaenetini

(Mateo 24.3-14; Marko 13.3-13)

⁷Ininiã ninoa pimaãri:

—Koerekareri, kirisaakipa ikara atoko inakari auapani? Kiãtokopa itxa ia aiko Teoso misãkiretiko irikini ôti manapi aimarotini ĭkapani —itxana.

⁸Ininiã Xesosi apakapapiretana:

—Erepaniko, xipokatxi ôti apokaãpotakasaaki, kãkiti nirekari imisirienetinii hïte. Ito aãpirena auako. Kaiãopokori kiki sãkire: “Teoso mereëkitikarano nota. Nota apokapeka uai,” itxamana. Paxirari ninoa sãkire. !Himaãkatapena ninoa. !Himoianatapena ninoa. ⁹Neenamatiene hïkenakoenetakasaaki, !hïpïkaruatape. Iua atoko inakari merepanika auako. Iuasaaki xipokatxi ôti !apokapanika —itxa Xesosi.

¹⁰—Ãti uãka kamari neenamati ãti uãkakata. Ãti auïtetxi sotatoneakori neenamauata ãti auïtetxi sotatoneakorikata. ¹¹Iuasaaki xipokatxi ôti apisa, nota apokini apisa, itixi iakeëkatakato. Natxi auako. Itori amianari auako. Apaka kãkiti atamatakiti iaxiti kamapïkaretana.

¹²—Ikara inakari apisa, apanakini maïkaiko hïte. Himisiritaãkako. Xoteoakori anikaiko aiko Xoteo apotiitiniãtaãua Xoteoakori auïte apisatoõ apoïtiniina ĭkapani. Hïtakaãka kateia ãki. Ninoa anikaiko hïte itixi auakani auïteakorimoni hïte apoïtinina ĭkapani. Iua atokokanerako

hinaākako nisākire hāuikini xika. ¹³Iuasaaki auñtetxiakori apisatoõ hāuakasaaki, hīsāpiretariko Teoso iokanapirena erekari. ¹⁴Ninoa himisākiretini apisa, maerekaxiniretika !hĩtxape. Kona hīpikarauatape, ¹⁵kotxi ninoa apisatoõ hāuakasaaki, nota sikaimaroretai hĩte, ininiã himokaiakariakori liposotari apakapapiretiniina hĩte. !Iposotarina isāpiretiniina: “Kona atāo pisākire,” !itxana. ¹⁶Hinoroma, hĩrima, hĩtariakorima, apanakini hinirimanema, haõkimanerema pakini sikaiko hĩte himokaiakariakorimoni. Ātikaka hĩte okaākako iuasaaki. ¹⁷Ikinimane omanataiko hĩte nisākire hāuikini xika. ¹⁸Iuaritika Teoso !auritari ātika hiãko maporokiko, kotxi Teoso iteene nĩkatapitikaiko hĩte. ¹⁹Himĩteenekiniãri ikinika himisiritiko, ininiã Teoso txĩkitakaiko ātipirika iuakata hāuapininiika hinini ĩkapani —itxa Xesosi.

Xerosareẽ Xipokiko Pirena

(Mateo 24.15-28; Marko 13.14-23)

²⁰Apikomoni Xesosi txari:

—Hātamatakasaakiri sotatoakori ākitiniri Xerosareẽ, iuasaaki himarotariko pakotapaniri sitatxi xipokini. ²¹Iuasaaki hĩte Xotéia tōpa auakani himitekako oxiratarimoni. Sitatxi hāuiniã, ininiã himitekako. Mapara hāuiniã, kona hĩkanapiripe sitatximoni, ²²kotxi iuasaaki kākiti misiritiko õti apoka. Teoso sākire iõkatsopatakori sāpiretapekari ikara õti apokini. ²³Iuasaaki !erekapaniri sito kamixiro ĩkapani, kaxitakarero ĩkapani, kotxi omitekini !apakata. Xoteo auiniãtaã auapitikako iteene imisiritikona tĩkane, kotxi iuasaaki Teoso oerekari iua omanākare Xoteoakorimoni. ²⁴Itomaneri kākiti okaākako saasara atoko inakaroã. Apanakini anikaākako ikini uãka tixinemoni. Xoteo minakanuia xipokariko sitatxi Xerosareẽ. Teoso auiritana ninoa kaikotini iuaã. Eereka Teoso xipokariko ninoa tapara. Eereka !auaikana —itxa Xesosi.

Kākiti Itari Iaxitikiri Kanapiriini

(Mateo 24.29-31; Marko 13.24-27)

²⁵Apikomoni Xesosi txari:

—Nota uai apokini apisa, atokatxi, kasiri, iõriki pakini oerekariko kākiti nota iposope uai napokini. Apaka potxoari uiniti auari tsakati mitari. Iua tsakati miramaneri iene. Ikara xika itixi auakani kamaxirexinirepeka itxanako. ²⁶Kākiti ākipa iotokako ipĩkare xika. Itixi misiritiko xika ipĩkarauata, kotxi iõriki, ikinika iaxiti auakani iakeẽkatakako. ²⁷Iuasaaki nota, hĩtari iaxitikiri

katxakaãpota katxiãrikata. Iuasaaki ikinimane atapanoko nota. Iuasaaki kaposotiireno nota. Niotximerekata napoka uai. ²⁸Ikara itixi misiritiko apokaãpotakasaaki, haiamatako. Hionakaãtako, kotxi paítiki nota kanapiriã híte napini ãkapani. Iuasaaki nimakatkakai híte ikinika maerekati auiniãtaã —itxa Xesosi.

Piko Mina Pirena

(Mateo 24.32-35; Marko 13.28-31)

²⁹Xesosi sãpiretari ãti sãpirenatxi atão inakari oerekiko. Itxari: —Hĩxinikari aamina piko inakori. Apanakini ãtião aamina apaka hĩxinika. ³⁰Pooĩoporipeka onakasaaki, otomorekasaaki, “Kamoĩ apokanapanoka,” hĩtxa. ³¹Iua atokokana ikara misirikaretxi mixikanani nisãpiretakiti hĩtikasaaki, iuasaaki himarotariko paítiki Teoso ikinimane auíte itxauako.

³²—Ia nisãkire atão. Itixi auakani !ixipoka ikinipoko nisãpiretakiti mapokakani apisa. ³³Iaxiti xipokapitikako. Ìkoraxiti apaka xipokapitikako. Iuaritika nota sãkire !ixipoka.

Iãtapakori Ôti Pirena

³⁴—Erepaniko, maerekaxiniretika kona hĩtxape. !Hĩsarauatape. !Hĩpoãtape. Hĩparĩkanoka !hĩxinikapeco, kotxi hĩsarauatiniã, hĩpoãtiniã, hĩparĩkanoka hĩxinikiniã, !hĩxinikari nikanapiriini õti, kotxi ãkora õti himimarotakani õtisaaki, napokako. Erepaniko, kotxi txikatoro atoko itxa napokini. Kãkiti !imarotapaniri napokini õti. ³⁵Imakinika kãkiti itixi auakani imarotariko napokini iuasaaki. ³⁶Hiãtapariko nikanapiriini. ãtipirika himisãkiretariko Teoso. Hamanaãriko Teoso ikara inakari mamisiritakanii híte. Hamanaãriko Teoso himapẽtauatakani ãkapani hĩtari iaxitikiri apokasaaki iua apisatoõ hĩtimakasaaki —itxa Xesosi.

³⁷Ikiniõtika Xesosi sari Teoso misãkiretiko aikotimoni Teoso sãkire oerekini ãkapani. Ikiniõtika mapiãnikata Xesosi sari õtanoxiratarimoni, Oriva inakorimoni. ³⁸Ìkanõkapanika kãkiti apoka Teoso misãkiretiko aikotiã Xesosi sãkire ikenakotinina ãkapani.

Satanasi Ìroã Xotasi Xinireẽ

(Mateo 26.1-5; 14-16, Marko 14.1-2; 10-11, Xoão 11.45-54)

22 ¹Kaiamapeka Pãskoa inakori kiiniriti apokini. Iua kiiniriti Xoteoakori nikari pão matireẽkati. ²Iuasaaki sasetotxi

auíteakori, kaiõkatsopareriakori pakini nirekari Xesosi okinina, txamari, ninoa píkari apanakini kākiti, kotxi ninoa apokaerekatari Xesosi.

³Iuasaaki Satanasi ñroaítotari Xotasi Isikariotxi inakori. Iua Xotasi Xesosi moianarikamara, apanakinikata. ⁴Iuasaaki iua sari sasetotxi auíteakorimoni, Teoso misākiretiko aikoti nĩkatakani auíteakorimoni. Iuasaaki isākirauata ninoakata Xesosi imĩkapiritini ĩkapani. Iuasaaki ninoa xinikaxitita:

—Kiātokopa itxatari Xesosi isikini atemoni?

⁵Sasetotxi auíteakori enenĩka. Ninoa txari Xotasimoni:

—Pisikasaakiri Xesosi atemoni, aĩkitxitaiko pite —itxana Xotasimoni.

⁶—Ateeneka —itxa Xotasi.

Ikara atoko inaāka atoko Xotasi iātapari isikiniri õti manapi. Inirekari kākiti mauakanisaaki, Xesosi imĩkapiritini.

Páskoa Kiiniriti Kamiko

(Mateo 26.17-25; Marko 14.12-21)

⁷Iuasaaki kākiti parĩkauata Páskoa kiiniriti ikaminina ĩkapani. Iua kiiniriti auakasaaki, itotarina pāo matireēkati inikinina. Iuasaaki okarina soti auíte ākiri kiinirisaaki iniākitina ĩkapani.

⁸Xesosi paniātana Xoão, Petro pakini:

—Hĩsako. Hāpotiitariko nipokori Páskoa kiiniriti ĩkapani —itxa.

⁹Ininiā ninoa:

—Namonipa akamatari kiiniri? —itxana.

¹⁰Ininiā Xesosi:

—Xerosareēmoni hĩa. Iuaã hĩtikari kiki kaminiri sito parĩka. Iua apañātari āparaã. Kopiti ikiiā anikanāta. Iua aõkitaiko hĩte. Iuakata sa hĩtxako. Hĩiroã aapokotxi iua ĩroiniātaã.

¹¹Himisākiretari kauiniri. Hĩtxariko iua: “Koerekareri nirekari imarotiniri: ‘Namonipa ianapokotakani kaikotiniātaã iriko? Iuaã inirekari inapiniri Páskoa õti imoianariakorikata,’ hĩtxariko iua.”

¹²Iuasaaki kauiniri oerekai itanokiri koa mitari iuaã kiiniri ĩkapani. Imakinika tiĩtxi iposope. Iuaārako hāpotiitari imakinika Páskoa kiiniriti ĩkapani —itxa Xesosi.

¹³Ininiā sa itxana. Apoka itxarina ikinika Xesosi sākire iaõka. Ininiā iuaã ninoa maiamatari kiiniri.

Xesosi Ìto, Iarēka Pakini

(Mateo 26.26-30; Marko 14.22-26; 1 Korĩto 11.23-25)

14 Ininiã Páskoia kiiniriti potorikasaaki, Xesosi imoianariakorikata topāka. 15 Ininiã Xesosi txana:

—Iteene ninirekari hītekata ninikiniri ia nipokori Páskoia kiiniritisaaki, natatsiirauatini apisa. 16 Ia atoko inakari nipokori !ninikaikariko hītekata. Teoso ikinimane auīte inakasaakiua, iusaakiikarako ninikapitikariko iuaīkana.

17 Eereka iua kosekari iātatxi koana ovaã iāriāti. Ininiã itxa:

—Niri, erekapitikari ia pisikakiti —itxari Teoso.

Eereka itxana imoianariakori:

—Ia iāriã hāpakapako. Hīkinika hiātariko. 18 Atāo nisāpiretai. !Niātaikaroko ovaã, Teoso ikinimane auīte iminakanisaakiua. Teoso ikinimane auīte inakasaakiua, iusaakiikarako iuaīkana niātariko ovaã —itxa Xesosi.

19 Eereka ikosekari komiri:

—Erekapitikari ia komiri pisikakiti atemoni —itxari Teoso.

Eereka imapixinikaāpotari, sikaāpota itxana imoianariakori:

—Ia niīto okaāka hīte īkapani. Ia komiri hinikasaaki, hīxinikanoko nota. Hīxinikari nipinini hīte īkapani.

20 Inikaākarina atoko, ikosekaro ovaã. Isikana imoianariakori. Ininiã itxa:

—Ia niarēka xiketakariki makatxakariko hīte maerekani. Teoso sāpiretapekari kākiti ikamaenetakiti amaneri kākiti īkapani. Ia niarēka oerekari kākiti, Teoso kamapekari ikamaenetakiti. 21 Iua nimīkapiritakiri uatxa uai topāka notakata. 22 Nota hītari iaxitikiri okaākako. Teoso sākire iōkatsopatakori sāpiretapekari nipinini tīkane. Nota hītari iaxitikiri mīkapiritakari iteene misiritaākako —itxa Xesosi.

23 Xesosi moianariakori ninoakakarika isākirauatana:

—Kipa sikatari Xesosi imokaiakariakorimoni? —itxanātana.

Kiripa Apiatakari?

24 Ikara atoko inaāka atoko Xesosi moianariakori misākiretakakaua.

—Kiripa apiatakari txatapaniuako ate sauaki? —itxana.

25 Ininiã Xesosi:

—Xoteo minakanuia auīteakori itaparasākireritika ipaniātana Xoteo minakanuia iauītena nireēkiti ikaminina īkapani, iuaritika

ninoa sãkire, “Peerekaua ate. Ate moianatari kãkiti,” itxana. ²⁶Hĩte kona ninoa atoko kona hĩtxape. Atxiĩti apiari pitxaua hĩte sauaki, ininiã amarini atoko pitxauako. Auĩtetxi pininiãua, nitiritxi atoko pitxauako. ²⁷Kiripa apiatakari txataua? Auĩtetxi nipokori nikakarikani, apiatakari txatauako? Initiri nipokori kamakarikani apiatakari txatauako? Ikinimane kãkiti imarotari nipokori nikakari apiatakari itxaua. Txamari nota auakasaaki kãkiti sauaki, nitiritxi atoko nitxaua, kotxi kãkiti nimoianata.

²⁸—Xoteoakori misiritakasaakino nota, kona hĩte takanapano. Atão nimoianariakori hĩtxaua. ²⁹Niri, auĩtetxi txĩkitakapekano nota. Ininiã iua atokokana nota txĩkitakai hĩte auĩtetxi hininiua. ³⁰Nota auĩtetxi ninakasaaki, hinipokota, hiãta hĩtxako notakata. Auako auĩtetxi topãkini hĩte ĩkapani. Ininiã iuasaaki hĩpaniãtana tosi nirimanetxi Isaeo auakani ikamakitina tĩkane —itxa Xesosi.

Xesosi Sãpiretari Petro

Kipatiniri Iua

(Mateo 26.31-35; Marko 14.27-31; Xoão 13.36-38)

³¹Xesosi sãkirauata Simão Petromoni:

—Simão, Simão, Satanasi amanaãpekari Teoso pite, apanakini apaka atamakaerekatini ĩkapani. Ahoisi misiritiko atoko inirekari imisiritinii pite. ³²Iuaritika, nota misãkiretapekari Teoso isikataparatiniri pixinire Simão, nisãkire atão pauikini ĩkapani. Pikerokariko pikamakiti, iuaritika pikanapiriãpitika nota sãkire iteene iuaĩkana pauikini ĩkapani. Eereka pisikataparaxiniretanako pitariakori nota sãkire auiãkani —itxa Xesosi sãkire.

³³Petro txari Xesosi:

—Niauĩte, nota iposope nitxa kateiamoni nisini pitekata. Pitekata iposope nitxa nipinini —itxa.

³⁴Xesosi txari:

—Atão nisãpiretai. Ia ĩkanõkati patari sãkirauatini apisapanikako, ipi ãti pakinikata, “!Nimarotari iua,” pitxanoko — itxa Xesosi.

Xesosi Ôtākikana Imoianariakori

35 Eereka iuaĩkana Xesosi sākirauata imoianariakorikata:

—Mítxi nota iokanatai kākitemoni. Iuasaaki kona nisikai txineiro.

Kona nisikai sako mata. Kona nisikai sapato, iuaritika minakati auinii atxiĩti? Erekari hĩsini ikinika hinirekakiti mauakanisaaki? —itxa Xesosi

—Minakati !auinaua ate —itxana.

36 Ininiã Xesosi txana:

—Txamari uatxa pitxineirote, sakora pakini auiniã, panika. Iouata mitaro mauakanisaakii, pimãka inopinikiri pivêtxitako iouata piamotini ĩkapani. 37 Teoso sākire iókatsopatakori kitxakapirĩka txari:

Imaĩkaãka, kokaniri maĩkiko atoko inaãkako.

Ininiã ikara nimaĩkiko apokapitikako. Ikara nota pirena kitxakapirĩka atãopitika —itxa.

38 Imoianariakori txari:

—Apiananiri, patamata. Uai aua ipi iouata aneenamauatini ĩkapani.

Xesosi txari:

—!Apakata ikara atoko inakari hĩsãkire —itxa Xesosi.

Xesosi Misãkiretiniri Teoso Xetsẽmani Inakoriãtaã

(Mateo 26.36-46; Marko 14.32-42)

39 Eereka ixirata auĩte Oriva inakorimoni isa, kotxi itotapekari iuaã isini. Imoianariakori sari iuakata. 40 Iuaã apokasaakina, Xesosi txana:

—Satanasi nirekari maerekati hĩkamini. Ininiã himisãkiretariko Teoso, iua sikataparatinii, Satanasi nirekakiti himakamakani ĩkapani —itxa Xesosi.

41 Ininiã iuaã itakanapana imoianariakori. Apikoxãki axapiti sa itxa. Iuaã ikapotoreẽkaua, misãkireta itxari Teoso. 42 Itxari:

—Niri, !pauiritapeno paĩtiki natatsiirauatini, iuaritika kona pikamapiri nota nirekaãkiti. Pite nirekaãkiti ninireka nikamini —itxa Xesosi.

43 Iuasaaki Teoso nitiri iaxitikiri apoka iuamoni isikataparaxiniretiniri ĩkapani.

44 Iuasaaki Xesosi xinire kamaxirepeka. ãkixinireẽ apokapeka itsii. Ininiã iteene imisãkiretari Teoso. Ininiã iinĩkakare arẽkatxikata tapika ixitimoni.

45 Teoso imisãkiretaka atoko, õkitikaua, imoianariakorimoni isa. Iua apoka ninoamoni. Imakapoanãtana, kotxi isãpakapekana imatanianuatina xika. 46 Ininiã akiritana:

—Kinirepa himakanãta? Hõkitikaua. Himisãkiretari Teoso, Satanasi nireẽkiti himakamakani tĩkane —itxa Xesosi.

Xesosi Maĩkiko Pirena

(Mateo 26.47-56; Marko 14.43-52; Xoão 18.1-11)

47 Xesosi sãkirauatakasaaki imoianariakorikata, itomaneri kãkiti Xotasikata apoka. Xotasi mĩikiikana ninoa Xesosi oerekini ĩkapani. Iua Xotasi Xesosi moianarikamara, apanakinikata. Xotasi apokasaaki apitxokari Xesosi. 48 Ininiã Xesosi txari iua:

—Xotasi, pimĩkapiritatari pitari iaxitikiri papitxokasaaki? —itxa Xesosi.

49 Xesosi moianariakori imarotakasaakiri kãkiti nirekiniri Xesosi imaĩkini, itxana:

—Apiananiri, erekari atxiĩti uatxa aneenamauatini, aiouataneẽ —itxana.

50 Ininiã ãti Xesosi moianari sauakari sasetotxi auĩte apiatakari nitiri kĩpita ikikomoni. 51 Ininiã Xesosi:

—Hiĩtoka ikara. Iaõpe.

Eereka Xesosi takapiotaua ikĩpitaã. Iuasaaki kakĩpitapeka itxa iuaĩkana. 52 Sasetotxi auĩteakori, kiomãtxiakori pakini ina Xesosi imaĩkinina ĩkapani. Xesosi txari ninoamoni:

—Kinirepa himinari iouata, piriri pakini himaĩkinino ĩkapani?

53 ĩkiniõtika hĩtekata naua aiko Teoso misãkiretikoã. Iuasaaki kona hĩte maĩkano. ĩkanõka hina, kotxi ipiaã hĩkamari maerekati —itxa Xesosi.

Petro Kipatari Xesosi Imarotini

(Mateo 26.69-75; Marko 14.54, 66-72; Xoão 18.15-18, 25-27)

54 Ininiã ninoa maĩkari Xesosi, anika itxarina sasetotxi auĩte apiatakari aapokomoni. ĩroãna aapoko ãki. Ininiã Petro sari ninoa tikini. 55 Sasetotxi aapoko takote apoka. Iuasaaki mapara xamina pokitakori aua. Kãkiti topãkanãta xamina takote. Irokanãtana. Ininiã Petro topãka ninoa takote. 56 Iuasaaki ãtokoro atamatari iua xamina kamaraã. Ininiã itakote oãpoka. Omixinitari iua:

—Ia kiki Xesosikata auakari —otxa.

57 Txamari Petro txari:

—Ãtokoro, kona nimarotari iua —itxa.

58 Eereka ãti atamatari iua. Itxari iua:

—Pite Xesosi moianarikalari? —itxari.

Txamari Petro:

—Konapitini —itxa.

⁵⁹Āti oara napa atoko āti txari:

—Atāopitikara, ikira kiki Xesosi moianaripitikara, kotxi Kariréiakiri itxaua iua —itxa.

⁶⁰Petro txari:

—Kona nimarotari ikara pisāpiretakiti.

Iuasaaki, isākirauatakasaaki, patari sākirauata. ⁶¹Iuasaaki Xesosi sapotorika, atamata itxari Petro. Iuasaaki, Petro xinikari mitxi Xesosi sāpiretakiti: “Patari sākirauatini apisapanikako, ipi āti pakinikata, ‘!Nimarotari iua,’ pitxanoko” ininiri iaōka aua. ⁶²Ininiā eereka Petro sipe. Iteene txiapata itxa.

Sotatoakori Napetiniri Xesosi

(Mateo 26.67-68; Marko 14.65)

⁶³Xesosi nīkatakani napetari, noropata itxarina Xesosi.

⁶⁴Iuasaaki iaxirikaokitarina iua, ninoa imatamatakani ikapani. Iuasaaki noropata itxarina.

—Kimarorei pite. Kiripa noropatai? —itxana.

⁶⁵Itomaneri maerekati sākiretxitiā itxitarina Xesosi. Inapetiniri liotoka.

Xesosi Xoteo Auīteakori Apisatoō

(Mateo 26.57-68; Marko 14.53-65; Xoão 18.19-24)

⁶⁶Īkanōkapanika kiomātxiakori, sasetotxi auīteakori, kaiōkatsopareriakori pakini apotiitaua. Iuasaaki Xesosi minaāka ninoamoni.

⁶⁷—Pisāpiretaua ate, Teoso mereēkitikai pite? —itxarina.

Ininiā Xesosi apakapapiretana:

—Nisāpiretiniāi, !hāuikari nisākire. ⁶⁸Nipimarauatiniā, hīte !apakapapiretano. Apaka !hāuiritari nisikakiko. ⁶⁹Paītiki hītari iaxitikiri topākako Teoso kaposotiireri kikomoni —itxa Xesosi.

⁷⁰Ininiā iuaākana ninoa pimaāri:

—Teoso ākirikai pite? —itxarina.

Ininiā Xesosi apakapapireta:

—Atāopitikara hīsākire. Iuapitikarano nota —itxa.

71—Iaõpekara. Akenakotapekari isäkire. Ininiã apikomoni isäkire kenakotakani !anirekaika, kotxi ateka kenakotapekari iua säkire maerekati —itxana.

Xesosi Pirato Apisatoõ

(Mateo 27.1-2, 11-14; Marko 15.1-5; Xoão 18.28-38)

23 ¹Ininiã imakinika ninoa anikari Xesosi Piratomoni.
²Ininiã iuaã ikamarina aãpirena. Apoïtarina Xesosi:
 —Ate kenakopiretari oerekiniri kãkiti maerekati ikamini, kotxi iua õtãkikari kãkiti, kãkiti miïkitxitakaniri Sesa, Homano auïte apiari. Apaka itxa: “Teoso mereëkitino nota. Auïtetxi apiatakari nitxaua,” itxa iua säkire.

Txamari na atãoni ikara atoko itxana ninoa. Ikara atoko ninoa apoïtari Xesosi. Kona atão ninoa sãpiretakiti. ³Ininiã Pirato pimaãri Xesosi:

—Pitekani Xoteoakori auïte txataua? —itxari Xesosi.

—Iuapitikarano nota —itxa Xesosi.

⁴Ininiã Pirato txana sasetotxi auïteakori, kãkiti pakini:

—!Napokari maerekati ikamakiti —itxa.

⁵Iuaïkana apoïtarina:

—Iua oerekana kãkiti maerekati ikamini auïtetxiakorimoni.

Kariréia tãpamonira ipotorika. Uatxa uaipekarari iua —itxana.

Xesosi Erotxi Apisatoõ

⁶Pirato kenakotakasaakiri isäkirena, ipimaãna:

—Ia kiki Kariréiakirikani?

⁷—Ari iuapitikara —itxana.

Ikara Pirato imarotakasaaki, iokanatarí Xesosi Erotximoni, kotxi Kariréia tãpa auakani auïte itxaua Erotxi. Iuasaaki iua ianapokota Xerosareë. Ininiã Pirato iokanatarí Xesosi Erotximoni, kotxi Xesosi Kariréiakiri.

⁸Erotxi kenakopiretapekari Xesosi pirena. Ininiã iua aõkitakasaakiri Xesosi, poxokope itxakata, kotxi inirekari Xesosi oerekiniri iposotiire.

⁹Ininiã iteene ipimaãri Xesosi, ikamakiti imarotini íkapani. Txamari Xesosi !apakapapiretari iua. ¹⁰Iuasaaki sasetotxi auïteakori, kaiõkatsoparerini pakini iteene apoïtari Xesosi. Ikinika ninoa säkire aãpirenanoka. ¹¹Eereka Erotxi, isostatoneakori pakini napetari Xesosi. Ieretakarina auïtetxi mãka maparakiri apiata inapetinirina íkapani.

—Hätamatari ere. Auñtetxi itxaua —itxana.

Eereka iuaĩkana iokanatarina Piratomoni. ¹²Mitxi Erotxi, Piratokata omanatakakaua. Ikara õti ninoa apokaerekatakakaua.

Xesosi Okiko Nirekiko

(Mateo 27.15-26, 11-14; Marko 15.6-15; Xoão 18.39-19.16)

¹³Ininiã eereka Pirato apotiitari sasetotxi auñteakori, Xoteo auñteakori, apanakini kãkiti pakini. ¹⁴Ininiã itxa:

—Hĩte minari ia kiki notamoni. Hĩte apoĩtari iua imisirienetiniri kãkiti. Hĩte apisatoõ nipimaãpekari ikamakiti pirena. Notamoni kona maerekati !ikama. ¹⁵Erotxipekana !apokari maerekati ikamakiti, ininiã iokanatarari iua notamoni iuaĩkana. Inipitikara iua erekari, txamari hĩte nirekari okiko maxikatiĩka. ¹⁶Ininiã nota paniãtari inoropatiko aãpitsa aamata kamakoriã. Eereka niokanatarari isini.

¹⁷Iuasaaki Pãskoã kiiniritisaaki, auñtetxiakori itotari isikakiniri ãtika kateia ãki auakari.

¹⁸Ikara Pirato sãkire ikenakotakasaakina, ninoa akirikata: —Hõkariko ere kiki. Hĩsikakariko Pahapasi —itxana.

¹⁹Pahapasi kateia ãki aua, kotxi iua apanakinikata naiatarari auñtetxiakori. Kokaniri apaka itxaua.

²⁰Pirato nirekari Xesosi isikakini, ininiã iuaĩkana isãkirauata kãkitimoni. ²¹Txamari ninoa akiripoakata:

—Aamina ĩpiriãmitakari nopini hĩtokakitariko. Hõkariko aamina ĩpiriãmitakari nopini —itxakatana.

²²Pirato mitxi isãkirauata ipikata. Iuaĩkana isãkirauata:

—Kixikapa? Maerekati !ikama. Ixika !auari ipinini ĩkapani. Nipaniãtariko inoropatiko, eereka nisikakariko —itxari.

²³Txamari iuaĩkana akiripoakatana:

—Hõkariko aamina ĩpiriãmitakari nopini.

Ninoa akiripoakatini xika Pirato kamari ninoa nirekakiti.

²⁴Ininiã Pirato:

—Xesosi ipinako hinirekakiti iaõka —itxa Pirato.

²⁵Iuasaaki isikakari Pahapasi kateia ãki auakari. Neenamatzĩ kamakari, kokaniri apaka itxaua Pahapasi. Eereka isikari Xesosi sotatoakorimoni aamina ĩpiriãmitakari nopini okiko ĩkapani.

Xesosi Tokakitaãka Aamina Īpiriãmitakari Nopini
(Mateo 27.32-44, 11-14; Marko 15.21-32; Xoão 19.17-27)

²⁶Ininiã sotatoakori anikari Xesosi okiko ĩkapanimoni. Iuusaaki kimaporiãpo aõkitarina Simão, Sireni sitatxitikiri. Iuusaaki iua apoka sitatximoni. Sotatoakori maĩkari iua. Aamina ĩpiriãmitakari itakana Simão tsotere nopini:

—Panika ia aamina ĩpiriãmitakari —itxarina.

Xesosi tikini sa itxa Simão. ²⁷Xesosi tikini isa mirikiniti kãkiti. Ātokaka sitoakoro sari apaka. Imatinaniuatana, itxiapatana, kotxi imarotarina Xesosi paĩtiki ipinini. ²⁸Xesosi kirioka ninoa sitoakoromoni. Itxana:

—Sitoãkini Xerosareẽ auakani anaakoro. Kona notani !himariaka. Hitekara himariakaua. Hamariteni ĩkapani hĩtxiapata, ²⁹kotxi ãti õti apokasaaki, kãkiti sãkire: “Apiaerekata sito meeneto oniniua,” kotxi iuusaaki misirikaretxi apokasaaki, pamonõkoniri. ³⁰Iuusaakiikarako kãkiti akiripoakatako ixirata auĩtemoni: “Ate nopini pirika. Pipataua,” itxanako, kotxi iuusaaki ninoa mokaiakariakori apokaãpota ninoa xipokini ĩkapani. ³¹Nota aamina amaneri atoko nitxa. Hĩte aamina ĩsasaka atoko hĩtxa. Nota !ikamari maerekati, iuaritika ia atoko nota ipina. Erepaniko aamina ĩsasaka atoko hĩtxa, ininiã ãti õtirako apiata himisiritiko —itxa Xesosi sãkire.

³²Ninoa anikari ipi maerekati kamakani Xesosikata ipininina ĩkapani. ³³Apokasaakina “Kiitãtatxi” inakoriãtaã, itokakitarina Xesosi aamina ĩpiriãmitakari nopini. Iua atokokanera itxana maerekati kamakani. Āti maerekati kamakari itakana Xesosi kikomoni, ãti isanaremoni.

³⁴Iuusaaki Xesosi txari:

—Niri !pimisiritapena ninoa, maerekati ikamakitina xika, kotxi !imarotarina ikamakitina —itxa Xesosi.

Iuusaaki sotatoakori kamari sarauatxi. Eereka imaktxakarina Xesosi mãka. Sarauatxi kãiatakari apakapari imãka. ³⁵Kãkiti iuaã auakani itikari Xesosi. Sasetotxi auĩteakori napetari iua. Itxana:

—Iua makatxakapekari apanakini imapinakanina ĩkapani. Teoso mereẽkiti ininiãua, kinirepa iuaka !imaktxakaua? —itxana.

³⁶Iuusaaki sotatoakori apaka napetari iua. Katxioãri isikarina Xesosi iãtini ĩkapani, txamari !iãtari. ³⁷Itxana:

—Pite Xoteo auĩte pininiãua, ininiã aamina ĩpiriãmitakariã pimakatxakaua. Piteka pimakatxakauako —itxarina.

³⁸Iuasaaki iókatakori takaãka ikii tanomoni:

—Xoteoakori Auíte —itxa iua iókatakori. Homano sãkireẽ aua. Kreko sãkireẽ aua. Xoteo sãkireẽ pakini aua iuaã iókatakori.

³⁹Maerekati kamakari Xesosi takote tokakitakori akiritari iua. Itxitari. Inapetari:

—Pite Teoso mereẽkiti pininiãua, ãteroa piposotiire? Piteka pimakatxakaua. Ate apaka pimakatxaka —itxa.

⁴⁰Ãti maerekati kamakari iuaã tokakitakori ôtãkikari iua:

—Kona pite pĩkatari Teoso? Ate apaka apinako. ⁴¹Atãopitikara ate misiritiko, kotxi maerekati akamapeka. Ere kiki !ikamari maerekati —itxa.

⁴²Eereka itxari Xesosi:

—Xesosi, auĩtetxi pininiãtaãua papokasaaki, pixinikano nota, kotxi ninirekari nisini pitekata iuaxiti —itxari.

⁴³Xesosi apakapapiretari:

—Atãopitikara nitxai, uatxa ia õti, pite sariko notakata iaxiti Erekarĩtaã.

Xesosi Ipinini Pirena

(Mateo 27.45-56; Marko 15.33-41; Xoão 19.28-30)

⁴⁴Ininiã apaniãxiti takote atokatxi piãkapeka. Ipi ãti pakini oara ipiãka. ⁴⁵Atokatxi !iponikaika. Iuasaaki mãkatxi mata mitari Teoso misãkiretiko aikotiã arõkakari matsorakitaãka. Ipi matapeka itxa.

⁴⁶Iuasaaki Xesosi akirikata:

—Niri, nisikai nixinire pinĩkatini ikapani.

Ikara atoko inaãka atoko, ipina. ⁴⁷Sotato auíte itikasaakiri, ikenakotakasaakiri, itxa:

—Atãopitikara ikira kiki atão inakaranoka kamakari iua. Maerekati likama —itxa sotato auíte.

⁴⁸Kãkiti iuaã apotiitakaniua ikara atamatakasaakina, itorotana iaritana ipĩkarauatini xika. Ininiã isipekana. ⁴⁹Ikinika Xesosi aõkimanere, sitoakoro Kariréiakini, iua tikini sikani pakini aua iuaã. Ikira atoko itikanãtarina Xesosi okiko.

Xesosi Katiko Pirena

(Mateo 27.57-61; Marko 15.42-47; Xoão 19.38-42)

⁵⁰Iuasaaki iuaã aua Xosee inakori. Xoteo auíteakori ôtãkikakari iua. Erekarĩ iua. Erekarinoka ikama. ⁵¹Arimateia sitatxitikiri iua.

Arimateia sitatxiti, Xotéia tōpa aua. Iātapapikari Teoso ikinimane auíte ininiua. Mitxipe apanakini Xoteo auíteakori ôtākikakani nirekasaakiri Xesosi okinina, iusaaki iua Xosee txari:

—Konapitini. !Apakata ikara atoko akamini —itxa.

⁵²Xesosi ipinaka atoko, Xosee sari Piratomoni. Amanaāri Xesosi ito akauarimoni itakini ikapani. Ininiā Pirato sikari Xesosi ito iuamoni.

⁵³Ininiā iua makatxakari Xesosi ito itokakitikoōtaā. Iapirikari mākatxi mataā, kai iriko āki taka itxari. Mitxi ipīkari !auapanika iua iriko āki. ⁵⁴Ikara ōti sesta veira. Ikinika sesta veira, Xoteoakori tomatini ōti apisa, Xoteoakori aiamata tomatiko ōti ikapani.

⁵⁵Sitoakoro Kariréiakini Xesosikata ikani sari Xosee tikini kai irikomoni. Ninoa nirekari imarotiniri Xesosi ito takikoōtaā.

⁵⁶Eereka ninoa kanapiriā aapokomonina. Kamariāro, aātsopa ātiāo pakini apotiitana Xesosi itoā itakinina ikapani. Ininiā tomatiko ōti tomata itxana, kotxi Teoso paniātakiti iaōka ikamana.

Xesosi Iuaikana Auāki Inini

(Mateo 28.1-10; Marko 16.1-10; Xoāo 20.1-10)

24 ¹Tomīkosaaki ikanōkapanika, sitoakoro sari kai irikomoni, kamariāro Xesosi itoā itakinina ikapani. ²Ninoa apokasaaki iuaā, atamatarina. !Katoreikari kai iriko. Kai tore makatxakapeēkaika. ³Ininiā ninoa iroā, txama kona apokarina Xesosi ito. ⁴Ininiā sitoakoro: —Itapari Xesosi ito? Kanatokopa itxa? —itxanātana.

Iusaakipeka ipi kiki tokiā. Itimana sitoakoro apisatoō. Pomēkori mākarini ninoa. Mēkokari iotximere atoko itxa ninoa māka. ⁵Sitoakoro pīkaruata, ininiā iākana. Ixitipeka auakiitana. Ininiā ninoa kiki txana:

—Kinirepa hinitanātari auāki inakari ipīkani sauaki? ⁶!Uaiikari iua. Ōkitikapekaua. Hīxinikari isākire Kariréia hitekata auakasaaki.

⁷Ia atoko itxa isākire: “Hitari iaxitikiri sikaākako maerekanimoni. Eereka nipinako aamina ipiriāmitakari nopini. Eereka ipi āti ōtisaaki iuaikana nōkitikauako,” itxa Xesosi. Hīxinikariko isākire —itxana.

⁸Ininiā ninoa sitoakoro:

—Ari ikara atokopitikara itxapeka isākire —itxana.

⁹Eereka ninoa sipeka. Ōsi Xesosi moianariakorimoni isana.

Apanakini kākiti iuaā aua apaka. Iuaā ninoa sāpiretana ikinipoko itikakitina. ¹⁰Maria Matarenama, Xoanama, Maria Txiako inoroma, apanakini pakini sāpiretari Xesosi moianariakori itikakitina.

¹¹Txamari Xesosi moianariakori kona auikari ninoa sākire.

—Paxirari hīsākire —itxana.

¹²Petronoka auikari ninoa sākire, ininiã imiteēkata kai irikomoni. Iāka, iriko āki atamatini ĩkapani. Mākatxi matanoka, Xesosi ĩtoã Xosee iapirikakitinoka atamata. Eereka aapokomoni ikanapiriã. Isikasaaki, itsoriãkaãnãta, Atamatakiti ixinikanãta.

Emaoso Kimaporiti Sikani

(Marko 16.12-13)

¹³Ikara ôti ipi Xesosi sākire auiãkani iãpota Emaoso inakori aapokotxitimoni. Xerosareẽ pipotorikasaaki, ipi oara napa atoko papoka Emaoso. ¹⁴Ninoa ipi sākirauanãta isaãpotakasaakina. Isākiretarina, ixinikarina Xesosi ipinini pirena. ¹⁵Isākirauanãtakasaakina, iusaaki Xesosi ina ninoa tikini, ininiã iua sa ninoakata. ¹⁶Txamari ninoa kona imarotari iua Xesosi ininiua. ¹⁷Ininiã Xesosi:

—Kipa hĩte sākirenãta? —itxa Xesosi.

Ininiã ninoa iotoka. Iusaaki ninoa toõ oerekari imatanianuatina. ¹⁸Kiropasi inakori apakapapiretari:

—Ikinimane Xerosareẽ auakani imarotari Xesosi okiko pirena. Atxiĩti pite ãtiãtaã ĩkarikai? —itxari.

¹⁹Ininiã Xesosi txari:

—Natokopa itxa iua? —itxa.

Ininiã ninoa:

—Xesosi Nasaree sitatxitikiri iua. Teoso sākire sãpiretakari itxaua. Teoso, kãkiti apaka apokaerekatari isākire, ikamakiti pakini, kotxi paposotiireri isākire, ikamakiti pakini. ²⁰Sasetotxi auĩteakori, aãũteakori apaka sikari iua okiko ĩkapani, aamina ĩpiriãmitakari nopini ipinini ĩkapani. ²¹Ate uãkatari iua kãkiti Isaeo auakani maerekani makatxaãkari ininiua. Kita mitxi iua ipina. ²²Mixikanani sitoakoro iua sākire auiãkani sãkirauata atekata. Ininiã atsorĩkaãta. Isãpiretauana ĩkanõkapanika akauarimoni isinina. ²³Txamari ninoa kona apokaikari Xesosi ĩto. Ninoa sākire, aõkitana Teoso nitiriakori iaxitikini iuaã. Ninoa sãpiretana sitoakoro Xesosi iuaĩkana õkitikapekaua. ²⁴Eereka ãtikaka imoianariakori sari iuaã atamatinirina ĩkapani. Sitoãkini sākire atãõpitikara. Txamari laõkitari Xesosi iusaaki —itxa Kiropasi.

²⁵Ininiã Xesosi txana ninoa:

—Miĩkiteni hĩtxaua. !Hinirekari hãuikiniri Teoso sākire sãpiretakani sãpiretakiti imakinika Teoso sākire, ²⁶kotxi ninoa

txari: “Teoso nirekari imereēkiti atatsiirauatini, Teoso tixine ikanapiriini apisapanika,” itxa Teoso sākire —itxa Xesosi.

²⁷Iāpotakasaakina, Xesosi sāpiretana ninoa Teoso sākire iuaka pirena. Merepanika iuaka oerekaua Moisesi iōkatsopatakitiā, eereka Teoso sākire sāpiretakani iōkatsopatakitiā. Iuaka oerekaua imakinika Teoso sākire iōkatsopatakoriā auakariā.

²⁸Iuasaaki ninoa apokaāpota Emaoso takote. Ninoamoni Xesosi nirekari apikomoni isini. ²⁹Ininiā itxana:

—Kona pisipe apikomoni. Mapiānikata, ininiā atekata pikaikota —itxarina.

Ininiā Xesosi iroā aapokotxiā ninoakata ikaikotini ikapani. ³⁰Iitopāka ninoakata inipokotini ikapani. Iuasaaki Xesosi kosekari komiri.

—Teoso, erekapitikari pisikakiti atemoni —itxa.

Iuasaaki imapixinikari komiri, sika itxana ninoamoni.

³¹Iuasaakipeka ninoa imarotari Xesosi ininiua. Iuasaakipeka, ereēkoka itxa. ³²Ininiā ninoa misākiretakakaua:

—Atāopitikara, kimaporiā isākirauaāpotakasaaki, Teoso sākire oerekarauaāpotakasaaki, axinire poxokoniyata iuasaaki —itxana.

³³Iuasaakipeka ninoa aiamata. Ikanapiriāna Xerosareēmoni. Iuaā apokana ōsi Xesosi moianariakori, apanakinikata. ³⁴Isāpiretana:

—Xesosi auāki inini pirena atāopitikara. Apiananiri ōkitikapekaka. Petromoni oerekapekaka —itxana ninoa.

³⁵Ininiā eereka Kiropasi imoianarikata sāpiretana kimapori isinina pirena. Isāpiretana komiri Xesosi mapixinikini pirena, kotxi iuasaakiika ninoa imarotari iua Xesosi ininiua.

Xesosi Oerekaua Imoianariakorimoni

(Mateo 28.6-20; Marko 16.14-18; Xoāo 20.19-23; Átosi 1.6-8)

³⁶Isākirauatapanikana inakasaakina, Xesosi tokiā ninoa sauaki. —Erekaxinire hītxako —itxa.

³⁷Itikoākatana. Ipīkarauatana. Kamiri iuākatarina.

³⁸—Kinirepa hītikoka? Kinirepa kamaxirepeka hītxa iīkiteta?

³⁹Hātamatariko niuako, nikiti pakini. Iuapitikarano nota.

Himaātakano. Kamiri !kaxiniri. Kamiri kona kapiri. Hātamatano. Niitokara. Kamiri !nitxaua —itxa Xesosi.

⁴⁰Ininiā oerekari iuako, ikiti pakini ninoamoni. ⁴¹Ninoa iteene poxokoniyata, txamari liteene !auikapanikarina atāo Xesosi ininiua. Ininiā iuasaaki Xesosi pimaāna:

—Nipokori aua hītemoni? —itxa.

⁴²Ininiā ninoa sikari ipixini ximaki kimitakori. Mapaā apaka isikarina. ⁴³Ininiā iua nikari ninoa apisatoō. Iuasaaki ninoa imarotari atāo Xesosi ininiua, kotxi kamiri !inikari nipokori.

⁴⁴Eereka iua misākiretana ninoa:

—Mitxi hītekata nauakasaaki, nisāpiretai ikinipoko nota pirena Teoso sākire iōkatsopatakoriā. Noerekapekai hīte Moisesini iōkatsopatakiti, Teoso sākire sāpiretakani iōkatsopatakiti. Xikari iōkatsopatakori apaka noerekapekai. Imakinika ninoa sāpiretakiti nota pirena apokaepka.

⁴⁵Iuasaaki isikaimaroretana ninoa Teoso sākire iōkatsopatakori imarotinina ĩkapani, ininiā iuasaaki ninoa imarotari atāo. ⁴⁶Itxari:

—Kitxakapirīka iōkatsopatapeēkaika:

Teoso mereēkiti atatsiirauatako. Okaākako. Ipi āti ōtisaaki ōkitikauako.

⁴⁷Kākiti nisākire auiākani iaripiretariko niokanapirena erekari ikini itixiti. Merepanika Xerosareē auakanimoni isāpiretaākako, eereka ikini itixiti auakanimoni isāpiretaākako. Ninoa oerekariko kākiti takanapiniri imaerekanina, ininiā iuasaakipeka Teoso makatxakariko maerekati ikamakitina. ⁴⁸Hīkinika hīte itikapekari nipinini. Hātamatano nota iuaīkana auāki ninini. Ininiā iteene himarotari nota pirena apanakini hīsāpiretini ĩkapani. ⁴⁹Nota iokanatariko niri sikaenetakiti, Erekari Matamatakoti, hītemoni. Uai sitatxi hīkaikotako. Hiātapariko iua apokini. Ininiā hāpakapariko Teoso posotiire itano ĩkari —itxa Xesosi.

Xesosi Anikaāka Teoso Tixinemoni

(Marko 16.19-20; Átosi 1.9-11)

⁵⁰Xesosi anikari imoianariakori Petánia sitatxitimoni. Iuaā apokasaakina, Xesosi ōkitikauakotaua. Itxari Teoso:

—Niri, naia pinīkata. Pitakari erekari naiamoni —itxa.

⁵¹Isākirauatakasaaki, anikaāka Teoso tixinemoni. ⁵²Iuasaaki ninoa:

—Peerekari Xesosi. Iuanoka Apiananiri —itxanātana.

Eereka Xerosareē ikanapiriāna ipoxokoniritikana. ⁵³Ikiniōtika isana Teoso misākiretiko aikotimoni. Iuaā ninoa misākiretari Teoso:

—Peerekai. Erekapitikari pikamakiti ate ĩkapani —itxanātana ikiniōtika.

Ameē.

XOÃO

Xesosi, “Teoso Sākire” Inakori

1 ¹Itixi kamiko apisa iua “Teoso Sākire” inakori auapeka. Iua Teosokata aua. Iua Teoso txaua. ²Ikinipoko potorikikosaaki Teosokata auari iua “Teoso Sākire” inakori.

³Teoso paniātari iua ikinipoko ikamini. !Auari iua makamakiniti. ⁴Xesosi, “Teoso Sākire” inakori, kamari itanapokoka auāki inini. Iuanoka sikari ikinipoko auāki inini, kotxi iuanoka auapika. Iua tirikapi atoko itxa, kotxi iopinikari kākiti xiniremoni Teoso sākire imarotini ĩkapani, ātipirika auini ĩkapani. ⁵Iopinikari ipiā. Ipiā kona xipokari iua tirikapi kamara.

⁶Teoso iokanataru isākire sāpiretakari tĳkane kiki Xoāo inakori. Iokanataru iua kākitimoni, kākiti xinire iopiniākari isāpiretini ĩkapani. ⁷Isāpirenauata, Teoso sākire ikinimane imarotini ĩkapani, auikapiretinirina ĩkapani. ⁸Kona Xoāoni kākiti xinire iopiniākari txaua. Xoāo iokanataāka kākiti xinire iopiniākari isāpiretini ĩkapani. ⁹Iua atāo iopinikari kākiti xinire. Apoka ĩkoraxiti, ikinipoko kākiti xinire iopinikini ĩkapani.

¹⁰Iua “Teoso Sākire” inakori aua ĩkoraxiti. Iua kamari itixi, iuaritika ĩkoraxiti auakani kona auikapiretari iua sākire. ¹¹Iua apoka itixi ikamakitimoni, txamari kākiti ikamakini kona nirekari iua. ¹²Iuaritika apanakini nirekari iua, ininiā auikarina isākire. Ininiā iua sikaposotiiretana ninoa Teoso anaakori ininiuana ĩkapani. ¹³Aponaniākasaaki, Teoso anaakori !atxaua. Ateka Teoso anaakori akaminiua !aposota. Kona kākيتينi txĳkitakaua Teoso anaakori aniniāua. Teosora kamari iua anaakori aniniua.

¹⁴Kākiti itxapekaua iua “Teoso Sākire” inakori. Atekata aua. Ate itikari iua. Peerekari iua. Peerekari iposotiire. Ikinipoko erekari aua iuamoni. Isākire atāonoka itxa. Ikara atoko itxa, kotxi iri Teoso. Teoso ākiri imatonōkari itxaua Xesosi.

¹⁵Xoão sāpiretari Xesosi kākitimoni. Ia atoko isāpirenauata:

—Iua, hītemoni nisāpiretakiti: “Nota tikinimoni apokakari, apiatako iua. Nota poiāoka, kotxi nota auini apisapanika auapeka iua.”

¹⁶Ikinipoko erekari aua iuamoni, ininiā amakinika ate apakapari ikinipoko erekari iuamonikiri. Isikaāpotari erekari atemoni.

¹⁷Aimarotari Teoso paniātakiti sākiretxiti, kotxi Moisesini oerekepekaua. Apiaerekata Xesosi Kristo oereēkiti, kotxi iua oerekaua Teoso iteene tirtiniua. Ikinipoko erekari isika atemoni. Maerekati kamakani atxaua, iuaritika Teoso tirtetaua. Oerekaua atāo inakari aimarotini īkapani.

¹⁸Teoso atamatakari !uari. Imatonōkari Teoso ākiri, irikata auakari, iuara oerekaua Teoso aimarotini īkapani, kotxi Teosotxikana iua.

Xoão Kapatxisareri Sāpiretakiti

(Mateo 3.1-12; Marko 1.1-8; Arókasi 3.1-18)

¹⁹Xoteo auīteakori Xerosareē sitatxiti auakani iokanatana kākiti Xoāomoni. Iokanatana sasetotxiakori. Iokanatana sasetotxiakori moianatakani apaka Xoāomoni, ipimainirina īkapani: “Kinakariparai pite?” ²⁰Kona Xoão kipatari isāpiretinina. Atāo isāpiretana:

—Teoso mereēkiti kākiti iātapakiti, kona nitxaua nota —itxa.

²¹Ininiā ipimaārina:

—Ikara atoko ininiā kiriparai? Eríasikani? —itxana.

—Kona iuano —itxa.

—Teoso sākire sāpiretakari aiātapakitikani atxiīti? —itxana.

—Kona iuano —itxa.

²²—Ikara atoko ininiā, natokopa inakariparai pite? Ninoa ate iokanatakani nirekari imarotiniina pite. Natokopa inakaripa pite? —itxana.

²³Ininiā Xoão:

—Teoso sākire sāpiretakari Isaía inakori iōkatsopatakiti txari:

Auako kiki āparaā makipakaniātaā. Isāpirenauatako. Itxariko:

“Hōeretariko kimapori Apiananiri apokini apisapanika.

Itīkaāpo erekari hīkamako iua napini īkapani,”

itxa Isaía. Iua kiki āparaā makipakaniātaā kasāpirenari, iuakarano nota. Iua Isaía sāpiretakitikanano nota —itxa Xoão.

²⁴Pariseoakorira iokanatana ninoa kiki Xoãomoni. ²⁵Ipimaãrina Xoão:

—Iua Teoso mereẽkiti aiãtapakiti piminakanisaakiua, Eríasi inakori piminakanisaakiua, Teoso sãkire sãpiretakari aiãtapakiti piminakanisaakiua, kinirepa pite patxisatari kãkiti? Kipaniãpa pite patxisarauata? —itxarina.

²⁶—Ãparaaãnanira nota patxisarauata. Hĩte sauaki aua kiki himimarotakiniti. ²⁷Iuara, nota tikini apokakari, apiatakari iua. Minakati nitxaua nota, ininiã kona apakata napokini iua takote. Kona apakata ikiti mata tsapitsa nikoxirikini, kotxi minakati nitxaua —itxa Xoão.

²⁸Ikara atoko Xoão sãpiretana ninoa Xotão ipiniã Petânia sitatxiti, ipatxisarauatiniãtã.

Soti Auĩte ãkiri, Teoso Nakiti

²⁹Katimatinĩkata Xoão atapari Xesosi, iuamoni inini. Xoão sãpiretana apanakini itakote auakani:

—Hãtapari. Erenapani soti auĩte ãkiri Teoso nakiti, kotxi ikinimane maerekani makatxaãkari itxaua. ³⁰Mitxi nisãpiretakitikara ere. “Kiki apokako nota tikini. Apiananiri iua, kotxi nota mauakanisaakipanika iua aua.” ³¹Mitxi nota apaka kona nimarotari maerekanitxi makatxaãkari uãka. Nota patxisatari kãkiti ãparaaã, kotxi iuasaaki nisãpiretari iua pirena Isaeo tixini auakanimoni —Xoão txana ninoa.

³²Xoão sãpiretana apanakini itikakiti:

—Nota itikari iua Erekarí Matamatakoti Teoso tixinekiri katxakini. Kamoa katxakini atoko itxa iua. Isari Xesosimoni, kaikota itxa iuakata. ³³Ikara apisa kona nota imarotari iuãka. ãparaaã nipatxisarauatini paniãtakari sãpiretano: “Pitikariko Erekarí Matamatakoti katxakini. Kikimoni apokini pitikariko. Iua kiki patxisarauatini ãtiã, kotxi isikari Erekarí Matamatakoti patxisatakonimoni,” itxano. ³⁴Notakara itikari ikara. Nota sãpiretari nitikakiti, ininiã nimarotapitikari ia kiki Teoso ãkiri ininiua —itxa Xoão.

Merepitipanika Xesosi Moianariakori

³⁵Katimatinĩkata iuaĩkana Xoão auanãta iuaã ipi imoianariakorikata. ³⁶Iuasaaki itikari Xesosi inapaãpotini, ininiã akiritari imoianariakori:

—Hãtapari. Ere kiki, soti auĩte ãkiri Teoso nakiti itxaua —itxa.

³⁷Ikara ikenakotakana atoko ninoa ipi imoianariakori sari Xesosi tikini. ³⁸Ininiã Xesosi sapotorika, atapana iua tikini ìkani.

—Kipa hinireka atxiiti? —itxana ninoa.

—Koerekareri, namonipa paua pite? —itxarina.

³⁹—Masa, hãtamata —itxa.

Ininiã isana iuakata, atamata itxarina iua auiniãtaã. Iuasaaki kikatapeka. Eereka ìkanõkapeka ikanapiriãna.

⁴⁰Ninoa Xoão moianariakori, Xesosikata sikani, ãtree, ãtree moianari pakini. Simão Petro itari itxaua iua ãtree. ⁴¹Eereka ãtree sari katimariã itari Simãomoni.

—Ate aõkitari Teoso mereëkiti aiãtapakiti —itxa.

⁴²Ininiã ãtree anikari itari Simão Xesosimoni. Xesosi atamatari Simão.

—Pite Simão, Xoão inakori ãkiri. Uatxa pite Petro pinaãkako —itxa.

Kai sorotxikana iuãka Petro.

Piripi, Natanaeo Pakini

Xesosi Akiritini

⁴³Katimatinikata Xesosi nirekari Kariréia tõpamoni isini. Iuaã aõkitari Piripi inakori.

—Notakata masa. Nimoianari pitxapekauako —itxari.

⁴⁴Iua Piripi aapoko Petsáita sitatxiti. Iuaã apaka aua ãtree, Petro pakini aapoko. ⁴⁵Iuasaaki Piripi nitari Natanaeo inakori. Apokasaakiri isãpiretari:

—Ate aõkitari kiki. Moisesini iõkatsopatakiti sãpiretakiti iua. Teoso sãkire sãpiretakani iõkatsopatakiti sãpiretakiti aaõkita. Iuakara Xesosi txaua. Nasaree sitatxitikiri iua. Xosee ãkiri iua Xesosi —itxari.

⁴⁶—Nasaree sitatxitiã !uari erekari —itxa Natanaeo.

—Auapitika. Masa, maãpiãkatari iua —itxa Piripi.

⁴⁷Xesosi atapari Natanaeo iuamoni inaãpotini.

—Ere kiki atão Xoteopitikara. Atãonoka ikama —itxa Xesosi.

⁴⁸Ininiã iuasaaki Natanaeo kenakotari Xesosi sãkire. Ipimaãri Xesosi: —Kiãtokopa ininiãpa pimarotano nota? —itxari.

Xesosi txari iua:

—Piripi akiritinii apisapanikara, nimarotari piko kati patapi piitopãkanãta.

⁴⁹Ininiã Natanaeo apakapapiretari:

—Koerekareri, Teoso ãkiri pitxaua pite. Kãkiti Isaeo tixini auakani auíte pitxaua —itxari Xesosi.

⁵⁰Ininiã Xesosi:

—Pite auikari nisãkire, kotxi nimitikakinitika nimarotari piko kati patapi piitopãkanãtini. Pite imarotapanikariko apia posotiiiretxi.

⁵¹Pite itikariko Teoso tixine osereẽkiko. Pitikariko Teoso nitiriakori kanĩkini. Pitikariko ninoa katxakini, pitari iaxitikiri nopini apokinina. Atãopitikara ikara atoko nitxai pite —itxari Natanaeo.

Xesosi Inoãkari ãparaã,

Iãriãpeka Itxĩkitakini

2 ¹Ipi õti napaka atoko aua kiiniri tanirauatiko pirena kiiniriti Kanaa sitatxiti Kariréia tõpa. Xesosi inoro aua kiiniriãtaã iuasaaki. ²Kakiiniriteri kemaĩtxitari Xesosi, imoianariakori pakini.

³Iãriã xipoka atoko Xesosi inoro:

—!Auaika iãriã —otxari Xesosi.

⁴Ininiã Xesosi:

—Kinirepa ikara atoko pitxano? Niposotiiire manapi !apokapanika —itxaro inoro.

⁵Ininiã Xesosi inoro txana kaapokori nitiriakori:

—Ipaniãtakiti iaõka hĩkamako —otxa.

⁶Iuaã kopiti aua, seisi pakini, mitari kopititi, kai kamakori. Naia kopiti ãki aua ãparaã Xoteoakori arokiniua ĩkapani. Iuaãtaã ninoa arokaua. Kiomãtxiakorini oerekinina atoko ninoa arokaua Teoso imisãkiretinina apisa, ninoa Teoso apakapini ĩkapani. ãtika iua kopiti maĩkari ãparaã seĩ arĩtro.

⁷Xesosi paniãtana kaapokori nitiriakori:

—Hixãpokakari naia kopiti ãki ãparaã —itxana ninoa.

Ininiã ninoa xãpokakari kopiti ãki ãparaã. Isonakatapeka apoka ãparaã. ⁸Ininiã Xesosi:

—Hĩsorokaãtari ãparaã, sika hĩtxari kakiiniriterimoni iãtini ĩkapani.

Ininiã ninoa anikari ãparaã kakiiniriterimoni. ⁹Iua kakiiniriteri iãtari. Iuasaaki iãriãpeka itxapekaua ãparaã.

—Amonipa ina ia iãriã? —itxa.

!Imarotari. Ninoa nitiritxi ãparaã anikakani imarotari iua iãriã. Ininiã kakiiniriteri txari ĩtanorouatakari:

¹⁰—Kinirepa mixikanani ia iãriã apia erekari na pisikaua? Apanakini sikari iãriã apia erekari kiiniri potorikasaaki. Kãkiti kamitope inakasaakiika apanakini sikari iãriã poião erekari. Txamari uatxaika pite sikari apia erekari —itxari.

¹¹Iuasaaki Xesosi mipotorikari iposotiire Kanaa sitatxiti Kariréia tõpa iua auakasaaki. Iposotiire oerekari Apiananiri ininiua. Ikara atoko ininiã, Xesosi moianariakori auikari Xesosi Teoso mereëkiti kãkiti iãtapakiti ininiua, kotxi ninoa itikari iposotiire.

¹²Ikara atoko inaãka atoko Xesosi, inoro, itariakori, imoianariakori pakini sari Kapanaoõ sitatxitimoni. Iuaã ikaikotana mapaõtipeka.

Pirãtxi Omitikiko Pirena

(Mateo 21.12-13; Marko 11.15-17; Arókasi 19.45-46)

¹³Xoteoakori kiinirite Pãskoa inakori apisapanika, Xesosi sari Xerosareẽmoni. ¹⁴Isa Teoso misãkiretiko aikotimoni. Iuaã pirikeri ãki itikari pirãtxi vëtxitakani, kema auíte, soti auíte, kamoã pakini vëtxitakani. Itikari txineirota sikakani apaka. Amesa takote ninoa topãkanãta. Ivëtxitarona txineirota. Apakaparona ãti uãka txineirote, kotxi oa ãtoião, ininiã Xoteo txineirote isikana. ¹⁵Ininiã Xesosi kosekari aãpitsa. Ìpatari. Aãpitsaã omitikenatana ninoa pirãtxi vëtxitakani. Omitikenatana kema auíte, soti auíte Teoso misãkiretiko aikoti takote auakani. Ikakanapiriãri amesa txineirota apakapikoãtaã. Txineirota xikepoakatani. ¹⁶Ipaniãtana kamoã vëtxitakani:

—Himakatxakariko kamoã. Hanikariko mapara. Niri aapoko ãki hïvëtxirauatini !apakata. Kona uaini pirãtxi vëtxitiko —itxana ninoa.

¹⁷Iuasaakipeka imoianariakori xinikari Teoso sãkire iõkatsopatakori:

Nota iteene tiretari paapoko pite misãkiretiko aikoti. Iua xika nokaãkako, itxa Teoso sãkire iõkatsopatakori.

¹⁸Eereka Xoteo auíteakori misãkiretari Xesosi:

—Teoso paniãtiniãi ninoa kãkiti iua misãkiretiko aikotiã auakani pomitikenatini, poerekaua posotiiretxi Teoso paniãtiniã aũuikini ìkapani —itxana ninoa.

¹⁹Xesosi apakapapiretari:

—Hirikariko ia Teoso aapoko. Ipi ãti pakini õtisaaki iuaikana nõkitikariko ia Teoso aapoko —itxa Xesosi.

²⁰Ininiã ninoa:

—Anekani. Koarêta seisi anokanani iua aiko kamiko. Kiâtokopa pitxari ipi âti pakini ôtisaaki pökitikiniri iuaïkana? Kona kiïkitei pite pisäkire ikara atoko pinini —itxarina Xesosi.

²¹Txamari Xesosi säkire “Teoso aapoko” ixinikari iïto. !Ixinikari Teoso misäkiretiko aikoti. ²²Xesosi ipinaäka atoko, ôkitikaäkaua atoko, iusaakipeka imoianariakori xinikari ikara Xesosi säkire. Iusaaki ninoa auikari Xesosi säkire. Auikarina Teoso säkire iökatsopatakori sãpiretiniri Xesosi atão Teoso äkiri ininiua.

²³Xesosi Xerosareë auakasaaki, Páskoa kiiniriti auakasaaki, itomaneri kãkiti auikari Xesosi Teoso mereëkiti ninoa iätapakiti ininiua. Ninoa itikari posotiiretxi ikamakiti, ininiã auikarina Xesosi säkire. ²⁴Txamari Xesosi !auikari kãkiti säkire, kotxi imarotari ikinimane äkixinire säkire. ²⁵Kãkiti äkixinire säkire lipimaãri xatiki, kotxi imarotapekari kãkiti äkixinire säkire.

Nikotemo Pirena

3 ¹Âti ikanõkati Nikotemo inakori motika Xesosimoni. Iua Xoteoakori auïte itxaua. Pariseo itxaua apaka. ²Iua misäkiretari Xesosi:

—Koerekareri, ate imarotari koerekareri, Teoso iokanatakiti pininiua. Teoso pitekata mauakaniã, kona piposotari posotiiretxi pikamini, ininiã ate imarotari Teoso iokanatai pite kãkitimoni —itxa.

³Ininiã Xesosi:

—Iuaïkana iponaniãkarira sari Teoso auïtetxi ininiãtaãua. Iuananira sari iuaxiti. Atãopitikara ikara atoko nitxai pite —itxa.

⁴—Kiâtokopa pitxa auapekarikai iuaïkana piponaniini? Kona piposotari pinoro äko äki iuaïkana piïroini. Kona piposotari iuaïkana piponaniini —itxa Nikotemo.

⁵⁻⁶Ininiã Xesosi:

—Atãopitikara ikara atoko nitxai. Piponaniãkasaaki, piri, pinorokata äkirinanira pitxaua. Iua Erekarer Matamatakoti iponaniãkitakiniã, Teoso äkiri pitxaua. Kãkiti, iua Erekarer Matamatakoti iuaïkana iponaniãkitaãkitinanira, sari Teoso auïtetxi ininiãtaãua. ⁷Koniko pitsorïkaãtapeko. Piponaniãko ipikata. Ipikata pimiponaniãkaniã, kona pisari Teoso auïtetxi ininiãtaãua. ⁸Ïtima xõkarauata inirekiniãtaã. Pikenakotari ixõkarauatini, iuaritika na pimarotari ïtima sinimoni. Na pimarotari ïtima ininimoni. Iua atokokana !kimarotikori Erekarer

Matamatakoti iuaĩkana iponaniãkitaãkiniri kãkiti —Xesosi txari Nikotemo.

⁹Nikotemo apakapapiretari:

—Nota !imarotari ikara pisãkire —itxa.

¹⁰Ininiã Xesosi:

—Koerekareri apiari pitxaua. Kãkiti Isaeo tixini auakani poereka. Txamari pite !imarotari ikara atoko nininii pite. ¹¹Atãopitikara ikara atoko nitxanãtai pite. Ate sãpiretari aimarotakiti, aĩtiãkiti pakini. Txamari !hinirekari hãuikapiretiniri asãpiretakiti.

¹²ĩkorapokoriti pirena nisãpiretakasaakii, !pauikari nisãkire. Atauako pauikatari nisãkire Teoso tixine pirena nisãpiretakasaakii? ¹³Kona kãkiti sapanika Teoso tixine. ãtinoka sari iuaã, Teoso tixine potoriakarínoka, kãkiti itari iaxitikirinoka sari iuaã.

¹⁴—Kitxakapirĩka ãparaã makipakaniãtaã Moisesini õkitikari imini metao kamakori aãke mapotõkireẽ. Itano itakari. Kãkiti Teoso sãkire auiãkani imini akatsatakini atamatari Moisesini õkitikakiti, ininiã kona ipinana. Iua atokokana kãkiti itari iaxitikiri õkitikaãkako. ¹⁵Ininiãkara iua sãkire auiãkari kona ipinaika. Auapikako.

¹⁶—Teoso iteene turetari ikini itixiti auakani, ininiã iokanatarí imatonõkari imi kãkitimoni. Ininiã iua sãkire auiãkanirako kona ipinaikako. ãtipirika auapikako. ¹⁷Teoso iokanatarí imi kãkitimoni ikini itixiti auakanimoni kona imisiritinina ãkapanini. Iua iokanatarí imi kãkiti maerekani imaktxakini ãkapani, ninoa imapinakani ãkapani.

¹⁸—Teoso ãkiri sãkire auiãkari kona iokanataãka kãkiti misiritikomoni. Iua Teoso ãkiri sãkire mauĩãkati, iuarako sako kãkiti misiritikomoni. Teoso ãkiri sãkire imauĩãkani xikara ikara atoko inaãkanako. ¹⁹Teoso ãkiri sãkire mauĩãkani misiritaãkako, kotxi atão inakari oerekakari kãkiti xinire iopiniãkari apokapeka ãkoraxiti. Iua oerekari atão aimarotini ãkapani. Tirikapi atoko itxa, kotxi oerekaua atão. Ninoa mauikareni kona nirekari tirikapi. Inirekarina ipiã, kotxi maerekati ikamanãtana. ²⁰Maerekati kamakari kona nirekari tirikapi. Kona tirikapi takote kona aua, kotxi ipĩkari ikamara. Ipĩkari kãkiti itikiniri maerekati ikamini. ²¹Teoso sãkire iaõka kamakarira sari ikamaraã, kotxi ikamara oerekari apanakini iua kamakiti atão inini Teoso nireẽkiti iaõka inini —Xesosi txari Nikotemo.

Xesosi Apiari, Xoão Poiãori Inini

²²Ikara atoko inaka atoko Xesosi imoianariakorikata sari Xotéia tōpamoni. Mapaōti ikaikota imoianariakorikata iuaātaā. Imoianariakori patxisatari kākiti iuaā. ²³Xoão apaka patxisatari kākiti Enō inakoriātaā, Sarī inakoriātaā takote. Ipatxisarauata iuaātaā, kotxi iuaātaā āparaā kaiōpokori. Ikiniōtika kākiti sari iuamoni iuaātaā, ininiā Xoão patxisatana. ²⁴Iuasaaki Xoão kona takaākapanika kateia āki.

²⁵Iuasaaki Xoão moianariakori sākirauata apanakinikata kākiti arokiniua pirena, Teoso misākiretiko aikoti āki iiroinina apisa pirena. ²⁶Apokana Xoōmoni.

—Koerekareri, Xotāo ipiniā iua kiki pite patxisatakiti, atemoni pišāpiretakiti, uatxa iua patxisarauatapeka. Ikinipoko kākiti sari iuamoni. Atemoni !erekari ipatxisarauatini —itxana.

²⁷Xoão apakapapiretana ninoa:

—Erekapitikari ipatxisarauatini, kotxi Teoso paniātari iua. Teoso masikakaniāri posotiiretxi kākitimoni, kona xatiki iposotari iparīkauatini Teoso īkapani. ²⁸Nota kona Teoso mereēkitino. Kākiti iātapakiti kona nitxaua nota. Teoso iokanatanano nota Teoso mereēkiti apokini apisa. Ikara hīte imarotapeka. Ikara atoko nitxapekai hīte. Hīsāpiretari ikara apanakinimoni.

²⁹—Maxinikari kiki ītanorouatakasaaki. Sito amanaākito iua nakiti otxaua. Imoianari topāka iua takote. Ipxokoniua ītanorouatakari sākire ikenakotakasaaki. Iua atokokana nota poxokoniua. Nota iua moianari atoko nitxaua. Xesosi iua ītanorouatakari atoko itxaua. Kākiti iua nakiti itxaua. ³⁰Xesosi apiaāpotako. Nota poiōāpotako.

³¹—Iaxiti īkari Apiananiri. Itixi auakani imarore poiāonoka, kotxi itixinoka imarotana. Teoso tixine īkari Apiananiri itxaua. ³²Iua sāpiretari itiākiti. Ikenakotakiti isāpireta. Txamari kākiti !auikari isāpirena. ³³Kākiti Apiananiri sāpirena auīākani, imarotari Teoso sākire atāo inini, ininiā apanakini apaka imarotari Teoso sākire atāo inini. ³⁴Iua Teoso iokanatakiti sāpiretari Teoso sākire, kotxi Teoso sikari Erekarī Matamatakoti iuamoni, ininiā ikinipoko Erekarī Matamatakoti posotiire aua iua Teoso iokanatakitimoni. ³⁵Aīri Teoso tīretari imi. Isikari imi ikinipoko imoiaini īkapani. ³⁶Teoso ākiri sākire auīākani auapikako Teosokata. Teoso ākiri sākire mauīākani kona auapanina Teosokata. Teoso omanatapikanako ninoa ātipirika —itxa Xoão ninoamoni.

Xesosi Misäkiretaro Samariakero

4 ¹Käkiti sãpiretari pariseoakori:
—Xesosi sãkire auiäkani, iua patxisatakini, itomaneri. Xoão patxisatakini poiãoka —itxana.

²(Ari, kona Xesosini patxisarauata. Imoianariakorira patxisatari kãkiti.) ³Xesosi imarotakasaakiri pariseoakori kenakopiretiniri iua, iuasaaki iua osipikari Xotéia tōpa. Kinirão kanapirikari Kariréia tōpamoni. ⁴Inirekari Samaria tōpa ìpirixititini Kariréia tōpa apokini ìkapani.

⁵Samaria tōpa ìpirixititakasaaki, apoka Sikaa sitatxiti takote. Iuaã aua itixi Xoseeni nakiti, iri Xakooni sikakiti kitxakapirika. ⁶Iuaã aua aariko Xakooni kisakakiti ãparaã apaãtiko. Iuaã Xesosi apokasaaki, iotoka, kotxi isãpakapeka òtakori ìpirixititini xika. Ininiã iitopãka aariko takote. Iuasaaki apaniãxitipeka.

⁷Iuasaaki sito Samaria auakaro apoka iuaã, ãparaã apaãtakaro. Oãpokasaaki, Xesosi amanaãro ãparaã:
—Ãparaã pisikano —itxaro.

⁸Oa apokini apisapanika Xesosi moianariakori sari sitatximoni nipokori iamotinina ìkapani.

⁹Oa sito apakapapiretari:
—Xoteo pitxaua pite. Samaria auakaro nitxaua nota. Kinirepa nãparaãte pamanaãno? —otxa.

Ikara atoko otxa, kotxi Xoteoakori kona sãkirauata Samaria auakanikata.

¹⁰Ininiã Xesosi:
—Teoso sikakiti pimarotaãkamako, pitemoni ãparaã amanaãkari pimarotaãkamako, notamonimarako pamanaãri ãparaã, kotxi piätiniãri ãparaã nota sikakiti, pauapika ãtipirika —itxaro.

¹¹—Kona katiui pite. Kiriãpa papaãtari ãparaã, kotxi païtanoirikori. Namonipa papokatari ãparaã kãkiti ãtipirika auini inikitaãkari? ¹²Kitxakapirika aãtokirini Xakoo sikaua ate ia aariko. Iua, imiakori, ipiraakori pakini iãtari ia ãparaã ia aarikoãkiri. Pite apiata atxiiti? —otxa.

¹³Ininiã Xesosi:
—Käkiti ia irikoãkiri ãparaã iãtakari uaiãkana iposonatapanika. ¹⁴Käkiti nota siãkiti ãparaã iãtakari apikomoni !iposonataika.

Ãkixinire amomo atoko itxa ãparaã nota siãkiti. Iua ãparaã txĩkitakari iua ãtipirika auini Teosokata —itxaro.

15—Iua ãparaã pisikano nimapositionatakani tĩkane, ininiã uai kona ninaika ãparaã napaãtini —otxa.

16—Pakiritari pĩtaniri. Uai piminari —itxa.

17—Kona kĩtanirino —otxa.

—Atãopitikara, “Kona kĩtanirino,” pinini. 18Sĩko pakinipekara pĩtaniri. Kiki uatxa pitekata auakari na atão pĩtanirini. Inipitikara pisãkire —itxaro.

19Ininiã oa:

—Teoso sãkire sãpiretakari pitxaua pite, kotxi pimarotari ikinipoko nikamakiti. 20Kitxakapirĩka ate kiomaneakorini apotiitaua Teoso imisãkiretinina ĩkapani ia oxiratari nopini. Txamari hĩte Xoteoakori txari: “Xerosareẽnanira aãpotiitauako Teosokata” —otxa.

21Ininiã Xesosi:

—Pauikariko nisãkire. ãti õti apokako. Iuasaaki kona uai oxiratariãni, kona Xerosareẽni kãkiti apotiitaua aĩri Teoso imisãkiretinina ĩkapani. 22Hĩte Samaria tõpa auakani apotiitaua Teoso himisãkiretini ĩkapani. Txamari, kona atão himarotari iua. Ate Xoteoakori aimarotapitikari Teoso, kotxi Teoso sikakiti kãkiti maerekani makatxakakari Xoteo itxaua. 23Teoso keto apokapanika, ari apopeka, ininiã aĩri Teoso misãkiretakani atão inakani misãkiretari iua ãkixinireẽna. Ninoa sãpiretari atão inakarinoka iuamoni. Aĩri nirekari kãkiti ikara atoko inakani misãkiretiniri iua. 24Teoso nirekari amisãkiretiniri iua aãkixinireẽ, kotxi Teoso ĩto lauari. Inirekari kãkiti sãpiretiniri atão inakarinoka iuamoni —itxa Xesosi.

25Ininiã oa:

—Nimarotapitikari iua Teoso mereẽkiti aiãtapakiti, Kristo inakori, apokapitikako ĩkorapokoriti. Iua apokasaaki ikini sereti isãpiretauako —otxari.

26—Nota pimisãkiretakiti Teoso mereẽkiti hiãtapakitikarano nota —itxaro.

ãti Takarauata, ãti Amarauata Inini Pirena

27Iuasaakipeka Xesosi moianariakori kanapiriã. ãkixinireẽna ninoa tsorĩkaãnãta:

—Kinirepa Xesosi sãkirauata oa sitokata?

Kotxi oa Samaria auakaro. Iuaritika !ipimaãrona: “Kiripa ĩkai?” kona itxarona. Kona ipimaãrina Xesosi: “Kinirepa pimisãkiretataro oa?” kona itxarina.

²⁸Iuasaaki oa sito takanapari otii, sitatximoni kanapiriã otxa. Oãkiritari kãkiti iuaã auakani,

²⁹—Masa. Maãpiãkatari kiki ikinipoko nikamakiti imarotakari. Iua Teoso mereẽkiti aiãtapakiti atxiiti? —oa txana ninoa.

³⁰Ininiã iua sitatxi auakani sari Xesosimoni. ³¹Ninoa apokini apisapanika imoianariakori akiritari Xesosi:

—Koerekareri, pinipokota —itxarina Xesosi.

³²—Nipokori auape nota niãkiti tĩkane hĩte mimarotakiniti —itxa Xesosi.

³³Ininiã imoianariakori imisãkiretakakana:

—Kiripa sikatari nipokori Xesosi nikakiti? —itxana.

³⁴Ininiã Xesosi:

—Nota kamari iua niokanatakiri nirekaãkiti. Ninirekari nikaminiri ikinipoko iua paniãtakiti. Ia niparĩka. Niparĩka nikiena atoko itxa, kotxi niokanatakiri paniãtakiti nikamini sikataparatanano, nipokori sikataparatinino atokotxikana. ³⁵Kãkiti txari: “Ipi ipi pakini kasiriti auapanika takari iposope inini tĩkane, ininiã uatxa kona niparĩkauata.” Ia atoko kona hĩtxape hĩsãkire. Himereka. Hãtamatariko takari. Nisãpiretai hĩte hĩtakare iposope haãpoko hanikini tĩkane. ³⁶Iua atokotxikana Teoso sãkire takaãka kãkiti ãkixinireẽ. Katakakeri miparĩkatakari apakapari iparĩka ĩki. Iua anikari kãkiti Teoso aapokomoni, ãtipirika Teosokata auini ĩkapani. Ininiãkara katakereri, iua miparĩkatakari apaka poxokoniuatako. ³⁷Aãtokirini txari: “Ãti takarauata, ãtipekana apotiitari takari.” ³⁸Ia sãkiretxiti atão, kotxi nota paniãtai hĩte mitxi himaparĩkauatakaniãtaã hamarauatini. Apanakini parĩkauatapeka iuaã. Ninoa takapekari Teoso sãkire kãkiti ãkixinireẽ. Pasãpaniri ninoa parĩka. Ninoa parĩkauata mitxi, ininiã uatxa hĩte parĩka poião kãkiti Teosomoni hanikini —itxa Xesosi.

Samaria Auakani Auikiniri

Xesosi Sãkire

³⁹Kaiãopokori Samariakini iua sitatxiti auakani auikari Xesosi sãkire, kotxi oa sito mitxi sãpiretana:

—Nikamakiti ikinika isãpiretano —otxana.

⁴⁰Ininiã ninoa Samaria auakani apoka Xesosimoni.

—Atekata paua —itxarina Xesosi.

Ininiã Xesosi kaikota ipi õti ninoakata. ⁴¹Xesosi sãkire ikenakotakasaakina, apikomoni ninoa auikapiretari.

⁴²Ninoa misãkiretaro oa sito:

—Uatxa ate auikapiretari Xesosi sãkire, kona pite sãpirenaãnanini, ate auikapiretari. Ateka kenakotapekari iua sãkire, ininiãkara ate auikapiretari iua sãkire. Uatxa ate imarotari atão inini Teoso mereẽkiti ininiua Xesosi. Kãkiti itixi auakani maerekani makatxaãkari itxaua iua —itxarona.

Auítetxi ãkiri Xesosi Makananitini

⁴³Iuaã ipi õti inapaka atoko Xesosi sipeka. Kariréia tãpa isa. ⁴⁴Mitxi Xesosi sãkire: “Teoso sãkire sãpiretakari paxitaãka, txamari Teoso sãkire sãpiretakari itixineẽ auakasaaki, kãkiti iuaãtaã kona auikari iua sãkire,” itxapeka Xesosi. ⁴⁵Iuaritika Kariréia tãpa apokasaaki, kãkiti iuaã auakani ipoxokoniritika apakapari Xesosi, kotxi ninoa apaka sari iua Pãskoa kiiniriti Xerosareẽ sitatxitiã. Iuaãtaã itikarina Xesosi posotiire. Ininiãkara ipoxokoniritikana apakaparina Xesosi.

⁴⁶Xesosi iuaãkana sari Kanaa sitatxitimoni, Kariréia tãpa. Mitxi Xesosi inoãkapekari ãparaã iãriã ininiua iuaã. Xesosi apokasaaki Kanaa, auítetxi ãkiri amianata Kapanaoõ sitatxitikiri. ⁴⁷Iua auítetxi kenakopiretari Xesosi Kariréia tãpa apokini, Xotéia tãpa osipikini. Inakasaaki Xesosimoni isa, aõkita itxari Xesosi. Aiatari:

—Masa Kapanaoõmoni, naapokomoni. Namarite amianata. Pimakananitari iua. Ipinanapanoka —itxari Xesosi.

⁴⁸Ininiã Xesosi:

—Nimakamakaniãri posotiiretxi, kona hĩte nirekari auikiniri nisãkire. Posotiiretxi hĩtikasaakinani, hĩte nirekari nisãkire hãuikini. Teoso takaõtxikare hĩtikasaakinani, hinirekari nisãkire hãuikini —itxa Xesosi iuamoni.

⁴⁹—Masapoka naapoko. Pimasikanisaaki, namarite ipinapitikako —itxari.

⁵⁰—Pisa paapokomoni. Pamarite kona ipina —Xesosi txari iua.

Iua kiki auikari Xesosi sãkire, ininiã isipeka. ⁵¹Ipixinipokoriti aõkitana initiriakori.

—Pamarite auapitikako —itxarina.

⁵²—Namonikitapa akananita? —itxana.

—Kita apaniãxiti apoomari iotoka —itxana.

⁵³Iuasaaki iua kiki imarotari kita Xesosi sãkire manapikara:

“Pamarite kona ipina,” ininiri manapikara iotoka apoomari. Ikara atoko ininiã, ikinimane iua aapoko auakani, iua pakini auikari Xesosi sãkire.

⁵⁴Ininiã ipikatapeka Xesosi kamari posotiiiretxi Kariréia tōpa auakasaaki, Xotéia tōpa osipikasaaki.

Matípokotakati Xesosi Erekapeka Inĩkitakini

5 ¹Ikara atoko inaãka atoko Xesosi sari Xerosareẽ sitatxitimoni, kotxi Xoteo kiinirite Teoso ĩkapani aua iuasaaki. ²Xerosareẽ sitatxiti apanĩkaki, soti auĩte vētxitikoãtaã takote aua ipoa xapitikiri. Sĩko ĩronakiko aua iuaãtaã. Xoteo sãkire Epiráiko. Epiráiko sãkireẽ iua ipoa uãka “Petésita.” ³Ironakikoãtaã amianatakanipokoni sirĩkanãta. Mõsiãreni, motĩkakanani, matípokotakani pakini iuaã auanãta. Iãtapanãtarina ãparaã tokĩkaãtini. ⁴Teoso nitiri apokanaka iuaãtaã. Iua apokasaaki itokĩkaãtakari ãparaã. ãparaã tokĩkaãtakasaaki, ãtika amianatakari ĩkiika komokaãtakari erekapeka itxa. ⁵Matípokotakati iuaã auanãtakari amiananãtakari trĩa oito pakini anokanani amianata. ⁶Xesosi atamatari iua iuaã isirĩkanãtini. Imarotari iua uatxakapokoni amiananãta. Ininiã Xesosi pimaãri:

—Ereka pinini pinireka? —itxari.

⁷Amianatakari apakapapiretari:

—Ari, ninirekapitikamari, txamari kona kanikikono kãuaãriã ãparaã tokĩkaãtakasaaki. Nikomokaaritakasaaki, ãti komokape napisapanika —itxari Xesosi.

⁸—Põkitikaua. Pisirimata pikoseka, sipeka pitxa —Xesosi txari.

⁹Iuasaakipeka erekapeka itxa iua amianatakari. Isirimata ikoseka, tĩpokota itxapeka. Iua õti kãkiti tomatini õti. ¹⁰Ininiãkara Xoteo auĩteakori txitari amianatakari erekapeka inakari:

—Uatxa kãkiti tomatini õtisaaki pite anikanãtari pisirimata. ĩkora atoko ininiã, kãkiti lauritaãka —itxarina, kotxi ninoamoni iparĩkauata isirimata anikasaaki.

¹¹Ininiã iua kiki:

—Erekape ninĩkitaãkirira paniãtano: “Pisirimata pikoseka, sipeka pitxa,” itxano.

¹²Ininiã ninoa:

—Kiripa kiki paniãtai pisirimata pikosekini pisini ĩkapani?

¹³—!Nimarotari iuaãka —itxa.

Iuaãtaã ipoa xapitikiri takote kaiãopokori kãkiti auanãta, ininiã patimari Xesosi sipeka ninoa sauaki.

¹⁴Eereka Xesosi aõkitari iua kiki Teoso misãkiretiko aikotiã.

—Uatxa pitãpokotapeka, ininiã maerekati pitakanapako. Iuaĩkana maerekati pikamakasaaki, atxiĩti amianari apiatakari inokai — Xesosi txari iua.

¹⁵Eereka iua kiki sari Xoteo auĩteakorimoni.

—Xesosira erekapeka txĩkitakano nota —itxari.

Xoteo Omanatiniri Xesosi

¹⁶Tomatiko õtisaaki Xesosi makananitari iua amianatakari. Ikara xika Xoteo auĩteakori kinirão okaka txari Xesosi. ¹⁷Xesosi imarotari Xoteo auĩteakori sãkire, ininiã itxana:

—Niri Teoso kamari erekari ikiniõtika. Iua atokotxikana nota. Kona niotoka erekari nikamini tomatiko õtisaaki —itxa Xesosi.

¹⁸Ikara Xesosi sãkire xika Xoteo auĩteakori apiata omanatari Xesosi. Ninoamoni Xesosi kamari maerekati tomatiko õtisaaki amianatakari imakananitini. Xesosi sãkire: “Niri Teoso,” inini xika, apiata omanatarina iua, kotxi iua: “Teosotxikana nota” itxanãta iua Xesosi.

Xesosi Irikata

¹⁹Ininiãkara Xesosi misãkiretana Xoteo auĩteakori:

—Atãopitikara nitxai hĩte. Nota Teoso ãkiri nitxaua. Notanani !kakamareno. Nitikari niri kamanãtakiti, ininiã niri kamakiti iaõka nikama. Iuanokara nikama nota. Niri kamakititxikana nota kama apaka. ²⁰Niri turetano nota, ininiã ikini sereti ikamanãtakiti oerekano. Oerekapanikariko posotiiretxi apiatapanikako nota kamini ĩkapani, ininiãkara hĩte tsorĩkaãtako hĩtikasaakiri. ²¹Niri õkitikari ipĩkani, iuaĩkana aua inini tĩkane. Iua atokotxikana nota txĩkitakana kãkiti ninirekaãkini, iuaĩkana auini ĩkapani. ²²Teoso kona txari kãkitimoni: “Kona erekai pite, ininiã kãkiti misiritikomoni pisa,” kona itxa Teoso. Apanakinimoni kona Teoso txari: “Erekai pite, ininiã uai pina notakata pauini ĩkapani,” kona itxa Teoso. Notakara iua ãkirikara txari ikara atoko inakari kãkitimoni, kotxi Teoso sikaposotiiretano nota ikara atoko inakari nisãpiretini kãkitimoni. ²³Ikara atoko ininiãkara, kãkiti paxitano nota. Niri nirekari nota paxitiko, iua paxitiko atokotxikana. Nota mapaxitakani kona paxitari niri nota iokanatakari.

24—Atãoenepitikara nitxai hīte. Nisākire kīpitakari, nota iokanatakari sākire auiākari, auapika Teosokata. Kona Teoso misiritapaniriko iua. Kona ipinaika. Auapika Teosokata. 25 Atãoene nitxai hīte. Kākiti xinire ipīkari atoko itxa maerekati ikamakiti xika. Teoso ākiri sākire kākiti kīpitini ōti apokapanikako. Ari iketo apokapeka. Nota sākire kīpitakani auapikako. 26 Aīri Teosonoka posotari itxīkitakiniri ikinipoko auāki inini, kotxi iuanoka auapika. Isikaposotiiretano nota apaka ikinipoko nitxīkitakini auāki inini.

27—Aīri Teoso txano nota: “Kākiti itari iaxitikiri pitxaua, ininiākara pitxariko nisākire mauīākani: ‘Kona hīte kīpitari Teoso sākire, ininiā kākiti misiritikomoni hīsa,’ pitxako. Pitxariko nisākire auiākani: ‘Hīte kīpitari Teoso sākire ininiā uai hina Teosokata hāuini īkapani.’ Ikara atoko pitxariko kākitimoni,” Teoso txano nota.

28—Kona hītsorīkaātapeko, ikara sākiretxiti hīkenakotakasaaki. Āti ōti ipīkani, katakoni, kenakotariko Teoso ākiri akiritinina. 29 Iuasaaki ōkitikauanako. Ninoa erekari kamakani auapikako Teosokata. Ninoa maerekati kamakani misiritaākako.

30—Notanani kona nitxari kākiti: “Pite sari kākiti misiritikomoni. Pitepekana inari uai Teosokata pauini īkapani.” Notanani kona ikara atoko nitxari kākiti. Teoso sāpiretakinokara nitxa kākitimoni, ininiākara nisākire kākitimoni atāonoka, kotxi kona nota nirekaākitini nikama. Niri nipaniātakiri nirekaākitinanira nikama —itxa Xesosi.

Xesosi Sākire Atãoene Sāpiretakani

31 Apikomoni Xesosi sāpirenauata:

—Notaka sāpiretiniāua hītemoni, atxiīti kona kauikikono.

32 Ātipekana nota sāpiretakari aua. Nimarotari atāo inini iua sāpiretakiti. 33 Hīte iokanatapekari himoianariakori Xoāomoni nota himarotini īkapani. Iua sāpiretapekana ninoa atãoene nota sākire. 34 Kona ninitanātari kākiti nisākire atāo inini sāpiretakani. Nota sāpiretai hīte Xoão sāpiretakiti sākiretxiti, himaerekani Teoso makatxakini īkapani, himapinakani tīkane.

35—Xoão tirikapi tirinakari poniākari atoko itxa. Tirikapi iopinikari ikinipoko, tirikapi takote auakari aātamatinini īkapani. Iua atokokana Xoão oerekari kākiti atāo inakari. Mapaōtinokara hīte poxokiniuata iua sākire hīkenakotakasaaki.

36—Aua āti nota sāpiretakari. Iua Xoão poiāoka. Ātipekana apiata. Nota kamakitikara apiata. Nikamakiti sāpiretari nota sākire

atão inini. Nikamakiti, niri paniãtakiti kãkiti itikasaaki, imarotari niri uaimoni iokanatinino nota.

37—Niri, nota iokanatakari kãkitimoni, iua apaka nota sãpiretakari. Kona hïte kenakotari Teoso sãkirauatini. Kona hïte atamatari itoõ. 38Isãkire !auari hãkixinireẽ, kotxi kona hãuikari nota sãkire iua iokanatakiti sãkire.

39—Hïte atatsopatapikari Teoso sãkire iõkatsopatakori, hãuini ãtipirika Teosokata himarotini ïkapani. Ia Teoso sãkire iõkatsopatakori nota sãpiretakari apaka itxaua. 40Txamari kona hinirekari nisãkire hãuikini. Kona hinirekari notamoni hinini, ãtipirika Teosokata hãuini ïkapani.

41—!Ninitari niuikiko. 42Iteene nimarotai hïte. Kona xapiti hïtiretari Teoso hãkixinireẽ. 43Niri iokanatanano nota uaimoni. Txamari kona hïte apakapano nota Teoso iokanatakitino. Teoso maiokanatakinitira hïte apakapa. 44Hïte potxitari ãti iuikinii. Txamari kona hïkamari erekari Teosonoka iuikinii ïkapani, ininiã kona hãuikari iua sãkire.

45—Kona notani sãpiretapaniri niri hïte maerekani. Moisesira sãpiretariko himaerekani Teosomoni. Hïte uãkatari iua sãpiretari hïte ereka hinini, txamari iua sãpiretariko niri himaerekani. 46Moisesini sãkire iõkatsopatakiti hãuikaãkamako, nota sãkire apaka hãuikamako, kotxi Moisesini nota sãpiretakari apaka. Iua iõkatsopatapekari nota sãkire. 47Hïte kona aukapiretari Moisesini iõkatsopatakiti. Isãkire iõkatsopatakiti himauikakaniã, kiãtokopa hïtxa nota sãkire hãuikini? —itxa Xesosi.

Sïko Mio Kãkiti Xesosi Sikakienatini

(Mateo 14.13-21; Marko 6.30-44; Arókasi 9.10-17)

6 1Eereka ãti õti Xesosi ïpiriãtari Kariréia poa. Ia ipoa uãka apaka Txiperiãtxi poa inaãka. 2Kaiãopokori kãkiti sari iua tikini, kotxi ninoa itikapekari Xesosi makananirauatini. 3Xesosi kanïka mitaxiratarimoni. Iuaã itopãka imoianariakorikata. 4Xoteokori kiinirite, Pãskoa inakori kiiniriti apisapanika Xesosi sari iuaãtaã. 5Iitopãkasaaki, Xesosi atapari itomaneri kãkiti apokaãpotini iuamoni. Ininiã ipimaãri Piripi:

—Amonipa aiamotatariko komiri nakira kãkiti asikakienatini ïkapani?

6Xesosi ikara atoko txari Piripi, kotxi inirekari imarotiniri: “Atuako atxiiti Piripi auikari niposotiire?” Xesosi imarotapekari iuaka ikamakiti tïkane. 7Ininiã Piripi apakapapireta:

—Txineiropokoni, tosētosi txineiro ota, kona apakata komiri aamotini, nakira kākiti asikakienatini ikapani. !Apakata —itxari.

⁸Iuasaaki āti Xesosi moianari Simão Petro itari, Ātree inakori, txari Xesosi:

⁹—Uai aua amarini. Auari ikiena. Sīko komiri sevata inakori kamakori auari iua. Ipi ximaki axapitiri apaka auari iuamoni. Txamari kākiti itomaneri sikakienatiko !apakata. Ia nipokori poiāoka —itxari.

¹⁰Xesosi paniātari imoianariakori:

—Nakira hīpaniāta iitopākinina —itxana.

Sotonaiakiperi auari iuaātaā. Iua nopini iitopākana. Sīko mio apikomoni kikiakori aua. ¹¹Xesosi kosekari komiri amarini nakiti. Iuasaakipeka imisākiretari Teoso:

—Erekapitikari ia komiri auiniua ate.

Iua sikari imoianariakori. Eereka ninoa xanakari kākiti topākakanimoni. Iua atokokanera itxarina ximaki. Ikinikana inirekaka iaōka auana ninoa.

¹²Ikinimane kamitopeka inakasaaki, ipaniātari imoianariakori:

—Itetakori komiri, ximaki pakini hāpotiita. Kona hiomatapiriko —itxa.

¹³Ininiā apotiitarina komiri itetakori. Tosi kotarina ixāpokakana komiri itetakori.

¹⁴Xesosi posotiire ninoa kākiti itikasaaki, ninoakakarika isākirauatana:

—Atāopitikara Xesosi aiātapanātakitikara, Teoso sākire sāpiretakari inakorikara ere Xesosi —itxana.

¹⁵Xesosi imarotapekari ninoa nirekiniri iauītetinirina iua.

Iua kona nirekari ninoa auītetiniri iua. Ninoa mamaīkakaniri apisapanika, Xesosi sipeka iuanoka. Apikoxiti oxiratarimoni ikanīka.

Xesosi Ipoa Nopini Inaāpotini

(Mateo 14.22-23; Marko 6.45-52)

¹⁶Kikatapeka imoianariakori iokiriīta ipoa tiniā. ¹⁷Iereētauana kanaua āki. Īpiriaāpotarina ipoa Kapanaoō sitatxiti manapi.

Īkanōkapeka inakasaaki kona Xesosi apokapanika ninoamoni.

¹⁸Kataparari itimati apoka, ininiā tsakatipokoni. ¹⁹Iuasaaki imekoāpotana. Ipxiniāpeka apokasaakina, ataparina Xesosi ipoa nopini itīpokotini. Kanauamoni isaāpota. Ninoa pīkarauata, kotxi ninoa uākatari kamiri.

²⁰Xesosi akiritana:

—Notakara. Kona hīpīkarauatape —itxana.

²¹Ininiā apakaparina Xesosi ipoxokoniritikana. Iua morōkokaua kanauaã. Iereētakasaakiua, iusaakipeka kanaua apoka imiriīpe Kapanaoõ manapi.

Kākiti Nitiniri Xesosi

²²Katimatinīkata ipiniāmoni kaikotakani nitamari Xesosi. Ninoa imarotari ātoka kanaua mitxi iuaã auini. Oa kanaua Xesosi moianariakori anikapeka. Ninoa imarotari Xesosi kona sari imoianariakorikata. Imarotarina ninoanani sini. ²³Iusaaki kanauaniri Txiperiatxi sitatxitikini apokita Xesosi merepani Teoso misākiretiniātaã takote merepani komiri nikikoātaã. ²⁴Iusaaki kona ninoa apokari Xesosi, imoianariakori apaka. Ininiā ninoa iereētaua kanaua āki. Iuaīkana ikanapiriāna. Ipoa ĩpiriātana Kapanaoõ sitatxitimoni, Xesosi initinina ĩkapani.

Komiri Kākiti Auapininiika

Inini Tīkane

²⁵Ninoa apokari Xesosi ipoa ipiniã.

—Koerekareri, namonikitapa papoka uai? —itxarina.

²⁶Ininiã Xesosi:

—Atāo nisāpiretai hīte. Hīte nikari komiri nisikakiti. Kamitopeka hītixa, ininiã nipokori ĩkapaninokara hinitanātano nota. Kona hāuikari Teoso posotiireē nikaminiri iua posotiiretxi.

²⁷Xesosi pinitana:

—Nipokorinoka lhīxinikape, kotxi nipokori okanani mauakati itxaua. Hīxinikariko ātiāo nipokori, nota hītari iaxitikiri siākiti, kotxi nota sikari kākiti, kākiti auapininiika inini tīkane. Teoso sikari ĩkinika iposotiire notamoni nirekaākiti nikamini ĩkapani —Xesosi txana ninoa.

²⁸—Kiātokopa atxtari Teoso nireēkiti akamini? —itxana ninoa.

²⁹—Ianoka Teoso nirekari hīkamini. Iua nirekari hāuikiniri iua iokanatakiti sākire —Xesosi txana ninoa.

³⁰—Iuaīkana posotiiretxi apiari pikaminiã, ininiāra aāuikari Teoso iokanatakiti pininiāua. Kinakaripa posotiiretxi pikamapanika?

³¹Anirimaneni kitxakapirīkarini āparaã makipakaniātaã auakasaakina, inikarina komiri iaxiti katxakakari. Teoso sākire iōkatsopatakori txari:

Isikari komiri Teoso tixinekiri ninoamoni,
—itxarina Xesosi.

³²Ininiã Xesosi:

—Atão nisãpiretaiko hïte. Kona Moisesini sikari komiri Teoso tixinekiri. Nirikara sikaãtari atão komiri iua tixinekiri kãkitimoni. ³³Teoso tixine ïkari, iua ãkiri, komiri atoko itxa, ikini itixiti auakani ïkapani, kotxi iua sãkire auiãkani auapininiika Teosokata —itxana.

³⁴—Ikiniõtika pisikaua ia komiri —itxarina.

³⁵—Notakara iua komiri Teoso iokanatakiti nitxaua. Notakara sikari kãkiti auini ïkapani. Iua nisãkire auiãkari !inatxitaika. !Iposonataika.

³⁶—Hïte aõkitapekano nota, txamari kona hïte auikapanikari nisãkire. Ikara atoko nitxapekai hïte. ³⁷Imakinika kãkiti notamoni Teoso siãkini inapitikako notamoni. “Hïsipeka,” kona nitxana notamoni apoãkani. ³⁸Nitakanapari Teoso tixine. ïkorapokoriti napoka, nipaniãtakiri nirekaãkitinoka nikamini ïkapani. Notaka nirekaãkiti na nikama. ³⁹Niri nipaniãtakiri !nirekari ãtika kãkiti notamoni isiãkini ereëkokini. Itixi xipokini õtisaaki, inirekari nota õkitikinina ninoa auapininiika inini tïkane. ⁴⁰Iua nipaniãtakiri nirekari nota imarotakani, nisãkire auiãkani, auapininiika inini. Itixi xipokini õtisaaki nõkitikana ninoa iuaïkana auãki inini —itxa Xesosi.

⁴¹Ninoa Xoteoakori kona apokaerekatari Xesosi sãkire, kotxi iua txari: “Nota iua komiri Teoso tixine ïkari komiriti nitxaua,” ininiã ninoa tsoata. ⁴²Ininiã ninoa:

—Iua kiki Xesosi Xosee ãkiri. Aaõkitapekari iri, inoro pakini. Kinirepa “Teoso tixine ïkarirano” itxape iua? —itxana, itsoatinina.

⁴³Ininiã Xesosi txana:

—Kona himaxirauatape. Kona hïtsoatape. ⁴⁴Niri nipaniãtakiri akiritakitananira posotari inini notamoni. Niri makiritakiniti kona posota inini notamoni. Itixi xipokini õtisaaki nõkitikana notamoni apoãkani iuaïkana auinina ïkapani. ⁴⁵Kitxakapirïka Teoso sãkire sãpiretakani iõkatsopatari ia Teoso sãkire:

Teosorako oerekariko ikinipoko kãkiti.

Niri sãkire kïpitakani, niri oereëkini, apoka notamoni. ⁴⁶Kona aua kãkiti niri atamatakari. Nota Teoso tixine ïkari, notanokara atamatapekari niri.

⁴⁷—Nota sãkire auiãkari, iuara auapininiika Teosokata. Ia nisãkire atão. ⁴⁸Nota iua komiri nitxaua kãkiti auapininiika

inĩkitakakarino. ⁴⁹Hinirimane kitxakapirĩkarini nikari komiri iaxiti katxaākari āparaā makipakaniātaā. Iaxiti katxaākari inikanimana, txanima ipĩpena. ⁵⁰Kākiti nikiniāri atāo komiri Teoso tixine ĩkari kona ipina. ⁵¹Iua komiri, Teoso tixine ĩkari nitxaua nota. Kākiti auapininiika inĩkitakakarino nota. Ia komiri niākari auapininiika itxako. Ia komiri nisikakiti ia niitokara. Niĩto nisika kākiti ikini itixiti auakani auapininiika inini tĩkane —itxa Xesosi.

⁵²Ikara atoko ininiā ninoa Xoteoakori taparakienatakakaua: —Natokopa itxa ia kiki iĩto isikiniua ate, anikiniri ĩkapani? —itxana.

⁵³Ininiā Xesosi:

—Atāoenepitikara ikara atoko nitxai hĩte. Hĩtari iaxitikiri ĩto himanikakanisaaki, iarēka himiātakanisaaki, kona hĩxinire auapani ātipirika. ⁵⁴Iua niĩto niākari, niarēka iātakari, auapikako Teosokata. Xipokatxi ōtisaaki nōkitikariko iua iuaĩkana auini ĩkapani. ⁵⁵Niĩto atāo komiri itxaua. Niarēka atāo iāriā itxaua. ⁵⁶Niĩto niākari, niarēka iātakari, aua nākixinireē. Nota aua iua ākixinireē. ⁵⁷Niri, ātipirika auapika inakari, iokanatano nota ĩkorapokoriti. Iuara sikano nota ātipirika nauini ĩkapani. Iua atokotxikana nota sikari nota niākari ātipirika auini ĩkapani. ⁵⁸Nota iua komiri Teoso tixine ĩkari nitxaua. Komiri hĩkiomaneakorini nikakiti ātiāo. Iua komiri nikakari ipĩpe. Nota siākiti komiriti niākani, nisākire auĩākani auapininiika Teosokata itxanako.

⁵⁹Ikara atoko itxa Xesosi sākire aiko āki Xoteo apotiitiniātaāua Kapanaoō sitatxiti oerekarauatakasaaki.

Apanakini Takanapiniri Xesosi

⁶⁰Xesosikata sikani isākire potxitakani, ikara isākire ikenakotakasaakina, ipimarauatakakana:

—Pamimari ikara isākire. Kipa imarotari ikara atoko inakari sākiretxiti? —itxana.

⁶¹Masāpiretakotika Xesosi imarotari ikara atoko itsoatinina. Ininiā iua:

—Hĩnirekatari hĩtakanapinino nota ia nisākire xika? ⁶²Kiātokopa hĩxinikakiti hĩtikiniāno nota hĩtari iaxitikirino kanĩkini mitxi nauiniātaā? Atxiĩti iusaaki hāuikatarini nisākire? ⁶³Iua Erekarini Matamatakotinokara sikari kākiti auini tĩkane. Kākiti ĩto tapara lauari. Ikara sākiretxi hĩtemoni nisāpiretakiti, iua Erekarini Matamatakoti sākiretxikana. Nisākire auikiko auākitakari kākiti,

ãtipirika Teosokata auini ìkapani. ⁶⁴Txamari auapitika hîte sauaki nisäkire mauiäkani —itxa Xesosi.

Merepitipanika Xesosi imarotapekari iua säkire mauiäkani tìkane. Xesosi imarotari apaka imìkapiritakiri tìkane.

⁶⁵—Niri Teoso masakaposotiietakiniti kona iposota apokini notamoni —itxa Xesosi.

⁶⁶Ikara isäkire xika itori Xesosikata sikani takanapari iua. Kona inirekaikarina iuakata isinina. ⁶⁷Ininiã Xesosi pimaãna imoianariakori tosi:

—Hítepekana, hîte apaka nirekatari hîtakanapinino? —itxa Xesosi.

⁶⁸Ininiã Simão Petro apakapapiretari:

—Apiananiri, kirimonipa asa atxiiti? Pitenanira sãpiretari kãkiti auapininiika inini. ⁶⁹Ate imarotari Teoso mereëkiti pininiua. Teoso ãkiri, auapika inakari ãkiri pitxaua pite —Petro txari Xesosi.

⁷⁰Ininiã Xesosi:

—Nota mereëi hîte tosi kikiakori. Txamari hîte sauaki aua Satanasi nitiri —itxa Xesosi.

⁷¹Iuasaaki Xesosi xinikari Xotasi Isikariotxi inakori, Simão inakori ãkiri. Xesosi moianarikamara iua, txamari imìkapiritariko Xesosi.

Xesosi Itariakori

Mauikakaniri Isäkire

7 ¹Eereka Xesosi kaikotapanika Kariréia tōpa. Kona Xotéia tōpa !ikaikota iuasaaki, kotxi iuaã Xoteo auíteakori nirekari okiniri.

²Iuasaaki Xoteo kiinirite Papiri inakori kaiama atokopekari.

³Ininiã Xesosi itariakori misäkiretari iua:

—Posipika uai. Pisäkire auiãkanimoni Xotéia auakanimoni pisa. Ninoa apaka nirekari itikiniri pikamakiti. ⁴Kãkiti nirekiniãri iteene imarotaãka, likipatari ikamakiti. Pite kamanãtari posotiiiretxi uai Kariréia tōpa. Pisa Xotéiamoni. Iuaã poerekari piposotiiire ikinimane imarotini ìkapani —itxana.

⁵Ikara atoko itxarina Xesosi, kotxi itariakori apaka iuasaaki kona auikapanikari isäkire.

⁶Ininiã Xesosi apakapapiretana:

—Iuaã nisini keto kona apokapanika. Apakata ikiniõtika Xotéia tōpamoni hîte sini, ⁷kotxi kãkiti !omanatai hîte. Notananira omanataãka, kotxi nisãpiretari maerekati kãkiti kamakiti. ⁸Erekari

hĩte sini kiinirimoni. Kona nota sapani uatxa. Nisini manapi apokasaaki nisa —itxa Xesosi.

⁹Itariakorimoni ikara inaka atoko, ikaikotapanika Kariréia tōpa.

Xesosi Sari Papiri Kiiniritimoni

¹⁰Itariakori kiinirimoni iikiikapeka. Ninoa tikinimoni isa Xesosi. Iuasaaki !kasāpirenari kiinirimoni isini tĩkane. Ininiã kākiti mimarotakinitika isa.

¹¹Xoteo auĩteakori nitapiimari Xesosi kiinirisaaki. Ipimaãri kākiti: —Ītapari Xesosi?

¹²Kākiti iuaã auakani sākirauata Xesosi pirena. Apanakini txari: —Peerekari Xesosi.

Apanakinipekana:

—Kona erekari. Imisirienetari kākiti —itxana.

¹³Kona kākiti sākirauata Xesosi uãka Xoteo auĩteakori takote, kotxi ipĩkana.

¹⁴Mapaõtinoka kiiniri xipokini apisapanika, Xesosi sari Xotéia tōpamoni. Isari Teoso misākiretiko aikotimoni. Iuaã oerekarauata.

¹⁵Xoteoakori tsorĩkaãnãta Xesosi sākire ikenakotakasaakina:

—Kininiãpa ere kiki paimatireri. Kona apaiaõkarauata —itxanãtana.

¹⁶Ininiã Xesosi apakapapiretana:

—Na nota imaroreni noerekai hĩte. Iua niokanatakiri imarorera noerekai hĩte. ¹⁷Kākiti Teoso nirekaākiti nirekaākani imarotari noekiniri Teoso imarorenoka. Ninoa imarotari nimoerekakaniri notaka nimarore. ¹⁸Kākiti iuaka isākire sāpiretakari nirekari apanakini iuikiniri iua. Kākiti Teoso sākirenoka sāpiretakari nirekari iuikiniri Teoso ipaniãtakiri. Ikara atoko inakari kākiti sākire atãonoka. !Ikamari maerekati. ¹⁹Moisesini oerekai hĩte Teoso sākire, ipaniãtakiti iõkatsopatakori. Txamari kona hĩte kamari Teoso paniãtakiti. Kona ãtika hĩte kamari ipaniãtakiti, kotxi hinirekari hōkinino nota —itxana ninoa.

²⁰Ininiã ninoa apakapapiretari:

—Maerekati matamatakoti auãĩtotai pite. Kiripa kinirão okaka txai pite? Iua maerekati matamatakoti xika ikara atoko pitxa pisākire —itxarina.

²¹Ininiã Xesosi:

—Nota kamari posotiiretxi tomatikoõtxitisaaki, iua kiki matĩpokotakati nimakananitakasaaki, ininiãkara hĩte tsorĩkaãta.

Hĩuãkatari niparĩkauatini. ²²Txamari hĩte apaka parĩkauata tomatiko õtisaaki, kotxi hĩkamari Teoso takaõtxikare hamarite ãtoã tomatiko õtisaaki. Moisesini paniãtai Teoso takaõtxikare hĩkamini hamarite ãtoã oito õti iua auakasaaki. Ari hinirimane kitxakapirĩkarini, Moisesini apisapanika, oerekapekari ikara atoko inakari hĩkamini. ²³Ininiã hĩte kamari Moisesi paniãtakiti tomatikoõtxitisaaki. Ikara atoko ininiã, kinirepa hĩte omanatano nota, iua kiki erekapeka nitxĩkitakini xika tomatikoõtxitisaaki? ²⁴Iteene pimimarotakanisaakiri ãti kamakiti, kona pakiritapiri: “Iua kamari maerekati,” kona pitxape. !Papoĩtapiri ãti. Atão inakarinoka pinita, atão pimarotini ĩkapani —itxa Xesosi.

Xesosikani Teoso Mereẽkiti Txataua?

²⁵Apanakini kãkiti Xerosareẽ auakani txanãtari:

—Ere kikikani ninoa kinirão okaenetakitikani? ²⁶Hãtamatarari. Iua sãkirauanãta kãkiti apisatoõ. Kona kapĩkareri iua. Auĩtetxiakori !kãsãkirena. Atauako aũũteakori auikatarari isãkire atxiĩti? Atxiĩti auikatarina Xesosi Teoso mereẽkiti aiãtapanãtakiti ininiãua?

²⁷Atão Teoso mereẽkiti aiãtapanãtakiti apokasaaki, kona kimarotikori iua ininimoni. Ate amakinika imarotapitikari iua Xesosi ininimoni. Karirėiakiri iua, ininiã Xesosi Teoso mereẽkiti aiãtapakiti !itxaua —itxanãtana.

²⁸Teoso misãkiretiko aikotiã Xesosi oerekarauanãtakasaaki, itaparasãkireritika ipimaãna kãkiti iuaã auakani:

—Atauako hĩte imarotatano nota? Atauako himarotatarari nota ininimoni? Kona notaka iokanataua kãkitimoni. Niokanataãka. Nota paniãtakari atãonoka isãkire. Kona hĩte imarotari iua. ²⁹Nota imarotari iua, kotxi iua auiniãtaãkirikarano nota. Iuara iokanatano kãkitimoni —itxa Xesosi.

³⁰Iuasaaki auĩtetxiakori nirekamari imaĩkinirina. Kona kamaĩkikori, kotxi imaĩkiko manapi kona apokapanika. ³¹Ninoa auĩtetxiakori kona auikari Xesosi sãkire, iuaritika itomaneri kãkiti auikari Xesosi Teoso mereẽkiti kãkiti iãtapakiti ininiua.

—Iua kiki inipitikara Teoso mereẽkiti aiãtapakiti itxaua, kotxi ãti posotiiretxi apiari kamakari !auari —itxanãtana.

Sotatoakori Iokanatiko Xesosimoni

³²Pariseoakori kenakotakasaakiri kākiti sākire ikara atoko inakari, ninoa, sasetotxi auñteakori pakini iokanataro sotatoakori Xesosi imaĩkinina ĩkapani.

³³Sotatoakori apokasaaki iuamoni, Xesosi txari kākiti iuaãtaã: —Mapaõtinoka hñtekata nauako. Eereka nisa nipaniãtakirimoni. ³⁴Hinitapiikamano, !hãpokapanino. Nisinimoni kona hñte posotari hñsini —itxa Xesosi.

³⁵Auñtetxiakori ninoakakarika isãkirauatana: —Amonipa isa atxiĩti, ate mapokakaniãri iua? Atauako õtakoxiti isatako Xoteoakori iarikakanimoni, ãti uãka sauaki Xoteoakorimoni? Atauako oerekataro Xoteo minakaniua? ³⁶Kotxi iua sākire: “Hñitanoko. !Hãpokano nota. Kona hñte posotari nota sinimoni hñsini,” itxa sãkireta. Ate !imarotari isãkire —itxanãtakakana.

Ãparaã Kākiti Auãkitaãkari

³⁷Kiiniri mapotõkire õti apiapoxokonita. Iua õti Xesosi tima kākiti sauaki. Itapasãkñreritika isãpirenauata ikinimane kenakotiniri ĩkapani:

—Piposonatakasaaki, notamoni pinako piãtini ĩkapani. ³⁸Teoso sãkire iõkatsopatakori txari:

Nota sãkire auĩãkari ãkixinireẽ aua amomo atoko inakari. Iua ãparaã txĩkitakari kākiti auãki inini. —itxa Xesosi.

³⁹Iua Erekari Matamatakoti amomo atoko itxa. Xesosi sãkire auĩãkari apakapariko iua Erekari Matamatakoti. Iuasaaki Xesosi sãkirauatakasaaki, iua Erekari Matamatakoti kona siãkapanika kãkitimoni, kotxi Xesosi kona kanapiriãpanika Teoso tixinemoni.

⁴⁰Ikara Xesosi sãkire ikenakotakasaaki itori kākiti txari:

—Atãopitikara ikira kiki Teoso sãkire sãpiretakari aiãtapakiti itxaua.

⁴¹Apanakini txari:

—Iua Teoso mereẽkiti aiãtapakiti itxaua.

Apanakinipekana:

—Teoso mereẽkiti aiãtapakiti, Karirẽiakiri !itxaua. ⁴²Teoso sãkire iõkatsopatakori sãpiretari Teoso mereẽkiti aiãtapakiti, Taviini apika mekaniri itxaua. Iua iponaniãko Pereẽ sitatxiti Taviini auiniãtaã —itxana.

Ikara atoko itxanātana, kotxi kona imarotarina Xesosi iponaniniātaã Pereẽ sitatxiti.

⁴³Iuasaaki apanakini auikari Xesosi sãkire. Apanakinipekana !auikari Xesosi sãkire. ⁴⁴Apanakini nirekamari imaĩkiniri Xesosi iuasaaki, iuaritika iua maĩkakari !auari.

Sotatoakori Kanapiriã Xoteo Auĩteakorimoni

⁴⁵Ininiã sotatoakori kanapiriã sasetotxi auĩteakorimoni, pariseoakori pakinimoni. Ininiã ipimaãna:

—Kinirepa kona himinari Xesosi uaimoni?

⁴⁶—Apia imatiresãkireta iua. !Auari kãkiti iua atoko ina sãkiretakari, ininiãkara !apakata amaĩkiniri iua —itxana sotatoakori.

⁴⁷Ininiã pariseoakori omanãkarauata.

—Atauako iua misirienetai hĩte apaka? Iua txĩkitakai hĩte isãkire hãuikini. ⁴⁸!Auari auĩtetxi iua sãkire auĩãkari. !Auari pariseo iua sãkire auĩãkari. ⁴⁹Kãkiti miĩkitetinanira auikari Xesosi sãkire. Xesosi sãkire auĩãkari kona imarotari Moisesini paniãtakiti. Ininiãkara Teoso misiritanako ninoa —itxa pariseoakori sãkire.

⁵⁰Iuasaaki Nikotemo inakori iuaãtaã aua. Pariseo itxaua. Iua õti apisapanika iuara sari Xesosimoni iãkanõka imisãkiretiniri iãkapani. Ninoa ikara atoko isãkirauatakasaaki, Nikotemo misãkiretana ninoa:

⁵¹—Kãkiti kamakiti isãpiretini apisapanika, “maerekati ikamakiti,” kona hĩtxape. Ikara atoko itxa Moisesini oerekasaakiaua ate —itxana.

⁵²Ininiã ninoa pariseoakori:

—Atxiĩti pite Kariréiakirikai apaka, Xesosi atoko? Iteene patatsopatariko Teoso sãkire iõkatsopatakori. Iua iteene patatsopatakasaaki, iuasaakiikarako pimarotariko !auari Teoso sãkire sãpiretakari, Kariréia tõpakiri —itxarina iua.

⁵³Eereka ikinimane sari aapokomonina.

Sito Õtaniri Minakotikatika Sirĩkakarõ

8 ¹Iuasaaki Xesosi sari Orivanape Xiratamoni. Oriva txipokori. ²Katimatinĩkata ikanapiriã Teoso misãkiretiko aikotimoni. Iuasaaki ikinipoko kãkiti apotiitaua iuamoni. Ininiã Xesosi topãka, Teoso sãkire isãpiretini iãkapani. ³Iuasaaki kaiõkatsopareriakori, pariseoakori pakini minaro sito iuamoni. Ninoa apokaro oa sito õtaniri minakotikatika osirĩkini. Itakarona oa ikinimane apisatoõ.

4—Koerekareri, aãpokaro oia sito õtaniri minakotikatika osirĩkini.
 5Moisesini sãkire iõkatsopatakori paniãtaua ikara atoko inakaro kai soroã oõkaãka. Pitepekana, kiãtokopa atxataro oa? —itxana Xesosimoni.

6Ikara atoko ipimaãrina Xesosi, kotxi inirekarina Xesosi kerokiniri isãkire. Inirekarina Moisesini paniãtakiti iaõka imakamakaniã, ininiã maerekati ikamapeka. Txamari !kasãkireri Xesosi. Iokirita, iõkata itxari kipatxi iuakokiã. Imakenakotakiniti atoko itxa. 7Ipimarauatapanikana, ininiã Xesosi õkaõkitaua.

—Maerekati makamakaturako ãkiika kiporonakiniro aroa kai soroã —itxa Xesosi.

8Eereka Xesosi iuaĩkana iokirita, iõkata itxari kipatxi. 9Ninoa ikaraene ikenakotakasaakina, iua apiata kiomãtxi inakariua sipeka. Eereka iua tikini auakari apaka sipeka. Ikara atoko itxaãpotana ikinikana isinina. Eereka Xesosinoka kaikota oa sitokata. 10Xesosi õkaõkitaua, atamata itxaro oa sito. Oanoka kaikota iuaã.

—ãtãpari pimaerekani sãpiretakani? —itxaro.

11—Apiananiri, isipekana nimaerekani sãpiretakani —otxari.

—Nota apaka kona sãpiretari pimaerekani. Pisipeka. Maerekati kona pikamapinikako —itxaro.

Kãkiti Xinire Iopiniãkari

12Eereka Xesosi iuaĩkana oerekari kãkiti.

—Nota ikini itixiti auakani tirikapite atoko nitxaua, kotxi noerekari Teoso sãkire notakata sikani. Teoso mimarotakani ipiaã sikani itxauana. Notakata sikanipekana litãpokota ipiaã. Nota sikana ninoa ãtipirika auinina ãkapani —itxa Xesosi.

13Ininiã pariseoakori misãkiretari Xesosi:

—Kona ate aukapiretari pisãkire, kotxi pitenani sãpiretari pisãkire. Ikara atoko ininiã, kona aimarotari atãoene inini pisãkire. Ati sãpiretiniãri pite sãkire iaõka, aãuikari atxiĩti —itxarina Xesosi.

14Ininiã Xesosi:

—Nota sãkirekara ikara atoko nitxai hĩte, iuaritika atãoenekara ikara atoko nitxai hĩte, kotxi nota imarotari nininimoni, nimarotari nisinimoni. Kona hĩte imarotari nota ininimoni. Kona hĩte imarotari nota sinimoni. 15Kãkiti hitxaua, ininiã hãpoĩrauata, kotxi !himarotari atão. Kona nota txari kãkitimoni: “Pite, peerekai pite. Pitepekana, !erekai pite.” !Ikara atoko !nitxari kãkiti. 16Iuaritika nisãpiretakasaakiri kãkiti kamakiti, atãonoka nitxa nisãkire, kotxi kona notananini

sãpirenauata. Niri niokanatakiri sãpiretakititxikana nisãpireta.

¹⁷Kitxakapirika hiteka kiomaneakorini sãkire iøkatsopatakori txari:

Kãkiti itikakititxikana ãti itikakiti. Ninoa ipi sãkire ãtinoka auiniã, ininiã ninoa sãkire atãonoka itxa,

itxa hĩkiomane sãkire. ¹⁸Nota sãpiretari nota pirena. Niri niokanatakiri apaka sãpiretari nota pirena nisãkiretxikana, ininiã ipi auape —itxa.

¹⁹—Naniparari piri? —itxarina.

—Kona himarotano nota. Niri apaka kona himarota. Nota himarotaãkamako, niri apaka himarotamako.

²⁰Ikara atoko Xesosi sãkirauata. Txineiro Teoso ãkapani sikikoãtaã takote Xesosi oerekarauata Teoso misãkiretiko aikotiã. Xesosi ikara atoko isãpirenauata, iuaritika kona kamaĩkikori, kotxi imaĩkiko manapi kona apokapanika.

Xesosi Sinimoni Kãkiti Masikani

²¹Iuaĩkana Xesosi misãkiretari kãkiti:

—Nisipiriko. Eereka hinitapiimano. Nota sinimoni !hãuiritaãka hĩsini. Hĩpinakasaaki, himaerekanikatika hĩpinako —itxa Xesosi.

²²Xoteo auiteakeri napetari:

—Atauako iuaka okatauako? Kotxi iua txari: “Nota sinimoni kona hãuiritaãka hĩsini” —itxana ninoa.

²³Iuaĩkana Xesosi sãkirauata ninoamoni:

—Ĩkoraxitikinirai hĩte. Nota itanokiri. Hĩte ãkora itixikinirai hĩte. !ĩkoraxitikirino nota. ²⁴Ikara atoko ininiãkara, nota txai hĩte: “Hĩpinakasaaki himaerekanikatika hĩpinako,” nitxai. Himauijakanisaakiri nisãkire nota pirena, hĩpinakasaaki himaerekanikatika hĩpinako. Kona Teoso makatxakinii himaerekani —Xesosi txana ninoa.

²⁵—Kiriparai pite? —itxarina Xesosi.

—Merepitipanika nisãpiretakitikara iuakarano nota.

²⁶Nisãpiretakiti tĩkane hĩte maerekani nisãpiretini tĩkane kaiãopokori. Nota iokanatakari atãoenenokara isãkire. Iua sãpiretakitinokara nisãpiretari kãkiti itixi auakani —itxa Xesosi.

²⁷Ninoa !imarotari Xesosi iokanatakari aĩri Teoso. ²⁸Ininiã Xesosi txana:

—Nota hitari iaxitikiri høkasaaki, niĩto itano høkitikasaaki, iuasaakiikarako himarotano kinakaripa nota. Iuasaaki himarotariko notaka sãkire !nisãpireta. Niri oereẽkitinokara

nisãpireta. ²⁹Iua niokanatakiri notakata aua. Niri litakanapano nota, kotxi inireëkitinoka nikama —itxa Xesosi sãkire.

³⁰Xesosi ikara atoko ina sãkiretakasaaki, itomaneri kãkiti auikari isãkire.

Õpoĩkakoni Pirena

³¹Ininiã Xesosi sãkirauata Xoteoakorimoni iua sãkire auĩãkanimoni.

—Nisãkire iaõka hĩkamakasaaki, atão nimoianariakori hĩtxauako.

³²Atão nimoianariakori hinakasaakiua, himarotari atãonoka inakari. Atãonoka inakari himarotakasaaki, õpoĩkakoni atoko hĩtxaua.

³³Ninoa apakapapireta:

—Apraõni apika mekanireua ate, ininiã anirekinimoni asa. Nitiritxi iamotakoni !atxaua. Kinirepa õpoĩkakoni atoko pitxĩkitakaua? —itxana.

³⁴Ininiã Xesosi:

—Atãonoka nitxai hĩte. Maerekanitxi nitiri atoko itxa kãkiti maerekati kamakari. ³⁵Nitiritxi iamotakori ãtipirika !uari ipatrãote aapoko. Patrão ãkiri auapika ãtipirika iri aapoko. ³⁶Nota Teoso ãkiri txĩkitakasaakiri kãkiti õpoĩkakori atoko ininiua, maerekanitxi nitiri !itxaikauako. Iuasaaki iposotari erekari ikamini.

Apraõni Apika Mekaniriakori

³⁷—Nimarotari Apraõni apika mekaniriakori hininiua, txamari hinirekari hõkinino. Nisãkire himauiãkani xika hinirekari hõkinino. ³⁸Nota sãpiretai hĩte nota iri oerekakiti. Hĩte kamari hĩte iri paniãtakiti —itxa Xesosi.

³⁹—Apraõni ate iri —itxana ninoa.

Ininiã Xesosi:

—Apraõni apika mekaniriakori hininiãua, Apraõni kamakiti atoko hĩkamamako. ⁴⁰Atãonoka nisãpiretai hĩte. Teoso sãpiretakitinokara nisãpiretai, iuaritika hinirekari hõkinino. Apraõni !ikamari ikara atoko inakari. ⁴¹Hĩte kamari hĩte iri kamakiti atoko inakari —itxa Xesosi.

—Teosonanira ate iri. Ate atãopitika iua anaakori atxaua —itxana.

⁴²—Teoso atão hĩri ininiãua, nota hĩtiretamako, kotxi Teoso auiniãtaã nota ina uaimoni. Kona notaka iokanataua. Teosora iokanatano nota uaimoni. ⁴³Kininiãpa !hĩkitetataru ikara atoko

ninini? !Himarotari nisäkire, kotxi kona xatiki hinirekari nisäkire iaõka hikamini. ⁴⁴Satanasira hïri. Hïte nirekari maerekati, Satanasi nireëkiti iaõka hikamini. Kitxakapirïka itixi kamiko atokopanika kokaniri itxaua Satanasi. Iua !nirekari atãoene isãpiretini. !Iposotari atãoene isãpiretini. Aãpirenanokara iua imarota, kotxi aãpirenaãri itxaua iua. Aãpirenaãri iri itxaua iua Satanasi. ⁴⁵Nisäkire atão, ininiãkara hïte !auikari nisäkire. ⁴⁶Hïte ãtika itikatari maerekati nikamini? ãtika !itikari maerekati nikamini, kotxi kona maerekati kona nikama. Ininiã kinirepa kona hïte auikari nisäkire? ⁴⁷Teoso anaakori kïpitari iua sãkire. Hïte kona kïpitari iua sãkire, kotxi iua anaakori !hïtxaua hïte —Xesosi txana ninoa.

Xesosi Apraão Apisapanika Auini

⁴⁸Ininiã Xoteoakori txari Xesosi:

—Ate sãkire atão. Samariakiri pitxaua pite. Maerekati Matamatakoti auaiãtotai pite —itxana.

Ninoa akiriuãkatari Xesosi “Samariakiri,” kotxi Xoteoakori omanatana Samariakini. ⁴⁹Ininiã Xesosi:

—Maerekati Matamatakoti kona auaiãtotano nota. Nota paxitari niri, txamari hïte kona paxitano nota. ⁵⁰Kona notani nitari kãkiti nota iuikakani tïkane. Nirira nirekari kãkiti iuikinino nota. Nirira imarotari nisäkire atãonoka inini. ⁵¹Nota sãkire iaõka kamakari !ipina. Ikara atãoene.

⁵²Xoteoakori apakapapiretari:

—Uatxa aimarotari maerekati matamatakoti auaiãtotai pite, kotxi Apraãoni ipïpe. Teoso sãkire sãpiretakanini apaka ipïpe. Kinirepa pite sãkire: “Nota sãkire iaõka kamakari !ipina,” pitxa? ⁵³Aïrini Apraãoni ipïpe. Pite apiata atxiïti? Teoso sãkire sãpiretakanini apaka ipïpe. Kiriparai pite? —itxarina Xesosi.

⁵⁴Ininiã Xesosi:

—Notaka niuikiniua !apakata. Nirira iuikano nota. Hïte sãkire: “Ateosone iua,” txamari nota irira iua. ⁵⁵Kona himarotari Teoso. Notananira imarotari Teoso. Nota “kona Teoso nimarota,” nininiã, hïte atokokamarako nitxamako. Aãpirenaãri nitxamauako. Nota imarotapitikari iua. Nota kïpitari isãkire. ⁵⁶Hïri Apraão poxokoniuta, nota uai apokini ikenakoenetakasaaki. Iua itikari nota uai apokini, ininiã iua poxokoniuta.

⁵⁷Ininiã ninoa Xoteoakori: —Pite sîkoêta anokanani !apokapanika, iuaritika paôkitatari Apraão? Paxirari pisäkire —itxarina.

⁵⁸—Apraão apisapanikara nota aua. Ikara atãoene nitxai hîte — itxa Xesosi.

⁵⁹Ikara isäkire ikenakotakasaakina, ikosekarina kai soro Xesosi ikiporonakinina ïkapani, okinina ïkapani. Xesosi kipataua. Osipikari Teoso misäkiretiko aikoti. Inapaãpota ninoa sauaki.

Mõsiãreti Xesosi Erekepeka Inïkitakini

9 ¹Xesosi tïpokotakasaaki, itikari mõsiãreti. Iua ponaniãkasaaki, mõsiãreti itxapekua. ²Xesosi moianariakori pimaãri iua: —Koerekareri, kiripa kamari maerekati iua mõsiãreti inini? Iuakani? Irikani? Inorokani?

³Ininiã Xesosi:

—Kona iua maerekani xikani mõsiãreti itxaua. Kona iri maerekani xikani, kona inoro maerekani xikani mõsiãreti itxaua. Kona maerekanitxi xikani mõsiãreti itxaua. Iua mõsiãreti Teoso posotiire kãkiti imarotini ïkapanira. ⁴Kãkiti parïkauata pokamara. Mapiãpeka inakasaaki, kona kãkiti posotaikari iparïkauatini. Iua atokokana akamariko niokanatakiri paniãtakiti aãuapanika anakasaaki. Apinaka atoko kona akamaikari Teoso paniãtakiti ïkorapokoriti. ⁵ïkorapokoriti nauakasaaki, niopinikana ikinimane ãkixinire Teoso imarotininina ïkapani —itxa Xesosi.

⁶Ikara inaãka atoko ienemaã ixiti oakaka Xesosi. Ikamari ãkape, minapa itxari mõsiãreti oki nopini. ⁷Iokanatarari:

—Parokari poki Siroee poamoni —itxari mõsiãreti.

Iuaã auari ipoa xapitikiri kãkiti kamakiti. Iua ipoa uãka “Siroee.” Iua uãkatxikana “Iokanatakori” itxaua. Iua sari Siroeemoni. Arokatoõtaua. Iuasaakipeka kõiãrepeka itxa.

⁸Aapoko takote auakani, kãkiti mitxi mõsiãreti itikakani pakini, ninoa misäkiretakakaua:

—Ikira kiki mitxi iitopãkanãtapika inakarikani, kãkiti txineirote amanaãnãtapika inakarikani, ikira kiki? —itxana.

⁹Apanakini apakapapiretari:

—Ari, iuapitikara.

Apanakinipekana apakapapiretari:

—Kona. Kona iuani. ãti kiki iua mõsiãreti atoko inakarira.

Iua mitxi mõsiãreti apakapapiretari:

—Ari, iuapitikarano nota —itxa.

¹⁰Ininiã ninoá:

—Kiãtokopa pitxa uatxa kōsiãrepeka pitxapeka? —itxarina.

¹¹—Iua Xesosi inakori kamari ãkape, nokiã minapa itxari. Ipaniãtano: “Ãparaã Siroee inakorimoni pisa. Iuaã parokatoõtaua,” itxano nota. Ininiã nisa. Narokatoõtaua. Iuasaakipeka nota kōsiãrepekano —itxa.

¹²—Namoniparari iua? —itxarina.

—A, meta —itxa iua mitxi mōsiãreti.

Pariseoakori Mitxi Mōsiãreti Inakarikata

¹³Ninoa anikari iua mitxi mōsiãreti pariseoakorimoni. ¹⁴Iua õti Xesosi kamakasaakiri ãkape mōsiãreti kōsiãrepeka inĩkitakini ãkapani tomatiko õtisaaki iuasaaki. ¹⁵Ninoa anikasaakiri iua mitxi mōsiãreti inakari pariseoakorimoni, pariseoakori apaka pimaãri iua:

—Kininiãpa uatxa kōsiãrepeka pitxa? —itxana.

—Ãkapeãra noki nopini iminapa. Eereka narokatoõtaua. Uatxa kōsiãrepeka nitxa —itxa.

¹⁶Pariseoakori ãtikaka txari:

—Iua kiki, ãkape mōsiãreti oki nopini minapakari, kona iua kamari Teoso paniãtakiti, kotxi iparĩkauata tomatiko õtisaaki. !Apakata ikamakiti.

Pariseoakori ãtikakapekana sãkirauata:

—Maerekati kamakari kona kamari ikara atoko inakari posotiiiretxi, mōsiãreti kōsiãrepeka inĩkitakini.

Ininiã pariseoakori taparakienatakakaua ikara xika. ¹⁷Iuaĩkana pariseoakori misãkiretari iua kiki:

—Kiãtokopa inakaripa iua kiki pite makananitikari? —itxarina iua.

—Teoso sãkire sãpiretakari itxaua iua.

¹⁸Xoteo auĩteakori kona auikari isãkire, mitxi mōsiãreti eereka kōsiãrepeka inakari sãkire. Ininiã ninoá akiritari iri, inoro pakini.

¹⁹—Hĩte sãkire hamarite auakasaaki mōsiãreti itxapekaua. Hamaritekani ere? Kiãtokopa uatxa kōsiãrepeka itxa? —itxana.

²⁰—Ari, ate ãkiripitikara. Iponaniãkasaaki, mōsiãretimeka itxaua.

²¹Kona ate imarotari kiriãpareuako uatxa kōsiãrepeka itxa. Kona ate imarotari kiriuako kamari kōsiãrepeka inini. Hĩpimaãri iua, kotxi mitapekari iua. Iuaka apakapapiretai hĩte —iri, inoro pakini txana ninoá.

²²Iri, inoro pakini ikara atoko itxana Xoteo auĩteakori ipĩkinina xika. Xoteo auĩteakori sãpiretapekari kãkiti: “Kãkiti Xesosi sãkire auiãkani, Teoso mereẽkiti ininiua auiãkani, kãkiti iãtapakiti ininiua auiãkani, kona auiritaãkaikana ĩroinina aiko Xoteo apotiitiniãtaãua.” ²³Ininiã pĩkaretxi xika iri, inoro pakini txari: “Hĩpimaãri iua. Mitapekari iua,” itxana ninoa.

²⁴Ininiã iuaĩkana pariseoakori akiritari iua kiki mitxi mõiãreti inakari.

—Atãonanira pisãpiretako Teoso apisatoõ. Ate imarotari maerekatnoka ikamini Xesosi, kotxi imakananirauata tomatiko õtisaaki —itxarina.

²⁵Ininiã iua:

—Kona nimarotari maerekati ikamini. Kona nimarotari erekari ikamini. Mitxipeka mõiãreti nitxaua. Uatxa kõiãrepeka nitxaua. Ikaranoka nimarota —itxana ninoa.

²⁶—Kiãtokopa itxai kõiãrepeka inĩkitakiniãi?

²⁷Iua mitxi mõiãreti inakari apakapapiretari:

—Nisãpiretapekai hĩte mixikanani, txamari !hãuikari nisãkire. Kinirepa hinirekatari iuaĩkana nisãpiretinii? Atauako hĩte apaka nirekari iua sãkire hãuikini? —itxana.

²⁸Ininiã itxitarina:

—Pitera auikari iua sãkire. Ate auikari Moisesini sãkire.

²⁹Aimarotari Teoso misãkiretari Moisesini. Iua Xesosi kamari maerekati. !Aimarotari amonikiripa iua ina —itxana.

³⁰Iua kiki apakapapiretari:

—Anekani. Kona hĩte imarotari amonikiriuaoko iua ina. Iuara kamaõsiãretano nota. ³¹Teoso kona maãkatari maerekati kamakari amanaãkiti. Teoso teosonetakani amanaãkiti imaãkatapitika. Iua nirekaãkiti kamakari amanaãkiti imaãkatapitika. ³²Mitxipeka mõiãreti kõiãrepeka inĩkitaãkari kona auari. Itixi kamikosaakipanika !uari kõiãrepeka inĩkitaãkari. Uatxaikara auape. ³³Xesosi Teoso iokanatakiti iminakanimauako, !ikamamariko posotiiretxi —itxa iua.

³⁴Ininiã pariseoakori:

—Pite maerekatipeka auakarikai. ãtipirika pite kamari maerekati. Maerekatnoka piĩkiteta. Iuaritika pinirekatari ate poerekini? Konapitini. Kona ate nirekari ikara pisãkire. Pisipiniikaua. Kona uai pikanapiripinika. Ate kona nirekari pite uai kãkiti apotiitiniãtaãua aikoti pinini —ninoa txari iua.

Ininiã aiko porikiti iokanatarina.

Mitxi Mõsiãreti Inakari Auikiniri Xesosi Sãkire

³⁵Xesosi kenakopiretari iporikiti iokanatiko mitxi mõsiãreti inakari, ininiã Xesosi nitari iua. Apokasaakiri, itxari:

—Atauako pauikatari Teoso ãkiri sãkire? —itxari.

³⁶—Kipa iua? Nimarotiniãri, nauikapitikariko —itxa.

³⁷—Pite aõkitapekari Teoso ãkiri. Iuapitikara misãkirenãtai pite uatxa —itxa.

³⁸—Apiananiri, nota auikari pite Teoso ãkiri pininiua.

Ininiã iua kapotoreẽkaua Xesosi apisatoõ.

³⁹—Ïkorapokoriti napoka Teoso sãkire auiaãkani ipinimoni nitakinina ïkapani. Isãkire mauiaãkani ipinimoni nitakinina ïkapani napoka ïkorapokoriti. Apanakini nisikaposotiiireta, Teoso sãkire auikinina ïkapani. Mitxi ninoa mõsiãreti atoko itxauana, kotxi mitxi ïmarotarina Teoso. Ninoa auikapiretakasaakiri Teoso sãkire, kõsiãreri atoko itxapekauana. Apanakinipekana atão minakati isãkirena: “Nimarotapitikari Teoso.” Ninoa uãkatari kõsiãreri atoko ininiuana. Txamari kona atão ninoa nirekari ïmarotiniiri Teoso. Ñisikari posotiiiretxi ninoamoni, Teoso sãkire auikinina ïkapani. Kãkiti iua atoko inakari mõsiãreti atoko itxaua —itxa Xesosi.

⁴⁰ãtikaka pariseoakori Xesosi takote auakani kenakotari.

—Atauako atekani apaka mõsiãreti atoko atxaua? —itxana.

⁴¹—“Mõsiãreni atoko atxaua,” hininiã hãsãkire, ininiã atão hãsãkire. Txamari hãte txari: “Kõsiãreua ate,” hãtxama. Iua atoko hininiã hãkamapitikari maerekati, kotxi kona hãuikari Teoso sãkire —Xesosi txana ninoa.

Soti Auãte Pitikiri

10 ¹Xesosi sãkirauatakasaaki, ia atoko itxa isãpirena: —Atãopitikara ia atoko nitxapaniiko hãte. Soti auãte ïroã pirikeri itoremoni. Itoremoni miãroãkani kiãtiriri itxauana, kotxi ãtiãtaã ikanãka ïroini ïkapani. ²Pirikeri toremoni ïroãkari soti auãte pitikiri. ³Initiri osereãri pirikeri tore iua ïkapani. Soti auãte kenakotari ipitikiri sãkire. Ipitikiri ïmarotari ïkinipoko ipiraakori uãka akiritinina ïkapani. Iuara anikana inipokotinina ïkapani. ⁴Porikiti auakasaakina, iua saãpota ninoa apisa. Iua tikini isana ninoa. Ninoa ïmarotari iua sãkire ene. ⁵Ninoa kona sari kãkiti

imimarotakinitina tikini. Ipitikiri minakotika akiritakasaakina, imitekana. Kona imarotarina imapitikiritakinitina sãkire.

⁶Ikara sãpirenatxi atão inakari oerekiko Xesosi sãpiretari pariseoakori. Txamari ninoa kona imarotari Xesosi ikara atoko inakari isãpirena.

Xesosi Soti Auĩte Pitikiri

Erekari Itxaua

⁷Xesosi iuaĩkana sãkirauata.

—Inipitikara nota pirikeri tore nitxaua, soti auĩte ãroini ĩkapani. ⁸Nota apisa apoãkani, atão minasãkiretakani kiĩtiririni itxauana. Soti auĩte kona maãkatari ninoa sãkire. ⁹Nota itore nitxaua. Kãkiti ãroiniãtaã tore nitxaua. Nota makatxakari uai ãroãkari maerekani, auapininiika inini ĩkapani. Iĩroã, ipokĩka itxapika. Kona kapĩkareri. Natxi !auari. ¹⁰Kiĩtiriri apoka iĩtiriuatini ĩkapani, okaniuatini ĩkapani, imisirikarauatini ĩkapani. Notapekana apoka kãkiti auapininiika inini ĩkapani, kãkiti auini ereka inini ĩkapani.

¹¹Pitikiritxi erekari nitxaua nota. Pitikiritxi erekari ipina ipiraakori mapinakani ĩkapani. ¹²Nitiritxi soti auĩteakori pitikiri !itxaua. Anãpa auĩte kaneenamari apokasaaki, iua miteka. Itakanapanako soti auĩteakori. Ininiã anãpa maĩkari soti auĩte, oxikepoata itxana. ¹³Iua nitiritxi mitekako, kotxi txineiro ĩkapaninokara iparĩkauata. Kona atão itiretari soti auĩte.

¹⁴—Soti auĩte pitikiri erekari nitxaua nota. Atão nimarotari nipiraakori. Ninoa apaka atão imarotano nota. ¹⁵Iua atokokana niri imarotano nota. Nota apaka imarotari niri. Nota ipinako soti auĩteakori nota nakiti mapinakani ĩkapani. ¹⁶Nota aua apanakini soti auĩteakori apaka. Uatxa ia pirikeri ãki !auapanikana. Niminanako ninoa apaka ia pirikeri ãki auinina ĩkapani. Ninoa auikariko nisãkire. Ininiã ninoa imakinika aua ãtika pirikeri ãki. ãtikarako ninoa pitikiri.

¹⁷—Niri taretano, kotxi nauritari nipinini, iuaĩkana nõkitikiniua ĩkapani. ¹⁸Kãkiti !iposotari okinino nota nimanirekasaakiri nokiko. Nota sikariko niĩto nokiko ĩkapani. Ninirekasaaki manapi nipina. Ninirekasaaki manapi nõkitikaua. Ikara atoko niri paniãtano nota —itxa Xesosi.

¹⁹Ikara Xesosi sãkire Xoteoakori kenakotakasaaki, itaparakienatakakauana. Apanakini potxitari Xesosi sãkire. Apanakini kona potxitari.

²⁰Apanakini txari:

—Satanasi nitiri auaitotari iua.

~Atipekana txari:

—Imapitxirita. Kinirepa hïkenakotatari mapitxiritakari sãkire? — itxana ninoa.

²¹Apanakini txari:

—Satanasi nitiri auaitotakiti !ikara atoko itxa sãkireta. Satanasi nitiri kona kõiãrepeka txïkitakari mõiãreti —itxana.

Xoteoakori !Auikari Xesosi Sãkire

²²Mitaãsaaki Xoteoakori kamari kiiniri Xerosareẽ. Iuasaaki ixinikarina Teoso misãkiretiko aikoti merepaniko kamiko. ²³Iuasaaki Xesosi tïpokota aiko Teoso misãkiretikoãtaã, Saromãoni inakoriãtaã.

²⁴Iuaã Xoteoakori apotiitaua iuamoni. Iuasaaki ninoa txari iua:

—Pite Teoso mereëkiti pininiãua, pisãpiretaua. Akokaxiti anirekari aimarotïniri ikara —itxarina.

²⁵Xesosi apakapapiretana:

—Nisãpiretapekai hïte. Kona hãuikari nota sãkire. Nïposotiire nikamakiti niri uãkaã oerekapakai hïte. ²⁶Nisãpiretapekai hïte, txamari kona hãuikari nota sãkire, kotxi nisoti auïtene kona hïtxaua. ²⁷Nisoti auïtene imarotari nisãkire. Nota imarotana ninoa. Ninoa kapokitano nota. ²⁸Nitxïkitakana ninoa ãtipirika auinina. Nota kamari ninoa imipïkanina tïkane. Kona kamakatzakikona nota nïkatakini. ²⁹Niri sikana ninoa notamoni. Apiatakari itxaua iua. Ininiã ãti kona posotari imakatzakinina niri nïkatakini. ³⁰Niri, nota pakini ãtika atxaua.

³¹Ikara atoko Xesosi inakasaaki, Xoteoakori morökari kai soro ikiporonakinirina ïkapani. ³²Xesosi sãkirauata ninoamoni:

—Kaiãopokori erekari niri nakiti noerekapekai hïte.

Kinakarixikapa hinireka hïkiporonakinino nota? —itxa Xesosi.

³³Xoteoakori apakapapireta:

—Kona akiporonakai erekari pikaminiã. Akiporonakai, “Teosorano nota” pinini xikara. Pite kiki, iuaritika “Teosorano,” pitxa. Ininiã maerekati pikamapeka Teosomonikari.

³⁴Xesosi apakapapiretana:

—Kitxakapirïka Teoso sãkire iökatsopatakori txari:

Nitxai: “Teosoakori hĩtxaua hĩte.”

³⁵Aimarotari Teoso sãkire iökatsopatakori ätipirika atão inini. Teoso akiriuãkatana ninoa isãkire apakapakani “teosoakori.” ³⁶Ininiã kinirepa hĩte kamaãkaretxitano. Niri mereẽno nota inireẽkiti nikamini ïkapani. Iokanatanano ïkorapokoritimoni. Ininiã kinirepa hãpoĩtano Teoso nimisãkirepiretini, “Teoso ãkirirano” ninakasaaki? ³⁷Nimakamakaniãri niri nirekaãkiti, iusaaki kona hãuikari nota sãkire. ³⁸Nikaminiãri inirekaãkiti, iuaritika himauikakaniãri nisãkire, hãuikariko niposotiire. Hĩtikakiti hãuika. Ininiã himarotariko, hãuikariko, niri, nota pakini ätika aniniua —itxa Xesosi.

³⁹Iusaakipeka pariseoakori omanãkarauata. Iuaĩkana inirekarina imaĩkinirina Xesosi. Txamari iusaakipe isipe.

⁴⁰Iuaĩkana Xesosi kanapiriã Xotão ipiniãmoni. Iuaã ikaikota Xoão kapatxisarerini patxisarauatiniãtaã. ⁴¹Itomaneri kãkiti sari iuamoni. Ininiã ninoa txa:

—Xoão kona kamari posotiiretxi, iuaritika ikinika isãpiretakiti Xesosi pirena atão inakaranoka isãpireta.

⁴²Ininiã itori kãkiti iuaãtaã auikari Xesosi sãkire.

Arásaro Ipinini

11 ¹Kiki Arásaro inakori aua ipi itaro, Maria, Mata pakini. Ninoa aua Petânia aapokotxiti. Iusaaki Arásaro amianata.

²Xesosi ipinini apisa, oa Maria arokari Xesosi kiti kamariãroã, oiãkoã kaxipota otxari. Oa Maria itari Arásaro amianata. ³Iua amianatakasaaki, Maria, Mata pakini iokanapireta Xesosimoni:

—Apiananiri, pitiretakiti amianata —otxari.

⁴Ninoa iokanapirena ikenakotakasaaki, iua txa:

—Amianari inokari Arásaro kona ipinini ïkapanini. Teoso posotiire oerekini ïkapanira iua amianari inokari iua. Kãkiti: “Teoso ãkiri peerekari” iniko ïkapanira iua amianata.

⁵Xesosi taretari Mata, oĩtaro Maria, Arásaro pakini.

⁶Ikenakotakasaakiri Arásaro amianatini, iua napapanikari ipi õti iuaxiti. ⁷Eereka itxana imoianariakori:

—Iuaĩkana Xotéia tõpa masa.

⁸Ininiã imoianariakori:

—Koerekareri, kitapani iuaã Xoteoakori nirekari kai soroã ikiporonakinii pite. Iuaritika pisatapanikako iuaãtaã? —itxarina.

⁹Ininiã Xesosi:

—Pokamara tosi oara aua kãkiti parĩkauatini ìkapani. Pokamara tĩpokotakari kona mãkitita, kotxi atokatxi iopinikari ikinipoko.
 10Txamari ìkanõka tĩpokotakari mãkitita, kotxi atokatxi kamara !auari.

11 Ininiã Xesosi:

—Amoianari Arásaro imakanãta. Nota õpirĩkariko iua —itxa Xesosi.

12 Ininiã Xesosi moianariakori txa:

—Imakanãtiniã, erekaãpokekari uatxa —itxana.

13 Xesosi imarotari Arásaro ipinini, txamari imoianariakori uãkatari Arásaro atão imakini.

14 Ininiã Xesosi txana ninoa atão imarotinina ìkapani:

—Arásaro ipĩpe. 15 Erekapitikari iuaã nimauakani, kotxi eereka hĩte auikariko nota sãkire. Masa iuaxiti. Maõkitari iua —itxa Xesosi.

16 Tomee Txítximo inakori misãkiretana apanakini Xesosi moianariakori:

—Masa iuakata apinini tĩkane.

Ikara atoko itxa isãkire, kotxi iuaxiti Xoteoakori nirekari okiniri Xesosi.

Kãkiti Auãki Inĩkitaãkari

17 Xesosi apokasaaki iuaxiti ipi ipi pakini õti napapeka. Ininiã iuasaaki Arásaroni katapeẽkaika. 18 Petãnia Xerosareẽ takote.
 19 Apanakini kãkiti apoka Mata, Maria pakinimoni. Ninoa moianatana, kotxi itarina !auaika.

20 Mata kenakopiretari Xesosi apokaãpotini. Ininiã oa sari oaõkitiniri ìkapani. Maria kaikota oaãpoko ãki.

21 Xesosimoni Mata apokasaaki, otxari iua:

—Apiananiri, pite uai auaãkamako, kona nitari ipinamako.

22 Iuaritika nimarotapitikari, pamanaãkiti Teoso sikapitikai —otxa.

23 Ininiã Xesosi txaro:

—Pitari iuaĩkana auapanikako.

24 Ininiã Mata:

—Nimarotari itixi xipokini õti nitari iuaĩkana auapanikako. Ipĩkani õkitikinua õti, iua õkitikaua —otxa Mata.

25 Ininiã Xesosi sãkirauata:

—Nota ipĩkari õkitikakarirano nota. Kãkiti auãki inĩkitaãkarirano nota. Nota sãkire auiãkari ipininiã, iuaritika iuaĩkana auapanikako. Kona ipinaika. 26 Nota sãkire auiãkari auapanikako iuaĩkana. !Pinaikako. Pauikatari ikara atoko nininii? —itxa Xesosi.

27 Ininiã Mata:

—Apiananiri, nauikapitikari. Teoso mereêkiti pitxaua. Teoso âkiri pitxaua. Teoso iokanatakiti itiximoni îkari pitxaua. Ikara nauikapitika —oa txari iua.

Xesosi Txiapatini

28 Eereka Mata sari oïtaromoni. Oâkiritaro oa, mapara omisâkiretini îkapani.

—Koerekareri apope. Iua akiritai —otxa Mata.

29 Maria kenakotari ikara inakasaaki, katimariã ôkitikaua, iuamoni sa otxa oa. 30 Iuasaaki Xesosi !apokapanika aapokotxiãtaã. Ikaikotapanika mitxi Mata apokiniãtaã. 31 Maria katimaritika ôkitikasaakiua, Xesosimoni osini îkapani, Xoteoakori, oaãpoko âki auakani, oa mîkapiritakani, sari oa tikini. Ninoa uâkatari akauarimoni osini otxiapatini îkapani.

32 Maria apoka Xesosimoni. Oâtamatakasaakiri iua, iua apisatoõ okapotoreêkua. Otxari:

—Uai pauaâkamako, kona nitari ipinamako —otxa.

33 Xesosi atamataro otxiapatini. Xoteoakori oakata apokakani txiapata apaka, ininiã Xesosi iteene matinaniuata âkixinireẽ. 34 Iua pimaãna:

—Nanipa hîkatatari? —itxa.

Ininiã ninoa:

—Apiananiri, masa. Patariko iuaã —itxana.

35 Iuasaaki Xesosi txiapata.

36 —Hâtamatari Xesosi. Iua tiretapitikari Arásaroni —itxa Xoteoakori.

37 Âtikaka Xoteoakori txa:

—Mõsiãreti kõiãrepeka itxîkitakapeka. Atxiïti iua uai apokaâkamako, kona Arásaro ipinamako —itxana.

Xesosi Ôkitikiniri Arásaroni

38 Ininiã Xesosi iteene matinaniuata âkixinireẽ. Iuasaaki isa akauarimoni. Ninoa takari ipîkari kai auîte âki. Kai auîte itotaãka.

39 Ininiã Xesosi txari:

—Himakatxakari akauari tore —itxa.

Mata, Arásaroni itaro txari Xesosi:

—Apiananiri, ipaiakapeka. Ipi ipi ôti pakinipeka ikatiko, ininiã pataparasakari —otxari Xesosi.

40 Ininiã Xesosi:

—Nota sãpiretapekai: “Nota sãkire pauikiniã, pitikariko Teoso posotiire” —itxaro.

⁴¹Ininiã imaktxakarina kai. Iuasaakipeka Xesosi ionakaãta iaxiti.

—Niri. Erekaï, kotxi pikenakotari nisãkire. ⁴²Nimarotari ätipirika pikenakotiniri nisãkire. Ikara atoko nitxa sãkireta kãkiti uai auakani kenakotiniri ïkapani, kotxi ninirekari ninoa auikiniri pite iokanatinino nota uaimoni —itxa.

⁴³Ikara atoko inaãka atoko akirikatari:

—Arásaro, pökítikaua. Pipokïka.

⁴⁴Ininiã iuasaakipeka Arásaro pokïka. Imakinika iïto mãkatxi mataã iapirikaãka. Itoõ apaka iapirikaãka mãkatxi mataã.

Ininiã Xesosi:

—Himaktxakari iapirikiko.

Xesosi Okaenetiko Pirena

(Mateo 26.1-5; Marko 14. 1-2; Arókasi 22.1-2)

⁴⁵Xoteoakori Mariamoni ïkani itikari ikara atoko inakari, ininiã auikarina Xesosi Teoso äkiri ininiu. ⁴⁶Ätikaka Xesosi kamakiti itikakani kanapiriã pariseoakorimoni. Isãpiretana Xesosi ökitikiniri Arásaro. ⁴⁷Ininiã pariseoakori, sasetotxi auïteakori pakini apotiitaua. Imisãkiretakakana:

—Kiripa ate kama? Ia kiki kamari itori posotiiretxi.

⁴⁸Aãuiritiniãri iua ikara atoko ikamini, ikinipoko kãkiti auikari iua sãkire. Ininiã iua tikini isana. Ikara atoko ininiã, Homanoakori xipokari Teoso misãkiretiko aikoti ate nakiti, ate tixine apaka —itxana.

⁴⁹Iuasaaki Kaipasi inakori sasetotxiakori auïte apiatakari inakari iua. Itxana:

—Hïte kona kimarorepanikai. ⁵⁰Erekari äti kiki ipinini ikinimane mapinakani ïkapani. Ikara atoko ininiã, kona ikinipoko anirimane ipinako —itxa Kaipasi.

⁵¹Ïkorakanani sasetotxi auïte apiatakari itxaua Kaipasi. Ia atoko itxa: “Xesosi ipinako Xoteoakori mapinakani ïkapani. ⁵²Kona ninoa ïkapaninanini ipinako. Teoso anaakori iarikakani ïkapani apaka ipinako. Ininiã iuasaakirako iua apotiitari ikinipoko ninoa. Ininiã Teoso anaakori itxauanako,” itxa Kaipasi sãkire.

⁵³Iuasaaki eereka imapapiretarina Xesosi okinina tïkane.

⁵⁴Ikara atoko ininiã, Xesosi kona saika Xotéia töpamoni. Isari

Eparaĩ sitatxitimoni, ãparaã makipakaniãtaã takote. Iuaã ikaikota imoianariakorikata.

⁵⁵Iuasaaki imatokoãpotarina Páskoa kiiniriti. Iuasaaki itomaneri Xoteoakori Xerosareẽ tãpa auakani sari Xerosareẽ sitatxitimoni. Iua kiiniri apisapanika, isana iuaã oerexiniretiniuana ìkapani. Iuasaaki amanaãrina Teoso imakatzakiniri maerekati ikamakitina.

⁵⁶Iuaã Xoteoakori nitari Xesosi. Ninoakakarika ipimaãkakana:

—Atauako kiinirimoni inapani atxiĩti?

⁵⁷Sasetotxi auĩteakori, pariseoakori pakini paniãtapekari kãkiti:

—Himarotakasaakiri Xesosi auiniãtaã, hĩsãpiretauako ate, ininiã amaĩkariko iua.

Maria Takari Kamariãro

Xesosi Kitiã

(Mateo 26.6-13; Marko 14.3-9)

12 ¹Seisi õti Páskoa kiiniriti apisa, Xesosi sari Petãnia sitatxitimoni. Iuaã aua Arásaro, Xesosi õkitikakiti Arásaro ipíkasaaki. ²Iuaã ikamaãka nipokori Xesosi ìkapani. Mata sikari nipokori kãkitimoni. Iuasaaki Arásaro apanakinikata topãka Xesosikata. ³Iuasaaki Maria kosekaro kamariãro koana. Oia atão nato kamakoro. Ipixini kiro ominani aua. Kona koketakoroni. Natonokara. Pakaronero, iuaritika okitakaro Xesosi kitimoni. Oiãkoã okaxipokari. Iuasaaki aapokotxi ãki omarinokara itxaua.

⁴Txamari Xotasi Isikariotxi inakori !apokaerekatari kamariãro Xesosi kitiã okitakini. Iua Xotasi Simão ãkiri. Xesosi moianari itxaua, txamari imĩkapiritariko Xesosi.

⁵Ininiã Xotasi txari:

—Kãkiti parĩkauata tresẽtosi pakini õti oia atoko inakaro kamariãro iamotiko ìkapani. Kinirepa kona ovẽtxitaãka? Kinirepa txineiro mauakinitimoni !osika? —itxa Xotasi.

⁶Ikara atoko itxa, kotxi kiĩtiriri itxaua. Iua nĩkataro ninoa txineirote. Iua itotapekari txineiro iĩtirĩkini. Iua !imaãkatana txineiro mauakiniti.

⁷Xesosi apakapapiretari:

—Kona hĩtxitapero Mariapani. Onĩkataro kamariãro ia õti notamoni otakini ìkapani, kotxi oxinikari nikatiko õti ìkapani.

⁸Minakati mauinakini auapikako hĩtekata. Txama nota !auaikako hĩtekata —itxa Xesosi.

Xoteo Auĩteakori Nirekari Okiniri Arásaro

⁹Itomaneri Xoteoakori kenakopiretakasaakiri Xesosi Petânia sitatxitiã auini, ininiã iuaã isana Xesosi aõkitinina ãkapani. Kona iuananini ninoa nireka aõkitinina. Arásaro Xesosi õkitikakiti apaka ninoa nirekari atamatinina. ¹⁰Ininiã sasetotxi auĩteakori nirekari Arásaro apaka okinina, kotxi kaiãopokori kãkiti auikari Xesosi sãkire Arásaro sãpiretakiti ikenakotakasaakina. Itakanaparina sasetotxiakori sãkire auikinina. ¹¹Arásaro iuaĩkana auiniã, ininiã itomaneri Xoteoakori asikaãpotari iauĩtena, Xesosi sãkire auikinina ãkapani.

Xesosi Xerosareẽ Apokaãpotini

(Mateo 21.1-11; Marko 11.1-11; Arókasi 19.28-40)

¹²Katimatinĩkata, itomaneri kãkiti Páskoa kiiniritimoni sikani, kenakopiretari Xesosi apokaãpotini Xerosareẽmoni. ¹³Ininiã Xerosareẽkini sari aõkitinirina iua. Kinari tape anikana, Xesosi apiãkatakasaakina. Akirikatana:

—Peerekari Teoso. Teoso takari erekari Isaeo auakani auĩtemoni, Apiananiri uãkaã ãkarimoni —itxana.

¹⁴Mitxipe Xesosi iokanatarari imoianariakori xomẽta ãkiri initinina. Ninoa apokasaakiri, iminarina Xesosimoni. Ininiã Xesosi topãka iua nopini. Iua nopini Xesosi sari Xerosareẽmonikari. Kitxakapirĩka Teoso sãkire iõkatsopatakori txari:

¹⁵Kãkiti Xerosareẽkini kona hĩpĩkarauatape. Erepani hĩauĩte.
Xomẽta nopini iitopãkako,
itxa Teoso sãkire kitxakapirĩka. Ikara iaõka apokapeka, kotxi Xesosi apoka xomẽta nopini.

¹⁶Iuasaaki imoianariakori kona xinikari Teoso sãpiretakiti kitxakapirĩka auakari. Xesosi ipinaka atoko, õkitikaãkaua atoko, iuasaakiika ninoa xinikari ikara Teoso sãkire. Ininiã iuasaakiika imarotarina Teoso sãpiretakiti.

¹⁷Mitxi kãkiti akauari takote auakani, ninoa itikari Xesosi õkitikiniri Arásaro. Ninoa iaripiretari Xesosi kamakiti. ¹⁸Ininiã kãkiti apiãkatari Xesosi, kotxi ninoa kenakoenetapekari Arásaro õkitikini. ¹⁹Ininiã pariseoakori misãkiretakakaua:

—Hãtamata. Kiripa aposota akamini? Ikinimane kãkiti nirekari iua.
Ininiã pariseoakori xikotari Xesosi.

Ātikaka Krekoakori Nitari Xesosi

²⁰Ātikaka Krekoakori apoka Xerosareēmoni Páskoa kiiniriti ĩkapani, kotxi ninoa nirekari Teoso imisākiretinina. ²¹Apokasaakina iuaātaā, isana Piripimoni. Iua Petsáita aapokotxitikiri, Kariréia tōpa auakari. Ininiā apokasaakina Piripimoni, ipimaārina:

—Ate nirekari Xesosi aaōkitini.

²²Ininiā Piripi sari Ātreemoni, isāpiretiniri ĩkapani. Eereka isana Xesosimoni. ²³Ininiā apokasaakina, Xesosi txana ninoa:

—Kaiamapekari nota hītari iaxitikiri sini niri tixinemoni ikinipoko erekari napakapini ĩkapani. ²⁴Atāo nisāpiretai. Nota kimi oki atoko. Kākiti matakakaniāro oa, ātika okinoka auapika. Pitakiniāro, opitxaka. Ininiā kaiāori oki aua. Ikara atoko nota. Nimapĭkaniā, ininiā notanokara auari. Nipininiā, ininiā itomaneri kākiti sari niri tixinemoni. ²⁵Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, pite auapininiika txako Teosokata. ²⁶Kākiti nirekiniāri iparĭkauatini nota ĩkapani, imoianatanoko. Iua atoko ininiā, nota auiniātaā iua apaka auako. Kākiti parĭkauatiniā nota ĩkapani, ininiā niri paxitariko iua.

Xesosi Sāpiretari Ipinini

²⁷Xesosi misākiretari Teoso:

—Uatxa kona erekaxinireno, ininiā kiātokopa nitxa nisākire pitemoni? Atxiīti nipaniātai: “Niri, pimakatxakinanoko nimapinakani ĩkapani.” Ikara atoko !nipaniātai, kotxi nipinini ĩkapanira napoka ĩkorapokoritimoni. ²⁸Ininiā niri, poerekari kākiti ikinimane auīte pininiāua —itxa Xesosi.

Iuasaakipeka iaxitikiri txari:

—Noerekapekari kākiti ikinimane auīte nininiāua. Eereka iuaĭkana noerekapanikariko ikara —itxa Teoso.

²⁹Kākiti iuaātaā auakani kenakotari iaxitikiri sākire. Txamari itxana:

—Ikarokirauata.

Apanakini txari:

—Teoso nitirira sākirauata iuakata —itxana.

³⁰Xesosi txana ninoa:

—Ikara sākirauata kona nota ĩkapanini. Hĭte ĩkapanira isākirauata. ³¹Iposope ikini itixiti auakani misiritiko imaerekanina

xika. Iposope ikini itixiti auakani auíte Satanasi inakori xipokiko.

³²Nota aamina ipiriãmitakari nopini nõkitikikosaaki, iusaaki nikosekanako kãkiti notamonikari.

³³Ikara atoko itxa, kãkiti imarotiniri aamina ipiriãmitakari nopini ipinini.

³⁴Apanakini kãkiti apakapapiretari:

—Teoso sãkire kitxakapirĩka iõkatsopatakori oerekaua Teoso mereẽkiti atipirika auini. !Ipina. Txamari pite sãpiretaua ipinini aamina ipiriãmitakari nopini? Kipa iua aĩtari iaxitikiri pisãpiretakiti? —itxana ninoa.

³⁵Ininiã Xesosi:

—Tirikapi kamara atoko nitxa. Hĩtekata nauakasaaki, noerekai hĩte atão inakari. Uatxa tirikapi kamara hĩtekata auapanika. Paĩtiki nota sipe. Tirikapi auakasaaki, pauapikako tirikapi kamaraã. Ininiã ipiã kona apoka hĩtemoni. Kãkiti mauikakaniãri nota sãkire, iĩkanõka tĩpokotakani atoko itxana. !Imarotarina isinimonina.

³⁶Tirikapi hĩtemoni auakasaaki, hãuikariko iua sãkire. Ikara atoko ininiã, “pokamarari anaakori” hĩtxaua —itxa Xesosi.

Ikara atoko inaka atoko isipeka. !Isãpiretari isinimoni.

Xoteoakori Kona Auikari

Xesosi Sãkire

³⁷Xoteoakori itikari ikinipoko posotiiretxi Xesosi kamakiti.

Iuaritika kona ninoa auikari iua sãkire. ³⁸Ikara atoko ininiã, kitxakapirĩka Teoso sãkire sãpiretakari Isaía inakori iõkatsopatakiti, iusaaki apopeka. Isaía txari:

Apiananiri, kãkiti !auikapiretari asãkire ninoamoni

asãpiretakiti. !Auikari piposotiire poereẽkiti ninoamoni, itxa Isaía. ³⁹Iua atoko ininiã, Xoteoakori kona posotari auikiniri Xesosi sãkire, kotxi iuaĩkana Isaía txari:

⁴⁰Teoso mõsiãretakana ninoa. Kaikokii itxĩkitakana. Itikakitina kona iĩkitetana ninoa. Ikiãna kona !imarotarina. Ininiã ninoa kona apokapaniko notamoni erekapeka ininina nitxĩkitakini iĩkapani, itxa Teoso Isaía iõkatsopatakitiã.

⁴¹Kitxakapirĩka Xesosi uai apokini apisa Isaía iõkatsopataria ia sãkiretxiti. Iusaaki Teoso oerekari Isaía Xesosi posotiire, apaka iĩkinika Xesosi kamakiti tĩkane.

⁴²Iuaritika itomaneri Xoteo auíteakori auikari Xesosi sãkire. Txamari lisãpiretarina apanakini, kotxi ninoa pĩkari pariseoakori. Pariseoakori imarotakasaakiri Xesosi sãkire auiãkani ininiuana, !auritaikana ninoa ãroini aiko Xoteoakori apotiitiniãtaãua. ⁴³Iua atoko ininiã, ninoa apia nirekari kãkiti iuikinina. Poiãoka ninoa nirekari Teoso iuikinina.

Xesosi Iuaĩkana Sãkirauata Xoteoakorimoni

⁴⁴Xesosi itapasãkireritika txari:

—Kãkiti auikiniãri nota sãkire, kona nota sãkirenanini ninoa auika. Niri sãkire apaka auikana, kotxi iua iokanatano nota uaimoni. ⁴⁵Natamatakiri apaka atamatari niri. ⁴⁶Tirikapi atoko nitxa nĩkasaaki kãkitimoni. Nota sãkire auiãkani kona kaikota ipiaã. ⁴⁷Kãkiti nisãkire kenakotakani mauikakaniãri nisãkire, kona nimisiritari iua imaerekani xika. Kona kãkiti nimisiritini ãkapanini nina uaimoni. Nina kãkiti maerekani nimaktxakini ãkapanira.

⁴⁸—Nota manirekakati, nisãkire manirekakati apaka, auapeka imisiritiko mereẽkari. Nisãpiretakiti, iuarako itixi xipokini õtisaaki sãpiretari imisiritiko.

⁴⁹—Notaka sãkire !nisãpiretai. Niri sãkirera nisãpiretai. Niri iokanatano nota uaimoni. Iua paniãtakiti isãpiretakiti nisãpiretai hĩte. ⁵⁰Nimarotari kãkiti auikiniãri niri paniãtakiti auapininiika itxako. Nota sãpiretari niri sikapiretinino iaõka.

Xesosi Arokari Imoianariakori Kiti

13 ¹Pãskoa inakori kiiniriti apisapanika, Xesosi imarotari paĩtiki itixi itakanapini irimoni isini ãkapani. Iua tiretapikana kãkiti iua nakiti. Ninoa itiretiniritika ipinako Xesosi.

²Xesosi imoianariakorikata inipokotini apisapanika Satanasi sikanireõtapekari Xotasi Isikariotxi Xesosi imĩkapiritini ãkapani. Iua Xotasi, Simão ãkiri. Eereka inirekari isikiniri Xesosi imokaiakarimoni.

³Xesosi imarotapekari iri sikiniri ikinipoko posotiiretxi Xesosimoni. Imarotapekari Teosomoni ipotorikini. Imarotapekari iuamoni ãkapaniriini. ⁴Iuaritika inipokotaka atoko, õkitikaua. Imaktxakari imãka inopini auakari. Eereka ipomakitari mãkatxi mata nitiritxi parĩka atoko ikamini ãkapani. ⁵Eereka itakari ãparaã tiitxi ãki. Ininiã arokana imoianariakori kiti. Eereka mãkatxi mataã ikaxipokaãpotana.

⁶Simão Petro takote apokasaaki, Petro txari:

—Konapitini, Apiananiri. Ninitiri !pitzaua. Ininiã kona parokapiri nikiti —itxari.

⁷Ininiã Xesosi:

—Uatxa kona pimarotari nikamakiti. Pimarotariko ãti õti.

⁸—Koniko pite arokapaniri nota kiti —itxa Petro.

⁹Ininiã Xesosi:

—Pimauiritakaniãno pikiti narokini, ininiã kona nimoianari pitxaikauako —itxa Xesosi.

⁹—Ikara atoko ininiã, kona nikitinani paroka. Niuako, nikii, imakinika paroka —itxa Petro.

¹⁰Ininiã Xesosi:

—Kãkiti kipaãtakaniua poirepe itxana. Itipokotakasaaki, iuaãkana itxiko apoka iuamoni. Iuasaaki ikitinokara arokaãka. Hite himakinika poirepeka, kotxi nimaktxakapekari himaerekani. ãtinokara kona poireri, kotxi imaerekani auapanika.

¹¹Xesosi imarotapekari iua mĩkapiritakari, ininiã itxa: “Himakinika poirepeka. ãtinokara kona poireri,” itxana.

¹²Ninoa kiti arokaãka atoko, ieretakari imãka inopinikiri. Ikanapiriã amesamoni. Ipimaãna:

—Kinirepa narokatari hĩkiti? ¹³Hite akiriuãkatano nota “koerekareri.” Apaka hãkiriuãkatano “Apiananiri.” Atãopitikara hĩsãkire, kotxi ikara inakari nitxaua. ¹⁴Hĩauite, hõereẽkiri nitxaua. Iuaritika narokari hĩkiti. Hinitiri atoko niparĩkauata. Ininiã hãrokakititakauako, kãkiti nitiri atoko hininiua. ¹⁵Noerekapekai hite erekari hĩkamini. Uatxa hĩkamariko nota kamakiti atokokana. ¹⁶Atão inakari nitxai. Nitiritxi iamotakori poiãori. Iauite apiari. Apaka kãkiti iokanatakari apiata. Iokanatakiti poiãori. ¹⁷Uatxa hite imarotari atão inakari hĩkamini. Hĩkaminiãri, hĩpoxokoniuata.

¹⁸—Kona himakinikani ikara atoko nitxai. Nimarotari nimereẽkini, txamari ia Teoso sãkire iõkatsopatakori iaõka apokapitikako. Itxari:

Notakata komiri nikakari, iuakarako kamari maerekati notamoni. ¹⁹Uatxa iua himarotini apisapanika nisãpiretai hite. Ininiã nisãkire iaõka apokasaaki, himarotariko Teoso ãkiri nininiua nota. ²⁰Atão inakari nisãpiretai. Kãkiti nota iokanatakiti hitemoni hãpakapiniã, nota apaka hãpakapa. Hãpakapiniãno nota, hãpakapari apaka nota iokanatakari hitemoni —itxa Xesosi.

Xotasi Mīkapiritiniri Xesosi

(Mateo 26.20-25; Marko 14.17-21; Arókasi 22.21-23)

- 21 Xesosi ikara isāpiretaãka atoko, ākixinireē imatinaniuata. Itxana: —Ari, ātikara hīte sauaki mīkapiritano nota.
- 22 Ininiã imoianariakori atamatakakaua.
—Kiripa ikara atoko txatako? —itxana.
- 23 Iuasaaki Xesosi moianari itiretakiti papīkaītota iuamoni.
- 24 Ininiã iuasaaki Simão Petro ieki itxa isona iuamoni. Ininiã Petro: —Pipimaãri iua: “Īkiripa ikara atoko txatariko iua?” —itxari.
- 25 Ininiã Xesosi tiretakiti pimaãri Xesosi:
—Kiripa ikara atoko txatai? —itxari.
- 26 Ininiã Xesosi:
—Komiri niākakiti nisikakitikarako ikara atoko txanoko.
Ininiã iuasaaki iākari komiri. Eereka isikari Xotasi Isikariotximoni. Iua Xotasi Simão ākiri. 27 Xotasi komiri inikasaaki, Satanasi ĩroã ixiniremoni. Ininiã Xesosi txari Xotasi:
—Kinirāo kamaka pinakiti pikamapoka —itxari.
- 28 Iuaã auakani ākixinireē:
—Kinirepa ikara atoko itxatari Xotasi?
- 29 Xotasi nīkataro ninoa txineirote. Ininiã ninoa ākixinireē:
—Atxiīti iokanataru iua komiri iamotini ĩkapani.
Ātipekana:
—Atxiīti iokanataru iua matiinimoni txineiro isikini ĩkapani — itxanātana ākixinireēna.
- 30 Komiri apakapaãka atoko, inikaãka atoko isipe Xotasi. Mapiãpe inakasaaki.
- 31 Xotasi sipeka inaãka atoko, Xesosi txana ninoa:
—Uatxa kākiti itikariko kākiti itari iaxitikiri posotiire. 32 Kākiti atamatariko Teoso posotiire imimoni auakari. Ininiã Teoso txari: “Erekapitikari namarite.” Iuasaaki Teoso oerekari kākiti iua apokaerekatiniri imi. Ikara atoko ininiã, oerekari imi ereka inini.
- 33 —Nitiretakini, paītkinoka nauini hītekata. Eereka hinitapiimano nota, txamari nota sinimoni kona hīposotari hīsini. Ikara atoko nitxapekana Xoteoakori. Iuatxikana uatxa nisāpiretai hīte. 34 Ininiã uatxa nisāpiretaiko hīte Teoso paniātakiti amaneri: “Hītiretakakaua, nota hīte nitiretini atokokana.” 35 Ikara atoko hīkaminiã, ikinimane imarotariko nota moianariakori atão hininiãua.

Xesosi Sāpiretari Petro

Kipatiniri Iua

(Mateo 26.31-35; Marko 14.27-31; Arókasi 22.31-34)

³⁶Simão Petro pimaãri:

—Koerekareri, nanipa pisatako?

Xesosi apakapapiretari:

—Nota sinimoni kona uatxa apakata hīsini. Āti ōtirako hīsa hīte.

³⁷Iuaĩkana Petro:

—Apiananiri, kinirepa kona pitekata nisa uatxa?

Nipinapitikamako pitekata —itxa Petro.

³⁸—Atāopitikani notakata pipinini pinirekaka? —itxari.

—Atāo nisāpiretai. Ia ĩkanōkati patari sākirauatini apisapanikako, “!Nimarotari iua,” pitxanoko ipi āti pakinikata —itxa Xesosi.

Xesosi Pinitari Imoianariakori

14 ¹—Kona himatinaniuatape. Kona himaãkapeua. Hāuikariko Teoso sākire. Apaka hāuikariko nota sākire. ²Niri auiniātaā aua kaiāopokori aapokotxi. Ikara atoko iminakanimako, nisāpiretapiimaiko hīte. Iuaã nisa hāuiniātaā nikamini ĩkapani. ³Iuaã nisa hāapoko nikamini ĩkapani. Eereka nikanapiriã. Nanikai hīte notakata hāuini ĩkapani. Ininiã hīte apaka aua nota auiniātaā. ⁴Hīte imarotari nota sini kimaporiti —itxa Xesosi.

Teoso Kimapore Itxaua Xesosi

⁵—Kona aimarotari pisinimoni. Natokopa ininiāpa aimarotatari pite sini kimaporiti? —itxa Tomee.

⁶Ininiã Xesosi txari:

—Teosomoni sikari kimaporiti nitxaua. Atāonoka nisākire. Atāonoka nikamakiti. Nitxīkitakari kākiti auapininiika inini. Notamoni apokakarinanira sari nirimoni. ⁷Atāo nota himarotiniã, ininiã himarotariko niri apaka. Uatxa himarotapekari iua. Hātamatapekari iua —itxa Xesosi.

⁸—Apiananiri, poerekari piri atemoni. Ikaranoka anireka —itxa Piripi.

⁹Ininiã Xesosi:

—Piripi, kona mixaikani hītekata nauama nota, iuaritika kona himarotapanikano nota? Nota aōkitakari, aōkitapekari niri. Kinirepa, “Piri poerekaua,” pitxa? ¹⁰Kona pite auikapanikari niri auini nota āki? Nota apaka aua niri āki.

—Hītemoni nisāpiretakiti kona nota sākirenanini. Niri paniātakitira. Niri nota āki auakari iuara kamari ikinipoko nikamakiti. ¹¹Hāuikariko nisākire niri āki nauini. Niri nota āki auini apaka hāuika. Himauikakaniāri nisākire, ininiā hāuikari nikamakiti. ¹²Atāo nisāpiretai. Nota sākire auiākani kamariko nota kamakiti atokokana. Apaka ninoa kamakiti apiata, kotxi nirimoni nisako. ¹³Nota uākaā hamanaākiti nota sikai hīte. Ikara atoko ininiā, oerekaāka niri ereka ininiua. ¹⁴Ikinipoko nota uākaā hamanaākiti, nota sikapitikai hīte. ¹⁵Nota hītiretiniā, hīkamariko nipaniātakiti —itxa Xesosi.

Erekari Matamatakoti Apokaenetini

¹⁶—Namanaāriko niri āti kōtākikarereri iokanatini hītemoni. Iuakara auapininiika txako hītekata. ¹⁷Iua Erekari Matamatakoti atāonani ina sākiretakari. Kākiti Teoso sākire mauīākani kona apakapari iua, kotxi kona atamatarina iua. Apaka kona imarotarina iua. Hītepekana imarotari iua, kotxi hītekata aua. Iua aua hīte ākixinireē.

¹⁸—Ininiā kona nitakanapai hīte. Nikanapiriāpanikako hītekata nauini ikapani. ¹⁹Paītiki atoko kākiti ikoraxiti auakani kona atamataikanoko nota. Hīte atamatanoko. Hīte auapanikako, kotxi nota apaka auapanikako. ²⁰Iuaīkana auapanika ninakasaaki, himarotariko niri āki nauini. Hīte apaka auako nota ākixinireē. Nota aua hīte ākixinireē apaka. Txapaniko.

²¹—Iua nisākire auiākarira nipaniātakiti kamakarira tiretano nota. Nota tiretakari niri tireta. Nota apaka tiretari iua nitiretakiri. Ikara atoko ininiā, noerekariko apikomoni nisākire iuamoni.

²²Āti Xotasi, kona Xotasi Isikariotxi inakorini, txari Xesosi: —Kinirepa atenani poerekari Teoso ākiri pininiua? Kinirepa kona poerekari ikara apanakinimoni? —itxa.

²³Xesosi apakapapiretari:

—Kākiti tiretiniāno, ikamari nisākire iaōka. Niri tiretariko iua. Niri, nota pakini apokako iuamoni. Iuakata aūako. ²⁴Nota matiretakani kona nīkatari nisākire. Nisākire hīkenakotakiti kona nota sākireni. Niri niokanatakiri sākirera.

25—Hĩtekata nauakasaaki, ikara sãkiretxi nisãpiretai. 26Niri iokanatariko kõtãkikareri, Erekar Matamatakoti inakori hĩtemoni. Erekar Matamatakoti oerekaiko hĩte ikinipoko niuãkaã. Himaxinĩkaretakiti iuaĩkanako iua oerekaiko. Ikinipoko nisãpiretakiti oerekaiko.

27—Nisini apisapanika nikamaerekaxiniretai. Nota xinire ereka inini atoktxikana nikamaerekaxiniretai. Nisãkire mauiãkani kona posotari kamaerekaxiniretiniri ãti nota kamaerekaxiniretini atoko. Kona himaãkapeua. Kona hĩpĩkarauatape. 28Hĩte kenakotapekari nisãkire ia atoko nininii hĩte: “Nisapitikako, iuaritika nikanapiriãpanikako hĩtekata nauini ĩkapani.” Hĩtiretiniãno, hĩpoxokoniuata nirimoni nisini ĩkapani, kotxi poiãori nitxaua nota. Apiatakari itxaua niri. 29Ikara nisãpiretakiti apokini apisa nisãpiretai hĩte. Ikara nisãpiretakiti iaõka apokasaaki, hĩte auikari nisãkire. 30Apikomoni iteene nisãpiretinii !apakata. ĩkorapokoriti auakani auĩte Satanasi inakori paĩtiki apokako notamoni, iuaritika !posotari itxĩkitakinino ipaniãtakiti nikamini. 31Iteene ninirekari imakinika kãkiti imarotiniri nitiretiniri niri. Apaka nikamari ikinipoko niri paniãtakiti —itxa Xesosi.

Eereka Xesosi txari:

—Maõkitikaua. Masipeka.

Xesosi Atão Itĩkaretsa Itxaua

15 1Ininiã eereka Xesosi txari:

—Atão itĩkaretsa nitxaua nota. Itĩkaretsa nĩkatakari itxaua niri. 2Isauakaro otsa marito, kotxi kona kariro oa. Otsa iriuatakaropekana iua kisauakaro omapotõkirenoka, iteene oriuatini ĩkapani. 3Hĩte poirepeka hĩtxa. Nisãkirenanira oeretai hĩte. 4Okanotsa atokokana hĩtxaua. Nota itĩkaretsa atoko nitxaua. Ininiã hĩpitxaka notamoni. Ikara atoko hininiã, hĩkaikota notakata. Ininiã nota kaikotapika hĩtekata. Ikara atoko hininiã, hĩriuatapitika. Ikara atoko hininiã, erekarinanira hĩkama. Hĩriuatinĩã, ininiã erekari hĩkama. Notamoni himapitxakakanĩã, kona hĩposotari hĩkaminiri erekari. Kona hĩriuata, kotxi nota tapara !apokari hĩtemoni. !Karii hĩte. Okanotsanoka auiniã, kona kariro. Notakata hãuapininiika hininiã, amãtiiru auapitika.

5—Nota itĩkaretsa nitxaua. Hĩte nikanotsa hĩtxaua. Notamoni pitakakari ãtipaniriko oripaniko. Notakata himauakaniã, kona xapitiki kona hĩposota hĩkamini. 6Nota sãkire mauiãkati okanotsa ipinakari

atoko itxa. Txiarokakari atoko itxa. Kākiti apotiitari okanotsa ipinakari. Eereka okari xaminaā arikini ĩkapani. Iua atokokana aĩri Teoso misiritari isākire mauiākani. ⁷Notamoni hĩpitxakiniā, hĩkenakotiniāri nipaniātakiti, hinirekaākiti hamanainiāno, ininiā nisikapitikai hĩte. ⁸Ito hĩriuatiniā, kākiti txariko niri: “Peerekai.” Hĩte iriuatiniā, ininiā hĩte atão oerekariko apanakinimoni atão nimoianariakori hininiua.

Hĩtiretakakiniua Pirena

⁹—Niri tiritinino atokotxikana, nitiretai hĩte. Kona hĩtakanapapiri nitiraōki. ¹⁰Hĩkĩpitiniāri nisākire, ininiā nitiraōki kaikotapika hĩtekata. Nota atokokanerako hĩtxako. Nota kĩpitari niri sākire, ininiā niri tiraōki kaikotapika notakata.

¹¹—Ikara atoko nitxai hĩte, nipoxokoni hĩtemoni kaikotini ĩkapani. Ikara atoko ininiā, poxokonitxi xāpokako hĩxiniremoni. ¹²Ia nipaniātakiti: “Nota tiritinii atokotxikana, hĩtiretakakauako.” ¹³Pipininiā pimoianariakori mapinakani ĩkapani, ininiākara iteene pitiretana ninoa. Ikara tiraōkitxi apiatakari. ¹⁴Nipaniātakiti hĩkaminiā, atão nimoianariakori hĩtxaua. ¹⁵Uatxa !nixinikaikari nitiritxi hininiua, kotxi nitiritxi kona imarotari iauĩte xinikakiti. Uatxa atão nimoianariakori hĩtxaua, kotxi ikinipoko niri oerekakiti nisāpiretapekai hĩte. ¹⁶Kona hĩteni mereēno nota. Notara mereēi hĩte hĩriuatini ĩkapani. Ninirekari hĩriuatini. Ninirekari kākiti nota sākire hĩsāpiretakini txipokori maxipokakati atoko ininina. Ikara atoko ininiā, hamanaāriko niri hinirekakiti nota uākaā, ininiā niri sikapitikai hĩte. ¹⁷Ia nipaniātai hĩte hĩtiretakakiniua.

Xesosi Moianariakori Omanatakani

¹⁸Iuaĩkana Xesosi pinitari imoianariakori:

—Apanakini omanataiko hĩte. Ininiā hĩxinikariko ia nisākire. Merepitipanika ninoa omanatano nota. ¹⁹Teoso sākire himauikakaniā, Teoso sākire mauiākani tiretapitikai hĩte, kotxi ninoa atoko hĩtxa. Txamari ninoa nakiti !hĩtxaua. Hĩte kona ĩkoraxiti auakani !hĩtxaikaua. Nimereēpekai hĩte. Nimakatzakapekai ātiāo parĩkatxi hĩkamini ĩkapani. Iua xika Teoso sākire mauiākani omanatai. ²⁰Hĩxinikariko ia nisāpiretakiti. Nitiritxi poiāoka itxaua. Iauĩte apiatakari itxaua. Kākiti misiritiniāno nota, nota atokokanerako imisiritai hĩte apaka. Nisāpiretapekai hĩte. Nota sākire apamonĩkiniāna, ininiā hĩte sākirekanera ninoa apamonĩka apaka. ²¹Imisiritaina, kotxi

hĩte auikari nota sãkire. Himisiritaãkako, kotxi kona imarotarina niokanatakiri. ²²Nota uai mapokakaniã, nimasãkirauatakaniã, kona imarotarina maerekati ikamakitina. ²³Nota omanatakani apaka omanatari niri. ²⁴Niposotiire nikamakiti apanakini kona posotari ikamini. Noerekari ninoa niposotiire, ininiã uatxa maerekati auari ninoamoni, kotxi !auikari nota sãkire. Ikinika itikapekari posotiiretxi nikamakiti, iuaritika ninoa omanatano nota, niri apaka.

²⁵—Uatxa apopeka Teoso sãkire iaõka. Teoso sãkire iõkatsopatakori txari:

Maxikatiĩka ninoa omanatano.

²⁶Kõtãkikareri kona apokapanika. Niokanatariko nirikata auakari, Erekar Matamatakoti. Iua potorika niri auiniãtaã. Atã ene sãkiretakari itxaua. Isãpiretariko nota sãpiretakiti, nikamakiti pakini. ²⁷Ininiã hĩte apaka sãpiretariko nota kamakiti, nisãpiretakiti pakini apanakinimoni, kotxi merepitipanika nipotorikasaaki hĩte auapika notakata. Ininiã himarotapitikano nota.

16 ¹Xesosi sãkirauatapanika:

—Ikara atoko nitxai hĩte atão himarotini ĩkapani, ininiã kona hĩtakanapari nisãkire. ²Ãti õti Xoteo auĩteakori omitikenataiko hĩte aiko Xoteo apotiitiniãtaãua. Ãti õti apokapanikako ia nisãpiretakiti. Iuasaaki ninoa xinikariko hĩte okiko ereka inini. Ninoamoni hĩte okiko Teoso paniãtakiti iaõka. Txamari kona Teoso paniãtari ikara atoko inakari. ³Ikara atoko inakari ikamanako, kotxi kona imarotano nota, niri pakini. ⁴Ikara atoko nitxai hĩte, kotxi ikara atoko inakari apokasaaki, hĩxinikariko nisãkire. Merepanika nimoianatakasaakii, kona ikara atokoni !nitxai hĩte, kotxi nota auapanika hĩtekata —itxa Xesosi.

Erekar Matamatakoti Parĩka

⁵Xesosi sãkirauatapanika:

—Paĩtiki nisipekako niokanatakirimoni. Kona hĩpimaãpeno: “Nanipa pisa?” Kona hĩtxapeno. ⁶Ikara atoko nisãpiretapekai, ininiã uatxa kona erekaxinirei hĩte. ⁷Iuaritika nitxai hĩte atão nisãkire. Apiaerekata nota sini. Nota masikaniã, iua Kõtãkikareri kona apoka hĩtemoni. Nisiniã, niokanatariko iua hĩtemoni. ⁸Iua Kõtãkikareri apokasaaki, oerekariko ĩkorapokoriti auakani maerekani. Oerekariko Teosonoka txĩkitakiniri kãkiti atão inakari ikamini. Oerekariko kãkiti misiritiko imaerekani xika. Iua Erekar Matamatakoti oerekariko ikara atoko inakari.

⁹Iua oerekariko maerekati kākiti kamakiti, kotxi ninoa !auikarina nisākire. ¹⁰Iua oerekariko Teosonoka txīkitakiniri kākiti atāo inakarinoka ikamini, kotxi nota sipekako nirimoni. Nota !auaika uai noerekarauatini ikapani. Paītiki kona hīte atamataikanoko nota. ¹¹Iua Erekarī Matamatakoti oerekariko maerekati kamakani misiritiko, kotxi īkorapokoriti auakani auīte Satanasi inakori misiritiko mereeēkapeka.

¹²—Auapanika apikomoni nisāpiretakiti tīkane hītemoni. Txamari !apakata apikomoni nisāpiretinii, kotxi !himīteenekari apikomoni nisāpiretinii. ¹³Iua Erekarī Matamatakoti, atāoene sāpiretakari, iua īkasaaki, iua oerekaiko ikinipoko atāo sākiretxiti. Kona iua sākireni isāpiretaiko hīte. Iaxiti auakari sākirera, niri sākirera, isāpiretaiko. Isāpiretaiko hīte katana Teoso kamakiti tīkane apaka. ¹⁴Erekarī Matamatakoti oerekaiko ereka ninini, kotxi iua apakapariko nisākire, eereka isāpiretaiko hītemoni. ¹⁵Ikini sereti niri nakiti nota nakiti apaka. Ininiā nota txai hīte, “Erekarī Matamatakoti apakapariko nota nakiti. Ininiā eereka isikai hītemoni himarotini ikapani.”

Matinanitxi, Eereka Poxokonitxi Apoka Inini

¹⁶—Paītiki kona hātamataikanoko nota. Eereka iuaīkana hātamatanoko, kotxi nirimoni nisako —itxa Xesosi.

¹⁷Imoianariakori txanāta:

—Kiripa itxanāta Xesosi? “Paītiki kona hātamatanoko. Eereka iuaīkana hātamatanoko nota, kotxi nirimoni nisako.” Kiripitipa itxanāta Xesosi? —itxana imoianariakori.

¹⁸—Kirisaakipa apokatako ikara inaātakiti? Kiripa ikara isākire: “Paītiki,” Xesosi sākire atemoni? Ikara isākire kona ate imarotari xatiki —itxanātana.

¹⁹Xesosi imarotari ninoa nirekari ipimainiri iua. Ininiā Xesosi txana:

—Hīte nirekari hīpimainino nota, kotxi nisāpiretai paītiki kona hātaminino, eereka iuaīkana hātamatano. ²⁰Atāopitikara ia atoko nitxai hīte. Hītxiapatako. Himatinaniuatako. Iuasaaki apanakini kākiti īkorapokoriti auakani poxokoniatako. Himatinaniuatako, eereka hīpoxokoni apokapitikako.

²¹—Hīte sito atoko hītchauako. Sito oāuaenetanapanoka onakasaaki, oa omaākapekua. Imi auaka atoko, kona oxinikaikari otsii. Poxokope otxa, kotxi auapeka amarini. ²²Ikara atoko itxako hītemoni apaka. Uatxa kona erekaxinirei hīte. Iuaīkana

naõkitapanikaiko hĩte. Iuasaakirako hĩpoxokoniyatako. Iuasaaki kãkiti kona posotari ixipokiniri hĩpoxokoni. ²³ĩkora õti apokasaaki, kona hĩpimaãikano nota. Iuasaaki hamanaãri niri hinirekakiti nota uãkaã, ininiã iua sikai hamanaãkiti. ²⁴Uatxapiima kona hamanaãpanikari hinirekakiti nota uãkaã. Hamanainiãri, hãpakapapitikariko. Ininiã hĩpoxokoni apokapitikako hĩtemoni.

Imoianariakori Auikari

Xesosi Sãkire

²⁵—Mitxi niomaãtari ipixini nisãkire, kãkiti mimarotakaniri ĩkapani. Āti õti kona niomaãtaikari atão. Nisãpiretaiko niri iteene himarotini ĩkapani. ²⁶Iuasaaki hinirekakiti hamanaãno nota uãkaã. Kona nota amanaãri niri hinirekakiti isikinii. Hĩte amanainiãri, isikapitikai. ²⁷Niri tiretai hĩte, kotxi hĩte tiretano nota. Hĩte auikari iua iokanatinino nota uaimoni. Ininiã iua tiretapitikai hĩte. ²⁸Niri iokanatanano ĩkorapokoriti. Paĩtiki nitakanapari ĩkorapokoriti nirimoni nisini ĩkapani —itxa Xesosi.

²⁹Imoianariakori txari:

—Uatxa pisãkire atãoenepitika. Sãkiretxi piomaãtakiti kona auaika, kotxi uatxa aimarotari pisãkire. ³⁰Uatxa aimarotari pite imarotini imakinika. Kona apakata apikomoni apimarauatini, kotxi uatxa aãuikari Teoso auinimoni ĩkari pininiua pite —itxarina Xesosi.

³¹Xesosi apakapapiretana:

—Uatxa hãuikari nisãkire —itxa Xesosi.

³²—Uatxa Teoso ketotini manapi apope hãarikini ĩkapani. Imakinika hĩte takanapanoko. Notanani kaikota. Iuaritika kona notananini kaikota, kotxi niri aua notakata. ³³Ikara atoko nisãpiretai, kotxi ninirekari erekaxinirepeka hinini. ĩkorapokoriti hãuakasaaki, kãkiti misiritapitikai hĩte. Iuaritika hĩpoxokoniyatako, kotxi nota tapara apiata. Maerekanitxi tapara poiãoka —itxa Xesosi.

Xesosi Misãkiretari Teoso

Iuaka ĩkapani

17 ¹Xesosi ionakaãta iaxiti. Iuasaaki isãpiretari ia isãkire Teosomoni:

—Niri, piketotini manapi apopeka. Pisikariko piotximere iuaĩkana nota pamaritemoni, ininiãkara nota oerekari kãkiti pite iotximere,

²kotxi pite sikano nota piposotiire ikinimane auíte nininiua ìkapani. Ininiã nikamari ikinimane kãkiti pite sikakini auapininiika ininina ìkapani. ³Kãkiti imarotiniãi pite, imarotiniãno nota Xesosi Kristo piokanatakiti, ninoa auapininiika, kotxi pite atão Teoso pitxaua. Pitenanira atão Teoso pitxaua. ⁴Noerekari ìkorapokoriti auakani pite Apiananiri pininiua, kotxi nikamapekari parìkatxi pipaniãtakiti. ⁵Ininiã niri, uatxa piotximere pisikano, pitemoni napokasaaki. Itixi kamiko apisapanika pitekata nauakasaaki, niotximere aua. Iua niotximeretxikana pisikano iuaìkana —itxa Xesosi.

Xesosi Misãkiretai Teoso Imoianariakori Ìkapani

⁶Xesosi sãkirauatapanika irimoni:

—Nota sãpiretai piuãka kãkitimoni, ninoa itixi auakani notamoni pisikakini. Mitxi pite nakitiakori itxauana. Pite sikana ninoa notamoni, ininiã ninoa kamari pisãkire iaõka. ⁷Uatxa imarotarina ikinika napakapakiti pite sakinino. ⁸Nisãpiretapekana ninoa pisãkire, ininiã auikarina pisãkire. Imarotapitikarina pitemoni nipotorikini. Ininiã auikarina pite iokanatinino nota kãkitimoni.

⁹—Nimisãkiretai pite ninoa ìkapani. Kona nimisãkiretai nota sãkire mauiaãkani ìkapani. Nimisãkiretai ninoa notamoni pisikakini ìkapaninoka, kotxi pite nakitiakori itxauana. ¹⁰Ikinika nota nakiti pite nakiti itxaua apaka. Ikinika pite nakiti nota nakiti itxaua. Ninoa pisikakini oerekari apanakini Apiananiri nininiua. Ininiã iusaaki apanakini txari: “Peerekari Xesosi.” ¹¹Uatxa !nikaikotaikako ìkorapokoriti. Txamari ninoa kaikotapanika uai. Nota sipekako pitemoni, ininiãkara pinìkatana ninoa notamoni pisikakini, kotxi pite niri pitxaua, erekarinoka kamakarii pite, kaposotiirei pite. Pite sikaposotiiretano nota. Ninirekari ninoa àtika atoko ininiuana, nota pitekata àtika atoko aniniua atokokana. ¹²Itixi ninoakata nauakasaaki, ninìkatana ninoa pite uãkaã, piposotiireẽ. Ninoa notamoni pisikakini ninìkatapitika. Kona àtika nomaiãta. Xotasinoka pìpinanaka, kotxi pìpinanakakani àkiri itxaua iua. Ipìpinanaka, kotxi kitxakapirìka Teoso sãkire iõkatsopatakori sãpiretapekari ikara apokini apisapanika.

¹³—Uatxa nota sipeka pitemoni. Ikara atoko itxa nisãkire kãkitikata nauapanika ninakasaaki, nota poxokoni ninoa àkixinire auini ìkapani. ¹⁴Nisikapekari pisãkire ninoamoni, ininiãkara nisãkire mauiaãkani omanatana ninoa, kotxi nisãkire auiaãkani ìkorapokoriti auakani !itxaikauana ninoa. Iua atokotxikana kona

ĩkorapokoriti auakarino nota. ¹⁵Nimisãkiretai pinĩkatinina ninoa, Satanasi mamaĩkakanina ĩkapani. Kona ninirekari mauikareni sauaki auakasaakina pimakatzakinina. ¹⁶Ĩkorapokoriti auakani litxauana. Nota iua atokotxikana. ¹⁷Pimakatzakana ninoa pite nakitiakori ĩkapani. Pisãkireẽ pimakatzakana, kotxi pisãkire atão. ¹⁸Nota pisãkire mauĩãkanimoni piokanatini atokokana, niokanatana ninoa pisãkire mauĩãkanimoni. ¹⁹Ninoa ĩkapani notaka nisikaua pitemoni pinirekakiti nikamini ĩkapani. Ininiãkara ninoaka apaka sikaua pitemoni pinirekakiti ikaminina ĩkapani.

Xesosi Misãkiretari Teoso Isãkire Auiãkani ĩkapani.

²⁰—Kona nimoianariakorinani ĩkapanini nimisãkiretai pite. Apaka nimisãkiretai imakinika nisãkire auiãkani ĩkapani, katana nimoianariakori sãkire auiãkani ĩkapani apaka. ²¹Nota amanaãi ninoa xinire ãtika atoko ininina ĩkapani. Nota aua pite ãkixinireẽ. Pitepekana aua nota ãkixinireẽ. Iua atokotxikana ate aua ninoa ãkixinireẽ. Ikara atoko ininiã, nota sãkire mauĩãkani ĩkorapokoriti auikapanikariko pite iokanatinino nota. ²²Ininiã erekari notamoni pisikakiti, piotximere, nisikapekana ninoa. Ininiã ninoa xinire ãtika atoko itxauana, ate ãtika aniniua atokokana itxana ninoa. ²³Nota aua ninoa ãkixinireẽ. Pite aua nota ãkixinireẽ. Ikara atoko ininiã peerekari, kotxi ãtika itxaua ixinirena. Ikara atoko ininiã nisãkire mauĩãkani imarotariko pite iokanatinino nota. Apaka ninoa imarotari nota pitiretini atokotxikana, pitiretinina ninoa apaka.

²⁴—Niri, ninirekari ninoa notamoni pisikakini notakata auini ĩkapani. Ninirekari ninoa atamatiniri ikinipoko erekari notamoni pisikakiti, niotximere pisikakiti, kotxi pite turetano nota itixi kamiko apisa. ²⁵Niri, atão inakarínoka kamakarii pite. Kãkiti ĩkorapokoriti auakani kona imarotai pite. Iuaritika nota imarotai pite. Ninoa imarotari pite iokanatinino nota kãkitimoni. ²⁶Nisãpiretapekai pite kãkitimoni. Apikomoni nisãpiretapanikariko pisãkire. Ininiã pitiraõki notamoni auakari ninoamoni auako. Ininiãkara nota aua ninoa ãkixinireẽ.

Xesosi Maĩkiko Pirena

(Mateo 26.47-56; Marko 14.43-50; Arókasi 22.47-53)

18 ¹Teoso imisãkiretaka atoko, Xesosi ĩpiriãtari sõtoãri Setorõ inakori. Iuaã aua amãtiirinape. Ininiã Xesosi sari iuaã imoianariakorikata. ²Xotasi, Xesosi mĩkapiritakari, imarotari

Xesosi imoianariakorikata itotiniri iuaãtaã isinina. ³Ininiã Xotasi sari amãtiirinapemoni ãtikaka sotatoakorikata, Teoso misãkiretiko aikoti nĩkatakanikata. Sasetotxi auĩteakori, pariseoakorikata sari iuaãtaã apaka. Ikeekotxi, tirikapi pakini anikana. ⁴Xesosi imarotari ikinika iuamoni ikamakitina tĩkane. Imarotapekari ninoa nirekakari okinirina iua. Iuaritika isari ninoamoni.

Ipimaãna:

—Kiripa hinitanãta?

⁵Ininiã ninoa:

—Xesosi Nasareekirira anita —itxana.

Ininiã Xesosi:

—Iuakarano nota.

Iuasaaki Xotasi, Xesosi mĩkapiritakari, aua ninoakata. ⁶Xesosi “iuakarano nota” inakasaaki, osipikana, ixitipe irika itxana.

⁷Iuaĩkana Xesosi pimaãna:

—Kipa hinitanãta?

—Xesosi Nasareekirira —itxana.

⁸—Nĩtxapekai, iuakarano nota. Nota hinitiniã, hãuiritana nimoianariakori sini —itxa Xesosi.

⁹Ikara atoko itxa, mitxi isãkire apokini ĩkapani. Mitxi itxari Teosomoni: “Kona nomaiãtana nimoianariakori notamoni pisikakini. Kona ãtika !nomaiãta.”

¹⁰Eereka Simão Petro inakori kosekari iouata auĩte. Isauakari Maoko inakori ikikomoni ikĩpita. Iua sasetotxi auĩte apiatakari nitiri.

¹¹Xesosi txari Petro:

—Pitakaro iouata auĩte omata ãki. Apakatapitika nota kaminiri niri paniãtakiti. Niri nirekapitikari natatsiitiniri nipinini kãkiti ĩkapani —itxa Xesosi.

Xesosi Anasi Apisatoõ

¹²Eereka sotatoakori, apaka sotatoakori auĩte, Teoso aikote nĩkatakanani pakini maĩkari Xesosi. Iaxirika itxarina. ¹³Merepanika anikarina Xesosi Anasi inakorimoni. Iua Anasi Kaipasi imatikiri. Iuasaaki iua Kaipasi sasetotxi auĩte apiatakari itxaua. ¹⁴Iua Kaipasi õtãkikapekana Xoteo auĩteakori. Ia atoko itxa isãkire: “A piaerekata ãti kiki ipinini ikinimane mapĩkani ĩkapani,” itxa Kaipasi õtãkikare.

Petro Kipatari Xesosi Imarotini

(Mateo 26.69-75; Marko 14.54, 66-72; Arókasi 22.54-62)

¹⁵Simão Petro, āti Xesosi moianari pakini asikatikinitari Xesosi Anasi aapokomoni anikikosaaki. Mitxipeka sasetotxiakori auīte apiatakari aōkitapekari iua āti Xesosi moianari. Ininiā iua ĩroā sasetotxiakori auīte apiatakari aapoko Xesosikata. ¹⁶Petro kaikota iporikiti itore takote. Eereka imoianari sari iporikiti. Imisākiretaro ĩronakikoātaā tore nĳkataro. Ininiā oāuiritari Petro ĩroini.

¹⁷Oa txari Petro:

—Pite ikira Xesosi moianarikai? —otxari.

—Kona —itxaro.

¹⁸Iuasaaki katxĳkareri aua, ininiā nitiritxiakori, Teoso misākiretiko aikoti nĳkatakani pakini kamari xamina. Xamina ĩtinipoki irokanātauana. Petro ninoakata aua iuasaaki.

Xesosi Sasetotxiakori Auīte Apisatoō

(Mateo 26.57-68; Marko 14.53-65; Arókasi 22.54, 66-71)

¹⁹Iroko āki Xesosi sasetotxi auīteakorikata aua. Ininiā sasetotxiakori auīte apiatakari misākiretari Xesosi:

—Pisāpiretano pimoianariakori, pisākire poerekakiti pakini —itxari.

²⁰Xesosi apakapapiretari:

—Ātipirika nisāpiretapikai hĳte. Nitotari noerekarauatini aiko Xoteo apotiitiniātaāua, Teoso misākiretiko aikotiā apaka. Kona nikipatari nisākire. Ikinipoko kenakotari noereēkiti. ²¹Ininiā kinirepa hĳpimaāno? Hĳpimaāna nisākire kenakotakani. Ninoara imarotari noereēkiti —itxa Xesosi.

²²Xesosi ikara atoko isākirauatakasaaki, Teoso misākiretiko aikoti nĳkatakari aritoōtari Xesosi.

—Atokope. Kona ikara atoko pitxape sasetotxi auīte apiatakarimoni —itxari.

²³Ininiā Xesosi:

—Nikerokiniāri nisākire, pisāpiretano nikerokakiti, txamari kona nikerokari. Atāo nisākire, ininiā kinirepa piaritano? —itxa Xesosi.

²⁴Eereka Anasi iokanatari Xesosi iaxirikiko. Eereka anikarina sasetotxi auīte apiatakarimoni, Kaipasi inakorimoni.

Iuaĩkana Petro Kipatari Xesosi Imarotini

(Mateo 26.71-75; Marko 14.69-72; Arókasi 22.58-62)

25 Petro iporikiti aua iusaaki. Ininiã apanakini pimaãri:

—Ikira kiki moianarikai pite? —itxarina.

Ininiã iua:

—Kona —itxa.

26 ãTi sasetotxi auĩte apiatakari nitiri, Petro kisauakakĩpitatakiti nirimane iua. Iua pimaãri Petro:

—Pitekani amãtiirinapeãtaã nitika iuakata? —itxari.

Iuaĩkana Petro txari:

—Kona notani.

27 Iusaakipeka patari sãkirauata. Iusaakipeka mitxi Xesosi sãpiretakiti iaõka auape.

Xesosi Pirato Apisatoõ

(Mateo 27.1-2; Marko 15.1-5; Arókasi 23.1-5)

28 ãIkanõkapanika ninoa takanapari Kaipasi aapoko, Anikarina Xesosi Homano auĩte auinimoni, kãkiti misiritiko imarotiko pakitamoni. Xoteo auĩteakori kona nirekari aiko ãki ãroinina. Kona inirekarina ãti uãka takote iitopãkinina. ãTi uãka takote iitopãkiniãna, kona apakata nipokori inikinina Pãskoã kiiniritiã. 29 Ininiã Pirato pokĩka porikiti Xoteo imisãkiretini ãkapani. Ininiã Pirato txana ninoa:

—Kixikapa himinatari ikira kiki notamoni? —itxana.

30 Ininiã ninoa txari:

—Maerekati imakamakaniã, kona ate minari iua pitemoni.

31 Ininiã Pirato:

—Hĩteka xinikari maerekati ikamakiti, ininiã ixika auiniã hĩteka misiritari iua. Hĩkiomaneakorini sãkire iaõka himisiritari iua — itxa Pirato.

Xoteoakori apakapapiretari:

—Kona apakata aõkiniri iua, kotxi hĩte Homanoakori !auiritaua aõkiniri kãkiti. Pitenokara apakata okiniri iua —itxana.

32 Ikara atoko inaãka, mitxi Xesosi sãkire iaõka apokini ãkapani, kotxi mitxi isãpiretapekari aamina ãpiriãmitakari nopini ipinini.

33 Pirato ãroã kãkiti misiritiko imarotiko pakita ãki iuaĩkana.

Ipĩkapiretari Xesosi. Ipimaãri:

—Pitekani Xoteoakori auĩte txataua? —itxari.

³⁴Ininiã Xesosi txari: —Piteka sãkirekani ikara? Atxiiti apanakini sãkire atokotxikana pipimaãno atxiiti? —itxa Xesosi.

³⁵Pirato apakapapiretari:

—Xoteokani nitxataua? Konapitini. Piteka nirimane, pinirimane auiteakori pakini sikai pite notamoni pimisiritiko tĩkane. Kixikapa? Kipa maerekati pikamakiti? —itxa Pirato.

³⁶Ininiã Xesosi:

—Auĩtetxi nininiãtaãua kona ĩkorapokoritini. Nitixine ĩkorapokoriti inaãkamako, ninitiriakori neenamauatamako, ininiã Xoteoakori kona maĩkamanoko. Auĩtetxi nininiãtaãua aĩtiãtaãra —itxa Xesosi.

³⁷Pirato txari Xesosi:

—Ininiã auĩtetxikani pitxataua?

Ininiã Xesosi: —Atãopitikara pisãkire auĩtetxi nininiua. Niponaniã ĩkorapokoriti auĩtetxi nininiua ĩkapani. Itixi napoka atãoene nisãpiretini ĩkapani. Atãoene nirekakani auikari nisãkire —itxa Xesosi.

³⁸Ininiã Pirato:

—Kiripa atãoene txaua?

Xesosi Okiko Nirekiko

(Mateo 27.15-31; Marko 15.6-20; Arókasi 23.13-25)

Eereka Pirato iuaĩkana mapara isa Xoteoakori imisãkiretini ĩkapani. Itxari:

—Kona nota apokari maerekati ikamakiti. ³⁹Hĩte itotari maerekati kamakari kateia ãki auakari nisikakini Pãskoã kiiniritisaaki. Hĩte nirekatari nisikakiniri ikira Xoteoakori auĩte? —itxa Pirato.

⁴⁰Ikinimanekana akiripoakatana:

—Kona iuani. Pahapasira anireka.

Txamari iua Pahapasi kokaniri. Iua naiatapekari Homanoakori.

19 ¹Ininiã Pirato paniãtari sotatoakori noropatiniri Xesosi. ²Ininiã sotatoakori kamari saporieãta atoko inakari, kotipiaro kamakori. Ieretakari Xesosi kiiã. Auĩtetxi mãka poporeri itakana Xesosi nopini. Ikara atoko ininiã, inapetarina Xesosi. ³Ikara atoko itxana inapetinirina:

—Aãũite —itxarina Xesosi inapetinina.

—Xoteo auĩtekai pite —itxarina.

Ininiã iuasaaki iaritarina itoõ.

⁴Iuaĩkana Pirato sari mapara iuaĩkana Xoteoakori imisãkiretini ĩkapani.

—Hítakaõtxikari. Hítemoni niminari iua, kotxi ninirekari himarotiniri, !napokari maerekati ikamakiti. ⁵Ininiã Xesosi apoka mapara. Saporietà kotipiaro kamakori ikiã, auítetxi māka pakini aua iuamoni. Ininiã Pirato txari:

—Hātamatari iua.

⁶Sasetotxi auíteakori, Teoso misākiretiko aikoti nīkatakani pakini atamatakasaakiri, ninoa akiripoakata:

—Hōkariko iua. Hōkariko iua. Aamina ĩpiriãmitakari nopini hītokakitariko —itxana.

Ininiã Pirato:

—Híteka anikari. Híteka okari iua aamina ĩpiriãmitakari nopini, kotxi kona napokari maerekati ikamakiti.

⁷Ininiã Xoteoakori:

—Akiomane sākire paniātari kākiti iua atoko inakari okiko, kotxi iua sākire: “Teoso ākirirano nota,” itxa —itxana Xoteoakori Piratomoni.

⁸Xoteoakori sākire ikenakotakasaaki, apia pīkareta Pirato. ⁹Ininiã iuaĩkana ĩroã kākiti misiritiko imarotiko pakita āki. Ipimaãri Xesosi:

—Nanipa pina?

Txamari !kasākireri Xesosi.

¹⁰Ininiã Pirato:

—Kona pinirekatari pimisākiretinino? Pixinikariko ia nisākire. Nota posotari nisikakinii. Apaka nota posotari nokinii aamina ĩpiriãmitakari nopini —itxa Pirato sākire.

¹¹Xesosi apakapapiretari:

—Kona pite auari posotiiretxi pokinino ĩkapani. Ikara inakari piposotiire auiniã, Teosonanira sikai ikara posotiiretxi. Nota sikanapakani pitemoni kamari apiata maerekati.

¹²Pirato ikara atoko inakari ene ikenakotakasaaki, iua ākixinireẽ ixinikari:

—Kiatokopa atxiĩti nisikakari Xesosi?

Inirekari Xesosi isikakini. Txamari Xoteoakori akiripoakata:

—Pisikakiniãri ikira kiki, kona Sesa moianari !pitxaikauako. Iua sākire: “Auítetxi apiananiri nitxaua.” Sesanoka auítetxi apiananiri —itxana Xoteoakori.

¹³Pirato ikara atoko inakariene ikenakotakasaaki, iminari Xesosi iporikitimoni. Ininiã Pirato topāka. Iuaã kākiti misiritiko isāpiretiniãtaã. Kākiti takauãkatari iuaã “Kimapori kai kamakori”

inaãka. Xoteo sãkireẽ “Kapataa.” Iuaã auĩtetxi iokanatarari maerekati kamakari imisiritikomoni. ¹⁴Iuasaaki apaniãxiti takote. Iua õti Páskoa kiiniriti potorikini õti apisa. Iuasaaki Pirato txari Xoteoakorimoni:

—Hãtamata, hãauĩte.

¹⁵Ininiã iuaĩkana ninoa akiripoakata:

—Piokanatariko ere. Piokanatariko ere. Hõkariko aamina ãpiriãmitakari nopini —itxana sasetotxi auĩteakori.

Ininiã Pirato:

—Hinirekatari nokiniri hãauĩte aamina ãpiriãmitakari nopini?

Ininiã ninoa:

—Ãtikara ate auĩte. Sesanokara ate auĩte —itxana ninoa.

¹⁶Ininiã Pirato sikari Xesosi sotatoakorimoni aamina ãpiriãmitakari nopini okiko tĩkane.

Xesosi Tokakitaãka Aamina ãpiriãmitakari Nopini

(Mateo 27.32-44; Marko 15.21-32; Arõkasi 23.26-43)

Ininiã anikarina Xesosi. ¹⁷Xesosi anikari aamina ãpiriãmitakari iuaka okiko ãkapani. Isana ixirata “Kiitãtatxi” inakorimoni. Xoteo sãkireẽ, “Kõokota,” inakori.

¹⁸Iuaã aamina ãpiriãmitakari nopini itokakitaãka Xesosi.

Apaka ipi kiki tokakitaãka iua takote. Ãti Xesosi kikomoni. Ãti isanaremoni. ¹⁹Pirato paniãtari iõkatsopari aamina ãpiriãmitakari nopini tokakitiko. Ia atoko itxa iõkatakiti: “Xesosi Nasareekiri, Xoteoakori Auĩte.” ²⁰Itomaneri Xoteoakori atatsopatarari iua, kotxi Xesosi okikoãtaã sitatxi takote. Sitatxi sikani napaãpotakasaaki, atamatarina iua iõkatsopari. Ia iõkataãka Xoteo sãkireẽ, Kreko sãkireẽ, Homano sãkireẽ pakini ikinimane imarotiniri ãkapani.

²¹Ininiã sasetotxi auĩteakori txari Pirato:

—Kona piõkatsopatarari, “Xoteoakori auĩte.” Piõkatsopatariko iuanoka uãkatari Xoteoakori auĩte ininiua —itxana.

²²Ininiã Pirato:

—Auape niõkatsopatakiti. Kona iuaĩkana niõkatsopatarari —itxa Pirato.

²³Xesosi itokakitakana atoko, sotatoakori kosekari Xesosi mãka. Imatsorakitarina. Imãka mata imatsorakitana ninoa ipi ipi pakini apakapini ãkapani. Ãti sotato apakapari ipixini, ãti sotato apakapari ipixini, itxaãpota. Xesosi mãka, ãti imãka patapi auakari, ãimatsorakitana, kotxi iotsare !auari. Peerekari. ²⁴Sotatoakori itxakakana:

—Kona amatsorakitari ia. Sarauatxi atoko makama, imāka anikakari aimarotini ikapani.

Ininiā iusaaki Teoso sākire iōkatsopatakori kitxakapirīka iaōka apoka. Iua txari:

Ninoa xanakari nimāka. Isarauatana nimāka anikakari imarotina ikapani.

Teoso sākire iaōka sotatoakori kama.

²⁵Iusaaki aamina ipiriāmitakari takote oāua Maria, Xesosi inoro oītarokata. Iuaā apaka oāua Maria Matarena inakoro. Iuaā apaka oāua āto Maria, Krópasi inakori itanoro. ²⁶Xesosi atamatakasaakiro inoro iua takote, atamatakasaakiri imoianari itiretakiti apaka, itxaro inoro:

—Nitiretakito, ere Xoão, pamarite itxaua.

²⁷Imoianaripekana itxa:

—Aroa pinoro otxaua.

Ininiā eereka iua anikaro oa aapokomoni iuakata oāuini tīkane.

Xesosi Ipinini Pirena

(Mateo 27.45-56; Marko 15.33-41; Arókasi 23.44-49)

²⁸Eereka Xesosi imarotari iparīka xipope. Ikinika Teoso sākire iōkatsopatakori iaōka apokini ikapani, itxari:

—Niposonata.

²⁹Iuaātaā aua tiitxi. Iua tiitxi āki aua iāriā katxioāri. Ininiā iusaaki iokomokarina mapoa atoko inakari iāriāmoni. Aākeē itakarina, Xesosi namaā taka itxarina. Iua aāke isopo inakorike. ³⁰Iātaka atoko itxari:

—Ikinika niparīka uatxapeka ixipopeka.

Inaāka atoko iokirikiita, iokanata itxari ixinire irimoni. Iusaakipeka ipina itxa.

Sotato Iorotari Xesosi Iomītiā

³¹Iua ōti sesta veira, kākiti tomatiko ōti apisa. Xoteo auīteakori paniātari Pirato aamina ipiriāmitakariā auakani tapike kapatakiko, katima ipīka ininina ikapani, iītona makatxakiko ikapani apaka. Tomatiko ōtisaaki kona ninoa nirekari ipīkari ito kaikotini iuaā. ³²Ininiā sotatoakori sari iuaā. Ikapatakarina Xesosi takote auakani tapike. ³³Txamari sotato atamatakasaakiri Xesosi, !auaika. Ipīpeka. Ininiākara kona ikapatakari itapike. ³⁴Sotato iorotari Xesosi itanapitaā iomītiā. Iusaaki iarēka, āparaā pakini xiketa.

³⁵Notara itikari Xesosi ipinini, ininiã atãopitikara nisãpiretakiti. Nisãpiretari ikinika nitikakiti. Nimarotari nisãkire atão inini, ininiã nisãpiretai ia atatsopatakanii, hïte apaka auikiniri ïkapani.

³⁶Teoso sãkire iõkatsopatakori kitxakapirïka txari:

Kona ãtika iua api !kapatakaãka.

Ininiãkara kona Xesosi api kapatakaãka, Teoso sãkire iõkatsopatakori iaõka apokini ïkapani. ³⁷Ãti Teoso sãkire iõkatsopatakori txari:

Ninoa atamatariko iorotakitina.

Xesosi Katiko Pirena

(Mateo 27.57-61; Marko 15.42-47; Arókasi 23.50-56)

³⁸Eereka Xosee, Arimateia sitatxitikiri, amanaãri Xesosi ïto Piratomoni. Iua Xosee auikari Xesosi sãkire, txamari ikipatari Xesosi sãkire auikini, kotxi ipïkari Xoteo auïteakori. Amanaaãkasaakiri Xesosi ïto, Pirato txari:

—Ari, panikari iua.

Ininiã Xosee anikari Xesosi ïto. ³⁹Iuusaaki imoianari Nikotemo inakori. Iua Nikotemo mitxipeka sari Xesosimoni ïkanõka imisãkiretiniri ïkapani. Iua moianatari Xosee, Xesosi ïto apakapakasaaki. Nikotemo anikari aãtsopa aroesi inakori, miha inakori pakini ikoke Xesosi ïtoã taãkori tïkane. Trïta sïko kiro pakini iua ikoke anika. ⁴⁰Ninoa ipi iapirikari Xesosi ïto mãkatxi mataã ikokekata. Ikara atoko Xoteo kamari ipïkari ïtoã ikatiko apisa.

⁴¹Xesosi aamina ipiriãmitakari nopini takikoãtaã, iuaã takote aua amãtiirinape. Amãtiirinapeãtaã aua akauari amanepanika inakari. Kona ipïkari ïto takaãkapanika iuaã. ⁴²Iua akauari kona õtakori, ininiã itakarina Xesosi ïto iuaã, kotxi Xoteo tomatini õti apokanapanoka.

Akauariã Xesosi ïto Mauakani

(Mateo 28.1-8; Marko 16.1-8; Arókasi 24.1-12)

20 ¹Tomïko ïkanõkapanika, Maria Matarena sari akauarimoni. Oãpokasaaki, oãtamatari akauari tore kai auïte kamakori makatxakapeëkaika. ²Ininiã omiteka Simão Petromoni. Xesosi moianari itiretakitimoni apaka osa. Oãkiritana:

—Apiananiri ïto makatxakaãka akauariã. Kona aimarotari namonireuako itakapirina —otxana.

³Ininiã Petro, ãti Xesosi moianarikata sari akauarimoni. ⁴Imitekana. Iua ãti Xesosi moianari miteka katimaritika, ininiã inapari Petro.

Ininiã iua apoka Petro apisa. ⁵Iãka aariko ãki atamatini ìkapani. Atamatari mākaxi mata, ipīkari iapirikiko. Kona iïroã. ⁶Iuasaaki Petro apoka iua tikini. Iïroã aariko ãki. Atamatari mākaxi mata. ⁷Atamatari mākaxi mata, mitxi Xesosi kiiã iapirikiko. Iporiimatataãka. Ikikomoni aua ãti mākaxi mata. Isanaremoni aua ãti mata. ⁸Ininiã iua mitxi apoãkari iïroã, atamata itxari. Ininiã auikari Maria sãkire. Iuasaakiã auikari Xesosi òkitikiniua. ⁹Iuasaaki ninoa kona iteene imarotapanikari Teoso sãkire iòkatsopatakori kitxakapirīkari, kotxi Teoso sãkire sãpiretapekari Xesosi ipinini, eereka òkitikiniua. ¹⁰Eereka Petro ãti Xesosi moianarikata kanapiriã aapokomonina.

Xesosi Oerekaua Maria Matarenamoni

(Mateo 28.9-10; Marko 16.9-11)

¹¹Maria Matarena kaikota aariko iriko takote. Otxiapanãtakasaaki, amaãtiki opapīkakiita oiãkakiita aariko iriko ãki oãtamatini ìkapani. ¹²Oãtamatana ipi Teoso nitiriakori iaxitikini. Imãkana kasarori. Iitopãkana mitxi Xesosi ìto auiniãtaã. ãti mitxi Xesosi kii auiniãtaã, ãti mitxi ikiti auiniãtaã. ¹³Itxarona:

—Kinirepa pitxiapanãta? —itxana.

Ininiã oa:

—Imaktxakaãka niauĩte ìto. Kona nimarotari iĩto takikoãtaã —otxana.

¹⁴Iuasaaki oporikimoni osapotorika. Oãtamatari Xesosi, txamari loimarotari.

¹⁵Ininiã Xesosi:

—Kinirepa pitxiapanãta? Kiripa pinita? —itxaro.

Ouãkatari Xesosi amãtiirinape nīkatakari ininiua. Ininiã otxari:

—Pite maktxakiniãri iua ìto, ininiã pisãpiretano iĩto pitakiniãtaã. Ininiã nanikariko ãtiãtaã —otxari.

¹⁶Ininiã Xesosi txaro:

—Maria.

Ininiã okirioka iuamoni. Otxari osãkireẽ:

—Haponii.

Popīkari sãkireẽ, “Noereẽkiri,” otxa.

¹⁷Ininiã Xesosi txaro:

—Kona pimaãtakapeno, kotxi nirimoni kona nisapanika. Pisa nitariakorimoni. Pitxanako: “Nota sariko nirimoni, hĩte iritxikana apaka. Nisariko niTeosonemoni, hĩTeosonetxikana apaka,” itxa.

¹⁸Ininiã Maria Matarena sari Xesosi moianariakorimoni:
—Natamatapekari aãuïte —otxana.
Ininiã osãpiretana ikinika Xesosi sãkire.

Xesosi Oerekaua Imoianariakorimoni

(Mateo 28.16-20; Marko 16.14-18; Arókasi 24.36-49)

¹⁹Iua Tomïko ãkanõkati Xesosi moianariakori apotiitaua.
Iuasaaki itotarina ikinika aapokotxi tore, kotxi ipïkana Xoteo
auïteakori. Iuasaaki Xesosi tokiã aapokotxi ãki ninoa sauaki.
—Erekaxinire hïtxako —itxana ninoa.

²⁰Ikara inaka atoko oerekari iuako karo. Oerekari itanapita
karo. Ininiã Xesosi atamatakasaakina, imoianariakori iteene
poxokoniua. ²¹Iuaïkana Xesosi txana:
—Erekaxinire hïtxako. Niri iokanatinino atokotxikana,
niokanatai hïte niri nireëkiti hïkamini ãkapani.

²²Iuasaaki ixõkana. Itxana:
—Hãpakapariko Erekari Matamatakoti. ²³Apakata pisãpiretiniri nota
sãkire auiãkari, imaerekani makatxakaãkapeka. Apakata pisãpiretiniri
nota sãkire mauïãkani, imaerekani !imakatxakaãka —itxa Xesosi.

Xesosi Oerekaua Tomeemoni

²⁴Xesosi imoianariakorimoni oerekasaakiua, Tomee Txítximo
inakori kona aua ninoakata. ²⁵Ininiã apanakini sãpiretari Tomee:
—Ate aõkitari Xesosi —itxana.

Ininiã iua:

—Iuako karo nimatamatakaniã, iuako karo nimakaaiakakaniã
niuakokiã, kona nauikari hïte sãkire. Itanapita karo
nimakaaiakakaniã, kona nauikari hïsãkire —itxa Tomee.

²⁶Ãti semanati napaka atoko, Xesosi moianariakori apotiitaua
iuaïkana aapokotxi ãki. Iuasaakiika Tomee aua ninoakata.
Aapokotxi tore itotaãka, iuaritika Xesosi tokiã ninoamoni:
—Erekaxinire hïtxako —itxana ninoa.

²⁷Iuasaaki itxari Tomee:

—Patamata niuako. Pikaaiakariko piuakokiã nitokakitiko karoã.
Nitanapita iorotikomoni pitakari piuakoki. Kona mauikaretika
!pitxape. Pauikariko nisãkire —itxari.

²⁸Ininiã:

—Niauïte, niTeosone —itxa Tomee.

²⁹Ininiã Xesosi:

—Uatxa pite auikari auãki ninini, kotxi patamatano. Kãkiti nota maõkitakani auikiniãri nisãkire, apakapariko apiata erekari Teoso sikakiti —itxa Xesosi.

³⁰Xesosi kamari apikomoni iposotiire imoianariakori sauaki. Iposotiire ikamakiti imakinika kona iõkatsopataãka ia iõkatsopariã.

³¹Ia niõkatsopata Xesosi Teoso mereẽkiti, Teoso ãkiri ininiua hãuikini ãkapani. Ikara atoko hãuikiniã, hãuapininiika hĩtxako Xesosi posotiireẽ.

Xesosi Oerekaua Setxi Imoianariakorimoni

21 ¹Ãti õti Xesosi oerekaua iuaĩkana imoianariakorimoni ipoa Txiperiatxi inakori tiniã. Ia atoko iua oerekaua:

²Iuaã aua Simão Petro. Iuakata aua Tomee Txĩtximo inakori. Natanaeo, Kanaa aapokotxitikiri, Kariréia tõpa auakari apaka aua iuakata. Sepeteo anaakori apaka aua iuakata. Apikomoni ipi Xesosi moianariakori apaka aua iuaã. ³Simão Petro txana:

—Nota okatsaãtako —itxa.

Ininiã apanakini:

—Ari, ate apaka okatsaãtako pitekata —itxana. Ininiã isana. Kanauaã iereẽtauana. Ìkanõka okatsaãtana, txamari limaĩkarina ximaki. ⁴Ìkanõkapanika Xesosi ikipatxitemoni tĩpokonãta, txamari ãmarotarina Xesosi iuaã auini.

⁵Xesosi akiritana:

—Namariteakori, kaiomaãi ereẽ? —itxana.

—Kona kaiomaãua —itxarina.

⁶Ininiã Xesosi paniãtana:

—Hĩtakariko hetxi hĩkikomoni. Ereẽ hãpokariko ximaki —itxa Xesosi.

Ininiã ninoa okari hetxi ikikomona. Eereka kona iposotaikarina ikosekinirina hetxi kanaua ãki, ximaki itori imaĩkinina xika. ⁷Xesosi moianari itiretakiti txari Petromoni:

—Aãuĩtekara.

Ikara inakari sãkiretxiti ikenakotakasaaki, Petro ieretakari imãka, mitxi imaktxakakiti, oka itxaua ipoamoni Xesosimoni isini ãkapani. ⁸Apanakini kanauaã ina. Ikosekaãpotarina hetxi. Iuasaaki ximaki xãpoka hetxiã. Itakoã !ĩtakori, atxiĩti seĩ metronoka.

⁹Ikanĩkiĩtakasaakina, atamatarina xamina. Ximaki iropike nopini auape. Apaka auari komiri.

¹⁰Xesosi txana:

—Himinari ximaki himaĩkakiti mapake.

¹¹Ininiã Petro kosekari hetxi imiriĩ. Xãpoãkata ximaki.

Sêtosĩkoëta tres ximaki mitapoakari aua. Kaiãopokori ximaki, iuaritika hetxi kona tsorakita. ¹²Xesosi akiritana:

—Uai hina. Manipokota.

Kona ätika imoianari kona kataparaxinire ipimainiri iua:

“Kiriparai” ininiri iua, kotxi ninoa imarotari iua Apiananiri ininiua.

¹³Ininiã Xesosi apoka ninoamoni. Ixanakari komiri, ximaki pakini, sika itxana ninoamoni.

¹⁴Ikara ôti apisapanika, Xesosi ipinaka atoko, ôkitikaua atoko, oerekapekaua ipikata imoianariakorimoni.

Xesosi Misãkiretari Petro

¹⁵Inipokotaka atoko Xesosi pimaãri Simão Petro:

—Simão, Xonasi äkiri, kipa apiata tiretano nota, pitekani, nakirakani? —itxa Xesosi.

Ininiã Petro txari:

—Ari, Apiananiri, pimarotari nota apokaerekatiniĩ —itxa Petro.

Ininiã Xesosi:

—Poerekari nisãkire soti auĩte anaakorimoni, ninakitiakorimoni.

¹⁶Iuaĩkana ipimaãri:

—Simão, Xonasi äkiri, atão pitiretatano nota? —itxa Xesosi.

—Ari, Apiananiri, pimarotari napokaerekatiniĩ —itxa Petro.

Ininiã Xesosi:

—Pinĩkatana soti auĩte, ninakitiakori —itxa Xesosi.

¹⁷Iuaĩkana ipimaãri:

—Simão, Xonasi äkiri, pitiretatano nota?

Ininiã Petro matinaniuata ixinireẽ, kotxi Xesosi pimaãri ipi äti pakinikata “Pitiretatano nota.”

Ininiã Petro:

—Apiananiri, pite imarotari ikinipoko. Pimarotapitikari nitiretinii pite.

Ininiã Xesosi:

—Poerekari nisãkire soti auĩte ninakitiakorimoni. ¹⁸Atão nitxai. Ätokoripanika pinakasaaki, piteka pieremãkataua. Pisari pinirekinimoni. Kiomãtxi pinakasaaki, pitamëkakanoketauako, ininiã äti ieremãkatai. Eereka anikai pimanirekakanimoni —itxa Xesosi.

¹⁹Ikara atoko Xesosi sãkire, kotxi ikara atoko itxako Petro ipinini. Petro ipinini iteene paxitariko Teoso, ininiã kãkiti txariko: “Peerekari Teoso.” Ininiã Xesosi:

—Pikapokitano nota. Ninireëkiti pikamako —itxa Xesosi Petromoni.

Xesosi Iteene Tiretakiti

²⁰Petro kirioka. Atapari Xesosi moianari, itiretakiti ninoa tikini inini. Iuakara mitxi Xesosikata iitopãka Pãskoa kiiniritisaaki.

Iuasaaki ipimaãri Xesosi: “Niauĩte, kiripa mĩkapiritai?” ²¹Petro atapakasaakiri Xesosi tiretakiti ninoa tikini inini, ipimaãri Xesosi:

—Natokopa itxatako ere ipinini?

²²Ininiã Xesosi:

—Nota nirekiniãri iua auapanika inini nikanapiriãkasaaki, kona nisãpiretai pite. Kona pixinikapiri iua. Pixinikari piteka kaminiri nota nireëkiti —itxa Xesosi.

²³Ininiã iaripireta Xesosi sãkire auiãkanimoni, iua imoianari itiretakiti imapinakani Xesosi kanapiriini apisa. Txamari Xesosi !isãpiretari imapinakani. Iua txari: “Nota nirekiniãri iua auapanika inini nikanapiriãkasaaki, kona nisãpiretai,” itxa Xesosi.

²⁴Nota ikara Xesosi moianari itiretakiti mitxaua. Nota itikari imakinika Xesosi kamakiti. Ininiã nota iõkatsopatari ikamakiti, isãkire pakini. Ininiã aimarotari atão nisãpiretakiti.

²⁵Auapanika itori Xesosi kamakiti. Ikinika ikamakiti !kaiõkatikopaniari. Ikinika niõkatsopatiniã, !apakata, kotxi itixi kona apakata kaiãopokori aãtsopa auini.

ÁTOSI

Xesosi Iokanatakini Kamakiti Pirena

Xesosi Kanapiriini Iaxiti

1 ¹Ereēkai Teópiro, Teoso tiretakari. Merepitipanika niōkatsopatakiti aātsopaã txari ikinipoko Xesosi kamakiti, isāpiretakiti pakini. ²Niōkatsopatakiti mapotōkire auari Xesosi iaxiti sini pirena. Isini apisa isāpiretana iokanatakini Erekar Matamatakoti paniātakiti.

³Ipinaāka atoko iuaīkana iuaka oerekaua ninoamoni, ininiā imarotarina atāopitika iua ōkitikapekaua. Koarēta pakini ōti iua auanāta ninoakata. Iuasaaki isāpiretana Teoso auītetxi ininiāua pirena. ⁴Imakinika apotiitakasaakiua itxana ninoa:

—Kona hītakanapiri Xerosareē sitatxiti. Aīri iaxitikiri iokanaenetakiti hiātapako. Iua mitxi hītemoni nisāpiretakiti.

⁵Atāopitikara Xoāoni patxisatai hīte āparaaã. Mapaōti napaka atoko, Erekar Matamatakoti apokako hītemoni. Iuasaaki hīpatxisataākako Erekar Matamatakotiā —itxa Xesosi sākire.

⁶Ininiā imoianariakori apotiitakasaakiua Xesosikata, ipimaārina iua: —Aāuīte, uatxa iuaīkana pisikatari atixine atemoni, Isaeo apika mekaniriakorimoni? —itxarina.

⁷Ininiā Xesosi txana ninoa:

—Kona hīte imarotiniri īkapanini. Aīrinanira imarotapaniri hīte tixine hītemoni isikini ōti. ⁸Erekar Matamatakoti apokasaakirako hītemoni, hāpakapariko posotiiretxi. Ininiā hīte nota kamakiti atamatakani hītxauako. Hīsāpiretariko hītiākiti, himarotakiti

pakini Xerosareẽ sitatxiti auakanimoni, imakinika Xotéia tõpa auakanimoni, Samaria tõpa auakanimoni, ikini itixiti auakanimoni pakini hĩsãpireãpotariko —itxa Xesosi ninoamoni.

⁹Ikara atoko inaãka atoko, ninoa okiã atamatari iua anikiko iaxiti. Katxiãri ãki isa, ininiã kona ninoa itikaikari. ¹⁰Iaxiti ionakaãtakasaakina, apoka ipi kiki katsopiri mākatakani ninoa takote. ¹¹Ninoa txana:

—Kiki Kariréiakini, kinirepa hionakanãta iaxiti? Ìkora Xesosi iaxiti sikari, isini atokotxikana ikanapiriini —itxana ninoa.

Itanokiri Koaã Apotiitakaniua

¹²Ininiã Oriva xirataãtaã ipotorikana. Ikanapiriãna. Xerosareẽmoni isana. Oriva kona õtakori. Kãkiti Oriva xirata potoriakani sini Xerosareẽmoni tako atokokanera Xoteo ki maneakorini auiritari kãkiti sini tomatiko õtisaaki.

¹³Xerosareẽ sitatxiti apokasaakina, iĩroãna aapokotxi ãki. Ininiã isana itanokiri koaã. Petroma, Xoõoma, Txiakoma, ãtreema, Piriipima, Tomeema, Patoromeoma, Mateoma, Txiakoma (Aopeo ãkiri), Simãoma (Homano omanatakari), Xotasima (ãti Txiako itari) pakini aua iuaãtaã. ¹⁴Àtipirika ninoa apotiitaua Teoso imisãkiretinina ìkapani. Apaka sitoakoro Xesosi sãkire auiãkani, Maria Xesosi inoro, Xesosi itariakori pakini apotiitaua ninoakata. Ninoa misãkiretakasaakiri Teoso, ãtika kãkiti xinirenoka atoko itxana. Ininiã erekarinoka auana ninoamoni. Kona omanatakauana.

Matxia Mereĩko Pirena

¹⁵Iusaaki sětovĩtxi pakini Xesosi sãkire auiãkani aua. Petro õkitikaua ninoa sauaki. ¹⁶Ininiã itxa:

—Nitariakori, hĩtakaõtxikari Teoso sãkire kitxakapiriãka Taviimoni isãpiretakiti. Tavii iõkatsopatarari Xotasini pirena, Xesosi maĩkakani oerekakari pirena, kotxi Erekarari Matamatakoti kamaimaroretari iua Tavii. Atão ikara Teoso sãkire kitxakapiriãkari apokapeka uatxa. ¹⁷Iua Xotasini atekata auakari iua. Ate pariãka atoko ikama.

¹⁸—Iuaritika isikari Xesosi imokaiakariakorimoni. Txineiro apakapakitoã iamotaãka itixi. Iuaã ipĩpe. Itano okaua. Ixiti apokasaaki, iokirikiita. Ixoreka itikako. Iusaaki itikapitsa poãpekatani. ¹⁹Imakinika Xerosareẽ auakani kenakopiretari Xotasini ipinini. Ininiã ninoa akiritari iuaãtaã itixi uãka “Aseotama.” Popĩkari akiritari “Arëkatxi Tixini.”

²⁰—Xikari iókatsopatakoriã iókatsopatapeẽkaika ia Xotasi pirena: Iua aapoko takanapaãkako. Kona auiritaãka kãkiti auini iuaãtaã. Iparĩka sikaãkako ãtimoni, itxa Teoso sãkire.

²¹—Ininiã amereẽriko ãti kiki atekata sikari tĩkane. Amereẽriko kiki mitxi Xesosikata sikari, mitxi amoianari ikiniõtika Xesosikata aãuakasaaki. ²²Amereẽriko kiki Xoãoni patxisarauatini itiãkari, imakinika Xesosi kamakiti itiãkari, iaxiti isini itiãkari, kotxi anirekari iua amereẽkiti Xesosi õkitikiniua imarotakari ate atoko inakari —itxa Petro.

²³Ininiã imereẽrina ipi kiki, Xosee Pasapasi inakori. Apanakini akiritari iua Xósite. ãti kiki uãka Matxia inakori. ²⁴Iposo atoko imisãkiretarina Teoso:

—Pite imarotari ikinimane kãkiti ãkixinire. Poerekaua ĩkiripa naia kiki pimereẽkiti ²⁵atekata parĩkauatakari tĩkane, Xesosi iokanatakiti tĩkane, kotxi Xotasini takanapari ikara parĩkatxi imaerekani xika, maerekani misiritikoãtaã isini ĩkapani —itxana Teosomoni.

²⁶Iposo atoko ikamarina sarauatxi atoko inakari imoianarina imarotinina ĩkapani. Ikara atoko ininiã, imereẽrina Matxia. Ininiã Xesosi iokanatakiti itxaua. Ikara õti atoko, iua moianatari apanakini õsi Xesosi iokanatakini.

Pëtekósitxi Kiiniriti Õti

2 ¹Pëtekósitxi kiiniriti õti (takari merepitipanika nikiko õti) apokasaaki, Xesosi sãkire auiaãkani ãtika kãkiti xinire atoko itxauana. Imakinika apotiitauana. ²Katimaritika iaxiti ĩkari kataparari ĩtimati atoko inakari xãpoka aapokotxi ãki Xesosi moianariakori topãkiniãtaã. ³Ininiã uusaaki xamina tirika atoko inakari tokiã. Imakinikana ikiiãna apoka. ⁴Erekari Matamatakoti ĩroã ikinika ãkixinireẽ. Iusaakipeka ninoa sãkirauata ãti uãka sãkireẽ, kotxi Erekari Matamatakoti kamaimaroretana.

⁵Iusaaki Xerosareẽ sitatxitiã auanãta ikini uãkati kãkiti Xoteoakori. Ninoa Teoso sãkire kĩpitakani. ⁶Ikenakotakasaakirina iaxiti ĩkari ĩtima atoko inakari, apotiitauana mirikiniti kãkiti. Ininiã itikokitatana, kotxi ikenakotarina apanakini sãkirauatini isãkireẽna. ⁷Itsorĩkaãtana:

—Kiãtokopa ininiãpa imarotatarina ate sãkire. Hãtamatana, Kariréiakinikara sãkirauanãta ateka sãkireẽ. ⁸Kiãtokopa itxa akenakotiniri ateka sãkire? —itxana ninoa.

⁹Iuaãtaã auari kaiãopokori kãkiti ãti uãka. Auari Patxiakinima, Métxiakinima, Erãokinima, Mesopotãmiakinima, Xotéiakinima, Kapatósiakinima, Pótokinima, Ásiakinima, ¹⁰Piríxiakinima, Pãpíriakinima, Exitokinima, Arípiakinima, Sireni takotekinima, Homakinima pakini aua. Apanakini Homakini atão Xoteoakori. Apanakini mamakaua, ininiã Xoteo itxapekauana. ¹¹Kretakinima, Arápiakinima pakini aua iuaã.

Ininiã ninoa txa:

—Ate kenakotari Kariréiakini sãkirauatini ateka sãkireẽ.

Isãpiretarina ikinipoko erekari Teoso Apiananiri kamakiti —itxana.

¹²Ininiã ninoa tsoríkaãta. !Imarotarina.

—Natokopa itxana imarotininirina ate sãkire? —itxana.

¹³Apanakini kãkiti napetana:

—Poãtakanira ninoa —itxana.

Petro Apakapapiretakiti Kãkitimoni

¹⁴Iusaaki Petro, õsi Xesosi iokanatakinikata misãkiretana iuaã apotiitakaniu. Itxari:

—Xotéia auakanii, ikinika Xerosareẽ sitatxiti auakanii, hĩtakaõtxikariko nisãkire himarotini íkapani. ¹⁵Híuãkatana naia kikiakori poãtini. Kona ipoãtana, kotxi atokatxi inaãpotapanika. ¹⁶Ia uatxa hãtamatakiti kitxakapiríka Teoso sãpiretapekari Xoeomoni. Iua Xoeo Teoso sãkire sãpiretakari sãpiretapekaua. Iua txari:

¹⁷Teoso txari: “Xipokatxi õti iatokopeka inakasaaki, niokanatari Erekari Matamatakoti ikini kãkitimoni. Pamariteakori sãpiretariko nisãkire apanakinimoni. Átokoriakori atamatariko itapone atoko inakari Teoso sikakiti pokamarasaaki. Iusaaki nisãkire nisãpiretana. Kiomãtxiakori taponetariko nota oerekakiti. Iusaaki nisãpiretariko nisãkire ninoamoni.

¹⁸Íkora õtisaaki ninitiriakori, niniteroakoro pakinimoni niokanatari Erekari Matamatakoti. Ninoa sãpiretariko nisãkire.

¹⁹Iaxiti noerekariko niposotiire kãkiti mimarotakiniti. Íkorapokoriti apaka noerekariko niposotiire Apiananiri nininiu imarotininia íkapani. Arëkatxi, xamina, katxiãri pakini apokako.

²⁰Atokatxi piãkako. Kasiri arëkatxi atoko itxako. Apiananiri apokini apisapanikarako auako ikara atoko inakari. Peerekapaniri Apiananiri apokini õti. Íkora õti apiatakari, kotxi iusaaki Apiananiri oerekauako kãkitimoni.

21 Ininiã Apiananiri akiritakani makatxakaãkako imapinakani
 ïkapani,”

itxa Apiananiri Xoeomoni.

22 Petro sãkirauatapanika:

—Kãkiti, Isaeokini, hïkenakotariko nisãkire. Hïte apisatoõ Teoso oerekapekari Xesosi, Nasaree sitatxitikiri. Teoso mereëkiti itxaua, kotxi ikamari Teoso posotiire kãkiti mimarotakiniti Teoso himarotini ïkapani. Himarotapekari ikara. 23 Xesosi sikaãka imokaiakariakorimoni, kotxi Teoso nirekari ikara atoko iniko. Teoso imarotapekari ikara atoko inakari apokini õti. Hïtekara, apanakini maerekati kamakanikata maïkari Xesosi. Aamina ïpiriãmitakari nopini hïtokakitari, oka hïtxapiri iuani. 24 Iuaritika ipinaka atoko, iuaïkana Teoso õkitikari iua. Teoso sikakari iua ipïkitxi mamisiritakaniri ïkapani. Ipïkitxi !iposotari ixipokiniri iua, kotxi Apiananiri itxaua.

25—Kitxakapirïka Tavii sãpiretari Xesosi pirena. Itxari:

Nota itikapikari Apiananiri nota apisatoõ. Iua aua nikipomoni.

Ininiã !nimakatxaãka.

26 Ininiã nixinire poxokoniuatapeka itxa. Nisãkire poxokoni apaka aua. Niïto auãki inakasaaki, iãtapari Teoso sikaenetakiti.

27 Apiananiri kona takanapano nota ipïkani auiniãtaã.

Apiananiri !auritano Erekarï Kamakari paiakini.

28 Apiananiri oerekapekano mapïkani kimaporite. Iua notakata aua, ininiã nipoxokoniuata,
 itxa Xesosi Taviimoni kitxakapirïka.

29 Ininiã Petro sãkirauatapanika:

—Kikiakori, hãuiritano nisãpiretiniri Tavii pirena. Tavii anirimane kitxakapirïka auakari. Iuani ipïpe, ikatapeëka. Uatxa atemoni auapanika iua akauare. 30 Iua Teoso sãkire sãpiretakari. Atão iua imarotari Teoso sãkire. Teoso sãpiretapekari iua apika mekani Teoso mereëkiti itxauako. Tavii imarotari Teoso mereëkiti õkitikaãkapanikako auïtetxi ininiua tïkane. Teoso sãpiretari imereëkiti topãka auïtetxi itopanere nopini. Ininiã atão auïtetxi itxaua.

31—Tavii imarotari ikara atoko inakari Xesosi apokini apisapanika, kotxi iõkatsopatarï Xesosi ipinini pirena, iuaïkana õkitikiniua pirena apaka. Iua txari:

Ipïkani auiniãtaã !ikaikota. Iïto !ipaiaka,
 itxa Tavii kitxakapirïka.

32—Iua Xesosi ipinaka atoko, Teoso ôkitikari iua. Ate amakinika Xesosi ôkitikiniua itikakani atxaua. 33Ininiã uatxaika Xesosi topâka Teoso kikomoni. Ikara atoko Xesosi Apiananiri itxaua. Apakapari Erekarî Matamatakoti, Teoso sikaenetakiti. Iposo atoko, iokanatarî Erekarî Matamatakoti atemoni. Iuakara uatxa hâtamata ikamakiti. Hîkenakotari iua sâkire uatxa.

34—Tavii !isari iaxiti auîtetxi ininiua îkapani, iuaritika iôkatsopatari: Apiananiri misâkiretari niauîte: “Nota kikomoni piitopâkiniritika 35nixipokariko pimokaiakariakori. Nikamariko ninoa pikiti pitakiniãtaã atoko ininiua,” Apiananiri txari niauîte.

36—Ininiã Isaeo auakanii, himarotariko ia. Hîte okari Xesosi, iuaritika Teoso kamari iua auîtetxi ininiua. Teoso mereêkiti itxaua —itxa Petro.

37Iusaaki Petro sâkire ikenakotakasaakina, âkixinireêna tsiîtxi apoka iouata iorotiniri tsiî atoko itxa. Maerekaxiniretinoka itxana. Eereka itxana ninoa:

—Kiripa akama? —itxana.

38Petro apakapapiretana:

—Himaerekani hîtakanapa. Hîte imakinika hîpatxisataãkako Xesosi Kristo uãkaã, ininiã Teoso makatxakari himaerekani. Iusaakiko hâpakapari Erekarî Matamatakoti Teoso sikakiti.

39Kotxi ikara Teoso sikaenetakiti hîte îkapani, hamarite îkapani, apanakini ôtako auakani apaka îkapani. Ikara Teoso sikaenetakiti ikinimane kâkiti Teoso akiritakini îkapani —itxa Petro.

40Petro iteene ôtâkikana ninoa, kotxi inirekarî atão ikaminina, ininiã itokata ôtâkikana ia atoko:

—Îkorapokoriti auakani maerekati kamakani itxauana.

Himakatxakaua. Hîtakanapariko himaerekani. Hãuikariko Xesosi sâkire —Petro txana ninoa.

41Îkora ôti, tres mio kâkiti ipoxokoniritikana auikari Petro sâpiretakiti. Iusaaki ipatxisataãkana.

Xesosi Sâkire Auiãkani Moianatakakiniua

42Eereka ikiniôtika apaiãôkarina Xesosi iokanatakini oerekakiti. Âtipirika itiretakakauana. Âtipirika ikamarina kiiniri komiri imapixinikinina Xesosi ipinini ixinikinina îkapani. Âtipirika imisâkiretarina Teoso. 43Ikinimane tsorîkaãnãta, kotxi Xesosi

iokanatakini kamari ito posotiiretxi kākiti mimarotakinini, apanakini Teoso imarotini ĩkapani.

⁴⁴Teoso sākire auiākani apotiitapikaua. Ninoa xanakari ikinika inakitina. ⁴⁵Ivētixitarina itiina, ininiā tiitxi ĩki isikana matxineirotenimoni. ⁴⁶Ikiniōtika aiko āki Teoso misākiretikoātaā apotiitapikauana. Ninoa aapoko āki ikamarina komiri mapixinikiko kiiniriti. Ātipirika ninoa apotiitaua ipoxokoniritikana nipokori inikinina ĩkapani. Ākixinirena erekapitikari. ⁴⁷Ixikarauatana Teoso ĩkapani. Imakinika kākiti apokaerekatana ninoa. Ininiā ikiniōtika Teoso makatxakari kākiti maerekani. Ininiā Teoso sākire auiākani apiaāpota.

Petro, Matĭpokotakati Pakini

3 ¹Āti ōti mapiātiki Petro, Xoāo pakini sari Teoso misākiretiko aikotimoni Teoso imisākiretinina ĩkapani. ²Iuasaaki ikiniōtika kākiti anikari matĭpokotakati Teoso misākiretiko aikoti toremoni. Itore uāka “Peereri.” Iuaā matĭpokotakati amanaāri txineiro iuaā napakanimoni. Iponaniākasaaki matĭpokotakati itxaua iua. ³Ininiā Petro, Xoāo pakini ĩroākasaaki, iua amanaāri txineiro:

—Txineiro hĭsikano —itxa.

⁴Ininiā Petro, Xoāo apaka atamatari iua. Ininiā Petro txari: —Patamataua.

⁵Ininiā iua matĭkati atamatana ninoa. Iuākatari txineiro isikinina iuamoni. ⁶Ininiā Petro:

—Kona auari txineiro atemoni. Kona pirata aua atemoni. Oro apaka !auari. Iuaritika nota auakiti nisikapitikai. Xesosi, Teoso mereĕkiti, Nasareekiri, iua uākaā pōkitikauako. Pitĭpokotako — Petro txari iuamoni.

⁷Ininiā Petro maĭkari iuako ikikomunikiri ōkitikiniua ĩkapani. Iuasaakipeka ikiti, ikitinota pakini kataparapeka itxa. ⁸Ininiā okakataua, tĭpokota itxa. Īroā Petro, Xoāo pakinikata Teoso misākiretiko aikoti āki. Īroākasaaki, okaāpokataua. Itĭpokoāpokata. —Ari, peerekari Teoso —itxanāta.

⁹Ikinimane itikari iua tĭpokotini. Ikenakotari ixikarauatini Teosomoni. ¹⁰Ikinimane imarotari iua kiki aiko ĩronakikoātaā “Peereri” inakoriātaā topākanātakari, txineiro amanaānātakari iua. Ininiā ninoa:

—Anekani. Kiripa atxiĭti? Mitxi matĭpokotakati. Uatxa itĭpokotape. Kanatokopa itxa? —itxana.

Petro Sâpiretakiti Kâkitimoni

¹¹Apanakini kenakopiretana ninoa, ininiã imitekana ninoamoni matîpokotakati pirena imarotinina îkapani. Iuasaaki ninoa auiniãtaã akiritaãka “Saromão pakita.” Iuaã Petro, Xoão pakini aua mitxi matîpokotakatikata. Iua maĩkakanokeãpotana Petro, Xoão pakini. ¹²Iua Petro atapana kâkiti ninoamoni îkani. Itxana:

—Isaero auakanii, kinirepa hîte tikoka ere kiki tîpokotini hâtamatakasaaki? Kinirepa hîte itikaua ate? Na ate posotiireëni kamari iua tîpokotini. Ate ereka anini kona kamari iua tîpokotini. ¹³Apraãoni, Isakini, Xakooni pakini Teosone, aĩriakorini kitxakapirĩkarini Teosone, iuara oerekapekaua imi Xesosi ereka inini. Teoso âkiripitikara itxaua. Iua posotiire auapitika. Iuakara hĩsika okiko îkapani. Eereka Pirato inakori nirekasaakiri isikakiniri. Hîte !inirekari iua sikakiniri Xesosi. ¹⁴Iuasaaki hîte kona nirekari erekarinoka kamakari. !Hinirekari iua atão inakarinoka kamakari. Hîte amanaãri Pirato isikakiniri kokaniri hĩtemoni. ¹⁵Ininiãkara hîte okapiri kâkiti auãki inini kamakari. Iuaritika ipĩkani sauaki Teoso õkitikari iua. Ate itikari atãopitikara iua õkitikiniri.

¹⁶—Ia kiki hĩtikakiti himarotakiti kataparapeka itxa, kotxi iua auikari Xesosi posotiire. Iua auikari Xesosi sãkire erekapeka inini îkapani. Hâtamatari hîte apisatoõ iua ereka inini.

¹⁷—Ininiã uatxa nitariakori, nimarotari hîte, hîte auĩteakori pakini okapiri Xesosi atão himimarotakani xika. ¹⁸Kitxakapirĩka Teoso sãkire sãpiretakani oerekapekaua Kristo misiritiko. Ikara imisiritiko auapeka. ¹⁹Ikara atoko ininiã, hĩtakanapariko himaerekani. Erekariki kimaporiti hinitako, ininiã Teoso makatxakari himaerekani.

²⁰Iuasaaki Apiananiri kamapoxokonitai. Isikataparatai. Iuasaaki iua iokanatariki Xesosi imereẽkiti hĩtemoni. ²¹Merepanika iua Xesosi kaikota iaxiti. Teoso kamariki imakinika amaneri. Iuasaaki Xesosi apoka iuaĩkana. Iua atokokana itxana Teoso sãkire sãpiretakani kitxakapirĩka. ²²Kitxakapirĩka Moisesi txari:

Apiananiri hĩTeosone iokanatariki isãkire sãpiretakari hĩtemoni nota iokanatiniki atokokana. Hinirimane itxaua iua. Hĩkenakotariki ikinika isãpiretakiti hĩtemoni.

²³Ikinimane iua sãkire makenakotakati xipokaãkako.

²⁴—Teoso sãkire sãpiretakari Samoeo inakori, eereka ikinikana Teoso sãkire sãpiretakani pakini sãpiretapekari Teoso iokanatiniri imereẽkiti kâkitimoni îkorasaaki. ²⁵Teoso sãkire sãpiretakani

anaakorirai hīte, ininiākara isākire ninoamoni, iuatxikana isākire hītemoni uatxa. Itxari Apraāoni:

Āti pimekaniri sikariko erekari ikini itixiti auakanimoni, itxa Teoso. Ininiā ikara Teoso sikaenetakiti hīkiomaneakorinimoni, hītemoni apaka isikaeneta. ²⁶Ininiā Teoso iokanataru iua ākiri Xesosi hītemoni merepitipanika. Iokanataru iua hītemoni erekari hītemoni isikini ikapani, himaerekani hītakanapini ikapani —itxa Petro.

Petro, Xoão Pakini Xoteo

Auīteakori Apisatoō

4 ¹Petro, Xoão pakini sākirauatapanika kākitimoni inakasaaki, sasetotxiakori, Teoso misākiretiko aikoti nīkatakari, satoseoakori pakini apoka ninoamoni. ²Ininiā ninoa naiataua, kotxi Petro, Xoão pakini sāpiretari kākiti ipīkani ōkitikiniua pirena, kotxi ninoa txari: —Xesosi ipinaka atoko, iuaīkana iua ōkitikaua, ininiā ipīkani ōkitikauako.

³Ininiākara ninoa maīkana Xoão, Petro pakini. Iuasaaki mapiānikata, ininiā itakana kateia āki ikanōka iuaā inapinina ikapani. ⁴Iuaritika itomaneri Petro sākire kenakotakani auikapiretari iua sākire. Sīko mio kikiakori aukari Teoso sākire Petro sāpiretakiti.

⁵Katimatiniakata Xoteo auīteakori, kiomātxiakori, kaiōkatsopareriakori pakini apotiimanetaua Xerosareē. ⁶Sasetotxiakori auīte apiatakari Anasi inakori iuaā aua. Inirimane Kaipasi inakori, Xoão inakori, Arexātri inakori pakini aua iuaā apanakini sasetotxiakori auīte nirimaneakata. ⁷Xoão, Petro pakini minaāka ninoa apisatoō. Ipimaārina: —Kiposotiireēpa hōkitikari matīpokotakati? —itxana.

⁸Erekari Matamatakoti moianataru Petro. Ininiā iua txana ninoa: —Aāuīteakori, akiomaneakori, ⁹hinirekari asāpiretinii uatxa erekari akamakiti matīkatimoni. Hinirekari himarotiniiri erekapeka inini. ¹⁰Ininiā ikinika hīte, ikinika Isaeo tixini auakani apaka, himarotariko ia. Xesosi Nasareekiri posotiireēra ia kiki hīte apisatoō timakari makananitaāka. Iuara hīte oka aamina ipiriāmitakari nopini. Iuara Teoso ōkitika iuaīkana ipīkani sauaki. ¹¹Kitxakapirīka Teoso sākire iōkatsopatakori sāpiretari Xesosi hīte manirekakani, kotxi itxari:

Kai aapokotxi kamakanii, !hinirekari āti kai soro. Iua kai himanirekakiniti apiari itxapekua. Apanakini kai soro maīkakari itxaua.

12—Xesosinokara makatxakari kākiti maerekani. Kona āti maerekanitxi makatxakakari lauari ikini itixiti. Teoso sikari iuanokara kākitemoni imaerekani imakatxakini ikapani —itxa Petro.

13Ninoa tsorīkaānātana Petro sākire ikenakotakasaakina, kotxi Petro, Xoão pakini sākirauata itaparaxinireritika. Mitxi kona ninoa apaiaōkarauata, iuaritika ninoa imarotari atão isākirauatini. Ninoa xinikari:

—Ixi. Ninoa minakani. Iuaritika kīikitena, kotxi Xesosi moianariakori itxauana —itxana.

14Ininiā !kasākirena, kotxi matīkati tīpokotapeka ninoa apisatoō. 15Ininiā ipaniātana Petro, Xoão pakini mapara isinina, ninoa auītetxiakori ininimoniuana isākirauatinina ikapani. 16Ininiā auītetxiakori txari:

—Kanatokopa atxatana ninoa? Kotxi ikinimane Xerosareē auakani imarotari itxīkitakinirina matīkati erekape inini. Atāopitikara ninoa kamari posotiiiretxi. !Aposotari akipatiniri ia sākiretxiti, kotxi ikinipoko imarotapekari matīkati tīpokotini. 17Kona anirekari ikara pirena apikomoni iaripiretini kākiti sauaki. Ininiā atxanako ninoa: “Na apikomoni Xesosi pirena hīsāpiretapinikariko.”

18Ininiā uuaīkana akiritana. Eereka itxana:

—Kona hīsāpiretapinikariko apikomoni Xesosi pirena. Kona hōerekapiriko uuaīkana Xesosi pirena —itxana.

19Ininiā Petro, Xoão pakini apakapapiretana:

—Kiripa atão akīpitini? Hītekani? Teosokani? Kipa erekari? Hīte mereēri. 20Kona aposotari atakanapiniri asāpiretiniri aītikakiti, akenakotakiti pakini —itxana.

21Ininiā uuaīkana auītetxiakori txitana. Iposo atoko auiritana isinina, kotxi maerekati likamana. !Imisiritana, kotxi ipīkarina kākiti. Ikinimane kākiti txari:

—Peerekari Teoso kamakiti matīkati ikapani —itxana.

22Ikora kiki makananitakori koarēta anope iusaaki.

Xesosi Sākire Auiākani Misākiretiniri Teoso

23Xoão, Petro pakini sikakikosaaki, ninoa kanapiriā imoianariakorimoni. Ikinika sasetotxi auīteakori sākire, kiomātxiakori sākire pakini ikinika isāpiretana. 24Ikara ikenakotakasaakina, ikinikana misākiretari Teoso. Ininiā itxana:

—Apiananiri, ikinika posotiiretxi auari pitemoni. Pitenanira Teoso pitxaua. Pite kamari iaxiti, itixi, potxoari uiniti pakini. Imakinika iaxiti auakani, itixi auakani, potxoari uiniti auakani pakini pikama. ²⁵Kitxakapirīka Erekarī Matamatakoti kamaimaroretari pinitiri aātokiri Tavii. Ininiã itxari:

Kinirepa kākiti Teoso manirekaãkani omanãkarauata? Kinirepa kākiti maxikatiīka xinikari maerekati ikamini ātimoni?

²⁶ Auītetxiakori apotiitaua neenamatzī ikaminina īkapani. Ninoa apotiitaua Apiananiri inaiatinina īkapani, imereēkiti apaka inaiatinina īkapani,

itxa Tavii.

²⁷—Atãopitikara Erotxi, Põsio Pirato pakini apotiitaua Xoteo minakonikata, Xoteoakori pakinikata. Ninoa apotiitaua uai ia sitatxitiã. Isãkirauatana pamarite Xesosi okinina īkapani. Txamari pite mereēri iua erekarinoka kamakari. ²⁸Mitxi pite imarotari imakinika ninoa kamakiti tīkane. Kākiti kamari pinirekakiti, kotxi kaposotiirei. ²⁹Ininiã aũũite, pixinikariko ikara maerekapirenati. Pisikataparaxiniretaua ate pinitiriakoriua pisãkire asãpiretini īkapani. ³⁰Pamarite erekarī kamakari Xesosi posotiireē pimakananitanako amianatakani. Kākiti maposotakinini pikamako. Posotiiretxi pikamako pisãkire aōerekini īkapani. Ikara pikamako pamarite Xesosi posotiireē —itxana ninoa Teosomoni.

³¹Teoso imisãkiretaãkana atoko, ninoa apotiitiniãtaãua iakeka. Erekarī Matamatakoti apoka ikinimanemoni. Ininiã itaparaxinireritikana isãpiretarina Teoso sãkire kãkitimoni.

Teoso Sãkire Auiãkani Moianatari Itariakori

³²Ikinika Teoso sãkire auiãkani ātika kākiti xinire atoko itxauana. Kona itxana: “Nota nakitira ia,” kona itxana. Kapotxinaniri !auari. Ninoa xanakari ikinika itiina. ³³Xesosi iokanatakini itaparaxinireritikana txari ikinimanemoni:

—Xesosi Apiananiri iuaĩkana õkitikaua ipinaka atoko. Ate imarotari, kotxi ate aõkitari iua ipinaka atoko —itxana kãkitimoni.

Ininiãkara Teoso sikari ikinika erekarī ninoamoni. ³⁴Ninoa sauaki tiitxi amonitakarī !auari. Kikio ipi auiniãri, kakikioteri vëtxitari ātika. Aapokotxi ipi auiniãri, kaapokori vëtxitari ātika. Oa txineiro ninoa sika ³⁵Xesosi iokanatakinimoni. Eereka ninoa xanakaro oa txineiro matiitinimoni.

³⁶Iuasaaki aua Xosee. Sasetotxi, Arevii apika mekaniri itxaua. Xipri inakori pokomiriitikiri iua. Xesosi iokanatakini takauākatari iua Panapee inaāka. Popīkari sākireē iuāka: “Kasikapoxokoniri,” kotxi ātipirika isikapoxokonitari kākiti. ³⁷Iua vētxitari ātika ikikiote. Iua kikio īki isika Xesosi iokanatakinimoni.

Ananíasi, Sapira Pakini

5 ¹Iuasaaki auari Ananíasi inakori, ĩtanoro Sapira inakoro pakini. Iua vētxitari kikio. ²Ikaikotakaro ipixini kikio īki. Ipixininoka isika Xesosi iokanatakinimoni. Sapira imarotari ōtaniri kamakiti. Txamari iua sikasaakiro oa txineiro Xesosi iokanatakinimoni, itxari: —Ikinika kikio īki asika Teosomoni —itxa.

³Iuasaaki Petro txari:

—Ananíasi, kinirepa pauiritari Satanasi misirienetini maerekati pikamini ĩkapani? Erekar Matamatakotira pimisirieneta, kotxi ipixini kikio īki kaikota pitekata. Kinirepa pisāpiretari ikinika txineiro pisikini Teosomoni? ⁴Kikio pivētxitini apisapanika, ĩkora kikio pite nakiti. Eereka pivētxitakasaakiri, ōkora txineiro pite nakito. Ininiā kinirepa pitxari: “Ikinika nisika Teosomoni?” Kona kākitini pimisirieneta. Teosora pimisirieneta —Petro txari.

⁵Iuasaakipeka Ananíasi iripe. Ipīpe. Ininiā ikara kenakotakani pīkarauakata. ⁶Iuasaaki ātokoriakori iapirikari Ananíasini ĩto mākatxi mataā ikatinirina ĩkapani. Eereka anikarina, kata itxarina iuani.

⁷Ipi oara, āti oara pakini napaka atoko iua ĩtanoro apoka. Kona oimarotapanikari oītanirini ipinini. ⁸Ininiā Petro txaro:

—Pisāpiretano. Oia txineironokani hīkikiote īki hāpakapakito aua? Atāo pisāpiretano? —itxaro.

Ininiā oa:

—Ari aroanokara ate apakapakito aua —otxari.

⁹Ininiā Petro:

—Hīte uākatatari Erekar Matamatakoti auiritai himisirienetini iua? Uatxaika ĩronakikoātaā pītanirini katakani apokapeka. Ininiā ninoa anikapitikai pite apaka —itxaro.

¹⁰Iuasaakipeka oīripe, pīpe otxa. Iuaīkana ninoa ātokoriakori ĩroā. Apokarona oani, ininiā anikarona. Ikatarona ōtanirini takote. ¹¹Ininiā ikinipoko Xesosi sākire auiākani, apanakini ikara kenakoenetakani pakini pīkarauata.

Amianatakani Makananitiko

¹²Iuasaaki Xesosi iokanatakini kamanātari posotiiiretxi, kākiti mimarotakiniti pakini kākiti sauaki. Ikiniōtika Xesosi sākire auiākani apotiitaua Teoso misākiretikoātaã, “Saromão pakita” akiritakori. ¹³Xesosi sākire mauiakani apokaerekatana ninoa, txamari ipīkarena xika !inirekarina imoianatinina. ¹⁴Iuaritika apikomoni kākiti apotiiāpotaua ninoakata, kotxi kikiakori, sitoakoro pakini auikari Apiananiri sākire. ¹⁵Iuasaaki Xesosi iokanatakini makananitana amianatakani, ininiākara kākiti anikana amianatakani kimaporimoni. Sirimatatxi nopini itakana ninoa kimaporiātaã. Ininiã kākiti xinikari: “Petro napakasaaki, isanōka amianatakanimoni apokiniã, imakananitaākana.” ¹⁶Ininiã kaiāopokori kākiti Xerosareē takotekini apoka. Ninoa minana amianatakani, apaka kākiti maerekani matamatakoni misiritakini pakini. Ininiã Xesosi iokanatakini makananitana imakinikana.

Xesosi Iokanatakini Misiritiko

¹⁷Iuasaaki sasetotxi auīte apiatakari, imoianariakorikata, satoseoakorikata xikotana Xesosi iokanatakini. ¹⁸Ininiã ninoa maīkana. Eereka kateia āki taka itxapena ninoa. ¹⁹Iua īkanōkati Teoso nitiri iaxitikiri matakakari kateia tore. Eereka anika itxana iporikiti. Itxana:

²⁰—Hīsa Teoso misākiretiko aikotimoni. Iuaã hīsāpiretariko Teoso sākire kākitemoni kākiti auini amaneri inini īkapani —itxa Teoso nitiri.

²¹Ininiã īkanōkapanika ninoa sari Teoso misākiretiko aikotimoni. Teoso nitiri sākire iaōka ikamana. Iuaã isāpiretarina Teoso sākire kākitemoni.

Iuasaaki sasetotxi auīte apiatakari, imoianariakorikata pīkapiretana Xoteoakori kōtākikarerini, Xoteo kiomaneakori pakini, ininiã imakinika ninoa apakītakana Xesosi iokanatakini. ²²Ininiã apanakini sari kateiamoni apinina īkapani. Txamari apokasaakina iuaã, !auaikana Xesosi iokanatakini. Ininiã ikanapiriāna auītetxiakorimoni isāpiretinina īkapani. ²³Ininiã itxana:

—Ate apokasaaki kateia tore, itotaākapanika. Kateia nīkatakani auanāta itore takote. Txamari itore amatakakasaaki, kākiti !auaika iriko āki —itxana.

²⁴Ininiã sasetotxi auīte apiatakari, Teoso aikote nīkatakani auīte, sasetotxiakori pakini kenakoenetakasaakiri ikara sākiretxiti:

—Anekani? Nāpa ninoa atxiiti? Kiripa apikomoni auatako? —itxana.

²⁵Iuasaakipeka kiki apoka. Isāpiretana:

—Hikenakotariko nisākire. Ninoa kikiakori kateia āki hītakakini Teoso misākiretiko aikoti āki aua. Oerekanātarina Teoso sākire kākitemoni —itxana.

²⁶Ininiā Teoso misākiretiko aikoti nīkatakani auīte, initiriakorikata sari iuaā. Ninoa minana Xesosi iokanatakini iuaīkana auītetxiakorimoni. Imaīkasaakina, kona iaritatana, kotxi ipīkarina kākiti kai soroā kiporonakinina. ²⁷Ninoa apokasaaki, ipaniātana Xesosi iokanatakini Xoteoakori kōtākikarerini apisatoō itiminina. Sasetotxi auīte apiatakari txana:

²⁸—Mitxi ate paniātai Xesosi sākire himasāpiretakani kākitemoni. Txamari hōerekapanikari iua sākire ikinimane Xerosareē auakanimoni. Ate xika Xesosi ipina, hītxanāta ikinimanemoni —itxa sasetotxi auīte.

²⁹Ininiā Petro, apanakini Xesosi iokanatakinkata apakapapiretari:

—Ate kīpitari Teoso paniātakiti. Kona kākiti paniātakitini akīpita. ³⁰Teoso, akiomaneakorini Teosone, ōkitikari Xesosi iuaīkana auini īkapani. Hītera okari iua Xesosi aamina ipiriāmitakari nopini. ³¹Iuaritika Teoso takari Xesosi ikikomoni. Itxīkitakari iua auītetxi ininiua. Kākiti maerekani makatxaākari itxaua. Ininiā Isaeo auakani takanapiniāri imaerekani, Xesosi makatxakari ninoa maerekani. ³²Ikara ate imarota. Apaka Erekari Matamatakoti imarotari ikara. Teoso sikari iua Erekari Matamatakoti isākire kīpitakanimoni —itxa Petro ninoamoni.

³³Ikara ikenakotakasaakina, iteene omanākarauatana. Ininiā ninoa:

—Māokana —itxana.

³⁴Iuasaaki Kamarieo inakori ōkitikaua kōtākikarerini sauaki. Pariseo itxaua. Teoso paniātakiti oerekakari itxaua. Ikinimane paxitari iua. Ininiā iua txari:

—Hanikana naia mapara atenoka asākirauatini īkapani —itxa.

³⁵Ininiā eereka itxana:

—Isaeo tixini auakanii, hūkitetariko hīkamakiti ninoa Xesosi moianariakorimoni. ³⁶Akokaxiti auari Teota inakori. Iua txari: “Auītetxi apiatakari nitxaua nota,” itxa. Iuasaaki koatrosētosi kikiakori moianatari iua. Auikarina iua sākire. Txamari okapeēka iuani. Eereka iuakata sikani iarikape. Iua auītetxi ininiua xipope. Isākire !auikaākaika.

³⁷—Teotani ipinaka atoko Xotasi Kariréiakiri apoka. Iuasaaki auītetxiakori iaōtari ikinimane kākiti. Kaiāopokori kākiti

auikari iua Xotasi sãkire, ininiã ninoa moianatari iua. Iua Xotasi imoianariakorikata nirekari ixipokinina auĩtetxiakori. Txamari iua apaka okapeẽka, ininiã imoianariakori iarikape.

³⁸—Ininiã uatxaikara nõtãkikai hĩte: “Hĩtakanapanako ninoa Xesosi iokanatakini. Hĩsikakanako ninoa, kotxi atxiĩti ninoa !ikamari Teoso paniãtakiti, ininiã paĩtiki ninoa sãkire apaka !auaika. ³⁹Txamari, ninoa kaminiãri Teoso paniãtakiti, erepaniko, kotxi atxiĩti hinaiatari Teoso” —itxa Kamarieo.

Iuasaaki ninoa Xoteo õtãkikakani kĩpitari Kamarieo sãkire. ⁴⁰Akiritana Xesosi iokanatakini iuaĩkana iĩroinina. Ipaniãtari ninoa xirokitatiko. Ininiã ninoa:

—Xesosi sãkire kona hĩsãpiretapinikako —itxana.

Eereka sikaka itxana isinina ĩkapani. ⁴¹Isikasaakina, ipoxokoniuatana.

—Teoso apokaerekataua ate, kotxi auritari amisiritiko Xesosi sãkire aũuikini xika —itxana.

⁴²Ininiã ikiniõtika oerekarauatana Teoso misãkiretiko aikoti ãki, kãkiti aapoko ãki apaka. Isãpiretarina erekari pirena Xesosi Teoso mereẽkiti ininiua pirena.

Setxi Kikiakori Mereĩko

6 ¹Xesosi sãkire auiãkani apiaãpota. Iuasaaki Xoteoakori Kreko sãkire imarotakani taparakienatana apanakini Xoteoakori. Itxana: —Atekata auakani sitoakoro tikinitakoni kona apakapari nipokori ikiniõtika apanakini tikinitakoni apakapiniri atoko —itxana ninoa.

²Ininiã Xesosi iokanatakini tosi pakini pĩkapiretana ikinimane Xesosi sãkire auiãkani. Itxana:

—Kona erekari ate takanapiniri Teoso sãkire aõerekini asikakienarauatini ĩkapani. ³Ininiã setxi kikiakori himereẽko, ikara parĩkatxi ikaminina ĩkapani. Himereẽna Erekari Matamatakoti paniãtakitinoka kamakani. Himereẽna kimarorerini. Ininiã asikana ia parĩkatxi ikaminina, sitoakoro tikinitakoni isikakienatinina ĩkapani. ⁴Ininiã atepekana, Teoso amisãkireta. Isãkire aõereka. Ikaranoka akamako ikiniõtika —itxana.

⁵Ikinimane Xesosi sãkire auiãkani apokaerekatari Xesosi iokanatakini sãkire, ininiã ninoa mereẽri Estevão. Iua iteene auikari Teoso sãkire. Erekari Matamatakoti paniãtakitinokara ikama. Apaka imereẽna Piripima, Porókoroma, Nikanooma, Tximoma, Pamenama, Nikoraoma pakini. Iua Nikorao ãtxiokiakiri

itxaua. Mitxi Xoteo minakatiua iua, eereka imamakaua. Xoteopeka itxapekua. ⁶Xesosi sākire auiākani minana ninoa Xesosi iokanatakinimoni. Ininiā Xesosi iokanatakini misākiretari Teoso. Iuakona itakana ninoa nopini, ikara Teoso parika ikaminina tīkane.

⁷Ikara atoko ininiā, Teoso sākire iaripireta apikoxiti. Ininiā mokatanitika kaiāori Xerosareē auakani auikari Xesosi sākire. Ito sasetotxiakori apaka kīpitari Xesosi sākire.

Estevão Maīkiko

⁸Estevão iteene auikari Xesosi sākire. Teoso posotiire aua iuamoni. Kaposotiireri iua, ininiā ikamari kākiti mimarotakiniti. Ikamari posotiiretxi, Teoso posotiire oerekini ĩkapani. ⁹Txamari ātikaka kikiakori !inirekari iua. Ninoa āti Xoteo apotiitiniātaāua aikoti sikani. Ninoa “Ninoaka nireēkiti kamakani” akiritaākana. Ninoa Sireni sitatxitikini, Arexātria sitatxitikini, Sirísia tixinikini, Ásia tixinikini pakini. Ninoa iteene misākiretakakaua Estevãokata, kotxi !auikarina iua sākire. ¹⁰Txamari Estevão sākirauataka atoko, !kasākireikana, kotxi Erekari Matamatakoti sikaimaroretari iua Estevão. ¹¹Ininiā ninoa sikari txineiro apanakini kikiakorimoni Estevão apoītinina ĩkapani. Ininiā ninoa txineiro apakapakani txari: —Ate kenakotari iua, Moisesini imisākirepiretini, Teoso apaka imisākirepiretini —itxana.

Txamari na atāoni isākirena. ¹²Ikara isākirena xika, kiomātxiakori, kaiōkatsopareriakori, apanakini kākiti pakini naiataua, ininiākara imaīkarina Estevão, kōtākikarerinimoni anika itxarina iua.

¹³Eereka iminana apanakini, Estevão imisākirepiretinina ĩkapani. Ninoa txari:

—Ia kiki misākirepiretapikari Teoso misākiretiko aikoti. Apaka kona inirekari Moisesi paniātakiti. ¹⁴Ate kenakotari iua sākire: “Xesosi Nasareekiri xipokariko Teoso misākiretiko aikoti. Ixipokariko akiomaneakorini sākire Moisesini paniātakiti.”

Ikara atoko aāpirena ikamana ninoa. ¹⁵Ikinimane ninoa kākiti ōtākikakani atamatarari Estevão toō. Teoso nitiri iaxitikiri toō atokokana itxa Estevão toō.

Estevão Sākirauata Kōtākikarerimoni

7 ¹Ininiā sasetotxiakori auīte apiatakari txari Estevão: —Atāokani ninoa sākire?

²Estevão txari:

—Nikiomaneakori, nitariakori pakini, hīkenakotanoko. Teoso iaxitikiri oerekaua aātokirini Apraāonimoni. Mesopotámia tixini auakasaaki, Araã tixini auini apisapanika, Teoso motika iuamoni.

³Iusaaki Teoso txari iua: “Pitakanapariko pitixine, pinirimane pakini. Āti tixinimoni pisako. Noerekinimoni pisako,” itxa Teoso. ⁴Ininiã sipe itxa Apraão. Itakanapari Kaotéia inakori tixini. Araã tixinimoni iua sipe. Araã auakasaaki irini ipīpe. Irini ipinaka atoko, Teoso mīpiri iua uaimoni uatxa aāuiniātaã. ⁵Apraão auakasaaki, Teoso !isikari uai tōpa iuamoni iua nakiti inini ĩkapani. Kona ipixini metro isika iuamoni inakiti inini ĩkapani. Isikaenetari uai tōpa iua, imekaniriakori pakinimoni. Txamari !keeneri iua iusaaki. ⁶Teoso txari Apraāomoni: “Pamariteni, pimekaniriakori, papika mekaniriakori auako āti kākiti tixine. Iuaārako imisiritapeēkanako koatrosētosi anokanani. Iparīkauatana apanakini ĩkapani maxikatiūka. Ininiã iteene imisiritiko aua.”

⁷—“Ininiākara nimisiritariko ninoa misiritakani. Eereka Apraão apika mekaniriakori takanapariko iuaã, uaimoni kanapiriã itxanako. Ininiã ĩkorapokoriti ninoa parīkauatako nota ĩkapani,” itxa Teoso. ⁸Ininiã Teoso txari: “Hīte kitsotakariko ikini hamariteni tsiki mata. Ikara nitakaōtxikare hātamatakasaaki, hīxinikariko nisikaenetakiti,” itxa Teoso. Eereka Apraão ākiri aua, Isaki inakori. Oito ōtipeka auini ōti inakasaaki, Apraão kitsotakari itsiki mata. Isaki aneēkasaaki, imi Xakoo inakori aua. Eereka Xakoo anaakori auapeka tosi pakini. Ikara tosi imiakori aātokiriakorini iriakori itxauana.

Xosee Pirena

⁹—Xakoo anaakori xikotari itarina Xosee inakori. Ininiã itariakori vēxtitari iua Exito sikanimoni. Iuaritika Teoso auapika iuakata. ¹⁰Imisiritiko auakasaaki, Teoso moianatari iua imapinakani ĩkapani. Iusaaki Exito auakani auīte Paraoo inakori. Teoso sikaimaroretari Xosee, ininiã Paraoo potxitari iua, ininiã Paraoo txari iua: “Exito auakani auīte pitxauako. Naapoko auakani pinīkata apaka,” itxa Paraoo Xoseemoni.

¹¹—Eereka makienanitxi aua Exito tixiniã, Kanaaã tixiniã apaka, ininiã ikinimane natxita. Aātokiriakorini apaka !auari nipokori. !Apokari nipokori. ¹²Ininiã Xakoo kenakoenetari triko auini Exito tixini. Ininiã ipaniātana tesi imiakori Exito tixinimoni isinina. Mītxi !isana Exitomoni.

13—Ininiã iuaĩkana ãti õti isana Exitomoni, kienatxi iamotinina ĩkapani. Iuasaaki Xosee oerekaua ninoamoni. Iuasaaki Paraoo imarotari Xosee nirimane. 14Ininiã Xosee pĩkapiretari iri Xakoo, itariakorikata, inirmanekata. Setẽta sĩko pakini kãkiti sari Exito tixinimoni, kotxi aua ikinipoko nipokori iuaã.

15—Ininiã Xakoo apanakinikata sari Exitomoni. Iuaã mapakanani atoko Xakooni ipĩpe. Eereka aãtokiriakorini ipina iuaãtaã apaka. 16Ninoa ipĩkasaakina, iĩtona anikapeẽka Sikeẽ tixinimoni. Iuaãkiri akauaritiã ikata inapeẽkana. Apraãoni auapanika inakasaaki, iamotari iua akauari Emoo ãkiriakorimoni.

Moisesi Pirena

17—Itixi Teoso sikaenetakiti Apraãomoni kaiamapeka Xoteoakorimoni inakasaaki, kãkiti Isaeokini kaiãopokoikana Exito tixiniã. 18Itokanani napaka atoko, ãti Exito auakani auĩte Xoseeni mimarotakati aua. 19Iua auĩtetxi misiritari anirmanearorini. Ininiã sotatoakori mixirika itxapena amarini xapitiri. Eereka oka itxapena.

20—Iuasaakiikara Moisesi iponaniã. Moisesi amarinipanka inakasaakia peerepatikiri. Ipi, ãti pakini kasiriti iri, inoro pakini nĩkatari iua ninoa aapoko. 21Eereka ninoa takanapari iua Paraoo ãkero kipaãtiniãtaãua takote. Ininiã oa apokari iua amarini. Oanikari oaãpokomoni. 22Exito auakani imarore ikinipoko oerekaãka iuamoni. Kasãkireri iua. Kakamareri iua.

23—Koarẽta anokanani inakasaaki, inirekari inirimane Isaeokini aõkitini. 24Inirmanemoni isikasaaki, itikari Exito auakari xirokitatiniri kiki Isaeokiri, ininiã ixikatxitari. Iua aritapiri Exito auakari, oka itxapiri iuani. 25Iuasaaki Moisesi uãkatari inirimane Isaeokini imarotini Teoso nirekari Moisesi makatxakinina ninoa, Exito auakani mamisiritakanina ĩkapani. Txamari ninoa ĩmarotari ikara. 26Apikomoni ãti õti, iua sari inirmanemoni. Iuaã iua apokana ninoa neenamuanãtini, inaiapoatakauana. Ininiã Moisesi õtãkikana ninoa. Itxana: “Kikiakori hĩaritakakaua. Kinirepa himisiritakakaua?”

27—Inirimane misiritakari katika txari Moisesi: “Kipa txai pite ate auĩte pininiua? Kipa txai pite ate õtãkikakari pininiua? 28Kita Exitokirini pokini atokokana pokatanoko nota?” itxa. 29Ikara sãkiretxiti ikenakotakasaaki, Moisesi takanapari Exito tixini. Mĩtxiaã tixinimoni isa. Iuaã ĩtanorouata. Ipi imiakori aua iuamoni.

30—Koarêta anokanani âparaã makipakaniãtaã iua aua iusaaki. Teoso nitiri iaxitikiri motika Moisesimoni ixirata Sinai inakoriãtaã. Iusaaki iua atamatari aanaia tirinini, txama !rika. !ixipoka.

31 Ikara itikasaaki, Moisesi tsorïkaãta, ininiã aanaia takote isa iteene atamatini ïkapani. Iusaakipeka ikenakotari Apiananiri sãkirauatini:

32“Pikiomaneakori Teosonekarano nota. Apraã, Isaki, Xakoo pakini Teosonekarano nota,” itxa Teoso. Iusaaki Moisesi kikinana ipïkare xika. Ipïkari Teoso sãkirauatini manapi atamatini.

33—Ininiã Apiananiri txari iua: “Pikitimata pimaktxaka, kotxi uai pitiminiãtaã nota auanãta. 34Nitikana ninakitiakori Exito tixiniã. Exito auakani misiritapena ninoani. Nikenakotari oõkinina. Nota inari nisikakinina ïkapani. Ininiãkarako Exito tixinimoni niokanatai pite,” Apiananiri txari Moisesi.

35—Iua Moisesi Isaeokini manirekakiniti, kotxi ninoa txari: “Kipa txai pite ate auïte pininiua? Kipa txai pite ate õtãkikakari pininiua?” itxarina. Iuakara Teoso iokanatakiti ninoamoni ninoa auïte ininiua ïkapani, ninoa imaktxakini ïkapani, kotxi Teoso nitiri aanaiaã tirinakariã auakari iokanataru iua ninoamoni.

36—Eereka iua makatxakana ninoa Exito tixini. Oerekari Teoso posotiire kãkiti maposotakinini Exito tixiniã. Oerekari Teoso posotiire potxoari uiniti, Põkamarari inakoriã. Âparaã makipakaniãtaã apaka oerekari Teoso posotiire koarêta anokanani iuaãtaã.

37—Ia Moisesikara sãpiretana Isaeokini: “Teoso iokanatariko isãkire sãpiretakari hïtemoni nota iokanatini atokokana. Hïte nirimanekara iua. Hïkenakotariko iua sãkire,” itxa Moisesi.

38Moisesi aua Teoso nakitiakorikata âparaã makipakaniãtaã. Aãtokiriakorini aua iuakata. Apaka Teoso nitiri iaxitikiri aua iuakata. Iua Teoso nitiri misãkiretari Moisesi ixirata Sinai inakoriãtaã auakasaaki. Iua apakapari Teoso sãkire, atemoni isikini ïkapani. Iua Teoso sãkire txïkitakari iua sãkire auïãkani âtipirika auini Teosokata.

39—Aãtokiriakorini kona nirekari inïkaenetinirina Moisesi sãkire. !Nirekarina iua. Inirekarina Exitomoni ikanapiriinina. 40Iusaaki ninoa paniãtari Arã: “Teosoakori kamakoni pikaminaua, ate mikiikakani tïkane. ïkora Moisesi Exito tixini amaktxakakiri, ïtapari iua? !Aimarotari iua auiniãtaã,” itxarina Arãomoni. 41Ininiã ninoa kamari kema auïte ãkiri atoko inakari oro kamakori iteosonetinina ïkapani. Eereka okarina soti auïte teoso ikamakitina

isikinina ìkapani. Kiiniri ikamana. Ipoxokoniuatana, kotxi ninoaka kamari iteasonena. ⁴²Txamari Teoso atão inakari takanapana ninoa. Ininiã iteasonetarina iaxiti auakani iõriki, kasiri, atokatxi pakini. Teoso sãkire sãpiretakani kitxakapirîka iõkatsopatarì ia sãkiretxiti:

Hîte Isaeokini, koarêta anokanani ãparaã makipakaniãtaã hãuakasaaki, !hõkari pirãtxi nota ìkapani.

⁴³Iuasaaki hîte anikari papiri aamata kamakori hîteosone Moroki inakori ìkapani. Apaka iõriki atoko inakari hîteosone Hêpaã inakori hîkamakiti hanika hîtekata iuasaaki. Hîte kamari Moroki, Hêpaã pakini hîteosonetini ìkapani. Ikara xika nota iokanataiko hîte ãti kãkiti tixinemoni. Papirõnia sitatxiti apikoxiti niokanatai hîte.

Teoso Papire Pirena

⁴⁴—Aãtokiriakorini auari papiri aamata kamakori Teoso misãkiretiko papire ãparaã makipakaniãtaã auakasaakina. Moisesi kamari iua papiri Teoso paniãtakiti iaõka, kotxi Teoso oerekari Moisesi iua papiri kamiko. ⁴⁵Moisesi ipinaka atoko apanakini aãtokiriakorini apakapari iua papiri irina sikakiti. Ininiã iuasaaki ninoa anikari iua papiri, Xosoeekata isikasaakina, ãti uãka tixine imixirikasaakina, kotxi Teoso omitikana ninoa ãti uãka, aãtokiriakorini apokasaaki iuaã. Iua papiri kaikota iuaã. Auapanika iuaã Tavii aãtokiriakorini auîte inakasaakia. ⁴⁶Teoso apokaerekatarì Tavii, ininiã Tavii nirekari Xakoo Teosone misãkiretiko aikoti ikamini. ⁴⁷Txama Teoso !auritarì Tavii kaminiri. Ininiã Saromão, iua ãkiri kamari Teoso misãkiretiko aikoti.

⁴⁸—Teoso Apiananiri kona aua aapokotxi kãkiti kamakiti ãki, kotxi Teoso sãkire sãpiretakari kitxakapirîka txari:

⁴⁹Apiananiri txari: “Niitopãkiniãtaã iaxiti itxa. Itixi nikiti nitakiniãtaã. Ininiã kanatokopa itxa aapokotxi hîkamini nota ìkapani? Namonipa nauiniãtaã?”

⁵⁰Kotxi notakara kamari ikinipoko,” itxa.

Erekari Matamatakoti Manirekakani

⁵¹Estevão sãkirauatapanika:

—Hîte kona kinirão kenakotaka txari Teoso sãkire. Hîtsiki mata kisauakaãkapitika, txamari kona hîkenakotari Teoso sãkire hãkixinireẽ. ãtipirika kona hinirekari Erekari Matamatakoti paniãtakiti hîkamini. Hãtokiriakorini kitxakapirîka atokotxikana hîte. ⁵²Hãtokiriakorini

misiritana ikinimane Teoso sãkire sãpiretakani. Ninoa okana iua sãkire sãpiretakani, Erekarinoka Kamakari sãpiretakani. Ninoa Teoso sãkire sãpiretakani sãpiretari Erekarinoka Kamakari äti öti uai apokini. Ìkorsaaki hïtera mïkapiritari iua. Hïtera okari iua Erekarinoka Kamakari. ⁵³Hitekara apakapapekari Teoso sãkire Teoso nitiriakori mïkiti. Iuaritika !hïkamari ipaniätakiti —itxa Estevão.

Estevão Kiporonakiko

⁵⁴Xoteoakori kenakotakasaakiri Estevão sãkire, omanãkarauatana. Akatsakatsiriïtauana omanãkarena xika. ⁵⁵Iuaritika Erekarini Matamatakoti iteene sikataparaxiniretari Estevão. Iuasaaki iua ionakaãta iaxiti. Atamatari Teoso iotximere. Atamatari Xesosi timini Teoso kikomoni. ⁵⁶Ininiã itxa:

—Hätamata. Natamatari iaxiti xorekini. Aïtari iaxitikiri tima Teoso kikomoni —itxa Estevão.

⁵⁷Iuasaaki Xoteoakori totari ikenakokina iuakoãna. Iteene ninoa akiripoakata. Eereka ninoa ikinika miteka iuamoni. ⁵⁸Imaïkarina. Ikosekaãpotarina sitatxi mapotökire. Iuaãtaã ipotorikana ikiporonakinirina iua kai soroã. Iuasaaki itikarauatakani takari imäkana Saoro inakori kiti takote inïkatini ïkapani.

⁵⁹Ikiporonakasaakirina, Estevão akiritari Teoso. Itxari:

—Apiananiri Xesosi, papakapariko nixinire.

⁶⁰Iuasaaki ikapotoreëkaua. Itapasãkireritika akiritari Teoso:

—Apiananiri, pimaxinïkaretariko ia maerekati ninoa kamakiti —itxa.

Iuasaakipeka ipïpe.

Xesosi Sãkire Auiäkani Misiritiko

8 ¹Estevão ipïkasaaki Saoro aua iuaã.
—Ari erekapitikari ipinini —itxa Saoro.

Estevão ipinini ötisaakipeka ipotorika Xesosi sãkire auiäkani misiritiko Xerosareë. Ninoa iteene misiritaãka, ininiã ikinimane Xesosi sãkire auiäkani Xerosareë auakani iarika itxapena. Xotéia töpamoni, Samaria töpamoni pakini iarikana. Xesosi iokanatakininoka kaikota Xerosareë. ²Estevão ipinaka atoko kikiakori Teoso sãkire auiäkani katari iuani. Iteene itxiapatana. ³Iuasaaki Saoro potorika ixipokinina Xesosi sãkire auiäkani. Ninoa aapokomoni isaãpota. Kikiäkini, sitoakoro apaka ikosekaïtota, taka itxana kateia äki.

Piripi Samariamoni Sini

⁴Teoso sākire auiākani iarikasaaki, isāpiretarina Teoso sākire ikini aapokotxitiā. ⁵Piripi sari Samaria sitatxitimoni. Iuaā iua sāpiretari kākiti Xesosi Teoso mereēkiti ininiua. ⁶Isākire ikenakotakasaakina, posotiiretxi ikamakiti itikasaakina, iteene ikenakotarina isākire. Imixinikarina isāpiretakiti. ⁷Maerekani matamatakoni kākiti auaitotakini takanapari kākiti. Akiripoakatana ipokīkasaakina. Kaiāopokori matīpokotakani apaka makananitaāka. ⁸Ininiā Samaria auakani iteene poxokoniuata.

Miiti Simão Inakori

⁹Iuasaaki Samaria sitatxitiā aua kiki Simão inakori. Miiti itxaua iua. Imisirienetana kākiti Samaria auakani. Ininiā ikinimane tsorīkaāta, ikamakiti atamatakasaaki. Iua iuikaua.

—Kimaroreno nota —itxa.

¹⁰Ininiā ikinimane kīpitari iua sākire. Auītetxiakori, poiāorini pakini kīpitari isākire. Ininiā itxana:

—Iua Simão auari Teoso posotiire. Kaposotiireri iua —itxana.

¹¹Ininiā ikīpitarina isākire, kotxi itokatapeka itikarina ikamakiti kākiti mimarotakiniti. ¹²Ninoa auikasaakiri Piripi sāpiretakiti erekari pirena, Teoso auītetxi ininiāua pirena, Xesosi Kristo posotiire pirena pakini, kikiakori, sitoakoro apaka patxisataāka. ¹³Iuasaaki Simão apaka auikari. Ipatxisataāka. Ininiā isari Piripi sinimoni, kotxi itsorīkaāta, posotiiretxi kākiti mimarotakiniti itikasaaki.

¹⁴Xesosi iokanatakini Xerosareē auakani kenakopiretari Samaria auakani auikiniri Teoso sākire. Ininiā ninoa iokanataro Petro, Xoão pakini Samariamoni. ¹⁵Iuaā apokasaakina, imisākiretarina Teoso, Erekari Matamatakoti isākire auiākani apakapini ĩkapani. ¹⁶Erekari Matamatakoti kona apokapanika ninoamoni iuasaaki. Apiananiri Xesosi uākaānanira ipatxisataākana. ¹⁷Ininiā Petro, Xoão pakini takari iuakona ninoa nopini. Iuasaakipeka apakaparina Erekari Matamatakoti.

¹⁸Simão itikasaakiri Erekari Matamatakoti apokini kākitimoni, kinirāo sikaka itxaro txineiro Petro, Xoão pakinimoni. ¹⁹Ininiā itxa:

—Īkora hīposotiire hīsikano, niuako kākiti nopini nitakasaaki, Erekari Matamatakoti ninoamoni apokini ĩkapani —itxa.

²⁰Txamari Petro txari:

—Pite, pitxineirotekata samakauako, kotxi pite uākatari pitxineirote iamotiniri Teoso posotiire. ²¹Kona xapiti pitemoni auapani ia parīkatxi, kotxi pākixinire na atāo Teoso apisatoō. ²²Ininiā pitakanapariko ikara pimaerekani. Pamanaāri Apiananiri pimaerekani imakatzakini ĩkapani. Atxiīti iua maxinīkaretari pixinikakiti pākixinireē. ²³Nota imarotai pite. Pākixinireē xāpoākata maerekatinoka. Pimaerekani maīkai. !Auiritai pisini pinirekinimoni —itxa Petro.

²⁴Ininiā Simāo apakapiretari:

—Pimisākiretariko Teoso nota ĩkapani. Ikara atoko pisāpiretakiti na ninireka —itxa Simāo.

²⁵Petro, Xoāo pakini sāpiretari Xesosi kamakiti ninoa ĩkapani. Isāpiretarina Apiananiri sākire. Eereka ikanapiriāna Xerosareēmoni. Ikanapiriaāpotakasaakina, isāpiretarina Teoso iokanapirena erekari kaiāopokori aapokotxi auakanimoni Samaria tōpa.

Piripi Etxiópeziakirikata

²⁶Eereka Apiananiri nitiri iaxitikiri misākiretari Piripi:

—Paiamatako. Atokatxi pokīkinimoni pikikomoni pisako. Pisa kimaporimoni, āparaā makipakaniātaā. Iua kimapori Xerosareē Kasa tixinimoni sikari.

²⁷Ininiā aiamata, sipe itxari. Ipixinipokoriti aōkitari Etxiópezia tixinikiri. Etxiópezia auakani auīte otākikakari itxaua. Paimatireri iua. Ikinimane kamari iua paniātakiti. Etxiópezia auakani auīte sito Kātasi inakoro. Kaiāopokoro otxineirote, otii pakini. Iua kiki parīka ikinipoko oa nakiti inīkata oa ĩkapani. Mitxi iua sari Xerosareēmoni Teoso imisākiretini ĩkapani. ²⁸Ikanapiriākasaaki, mitekaī āki iitopākasaaki, atatsopatarī Isaía iōkatsopatakiti. Isaía Teoso sākire sāpiretakari kitxakapirīka. ²⁹Iuasaaki Erekarī Matamatakoti txari Piripi:

—Pisa okira mitekaīmoni. Pikaikota oa takote.

³⁰Ininiā Piripi miteka iuamoni. Ikenakotakasaakiri Isaía iōkatsopatakiti atatsopatini, Piripi pimaāri:

—Pimarotatarī ere patatsopatakiti? —itxari.

³¹Ininiā iua:

—Natokopa ininiāpa nimarotari? Kipa oerekano? —itxari.

Ininiā aiatarī Piripi mitekaī āki iuakata iitopākini ĩkapani. ³²Iua iōkatsopatarī ia Teoso sākire:

Soti auíte okikomoni anikiko atoko itxa iua. Soti auíte ākiri piti kisauakikosaaki, !kasākireri iua. Iua soti auíte ākiri atoko itxa iua, kotxi iua apaka !kasākireri.

³³ Inapetaāka iua. !Atāoni kākiti kama iuamoni. Okaākape. !Auari iua ākiri.

Ikara atoko itxa Teoso sākire, Isaía iōkatsopatakiti.

³⁴ Ininiā iua Etxiōpiakiri pimaāri Piripi:

—Pisāpiretano, natokopa itxa Teoso sākire sāpiretakari sākire? Kipa soti auíte atoko inakari? Kipa okaāka? Iuakani? Ātikani?

³⁵ Ininiā Piripi oerekari ikara Teoso sākire iōkatsopatakori.

—Xesosira ikara atoko inaāka —itxa.

Ininiā apikomoni isāpiretari Teoso iokanapirena erekari, Xesosi pirena.

³⁶ Isaāpotakasaakina, apokana āparaā auiniātaā. Ininiā iua kiki txari:

—Uai aua āparaā. Apakata nipatxisatiko?

³⁷ Ininiā Piripi txari iua:

—Apakatapitika pipatxisatiko iteene pauikiniāri Xesosi sākire pākixinireē.

Ininiā iua apakapapireta:

—Nota auikapitikari Xesosi Teoso mereēkiti, Teoso ākiri ininiāua.

³⁸ Ininiā iua Etxiōpiakiri paniātari mitekaī anikakari iotokini. Iuasaaki Piripi, iua Etxiōpiakiri apaka katxaka, imaāta itxana. Ininiā Piripi patxisatari iua kiki.

³⁹ Ikanīkiitakasaakina, Erekar Matamatakoti anikari Piripi. Ininiā iua kiki kona atamataikari Piripi. Ininiā iāpotapitipo. Ipoxokoninoka itxa. ⁴⁰ Iuasaaki Asoto sitatxitipeka itokiā Piripi. Isaāpotakasaaki, ikinika aapokotxitiā isāpiretari Teoso sākire. Teoso sākire isāpiretiniritika Sesaréia sitatxitimoni apokako.

Saoro Auikiniri Xesosi Sākire

(Átosi 22.6-16, 26.12-18)

9 ¹ Iuasaaki Saoro okaenetapikana Apiananiri sākire auiākani. Ininiā iua sari sasetotxi auíte apiatakarimoni. ² Amanaāri aātsopa Saoro parīka sāpiretiko aātsopati. Iua nirekari sasetotxi auíte iōkatsopatiniri ikara, Saoro anikini iġapani. Inirekari isikiniri iua aātsopa ikinika aiko Xoteo apotiitiniātaāua nīkatakanimoni Tamásiko sitatxiti, kotxi Saoro nirekari imaīkinina Xesosi sākire auiākani, kikiakori, sitoakoro pakini, Tamásiko sitatxitiā apokakini. Inirekari anikinina Xerosareēmoni.

³Iua apokaãpotakasaaki Tamásiko sitatxitimoni, katimaritika iotximeretxi iaxitikiri ákitari. ⁴Irika xitipe. Ininiã ikenakotari sákiiretxi: —Saoro, Saoro, kinirepa pimisiritano? —itxa ikenakotakiti.

⁵Ininiã iua:

—Kiriparai Apiananiri?

Ininiã:

—Xesosira nota. Pimisiritakitikarano —itxa Xesosi.

⁶Ikikinanaka, iteene ipíkarauatiniã.

—Apiananiri, kipa pinireka nikaminii? —itxa.

Ininiã Apiananiri:

—Pókitikaua, sitatxi pisa. Iuaã áti sápiretai pikamakiti tíkane —itxa Xesosi.

⁷Imoianariakori iotoka. Ipíkarauatana. Masákiireninoka itxana. Ninoa kenakotari iaxitikiri sákiire, txamari !atamatarina.

⁸Eereka Saoro ókitikaua, xorekaãta itxa, txamari imosiãretapeka iua. Ininiã imoianariakori anikari iua. Ikanõpiãpotarina Tamásikomoni. ⁹Ipi, áti pakini óti mósiãretika itxa. Iuasaaki !inipokota. !lãta.

Ananíasi Makananitiniri Saoro

¹⁰Tamásiko sitatxiti aua kiki Xesosi sákiire auiãkari, Ananíasi inakori. Iuasaaki Teoso sákirauata Ananíasikata itaponemoni. Itaponeẽ Apiananiri akiritari iua:

—Ereẽkai Ananíasi —itxa.

Ininiã:

—Uaikarano nota, Apiananiri —itxari Teoso.

¹¹Apiananiri txari:

—Paiamatako. Kimapori Eretíka ãpori kimaporitimoni pisako. Xotasi aapokomoni pisa. Iuaã pinitari Taaso sitatxitikiri Saoro inakori. Uatxiikara isákirauanãta notakata. ¹²Saoro taponetai pite. Iua atamatai pite apokini iuamoni, piuako inopini pitakini íkapani iuaíkana kósiãrepeka inini íkapani —itxa Teoso.

¹³Ininiã Ananíasi:

—Apiananiri, kákitipokoni sápiretano ikara kiki pirena. Pamonókoniri iua. Imisiritapekana pite nakitiakori Xerosareẽ sitatxiti auakani. ¹⁴Sasetotxiakori auíte paniãtari iua imaíkinina piuãka akiritakani uai Tamásiko sitatxiti auakani —itxa Ananíasi.

¹⁵Ininiã Apiananiri txari:

—Pisako iuamoni. Nota mereẽpekari iua kiki, nota parĩka ikamini ìkapani. Iua sãpiretariko nota sãkire Xoteo minakonimoni, auĩtetxiakorimoni, Isaeo tixini auakanimoni pakini.

¹⁶Noerekariko Saoro iteene atatsiirauatini nota sãkire auikini xika —itxa Teoso.

¹⁷Ininiã Ananíasi sari Xotasi aapokomoni. Iĩroã. Eereka iuako itaka Saoro nopini.

—Nitari Saoro, Apiananiri Xesosi, paõkitakitira kimaporiã, iuara iokanatano nota pitemoni kõiãrepeka iuaĩkana pinini ìkapani. Iokanatano nota pitemoni Erekari Matamatakoti papakapini ìkapani —itxa.

¹⁸Iuasaakipeka oki nopini auakari katxaka. Ximaki tãta atoko itxa. Kõiãrepeka itxa. Eereka õkitikaua. Iuasaaki ipatxisataãka.

¹⁹Inipokotaka atoko, itapara auapeka.

Saoro Tamásiko Sitatxiti Auakasaaki

Saoro kaikota Tamásiko mapaõti Xesosi sãkire auĩãkanikata.

²⁰Iua sari aiko Xoteo apotiitiniãtaãua. Iuaã oerekarauata.

Oerekari Xesosi Teoso ãkiri ininiãua. ²¹Isãkire kenakotakani tsorĩkaãta.

—Iua Saoro okana Xesosi uãka akiritakani Xerosareẽ auakani.

Iua ina uaimoni Xesosi uãka akiritakani imaĩkini ìkapani, sasetotxi auĩteakorimoni anikinina ìkapani —itxana.

²²Saoro oerekarauatakasaaki, imaroãpotari Teoso imarore.

Teoso sikaposotiireãpotari iua. Ininiã iteene imarotari Teoso sãkire, apanakini oerekini ìkapani. Iua atoko ininiã, itaparaxinireritika oerekari Xoteoakori Tamásiko sitatxiti auakani Xesosi Teoso Mereẽkiti ininiãua. Ininiã ninoa !imarotari apakapapiretinirina iua.

²³Mapaõti atoko Xoteoakori sãkirauatakaka Saoro okinina ìkapani. ²⁴Saoro sãpiretaãka Xoteo aiamatapeka okinirina iua. Ninoa iãtapapikari sitatxi ìronakikoãtaã okinirina tĩkane. Ìkanõka, pokamara iãtaparina iua.

²⁵Iuasaaki ìkanõka Xesosi sãkire auĩãkani anikari iua sitatxi pirikeremoni. Iuaã Saoro ieretakaua kotari ãki. Pirikeri sonaã iokatxakarina Saoro kotari ãki sitatxi mapara. Iposo atoko imiteka Xerosareẽmoni.

Saoro Xerosareë Apokini

²⁶Saoro apokasaaki Xerosareë, inirekari Xesosi moianariakori imoianatini. Txama ikinikana p̄kari iua. Kona !auiritarina iua moianatinina ninoa, kotxi !auikarina iua atão auikiniri Xesosi sãkire. ²⁷Iuaritika Panapee anikari iua Xesosi iokanatakinimoni. Isãpiretana ninoa:

—Kimaporiã isikasaaki, Saoro aõkitari Apiananiri. Apiananiri misãkiretari iua. Tamásiko sitatxiti auakasaaki, itaparaxinireritika isãpiretari Xesosi sãkire kãkitimoni —itxa Panapee.

²⁸Panapee sãkire ikenakotakasaakina, auikarina Saoro sãpiretakiti. Ininiã Saoro kaikota Xerosareë Xesosi sãkire auiãkanikata. Inirekinimoni isa Xerosareë. Isinimoni itaparaxinireritika isãpiretari Apiananiri Xesosi sãkire. ²⁹Isãkirauata Xoteoakorikata, Kreko sãkire imarotakanikata. Inirekarina ninoa imarotiniri Xesosi sãkire. Txamari inirekarina okinirina iua. ³⁰Iuasaaki Xesosi sãkire auiãkani imaropiretari ninoa okaenetiniri Saoro, ininiã anikarina sitatxi Sesaréia inakorimoni. Eereka iokanatarina iua Taaso inakori sitatxitimoni.

³¹Iuasaaki Xesosi sãkire auiãkani !imisiritaãkaika. Xotéia tōpa, Kariréia tōpa, Samaria tōpa pakini !uaika Xesosi sãkire auiãkani misiritiko iuasaaki. Erekari Matamatakoti sikataparaxiniretana ninoa. Kãkiti itoãpotari auikiniri Xesosi sãkire. !Ikamarina maerekati, kotxi iteene ip̄karina Apiananiri.

Enéiasi, Tókasi Pakini

³²Petro ianaxititakasaaki, iua sari Teoso sãkire auiãkanimoni Arita sitatxiti auakanimoni. ³³Iuaã aõkitari kiki Enéiasi inakori. Iua mat̄pokatokati itxaua. Oito anokananipeka !õkitikaua. ³⁴Petro txari iua: —Enéiasi, Xesosi Kristo makananitai. Põkitikaua. Piapirikari pisirimata —itxari mat̄pokatokati.

Iuasaakipeka õkitikaua. ³⁵Ikinipoko Arita sitatxiti auakani, Sarõ sitatxiti auakani pakini atamatari iua Enéiasi, ininiã itakanaparina imaerekanina. Inĩkapiretarina Apiananiri sãkire.

³⁶Ãti sitatxiti Xopi inakoriã oãua sito Teoso sãkire auiãkaro, Tapita inakoro. Kreko sãkireë ouãka Tókasi otxaua. Oa kamapikari erekari. Omoianatana matxineiroteni.

³⁷Arita auakani auikasaakiri Apiananiri sãkire, oa Tókasi amianata. Eereka oani op̄pe. Op̄peka atoko, arokaĩtotarona, taka itxarina oĩto

itanokiri koaã. ³⁸Xopi sitatxiti Arita sitatxiti takote, ininiã Xesosi sãkire auiãkani Xopi sitatxiti auakani kenakoenetari Petro Arita sitatxiti auiniã, iokanatana ipi kiki Petromoni, apinirina ïkapani. Iokanapiretana:

—Pinapokako uai. Katima pitxako —itxana.

³⁹Ininiã Petro aiamata. Ninoakata isa. Iua apokasaaki, anikarina itanokiri koaã. Ikinipoko tikinitakoni txiapanãta Petro takote. Ninoa oerekari Petro mākaxi Tókasini kamakiti ninoa ïkapani oãuakasaaki.

⁴⁰Ininiã Petro iokanatana ninoa mapara. Eereka ikapotoreëkua.

Isãkirauata Teosokata. Eereka oamoni ikirioka. Itxaro:

—Tapita pōkitikaua.

Iuasaakipeka xorekaãta otxa. Oãtamatakasaakiri Petro, oitopãka.

⁴¹Ininiã imaïkaro ouako oōkitikiniua ïkapani. Eereka iua akiritana Xesosi sãkire auiãkani, tikinitakoni pakini, oa auãki onini oerekini ïkapani.

⁴²Ikini Xopi auakani imaropiretari Tókasi iuaïkana auãki onini, ininiãra itomaneri kãkiti auikari Apiananiri sãkire. ⁴³Petro kaikota iuaã Xopi sitatxiti mapaõti. Iua kaikota Simão inakorikata. Iua Simão aamata kamakari.

Konério Tapone Pirena

10 ¹Iuasaaki Sesaréia sitatxiti aua kiki Konério inakori. ãti uãka iua. Homano itxaua. Seï pakini sotato auïte iua. Kãkiti akiritana ninoa sotatoakori Itáriakini. ²Iua Konério kamari Teoso sãkire iaõka. Iua, ikinipoko aapoko auakanikata paxitari Teoso. Imisãkiretapikari Teoso. Isikana matiitimoni inirekakitina. ³ãti õti kikatapeka inakasaaki itaponeuata. Itaponeë itikari Teoso nitiri apokini iuamoni. Itxari:

—Konério —itxa.

⁴Teoso nitiri atamatakasaaki, ipïkarauata.

—Apiananiri, kipa pinireka? —itxa Konério.

Ininiã Teoso nitiri txari:

—Teoso kenakotapekari pisãkire iuamoni. Itikapekari pisikarauatini matiinimoni. Teoso xinikapitikai. ⁵Ininiãkara ãtikaka kikiakori piokanata Xopimoni Simão Petro uaimoni imininina ïkapani. ⁶Iua kaikota ãti Simãokata, aamata kamakarikata. Iua aapoko potxoari uiniti takote aua. Iua Simão Petro sãpiretaiko pikamakiti tïkane —itxa Teoso nitiri.

⁷Eereka iua Teoso nitiri sipe. Iposo atoko Konério akiritana ipi initiriakori, ãtika isotatone pakini. Iua sotato kamari Teoso sãkire

iaõka. Iua auapika Konériokata, inireẽkiti ikamini tĩkane. ⁸Ininiã Konério sãpiretana ninoa ikinipoko Teoso nitiri sãpiretakiti. Iposo atoko iokanatana Xopimoni.

Petro Tapone Pirena

⁹Katimatinĩkata Konério iokanatakini potorika. Apaniãxiti inakasaaki ninoa apokaãpota sitatxi Petro auiniãtaã. Iuasaaki Petro kanikauata aapokotxi nopini Teoso imisãkiretini ĩkapani.

¹⁰Iuasaaki Petro natxita. Inirekari inipokotini. Nipokori kamikosaaki, itaponeuata. ¹¹Itaponeẽ atamatari iaxiti xorekini. Aamata mitamatari katxakaãpota iuamoni. Imapotomatatare ipi ipi pakini iaxirikaãka. Iua aamata katxaka xitimoni. ¹²Iua aamata ãki aua ikini sereti kaxipirini. Aua pirãtxi. Aua ĩtopa auakani. Aua imini. Aua araãkani. ¹³Ininiã Petro kenakotari itanokiri sãkirauatini:

—Petro, põkitikaua. Pokari ia, pinikini ĩkapani —itxari Petro.

¹⁴Petro Xoteo itxaua, ininiã kona ikinika ĩnika. Ininiã Petro txari: —Konapitini Apiananiri. Kona ninikari ikinipoko naia kaxipirini. Manaiatini. Pamininiri —itxa.

¹⁵Iuaĩkana itanokiri sãkirauata:

—Nota oeretakiti kona kamininiri kona pitxape —itxa.

¹⁶Ipi, ãti pakinikata iua aamata katxaka ikara atoko. Iposo atoko ikanĩkaxitita Teoso tixinemoni.

¹⁷Ininiã Petro ãkixinireẽ ixinikaxitita:

—Kanatokopa itxa ikara nitapone?

Iuasaakipeka Konério iokanatakini apokapekari Simão aapoko. Apokana Simão aapoko toremoni. ¹⁸Akiritana:

—Ereẽkai. Simão Petro uai aua atxiĩti? —itxana.

¹⁹Iuasaaki Petro xinikapanikari itapone. Erekar Matamatakoti txari: —Ikiraãkarana ipi, ãti pakini kãkiti nitanãtai. ²⁰Põkitikaua. Pikatxaka xitimoni. Pisa ninoakata, kotxi niokanatana ninoa uaimoni —itxa Erekar Matamatakoti.

²¹Ininiã Petro sari Konério iokanatakinimoni:

—Notakara hĩte nitanãta. Kipa ĩkai hĩte?

²²Ninoa apakapapiretari iua:

—Konério, aãũite iokanataua ate. Erekar iua. Ikamari Teoso sãkire iaõka. Ikinipoko Xoteo apokaerekatari iua. Teoso nitiri iaxitikiri paniãtari iua pite akiritini, pisãkire ikenakotini ĩkapani —itxana.

²³Ininiã Petro:
—Hĩĩroã. Uai himaka —itxa.

Konério Aapoko Auakasaakina

Katimatinĩkata Petro sari ninoakata. Apanakini Xesosi sãkire auiãkani Xopikini sari apaka. ²⁴Katimatinĩkata apokana Sesaréia sitatxiti, Konério auiniãtaã. Iua Konério apotiitapekana inirimane, aõkimanere pakini Petro iãtapinina ĩkapani. ²⁵Petro ĩroãkasaaki Konério aapoko, iua aõkitari Konério. Iuasaaki Konério kapotoreẽkaua Petro apisatoõ. ²⁶Txamari Petro txari iua:

—Põkitikaua. Kiki pite atoko inakarikarano nota.

²⁷Isãkirauatakasaakina, Petro ĩroã. Aõkitari ito kãkiti apotiitakaniua. ²⁸Ininiã itxana:

—Hĩte imarotari ate kiomaneakorini !auiritari Xoteo moianatiniri ãti uãka. !Auiritaãka ate ĩroini hĩte atoko inakari aapoko. Iuaritika Teoso txano nota: “Na pakiritapiri ãti uãka kanaiari,” itxano. ²⁹Ininiã hĩte pĩkapiretakasaakino nota, nimarotari atão nisini hĩtemoni. Ininiã, kinirepa hĩte apakĩtakano nota? —Petro txari Konériomoni.

³⁰Konério apakapapiretari:

—Ipi, ipi pakini õti apisapanika nuanãta naapoko. Iuasaaki kona ninikari nipokori, Teoso nimisãkiretini ĩkapani. Kikatapeka inakasaaki, nimisãkiretakasaakiri Teoso, katimaritika kiki tokiã nota apisatoõ. Pomẽkoriri imãka. ³¹Itxano: “Konério, Teoso kenakotapekari pamanaãkiti. Ixinikari pisikarauatini matiinimoni. ³²Ãtikaka kiki piokanata Xopi sitatxitimoni Simão Petro inakori uaimoni imininina ĩkapani. Iua aua ãti Simãokata, aamata kamakarikata. Simão aapoko potxoari uiniti takote.” ³³Iuasaaki nota apakĩtakai pite. Peerekari papokini atemoni. Uatxa ate uai aua Teoso apisatoõ Teoso paniãtakiti pitemonikiri akenakotini ĩkapani. Ininiã pisãpiretauako —itxa Petromoni.

³⁴Ininiã Petro txari:

—Uatxa nimarotari atão inakari. Teoso sikari erekari ĩkininapemoni. Inirekari ikini uãka apokini iuamoni, inakitiakori ininiuana ĩkapani. ³⁵Teoso apakapari ikini itixiti auakani, iua paxitakani, atão inakari kamakani. Apakapari Xoteoakori. Apakapari Xoteo minakaniua apaka. ³⁶Himarotari Teoso iokanapirena Isaeo auakanimoni. Ikara erekari pirena sãpiretaua Xesosi Kristo xipokari Teoso omanatiniri kãkiti imaerekani xika, kãkiti erekaxinire inini

ĭkapani. Ikinimane auĭte itxaua Xesosi. ³⁷Ikara Teoso iokanapirena himarota, kotxi iaripireta ikini Xotéia tōpa. Merepitipanika iaripireta Kariréia tōpa, Xoāo patxisarauataka atoko. ³⁸Himarotari Xesosi Nasareekiri pirena. Himarotari Teoso sikari Erekarĭ Matamatakoti iuamoni. Iteene isikaposotiiretari iua. Ikini tōpati isa erekarĭ ikamini ĭkapani. Imakananitana Satanasi misiritakini, kotxi Teoso aua iuakata. ³⁹Ateka itikari ikinipoko ikamakiti Xoteoakori tixine iua auakasaaki, Xerosareē sitatxiti auakasaaki apaka. Eereka aamina ĭpiriāmitakarĭ nopini ninoa okari iuani.

⁴⁰—Iuaritika ĭpi āti pakini ōtisaaki Teoso ōkitikari iua. Iuaka oerekaua kākĭtimoni ĭpĭpekariika iuaĭkana aua inini. ⁴¹Kona ikinipokoni atamatari iua. Teoso mereēkininanira atamatari iua. Iuaritika kaiāori iua atamatakani. Ininiā ate atamatari iua. Iua ōkitikaua atoko ate nipokota, iāriā aāta iuakata. ⁴²Iokanataua ate Teoso sākire asāpiretini ikini kākĭtimoni. Teoso mereēri iua, kākĭti misiritiko mereēkarĭ ininiua ĭkapani. Auākipanika inakani, ĭpĭkani pakini misiritiko mereēkarĭ itxaua. ⁴³Ikinipoko Teoso sākire sāpiretakani sāpiretari iua pirena. Ninoa txari: “Iua sākire auiākani maerekani makatxakaāka” —itxa Petro.

Xoteo Minakaniua Patxisatiko

⁴⁴Petro sākĭrauatapanika inakasaaki, Erekarĭ Matamatakoti apoka ĭkinika Petro sākire kenakotakanimoni. ⁴⁵Ininiā Petro moianariakori Xesosi sākire auiākani kisauakatsikimatatakoni tsorĭkaāta, kotxi Teoso sikari Erekarĭ Matamatakoti Xoteo minakonimoni apaka. Ninoa tsiki mata !ikisauakaāka, iuaritika Erekarĭ Matamatakoti apoka ninoamoni. ⁴⁶Ikenakotarina Xoteo minakaniua sākĭrauanāta āti uāka sākireē.

—Peerekari Teoso. Apiananiri itxaua —itxanātana Xoteo minakaniua.

⁴⁷Ininiā Petro txari:

—Ninoa Xoteo minakaniua apakapapekarĭ Erekarĭ Matamatakoti ate apakapiniri atokokana. Ininiā apakatapitika ninoa patxisatiko āparaaā. Kona kākĭtini iotokakana ĭpatxisatikona.

⁴⁸Ininiā iua paniātana ninoa patxisatiko Xesosi Kristo uākaā. Iuasaaki ninoa aiatarĭ Petro:

—Atekata mapaōti pikaikota —itxarina.

Ininiā Petro kaikota ninoakata.

Petro Sāpiretakiti

11 ¹Xesosi iokanatakini, Teoso sākire auiākani Xotéia tōpa auakani apaka kenakotari Xoteo minakanuia auikininina Teoso sākire. ²Ininiã Petro kanapiriākasaaki Xerosareēmoni, kisauakatsikimatatakoni apoītari iua.

³—Pite imaka itsiki mata makisauakakoni aapoko āki. Ninoakata pinipokota pitxa. !Apakata pikamakiti —itxarina.

⁴Ininiã Petro sāpiretari ikinipoko itiākiti, ikenakotakiti pakini.

⁵—Xopi sitatxiti nauakasaaki, Teoso nimisākiretakasaaki, nitaponemoni natapari mākatxi mata atoko inakari iaxiti katxakaāpotini. Ipi, ipi pakini imapotomatare iaxirikaāka. Iua apoka nota takote. ⁶Iteene nimixinitari mākatxi mata āki auakani. Natamatari ikini sereti kaxipirini. Aua pirātxi. Aua itopa auakani. Aua imini, araākani pakini. ⁷Iuasaaki nikenakotari sākiretxi iaxitikiri: “Pōkitikaua. Oka, nika pitxako,” itxa. ⁸Txamari nitxari iua: “Apiananiri, konapitini. !Ninikari nipokori mauiritakoti ia atoko inakari, kotxi pamininiri,” nitxari.

⁹—Iuaīkana iaxitikiri sākirauata: “Teoso oeretakiti kona kamininiri kona pitxape.” ¹⁰Ipi āti pakinikata iua aamata katxaka ikara atoko. Eereka ikinika kosekaāka iaxiti.

¹¹—Iuasaakipeka ipi, āti pakini kikiakori Sesaréiakini apoka aapokotxi nikaikotiniātaā. Iokanataākana notamoni. ¹²Ininiã Erekar Matamatakoti paniātano: “Pisa ninoakata. Kona pipīkarauatape,” itxa. Naia seisi aītariakori Xopikini moianatano nota iuasaaki. Ininiã ate ĩroã Konério aapoko. ¹³Ininiã iua sāpiretaua ate, Teoso nitiri iaxitikiri apoka iuamoni aapoko āki. Iua Teoso nitiri txari iua: “Piokanatar kikiakori Xopimoni Simão Petro inakori apinina ĩkapani. ¹⁴Iua sāpiretaiko pite maerekani makatxakiko, paapoko auakani maerekani makatxakiko apaka.”

¹⁵—Nipotorikasaaki nisākirauatini, Erekar Matamatakoti apoka ninoamoni merepanika atemoni apokini atokotxikana. ¹⁶Iuasaaki nixinikari Apiananiri sākire. Iua txari: “Xoã patxisarauata āparaā. Hīte patxisataākako Erekar Matamatakotiā.” ¹⁷Ininiã Teoso sikari Erekar Matamatakoti ninoamoni, atemoni isikini atokotxikana Xesosi Kristo Apiananiri sākire aūikasaaki. Ikara atoko ininiã, !apakata Teoso ninaiatini —itxa Petro.

¹⁸Petro sākire ikenakotakana atoko, !itsoataikana.

—Peerekari Teoso —itxana.

—Ininiã Teoso auiritari Xoteo minakaniuua apaka imaerekanina itakanapinina, Teosokata âtipirika auinina îkapani —itxana.

Teoso Auiãkani Ãtxiokia Sitatxiti Auakani

¹⁹Estevão ipinaãka atoko, Xesosi sãkire auiãkani misiritaãka, ininiã ninoa iarika. Iariãkani sari maioakari. Penísia tixinima, Xipri pokomiriitima, Ãtxiokia sitatxitima pakinimoni isana. Ninoa oerekari Teoso sãkire Xoteomoninani. ²⁰Ninoa âtikaka Xiprikini, Sirenikini pakini sari Ãtxiokia sitatxitimoni. Iuaã isãpiretarina Teoso iokanapirena erekari, Xesosi Apiananiri pirena, Xoteo minakonimoni ninoa apaka imarotini îkapani. ²¹Apiananiri sikaposotiiretana ninoa. Ininiãkara itomaneri kãkiti auikari Apiananiri sãkire. Maerekati itakanapana. Ikamarina Apiananiri nireêkiti.

²²Ikara apopireta Xesosi sãkire auiãkanimoni Xerosareẽ sitatxitiã. Ininiã ninoa iokanataro Panapee Ãtxiokia sitatxitimoni. ²³Iuaã iua apokasaaki, imarotakasaakiri ninoa apakapiniri erekari Teoso sikakiti, ipoxokoniuata. Isikataparaxiniretana. Ôtãkikana Apiananiri paniãtakitinoka ikaminina ikini itaparaxinireritikana. ²⁴Erekari Panapee. Ikinika Erekari Matamatakoti paniãtakiti ikama. Auikari Xesosi sãkire ikini ixinireritika. Ikara atoko ininiã, itomaneri kãkiti auikari Apiananiri sãkire.

²⁵Eereka Panapee sari Taaso sitatxitimoni, Saoro initini îkapani. ²⁶Itaõkitakasaakiri, iminari iua Ãtxiokia sitatxitimoni. Âti anokanani ikaikotana iuaã Xesosi sãkire auiãkanikata. Oerekarina Teoso sãkire itomaneri kãkitimoni. Xesosi sãkire auiãkani Ãtxiokia sitatxiti auakani merepitipanika takauãkataãka, “Kristopiki.”

²⁷Iuasaaki âtikaka Teoso sãkire sãpiretakani Xerosareẽkini sari Ãtxiokia sitatxitimoni. ²⁸Ninoa âtika Ákapo inakori õkitikaua. Erekari Matamatakoti sãkire isãpireta:

—Natxinoka auako ikini itixiti —itxa.

Ikara isãkire apokapeka Krátxio Homano auite inakasaaki.

²⁹Ininiã ikinika Xesosi sãkire auiãkani nirekari txineiro iokanadini itariakorimoni Xotéia tōpa auakanimoni. Ito auinina, ito iokanadana. Poiãonoka auinina, poiãonoka iokanadana. ³⁰Panapee, Saoro pakini anikari isikakitina. Isikaro oa txineiro Xotéia tōpa auakani õtãkikakanimoni.

Xesosi Säkire Auiäkani Misiritiko Iuaïkana Apokini

12 ¹Iuasaaki auïtetxi, Erotxi inakori, misiritana Xesosi säkire auiäkani. Átikaka itaka kateia äki. ²Iua okapiri Txiako iouata mitaroã. Iua Txiako Xoão itari. ³Erotxi imarotakasaakiri Xoteoakori apokaerekatiniri Txiakoni okiko, ipaniätari Petro maïkiko. Imaïkari Petro Xoteoakori kiiniritesaaki, pão miãtiäkati kiiniritisaaki. ⁴Petro imaïka atoko itakari iua kateia äki. Ipaniätari tesiseisi sotatoakori nïkatiniri iua. Kiiniri xipoka atoko Erotxi nirekari imereiniri imisiritiko ikinimane apisatoõ. ⁵Ininiã Petro kateia äki kaikota. Iuasaaki Xesosi säkire auiäkani ätipirika misäkiretari Teoso Petro ïkapani.

Petro Sikakaäka

⁶Ïkanõka, imisiritiko imarotini õti apisapanika, kateia äki Petro imakanãta ipi sotato apanïkaki. Iaxirikiko tsapi metao kamakori ipi. Aua apaka apikomoni sotatoakori kateia toreãtaã, Petro mamitekakani ïkapani. ⁷Patimari Teoso nitiri tokiini. Tirikapi ponika kateia äki. Iuasaakipeka Teoso nitiri õpirïkari Petro.

—Põkitikaua. Katima pitxako —itxari.

Iuasaakipeka itsapi iaxirikiko iuakoäkiri katxaka. ⁸Teoso nitiri paniätari:

—Pimãka pieretaka. Pikiti mata pitaka, ininiã Petro takari.

Pimãka pinopinikiri apaka pitaka, eereka pisa notakata —itxa.

⁹Ininiã Petro sari iua tikini. Kateia ipokïkana. Iuasaaki Petro uäkatarï itaponeuatini. !Imarotari atão Teoso nitiri mipokïkiniri iua. ¹⁰Eereka inapari ipi sotatoakori auiniãtaã, apoka itxana itore maparakiri metao kamakori. Iuaãtaã napakari sari sitatximoni. Ikara itore iuaka matakakaua. Ininiã ninoa pokïka. Iua ahoa mapotõkire apokasaakina, katimaritika Teoso nitiri takanapari iua. ¹¹Iuasaaki Petro imarotapekari:

—Na nitaponeni itxa. Atãopitikara Apiananiri iokanatarï iniriti itixinekiri nota imakatzakini ïkapani. Pataparari Erotxi, iuaritika Apiananiri makatzakano. Xoteoakori nirekari okinino, iuaritika Apiananiri makatzakano —itxa.

¹²Ikara ixinika atoko, isari Maria aapokomoni. Xoão Marko inakori inoro oa Maria. Iuaã itomaneri kãkiti apotiitapekaua, Teoso imisäkiretinina ïkapani. ¹³Maria aapoko apokasaaki, akirita. Átokoro Hotxi inakoro sari itoremoni. Okenakotari Petro säkire.

¹⁴Oimarotakasaakiri Petro mapara apokini, omiteka iriko äki

aapokotxi āki auakanimoni. Opoxoniuata, txamari omaxinīkaretari itore omatakakini Petro īkapani. Ininiā otxari apanakinimoni:

—Aapokotxi toreātaāpekari Petro —otxa.

¹⁵Ininiā ninoa:

—Pimapitxirita.

—Atāopitikara nisākire —otxa oa.

Ininiā ninoa:

—Petro kamiritekara.

¹⁶Ninoa ikara atoko inaātakasaaki, Petro mapara akirinātapanikana ninoa. Eereka ninoa matakakari itore, atamata itxarina.

—Kanatokopa pitakanapari kateia? —itxarina.

¹⁷Ininiā iuakoā ipinitana:

—Hīkenakotari nisākire —itxana.

Eereka isāpiretana:

—Apiananiri makatxakano nota kateia āki. Ikinika ikara hīsāpiretariko Txiako, apanakini aītariakori pakini —itxa.

Iuasaaki isipe. Ātiātaā isa.

¹⁸Katimatinīkata sotatoakori kateia nīkatakani tsorīkaāta:

—Īteri iua Petro? Kanatokopa itxa Petro pokīkini? —itxana.

Initapiimarina Petro. ¹⁹Ininiā Erotxi paniātana initiko, txamari lapokarina. Erotxi pimaāna sotatoakori Petro nīkatakani, Petro sinimoni imarotinina īkapani, txamari ninoa limarotari Petro sinimoni. Ininiā eereka ipaniātari ninoa sotatoakori okiko Petro mitekini xika.

Ikara atoko inaāka atoko Erotxi sipeka. Xotéia tōpa ipotorika. Sesaréia sitatxitimoni isa.

Erotxi Ipinini Pirena

²⁰Erotxi omanatana Txiro sitatxiti auakani, Sitoō sitatxiti auakani pakini. Ninoa nirekari iua omanatinina xipokini, kotxi ninoa apakapari nipokori Erotxi tixinekiri. Ininiā ninoa sākirauata Parásito inakorikata. Iua Parásito nīkatari Erotxi aapoko, itii pakini. Paimatireri iua. Ninoa sākirauatakasaaki iuakata, iua auikari ninoa sākire. Eereka Erotximoni isana neenamtxi xipokini īkapani.

²¹Erotxi ketotari ikinimane kākiti imisākiretini īkapani. Iketo ōti apokasaaki ieretakari imāka ereri inakari, auītetxi māka. Eereka iitopāka auītetxi itopanere nopini. Iuaā iua misākiretana kākiti.

²²Ininiā kākiti txari:

—Teosora sākirauanāta. Na kākītini —itxana.

²³Iuasaakipeka Teoso nitiri iaxitikiri okari Erotxi, kotxi iua auiritari kākiti iteasonetiniri iua. Ininiã tsomi sotakiperi nika txari iito. Ikara atoko inikoã ipipe.

²⁴Iuasaaki Teoso sākire iaripireta. Ininiã itomaneri kākiti aukari Teoso sākire.

²⁵Panapee, Paoro pakini parĩka Xerosareẽ sitatxitiã xipokaãka atoko, ãtxiokia sitatxitimoni kanapiriã itxana. Anikarina Xoão Marko ninoakata.

Panapee, Saoro Pakini Mereĩko

13 ¹Xesosi sākire auĩãkani sauaki ãtxiokia sitatxitiã aua Teoso sākire sãpiretakani, Teoso sākire oerekakani pakini. Aua Panapee. Aua Simão “Pomamari.” Aua Arósio Sirenikiri. Aua Manaeẽ. Auĩtetxi Erotxi inakori xapitipanika inakasaaki, iua Manaeẽ xapitipanika inakasaaki, imakananitaãka Erotxikata. Apaka Saoro aua ãtxiokia sitatxitiã. ²Ãti õti Xesosi sākire auĩãkani iuaãtaã takanapari inipokotinina Apiananiri imisãkiretinina iĩkapani. Iuasaaki Erekar Matamatakoti txana ninoa:

—Himakatxakana Panapee, Saoro pakini parĩkatxi ikaminina nota iĩkapani —itxa Erekar Matamatakoti.

³Ininiã ninoa takanapari inikini Teoso imisãkiretini iĩkapani. Iposo atoko itakarina iuakona Panapee, Saoro pakini nopini. Iokanatana ninoa Erekar Matamatakoti paniãtakiti ikaminina iĩkapani.

Xipri Pokomiriĩti Pirena

⁴Erekar Matamatakoti iokanatana Panapee, Saoro pakini, ininiã ninoa sari Sereósia sitatxitimoni. Iuaã ninoa iereẽtaua maporo ãki. Isana Xipri pokomiriĩtimoni. ⁵Saramina sitatxitiã apokasaakina, isãpiretarina Teoso sākire aiko ãki Xoteo apotiitiniãtaãua. Xoão Marko inakori moianatana ninoa iuasaaki.

⁶Xipri pokomiriĩti iĩpirixititana. Paposi sitatxitimoni isana. Iuaã itaõkitarina kiki Xoteo. Miĩti itxaua. Iuãka Paxesosi. Ãti iuãka Erimasi.

—Teoso sākire sãpiretakaritarano nota —itxa iua.

Txamari na atão isãkire. ⁷Iua moianatari Xipri auakani auĩte Séxio Paoro inakori. Paimatireri iua Séxio Paoro. Iua akiritana Panapee, Saoro pakini iuamoni Teoso sākire ikenakotini iĩkapani. ⁸Txamari Erimasi !inirekana ninoa. !inirekar Séxio Paoro auikiniri atão Teoso sākire.

⁹Iuasaaki Erekarí Matamatakoti iteene sikaimaroretari Saoro (ãti iuãka Paoro,) ininiã iteene atamatari iua miiti. ¹⁰Itxari iua:

—Pite Satanasi ãkiri pitxaua. Pite atão kamakari mokaiakari pitxaua. Pite kamari ikini sereti maerekati. Ikara atoko ininiã, pimisirienetari kãkiti. Atão inakari Apiananiri sãkire pite nirekari pimamakini. ¹¹Ikara pimaerekani xika Teoso misiritaiko pite uatxa. Mõsiãretí pitxauako. Kona patamatapaniri atokatxi mapaõti.

Iuasaakipeka katxiãri atoko inakari, ipiã apaka apoka Erimasimoni. Ininiã iua nitari ãti anikakiri ãkapani. ¹²Séxio Paoro atamatakasaakiri Erimasi misiritiko, iua auikari Teoso sãkire. Itsoriãkaãta:

—Peerekari Paoro oerekakiti sãkiretxiti Apiananiri pirena isãpiretakiti —itxa.

Ãtxiokia Sitatxiti Pisítxia Tixini

¹³Iposo atoko Paoro imoianariakorikata iereẽtaua maporo ãki. Paposi itakanapana. Pexi sitatxitimoni, Pãpíria tixini isana. Pexi sitatxiti auakasaakina, Xoão Marko takanapana ninoa, Xerosareẽmoni ikanapiriini ãkapani. ¹⁴Eereka iuaĩkana maporo ãki iereẽtaua. Isana Ãtxiokia sitatxitimoni, Pisítxia tixinimoni. Ãtxiokia sitatxiti auakasaakina tomatiko õtisaaki ãroãna aiko Xoteo apotiitiniãtaãua. Iuaã iitopãkana. ¹⁵Teoso paniãtakiti aãtsopateẽ, Teoso sãkire sãpiretakani iõkatsopatakiti aãtsopateẽ pakini atatsopataãka atoko auĩtetxiakori iuaãtaã auakani txana ninoa:

—Aĩtariakori, ate nirekari hĩsãkirauatini, hĩsãkire auiniã, naia kãkiti hĩsikataparaxiniretini ãkapani —itxana.

¹⁶Ininiã Paoro õkitikaua. Õkatari iuako ninoa sãkirauatini iotokakinina ãkapani. Ininiã itxa:

—Nitariakori Isaeo auakanii, apaka hĩte Xoteo minakanua Teoso paniãtakiti kamakanii, hĩkenakotariko nisãkire. ¹⁷Isaeo auakani Teosone mereẽna aãtokiriakorini Exito tixini auakasaakina, ãti uãkakata auakasaakina. Itxĩkitakana ninoa itomane ininina. Iuasaaki Exito auakani misiritana. Ininiã eereka Teoso makatxakana iposotiireẽ, ininiã itakanaparina Exito tixini.

¹⁸—Eereka, koarẽta ano Teoso miĩteenekana ninoa ãparaã makipakaniãtaã, kotxi ikamapikarina maerekati iuaã. ¹⁹Eereka ixipokana setxi pakini ãti uãka Kanaã tixini auakani. Eereka isikari iua itixi ninoamoni ãtipirika iuaã auinina ãkapani. ²⁰Eereka Teoso sikana kõtãkikarerini Isaeo auakani auĩteakori tĩkane. ãti kõtãkikarerini

aua. Eereka iua ipina. Eereka átipekana kōtākikareri aua. Eereka iua ipina. Itxaāpotana koatrosētosi sīkoēta anokanani. Imapotōkire, Samoeo inakori Teoso sākire sāpiretakari ninoa otākikakari itxaua.

²¹—Eereka ninoa nirekari auītetxi apiatakari ninoa auīte ininiua ĩkapani. Ininiā Teoso sikana ninoa Saoo inakori, Kixi ākiri. Iua atokiri kitxakapirīka Pēxamiī inakori. Iua Saoo ninoa auīte apiatakari koarēta anokanani. ²²Eereka Teoso makatxakari Saoo. Itxīkitakari Tavii ninoa auīte apiatakari ininiua. Teoso sāpiretari Tavii pirena: “Kākiti Tavii Xesee ākiri atoko inakari ninireka, kotxi iua kamari ikinika ninireēkiti,” itxa Teoso.

²³—Teoso sikaenetari āti, Tavii apika mekani Isaeo auakanimoni. Isaeo auakani maerekani makatxaākari itxauako. Iua Xesosikara. Iua kākiti maerekani makatxaākari txaua. ²⁴Xesosi parīka ipotorikini apisapanika, Xoão sāpiretari ikinimane Isaeokini imaerekanina itakanapinina, eereka ipatxisataākana. ²⁵Xoão parīka ixipokasaaki, ipimaāna ninoa: “Kipa hīuākatatano nota? Nota kona iua hiātapakitini. Iuaritika iua ina nota tikini. Nota poiāori, ininiā !apakata iua takote napokini ikiti mata nimaktxakini ĩkapani, kotxi iua Apiananiri,” itxa Xoão.

²⁶Paoro sākirauatapanika:

—Nitariakori, Apraão apika mekaniriakorii, apaka hīte Xoteo minakaniua Teoso paniātakiti kamakanii, hīkenakota. Hītemonikari Teoso iokanatarari iokanapirena kākiti maerekani makatxakiko pirena. ²⁷Xerosareē auakani, ninoa auīteakori pakini kona imarotari Xesosi Teoso ākiri ininiua. Ninoa atatsopatarari Teoso sākire sāpiretakani sākire ikini tomatiko ōti, iuaritika !imarotarina ninoa sākire. ²⁸Ninoa kona apokari ixika Xesosi okiko ĩkapani, iuaritika ipaniātari Pirato okiniri. ²⁹Ninoa kamari Xesosimoni ikinipoko mitxi Teoso sākire iōkatsopatakorari iaōka. Iposo atoko imaktxakarina iua aamina ĩpiriāmitakariā. Ikata itxarina kai iriko āki. ³⁰Iuaritika Teoso ōkitikari iua ipīkitximonipeka auakaripeka. ³¹Ōkitikaāka atoko, ito ōti kākiti atamatari iua. Kariréiakini, iuakata Xerosareēmoni sikani aōkitari iua. Ininiā Xesosi iuaīkana auini pirena sāpiretakani itxauana ninoa Xesosi aōkitakani. Isāpiretarina apanakini Isaeo auakani.

³²—Ininiā uatxa ate sāpiretari Teoso iokanapirena erekari hītemoni. Ikara sākiretxiti Teoso kamaenetakiti aātokiriakorinimoni kitxakapirīka. ³³Īkorasaaki Teoso kamapekari ikara ikamaenetakiti ate ĩkapani, ninoani apika mekaniriakori

ĭkapani, kotxi iua ōkitikari Xesosi ipĭkasaaki, iuaĭkana auāki inini ĭkapani. Kitxakapirĭka Teoso sākire iōkatsopatakori Xikari ipiātaā sāpiretari Xesosi ōkitikiniua ōti, kotxi itxari:

Pite namarite. Ia ōti noerekari kākiti pite iri nininiua nota.

³⁴—Kitxakapirĭka Teoso sāpiretapekari iua ōkitikiniiri Xesosi ipĭkasaaki, iuaĭkana imapinakani tĭkane, kotxi isākire iōkatsopatakori txari:

Nikamaenetakiti Taviimoni pitemonikara nikama. Ikara erekari nikamapitikako pitemoni.

³⁵Teoso sākire iōkatsopatakori Xikari tesiseisiātaā txari:

Teoso kona auiritari Erekaru Kamakari ĭto paiakini.

³⁶—Kitxakapirĭka Tavii auakasaaki, ikamari Teoso nireēkiti, kotxi inirimane auĭte itxaua. Eereka ipĭpe. Ikatapeēka. Inirimanekata ikatapeēka, ininiā ĭto paiaka. ³⁷Xesosipekana, Teoso ōkitikari iua. Iua ĭto kona paiaka. ³⁸Ininiākara nitariakori himarotariko ia. ³⁹Xesosi sākire auĭākani maerekani makatxakaāka. Erekarini ninoa. Moisesi paniātakiti kamiko kona makatxakari kākiti maerekani. ⁴⁰Erepaniko. Kitxakapirĭka Teoso sākire sāpiretakani sākire iaōka atxiĭti apoka hĭtemoni, kotxi ⁴¹ia atoko itxana:

Hĭkenakota, hĭte Teoso sākire napetakanii. Hātamatariko nĭposotiire, iuaritika hĭpinako, kotxi !hāuikari nĭparĭka hĭte sauaki. Āti sāpiretiniāri nĭparĭka, iuaritika !hāuikari.

Ikara atoko itxa Paoro sākire ninoamoni.

⁴²Xoteoakori pokĭkasaaki Xoteo apotiitiniua aapokotxiti, iuasaaki Xoteo minakanĭua aiatana Paoro, Panapee pakini iuaĭkana tomatiko ōti ĭkari Teoso sākire isāpiretinina ĭkapani. ⁴³Kākiti apotiitakanĭua potorika atoko, itomaneri Xoteo, Xoteo minakanĭua Teoso sākire auĭākani pakini sari Paoro, Panapee pakĭnikata. Paoro, Panapee pakini misākiretana ninoa. Ōtākikana ninoa, ikiniōtika atāo ikaminina, kotxi Teoso iteene tĭretana ninoa.

⁴⁴Ininiā āti tomatiko ōtisaaki ikinimane iua sitatxiti auakani apoka Apiananiri sākire ikenakotinina ĭkapani. ⁴⁵Xoteoakori atapari itomaneri kākiti apokaāpotini Paoro, Panapee pakini sāpiretakiti ikenakotinina ĭkapani. Ininiākara ninoa xĭkotana Paoro, Panapee pakini. Imisākirepiretana ninoa:

—Na atāo Paoro sākire. !Apakata isākire —itxanātana.

⁴⁶Iuasaaki Paoro, Panapee pakini itaparaxinireritikana isākirauatana.

—Ate sãpiretari Teoso sãkire hĩte Xoteoakorimoni merepitipanika. Ikara atão. Txamari hĩte !inirekari. Hĩte atxiĩti !inirekari atipirika auãki hinini? Ikara atoko ininiã, ate sariko Xoteo minakonimoni, ⁴⁷kotxi Apiananiri paniãtaua ate ia atoko:

Tirikapi atoko inakari hĩtxauako Xoteo minakaniua ĩkapani nisãkire atão ninoa imarotini ĩkapani, ninoa maerekani nimakatzakini ĩkapani, ikini itixiti auakani ikara imarotini ĩkapani,

—itxa Paoro.

⁴⁸Xoteo minakaniua kenakotakasaakiri ikara Paoro sãkire, ipoxokoniuatana. Ininiã ninoa:

—Peerekari Apiananiri sãkire —itxanãtana.

Teoso mereẽri kãkiti atipirika iuakata auini ĩkapani, ininiã iuasaaki kãkiti kenakotakasaakiri Paoro sãkire, ninoa Teoso mereẽkini auikari iua sãkire.

⁴⁹Iuasaaki Teoso sãkire iaripireta ikinipoko iua tixini. ⁵⁰Txamari Xoteoakori !apokaerekatari Xoteo minakaniua auikiniri Xesosi sãkire. Ininiã isãpiretarina aãpirena sitoakoro apiatakani Teoso paxitakanimoni, sitatxi auakani auĩteakorimoni pakini. Ininiã ikara xika ninoa omanatana Paoro, Panapee pakini. Ininiã iokanatana atĩataã isinina. ⁵¹Ininiã Paoro, Panapee pakini takanapari iuaã. Itakanaparina kipatxi ikiti mataã auakari apaka, kotxi kona ninoa nirekaikari Teoso sãkire. Ininiã isana Ikõnio sitatxitimoni. ⁵²Atxiokia sitatxiti auakani Xesosi sãkire auĩãkani poxokoniuata. Iteene ikamarina Erekaru Matamatakoti nireẽkiti.

Ikõnio Pirena

14 ¹Paoro, Panapee pakini auakasaaki Ikõnio sitatxitiã, isana aiko Xoteo apotiĩtiniãtaãua. Isãpiretarina Teoso sãkire kãkitimoni, ininiã kaiãopokori Xoteoakori, Xoteo minakaniua pakini auikapiretari Teoso sãkire. ²Txamari apanakini Xoteoakori Teoso sãkire mauĩãkani kamaomanãkaretana Xoteo minakaniua. Ininiã ninoa omanatana Teoso sãkire auĩãkani. ³Xesosi iokanatakini Paoro, Panapee pakini okanani auana Ikõnio sitatxiti. Ninoa sãpiretari Apiananiri pirena itaparaxinireritikana. Isãpiretarina Apiananiri sikiniri ikinipoko erekari maerekanimoni. Apiananiri oerekari isãkirena atão inini, kotxi isikaposotiiretana ninoa, posotiiretxi, kãkiti mimarotakiniti pakini ikaminina. ⁴Kãkiti sitatxi auakani

omanatakakana. Apanakini auikari Xoteoakori sãkire. Apanakini auikari Xesosi iokanatakini sãkire.

⁵Ininiã Xoteo minakaniua, Xoteoakori pakini, ninoa auĩteakorikata imisãkiretakakaua Xesosi iokanatakini imisiritinina ĩkapani, kai soroã ikiporonakinina ĩkapani. ⁶Paoro, Panapee pakini kenakotakasaakiri ikiporonakikona pirena, imitekana. Arisitara sitatxitimoni, Tepi sitatxitimoni, Arikaõnia tixini isana. ⁷Iuaã isãpiretarina Teoso iokanapirena erekari kãkitimoni.

Arisitara Pirena

⁸Arisitara sitatxiti aua kiki petokakititakari iuasaaki. Matĩpokotakati. Iponaniãkasaaki, ipetokakititapeka.

⁹Ikenakotakasaakiri Paoro sãkire, Paoro atamatari iua. Iuasaaki Paoro imarotari iua kiki aukapiretiniri Xesosi sãkire erekape inini ĩkapani. Ininiã iteene atamatari iua. ¹⁰Itaparasãkireritika Paoro txari iua:

—Põkitikaua. Pitima —itxari.

Ininiã iuasaakipeka õkitikaua, tĩpokota itxa. ¹¹Iuasaaki kãkiti itikari Paoro kamakiti. Ininiã ninoa akirikata isãkireẽna, Arikaõnia tixini auakani sãkireẽ:

—Teosoakori apoka atemoni. Kikiakori atoko itxana ninoa.

¹²Ninoa takauãkatari Panapee, Xõpite ininiua. Itakauãkatari Paoro Mekório ininiua, kotxi apiata isãkirauata. Panapee poiãoka isãkirauata. Xõpite, Mekório pakini teosoakori kamakoni uãka.

¹³Sitatxi ĩronakikoãtaã takote aua Xõpite misãkiretiko aikoti. Xõpite misãkiretakani auĩte iuasaaki minari kema auĩteakori, aãui kaiãori pakini sitatxi ĩronakikoãtaãmoni. Iuaã iua apanakini kãkitikata nirekari kema auĩte okinina Paoro, Panapee pakini ĩkapani, iteosone ĩkapani okinirina atokotxikana. ¹⁴Panapee, Paoro pakini imarotakasaakiri ikamakitina tĩkane, imatsorakitarina ninoaka mãka, kotxi Teoso !itxauana.

Ninoa kãkiti itomanerimoni imitekana. Itaparasãkireritikana itxana:

¹⁵—Kãkiti, kinirepa ĩkora atoko hĩtxa? Hĩte kikiãkini atokokanera atxa ate. Ate uai apoka teoso kãkiti kamakiti hĩtakanapini ĩkapani, atão Teoso himarotini ĩkapani, kotxi atão Teoso auapininiika inakari itxaua. Iua kamari iaxiti, iaxiti auakani, itixi, itixi auakani, potxoari uiniti, potxoari uiniti ãki auakani pakini. ¹⁶Kitxakapirĩka Teoso auiritana ikinipoko kãkiti inirekaãkitina ikaminina. ¹⁷Iua Teoso

ininiua sãpiretakari kaiãopokori auapika, kotxi erekari Teoso sikakiti kãkitimoni oerekari iua Teoso ininiua. Teoso sikari ãparaã iaxitikiri kãkitimoni. Iua ãparaã oerekari iua Teoso ininiua. Takari kikiu auakari iua sikakiti erekari apaka oerekari kãkiti iua Teoso ininiua. Teoso sikari nipokori ikini sereti kãkitimoni. Ikara oerekari iua Teoso ininiua. Iua sikapoxokonitari aãkixinire. Ikara apaka oerekari iua Teoso ininiua.

¹⁸Ikara atoko itxana Paoro, Panapee pakini, iuaritika kãkiti nirekapanikari okiniri kema auite Paoro, Panapee pakini ikapani. Itapararitika Paoro, Panapee pinitana ninoa, ininiã likamarina. ¹⁹Eereka Xoteoakori Átxiokia sitatxitikini, Ikônio sitatxitikini pakini apoka Arisitara sitatxitimoni. Ninoa kãkiti misãkiretana Arisitara auakani. Imisãkirepiretana Paoro, Panapee pakini, ininiã Arisitara auakani auikari ninoa sãkire. Ininiã ikiporonakarina Paoro kai soroã. Eereka ikosekaïtotarina iua sitatxi mapotökire. Ninoa uãkatari iua ipipe. ²⁰Iuaritika Xesosi sãkire auiãkani apotiitakasaakia iuakata, Paoro õkitikaua. Sitatximoni kanapiriã itxa. Katimatinĩkata Paoro, Panapeekata sari Tepi sitatxitimoni.

Ikanapiriãna Átxiokiamoni,

Síria Tixiniã

²¹Paoro, Panapee pakini sãpiretari Teoso iokanapirena erekari Tepi sitatxiti auakanimoni. Ninoa oerekari kaiãopokori kãkiti. Eereka Arisitara, Ikônio, Átxiokia pakini sitatxitimoni ikanapiriãna. ²²Iuaã oerekana kãkiti Teoso sãkire iteene imarotininina ikapani. Ôtãkikana ninoa Teoso sãkire iaõka ãtipirika ikaminina. Ia atoko Paoro, Panapee pakini oerekana ninoa: “Teoso aãuïtetakasaaki, amisiritiko kaiãopokori amiteenekako.”

²³Ikinipoko Xesosi sãkire auiãkani apotiitiniãtaãua Paoro, Panapee pakini mereẽna ninoa ôtãkikakani. Ninoa kõtãkikarerini iteene auikari Apiananiri sãkire. Paoro, Panapee pakini misãkiretari Teoso ninoa ikapani. Nipokori itakanapa Teosokata isãkirauatini ikapani iuasaaki.

²⁴Eereka isipekana. Ipirixititarina Pisíxia tixini. Eereka Pãpíria tixinimoni isana. ²⁵Isãpiretarina Teoso iokanapirena erekari Pexi sitatxiti auakanimoni. Eereka isana Atária tixinimoni. ²⁶Iuaã iereëtaua maporo ãki Átxiokia sitatxitimoni isinina ikapani. Iuaã Átxiokia sitatxitiã mitxipeka ninoa iokanataãka Teoso parĩka ikaminina ikapani. Iuaãtaã Xesosi sãkire auiãkani misãkiretari Teoso

ninoa ĩkapani, Teoso iteene nĩkatinina ĩkapani. Ikara parĩkatxi iposope ninoa kamini.

²⁷ Átxiokia sitatxiti apokasaakina, Xesosi sãkire auiãkani imakinika apotiitaua ninoakata. Ininiã Paoro, Panapee pakini sãpiretari ikinika Teoso kamakiti. Isãpiretarina Teoso auiritinina Xoteo minakaniua apaka auikiniri Xesosi sãkire. ²⁸ Paoro, Panapee pakini auapokota iuaã Átxiokia sitatxitiã Xesosi sãkire auiãkanikata.

Teoso Takaõtxikare Pirena

15 ¹ Átikaka kikiakori Xotéia tõpakini apoka Átxiokia sitatxitimoni. Ninoa oerekana Xesosi sãkire auiãkani: —Moisesini paniãtaua Teoso takaõtxikare aĩtoã atakini. Txamari hĩte !hĩtakari, ininiã Teoso !imakatxakari himaerekani —itxana ninoa.

² Paoro, Panapee pakini txana ninoa:

—Na atão hĩte sãkire. Teoso takaõtxikare ninoa ĩtoã !auari, iuaritika Teoso makatxakapekari ninoa maerekani —itxana.

Ininiã itaparakienatakauana ikara sãkiretxiti xika, ininiã ninoa mereẽna Paoro, Panapee, átikaka Xesosi sãkire auiãkani Átxiokia auakani apaka Xerosareẽmoni isinina ĩkapani.

—Iuaã hĩsãpiretariko ikara sãkiretxiti Xesosi iokanatakinimoni, kiomãtxiakori pakinimoni. Ninoa sãpiretaua atão —itxana.

³ Iusaaki Xesosi sãkire auiãkani takapiretanapana ninoa, ininiã Paoro, Panapee, apanakini pakini potorika. Ninoa ĩpirixititakasaakiri Penísia tixini, Samaria tõpa pakini, Paoro sãpiretana ikinimanemoni:

—Xoteo minakaniua takanapapekari imaerekani. Inirekarina Teoso paniãtakitinoka ikaminina.

Ininiã Xesosi sãkire auiãkani poxokoniuata ikara pirena ikenakotakasaakina.

⁴ Eereka Paoro apanakinikata apoka Xerosareẽmoni. Xesosi iokanatakini, kiomãtxiakori, apanakini Xesosi sãkire auiãkani pakini apakapana ninoa. Paoro, Panapee pakini sãpiretari Teoso kamakiti Xoteo minakonimoni. ⁵ Iusaakipeka átikaka pariseoakori, Xesosi sãkire auiãkani, apakapapiretana:

—Ninoa Xoteo minakaniua apakapapitkariko Teoso takaõtxikare. Ninoa kamapitkariko Moisesini paniãtakiti. Hĩsãpiretanako —itxana.

Xesosi Iokanatakini Kiomãtxiakorikata

⁶Ininiã ninoa Xesosi iokanatakini, kiomãtxiakorikata apotiitaua, Xoteo minakanuia ãtoã Teoso takaõtxikare takiko pirena isãkiretinina ãkapani. ⁷Ninoa iteene sãkirauataka atoko, iua Petro õkitikaua, misãkireta itxana ninoa:

—Nitariakori hõte imarotari Teoso mereẽno nota. Hõte sauaki uatxakapokoikani iua mereẽno nota, iua iokanapirena erekari nisãpiretini ãkapani Xoteo minakonimoni, ikenakotinina ãkapani, auikinirina ãkapani. ⁸Teoso imarotari kãkiti ãkixinire sãkire. Iua sikari Erekar Matamatakoti Xoteo minakonimoni. Ininiãkara aimarotari Teoso apakapari Xoteo minakanuia, kotxi isikari Erekar Matamatakoti ninoamoni, atemoni isikini atokotxikana. ⁹Amaerekani ate ãkixinireẽ Teoso makatxakini atokokanera, Teoso makatxakari imaerekanina ãkixinireẽna, kotxi ninoa auikari Xesosi sãkire. ¹⁰Hõte txãkitakari Teoso omanãkarauatini. !Erekar hõkamakiti. Hõte nirekar Xesosi sãkire auãkani kaminiri ikinika Moisesi paniãtakiti, txamari akiomaneakorini kitxakapirãka !iposotari ikaminirina Moisesi paniãtakiti. Ate apaka !aposotari. ¹¹Moisesini paniãtakiti kamiko !imakatxakari kãkiti maerekani. Amaerekani makatxakaãka, kotxi Xesosi Apiananiri iteene tiretaua ate, ininiã aũukari isãkire. Ikara atokokana Xoteo minakanuia maerekani makatxakaãka apaka —itxa Petro.

¹²Panapee, Paoro pakini sãpiretana ninoa Teoso kamakiti Xoteo minakonikata auakasaakina, Teoso kamakiti kãkiti maposotakinini, posotiiretxi. Ikara isãpiretakasaakina, ikinimane iuaã apotiitakanuia tsorãkaãnãta. Masãkireninoka itxana. ¹³Panapee, Paoro pakini sãkirauataka atoko, Txiako txari:

—Nitariakori hõkenakotari nota sãkire. ¹⁴Simão Petro uatxananira isãpiretaua Teoso tiretinina Xoteo minakanuia, kotxi ninoa sauaki imereẽna kãkiti inakitiakori ãkapani. ¹⁵Teoso sãkire sãpiretakani kitxakapirãkarini iõkatsopatapekari ikara atoko inakari sãkiretxiti. Ninoa iõkatsopatapekari:

¹⁶Apiananiri txari: “Ereka nikanapiriã. Noerekai nisãpirena amaneri, notamoni hãpokini ãkapani. Hõauõte Taviini auakasaaki, pamimari hãpokini notamoni. Ikara atoko inakari uatxa xipope, aapokotxi irikakari xipokakari atoko itxa. Aapokotxi amaneri atoko nikamako, ininiã apakatapitika kãkiti apokini notamoni.

17 Ininiã ikini uākati nitanoko nota. Xoteo minakaniua nota akiritakini ninakitiakori nitanoko nota.”

18 Ikara atoko itxa Apiananiri kitxakapirīka kākiti imarotini ĩkapani, itxa Teoso sākire iōkatsopatakori.

19—Ininiã notamoni, !erekari apaniātina ninoa Xoteo minakaniua, Teoso sākire auīākani, ate kiomaneakorini paniātakiti ikaminina. Ikara atoko inakari pamimari. 20Maōtākikana ninoa. Maiōkatsopata ninoamoni: “!Hinikapiri nipokori teoso kamakorimoni siākori. Hītanoro minakotokatika !hīsirīkape. Hītaniri minakotokatika hīsirīkape. !Hinikapiri nipokori manotsaatakori xini. Arēkatxi !hiātape, !hinikape.” Ikaranokara maiōkatsopata ninoamoni. 21Ikaranoka aiōkatsopata, kotxi apikomoni Moisesini paniātakiti atatsopataāka aiko āki Xoteoakori apotiitiniātaāua ikini ōti tomatiko ōtisaaki. Moisesini sākire sāpiretaāka ātipirika ikininape sitatxiti, ninoa iteene imarotini ĩkapani —itxa Txiako ninoamoni.

Iokanatsopatakina Xoteo Minakonimoni

22Ninoa Xesosi iokanatakini, kiomātxiakori apaka, ikinimane Xesosi sākire auīākani apaka, ninoa apokaerekatari ātikaka kiki imereinina Ātxiokia sitatxitimoni Paoro, Panapee pakinikata isinina ĩkapani. Ninoa mereēri Xotasi inakori, Síراسi inakori pakini. Iua Xotasi uāka Pasapasi inaāka. Xesosi sākire auīākani iteene paxitana ninoa ipi. 23Xesosi iokanatakini, apanakini pakini iokanatarari aātsopa iōkatsopatakina Xotasi, Síراسi pakini anikiniri. Ia atoko itxa iua iōkatsopari:

Ate hītariakori, Xesosi iokanatakini, kiomātxiakori apaka, aiokanatsopata hīte aītariakorimoni Xoteo minakonimoni, Ātxiokia sitatxiti auakanimoni, Síراسi tixini auakanimoni, Sirísias tixini auakani pakinimoni aiokanatsopata. Ereēkai hīte. 24Ate kenakoenetari Xesosi sākire auīākani uai auakani sari hītemoni. Ninoa txai hīte: “Hītakariko Teoso takaōtxikare hītoā. Hīkamariko Moisesini paniātakiti. Ikara himakamakanisaaki, Teoso !imakatxakapaniri himaerekani.” Ikara atokora itxaina hīte. Ininiã hīte kamaxirexinirenoka hītxa. Uatxa kona hīte imarotari atāo hīkamini. Kona ateni paniātana ninoa ikara atoko inakari isāpiretiniina hīte. 25Ininiākara ate apotiitaua. Akinika ate apokaerekatari kikiakori amereēkini hītemoni aiokanatini Panapee, Paoro pakinikata. Panapee, Paoro pakini ate tirketakini.

²⁶Ninoa kikiakori amereēkini sipeka monōkoriātaã Apiananiri Xesosi Kristo paniātakiti ikaminina ĩkapani.

²⁷Ate iokanatarı Xotasi, Sírası pakini ninoakata hĭtemoni. Hāpisatoõ ninoa sāpiretaiko ate iokanatsopatakititxikana.

²⁸Erekari Matamatakoti apokaerekatakiti sākiretxiti, ate apokaerekatakiti sākiretxiti apaka asāpiretai hĭte uatxa.

Paniātakori apia mimari !apaniātai hĭte. Ianokara apaniātakiti sākiretxiti hĭkamako: ²⁹“!Hinikapiri nipokori teoso kamakorimoni sikakori. Arēkatxi !hiātape, !hinikape. !Hinikapiri nipokori manotsaātakori xini. !Hĭsirĭkape sitokata pĭtanoro minakotokatika. !Hĭsirĭkape kikikata pĭtaniri minakotikatika.”

Iuanokara himakamakaniã, peerekari. Ereēpiko,

itxa ninoa iōkatsopatakiti.

³⁰Paoroma, Panapeema, Xotasima, Sírasima pakini iokanataãka Ātxiokia sitatxitimoni. Ninoa iuaã apokana. Apotiitana ikinimane Xesosi sākire auĩãkani, ninoamoni sika itxarina iua iōkatsopari.

³¹Atatsopatakana atoko ipoxokoniuatana, kotxi erekapirenari ninoa iokanapirena. ³²Xotasi, Sírası pakini Teoso sākire sāpiretakani itxauana. Ninoa iteene sākirauata ninoa Xoteo minakaniua isikataparaxiniretinina ĩkapani. Ininiã ninoa Xoteo minakaniua apikomoni auikarina Xesosi sākire. ³³Xotasi, Sírası pakini kaikota iuaãtaã mapaõti. Eereka Xesosi sākire auĩãkani takanapapiretana, Xesosi iokanatakinimoni ikanapiriinina ĩkapani.

—Hĭsipiniikaua erekaxinire hinini —itxana.

³⁴Iuaritika Sírası apokaerekatari iuaã ikaikotini. ³⁵Paoro, Panapee pakini kaikotapanika Ātxiokia sitatxiti. Ninoa apanakinikata oerekari Apiananiri sākire iua sākire auĩãkanimoni. Isāpiretarina iua sākire isākire mimarotakanimoni apaka.

Paoro, Panapee Pakini Iarikini

³⁶Eereka mapaõtipeka inapaka atoko, Paoro misākiretari Panapee: —Makanapiriã ikininape aapokotxitimoni mitxi Apiananiri sākire asāpiretinimoni. Mamotikaētana aĭtariakori atauako erekana atxiĩti —itxari Panapee.

³⁷Panapee nirekari Xoão Marko inakori anikini ninoakata. ³⁸Txamari Paoro !inirekari anikiniri iua.

—Pāpĭria tixini aãuakasaaki, iua Xoão Marko asikaua. !Inirekaikari atekata iparĭkauatini —itxa.

³⁹Ikara xika itaparakienatakakauana. Eereka iarikana. Panapee anikari Xoão Marko. Maporo āki iereētauana Xipri inakori pokomiriītimoni isinina ĩkapani. ⁴⁰Paoro mereēri Sírsi, iuakata isini ĩkapani. Iuaātaā Xesosi sākire auiākani misākiretari Teoso, Paoro, Sírsi pakini ĩkapani, Teoso inĩkatinina ĩkapani. Eereka Paoro potorika Sírsikata. ⁴¹Īpirixititarina Síria tixini, Sirísia tixini pakini. Aapokotxi apokasaakina, isāpiretari Xesosi sākire iuaātaā auakanimoni. Isikataparaxiniretana Xesosi sākire auiākani. Ininiā ninoa apia auikari Xesosi sākire.

Tximótxio Moianatana Paoro, Sírsi Pakini

16 ¹Paoro sari Tepi sitatxiti. Eereka Arisitara sitatxiti isa. Iuaā aua kiki, Xesosi sākire auiākari, Tximótxio inakori. Inoro Xoteo otxaua. Oa apaka auikari Xesosi sākire. Iri kona Xoteoni. Āti uāka Kreko itxaua. ²Xesosi sākire auiākani, Arisitara auakani, Ikónio auakani apaka sākire: “Peerekari Tximótxio.” ³Paoro nirekari anikiniri Tximótxio iuakata imoianari ĩkapani. Ininiā iua takari Teoso takaōtxikare Tximótxio ĩtoā, kotxi Xoteoakori iuaātaā auakani imarotari Tximótxio iri Kreko ininiua. ⁴Paoro imoianariakorikata saāpota ikininape sitatxitimoni. Kākiti aapoko apokaāpotakasaakina, isāpiretarina ninoa Xesosi iokanatakini sākire, kiomātxiakori sākire pakini. Isāpiretarina ikinimane kākitimoni. Ninoa sākire aātsopaā iōkatsopatakori sākiretixiti isāpiretana ninoa. Paoro imoianariakorikata ōtākikana ninoa ikara isākirena auikinina ĩkapani. ⁵Ininiā ikiniōtika kākiti apiaāpotape auikiniri Xesosi sākire. Itomanepaka auikari Xesosi sākire.

Paoro Taponetari Masetónia Auakari

⁶Paoro imoianariakorikata ĩpirixitiāpotari Piríxia tixini, Karásia tixini pakini. Iuasaaki Erekar Matamatakoti !auiritana ninoa Xesosi sākire isāpiretinina Ásia tixiniā. ⁷Ninoa apokasaaki Mísia tixini takote, inirekamarina Pitxínia tixini isinina. Erekar Matamatakoti !auiritana isinina Pitxínia tixinimoni. ⁸Ininiā ninoa ĩpirixititari Mísia tixini. Apokana Tóatxi sitatxiti.

⁹Iua ĩkanōkati Paoro taponeuata. Itaponetari kiki Masetónia tixini auakari. Itimanāta. Amanaanātari:

—Uaimoni pina Masetónia tixini. Pimoianataua ate —itxari.

¹⁰Ininiā Paoro taponeuataka atoko, ate xinikari:

—Masapoka Masetónia tixinimoni, kotxi atãoka Apiananiri akiritaua ate Teoso iokanapirena erekari kãkiti ikiraãkinimoni asãpiretini ìkapani. Ininiã aiamata Masetóniamoni asini ìkapani.

Arítxia Auikari Xesosi Sãkire

¹¹Tóatxi ioporokote ate iereẽtaua maporo ãki. Asapitipo Samotirásia ipokomiriiti. Pokatimari õti ate sari Niápori sitatxiti.

¹²Iuaã apotorika. Asari Piriposi sitatxitimoni, Masetónia tixiniã. Masetónia tixiniã iua sitatxi mitari. Piriposi atoko inakari !auari. Iuaã auana kaiãopokori kãkiti Homa sitatxitikini. Ate napari mapaõti iuaã.

¹³Tomatiko õtisaaki sitatxi ìtinikata ate sari uini ìtinikata. Ate uãkatari uini ìtinikata Xoteoakori apotiitiniãua Teoso imisãkiretinina ìkapani. Ininiã ate apoka iuaã. Atãopitika ate uãkatakiti. Aãpokaro Xoteoakoro. Iuaã apotiitauana Teoso imisãkiretinina ìkapani, ininiã aĩtopãka, ninoakata asãkirauatini ìkapani. ¹⁴Sito Arítxia inakoro auo nino sitokata. Oa txĩta poporeri vẽtxitakaro otxaua oa. Txiatxira sitatxitikero oa. Teoso misãkiretakaro oa. Iuasaakipekara okenakotari asãkire. Iuasaaki Apiananiri iteene kamaimaroretaro oa Paoro sãpiretakiti, ininiã oa auikari isãpiretakiti. ¹⁵Ininiãkara oa, oaãpoko auakani apaka, patxisataãka. Eereka oa aiataua oaãpoko ãki akaikotini: —Masa naapoko, hĩkaikotini ìkapani. Hĩtemoni atão nauikiniãri Apiananiri sãkire, ininiã notakata hĩkaikota —otxa.

Ikara atoko oa aiataua oakata akaikotini, ininiãkara akaikota oaãpoko.

Paoro, Sírası Pakini

Kateia ãki Auini

¹⁶Ãti õti Teoso misãkiretiko aikotimoni asikasaaki, ataõkitaro ãtokoro iamotakoro. Maerekati matamatakoti auaiõtaro oa. Iua maerekati matamatakoti imarotari kãkiti kamakiti apisapanika. Oa amotakani apakaparo ito txineiro oimarore ìki. ¹⁷Oa ãtokoro osapika Paoro tikini, ate tikini apaka. Oãkiritapika:

—Naia kikiakori Teoso nitiriakori. Apiananiri nitiriakori itxauana naia. Oerekauana amaerekani makatxakiko, Teosomoni asini ìkapani —otxaãpokata.

¹⁸Itanaõtika ikara atoko oãkirinãta. Ininiã Paoro maerekaxiniretinoka itxa oãkiritakiti xika. ãti õti isapotorika, paniãta itxari maerekati matamatakoti:

—Xesosi Kristo uãkaã nota paniãtai, pitakanapiniro aroa ãtokoro —itxa.

Iuasaakipeka maerekati matamatakoti takanaparo. ¹⁹Oa amotakani ikara imarotakasaaki, otsopa imapakapapekaniika oimarore ìki, ininiã imaïkarina Paoro, Sírası pakini. Ikosekaïtotana, anikana sitatxi apanïkaki auïtetxiakorimoni. ²⁰Iuaã apokana. Isãpiretarina Homanoakori:

—Naia kikiakori Xoteo itxauana. !Erekari ninoa oerekapiretakiti, ininiã sitatxi auakani omanãkarauata ninoa sãpiretakiti xika.

²¹Ate amakinika Homano atxaua. Aimarotapekari aãuiãkiti aãuïte paniãtakiti. Txamari naia oerekaua ipinimonipo inakari akamini ìkapani. Naia oerekaua ãti uãka auïãkiti sãkiretxiti. !Auiritaãka aãuikiniãri naia oerekapiretakiti. !Auiritaãka akaminiri —itxana.

²²Iuasaaki kãkitipokoni iuaã apotiitakaniu nirekari Paoro, Sírası pakini iãsokinina. Ninoa auïtetxiakori matsorakitari Paoro mãka, Sírası mãka apaka, imakatzakinina ìkapani. Ipaniãtarina apanakini aãpitsãã ixirokitatiko. ²³Ixirokitatapeëkana atoko, kateia ãki okaãkana Paoroni, Sírasini pakini. Auïtetxiakori paniãtari iua kateia nïkatakari, inapokopiretiniri imasikakakoni òkane. ²⁴Ininiãkara kateia nïkatakari okaraïtotana Paoro, Sírası pakini kateia irikoãkixiti. Ieretakari ninoa kiti isïkatatxi taopata kamapakotatakori ãki, imakatzakakanina ìkapani.

²⁵Ìkanõka Paoro, Sírası pakini misãkirenãtari Teoso.

Ixikarauanãtana Teoso ìkapani. Apanakini kateia ãki auakani kenakonãtari. ²⁶Iuasaaki katimaritika itixi iakeëkata iteene. Kateia patapi apaka iakeëkata. Iuasaakipeka kateia tore takaka. Iïtxikikona metao kamakori, pirikeri ãki auakani ìtxikikona, karakitakata, katxaka itxa metao. ²⁷Iuasaaki kateia nïkatakari mereka. Iua atamatari kateia tore takakapeka, ininiã iuãkatari ikinimane kãkiti inïkatakini mitekapeka. Ninoa mitekaãkamako, iua auïte okamariko iua, iparïka imakamakani xika. Ininiã ikosekaro iouata mitaro iuaka iorotiniua ìkapani. ²⁸Okaaritakasaakiu, Paoro akirikata:

—Kona pokapeua. Uaikareua ate amakinika —itxa.

²⁹Iua kateia nïkatakari amanaãri tirikapi. Katimaritika ïroã. Ipamaka Paoro, Sírası pakini apisatoõ. Ikininanaãkata. ³⁰Eereka imipokïkana ninoa. Iua:

—Kiatokopa nikama, nimaerekani Teoso makatzakini ìkapani? —itxana ninoa.

³¹Ninoa:

—Pauikariko Apiananiri Xesosi sãkire, ininiãkara Teoso makatxakari pimaerekani, paapoko auakani maerekani apaka —itxari.

³²Eereka Paoro, Sírsasi pakini sãpiretari Apiananiri sãkire iuamoni, iua aapoko ãki auakanimoni apaka. ³³Iuasaaki imaropirĩkata kateia nĩkatakari arokari ninoa karo. Eereka iua imiakorikata, ĩtanorokata patxisataãka. ³⁴Eereka anikana Paoro, Sírsasi pakini aapoko ãki. Isikakienatana. Iua imiakorikata, ĩtanorokata poxokoniuaata, kotxi iuasaaki ninoa auikari Teoso sãkire.

³⁵Katimatinĩkata auĩtetxiakori iokanatana initiriakori kateiamoni, Paoro, Sírsasi pakini isikakini ĩkapani. Ninoa apokasaaki, itxana kateia nĩkatarimoni:

—Pauiritana Paoro, Sírsasi pakini isinina.

³⁶Ininiã iua kateia nĩkatakari sãpiretari Paoro:

—Niauĩteakori iokanapireta notamoni hĩte nisikakini ĩkapani. Ininiãkara hĩsipiniikaua erekaxinirepeka hinini —itxana.

³⁷Txamari Paoro txari auĩtetxiakori nitiriakorimoni:

—Ari, Homanoakorikareua ate, iuaritika auĩtetxiakori Homanoakori iaritataua ate ikinimane apisatoõ. Maxikatiĩka ninoa iaritataua ate. !Akamari maerekati. Eereka kateia ãki ninoa okaua ateni. Uatxa ninoa nirekari iokanatiniaua ate ikinimane mimarotakinitipanika. Konapitini. Ninoapitikarako inari uai. Ninoa makatxakaua ate uai —itxa Paoro ninoamoni.

³⁸Ninoa kikiakori kanapiriã iauĩteakorimoni. Isãpiretarina Paoro iokanapirena. Ninoa auĩteakori imaropiretakasaakiri Paoro, Sírsasi pakini Homano ininiuana, ninoa pĩkarauata, kotxi ninoa maxikatiĩka misiritana Paoro, Sírsasi pakini. ³⁹Ininiãkara ninoa sari Paoromoni, Sírsasi pakinimoni. Ninoa:

—Ate !imarotari hĩte Homano hininiuua. Aimarotaãkamariko !amisiritamaiko —itxana.

Eereka ninoa auĩtetxiakori mipokĩkana Paoro, Sírsasi pakini.

—Sitatxi hĩtakanapako —itxana.

⁴⁰Ininiã Paoro, Sírsasi pakini takanapari kateia. Arĩtxia inakoro aapokomoni isana. Iuaã aõkitana kãkiti Xesosi sãkire auĩãkani. Paoro, Sírsasi pakini sikataparaxiniretana ninoa. Eereka isipekana, iua sitatxiti itakanapinina.

Tesarónika Sitatxiti Pirena

17 ¹Paoro, Sírası pakini napari Ápípori sitatxiti. Apikomoni inaparina Aporónia sitatxiti. Eereka apokana Tesarónika sitatxiti. Iuaã aua aiko Xoteo apotiitiniãtaãua. ²Paoro itotapekari Xoteo apotiitiniãtaãua aikotimoni isini. Ininiãkara iua sari iuaã. Ipi äti pakini öti tomatiko öti, isari iuamoni. Iuasaaki Teoso säkire iökatsopatakori isäpireta kãkitimoni iuaãtaã auakanimoni. Ninoa pimarauata, ininiã iua säpirenauata. ³Ininiã Paoro txari:

—Teoso säkire iökatsopatakori oerekaua ate: Teoso mereëkiti misiritaãkapitikako, okaãkapitikako. Eereka ökitikapitikauako, iuaĩkana auãki inini ĩkapani. Ia Xesosi hĩtemoni uatxa nisäpirenãtakiti Teoso mereëkitipitikara iua —Paoro txana ninoa.

⁴Ätikaka Xoteoakori aukari Paoro säkire, ininiã Paoro, Sírası pakini moianariakori itxapekauana. Kaiãopokori Akaia tixini auakani Teoso säkire auiãkani, aukari Paoro säkire apaka. Kaiãopokoro sitoakoro, auĩtetxiakori ĩtanoroakoro, aukari Paoro säkire apaka.

⁵Xoteoakori, Paoro säkire mauĩãkani, xikotari Paoro. Ininiã ninoa apotiitana kãkiti kaneenamarini, maparĩkauatakani ahoaãtaã auakani. Apotiitana kãkitipokoni. Ininiã ninoa akiripoakata, imiteëkatana. Ikinimane sitatxi auakani kenakotari. Neenamtxi atoko itxakatana. Imitekana Xasão inakori aapokomoni. ĩroãkatana itapararitikana, Paoro, Sírası pakini initinina. Inirekarina imipokĩkinirina ninoa kãkiti apotiitakanimoni apisatoõ. ⁶Txamari Paoro, Sírası pakini lauari iuaã. Ininiã ikosekaĩtotarina Xasão. Apanakini Xesosi säkire auiãkani apaka ikosekaĩtotana. Iauĩteakorimoni anikana. Isäpiretarina iauĩteakorimoni:

—Paoro, Sírası pakini kamari maerekati. Ikini itixiti ikamarina maerekati. Ininiã ninoa uai ate sitatxineëpekarana uatxa. ⁷Ia Xasão apakapana ninoa. Iua aapoko ikaikotana ninoa. ĩkamarina aãũte Sesa inakori paniãtakiti, kotxi ninoa oerekari kãkiti äti auĩtetxi ininiãua, Xesosi inakori —itxana iauĩteakorimoni.

⁸Ikara säkiretxiti ikenakotakasaakina, kãkiti apotiitakanigua akiripoakata. Auĩtetxiakori ĩmarotari ikamakitina tĩkane. ⁹Eereka auĩtetxiakori misäkiretana Xasão, apanakinikata:

—Hiĩkitxitana hĩsikakiko ĩkapani. Eereka auiritaina hĩsini. Ininiã eereka auiritana isinina.

Peréia Sitatxiti Pirena

¹⁰Kikatapeka inakasaaki, Xesosi sákire auiákani iokanatana Paoro, Sírsasi pakini Peréia sitatxitimoni. Iuaã Peréia sitatxiti ninoa apoka atoko, írõãna aikoã Xoteo apotiitiniãtaãua. ¹¹Kãkiti iuaã auakani iteene nirekari Paoro sãpirena ikenakotinina. Tesarónika auakani !atokoni itxana ninoa. Ikiniõtika ninoa atatsopatarari Teoso sákire iökatsopatakorari, kotxi inirekarina imarotininirina:

—Paoro sákire atão atxiiti? —itxana.

¹²Ininiã kaiãopokori Xoteoakori auikari Xesosi sákire. Kaiãopokoro sitoakoro Akaia tixini auakani apaka auikari Xesosi sákire. Naia sitoakoro auítetxiakori ítanoroakorokara. Kaiãopokori kikiakori Akaia tixini auakani apaka auikari Xesosi sákire. ¹³Eereka Xoteoakori Tesarónika sitatxiti auakani kenakopiretari Paoro sãpiretiniri Xesosi sákire Peréia sitatxitiã. Ininiã ninoa sari Peréia sitatxitimoni. Apokaãkana atoko, itxíkitakarina kãkiti ahoaãtaã apotiitakaniuua Paoro omanatinina íkapani. ¹⁴Ikara atoko ininiã, Xesosi sákire auiákani iokanatarari Paoro potxoari uunitimoni. Sírsasi, Tximótxio pakini kaikotapanika Peréia sitatxiti. ¹⁵Paoro moianatakani anikari iua Atena sitatxitimoni. Eereka ninoa kanapiriã Peréia sitatxitimoni. Paoro iokanapireta Sírsasi, Tximótxio pakinimoni:

—Katimariã hinako —itxa.

Atena Sitatxiti Pirena

¹⁶Ininiã Atena sitatxitiã Paoro iãtapari Sírsasi, Tximótxio pakini apokini. Iuasaaki Paoro itikari kaiãopokori teoso kãkiti kamakiti. Sitatxi xãpoka kãkiti teosonenoka. Ia xika Paoro matinaniuata. ¹⁷Ininiãkara Paoro oerekari Teoso sákire Xoteoakorimoni aiko ãki Xoteo apotiitiniãtaãua. Xoteo minakaniuua, Teoso sákire auiákani apaka, Paoro oerekari Teoso sákire iuaãtaã. Ninoa pimarauata, ininiã imisákiretakakana Teoso sákire ixinikinina íkapani. Ikiniõtika Paoro oerekari Teoso sákire kãkitimoni, nipokori iamotikoãtaã sikanimoni. ¹⁸Kãkiti kaxinikaxitirerini, Epikoreo inakoni, Esitóiko inakoni apaka sãkirauata Paorokata. Paoro sãpiretana ninoa Xesosi pirena. Isãpiretana Xesosi ipinini, eereka ôkitikiniua, iuaãkana auãki inini pirena. Ininiã átikaka:

—Natokopa itxa ikara inakari sãkiretxiti? Uuato sákire atoko itxa. !Kiíkiteri iua —itxana.

Apanakinipekana txari:

—Isäpiretari äti itixiti auakani teosone pirena.

Paoro Sãpirenauata Ariópako Inakoriãtaã

¹⁹Eereka ninoa kaxinikaxitirerini anikari Paoro aiko kãkiti apotiitiniãtaãua, imiriĩ nopini Ariópako inakoriãtaã. Iuaã ninoa txari:

—Ate nirekari aimarotini poerekakiti sãkiretxiti. Mitxi kona ate kenakotari ikara atoko inakari sãkiretxiti. ²⁰Ipixini poerekakiti sãkiretxiti !aimarotapanika. Ipinimonipo itxa poerekakiti. Ininiã pišãpiretaua. Poerekaua, aimarotini ïkapani —itxarina Paoro.

²¹Ikara atoko itxana, kotxi ikiniõtika Atena sitatxiti auakani, apaka äti itixiti ïkani Atena kaikotakani nirekari ätiãtaãkiri sãpiretakiti imarotini ïkapani, ininiã ikiniõtika amaneri sãkiretxiti ikenakonãtana.

²²Paoro ikinimane apisatoõ itima, imiriĩ Ariópako inakoriãtaã. Iua txana ninoa:

—Kikiakori, Atena sitatxiti auakanii, nitikapekari hãteosone kaiãopokori, ininiã nimarotari iteene hãpaxitiniri hãteosone.

²³Ahoaãtaã ninapaãpotakasaaki, natamatari kaiãopokori hãteosone misãkiretikoãtaã. Iuasaaki natamatari äti hãteosonemoni sikakori takikoãtaã. Iuaã natatsopatar iõkatakori: “Uai Teoso mimarotakoti misãkiretikoãtaã.” Iua hãteosonetakiti, himimarotakiniti, iuapitikara uatxa nota sãpiretai hãte.

²⁴—Iua Teoso kamari itixi. Ikinipoko itixi nopini auakari apaka ikama. Iua Apiananiri. Iua itixi auakani auĩte itxaua iua. Iaxiti auakani auĩte apaka itxaua iua. !Ikaikota kãkiti kamakiti aikotiã.

²⁵Ikinipokokara auapeka Teosomoni, ininiã !nirekari kãkiti kamakiti iua auini ïkapani. Teosopitikara txïkitakari kãkiti auãki inini. Iuakara sikaxiniretari kãkiti. Teosokara sikari ikinipoko kãkiti auakiti. ²⁶Merepitipanika kãkiti !uari, eereka Teoso kamari kiki Atão inakori. Ikini uãkati kãkititi atokiri itxaua iua Atão. Teoso iokanatana ninoa ikini itixitiã auinina. Kãkiti mauakani apisapanikara, imereëri kãkiti iponaniini õti tĩkane. Iaõtari kãkiti auiniãtaã tĩkane. ²⁷Ikara atokora itxa Teoso kamakiti. Teoso txïkitakari kãkiti nitiniri Teoso. Initaãpotakasaakirina, atxiiti ninoa apokari Teoso, kotxi kona õtakoni aua Teoso. ²⁸Äti txapekari: “Teoso txïkitakaua auãki anini, atĩpokotini ïkapani. Iua matxïkitakakaniãua auãki anini, !aãuari.” Kaxikarerini hãte sauaki auakani txapekari: “Teoso anaakori ate apaka txaua.”

²⁹Teoso anaakori aniniãua, ininiãkara aimarotari kona kãkiti kamakiti atoko inakarini !itxaua Teoso. Kona oro kamakorini !itxaua. Kona pirata kamakorini !itxaua. Kona kai kamakorini !itxaua Teoso. Konapitini.

³⁰Mitxipe kãkiti !imarotari atão inakari. Iuasaaki Teoso !imisiritana kãkiti imimarotakanisaakina. Txamari uatxaika ipaniãtari ikininape kãkiti ikini itixiti auakani imaerekanina itakanapinina !kapani. ³¹Ikara atoko Teoso txari ikinimane kãkiti, kotxi iua ketotapekari ãti õti kãkiti misiritiko õti. Xesosi Teoso mereẽkiti iuakarako sãpiretariko kãkiti misiritiko ikara õti apokasaaki, kotxi iua imarotari atão inakari. Aimarotari Xesosi Teoso mereẽkiti ininiãua, kotxi Teoso õkitikari iua, iuaĩkana auãki inini !kapani —Paoro txana ninoa.

³²Xesosi iuaĩkana auãki inini pirena ikenakotakasaakina, ãtikaka napetari Paoro. Apanakini:

—Ate nirekari pisãpirena iuaĩkana akenakotini —itxarina Paoro.

³³Ininiã Paoro sipe. ³⁴Apanakinipekana auikapitikari Paoro sãkire. Txionísio inakori, Atena sitatxiti auakani auĩte, auikari isãkire. Apaka sito Tamari inakoro auikari isãkire.

Korĩto Sitatxiti Pirena

18 ¹Eereka Paoro takanapari Atena sitatxiti. Korĩto sitatxitimoni isa. Iuamoni apoka. ²Iuaã aõkitari kiki Ákira inakori. Iua Xoteo. Põto inakoriãtaã iua iponaniã. Itãria tixini !kari. !Okanani apoka Korĩto sitatxiti. Apoka !tanorokata, Pirisira inakorokata. Ninoa takanapari Itãria tixini, kotxi Itãria auakani auĩte Krãotxio inakori paniãtana ikinimane Xoteoakori, Homa sitatxiti itakanapinina. Paoro ianapokota Ákira, Pirisira pakinimoni. ³Eereka ikaikota ninoakata, kotxi ninoa parĩka iua Paoro parĩkatxikana. Papiri aamata kamakori kamakani ninoa. Ininiã Paoro kaikota Ákirakata, iuakata iparĩkauatini !kapani. ⁴Ikiniõtika tomatiko õti, Paoro sari aiko Xoteo apotiitiniãtaãua. Iuaã Xoteoakori, Krekoakori pakini apotiitaua. Paoro oerepiretana ninoa Xesosi sãkire, isãkire auikinina !kapani.

⁵Sĩrasi, Tximótxio pakini takanapari Masetónia tixini. Korĩto sitatxiti apoãkana atoko, Paoro takanapari iparĩka papiri aamata kamakori ikamini, Teoso sãkire kãkitimoni ikiniõtika isãpiretini !kapani. Iua oerekana Xoteoakori Teoso mereẽkitipitikara iua Xesosi. ⁶Txamari ninoa Xoteoakori omanatari Paoro. Ninoa misãkirepiretari Xesosi, ininiã Paoro kamaãkaretxitana ninoa Xesosi imisãkirepiretinina xika. Iõkokari imãka ninoa apisatoõ

aãpani katxakini ìkapani, omanãkare oerekini ìkapani. Ininiã Paoro txana:

—Teoso !apakapai hïte Xesosi sãkire himauikakani xika. Kona nota xikani, kotxi nisãpiretapekamai hïte. Ininiã uatxaika nisãpiretariko Xesosi sãkire Xoteo minakonimoni. Xoteoakorimoni !nisãpiretaikariko —itxa Paoro.

⁷Ininiãkara Paoro takanapana ninoa. Isari Txísio Xósito inakorimoni iua aapoko ikaikotini ìkapani. Xoteo minakatiua iua. Teoso misãkiretakari iua. Iua aapoko aiko Xoteo apotiitiniãtaãua takote aua. ⁸Aiko Xoteo apotiitiniãtaãua sikani auïte Krispo inakori auikari Apiananiri Xesosi sãkire. Ìtanoro, imiakori apaka, auikari Xesosi sãkire. Kaiãopokori kãkiti Korïto auakani kenakotari Paoro sãpirena, ininiã eereka ninoa auikapiretari. Ipatxisataãkana.

⁹Áti ìkanõkati Teoso txìkitakari Paoro itaponeuatini. Itaponemoni Apiananiri misãkiretari iua:

—!Pipïkarauatape. Nisãkire pisãpiretapitipo kãkitimoni. !Piotokape. ¹⁰Kotxi nota auapika pitekata. Pikarotakiri !auari, kotxi kaiãopokori kãkiti nota nakitiakori ìkorapokoriti auari —itxa Paoromoni.

¹¹Ininiã Paoro kaikota iuaã áti ano, ipixini ano pakinikanani Teoso sãkire oerekini ìkapani.

Xoteoakori Anikari Paoro Káriomoni

¹²Eereka iuaã Akaia tixini auakani auïte áti ìroã, Káριο inakori. Iua Homano itxaua. Homanoakori auïtetari iua. Iusaaki Xoteoakori apotiitaua. Ninoa maïkari Paoro. Anikarina aiko kãkiti misiritiko sãpiretikoãtaã. ¹³Iuaã ninoa txari Káriomoni:

—Ia kiki na atão oerekari kãkiti Teoso paniãtakiti kamiko. Ipinimonipo itxa iua oerekakiti. Na aãtokiriakorini oerekakiti atokoni itxa. !Auiritaãka Paoro oerekapiretakiti —itxana.

¹⁴Paoro sãkirauatini apisapanika, Káριο txana Xoteoakori: —Nisãpiretai hïte Xoteoakori. Paoro kamaãkamariko maerekati, nota kenakotamariko apikomoni hïãsãkiremakoko. ¹⁵Txamari !ikamari maerekati. Hïte taparakienatakakaua hãuikapiretakiti xika, hãtokiriakorini oerekapiretakiti xika. Hïte Xoteoakori. Nota áti uãka nitxaua, ininiã hitekara xinikari atão inakari. Kona notani sãpiretai hïte auiaãkiti —itxa Káριο.

¹⁶Ininiã omitikana ninoa, aiko kãkiti misiritiko sãpiretikoãtaã õpõkikinina ìkapani. ¹⁷Iusaaki Krekoakori maïkari Sóseni

inakori. Iuani Xoteoakori apotiitiniãtaãua sikani auĩte. Krekoakori xirokitatari aãkeẽ aiko kãkiti misiritiko sãpiretikoãtaã apisatoõ. Txamari Kário !imaãkatari.

Paoro Kanapiriã Átxiokia Sitatxitimoni

¹⁸Eereka Paoro kaikotapanika mapaõti iuaã Korĩto sitatxiti Xesosi sãkire auiãkanikata. Eereka iua takapiretanapana ninoa. Isipe Pirisira, Ákira pakinikata. Iereẽtauana maporo ãki, Sírĩa tixinimoni isinina ãkapani. Sãkireia sitatxiti apokana. Iuaã Paoro sãpiretari Teoso ikamaenetakiti Teoso ãkapani. Eereka ikixatari ikii ikamaenetakiti ixinikini ãkapani. ¹⁹Ninoa apoka Épeso sitatxiti. Iuaã Paoro takanapana Pirisira, Ákira pakini. Paoro ãroã aiko ãki Xoteo apotiitiniãtaãua. Iuaã apakapapiretakakaua Xoteoakorikata Teoso sãkire isãpiretinina. ²⁰Ninoa misãkiretari Paoro ninoakata apikomoni ikaikotini ãkapani. Txamari Paoro !nirekari ikaikotini.

²¹—Nisariko kiiniri Teoso misãkiretiko aikotiã Xerosareẽ. Eereka Teoso nirekiniãri, uai nikanapiriã hĩtemoni —itxa Paoro.

Eereka isipe. Iereẽtaua maporo ãki. Épeso sitatxiti itakanapa. ²²Sesaréia sitatxiti apoka Paoro. Eereka isa Xerosareẽmoni. Iuaã apokasaaki, ianapokota Xesosi sãkire auiãkanimoni. Eereka isa Átxiokia sitatxitimoni. ²³Iuaã ikaikota mapaõti. Eereka isipe. Karásia tixini, Piríxia tixini apaka ãpirixitiãpota. Aapokotxi apokaãpotakasaaki, isikapoxokonitana ikinimane Xesosi sãkire auiãkani.

Aporo Pirena

²⁴Iuasaaki Xoteo Aporo inakori sari Épeso sitatxitimoni. Iua iponaniã Arexãtria sitatxitiã. Paimatireri iua. Imarotari Teoso sãkire iõkatsopatakori imakinika. ²⁵Iua oerekapeẽkaika Xesosi sãkire, ininiã atão Xesosi sãkire isãpireta kãkitimoni. Ipoxoniritika isãpirenauata. Txamari kãkiti patxisatiko pirena !iteene imarotapanika. Xoão kapatxisareri oerekapiretakitinanira imarota. ²⁶Iua Aporo sãpirenauata itaparaxinireritika aiko ãki Xoteo apotiitiniãtaãua. Iuasaaki Pirisira, Ákira pakini kenakotari isãkire. Eereka anikarina aapokomonina. Oerekarina apikomoni Teoso sãkire imarotini ãkapani. ²⁷Eereka Aporo:

—Ninirekari Akaia tixinimoni nisini —itxa.

Ininiã Xesosi sãkire auiãkani:

—Ari, erekapitikari pisini.

Ininiã Xesosi sãkire auiãkani, Épeso auakani, iokanatsopatari itariakorimoni Akaia tixini auakanimoni. Itxana iøkatsopariã: “Hãpakapariko aitari Aporo inakori.” Aporo apokasaaki Akaia tixini, iteene imoianatana Xesosi sãkire auiãkani. Ninoa auikari Xesosi sãkire, kotxi Teoso iteene turetana ninoa. ²⁸Ikinimane apisatoõ Aporo oerekana Xoteoakori, Xesosi sãkire mauiãkani, Xesosi atãopitika Teoso mereẽkiti ininiua. Teoso sãkire iøkatsopatakoriã iua oerekana Xesosi Teoso mereẽkiti ininiãua. Ininiã Xoteoakori lkasãkirena.

Paoro Épeso Sitatxiti Auakasaaki

19 ¹Aporo Korĩto sitatxiti auakasaaki, Paoro ipirixititari Épeso tõpa Épeso sitatxiti apokini ikapani. Iuaã aõkitana kãkiti Xesosi sãkire auiãkani. ²Paoro pimaãna ninoa:

—Xesosi sãkire hãuikasaaki, hãpakapatari Erekarĩ Matamatakoti?
—Paoro txana ninoa.

Ininiã ninoa:

—Kiripitipa iua Erekarĩ Matamatakoti? !Aimarotari —itxana.

³Ininiã Paoro:

—Kanatokopa inakariãpa hĩte patxisataãka, Erekarĩ Matamatakoti himimarotakani?

Ininiã ninoa:

—Ari, Xoã patxisarauatini atoko inakarikanera ate patxisataãka —itxarina Paoro.

⁴Ininiã Paoro:

—Xoã patxisatana kãkiti maerekati takanapakani. Itxana ninoa: “Hĩteko iteene auikapiretariko nitikini apokakari, Kristo Xesosi inakori,” Xoã txari kãkiti —itxa Paoro.

⁵Ikara ikenakotaãkana atoko, ninoa patxisataãka Xesosi Apiananiri uãkaã. ⁶Iusaaki Paoro takari imakinika iuako ninoa nopini. Iusaakipeka ninoa apakapari Erekarĩ Matamatakoti. Iusaaki ninoa sãkirauata kãkiti ãti uãka sãkireẽ. Isãpiretarina Teoso sãkire kãkitimoni. ⁷Ninoa kikiakori atxiĩti tosi pakini.

⁸Ipi ãti pakini kasiriti ikiniõtika aiko Xoteo apotiitiniãtaãua Paoro sãpirenauata itaparaxinireritika. Apanakinikata imisãkirenãtakakauana. Paoro nirekana ninoa auikinirina Teoso sãkire, Teoso auĩtetxi ininiãua pirena. ⁹Txamari ãtikaka ninoa !inirekarĩ auikapiretinirina, kotxi !inirekarina ikara atoko inakari sãkiretxiti. Ninoa misãkirepiretari Xesosi sãkire ikinimane kãkiti apisatoõ. Ininiãkara Paoro takanapana

ninoa. Anikana Xesosi sãkire auiãkani iuakata. Ikiniõtika Txirano inakori oerekarauatiniãtaã Paoro oerekari Teoso sãkire kãkitimoni. Ninoa pimaaãpotakakaua Teoso sãkire imarotininina ïkapani. Apakapapireãpotakakauana. ¹⁰Iuaã Paoro oerekarauata ipikanani, ininiã ikinimane kãkiti Ásia tixini auakani kenakotari Xesosi Apiananiri sãkire. Xoteoakori, Krekoakori pakini kenakotari.

Sepa Anaakori Pirena

¹¹Teoso sikaposotiiiretari Paoro posotiiiretxi ipinimonipo inakari ikamini. ¹²Ikara atoko ininiã ikii mata, imãka iparïkauatini ïkapani apaka anikaãka amianatakanimoni, ininiã Teoso txïkitakana amianatakani erekape ininina. Maerekani matamatakoni auaitotiniãri kãkiti, Paoro mãka ninoa kãkiti apakapakasaaki, maerekani matamatakoni sipe.

¹³Iusaaki apanakini Xoteoakori, miïtiakori, maerekani matamatakoni omitiãkani, sari kãkitimoni maerekani matamatakoni omitikinina ïkapani. Xesosi pirena ikenakotana. Ininiã eereka ninoa txari maerekani matamakonimoni:

—Apaniãtai hisipiniikaua Xesosi uãkaã, Paoro sãpiretakiti Xesosi uãkaã —itxana ninoa.

¹⁴Iusaaki aua kiki Xoteo, Sepa inakori. Sasetotxiakori auïte itxaua. Iua anaakori kiki setxi pakini. Sepa anaakori paniãtana maerekani matamatakoni sini Xesosi uãkaã. ¹⁵Txamari äti õti maerekati matamatakoti apakapapiretana ninoa:

—Nota imarotari Xesosi. Nimarotari Paoro. Hïte !nimarota. Kiniparai hïte? —itxa maerekati matamatakoti.

¹⁶Iusaakipeka kiki maerekati auaitotakiti okakataua ninoa nopini. Apiataparata iua maerekati. Iusaaki iua ãsokitakatapena ninoani. Ininiã ninoa miteëkata, kasarapekana, kakaropekana itxapena.

¹⁷Ikinimane kãkiti Êpeso sitatxiti auakani kenakopiretari ikara ene. Xoteoakori, Krekoakori apaka kenakopiretari ikara ene, ininiãkara ipïkarauatana. Ikara atoko ininiãkara Xesosi uãka apiata ipaxitaãka. ¹⁸Kaiãopokori Xesosi sãkire auiãkani apotiitaua. Ikinimane apisatoõ isãpiretarina maerekati mitxi ikamakitina.

¹⁹Apanakini kasikapõererini apaka apoka iuaã. Iminarina sikapõeretxi apaiaõkiko tsopa. Ikinimane apisatoõ iotikarina. !nirekaikarina maerekati ikaminina. Iaõtarina ikara aãtsopa ïki. Iiki sïkoëta mio txineiro ota pirata kamakoro. Kaiãopokoro txineiro.

²⁰Ikara atoko ininiāpanirako Apiananiri sākire iaripiretako ikini itixiti. Kaiāopokori kākiti apiata auikaāpotari Apiananiri sākire.

²¹Eereka Paoro ākixinire txari:

—Nīpirixititariko Masetónia tixini, Akaia tixini pakini. Iposo atoko Xerosareēmoni nisako. Iposo atoko Homa sitatxitimoni nisako —itxa ākixinireē.

²²Iokanatana imoianariakori, Tximótxio, Erásito inakori pakini Masetónia tixinimoni. Paoro kaikotapanika Ásia tixiniā.

Neenamatzixi Épeso Sitatxiti Auini

²³Iuasaaki Paoro Épeso sitatxiti auakasaaki, kākiti Xesosi oerekapiretakiti manirekakani misākirepireāpotari Paoro, kotxi linirekarina Xesosi oerekapiretakiti. ²⁴Iuasaaki kiki Temétxio inakori aua iuaā. Ikamari aiko axapitipikiri inakari. Krekoakori teosone Txiana inakoro misākiretiko aikoti atoko inakari ikama. Kaiāopokori ikama pirata kamakori ivētxitini ikapani. Iua, initiriakori apaka apakaparo txineiropokoni iparīkana iki. ²⁵Iua Temétxio pīkapiretana ikinimane initiriakori, ninoa kamakitikana kamakani apaka. Temétxio txana:

—Kikiakori, hīte imarotari kaiāopokori txineiro aāpakapa aparīka iki. ²⁶Hīte kenakotapekari Paoro sāpirenātakiti. Paoro txanāta: “Kākiti kamakiti kona teoso !itxaua.” Kona ia tōpananini, kona Épesonanini, ikara atoko itxa. Ikini itixiti Ásia tixini auakanimoni ikara atoko itxa. Kaiāopokori kākiti Paoro sākire auiākani auapeka. Kaiāopokori kākiti linirekaikari teoso ate kamakiti. ²⁷Atxiīti kākiti misākirepiretari ate kamakiti. Atxiīti !inirekaikari aparīka. !Ikarananini. Atxiīti kākiti !ipaxitaikari ateosone Txiana misākiretiko aikoti. Ininiā atxiīti kākiti misākirepiretaro oa Txiana. Ikinimane Ásia tixini auakani teosonetaro oa. Ikini itixiti auakani teosonetaro oa —itxa Temétxio ninoamoni.

²⁸Ninoa kenakotakasaakiri ikara sākiretxiti, omanākarauatana. Ninoa akirikata:

—Txiana, Épeso auakani teosone. Apiananiro oa —itxanātana ninoa.

²⁹Ikinimane kākiti sitatxi auakani miteēkata, akiriāpokatana. Imaīkarina Paoro moianariakori, Kaio inakori, Arisitako inakori pakini. Ninoa Masetónia tixinikini. Ikosekaītokatana. Imimiteēkatana. Kākiti apotiitiniātaāua aikotimoni anikaākana, miīroā itxana. ³⁰Ikara Paoro imarotakasaaki, inirekari ĩroini kākitekata isākirauatini ikapani, txamari Xesosi sākire auiākani !auiritari iua ĩroini. ³¹Ātikaka Ásia tixini auakani auīteakori, Paoro tiretakani, iokanapireta Paoromoni:

—Kona piïroãpeko kãkiti apotiitiniãtaãua aikoti ãki —itxarina iokanapirena.

³²Aiko ãki ikinimane akiripoananikata. Apanakini akirikatakiti ipinimonipo. Apanakinipekana akirikatakiti ipinimonipo itxanãtana, kotxi kaiãopokori kãkiti txari:

—Kixikapa aãpotiitaua?

!Imarotarina ixika. ³³Xoteoakori iuaã apotiitakanuia katikari Arexãtri inakori ikinimane apisatoõ, isãkirauatini ïkapani. Iuasaaki õkitikari iuako kãkiti iotokini ïkapani, isãkire ikenakotinina ïkapani. ³⁴Txamari ninoa imarotakasaakiri Arexãtri Xoteo ininiãua, akiripoakatana ipi oara:

—Txiana, Épeso auakani teosone, Apiananiro —itxanãtapikana.

³⁵Eereka auítetxi inakariua apoka ninoa apisatoõ. Iua posotari ninoa iotokakini. Itxarina:

—Ikini itixiti auakani imarotari atenokara Épeso auakaninokara nïkatiniri ateosone Txiana misãkiretiko aikoti. Apiananiro oa. Ninoa imarotari atenokara nïkatiniri kai oa ïto atoko inakari iaxiti katxakakaro. ³⁶Ikinimane imarotapekari ikara inakari, ininiãkara hïotokako. Iteene hïxinikariko hïkamakiti tïkane. Maxikatiïka !hãkirinãtape. ³⁷Kotxi hïte minana naia kikiakori uaimoni, txamari !iïtirïkarina tiitxi ateosone misãkiretiko aikoti ãki auakari. !Imisãkirepiretarona ateosone. ³⁸Temétxio, iuakata parïkauatakani pakini, nirekiniãri naia kateiamoni isinina, auapitika aiko kãkiti misiritiko sãpiretikoãtaã. Auapitika aãuïteakori. Iuaã erekari isãpiretinirina maerekati naia kamakiti. ³⁹Iuaïkana hïtsoatiniã, sitatxi auakani auïteakori apotiitakasaakiua, hïsapiretana ninoa himapokaerekatakiniti ninoa õtãkikinii ïkapani. ⁴⁰!Apakata mixikanani himitekini, hãkiripoakatini atoko hïkamini. Maxikatiïka hãkiripoanãta. Ixika !auari. Atxiïti Homanoakori auïte txिताu maerekati akamakiti xika —itxana ninoamoni.

⁴¹Eereka ipaniãtana ninoa sini.

Masetónia Tixini,

Akaia Tixini Pakini

20 ¹Ninoa kãkiti apotiitakanuia aapokomonina ikanapiriãka atoko, Paoro pïkapiretana Xesosi sãkire auiãkani. Imisãkiretana. Ikamapoxokonitana. Iposo atoko itakanapapiretana.

Isipe Masetónia tixinimoni. ²Ípirixititari Masetónia tixini. Aapokotxi apokaāpotakasaaki, isāpireāpotari Xesosi sākire kākítimoni. Isikataparaxiniretana. Eereka Akaia tixinimoni apoka. ³Iuaã ikaikota ipi āti pakini kasiriti. Eereka Paoro kaiamapeka maporo āki iereētiniua Síria tixinimoni isini íkapani. Iuasaaki, ikenakopiretari Xoteoakori okaenetiniri iua. Ininiākara Paoro:

—Masetónia tixinimonikanerako nikanapiriāko —itxa Paoro.

⁴Sópato inakori Peréia sitatxitikiri sari iuakata. Piho inakori ākiri itxaua. Arisitako inakori, Sekōto inakori, Tesarónika sitatxitikini, ninoa apaka sari Paorokata. Kaio inakori Tepi sitatxitikiri apaka sari Paorokata. Txíkiko inakori, Tópimo inakori Ásia tixinikini, Tximótxio inakori pakini moianatari Paoro.

⁵Iuasaaki nota Arókasi inakori iuakata naua. Paoro imoianariakorikata íkiika isinina. Nota, nimoianariakorikata sari Paoro tikini. Tóatxi sitatxiti Paoro iātapaua ate. ⁶Pão miātiākati nikiko ōti napaka atoko, Piriposi sitatxiti aiereētaua maporo āki Tóatxi sitatxiti asini íkapani. Síko pakini ōti napaka atoko Tóatxi aāpoka. Iuaã aāōkitana Paoro imoianariakorikata. Iuaã anapari āti semanati.

Paoro Txíkitakari Ipíkari

Iuaíkana Auāki Inini

⁷Tomatiko ōtisaaki Xesosi sākire auíākani apotiitaua komiri ixanakinina íkapani, Xesosi ipinini ixinikinina íkapani. Iuasaaki Paoro oerekanātari Teoso sākire. Apaíkanōkapeka isāpirenauatapanika, kotxi katimatiníkata isipe. ⁸Ate apotiitiniātaāua aiko inopinita auakari iriko āki. Iuaã auari kaiāopokori tirikapi poniākari, ininiākara papatakari.

⁹Iuasaaki ātokori Etxiko inakori topākanāta inopinita auakari sonaã. Paoro sāpirenauanātapika, ininiākara itapo inokaāpotari iua Etxiko. Eereka imaka. Iuasaaki ixipotorika. Xitipeka apoākata. Ninoa miteēkata iuamoni isinina, txamari !uaaika. ¹⁰Ininiā Paoro katxaka, sa itxa iuamoni. Isiríka iua ipíkari nopini, imaarata itxari.

—!Hípikarauatape. Auākipanikari —itxana ninoa.

Ininiā iuaíkana iua ātokori auākipeka itxa. ¹¹Iposo atoko Paoro kaníka iuaíkana inopinita irikomoni. Komiri inika. Iposo atoko iuaíkana ninoakata isākirauanātiniritika katimata itxa. Ikatimataāka atoko isipe Paoro. ¹²Eereka anikarina iua ātokori aapokomoni. Ninoa iteene poxokoniuata iua auākipanika inini.

Miretomoni Sikiko Pirena

13Iuasaaki Paoro paniātaua ate:

—Híte sari maporoã Asosi sitatxitimoni. Imiriĩrako nota sari. Iuaã nota iereẽtaua hĩtekata —itxaua ate.

Ininiã ate sari iua apisa. 14Asosi sitatxiti Paoro aõkitaua ate. Iereẽtaua maporo åki. Iposo atoko asa Mitxireni sitatxitimoni. 15Iuaãtaã aãpokasaaki, iuaĩkana apotorika. Åti õti napaka atoko, anapari Kio inakori takote pokomiriĩ. Åti õti napaka atoko, Samosi inakori pokomiriĩ aãpoka. Iuaĩkana åti õti napaka atoko, aãpoka Mireto sitatxiti. 16Iuasaaki Paoro !inirekari Épeso ioporokoti apokitini, kotxi !inirekari auapokotini Ásia tixiniã. Ikatimaritaua, kotxi iposotiniãri, inirekari Xerosareẽ apokini. Pêtekósitxi kiiniriti apisapanika apokini inireka.

Xesosi Sãkire Auiäkani Auĩteakori Ôtåkikiko

17Ininiã Paoro Mireto sitatxiti auakasaaki, iokanapireta Épeso sitatxitimoni. Ipĩkapiretana Xesosi sãkire auiäkani auĩteakori.

18Ninoa apokasaaki, Paoro misãkiretana ninoa:

—Himarotari merepitipanika Ásia tixini napokasaaki, eereka hĩtekata nauakasaaki, himarotari ikiniõtika nauini hĩtekata.

19Iuasaaki nipaĩkauata Apiananiri nirekakiti nikamini. Na niuikaua. Iteene nitxiapata. Xoteoakori nirekari okinino, ininiã nimaxirexinire auapitika iuasaaki, iuaritika nikamari Apiananiri paniātakiti.

20Himarotari na nikipatari ipixini Teoso sãkire. Nisãpiretapekai hĩte imakinika Teoso sãkire hĩte ereka hinini ĩkapani. Kãkiti apotiitiniãtaãua noerekai Teoso sãkire. Apaka nisari åti haãpokomoni, eereka åti haãpokomoni, eereka åti haãpokomoni, nitxaãpota Teoso sãkire noerekini. 21Xoteoakori, Xoteo minakaniua apaka nisãpiretari nimarotakiti Teoso oerekakiti maerekanitxi itakanapinina ĩkapani, Teoso paniātakiti ikaminina ĩkapani. Nisãpiretari nimarotakiti Teoso oerekakiti, Xesosi Apiananiri sãkire auikinina ĩkapani.

22—Ininiã nota sariko Xerosareẽ, kotxi Erekar Matamatakoti paniātano nota iuaã nisini. !Nimarotari kiatokouako ninaãkapaniko iuaã. 23Ikini sitatxiti nauakasaaki, Erekar Matamatakoti pinitano: “Piteniko takapeẽkako kateia åki iuaã. Iuaã pimisiritiko auapitikako,” itxano. Iuananira nimarota Xerosareẽ napokasaaki. 24Ikara nimisiritiko sãkiretixiti kona mamakari nixinikakiti, kotxi kona nitiretari nauini

Īkorapokoriti. Xesosi Apiananiri paniātakiti parĭkatxiti ninireka nikamini. Nipoxokoniritika nauini mapotōkirepe nitxako. Xesosi paniātano Teoso iokanapirena erekari Teoso tiraōki nisāpiretini kākiti.

²⁵—Nisāpiretapekari Teoso auĭtetxi ininiāua pirena hĭte sauaki nauakasaaki. Uatxa nimarotari hĭte hĭkinika kona hātamataikanoko nota. ²⁶Ininiā hĭxinikapikariko nisākire iaōka uatxa nisāpiretakiti. Kākiti hĭte sauaki auakari pĭpinanakinia, Teoso kimapore imimarotakania, kona nota xikani. ²⁷Kotxi nisāpiretapekai hĭtemoni imakinika Teoso iokanapirena. ²⁸Erepaniko, katokinani hĭtxako maerekati apokini hĭtemoni. Erekari Matamatakoti sikapekari kākiti hĭtemoni Xesosi sākire hōerekini ĩkapani, ininiākara hinĭkatana ninoa. Soti auĭte nĭkatakani atokokana hĭtxauako. Ninoa hĭpiraakori atoko. Ininiā hĭtiretanako ninoa kākiti, kotxi Teoso nakitiakori itxauana. Teoso ākiri ipina ninoa ĩkapani, iua nakitiakori ininiuana ĩkapani. ²⁹Nimarotari kākiti apokapitikako hĭtemoni nota sini tikini. Ninoa nirekari ixipokinirina hĭparĭka Teoso ĩkapani. Xapakori patari imaĭkini monōkoni atoko itxako ninoa hĭte sauaki imonōkoni apokini. Ininiā erepaniko. Katokinani hĭtxako. ³⁰Āti ōti kākiti hĭte oereĕkini sāpiretakiti na atāoni. Koketakori sākiretxiti isāpiretana apanakini Xesosi sākire auĭākani. Ikara xika apanakini auikari ninoa sākire, ininiākara isanako ninoakata. !Auikaikarina hĭte sākire. ³¹Ininiākara erepaniko. Hĭxinikariko ipi anokanani āti anokanani pakini nota ōtākikanātai hĭte. Noerekanātai hĭte Teoso sākire ĩkanōka, pokamara pakini. Ikiniōtika noerekai hĭte. Nitxiapata nōtākikasaakii, kotxi nitiretai.

³²—Uatxa nisikai hĭte Teosomoni, iua nĭkatinii ĩkapani. Nitakanapari Teoso sāpirena hĭtekata, kotxi iua sāpiretari isikinii ĩkinipoko erekari. Iuara sikaposotiiretai hĭte. Iuara sikai hĭte erekari inĭkatakiti, inakitiakorimoni isikini ĩkapani. ³³!Nixikotari apanakini. !Nimaākatari itxineirote, imākana pakini. ³⁴Hĭte imarotapitikari notaka parĭkauata imakinika ninireĕkiti, nimoianariakori nireĕkiti apaka niamotini ĩkapani. ³⁵Ikara atoko aparĭkauatiniā, atiretana kākiti maposotakaniua. Nota parĭka oerekapekai hĭte ikara atoko hĭkamini. Maxinikari Xesosi Apiananiri sākire. Iua txari: “Teoso takari erekari kākitemoni iua amonitakiti apakapakasaaki. Teoso takari apia erekari sikarauatarimoni,” —Paoro txana ninoa Ēpesokinimoni, Teoso sākire auĭākani auĭteakorimoni.

³⁶Iuasaaki Paoro kapotoreĕkaua ninoakata. Imisākiretarina Teoso. ³⁷Ninoa ĩkinimane txiapakata. Imaarākarina Paoro, apitxoka

itxarina. Itakapiretanaparina. ³⁸Apiata imatinanina, kotxi Paoro sãpiretana ninoa, !aõkitaikarina iua. Isana iuakata maporomoni.

Paoro Sari Xerosareẽmoni

21 ¹Maporo aãpokasaaki, ate takapiretanapana ninoa Épesokini. Eereka asipeka. Kosi pokomiriĩtimoni asakatapitipo. Iuaã aãpoka. Katimatinĩkata asa Hotxi ioporokotemoni. Eereka Pátara sitatxitimoni asa. ²Iuaã aãpokaro ãto maporo Penísia tixinimoni sikaro, ininiã aiereẽtaua atoko ate potorika asini. ³Apaniãxiti apokasaaki, aãtamatarari Xipri pokomiriĩti. Anapari Xipri pokomiriĩti asanaremoni. Asari Síria tixinimoni. Aãpokita Txiro sitatxiti, kotxi iuaã tiitxi maporo ãki auakari kaikota. ⁴Iuaã ate aõkitari kãkiti Xesosi sãkire auiãkani, ininiã akaikota ninoakata ãti semanati. Ninoa txari Paoro:

—Xerosareẽmoni !pisipe, kotxi Erekarari Matamatakoti sãpiretapekaua ate pimisiritiko tĩkane aua iuaãtaã —itxarina.

⁵Apororikini õti apokasaaki, ate sipe iuaĩkana maporomoni. Ninoa ikinika, ãtanoroakorokata, imiakorikata, isana atekata sitatxi ãtiniã ioporokomoni. Akinika akapotoreẽkaua ikipatxiteẽ, misãkireta atxari Teoso. ⁶Atakapiretanapana iposo atoko, ate iereẽtaua maporo ãki. Ninoa kanapiriã aapokomonina.

⁷Ininiã Txiro sitatxiti atakanapa. Iuaĩkana apotorika. Eereka aãpoka Pitoremaita sitatxiti. Iuaã ate misãkiretana kãkiti Xesosi sãkire auiãkani. Akaikota ãti õti ninoakata. ⁸Katimatinĩkata iuaĩkana apotorika asini. Eereka aãpoka Sesaréia sitatxiti. Iuaã Piripi inakori aapokomoni asa. Teoso sãkire sãpiretakari itxaua Piripi. Xesosi moianariakori Xerosareẽ auakasaakina, ninoa mereẽri iua Piripi, apikomoni kikiakori seisi pakini, ninoa imoianatinina ĩkapani. Ate kaikota Piripi aapoko. ⁹Piripi auari ipi ipi pakini imiakoro ãtokoropanika. Ninoa apaka sãpiretari Teoso iokanapirena kãkitimoni. ¹⁰Ate auanapa iuaã mapaõti. Iuasaaki Teoso sãkire sãpiretakari Ákapo inakori Xotéia tõpa potorikakari apoka Piripi aapoko. ¹¹Ikosekari Paoro makiomatate. ĩtxikari iuako ikitikata. Itxari:

—Erekarari Matamatakoti txari: “Xoteoakori Xerosareẽ auakani iaxirikapiriko ia makiomataretxi nakititakari ia atokokanerako iaxirikiko. Eereka isikarina Xoteo minakonimoni” —Ákapo txaua ate.

¹²Ikara akenakotakasaaki, ate apanakini iuaã auakanikata txari Paoro:

—Paoro koniko !pisipe Xerosareẽmoni —atxari.

¹³Txamari Paoro:

—Kinirepa h̄txiapanāta? H̄ite kamamatinanitano nota.
!Nimaākatari niaxirikiko Xerosareē. !Nimaākatari nokiko apaka
Apiananiri Xesosi nauikini xika —itxaua ate.

¹⁴!Ik̄ipitari asākire. Ininiā ate:

—Iaōpe. Ikara atoko ininiā, ate nirekari Teoso nireēkiti kamiko —atxa.

¹⁵Mapaōti inapaka atoko, aāiamata Xerosareēmoni asini
īkapani. Eereka apotorika asini. ¹⁶Apanakini Xesosi sākire
auīākani Sesaréiakini sari atekata apaka. Menasō inakori aapoko
ninoa anikaua ate, kotxi iuaā anirekari akaikotini. Menasō Xipri
pokomiriītikiri. Okananipeka iua auikari Xesosi sākire.

Paoro Apoka Xerosareē

¹⁷Xerosareē aāpokasaaki, Xesosi sākire auīākani apakapaua
ate ipoxokoniritikana. ¹⁸Katimatinīkata Paoro sari atekata
Txiakomoni aianapokotini īkapani. Ikinimane Xesosi sākire
auīākani auīteakori aua iuaātaā. ¹⁹Paoro misākiretana. Isāpiretana
imakinika Teoso kamakiti Paoro parīkaā Xoteo minakaniua sauaki
iparīkauatakasaaki. ²⁰Ikara ikenakotakana atoko, ninoa txari:

—Peerekari Apiananiri —itxana.

Eereka itxarina Paoro:

—Aītari, pimarotari kaiāopokori Xoteoakori auikiniri Xesosi sākire.
Ninoa auikari Moisesini oerekakiti sākiretxiti apaka. ²¹Apanakini
sāpiretapedkana ninoa: “Paoro oerekanātana Xoteoakori, Xoteo
minakaniua sauaki auakani, Moisesini oerekakiti itakanapinina
īkapani. Oerekanātana ninoa Teoso takaōtxikare imiakori ītoā
imatakakani īkapani. Oerekanātana ninoa aātokiriakorini oerekakiti
itakanapinina īkapani.” Ikara atoko itxanātana ninoa. ²²Ninoa
īmarotapanikari pite uai apokini, ininiākara natokopa atxatari
akaminiri, kotxi anirekari ninoa imarotiniri apanakini sāpiretakiti
poxiene inini. Anirekari ninoa imarotiniri pite auikapitikari Moisesini
oerekakiti. ²³Ininiākara ia pikama. Naia ipi ipi pakini kikiakori
misākiretari Teoso. Isāpiretarina Teosomonikari ikamaenetakitina
tīkane. ²⁴Ininiā pisa naiakata Moisesini oerekakiti iaōka h̄ikamini
īkapani, ininiākara h̄ikipaātaua Teoso īkapani. Pite iīkitxitari naia
kii kixatiko īkapani. Ikara atoko ininiā, ikinimane imarotariko
poxienetapa apanakini sāpiretakiti. Ninoa imarotariko Moisesini
paniātakiti pikamini. ²⁵Ninoapekana, Xoteo minakaniua Xesosi sākire

auiākanipekana, ate iokanatsopatapeka ninoamoni. Asāpiretana ate xinikakiti: —!Hinikapiriko nipokori teoso kākiti kamakitimoni sikakori. !Hinikapiri arēkatxi. Manotsaātakori xini !hinikape. !Hīsīrīkape pītanoro minakotokatika. !Hīsīrīkape pītaniri minakotikatika. Ikara atoko atxa ate ninoamoni aiokanatsopatini —itxarina Paoro.

²⁶Ininiā Paoro anikana ninoa kikiakori. Katimatinīkata ninoa kipaātaua Teoso īkapani Moisesini oerekakiti iaōka ikaminina īkapani. Eereka Paoro ĩroā Teoso misākiretiko aikotiā. Isāpiretari sasetotxi ninoa keto ĩtona arokiko xipokini ōti, kotxi iuasaakiko sasetotxi apakapari ninoa sikakiti Teosomoni.

Paoro Maīkiko

²⁷Iua semanati kaiamapeka ixipokini inakasaaki, ātikaka Xoteoakori Ásia tixinikini atamatari Paoro Teoso misākiretiko aikoti āki. Ninoa misākirepiretari Paoro ikinimane kākiti iuaā apotiitakanimoni, ininiā ninoa sākire xika ikinimane omanatari Paoro. Eereka imaīkarina Paoroni. ²⁸Ásia tixinikini akiripoata:

—Hīte Xoteoakori himoianataua ate. Ia kikira oerekari ikini itixitikini omanatinina Xoteoakori. Iara oerekari kākiti Moisesi paniātakiti imakamakani. Oerekari kākiti mapaxitakaniri ia Teoso misākiretiko aikoti. Īkorasaaki lipaxitari ia aiko, kotxi imiīroāna Xoteo minakanuia aiko āki, ininiākara itxikotari ia aiko Teoso nakiti —itxanātana ninoa.

²⁹Ikara itxana, kotxi mitxi itikarina kiki Xoteo minakatiua Tópimo inakori Épeso sitatxitikiri Paorokata tīpokotini sitatxi apanīkaki. Txamari Paoro !anikari iua aiko āki. Ininiā iuākatarina Paoro anikapekari iua aiko āki. ³⁰Ininiā iua Paoro maīkiko pirena iaripireta. Ikininape sitatxi auakani kenakoenetakasaakiri ikara, imitekana aikomoni. Imaīkarina Paoro. Ikosekaītotarina. Teoso misākiretiko aikotiā imipokiākatarina Paoro. Iuasaakipeka aiko tore totaākapeka. ³¹Kākiti iuaā apotiitakanuia nirekari okiniri Paoro. Sotatoakori Homano inakanuia ninoa auīte kenakoenetari ikinimane Xerosareē auakani neenamauatini. ³²Iuasaakipeka sotatoakori auīte anikana sotatoakori. Imitekana Paoromoni. Kākiti atapakasaakina sotatoakori auīte sotatoakorikata, iuasaakiika iotoka Paoro iaritatinina.

³³Ininiā sotatoakori auīte maīkari Paoro. Ipaniātana sotatoakori Paoro iaxirikini ipi kohētxiā. Iposo atoko ipimaāna kākiti itakote auakani:

—Kiripa ia kiki? Kixikapa ia atoko inaāka? —itxana ninoa.

³⁴Ininiã ãtikaka iuaã auakani, ia xikara. Apanakinipekana ãti xikara, itxaãponãtana isãkirena. Sãkiretxi kaiãopokori ininiã, iua !imarotari atão ixika. Ikara atoko ininiã, sotatoakori auíte paniãtana sotatoakori, ninoa aapokomoni anikinirina Paoro. ³⁵Sotato aapokokiri kanikoatxiã apokasaakina, sotatoakori õtanõkari Paoro ãto, kãkiti mamaikakaniri ãkapani. ³⁶Kotxi kaiãopokori kãkiti itikini ãkani akiripoakata:

—Hõkariko. Hõkariko —itxanãtana.

³⁷Paoro sotatoakori aapoko ãki iiroãnapanoka inakasaaki, Paoro txari sotatoakori auíte:

—Apakata pite nimisãkiretini?

Ininiã sotato auíte tikoka.

—Pite imarotari Krekoakori sãkire —itxari Paoro.

³⁸—Kona piteni Exito tixinikiri pitxataua? Kona piteni kitatiki kamanãtari neenamtxi auítetxiakori pomanatini? Kona piteni anikatana ipi ipi pakini mio kokanirini ixaminakitekatana ãparaã makipakaniãtaã? —ipimaãri Paoro.

³⁹Ininiã Paoro:

—Kona notani. Xoteo nitxaua. Nota Taaso sitatxitikirirano nota. Taaso sitatxiti, sitatxi apiari inakari, Sirísia tixinikiri. Pauritano nakira kãkiti nimisãkiretini —itxari iua.

⁴⁰Ininiã sotatoakori auíte:

—Ari, pimisãkiretana.

Inakasaakiri Paoro tima kanikoatxiã. Iuasaaki õkitikari iuako kãkiti akiritini iotokini ãkapani, isãkire ikenakotinina ãkapani. Ikinipoko iotokasaaki, iua sãkirauata ninoakata Xoteo sãkireẽ, Epirãiko sãkireẽ.

Paoro Misãkiretari Xerosareẽ Auakani

22 ¹Ininiã Paoro:

—Nitariakori, niriakori, hĩkenakotariko nisãkire. Na maerekati na nikama. Erekarinokara nikama —itxa.

²Ninoa kenakotakasaakiri ninoaka sãkireẽ, Epirãiko sãkireẽ isãkirauatini, !akiritaikana. Itsorĩkaãtana.

³Ininiã Paoro:

—Xoteopitikanano nota. Niponaniã Taaso sitatxiti, Sirísia tixiniã. Eereka uai Xerosareẽ sitatxiti napoka. Uaikara naneẽ. Iuasaaki koerekareri kimatireri Kamarieo inakori oerekano imakinika. Iua oerekano akiomaneakorini kitxakapirĩkarini paniãtakiti imakinika. Nota parĩkauata Teoso ãkapaninokara, hĩte parĩkauatini

atokotxikana. ⁴Mitxipeka nota kapokotana kākiti Xesosi sākire auiākani, Xesosi kimaporeē sikani. Nimaīkana, kateia āki oka nitxana. Kiki, sito pakini nimaīka. Nota xika ninoani ipīpe.

⁵Sasetotxiakori auīte apiatakari, Xoteo auīteakori pakini imarotari atāopitika nisākire. Ninoakara sikano aātsopa iōkatsopatakītina auītetxiakorimoni Tamásiko sitatxiti auakanimoni nanikini ikapani. Iua aātsopa auiritano Xesosi sākire auiākani nimaīkini. Ininiā nota sari iuaā Xesosi sākire auiākani nimaīkini ikapani, Xerosareēmoni nimikanapiriinina ikapani imisiritikona tīkane.

⁶—Apaniāxiti Tamásiko sitatxiti takote napokaāpotakasaaki, patimari iotximere iaxitikiri apoka notamoni. ⁷Xiti nirika. Nikenakotari nakiriūākatiko: “Saoro, Saoro, kinirepa pite misiritano nota?” itxano.

⁸—Ininiā nota: “Apiananiri, kiriparai pite?” nitxari.

—Ininiā iua: “Nota Xesosi Nasaree sitatxitikirikarano nota. Pimisiritakitikarano nota,” itxano.

⁹—Nimoianariakori atamatari iua iotximere, ininiā ipīkarauatana. Na ikenakotarina nota misākiretakari. ¹⁰Ininiā nota: “Apiananiri, kipa pinireka pitemoni nikamini?” nitxari.

—Ininiā Apiananiri: “Ereē pitima. Tamásikomoni pisa. Iuaātaā pisāpiretaākako imakinika Teoso nireēkiti pikamini ikapani,” itxa Apiananiri notamoni.

¹¹—Iua iotximere xika mōsiāreti nitxaua. Ininiā nimoianariakori kanōpiāpotano. Anikanona Tamásikomoni. ¹²Iuaātaā aua kiki Ananíasi inakori. Iua kamapikari akiomaneakorini kitxakapirīkarini paniātakiti. Ikinimane Xoteoakori Tamásiko auakani iteene paxitari iua. ¹³Iua ina notamoni. Nota takote apoka itxa. Itxano: “Nitari Saoro, kōsiāre pitxako,” itxano nota.

—Iusaakipeka nota kōsiārepeka nitxa. Natamatari iua. ¹⁴Iua: “Akiomaneakorini Teosone mereēi pite inirekakiti pimarotini ikapani. Teoso mereēi pite Erekarinoka Kamakari patamatini ikapani. Teoso mereēi pite Erekarinoka Kamakari sākire pikenakotini ikapani.

¹⁵Pitekarako sāpiretariko itanapoko kākitemoni atāo Xesosi pirena, patamatakiti, pikenakotakiti pakini. ¹⁶Ininiā kona okanani pitxape. Pōkitikaua. Pipatxisataākako. Pakiritariko Apiananiri uāka, ininiā iua makatxakari pimaerekani,” Ananíasi txano nota.

¹⁷Eereka nikanapiriā Xerosareēmoni. Teoso misākiretiko aikotimoni nisa. Iuaā Teoso nimisākirenātakasaaki, nitaponetari Apiananiri. ¹⁸Natamatari iua. Itxano nota: “Katima pitxako.

Xerosareẽ posipika uatxapeka. Uai auakani !auikapaniri nota pirena pisãpiretakiti,” itxa.

¹⁹Ininiã nota: “Apiananiri, nota nitapekana kãkiti pisãkire auiãkani ikini aikoti Xoteo apotiitiniãtaãua. Niãsokepekana. Kateia ãki nitakepekana. Ninoa imarotapitikari ikara nikamakiti. ²⁰Pite sãkire sãpiretakari Estevão inakori okikosaaki, nota aua iuaã. Iuasaaki ninĩkatari kokanirini mãka inopinikiri. Nota apokaerekatari okinirina iuani.”

²¹—Ininiã Apiananiri: “Pisipeka. Ôtakoxiti niokanatai Xoteo minakonimoni,” itxano —itxa Paoro kãkitimoni.

Paoro Homano Itxaua

²²Iuasaakipeka Xoteo minakonimoni isini xika, kãkiti iuaã apotiitakaniua !inirekaikarina Paoro sãkire ikenakotinina. Omanãkarauata. Akiripoakatana:

—Hõkariko. !Erekari auapanika inini —itxana.

²³Akiripoakatana. Iõkokarina imãkana inopinikiri. Kipatxi okarapekatana apaka, kotxi omanãkarauata. ²⁴Ininiã sotatoakori auĩte paniãtana sotatoakori anikiniri Paoro aiko kaikori ãki, sotatoakori aapoko ãki. Ipaniãtana Paoro ixirokitatiko tĩkane, kotxi inirekari imarotniri Paoro omanatiko xika. ²⁵Paoroni iĩtxikasaakina ixirokitatiko iƙapani, Paoro pimaãri sotato itakote timakari:

—Erekari atxiĩti hĩte xirokitatiniri kiki Homano inakori maxikatiĩka? Homano nitxaua. Kixikapa hĩte nirekari hĩxirokitatinino? —Paoro txari iua.

²⁶Ininiãkara sotato sari iauĩtemoni.

—Iua kiki amaĩkakiti Homano itxaua iua, ininiãkara erepaniko iuamoni pikamakiti tĩkane —itxari.

²⁷Ininiã sotatoakori auĩte sari Paoromoni.

—Pisãpiretano. Homanokani pitxataua? —itxari Paoro.

Ininiã Paoro:

—Iuapitkarano nota.

²⁸Sotatoakori auĩte txari:

—Nota Homano nitxaua, kotxi niĩkitxitari aãtsopa iƙi Homano nininiua iƙapani. Pakaroneri.

Ininiã Paoro:

—Niponaniãkasaaki Homano nitxapekaua —itxa.

²⁹Iuasaaki Paoro xirokaaritakani patimari isinina. Sotatoakori auíte pīkarauata, Paoro Homano ininiua imarotakasaaki, kotxi iua paniātana sotatoakori iitxikiniri Paoro.

Paoro Xoteo Auíteakori Apisatoõ

³⁰Katimatinīkata sotatoakori auíte koxirikari Paoro. Inirekari imarotiniri Xoteo apoītiniri, ininiã ipīkapiretana sasetotxi auíteakori, Xoteo auíteakorikata. Ipaniātari Paoro itimini ninoa apisatoõ.

23 ¹Ininiã Paoro iteene mixinitoõtana Xoteo auíteakori. —Nitariakori, erekari nikaminiritika, uatxa uai naua. Teoso nireēkitinoka ninireka nikamini. Teoso imarotari ikara, kotxi imarotari nixinikakiti nākixinireē —itxa.

²Sasetotxiakori auíte apiatakari Ananíasi inakori !ipotxitari Paoro sākire, ininiã ipaniātari Paoro takote auakani aritiniri Paoro sona. ³Ininiã Paoro:

—Teosokarako aritaiko pite. Aapokotxi tare txītatakori atoko pitxa pite, kotxi mapara peerekai, txamari pākixinireē maerekatinoka. Pite topākanāta ereē nota pikenakotini ĩkapani akiomaneakorini paniātakiti iaõka pikamini ĩkapani, txamari pipaniātari niaritiko. Akiomaneakorini na paniātari ikara atoko inakari. Pite kona kamari ninoa paniātakiti —Paoro txari iua auītetxi.

⁴Paoro takote auakani txitari Paoro:

—!Erekari pimisākirepiretiniri sasetotxi auíte apiatakari Teoso nakiti —itxana.

⁵Ininiã Paoro:

—Nitariakori, !nimarotari iua sasetotxi auíte apiatakari ininiua, kotxi Teoso sākire iõkatsopatakori txari: “Kona pimisākirepiretapiri hīauíte.”

⁶Paoro atamatana kākiti iuaã apotiitakaniua. Apanakini satoseoakori itxauana. Apanakini pariseoakori itxauana. Ininiã itapararitika isāpiretana:

—Nitariakori, pariseokarano nota. Pariseo ākirikarano nota. Uai nota minaāka hīte apisatoõ, kotxi nota auikari ipīkanipeka õkitikiniua, iuaĩkana auāki ininina ĩkapani —itxana ninoa.

⁷Iuasaakipeka pariseoakori, satoseoakori pakini taparakienatakakaua, kotxi pariseoakori auikari Paoro sākire. Satoseakori !auikari Paoro sākire. ⁸Kotxi satoseoakori !auikari ipīkari õkitikiniua, iuaĩkana auāki inini ĩkapani. Kona auikarina Teoso

nitiriakori iaxitikini auini. Kona auikarina matamatakoni auini. Pariseoakori auikari ipikari ōkitikiniua, iuaīkana auāki inini ikapani. Auikarina Teoso nitiriakori auini. Auikarina matamatakoni auini apaka. ⁹Iuasaaki ikinimane apia akiripoakata. Itaparakienatakakauana. Pariseoakori, kaiōkatsoparerini inakoni, ōkitikaua. Itapararitika itxana: —Atemoni ia kiki !ikamari maerekati. Atxiiti matamatakoti, atxiiti Teoso nitiri iaxitikiri sākirauata iuakata. Ininiākara lapakata anaiatiniri Teoso —itxana.

¹⁰Ninoa iteene taparakienatakakauana, ininiā ineenamauaaritana. Sotatoakori auite pīkari ninoa okiniri Paoro, ininiā ipaniātana sotatoakori:

—Hīsako kākiti sauaki apanīkaki. Iuaā himaktxakariko Paoro. Hanikariko sotatoakori aapokomoni —itxana.

Ininiā anikarina iuaā.

¹¹Āti ikanōkati Apiananiri apoka Paoromoni. Paoro takote itima. Itxari:

—Kataparaxinire pitxako. Pisāpiretapekari nota pirena uai Xerosareē. Apaka pisāpiretariko nota pirena Homa sitatxiti —itxari.

Xoteoakori Nirekari

Okinirina Paoro

¹²Katimatinīkata apanakini Xoteoakori apotiitaua. Ixinikarina Paoro okini ikapani. Ninoa txari:

—!Anipokotapani, !aātapani, Paoro aōkini apisa —itxana.

¹³Ninoa Xoteoakori koarēta apikomoni. ¹⁴Eereka ninoa sari sasetotxi auiteakorimoni, kiomātxiakori pakinimoni. Ninoa txana:

—Ate okaenetari Paoro. !Anipokotapani iua aōkini apisa. ¹⁵Ininiā hīte aūiteakori amanaāriko sotatoakori auite, imininiri Paoro uai. Hīsāpiretariko sotato auite, hinirekari apikomoni hīpimainiri Paoro. Iuasaaki ate iātapariko kimaporiā aōkiniri ikapani —itxana ninoa.

¹⁶Paoro itaro ākiri kenakoenetari Paoro okaenetiko, ininiākara iroā sotatoakori aapoko, sāpireta itxari iritanirimoni. ¹⁷Ininiā Paoro misākiretari sotato auite poiāori.

—Panikari ia ātokori hīauītemoni. Iminapiretakiti inireka isāpiretiniri iua —itxa.

¹⁸Ininiā sotato auite poiāori anikari iua auītemoni.

—Ate maĩkakiti Paoro misãkiretano nota, ia ãtokori pitemoni niminini, kotxi inirekari isãkirauatini pitekata —itxari.

¹⁹Ininiã apiari anikari iuakoã ninoanani auiniãtaã. Ininiã iua:

—Kipa pinireka pisãpiretinino? —itxari.

²⁰Ininiã iua ãtokori apakapapiretari:

—Xoteo auĩteakori nirekari amanainii katana pokamara Paoro panikini ninoamoni. Isãpiretainako pite, inirekapanikarina apikomoni Paoro sãkire ikenakotinina. Txamari paxirari ninoa sãkire. ²¹!Pauikapena, kotxi koarẽta apikomoni kikiakori kipatauako kimaporiã Paoro iãtapinina, okinirina ãkapani. Ninoa kikiakori txapeka ãnipokotaikana, ãliãtaikana, Paoro imokakinina apisa. Ninoa iposopeka kimaporiã iãtapinirina Paoro. Ninoa iãtapari ninoa nirekakiti pikamini —itxari sotato auĩte.

²²Ininiã sotato auĩte:

—!Pisãpiretapiri notamoni pisãpiretakiti apanakinimoni.

Ininiã iokanatarari ãtokori ikanapiriini aapokomoni.

Paoro Iokanataãka Périsi Inakorimoni

²³Iposo atoko sotato auĩte pĩkapiretana ipi sotatoakori auĩtetxi poiãoni inakaniu. Imisãkiretana:

—Hãpotiitana tosẽtosi sotatoakori ikitiã sikani, setẽta sotatoakori kavaro nopini sikani, tosẽtosi sotatoakori meretaua anikakani pakini. Iposope hĩtxako ia ãkanõkati novi oara hĩpotorikini Sesarẽia sitatxitimoni hĩsini ãkapani. ²⁴Kavaroakoro hĩsikari Paoro, oa nopini isini ãkapani. !Hãuiritapiri Paoro okiko. Hanikari Paoro Homanoakori auĩtemoni Périsi inakorimoni —itxana ninoa.

²⁵Iposo atoko sotato auĩte iõkatsopata:

²⁶Nota Krãotxio Arĩsia inakorino iõkatsopata apiarimoni, pite Périsi aãuĩtemoni. Ereẽkai. ²⁷Ia kiki Paoro inakori Xoteoakori maĩkakiti. Ninoa nirekari okiniri. Nota, nisotatoneakorikata makatxakari iua, kotxi Homano itxaua. ²⁸Ninirekari nimarotiniri kixikapa ninoa nirekari okiniri Paoro, ininiãkara nanikari iua Xoteoakori auĩteakori apotiitiniãtaãua. ²⁹Iuaã nimarotari ixika !auari kateia ãki ikaikotini ãkapani. Ixika !auari ipinini ãkapani. Ninoa apoĩtari iua ninoa atokiriakorini paniãtakiti imakamakani xika. ³⁰Nikenakopiretari Xoteoakori okaenetiniri Paoro, ininiã niokanatarari iua pitemoni. Nipaniãtana Paoro apoĩtakani isãpiretiniina Paoro kamakiti. Iananirako niõkatsopata. Ereẽpiko,

itxa sotato auíte sākire Périsimoni.

³¹Sotatoakori auíte paniātiniri atokokana sotatoakori anikari Paoro. Īkanōka anikarina Ātxipatiritxi sitatxitimoni.

³²Katimatinīkata sotatoakori ikitiāna sikaninanira kanapiriā sotato aapokomoni. Kavaro nopini sikani anikari Paoro apikomoni.

³³Anikarina Sesaréia sitatxitimoni. Isikarina Paoro iōkatsoparikata auítetximoni, Périsi inakorimoni. ³⁴Ininiā iua atatsopatarī iua iōkatsopari. Iposo atoko ipimaāri Paoro:

—Kitixinepa paua? —itxari iua.

Ininiā Paoro:

—Sirísia tixinikirirano —itxa.

³⁵Ininiā Périsi txari:

—Pikamapiretakini apokasaaki, nikemariko pisākire —itxa.

Ininiā ipaniātana sotatoakori:

—Erotxini kamakiti aikoti āki hinīkatariko Paoro.

Paoro Apoītico Pirena

24 ¹Sīko ōti auakasaaki, sasetotxiakori auíte apiatakari Ananíasi inakori sari Sesaréia sitatxitimoni. Apoka iuaā kiomātxiakorikata, kiki Tétoro inakorikata apaka. Iua Tétoro kākiti ĩkapani kasākireri kākiti misiritiko mereēkari apisatoō. Ninoa apoka Périsi apisatoō Paoro apoītinina ĩkapani. ²Ninoa apokasaaki, sotato minari Paoro Périsi apisatoō. Iposo atoko Tétoro akiritaāka isākirauatini ĩkapani. Ininiā Tétoro apoītari Paoro:

—Périsi, apiari pitxaua. Auítetxi kimatireri pitxaua, kotxi mapakanani atixine neenamati! auari. Mitxi kaiāopokori maerekati kamakori. Uatxa maerekati poiāoāpota, kotxi pite kamari erekari kākiti ĩkapani. ³Erekapitikari pikamakiti ate ĩkapani. Ate apokaerekatari. ⁴Kona ninirekari niomakotetini pite, ininiākara nisākire poiāoka apikomoni nisāpiretai, ininiā pikenakotari nisākire.

⁵—Ia kiki !erekari. Pamonōkoniri. Itxīkitakari Xoteoakori neenamauatini ikini itixiti. Kiki Nasaree sitatxitikiri sākire auiākani auíte itxaua iua Paoro. ⁶Teoso misākiretiko aikoti imapaxitakanisaaki, ate maīkari iua. Akiomaneakorini oerekini atoko atxamariko Paoro. ⁷Txamari iuasaakipeka sotatoakori auíte Arísia inakori apoka iuaā. Imakatzakari Paoro itapararitika ate sauaki. ⁸Eereka Arísia paniātaua pitemoni ainini. Pite pimaāriko Paoro, ininiā pimarotari asāpiretakiti inipitika inini —Tétoro txari Périsi.

⁹Iuasaaki Xoteoakori iuaã auakani:
—Ari, inipitikara isäkire —itxarina Périsi.

Paoro Säkire Périsi Apisatoõ

¹⁰Iposo atoko Périsi paniätari Paoro isäpirenauatini. Ininiã Paoro:
—Nimarotapitikari kona uatxakani ate tixine auakani misiritiko merečkari pitxaua. Ininiäkara nota apokaerekatari pitemoni nisäpiretiniri nikamakiti. ¹¹Tosi õti pakini napakari nisa Xerosareẽmoni Teoso nimisäkiretini ikapani. Pipimaãri apanakini atãokani nisäkire. ¹²Nanera !ikenakotari nota txitiniri äti Teoso misäkiretiko aikoti äki. Ikininape Xoteo apotiitiniãtaãua aikoti äki !atamatarina neenamatzxi nikamãkitakini. Ätiãtaã apaka !atamatarina nitxikitakiniri kãkiti neenamatzxi ikaminina. ¹³Nanera maxikatïika kamapiretano nota. !Itikanona nota maerekati nikamini. ¹⁴Nota auikari Xesosi säkire. Ia atão. Naneramoni Xesosi säkire na atão. Nota parïkauata ate atokiriakorini Teosone ikapani Xesosi säkire nikïpitakasaaki. Moisesini paniãtakiti apaka nauika. Teoso säkire säpiretakanini iøkatsopatakiti apaka nauika. ¹⁵Nanera auikari Teoso õkitikinina ikininape kãkiti ipïkani. Erekarini, maerekani apaka õkitikauako iuaïkana auãki ininina ikapani. Nota apaka auikari ikara. ¹⁶Ikiniõtika ninirekari atãonoka nikamini Teoso ikapani, kãkiti ikapani apaka.

¹⁷—Ninapapekari mapakanani ätiãtaã, eereka nikanapiriã Xerosareẽmoni. Iuaã nisa txineiro ninirimanemoni matxineirotenimoni nanikini ikapani. Apaka iuaã ninirekari nisikaenetakiti Teosomoni nisikini. ¹⁸Nisikaenetakiti Teosomoni nisikasaaki Teoso misäkiretiko aikoti äki, nikipaãtaua Moisesini oerekakiti iaõka. Iuasaaki Xoteoakori Ásia tixinikini itikano nota. Kãkiti apotiitakaniua !auari notakata iuasaaki. Neenamatzxi !auari iuasaaki. ¹⁹Ninoa itikano. Maerekati nikamaãkamako, kinirepa kona ninoa apoka uai uatxa pite isäpiretinina ikapani? ²⁰Ninoa uai mapokakanisaaki, pipimaãna nanera ikenakotakitina, itikakitina nota Xoteo auïteakori apisatoõ nauakasaaki. Kipa atxiiti nimaerekani iuasaaki? Iuasaaki kona nikamari maerekati. ²¹Atxiiti iuasaaki nanera !apokaerekatari nisäkire, kotxi nitxana: “Nota auikari ipïkani õkitikinina, iuaïkana auãki inini ikapani. Ikara nauikakiti säkiretxiti xika hïte maïkano nota.” Atxiiti nanera !apokaerekatari ikara nisäkire —itxa Paoro säkire Périsimoni.

²²Périsi iteene imarotapekari Xesosi oerekakiti säkiretxiti. Iua misäkiretana ninoa:

—Sotatoakori auíte Arisia inakori apokapanikako uai. Iuasaakiko nisãpiretari kiãtokopa nitxatari Paoro. Uatxa xipope asãkire —itxa Périsi.

²³Ipaniãtari sotato auíte poiãori inakari Paoro nĩkatakari tĩkane:

—Pinĩkatariko Paoro. Pauiritariko inirekiniãtaã isini.

Pauiritariko inirimane apokini iuamoni. Pauiritariko inirekakiti isikinirina —itxa Périsi.

Paoro Sãkirauata Périsi, Tosira Pakinikata

²⁴Mapaõti napa atoko Périsi ãtanorokata Tosira inakorokata apoka Paoro auiniãtaã. Xoteo oa. Périsi pĩkapiretari Paoro. Iua apokasaaki, Paoro sãpiretana ninoa Kristo Xesosi sãkire aukiko, ininiã ninoa kenakotari. ²⁵Paoro sãpiretari Teoso sãkire atão inakari kamiko pirena. Isãpiretari Teoso sãkire ãtotxi nireẽkiti amakamakani. Isãpiretari kãkiti misiritiko itixi xipokini õti apokasaaki. Ininiãkara Périsi pĩkarauata.

—Iaõpe. Pisipe. ãti õti niparĩka mauakanisaaki, iuaĩkana nipĩkapiretai —itxari.

²⁶Périsi nirekari Paoro sikiniri txineiro iuamoni, isikakiniri ãkapani. Ininiãkara itokata ipĩkapiretari Paoro iuakata isãkirauatini.

²⁷Ipikanani napa atoko Põsio Pésito inakori auĩtetxi txapekaua, ininiã Périsi sipe. Périsi nirekari Xoteoakori apokaerekatiniri iua, ininiã isini apisa ãsikakari Paoro, ininiã Paoro kaikotapanika kateia ãki.

Paoro Amanaãri Sesakata Isãkirauatini

25 ¹Pésito aua Sesaréia sitatxiti ipi ãti pakini õti, eereka isari Xerosareẽmoni. ²Iuaã sasetotxi auíteakori, Xoteo auíteakori pakini kamapiretari Paoro Pésitomoni. ³Ninoa iteene amanaãri Pésito:

—Pikamariko ate nireẽkiti. Piminariko Paoro uai Xerosareẽmoni —itxana.

Ikara ninoa nireka, kotxi okaenetarina Paoro ipixinipokoriti.

⁴Txamari Pésito apakapapiretana:

—Kona, Sesaréia sitatxitikarako aua Paoro. Mapaõti napa atoko nota kanapiriã iuamoni. ⁵Hinirekiniãri, ãtikaka hũte sari iuamoni notakata. Iuaã hĩsãpiretari Paoro kamakiti maerekati —Pésito txana ninoa.

⁶Pésito napari ipi semanati Xerosareẽ. Eereka ikanapiriã Sesaréiamoni. Katimatiniãkara ãroã aiko kãkiti misiritiko

sāpiretikoãtaã. Iuaã ipĩkapiretari Paoro. ⁷Paoro apokasaaki, Xoteo Xerosareẽkini ākitari iua. Apoĩtarina iua maerekati kaiãopokori ikamakiti, txamari imaerekani itikakari !uari, kotxi !kamari maerekati. ⁸Eereka Paoro:

—Maerekati na nikama. Xoteoakori aãtokiriakorini paniãtakiti nikamapitika. Teoso misãkiretiko aikoti nipaxitapitika. Homano auĩte paniãtakiti, Sesa inakori paniãtakiti nikamapitika —itxa.

⁹Pésito nirekari Xoteoakori apokaerekatini iuaka, ininiã ipimaãri Paoro:

—Pinirekatari Xerosareẽ pisini? Iuaãrako nota kenakotariko nanera sãkire, pite sãkire apaka —itxa.

¹⁰Txamari Paoro:

—Konapitini. Homano nitxaua. !Apakata Xerosareẽ Xoteoakori apisatoõ nisãkire kenakotiko. Uaikara Homanoakori auĩte Sesa nirekari Homano sãkirauatini kãkiti misiritiko sãpiretakani apisatoõ. Erekarari uai pikenakotiniri nisãkire. Pite iteene imarotari kona xatiki maerekati nikama Xoteoakorimoni. ¹¹Ixika auiniã nipinini ĩkapani, maerekati nikaminiã, ininiã apakata nipinini. Txamari nanera na atão apoĩtano nota, ininiã naneramoni nisikanapakiri !uari. Ninirekari Sesamoni nisini —itxa Paoro sãkire.

¹²Ininiã Pésito sãkirauata iua õtãkikakanikata Paoro Sesamoni isini ĩkapani. Eereka apakapapiretari Paoro:

—Pite nirekari Sesamoni pisini, ininiãrako iuamonirako pisa — itxari Paoro.

Pésito Sãkirauata Akiripakata

¹³Mapaõti napa atoko auĩtetxi Akiripa inakori apoka Sesaréia itaro Perenisi inakorokata. Ninoa ianapokota Pésitomoni.

¹⁴Mapaõti napa atoko Pésito sãpiretari Paoro Akiripamoni:

—Uai aua kiki kateia āki Périsi takakiti Paoro inakori. ¹⁵Xerosareẽ napokasaaki, sasetotxi auĩteakori, Xoteo auĩteakori apaka apoĩtari iua. Inirekarina nota paniãtiniri iua okiko. ¹⁶Txamari nisãpiretana: “Homanoakori kona okari kãkiti āti apoĩtakiti, iua apoĩtakiti sãkire imakenakotakani apisa. Merepanika erekari iua apokini iua apoĩtakanikata kãkiti misiritiko mereẽkari apisatoõ, ninoa sãkire kãkiti misiritiko mereẽkari kenakotini ĩkapani,” nitxana.

¹⁷—Paoro omanatakani uai apokasaaki, katimatinĩkata niĩroã kãkiti misiritiko sãpiretikoãtaã. Iuaã nipĩkapiretari Paoro, ininiã iua

apoka iua omanatakani apisatoõ. ¹⁸Ninoa sãkirauata. Apoïtarina Paoro. Niuãkatari ninoa sãpiretiniri maerekati Paoro kamakiti. ¹⁹Txamari ninoa auiaãkiti sãkiretxiti xika ninoa omanatari Paoro. Kiki ipïkari Xesosi inakori xikara apoïtarina. Paoro auikari Xesosi iuaïkana auãki inini. Ninoa !auikari Xesosi õkitikiniua.

²⁰—Iuasaaki na nimarotari nikamakiti tïkane. Ininiã nipimaãri Paoro: “Na pinirekatari Xerosareẽ pisini? Iuaã pite apoïtakani, pite pakini kenakotaãkako,” nitxari Paoro. ²¹Txamari iua apakapapiretano: “Kona. Sesamonira ninireka nisini,” itxano nota. Ininiã notara paniãtari iua kateia ãki ikaikotiniritika niokanatariko Sesamoni —itxa Pésito.

²²Ininiã Akiripa:

—Nota nirekari nikenakotiniri iua kiki sãkire —itxa.

Ininiã Pésito:

—Katanarako pikenakotari iua sãkire —itxa.

Akiripa, Perenisi Pakini Apoka Pésitomoni

²³Katimatiniãkata Akiripa, Perenisi pakini apoka, itomaneri initiriakorikata. Peeremãkapokona. Iïroãna kãkiti apotiitiniãtaãua. Sotato auïteakori, sitatxi auakani auïteakori pakini iïroã. Eereka Pésito pïkapiretari Paoro, ininiã Paoro minaãka. ²⁴Ininiã Pésito:

—Pite, Akiripa, hïte atekata apotiitakaniua apaka, hãtamataria ia kiki. Ikinimane Xoteoakori uai auakani, Xerosareẽ auakani apaka !apokaerekataria ia. Isãpiretanona ia maerekati ininiua. Ninoa amanaãno ia okiko. ²⁵Notamoni maerekati !ikama ia. Notamoni ixika !uari ipinini ïkapani. Eereka ia amanaãno apiari Sesamoni isini, ininiã nota auiritari isini. ²⁶Txamari !nimarotari ixika niõkatsopatini Sesamoni. Ininiãkara nimirari Paoro hïte apisatoõ isãkire hïkenakotini ïkapani. Akiripa, apiari pitxaua pite, ininiã ninirekari pite sãpiretinino nota niõkatsopatakiti tïkane. Ia hïkenakotaka atoko hisãpiretano Sesamoni niõkatsopatini ïkapani. ²⁷!Apakata kateia ãkikiri Sesamoni niokanatini ixika nimasãpiretakaniã, kotxi Sesa nirekari imarotiniri ikamakiti xika.

Paoro Sãkirauatini Akiripa Apisatoõ

26 ¹Eereka Akiripa paniãtari Paoro:

—Nauritai pisãpiretiniua pimaïkiko xika.

Ininiã Paoro õkatari iuako isãkire isãpiretini ïkapani. Iposo atoko Paoro sãkirauata, maerekati imakamakani ninoa imarotini ïkapani.

2—Aãuïte Akiripa, notamoni erekari pite apisatoõ nisãpiretiniri Xoteoakori apoïtinino. 3Kotxi pite iteene imarotari ate atokiriakorini oereëkiti, Xoteoakori paniãtakiti. Ininiã namanaãï pikenakotiniri nisãkire imakinika.

4—Xoteoakori imarotano nota ãtokoripanika ninakasaakiua, nitixine nauakasaaki. Eereka Xerosareẽ nauakasaaki ninoa imarotano. Imarotarina ikiniõtika nauini. 5Mixakapokoni ninoa imarotano nota. Imarotarina pariseo nininiãua. Ikara isãpiretaina, inirekiniãna. Kãkiti pariseo inakari iteene auikari ate atokiriakorini oereëkiti sãkiretxiti.

6—Xoteoakori uatxa omanatano nota, kotxi nauikari Teoso sikaenetakiti ate atokiriakorimoni apokapeka uatxa. 7Ate nirimane, tosi pakini nirimanetxi, iãtapari ikara Teoso sikaenetakiti apokini õti. Ninoa parĩkauata Teoso ãkapani ãkanõka, pokamara pakini. Niauïte Akiripa, ikara Teoso sikaenetakiti xika Xoteoakori maĩkano nota. 8Kinirepa hïte !auikari Teoso posotiniri ipĩkari õkitikini, iuaĩkana auãki inini ãkapani?

9—Mitxipeka nota omanatari Xesosi Nasareekiri, hïte omanatiniri atokokana, ininiã nikapokotari isãkire auĩãkani. 10Xerosareẽ nauakasaaki, nikapokotari isãkire auĩãkani. Sasetotxi auĩteakori auiritano kãkiti Teoso nakitiakori kateia ãki nitakini. Kaiãopokori nitaka kateia ãki. Xoteo auĩteakori nirekasaakiri okinina, nota apaka nirekari. 11Nisari Xoteo apotiitiniua aikotimoni ikininape Xesosi sãkire auĩãkani nimisiritini ãkapani. Ninirekari Xesosi sãkire auikiko xipokini. Itene nomanatana, ininiãkara nisari apanakini sitatxitimoni ninoa nikapokotini ãkapani.

12—Ikara xika nisari Tamásiko sitatxitimoni. Sasetotxi auĩteakori auiritano nisini. Ipaniãtanona Xesosi sãkire auĩãkani nimaĩkini. 13Ipixinipokoriti, apaniãxiti iotximere iaxitikiri apoka notamoni. Atokatxi iotximere poiãoka. Ikara iotximere apiata. Iua iotximere ãki nota nimoianariakorikata aua. 14Ate iriãkata xitipe. Iuasaakipeka nikenakotari nakiritiko: “Saoro, Saoro,” itxano Epiráiko inakori sãkiretxitiã. “Kixikapa pimisiritano nota? Piteka pimisiritaua, nota pimisiritakasaaki. Atxiïti kema auĩteka karotaua ipitikiri aãketeẽ. Iua kema auĩte atoko pitxa,” itxano.

15—Ininiã nota: “Apiananiri, kiriparai pite?” nitxari.

—Ininiã iua: “Xesosira nota, pimisiritakitikarano nota. 16Pitima. Nota oerekaua pitemoni, pite nimereini ãkapani, ninitiri pininiua ãkapani. Uatxa pitikakiti pisãpiretako apanakinimoni. Pisãpiretapanikariko

ikinimane kākiti apikomoni noerekakiti tīkane. ¹⁷Ninīkatakaite pite Xoteo sauaki pauakasaaki, Xoteo minakaniua sauaki pauakasaaki apaka. Xoteo minakonimoni niokanatai pisini. ¹⁸Kākiti ipiaā sikani atoko itxana, kotxi limarotarina Teoso sākire. Mōsiāreni atoko ninoa, kotxi !atamatarina Teoso kimapore. Ininiākara pitekara oerekanako Teoso sākire ikimapore imarotinina ikapani, ipiā itakanapinina, ikamaramoni isinina ikapani. Ininiākara !ikamaikari Satanasi paniātakiti. Teoso paniātakitinoka ikamana eereka. Ininiā ninoa auikariko nisākire, ininiākara nota makatxakariko ninoa maerekani. Ininiā Teoso nakitiakori ninoa apaka txauana,” Xesosi txano nota.

¹⁹—Niauīte Akiripa, ikara atoko ininiāra, nikamapekari imakinika Xesosi paniātakiti, iaxiti iotximere apokasaaki nikenakotakiti.

²⁰Nisāpiretari Xesosi sākire merepitipanika kākiti Tamásiko sitatxiti auakanimoni, eereka nisāpiretari Xerosareē auakanimoni. Eereka nisāpiretari ikinimane Xotéia tōpa auakanimoni. Eereka nisāpiretari kākiti Xoteo minakonimoni. Nisinimoni nisāpireāpotana ninoa: “Himaerekani hītakanapako. Hāuikariko Teoso sākire. Erekarinoka hīkamako, ininiākara aimarotapitikari maerekati hītakanapini,” nitxana. ²¹Ikara atoko nitxana ikinimane nisāpiretini. Ikara nisākire xika Xoteoakori maīkano nota Teoso misākiretiko aikoti āki nauakasaaki. Kinirāo okaka itxanona. ²²Uatxa nauapanika, kotxi Teoso nīkatano nota. Ininiā ia ōti Xesosi sākire nisāpireta hīte apiarinimoni, hīte poiāorinimoni apaka. Moisesini sāpiretakiti iaōka nisāpireta. Teoso sākire sāpiretakani sāpiretakiti iaōka nisāpireta. Ninoa sāpiretari Teoso mereēkiti apokini. ²³Ninoa txari: “Teoso Mereēkiti apokako. Iua misiritaākako. Iuakarako ōkitikaua ipinaka atoko. Iuaīkana auāki itxako. Mitxi ipinakari !ōkitikaua. Merepanika iua ōkitikaua. Iuara sāpiretariko Xoteoakori maerekani makatxakiko, Xoteo minakaniua maerekani makatxakiko apaka,” itxana Teoso sākire sāpiretakani. Ninoa sāpiretakiti iaōka nota sāpiretai apaka —itxa Paoro.

²⁴Paoro ikara atoko inakasaaki, Pésito akiritari:

—Paoro, !kiīkitei. Pimapitxiriāpota iteene papaiaōkarauatini xika —itxa.

²⁵Ininiā Paoro:

—Niauīte Pésito, kona nimapitxirita nota. Atāopitikara nisākire nikama. Erekari nisākire. ²⁶Niauīte Akiripa, pimarotapekari nota sāpiretakiti, ininiā kataparaxinireno nimisākiretinii. Pimarotari Xesosi pirena, kotxi Xesosi ipīkasaaki, kona kipatakorīātaāni ipina.

27 Niauĩte Akiripa, pite auikatari Teoso sãkire sãpiretakani sãkire? Nota imarotari pite auikiniri.

28 Ininiã Akiripa:

—Pite sãkire txĩkitakaaritano nota Xesosi sãkire nauikini —itxari.

29 Ininiã Paoro:

—Teoso imarotari. Ninirekari pite, hĩte hĩkinika uatxa nisãkire kenakotakani pakini iteene hãuikiniri Xesosi sãkire nota auikiniri atokotxikana. Txamari kona nota nirekai hĩte kateia ãki hãuini nota atoko —itxa Paoro sãkire.

30 Paoro sãkirauataka atoko auĩtetxi Akiripa, itaro Perenisi, Pésito, ikinimane ninoakata ĩkani pakini, itimana. 31 Iporikiti ipokĩkasaakina, imisãkiretakakana:

—!Auari ikira kiki okiko xika. !Auari kateia ãki itakiko xika.

32 Ininiã Akiripa txari Pésito:

—Ikira kiki mamanaãkaniãri Sesamoni isini, isikakaãkapiimako.

Paoro Potorika Homamoni Isini

27 1 Eereka Pésito sãpiretaua ate iketo apope Itária tixinimoni aĩpiriãtini. Paoro apanakini maĩkakoni apaka sikaãka Xório inakorimoni. Iua Xório seĩ pakini sotato auĩte itxaua. Sesa sotatone itxaua. 2 Ate iereẽtaua maporo ãki, Ataramĩtxio sitatxitikero ãki. Ásia tixinimoni sikaro oa maporo. Kiki, Arisitako inakori sari atekata. Iua Tesarónika sitatxitikiri, Masetónia tixinikiri iua Arisitako. Ininiã ate sipe. 3 Katimatinĩkata ate apoka Sitoõ ioporokoti. Xório tiretari Paoro, ininiã auiritari iua aõkimaneremoni isini iuaã, inirekakiti apakapini ĩkapani. 4 Eereka ate potorika iuaã. Iuasaaki ĩtima inataparata aãpisamoni, ininiã maporo iopiriãri Xipri pokomiriĩti ĩtima manapakaniãtaã. 5 Ate ĩpiriãtari potxoari uiniti. Sirísia tixini takote anapa. Pãpírĩa tixini takote anapa. Ate apoka Miha sitatxiti, Arísia tixiniã. 6 Iuaã sotato auĩte apokaro maporo Arexãtria sitatxitikero, Itária tixinimoni sikaro. Iua iereẽtakaua ate oa maporo ãki.

7 Iuaĩkana apotorika. Iuasaaki ĩtima inataparata aãpisatoõ, ininiã ianaritika asaãpota mapaõtipeka, ininiã eereka aãpoka Sinito sitatxiti apisatoõ. ĩtima tapara xika !aposotaika apikomoni asini anirekinimoni, ininiã aiopiriãri Kreta pokomiriĩti ĩtima manapakaniãtaã. Iuaã anapari Saomona pokomiriĩti. 8 Ianaritika asaãpota imiriĩ takote. Aãpoka ioporoko “Ioporoko Erekarĩ” akiritikoãtaã, Arasea sitatxiti takote.

⁹Iuaã aãuapokota. Pamonõkoniri apikomoni asini. Kiiniri Teoso ïkapani kãkiti manipokotakani inapapeka, ininiã imarotaãka ïtima kataparari kaiamapeka apokini. Ininiã Paoro õtãkikana ninoa:

¹⁰—Apikomoni asiniã, pamonõkoniri. ïtima kataparari kasaikamaro maporo atiikata. Kãkiti ipinako —itxa Paoro.

¹¹Txamari sotatoakori auïte !auikari Paoro sãkire. Iua auikapiretari kamaporoteri sãkire, maporo nïkatakari pakini sãkire. ¹²Kaiãopokori maporo ãki parïkauatakani txari:

—Ia ioporoko kona erekari mitaã anapini. Masa apikomoni. Atxiïti aposota Penisi sitatxitimoni aãpokini. Iuaã manapakakari mitaã —itxana.

Penisi sitatxiti Kreta inakori pokomiriïti ioporokoti. Atokatxi ereëkokini manapi aua Penisi sitatxiti.

ïtima Kataparari Pirena

¹³Iuasaaki ïtima poiãoka apokaãpota ate tikinimoni, ininiã ninoa uãkatari:

—Uatxaika erekapekari Penisi sitatxitimoni asini —itxana.

Ininiã õtanõkarina kai, maporo maïkiko, ininiã potorika atxa. Kreta miriïti takote anapaãpota. !Anirekari potxoari uiniti apanïkakiã asini, kotxi pamonõkoniri iuaã. ¹⁴Txamari patimari ïtima iteene inataparata Kreta pokomiriïtikiri. ïtima uãka “Atokatxi Pokïkinimonikiri.” ¹⁵Ininiã ïtima apoka maporomoni. Pataparari. !Aposotari ïtima ininimoni asini, ininiãkara aãuiritari ïtima anikiniro maporo ïtima sinimoni. ¹⁶Aiopiriãri Kaota inakori pokomiriïti. Iua pokomiriï xapitiri. Iua pokomiriïti ïtima kimaporeë aua, ininiã iuasaaki pokomiriï anapakasaaki ïtima poião taparata, ininiãkara aõtanõkaro kanaua maporo kapokiãmonikiri.

¹⁷Akosekaãpotari kanaua maporo ãki aeretakini ïkapani. Ininiã ninoa iapiripoataro maporo aãpitsaã ïtima katakakitapetiniri monõkoni. Ninoa pïkari ïtima anikiniro maporo ikipatxite apanïkakiãkirimoni. Iua ikipatxite Arïpia tixini takote. Ininiã ikaxitikarina mãkatxi mata maporo aniãkari. Mãkatxi mata kaikotiniã maporo nopini, patimaua ïtima anikiniua. Ikara atoko ininiã, auiritarina ïtima anikiniua. ¹⁸ïtima inataparatanika, ininiã katimatinïkata ninoa okaãpotari tiitxi maporo ãki auakari potxoari uinitimoni maporo sakikini monõkoni. ¹⁹Katimatinïkata okarina maporo tii potxoari uinitimoni.

²⁰Mapaõti !aãtamataikari atokatxi. !Aãtamataikari iõriki. ïtima inataparatanika, ininiã auãkatari apinini.

²¹ Mapaõtipeka maporo âki parĩkauatakani kona inikaikana. Ininiã Paoro misãkiretana:

—Kinirepa hĩte kona kĩpitari nisãkire? Kinirepa hĩte takanapari Kreta pokomiriĩti? Hĩkĩpitaãkamariko nõtãkikinii, tiitxi kona hõkamako. ²²Iuaritika kataparaxinire hĩtxako. Nisãpiretai, kona kãkiti !lipina. Maporonanira sakika. ²³Nota Teoso nakiti nitxaua. Iua ĩkapani niparĩkauata. Minipani iua nitiri iaxitikiri oerekaua notamoni. ²⁴Teoso nitiri akiritano: “Paoro, !pipĩkarauatape. Pite apokapitikako Sesa apisatoõ. Peerekari Teoso. Itiretai pite, ininiãkara ninoa pitekata sikani !lipinapani,” itxano. ²⁵Ininiã kataparaxinire hĩtxako, kotxi nota auikari Teoso sãkire. Ikapapitikariko nisãpiretini iaõka. ²⁶Ītima okaroko maporo ipokomiriĩ —itxa Paoro sãkire ninoamoni.

²⁷Ipi semanati ĩtima inataparata. Anikaro maporo potxoari uiniti Metxiteháneo inakori ĩpiriãtini. Eereka apanĩkanõka maporo âki parĩkauatakani uãkatari imiriĩ takotepeka aãpokini. ²⁸Ininiã ninoa okari kai iokaritsãã ĩpanaã imarotinina ĩkapani. Trĩta seisi metro ĩpanaã. Eereka apikomoni iaõtarina ĩpanaã, vĩtxi setxi metronoka. ²⁹Ininiã ipĩkarauatana maporo kai mitarimoni oãpokini monõkoni. Ininiã maporo kapokiãmoni ikaxitikarina ipi ipi pakini kai iokaritsãã maporo maĩkiko. Eereka imisãkiretarina Teoso paĩtiki ikatimatini ĩkapani. ³⁰Maporo âki parĩkauatakani nirekari maporo itakanapinina. Iokatzakarina kanaua potxoari uinitimoni. Ninoa txaua:

—Iuaĩkana kai aiokatzaka uai maporo ĩkiinaã.

Txamari na atão isãkirena. Inirekarina maporo itakanapinina kanaua âki. ³¹Iuasaaki Paoro txana sotato auĩte, sotatoakori pakini: —Nakira kikiakori maporo âki makaikotakaniã, hĩte ipinako —itxa.

³²Ininiã sotatoakori tsotakari aãpitsa kanaua maĩkakari, ininiã ĩtima anikari iua kanaua.

³³Iuasaaki imaropirĩkata. Paoro õtãkikana ikinimane inipokotini ĩkapani:

—Ipi semanati hiãtapanãtari ĩtima napini. Ipi semanati hĩteni kona xatiki hinipokota. ³⁴Ininiã hinipokotako uatxa, hĩtapara apokini ĩkapani himapinakani ĩkapani. Hĩkarotiko !uapani. Hiãko ãtika kona katzakapani —itxa.

³⁵Eereka Paoro kosekari komiri. Ikinimane apisatoõ isãkirauata Teosokata. Iposo atoko imapixinikari komiri porĩ, nika itxari. ³⁶Ininiã ikinimane kataparaxinirepe itxana, ininiã inipokotana. ³⁷Tosẽtosi setẽta seisi pakini kãkiti maporo âki auakani iuasaaki. ³⁸Iteene

inipokotakana atoko, okarina triko potxoari uunitimoni maporo poana onini íkapani.

Maporo Sakikini Pirena

³⁹Katimatiníkata maporo áki paríkauatakani atamatarí imirií, txamari !imarotarina itixi uáka. Atamatarina ikipatxite, ininiá ninoa: —Iuaã kipatxi nopini maanikaro maporo, aposotiniá —itxana.

⁴⁰Ininiá itsotakarina aãpitsa maporo tsapi. Kai kaikota ipatapiã. Ikoxirikarona aãpitsa mekotxi maíkiko, maporo oerekaátiko. Iposo atoko ókitikarina mákatxi mata maporo íkiiátinimoni auakari, ikipatxitemoni maporo ítima anikini íkapani. Ininiá ikipatxitemoni asaãpota. ⁴¹Txamari ipixinipokoriti maporo atxapaã ikipatxite nopini. Maporo íkiiátinimoni atxapaã. !Osaika. Tsakati kataparari xika maporo kapokiátinimoni txirakiãpota.

⁴²Sotatoakori kiniráo okaka txana ikinimane maíkakoni. !Inirekarina ninoa mitekini imiriímoni anokinina. ⁴³Sotatoakori auíte !inirekari Paoro okiko, ininiá !auritana. Ipaniátana ikinimane: —Himarotiniári hanokini, ininiá híte merepanika híkomokako. Hanoka ikipatxitemoni. ⁴⁴Eereka, híte mimataanoreni híkomokako. Himaíkariko maporo txirata, ininiá hanoka ikipatxitemoni —itxana.

Ikara atoko aniniá, amakinika aãpoka ikipatxitemoni.

Máota Pokomiriíti Pirena

28 ¹Imiriípekaua amakinika, eereka aimarotari Máota inakori pokomiriíti aãpokini. ²Iuaã auakani apakapaua ipoxokoniritikana. Iuasaaki áparaã potorika ikipini. Áparaã kipini xika patxíkareri, ininiá iuaã auakani kamari xamina, ate irokini íkapani. ³Iuasaaki Paoro apaka apotiitari xamina. Xamina pokiá itakasaakiri, xamina pataka ópókikari imini xamina iriko áki auakari. Akatsatari Paoro uako. ⁴Ninoa ipokomirií auakani atamatarí imini Paoro uakoã iarókini. Ininiá imisákiretakakana: —Ikira kiki kokaniri atxiíti. !Ipina potxoari uuniti, iuaritika inapakiniri !auari. Uatxaika ipinapitikako —itxakakana.

⁵Paoro íkokari imini xamina pokimoni arikini íkapani. !Katsiiri iuamoni. ⁶Ninoa iátapanátari iuako ananapoatini. Iátaparina iua mokatanitika ipinini. Mapa oara napa atoko !ipina, ininiá ninoa: —Kona kokaniri ikira. Teoso itxaua —itxanátana.

⁷Iuaãtaã takote aua kikió Pópirio inakori nakiti. Máota pokomiriĩti auakani auĩte itxaua. Iua apakapaua ate ipoxokoniritika. Akaikota iua aapoko ipi āti pakini ōti. ⁸Iuasaaki iri sirĩkanāta. Apoomata. Itikanāta. Ininiã Paoro sari iuamoni. Akiritari Teoso iua ereka inini ĩkapani. Itakari iuako inopini. Iuasaakipeka erekapeka itxa iua. ⁹Eereka amianatakani iua pokomiriĩti auakani sari Paoromoni, ininiã iua makananitana ninoa. ¹⁰Ninoa sikaua tiitxipokoni. Apotorikasaaki āto maporo āki, isikauana imakinika anireẽkiti.

Paoro Homa Sitatxiti Isini

¹¹Ate napari ipi āti pakini kasiriti iuaã. Eereka aiereẽtaua maporo āki, Arexãtria sitatxitikero āki. “Itaritxi Ipi” akiritaãka maporo uãka. Mitaãsaaki oa maporo kaikota Máota pokomiriĩti. ¹²Apotorika iuaã. Eereka aãpoka Sirakosa inakori sitatxiti. Iuaã akaikota ipi āti pakini ōti.

¹³Eereka iuaĩkana maporo potorika. Aãpoka Héxio sitatxiti. Katimatinĩkata ĩtima atikinimonikari ina, ininiã patimari asini. Katimatinĩkata aãpoka Posoori sitatxiti. ¹⁴Iuaã aõkitana kãkiti, Xesosi sãkire auĩãkani. Ninoa amanaãua āti semanati anapini ninoakata. Eereka iuaĩkana aiereẽtaua maporo āki. Iuaĩkana apotorika. Homa sitatxiti aãpoka.

¹⁵Xesosi sãkire auĩãkani, Homa auakani, kenakoenetari aãpokaenetini, ininiã inana ate aõkitinina ĩkapani. Apanakini aõkitaua ate kienatxi amotikoãtaã takote, Ápio inakoriãtaã takote. Apanakini aõkitaua ate kãkiti imakiniãtaã, “Ipi Āti Aapokotxiti” inakoriãtaã. Paoro aõkitakasaakina ninoa, ipoxokoniua.

—Peerekari Teoso, kotxi naia inari notamoni —itxa Paoro.

Homa Sitatxiti Paoro Apokini

¹⁶Homa sitatxiti aãpoka atoko, Paoro auiritaãka inirekiniãtaã auini. Ātika sotato kaikotapika iuakata isinimoni imarotini ĩkapani.

¹⁷Ipi āti pakini ōti napaka atoko, Paoro pĩkapiretana Xoteoakori auĩteakori. Ninoa apotiitakasaakiua, Paoro misãkiretana ninoa.

—Nitariakori, !nikamari maerekati Xoteoakorimoni. Nauikapitikari akiomaneakorini oerekakiti sãkiretxiti. Iuaritika nimaĩkaãka Xerosareẽ. Nisikanapaãka Homanoakorimoni. ¹⁸Homanoakori pimaãno nimaĩkiko xika. Eereka inirekarina isikakinino, kotxi ninoa imarotari ixika !auari nipinini ĩkapani. ¹⁹Txamari Xoteoakori !nirekari Homano sikakinino, ininiãkara nakiritari Sesa nisãkire ikenakotini ĩkapani.

!Ninirekari nimisākirepiretiniri ninirimane Xoteoakori. ²⁰Ikara atoko ininiã, nipīkapiretai hite nimisākiretini ikapani. Teoso mereēkiti sākire, Xoteoakori iātapakiti sākire nauikini xika, nota maīkaāka.

²¹Ininiã ninoa:

—Ate !apakapari iōkatsopari Xotéia tōpakiri pite maerekani pirena. Aītariakori iuaã ikani !iminapiretari maerekati pikamakiti pirena. ²²Ate nirekari akenakotiniri pite auīākiti sākiretxiti, kotxi akenakoenetapekari apanakini sākire: “Xesosi sākire na atão” —itxana ninoa.

²³Ininiã ninoa ketotari āti ōti Paorokata aōkitakakiniuana. Iketotiniri manapi itomaneri kākiti sari Paoro auinimoni. Paoro īkanōkapanika sākirauatapitipo. Īkanōkapeka auakapanika isāpirenauatini. Isāpiretana Teoso auītetxi ininiāua.

—Atão Teoso ākiripitikara Xesosi —itxa Paoro sākire.

Isāpiretana ninoa Moisesi iōkatsopatakiti, Teoso sākire sāpiretakani iōkatsopatakiti apaka, atão Teoso ākiripitikara Xesosi ininiua ninoa imarotini ikapani. ²⁴Apanakini auikari Paoro sākire. Apanakini !nirekari auikinirina Paoro sākire. ²⁵Ininiã ninoa taparakienatakakaua Xesosi sākire auikakani mauikarenikata. Ipotorikinina apisa, iuaīkana Paoro misākiretana ninoa:

—Erekari Matamatakoti sākirauata atão hinirimanekata kitxakapirīka. Ipaniātari Teoso sākire sāpiretakari Isaía inakori isāpiretiniri Teoso sākire hinirimanemoni. ²⁶Itxari:

Hisa kākitimoni. Hisāpiretanako ninoa: “Hīkenakotari nisākire ātipirika, txamari !hinirekari himarotiniri nisākire. Ātipirika hītikari nikamakiti, txamari !hinirekari hāuikiniri nota kaminiri ia atoko inakari.”

²⁷Kotxi kākiti ākixinireē !nirekarina imarotinirina nisākire.

!Nirekarina ikenakotinirina nisākire. !Nirekarina itikinirina nikamakiti. Inirekiniārina, itikapitkarina nota kamakiti. Inirekiniārina, atão ikenakotarina nisākire. Ākixinireēna imarotaākamariko nota sākire, inamanako notamoni, ininiã nota txīkitakamanako ninoa ereka ininina,

itxa Teoso sākire.

²⁸Paoro sākirauata iuaīkana ninoakata:

—Ninirekari himarotiniri Teoso iokanapirena erekari kākiti maerekani makatxakiko pirena iokanapiretaākapeka Xoteo minakonimoni. Ninoakara auikapitkariko Teoso sākire.

²⁹Ikara Paoro sãpiretaãka atoko, ninoa Xoteoakori sipeka. Isikasaakina, iteene itaparakienatakakauana Paoro sãkire ikenakotinina xika.

³⁰Paoro kaikota iuaã ipi anokanani. Iĩkitxitari kaapokori iua aapoko Paoronoka auini iĩkapani. Paoro ipoxokoniritika apakapana ikinimane iuamoni sikani. ³¹Isãpiretana ninoa Teoso auĩtetxi ininiãua. Oerekana ninoa Xesosi, Teoso mereẽkiti ininiãua, Apiananiri ininiãua. Isãkirauata itaparaxinireritika kãkitimoni. Auiritaãka ikinipoko imarotakiti isãpiretini.

HOMANO

Paoro Iokanatsopatakiti Homa Auakanimoni

1 ¹Nota Paoro iokanatsopata hītemoni. Xesosi Kristo nitirikarano nota. Teoso mereēno nota iua iokanatakiti kākitimoni nininiua īkapani. Iua akiritano nota, Teoso iokanapirena erekari kākitimoni nisāpiretini īkapani. Ikara parīkatxinoka inireka nikamini. ²Kitxakapirīka Teoso sākire sāpiretakani sāpiretaua Teoso sikaenetakiti, iua iokanapirena erekari. Teoso sākire iōkatsopatakoriā ikara atatsopataāka.

³Ia Teoso iokanapirena erekari sāpiretaua aāuīte Xesosi Kristo Teoso ākiri ininiua. Kākiti itxapekua. Iuasaaki Tavii apika mekaniri itxaua. ⁴Iuaritika Teoso ākiri itxaua. Erekari Matamatakoti oerekari kākiti Teoso ākiri ininiua Xesosi, kotxi ōkitikari Xesosi ipīkaripeka. Iuaīkana aua itxa. Ikara posotiiretxi apiari oerekari kākiti Xesosi Teoso ākiri ininiua. ⁵Xesosi Kristo sikaua ikinipoko erekari. Ininiā iokanataua ikini itixitimoni, kākiti isākire asāpiretini īkapani, isākire auikinina īkapani, isākire iaōka ikaminina īkapani. Ikara atoko aparīkauata Kristo īkapani.

⁶Hītepekana, Teoso akiritai hīte apaka Xesosi Kristo nakitiakori hininiua īkapani. ⁷Ininiā nota iokanatsopata hītemoni Teoso tirketakinimoni, Homa sitatxiti auakanimoni. Teoso akiritai hīte iua nakitiakori hininiua īkapani. Aīri Teoso, Apiananiri Xesosi Kristo apaka sikari ikinipoko erekari hītemoni. Ikamaerekaxiniretai hīte.

Paoro Nirekari Isini Homa Auakanimoni

⁸Merepanika nitxari niTeosone: “Erekapitikai, kotxi Homa auakani iteene auikari pisäkire. Ikini tōpati auakani kenakopiretari ninoa auikiniri pisäkire,” nitxari Teoso Xesosi Kristo uākaā.

⁹Nisākirauatakasaaki Teosokata, nimisäkiretari Teoso hīte īkapani. Ātipirika nimisäkiretari Teoso hīte īkapani. Teoso imarotari ikara nisäkire atāo inini. Nota parīkauata Teoso īkapani. Iuanoka ninireka nikamini. Nisāpiretari iua iokanapirena erekari imi pirena kākitimoni. ¹⁰Nimisäkiretakasaakiri Teoso, nitxari: “Pauiritiniāno, ninirekari paītiki Homa auakanimoni nisini. Mitxi lapakata ninoamoni nisini. Pinirekiniāri iuaā nisini, pimoianatano ninoamoni napokini īkapani,” nitxari. ¹¹Iteene ninirekari naōkitiniri hīte, kotxi ninirekari Teoso kamataparatiniri hākixinire nisäkireē. ¹²Ininiā nota kamataparaxiniretaiko hīte, kotxi himarotari nota iteene auikiniri Xesosi sākire. Apaka hīte kamataparaxiniretano nota, kotxi hīte apaka iteene auikari Xesosi sākire.

¹³Nitariakori, ninirekari himarotiniri itokatapiima niamatama hītemoni nisini īkapani, txamari iuasaaki lapakata nisini. Itomaneri kākiti Xoteo minakaniua ātiātaā auakani auikari Xesosi sākire. Ininiā iua atokotxikana ninirekari kaiāopokori kākiti hīte sauaki auakani apaka auikiniri Xesosi sākire. ¹⁴Nisāpiretari Teoso sākire ikininapemoni. Nisāpiretari sitatxi auakanimoni. Nisāpiretari itopa auakanimoni apaka. Nisāpiretari iōkatsopari imarotakanimoni. Nisāpiretari iōkatsopari mimarotakanimoni apaka. Ikara niparīka. ¹⁵Ininiā iposope nitxa nisāpiretiniri Teoso iokanapirena erekari hīte Homa sitatxiti auakanimoni apaka. Ikinika nitaparaā nisāpiretai.

¹⁶Na nipētatauata Kristo iokanapirena erekari nisāpiretinii, kotxi iua iokanapirena oerekaua Teoso posotiire iua sākire auīākani maerekani imaktxakini īkapani. Kaposotiireri iua, ininiā imaktxakari ikinimane maerekani, iua sākire auīākani maerekani. Ikara ikaminana Xoteoakori merepanika. Eereka ikaminana Xoteo minakaniua apaka. ¹⁷Teoso iokanapirena erekari sāpiretau Teoso txīkitakiniri kākiti atāo inakarinoka ikamini. Teoso sākire auikikoānokara, kākiti txīkitakaāka atāo inakarinoka ikamini. Teoso sākire iōkatsopatakori txari:

Kākiti atāo inakarinoka kamakani auini erekari, kotxi ninoa auikari Teoso sākire.

Kākiti Kamakiti Maerekati

18 Teoso iaxiti auakari oerekaua iua omanākaruatini kākiti maerekani xika, ininiākara iua misiritariko kākiti, kotxi kākiti linirekari Teoso paniātakiti ikamini. Ikamarina maerekatina. Maerekati ikamakasaakina, ikipatarina atão inakari. 19 Kākiti ikara atoko inakani Teoso misiritanako ninoa, kotxi apakata ninoa atamatiniri iua kamakiti. Teosora oerekapekari ikamakiti kākitimoni iua imarotinina ĩkapani. 20 Teoso kamari itixi, ininiā kākiti atamatakasaakiri Teoso kamakiti, imarotari kiātokopa itxa Teoso. Matamatakoti itxaua Teoso, iuaritika kākiti atamatakasaakiri ikamakiti, imarotari iua posotiire auapika inini. Imarotari iua Teoso ininiua. Kākiti imarotari ikara atoko inakari itxaua Teoso, iua kamakiti atamatakasaakina. Ininiākara kākiti imarotapitikari Teoso auini. Ininiākara na atão kākiti sākire: “Na nimarotari Teoso auini inini.”

21 Kākiti imarotari Teoso auini, iuaritika !isāpiretarina Teoso: “Atão Teoso pitxaua,” !itxarina. !Isāpiretarina Teoso: “Erekapitikari pikamakiti ate ĩkapani,” !itxarina. !Kiĩkitena. !Imarotaikarina atão inakari, kotxi ākixinireēna maerekatina aua. 22 Ninoa sākire: “Kimaroreua ate,” txamari !kiĩkitena. 23 Teoso mapinakatimoni !itxana: “Pitenokara Teoso txaua,” !itxarina. Kākiti ipinapitika, iuaritika kamakori kākiti atoko inakari imisākiretana: “Pite ateosone,” itxana. Kamakori kotipiriki atoko inakari, kamakori pirātxi atoko inakari, kamakori imini atoko inakari pakini ninoa misākireta: “Hĩte ateosone,” itxana.

24 Ininiākara Teoso takanapana ninoa. Auiritana maerekati ikaminina ākixinirena nirekaākiti. Itxiko atoko itxa imaerekanina ĩĩtona nireĩkiti. Ninoaka na paxitauana ĩĩtona, kotxi āti sirĩka ātikata. 25 !Inirekarina auikinirina atão inakari Teoso sākire. Inirekarina auikinirina atão minakati. Teoso kamakitimoni itxana: “Pite ateosone. Aparĩkauata pite ĩkapani,” itxana. Ikinipoko kamakarimoni !itxana: “Pite aTeosone. Aparĩkauata pite ĩkapani,” !itxana. Atão inakari kamakani ātipirika txari ikinipoko kamakari: “Peerekai pite.” Ameē.

26 Ikara kākiti maerekani xika, Teoso takanapana ninoa. Auiritana maerekati kākiti kapēta txĩkitaākari, ĩĩtona nireĩkiti ikaminina. Ininiā sito na nirekaikari kikikata osirĩkini. Sito nirekari āto sitokata osirĩkini. !Apakata. Ikara maerekati itxaua. 27 Iua atokokana kiki !inirekaikari sitokata isirĩkini. Kiki nirekari āti kikikata isirĩkini. !Apakata. Ikara maerekati itxaua. Ininiākara ĩĩtona misiritaākako imaerekanina xika.

28 Ninoa imaroreẽ !nirekarina imarotnirina Teoso, ininiã Teoso takanapana. Auiritana ixinikinirina atão minakati. Maerekatinoka ixinikakitina, ininiã ikamarina atão minakati. 29 Åkixinireẽna auu ikini sereti maerekati. Iĩtona nireẽkitinoka ikamana. Åtipirika ikamapikarina maerekati. Apanakini nakiti tiitxi atamatakasaakina, inirekarina. Ikamarina maerekati apanakinimoni. Åkixinireẽna ixikotarina åti. Kokaniri itxauana. Ineenamauatapikana. Apanakini imisirienetana. Ixinikarina apanakini kamakiti maerekatinoka. Aãpirena ikamana. 30 Imisãkirepiretarina åti. Omanatarina Teoso. !Paxitarina apanakini imisãkiretakasaakina. Iuikauana. Åtipirika: “Paimatireua ate,” itxanãtana. Ixinikapikarina: “Natokopa itxa apikomoni maerekati akamini.” !Ikĩpitarina iri paniãtakiti, inoro paniãtakiti pakini. 31 !Kĩikitena. !Ikamarina ikamaenetakitina. !Itiretarina inirimane. !Nirekarina neenamtxi ixipokinina. !Iamonĩkana apanakini. 32 Teoso sãkire txari: “Kãkiti ikara atoko inakani ipinapitikako. Ninoa ipinini atão.” Ikara Teoso sãkire imarotapiikamana, iuaritika ikamapanikarina ikara maerekati. Apaka apokaerekatarina apanakini, maerekati ikamakasaaki.

Teoso Misiritari Maerekati Kamakani

2 1 Atxiĩti hĩte txari: “!Erekana ninoa, kotxi ninoa kamari maerekati,” hĩtxa. !Apakata ikara atoko hinini, kotxi hĩte apaka kamari maerekati ninoa kamakiti atokotxikana. Ininiã !apakata kãkiti akiritiniri åti kãkiti maerekati kamakari ininiua. 2 Apakatapitika Teoso akiritiniri kãkiti maerekati kamakari ininiua, kotxi iua imarotari atão. Ininiã maerekati kamakari apakapari atão imisiritiko imaerekani iaõka. 3 “Ninoa maerekati kamakani misiritaãkako,” hinakasaaki, hĩxinikari hĩte apaka kamari maerekati ninoa kamakiti atokotxikana. Ininiã hĩte apaka !hinapakapaniri Teoso misiritinii hĩte. 4 Atxiĩti na hĩte maãkatari Teoso, kotxi hĩte txari: “Teoso katiraõkiri itxaua,” hĩtxa. Atxiĩti na himaãkatari Teoso, kotxi iuasaaki !imisiritapanikai hĩte. Atxiĩti na himaãkatari Teoso, kotxi Teoso åtipirika mĩteenekai hĩte. Teoso nirekari hĩtakanapiniri maerekati hĩkamakiti, erekarinoka hĩkamini !kapani. Ininiã iua tiretai hĩte. Ikara hĩte imarotamako. 5 Txamari hĩte paikoxinirei. Na hinirekari himaerekani hĩtakanapini. Ininiã himisiritiko apiaãpotako. Kãkiti misiritiko õti apokasaaki, Teoso misiritapitikaiko hĩte. Iuasaaki kãkiti imarotariko Teoso omanãkare

imaerekani xika, kotxi Teoso atão imarotari kākiti kamakiti. ⁶Ikamakiti erekari ininiāua, Teoso sikari erekari iuamoni. Txamari ikamakiti maerekati ininiāua, Teoso misiritariko iua. ⁷Aua kākiti ātipirika erekari kamakani. Iisāpaka erekari ikamini. Inirekarina Teoso: “Erekapitikai,” ininina. Inirekarina Teoso paxitinina. Inirekarina auinina ātipirika. Kākiti ikara atoko inakani Teoso txīkitakana ātipirika auinina īkapani. ⁸Apanakinipekana kamari inireēkitinoka. !Inirekarina atão imarotinina. Maerekatinoka inirekana ikaminina. Teoso omanatana kākiti ikara atoko inakani. Teoso misiritanako ninoa. ⁹Ikinipoko kākiti maerekati kamakani maxikaākako. Atatsiirauatako. Merepanika Xoteo misiritaākako, eereka Xoteo minakanuia apaka misiritaākako. ¹⁰Teoso txanako kākiti erekari kamakani: “Erekapitikai hīte.” Ikara atoko itxanako merepanika Xoteoakori, eereka Xoteo minakanuia apaka. Teoso paxitanako ninoa. Ikamaerekaxiniretanako. ¹¹Teoso misiritana ikini kākiti maerekati kamakani. !Auiritari apanakini maerekati kamakani napakakiniri imisiritikona. Apanakini maerekati kamakani imisiritini atokokana, imisiritari ikinipoko maerekati kamakani.

¹²Xoteo minakanuia !auari Moisesi sākire Teoso paniātakiti iōkatsopatakori. Ninoa kamari maerekati, ininiā Teoso paniātakiti imimarotakanisaaki ipinana. Xoteoakori aua Teoso paniātakiti iōkatsopatakori. Ninoa apaka kamari maerekati. Ininiā Teoso misiritana ninoa, isākire iōkatsopatakori iaōka imakamakani xika. ¹³Teoso kamaerekatari isākire iaōka kamakani. Pikenakotakasaakiri Teoso sākire, txamari !pikamari isākire iaōka, iusaaki Teoso !ikamaerekatai pite. ¹⁴Xoteo minakanuia !auari Teoso sākire iōkatsopatakori. Iuaritika atxiīti ikamarina Teoso paniātakiti iōkatsopatakori iaōka, kotxi ikamarina ākixinirena sākire iaōka. !Auari Teoso sākire iōkatsopatakori ninoamoni, iuaritika Teoso paniātakiti auape ākixinireña. ¹⁵Teoso paniātakiti iaōka ikamakasaakina, oerekarina imarotininina atão inakari ākixinireña. Ākixinirena sākire sāpiretana atão. Ātikata itxana: “Pite kamari maerekati. !Apakata.” Ātikata erekari ikamakasaakina, “Pite kamari erekari. Erekapitikari.” Itxa ākixinirena sākire. ¹⁶Kākiti kamakiti imarotiko ōti apokako. Iusaaki Teoso paniātariko Xesosi Kristo sāpiretiniri kākiti kamakiti. Kākiti kamakiti apanakini mimarotakinini apaka isāpireta. Iusaaki isāpiretari kākiti misiritiko imaerekani xika. Teoso iokanapirena erekari nisāpiretakiti oerekapekari ikara atoko inakari.

Xoteoakori Auari Teoso Paniātakiti Iōkatsopatakori

17 Hītepekana, hīte txari: “Ate Xoteo atxaua. Teoso apakapapitikaue ate, kotxi isikari ipaniātakiti iōkatsopatakori atemoni. Atenoka Teoso anaakori atxaua,” hītxa. Ininiā hīteka iuikaua. 18 Hīte imarotari Teoso nireēkiti hīkamini. Himarotari Teoso paniātakiti iōkatsopatakori, ininiā himarotari erekari apiari hīkamini. 19 Hītxari: “Atera oerekari Teoso kimapore, ikimapore mimarotakanimoni. Mōsiāreni atoko itxana ninoa,” hītxa. “Ate imarotari Teoso sākire, ininiā ate imarotari apanakini aōerekini. Ininiā ate tirikapi atoko atxaua. Apanakini ipiā sikani atoko itxana ninoa.” Ikara atoko hītxa hīte. 20 Hītxari: “Koerekarerini atxaua. Kākiti miūkiteni oereēkani atxaua. Ate oerekari kākiti poiāo imarotakani. Ate imarotari ikinipoko. Aimarotari atāo, kotxi Teoso sākire iōkatsopatakori aua atemoni.” Ikara atoko hītxa hīte. 21 Hīte Xoteo inakaniua oerekari apanakini. Kinirepa kona hīteka oerekaua apaka? Hīte ōtākikari apanakini: “!Piūtiriuatape”. Kinirepa hīte na takanapari hīitiriuatini? 22 Hīte ōtākikari apanakini: “!Pisirikape pītanoro minakotokatika.” Kinirepa hīte apaka sirīka hītanoro minakotokatika? Hīte omanatari teoso kamakori, ininiā kinirepa hītirīkari ninoa teosone aikoti ti? 23 Hīte iuikaua, kotxi Teoso sākire iōkatsopatakori aua hītemoni, txamari apanakini na paxitari Teoso hīte xika, kotxi kona hīte kamari Teoso sākire iaōka. 24 Teoso sākire iōkatsopatakori txari:

Hīte Xoteo xika, Xoteo minakaniua misākirepiretari Teoso, itxa Teoso sākire iōkatsopatakori.

25 Teoso takaōtxikare aua hītoā. Teoso paniātakiti hīkaminiā, erekapitikari Teoso takaōtxikare hītoā auini. Teoso paniātakiti iōkatsopatakori himakamakaniā, Teoso takaōtxikare mauakinini atoko hītxaua. 26 Xoteo minakatiua, Teoso takaōtxikare iitoā mauakini, Teoso sākire iaōka ikaminiā, Teoso txariko: “Tua Xoteo atokotxikana itxa. Nitakaōtxikare iitoā auakiti atokotxikana itxaua.” 27 Hīte Xoteoakorimoni aua Teoso paniātakiti iōkatsopatakori, iuaritika !hīkīpitari Teoso sākire. Teoso takaōtxikare auapitikama hītoā, iuaritika !hīkīpitari Teoso sākire. Xoteo minakaniua !auari Teoso takaōtxikare iitoāna, iuaritika ninoa kamari Teoso paniātakiti iōkatsopatakori. Ikara atoko ininiā, ninoa oerekai himaerekani.

28 Kiripa atāo Xoteo? Kiripa Teoso nakiti txataua? Kirimonipa aua Teoso takaōtxikare atāo inakari? Teoso takaōtxikare iitoā auakini, na ikinikani atāo Xoteo itxauana. 29 Teoso paniātakiti

iōkatsopatakori !oerekaua Teoso nakiti aniniua. Xoteo atão inakariua, Teoso nakiti itxaua ākixinireē. Teoso takaōtxikare aua iua ākixinireē. Erekar Matamatakoti takari Teoso takaōtxikare iua ākixinireē. !Inirekari kākiti iuikiniri. Inirekari Teoso iuikiniri.

Teoso Kamari Ikamaenetakiti

3 ¹Atxiīti hīte txano nota: “Teoso apakapari Xoteo. Teoso apakapari Xoteo minakaniua apaka, ininiā !apiaerekata Xoteo aniniua. !Apiaerekata Teoso takaōtxikare aītoā auini.” Atxiīti ikara atoko hītxa. Txamari na atão. ²Apiaerekatapitika Xoteo aniniua, kotxi Teoso merepitipanika sāpiretari iuaka sākire Xoteomoni, ninoa iōkatsopatiniri īkapani, inīkatinirina īkapani. ³Iuaritika apanakini Xoteo !auikari Teoso sākire. Ikara xika atxiīti Teoso !ikamari ikamaenetakiti? ⁴Ikamapitikari. Atxiīti paxirari ikinimane sākire. Iuaritika Teoso sākire atāonoka. Teoso sākire iōkatsopatakori txari:

Teoso sākirauatakasaaki, ikinimane imarotari isākire atão ininiua. Isāpiretakasaakiri kākiti imisiritiko imaerekani xika, iusaaki imarotaākako Teoso kamakiti atão inini.

⁵Atxiīti kākiti txano nota: “Atão minakati akamakasaaki, apanakini apia imarotari Teosonoka kaminiri atão inakari. Ininiā erekari akaminiri atão minakati apanakini imarotiniri Teosonoka kaminiri atão inakari. Ininiā !apakata Teoso misiritiniua ate, maerekati akamini xika.” Atxiīti aua kākiti ikara atoko ina sākiretakani. ⁶Apakatapitika Teoso misiritiniri maerekati kamakari. Iua kamari atāonoka, ininiā apakatapitika imisiritiniri ikinimane maerekati kamakani.

⁷Atxiīti kākiti txaua: “Atão minakati asāpiretakasaaki, apanakini imarotari Teoso sākirenoka atão ininiua. Atão aminasākiretakaniā, apanakini kākiti txari: “Teosonoka ereka,’ itxana. Ininiā !apakata Teoso misiritiniua amaerekani xika.” Atxiīti aua kākiti ikara atoko ina sākiretakani. ⁸Ikara atão ininiā, maerekati makama erekari apokini īkapani. Txamari ikara sākiretxiti na atão. Iuaritika apanakini apoītapekaua ate ikara atoko asāpiretini. Ininiā atāopitika ninoa misiritiko, isākirena xika.

!Auari Kākiti Erekar

⁹Hīxinikariko ikinika ikara nisāpiretakiti. Atauako Xoteo apiaerekata? Atauako Xoteo minakaniua poiāo ereka? Kona ikara atokoni itxa. Noerekapekai hīte, Xoteo minakaniua atokokana

itxa Xoteo, kotxi ikinimane kamari maerekati. Akinika !aposotari atakanapiniri maerekati akamini. ¹⁰Teoso sākire iōkatsopatakori txari:

!Auari atāo inakari kamakari. Ātika !auari.

¹¹ Teoso nireēkiti imarotakari !auari. Teoso nirekakari !auari.

¹² Ikinimane kaporīkikari Teoso. Ikinimane kerokari ikamakiti.

Erekari kamakari !auari. Ātika !auari.

¹³ Kākiti sākire maerekati, itotxi arakakari saka atoko itxa.

Itotarina imisirienetirinina apanakini. Kākiti sākire imini tsiīā atoko itxa.

¹⁴ Ātipirika imisākirepiretarina āti, kotxi inīkatarina omanākaretxi ākixinireēna.

¹⁵ Maxikatiīka inirekarina okinirina āti.

¹⁶ Isinimonina imaxikana apanakini. Maerekaxinireninoka itxīkitakana apanakini.

¹⁷ !Imarotarina neenamatzixi itakanapinina.

¹⁸ !Ipaxitarina Teoso. !Ipīkarina iua.

Itxa Teoso sākire iōkatsopatakori.

¹⁹ Aimarotari Teoso sikari ikinika ipaniātakiti iōkatsopatakori atemoni Xoteoakorimoni, inireēkiti aimarotini īkapani. Ininiā !apakata ate, Xoteo minakaniua pakini: “!Nimarotari Teoso nireēkiti,” anini, kotxi isāpiretapekari inireēkiti akamini tīkane. Ininiā atāopitikara Teoso misiritinina ikinimane maerekati kamakani. ²⁰Ikinika Teoso paniātakiti iōkatsopatakori !aposota akamini, ininiā Teoso kona kamaerekataua. Teoso paniātakiti iōkatsopatakori oerekaua maerekati kamakani aniniua.

Natokopa Itxa Teoso Kamaerekatiniri Kākiti?

²¹ Uatxa Teoso oerekapekaua itxīkitakiniri kākiti atāo inakari kamakani ininiua. Teoso paniātakiti ikinika !ikama kākiti, iuaritika itxīkitakaākana atāo inakari kamakani ininiuana. Kitxakapirīka Moisesi, Teoso sākire sāpiretakani apaka sāpiretari ikara. ²²Teoso txīkitakari kākiti atāo inakari kamakani ininiuana, Xesosi Kristo sākire auikasaakina. Itxīkitakari Xoteo, Xoteo minakaniua pakini atāo inakari kamakani ininiuana, Xesosi sākire auikasaakina. Xoteo minakatiua Teosomoni, Xoteotxikana itxaua. ²³Kotxi ikinimane kamari maerekati, ininiā !aposota aāpokini Teoso iotximeremoni. ²⁴Maerekati kamakanuiua ate, iuaritika Teoso sikari ikinipoko erekari maxikatiīka atemoni, ininiā Teoso kamaerekataua ate, kotxi Kristo Xesosi iīkitxirauata ate īkapani

ipíkasaaki. Ininiã Teoso !imisiritaikaua amaerekani xika. ²⁵Teoso sikari Xesosi ipinini kãkiti ikapani. Xesosi ipíkasaaki, Teoso makatxakari maerekati akamakiti. !imisiritaikaua ate, kotxi aũuikari Xesosi ipinini ikitxitari Teoso, maerekati akamakiti. Teoso sikari Xesosi ipinini ate ikapani. Ikara oerekaua atão inakarinoka ikamini. Mitxipitipanika Teoso !imisiritana kãkiti imaerekanina xika. Iãtapari iketo manapi apokini, kotxi iamoniãkari kãkiti. ²⁶Teoso sikari Xesosi, ininiã ipipe kãkiti ikapani, ininiã uatxa Teoso misiritari kãkiti maerekati ikamini xika, ininiã aimarotari Teoso atão inakarinoka kamakari itxaua iua, kotxi !auritari maerekati kamakari inapakakini. Erekarari Teoso, ininiã iua posotari ikamaerekatiniã kãkiti Xesosi sãkire auiãkani.

²⁷Ininiã !apakata aũuikiniua, kotxi !aurari aparika akamaerekatakiri, ininiã !apakata aũuikiniua Teoso paniãtakiti iokatsopatakori akamakasaaki. Teosora kamaerekataua, Xesosi sãkire aũuikasaaki. ²⁸Teoso paniãtakiti iokatsopatakori kamakari atxiiti !ikamaerekataãka, kotxi !auikari Xesosi sãkire. Xesosi sãkire auikakarinnoka ikamaerekataãka. ²⁹Atauako Teoso Xoteo Teosonenanini itxataua? Konapitini. Xoteo minakanua Teosonekanera apaka itxaua Teoso. ³⁰Teoso atinnoka aua. Iua kamaerekatana Xoteo, Xesosi sãkire auiãkani. Iua kamaerekatana Xoteo minakanua apaka, Xesosi sãkire auikasaakina. ³¹Ikara atoko ininiã, atxiiti kãkiti txari: “Teoso kamaerekataua ate, kotxi aũuikari Xesosi sãkire, ininiã Teoso paniãtakiti iokatsopatakori !itxaika. Ininiã !akamaikari,” itxa kãkiti sãkire atxiiti. Konapitini. Xesosi sãkire aũuikasaaki, anirekarari iteene akaminiri Teoso sãkire paniãtakiti iokatsopatakori.

Atão Inakari Kamakari Apraõ

4 ¹Maxinikari Apraõ aĩri kitxakapirikari. Natokopa itxa iua imarotakiti, Teoso kamaerekatiniã kãkiti? ²Apraõ kamakiti erekarari kamaerekataãkamariko iua, ininiã iua iuikamauako. Txamarari iua iuikiniua !aurari Teoso apisatoõ. ³Teoso sãkire iokatsopatakori txari:

Apraõ auikari Teoso sãkire, ininiãkara Teoso txikitakari iua atão inakari kamakari ininiua.

⁴Parikauatakari ipatrãote sikari iparika iki iuamoni. Maxikatiika !iikitxitari iua. Isikari, kotxi iparikauata. ⁵Kãkiti auikiniãri Teoso kamaerekatiniã maerekati kamakari, iua kãkiti !iuikari iuaka parika. Imarotari iparika !ikamaerekatari iua. Teoso txikitakari ikara atoko inakari kãkiti atão inakari kamakari ininiua, kotxi

iua auikari Teoso sãkire. ⁶Kitxakapirĩka Tavii txari ikara atoko. Iua sãpiretari kãkiti Teoso sikakiti erekari apakapakani. Teoso txĩkitakari iua atão inakari kamakari ininiua. Na iparĩkani txĩkitakari iua atão inakari kamakari ininiua. ⁷Tavii txari:

Teoso makatxakasaakiri kãkiti maerekani, !atamataikari maerekati ikamakiti. Teoso takari ikinipoko erekari kãkiti ikara atoko inakarimoni.

⁸Teoso liaõtari iua kamakiti maerekati. Teoso takari ikinipoko erekari iuamoni.

Itxa Tavii kitxakapirĩka.

⁹Atxiĩti pite txari: “Atauako ia erekari Teoso sikakiti, Tavii sãpiretakiti, kãkiti Teoso takaõtixikare auaiõtatakiti ikapaninanini?” Konapitini. Ia erekari Teoso sikakiti Teoso takaõtixikare mauaiõtatakini ikapani apaka. Nisãpiretapekai ia Teoso sãkire iøkatsopatakori:

Apraõo auikari Teoso sãkire, ininiãkara Teoso txĩkitakari iua atão inakari kamakari ininiua,

itxa Teoso sãkire iøkatsopatakori. ¹⁰Kirisaakipa Teoso txĩkitakari Apraõo atão inakari kamakari ininiua? Atauako Teoso takaõtixikare Apraõo iõtoã auakasaakiikani? Konapitini. Takaõtixikari Apraõo iõtoã takiko apisapanikara, itxĩkitakari Apraõo atão inakari kamakari ininiua. ¹¹Merepanika Teoso txĩkitakari Apraõo atão inakari kamakari ininiua, eerekaikara itakari itakaõtixikare iõtoã. Ikara Teoso takaõtixikare oerekari, mitxipeka Teoso txĩkitakari Apraõo atão inakari kamakari ininiua, kotxi iua auikari Teoso sãkire. Apraõo auikari Teoso sãkire, Teoso takaõtixikare iõtoã auini apisapanika. Ininiã Apraõo ikini Teoso sãkire auiaãkani iri atoko itxaua. Atxiĩti Teoso takaõtixikare iõtoãna !auari. Iuaritika ninoa iri atoko itxaua Apraõo. Teoso txĩkitakari ikinimane iua sãkire auiaãkani atão inakari kamakani ininiuana. ¹²Apraõo Teoso takaõtixikare auaiõtatakini iri atoko itxaua, ninoa auikiniãri Apraõo sãkire Apraõo auikiniri atokotxikana, kotxi Teoso auikari Teoso sãkire Teoso takaõtixikare iõtoã auini apisapanika.

¹³Teoso sikaenetari itixi Apraõomoni, imekaniriakori pakinimoni. Ikara atoko Teoso sãkire, kotxi Apraõo auikari Teoso sãkire. Iua auikari Teoso sãkire, ininiã Teoso txĩkitakari iua atão inakari kamakari ininiua. Apraõo kamakiti erekari !itxĩkitakari Teoso sikaenetiniri itixi Apraõomoni. ¹⁴Kãkiti erekari kamakari Teoso sãkire mauiaãkati !apakapari Teoso sikaenetakiti, kotxi !auikari Teoso sãkire. Teoso sikari isikaenetakiti iua sãkire auiaãkanimoninani.

¹⁵Teoso paniātakiti iōkatsopatakori makamakati misiritaākako. Teoso paniātakiti iōkatsopatakori mauakaniā, maerekati !auari. Txamari auapitika Teoso paniātakiti iōkatsopatakori.

¹⁶Ininiā kākiti auikasaakiri Xesosi sākire, apakapari Teoso sikaenetakiti. Maerekati kamakani kākiti, iuaritika apakaparina Teoso sikaenetakiti, kotxi Teoso nirekari ikinipoko erekari isikini kākitemoni. Ininiā ikinimane Apraão apika mekaniriakori apakapapitikari Teoso sikaenetakiti. Xoteoakori Teoso paniātakiti iōkatsopatakori auakini apakapari. Xoteo minakaniu Teoso sākire Apraão auikini atoko inakani apaka apakapari. Ate amakinika iri atoko itxaua Apraão. ¹⁷Teoso sākire iōkatsopatakori txari:

Teoso txari Apraão: “Nota txīkitakaiko pite itori āti uāka iri pininiua.”

Ininiā Teosomoni iua aīri atoko itxaua, kotxi Apraão auikari Teoso sākire. Teoso txīkitakana ipīkani iuaīkana auāki inini. Iua kamari mitxi mauakati auini.

¹⁸Apraão kiomātxipeka inakasaaki, kona keeneri. Iuaritika auikari Teoso sākire. Iātapari Teoso sikaenetakiti apokini. Ininiā apanakini āti uāka iri atoko itxapekaua Teoso sākire iaōka. Teoso sākire iōkatsopatakori txari:

Papika mekaniriakori kaiāopokopaniriko.

¹⁹Apraão seī anokanani inakasaaki, imarotari iīto ipinanapanoka inini. Imarotari Sara !oposotaikari keene onini. Iuaritika iteene auikari Teoso sākire. ²⁰!lotoka auikiniri Teoso sikiniri isikaenetakiti iuamoni. Iua auikari Teoso sākire itaparaxinireritika. “Teoso posotari ikinipoko ikamini,” itxa. ²¹Iua iteene imarotari Teoso posotiniri isikiniri isikaenetakiti. ²²Apraão auikari Teoso sākire, ininiākara Teoso txīkitakari iua atão inakari kamakari ininiua. ²³Na Apraāonanini Teoso txīkitaka atão inakari kamakari ininiua. ²⁴Iua txīkitakaua ate apaka atão inakari kamakani aniniua, aāuikiniāri Teoso sākire. Aāuīte Xesosi ipīkasaaki, Teoso ōkitikari iua iuaīkana auini īkapani. ²⁵Teoso sikari Xesosi kākitemoni ipinini īkapani maerekati akamakiti xika. Teoso ōkitikari iua iuaīkana auāki inini īkapani, ate ikamaerekatini īkapani.

Teoso !Omanataikaua Ate

5 ¹Ininiā Teoso kamaerekataua, kotxi aāuikari isākire, ininiākara aāuīte Xesosi Kristo iotokakari Teoso omanatiniua ate. Teoso

!omanataikaua ate. Uatxa apakapaua ate. ²Aãuikasaakiri Xesosi sãkire, iusaaki aimarotari ikinipoko erekari Teoso sikakiti atemoni ikiniõtika. Iteene apoxokoniuata, kotxi aiãtapari Teoso aaõkitini, iua iotximere aãtamadini ãkapani. ³Apanakini misiritakasaakia, apoxokoniuata apaka, kotxi Teoso oerekaua amãteenekiniri amisiritiko. ⁴Amisiritiko amãteenekiniã, aimarore apiaãpota. Aimarore apiaãpotakasaaki, aiãtapariko erekari apokini atemoni. ⁵Erekari apokini aiãtapiniã, aãpakapapitkariko erekari, kotxi aãkixinireẽ aimarotari Teoso iteene tiretiniua. Erekari Matamatakoti Teoso sikakiti atemoni, oerekaua Teoso tiraõki aãkixinireẽ.

⁶Erekari akamini amaposotakanisaaki, Teoso amanirekakanisaaki, Kristo ipina ate ãkapani. Iua ipina iketo õti manapi. ⁷Atxiiti kãkiti ipina atão inakari kamakari ãkapani iua mapinakani ãkapani? Atxiiti !ipina iua ãkapani. Atxiiti kãkiti ipina ãti erekari kamakari ãkapani, iua mapinakani ãkapani? Atxiiti ipina iua ãkapani. ⁸Teoso oerekaua ate, iua iteene tiretiniua ate, kotxi Kristo ipina ate ãkapani maerekati akamapanika anakasaaki.

⁹Kristo ipinini kamaerekataua ate, ininiã uatxa Teoso apakapaua ate. Apikomoni Kristo kaminaua, kotxi Teoso !omanataikaua. !imisiritaikaua. ¹⁰Ate Teoso omanatakani anakasaakia, Teoso ãkiri ipina ate ãkapani. Ininiã Teoso mokaiakari !atxaikaua. Iua apakapaua. Iua apakapaua, ininiã amaerekani imakatkaxa, ininiã aãuapininiika, kotxi iua õkitikaua auapininiika anini ãkapani Teosokata, kotxi Kristo auini auapika. ¹¹Teoso kamari ikara ate ãkapani. Apikomoni iua kaminapanikauako ate, kotxi iua kamapoxokonitaua, kotxi aãuõte Xesosi Kristo mikanapiriãua ate Teosomoni.

Adão, Kristo Pakini

¹²Maerekanitxi apoka itixi kiki ãtika xika, Adão inakori xika. Maerekati ikamakiti xika ipina. Ininiã ikinimane kãkiti ipina, kotxi ikinimane kãkiti kamari maerekati. ¹³Teoso paniãtakiti iõkatsopatakori apokini apisapanika, kãkiti kamari maerekati, iuaritika Teoso !imisiritana ninoã maerekati ikamakitina xika, kotxi iusaaki !isãpiretapanikari ipaniãtakiti. ¹⁴Adão auakasaaki atoko, Moisesi auakasaaki manapi, iusaaki Teoso paniãtakiti iõkatsopatakori !apokapanika, iuaritika ikinimane ipina. Atxiiti kãkiti !ikamari maerekati Adão maerekani atoko, kotxi iua

!ikamari Teoso paniãtakiti, iuaritika ikinimane ipina. Kiki Adão inakori axinikasaaki, aimarotari iua Xesosi atoko ininiua.

¹⁵Txamari aimarotari iua na Xesosi !atokoni itxaua, kotxi ãtika kiki maerekani xika, itori kãkiti ipina. Iua sikari ipĩkitxi kãkitimoni. Kiki ãtipekana, Xesosi Kristopekana, iua sikari erekari Teoso siãkiti itori kãkitimoni imapinakanina ãkapani. Teoso siãkiti iiki !auari. !Erekari Adão sikakiti. Peerekari Xesosi Kristo siãkiti. ¹⁶Kiki ãtika Adão inakori kamari maerekati. ãtinoka maerekati ikama, ininiã eereka Teoso sãpiretari imaerekani. Eereka Teoso misiritari iua. Teoso siãkiti !ikara atokoni itxa. Kãkiti maerekati itori ikamakasaaki, kiki ãtipekana Xesosi sikari Teoso siãkiti kãkitimoni, ininiã ikamaerekatana kãkiti. Iuasaaki imaktxakari ninoa maerekani. ¹⁷Kiki ãtika, Adão inakori maerekani xika, Teoso txĩkitakari ikinimane ipinini. !Erekari iua kiki kamakiti. ãti kiki, Xesosi Kristo inakori kamakiti peerekari. Iua txĩkitakari kãkiti ãkixinire katapara inini maerekati imakamakani ãkapani. Kãkiti ikara atoko inakari Teoso sikari ikinipoko erekari. Itori isika. Itxĩkitakari iua atão inakari kamakari ininiua. Ia iparĩka iiki !auari.

¹⁸Adão kamari ãtinoka maerekati, iuaritika iua maerekati txĩkitakari Teoso misiritinina ikinika kãkiti. Iua atokokana Xesosi kamakiti ãtika txĩkitakari Teoso kamaerekatina kãkiti ninoa ãtipirika auini ãkapani. Iuasaaki atãonoka ikamakiti. ¹⁹Kiki ãtika Adão inakori na kamari Teoso sãkire iaõka, ininiã itxĩkitakari kãkiti itomaneri maerekati ikaminina. Kiki ãtipekana Xesosi inakori kamari Teoso sãkire iaõka, ininiã itxĩkitakari kãkiti itomaneri atão inakari kamakani ininiuana.

²⁰Teoso sikari ipaniãtakiti iõkatsopatakori Moisesimoni. Iuasaaki kãkiti imarotari maerekati itori ikamakitina, ininiã maerekanitxi apiaãpota, kotxi Teoso paniãtakiti iõkatsopatakori auape. Maerekanitxi apiaãpota, iuaritika erekari Teoso sikakiti kãkitimoni apiata. ²¹Maerekanitxi txĩkitakari kãkiti ipinini. Erekari Teoso sikakiti kãkitimoni txĩkitakari kãkiti auini ãtipirika imaxipokakani tĩkane, kotxi aãuĩte Xesosi Kristo txĩkitakari kãkiti atão inakari kamakari ininiua. Ininiãkara kãkiti auapininiika, kotxi Xesosi Kristo kamaerekatana.

!Anirekaikari Maerekati Akamini

6 ¹Ininiã erekari atxiĩti apikomoni maerekati akamini, ikinipoko erekari Teoso sikakiti apiata auini ãkapani?

²Konapitini. Teoso makatxakapekari amaerekani, kotxi iuasaaki

!anirekaikari apikomoni maerekati akamini. Anireẽkiti maerekati akamini xipope, kãkiti ipinini atoko itxa ixipokini. Ininiã !apakata apikomoni maerekati akamini. ³Apatxisatiko oerekari Kristo Xesosi nakitiakori aniniua. Iuakata apinini atoko itxa apatxisatiko. Himarotapekari ikara. ⁴Apatxisatiko oerekari Kristokata ikatakoni atoko aniniua, ininiã !anirekari apikomoni maerekati akamini. Kristo iri Teoso posotiire õkitikari imi, uuaĩkana auãki inini ĩkapani. Peerekari iposotiire. Ininiã apatxisatiko oerekari Xesosi õkitikiko atokokana Teoso õkitikaua ate aãuini amaneri inini ĩkapani.

⁵Aãuapika Kristokata, ininiã ãtika atoko atxaua iuakata aãuini, ininiã Kristo ipinini atokokana mitxi aãuini xipope. Kristo uuaĩkana auini atokokana, aãuini amaneri. Peerekari, kotxi aãuapika Kristokata, ãtika atoko aniniua iuakata. ⁶Mitxi anireẽkiti xipope, kotxi Kristo makatxakari amaerekani aamina ĩpiriãmitakari nopini ipĩkasaaki ate ĩkapani. Ininiã mitxi anireẽkiti posotiire !auaika. Ixipokaãkapeka, kotxi mitxi anireẽkiti maerekatinoka. Ininiã maerekanitxi nitiriakori atoko !atxaikaua. Aimarotari ikara. ⁷Maerekanitxi na paniãtaikari kãkiti ipĩkari.

⁸Kristokata ipĩkani atoko aniniã, aimarotari iuakata aãuini apaka. ⁹Ipĩkasaaki õkitikaãka, ininiã !ipinaika. Aimarotari ikara. Ipĩkitxi na kaposotiireikari uuaĩkana Kristo ipinini ĩkapani. ¹⁰Iua ipina maerekanitxi posotiire ixipokini ĩkapani. Iuasaakipeka maerekanitxi posotiire xipoka. Uatxa Kristo auapininiika Teosokata, iri nireẽkitinoka ikamini ĩkapani. ¹¹Iua atoktxikana anireẽkiti maerekati xipope. Uatxa !anirekaikari maerekati akamini. Uatxa aãuapininiika Teosokata, iua nireẽkitinoka akamini ĩkapani, kotxi Kristo Xesosikata aãuapika.

¹²Ininiã na hãuiritapiri hiĩto paniãtinii maerekati hĩkamini. Na hĩkamapiri maerekati hiĩto nireẽkiti. ¹³Na hãuiritapiri hiĩto kaminiri maerekati. Na hãuiritapiri hõki kaminiri maerekati. Na hãuiritapiri hinama kaminiri maerekati. Na hãuiritapiri hũuako kaminiri maerekati. Na hĩkamapiri maerekati hiĩto nireẽkiti. Hĩteka hĩsikauako Teosomoni, kotxi mitxi ipĩkani atoko hĩtxaua, eereka Teoso txĩkitakai auãki uuaĩkana hinini, ininiã hĩsikari hiĩto ikinika Teosomoni. Atão inakarínoka hĩkamako hõkiã, hinamaã, hũuakoã, imakinika hiĩtoã. ¹⁴Uatxa maerekanitxi apatrãote atoko !itxaikauako. Uatxa amisiritiko !auaika, Teoso paniãtakiti iõkatsopatakori amakamakaniã, kotxi ikinipoko erekari Teoso sikakiti aãpakapakasaaki, iusaaki imakatzakari amisiritiko.

Atão Inakari Nitiriakori

15 Ininiã atxiĩti hĩtxano nota: “Maerekati makama, kotxi amisiritiko !auaika Teoso paniãtakiti iõkatsopatakori amakamakaniã, kotxi ikinipoko erekari Teoso sikakiti aãpakapakasaaki, imakatzakari amisiritiko. Ininiã makamari maerekati,” atxa atxiĩti. Konapitini. 16 Himarotari, hãuiritiniãri kãkiti paniãtinii iua nireẽkiti hĩkamini, ininiã iua hĩpatrãote atoko itxaua. Iua nitiriakori atoko hĩtxaua, kotxi hĩkamari iua paniãtakiti. Maerekanitxi hĩpatrãote ininiãua, hĩkamari maerekati, ininiã hĩpina. Ininiã kona hãua Teosokata ãtipirika. Teoso hĩpatrãote ininiãua, iua paniãtakiti hĩkama, ininiã atão inakarinoka hĩkama. 17 Nitxari Teoso: “Erekapitikari atemoni pikamakiti.” Ikara atoko nitxari Teoso, kotxi mitxi maerekanitxi nitiriakori atoko hĩtxaua. Uatxa maerekanitxi nitiriakori !hĩtxaikaua, kotxi iteene hĩkĩpitari hõerekiko. 18 Teoso makatzakapekai hĩte, ininiã uatxa maerekanitxi nitiriakori !hĩtxaikaua. Uatxa Teoso nitiriakori hĩtxaua, ininiã atão inakarinoka hĩkama. 19 Ikara atoko nitxa sãkireta hĩtemoni, kotxi himarotari nitiritxi, patrão pakini pirena. Himarotakiti poiãoka. Mitxi hãuiritari hiĩto kaminiri maerekati inireẽkiti. Hãuiritari hiĩto apikomoni maerekati ikamaãpotini. Apiaãpota maerekati hĩkamakiti. Iuasaaki hiĩto maerekanitxi nitiri atoko itxaua. Uatxa hĩsikari hiĩto Teosomoni atão inakari nitiri ininiua ãkapani, ininiã hĩkamariko atão inakarinoka. Ininiã Teoso nakitiakorinoka hĩtxaua.

20 Maerekanitxi nitiriakori hinakasaakiua, atão inakari nitiriakori na hĩtxaua, ininiã atão inakari na paniãtai hĩte atão inakarinoka hĩkamini. 21 ãkiripa erekari hãpakapa, maerekati mitxi hĩkamakasaaki? Kona kapakaparei. Uatxa hĩpẽtauata maerekati mitxi hĩkamakiti xika. Maerekati kamiko xika kãkiti ipina, ininiã kona aua Teosokata ãtipirika. 22 Uatxa maerekanitxi na paniãtaikai hĩte. Uatxa Teoso nitiriakori hĩtxapekaua, ininiã hĩkamari ikinipoko Teoso ãkapani. Ininiã hãuapininiika hĩtxako Teosokata ãtipirika. 23 Maerekanitxi kãkiti patrãote atoko itxa. Iĩkitxitari kãkiti parĩkatxi ãki, txamari ipĩkitxi itxaua parĩkatxi ãki. Teoso sikakiti atemoni ãtião. !Aparĩkauata Teoso sikakiti aãpakapini ãkapani, iuaritika isikaua aãuini ãtipirika inini ãkapani, kotxi aãuĩte Xesosi Kristo ipina ate ãkapani.

Tanirauatakaro Atoko Atxa

7 ¹Nitariakori, hīte hīkinika imarotari paniātakori iōkatsopatakori, ininiā himarotari nisākire. Kākiti auapanika inakasaaki, ikīpitariko paniātakori iōkatsopatakori. ²Noerekaiko hīte. Paniātakori iōkatsopatakori paniātaro sito okaikotini oītanirikata iua auapanika inakasaaki. Iua ipininiā, iua paniātakori na paniātaikaro oa. ³Ōtaniri auapanika inakasaaki, ātikata oāuiniā, kanokarero otxaua. Ōtaniri ipininiā, paniātakori iōkatsopatakori na paniātaikaro oa, ininiā apakata ātikata oītaniriuatini. Ikara atoko oniniā, kanokarero !otxaua.

⁴Nitariakori, oa sito atokotxikana ate amakinika. Kristo ipina ate īkapani, ininiā Moisesi paniātakiti iōkatsopatakori kona paniātaikaua, kotxi uatxa Kristo nakitiakori atxaua. Uatxa Teoso ōkitikakiti Kristo nakitiakori atxaua. Iua nakitiakori atxaua, ininiā erekari akama Teoso īkapani. ⁵Mitxi anireēkiti maerekati paniātaua maerekati akamini. Aīto nirekari maerekatinoka ikamini, kotxi paniātakori iōkatsopatakori txari: “Kona hīkamapiri maerekati.” Ininiā iusaaki apiata anirekari maerekati akamini, kotxi maerekatinoka kamakani atxaua. Ininiā apina, ininiā kona aāuapika Teosokata. ⁶Mitxi paniātakori iōkatsopatakori nirekari ipaniātiniua. Uatxa paniātakori iōkatsopatakori na paniātaikaua. Ikara kitxakari. Uatxa amaneri, kotxi uatxa aparīkauata Teoso īkapani. Erekari Matamatakoti oerekaua aparīkauatini Teoso īkapani.

Teoso Paniātakiti Iōkatsopatakori

⁷Ininiā natokopa itxa uatxa axinikakiti? Teoso paniātakiti iōkatsopatakori maerekati itxaua atxiīti? Konapitini. Maerekati !itxaua. Teoso paniātakiti iōkatsopatakori mauakanimako, nota !imarotamariko maerekati nikamini. Teoso paniātakiti iōkatsopatakori txari:

Kona pinirekapiri āti nakiti,
ininiā āti nakiti ninirekiniā, nimarotari nikaminiri maerekati.
⁸Maerekati xika na nota nirekari ikara Teoso paniātakiti nikamini. Ininiā iteene ninirekari apanakini nakiti. Ninirekari apanakini nakiti, kotxi Teoso paniātakiti iōkatsopatakori txari:

Kona pinirekapiri āti nakiti.
Teoso paniātakiti iōkatsopatakori mauakaniā, iusaaki maerekati !auari. ⁹Teoso paniātakiti iōkatsopatakori nimimarotakanisaaki, na

nimarotari maerekati nikamini. Niuãkatari nãkixinire auãki inini. Teoso paniãtakiti iõkatsopatakori nimarotakasaaki, nimarotari maerekati nikamini. Iuasaaki nimarotari nipinini nimaerekani xika. ¹⁰Iuasaakipeka nimarotari nãkixinire ipĩkari atoko inini. Teoso paniãtakiti iõkatsopatakori oerekari kãkiti erekari ikamini, iua auini ãkapani. Txamari Teoso paniãtakiti iõkatsopatakori oerekano nota nipinini nimaerekani xika. ¹¹Maerekati ninireẽkiti misirienetano. Imisirienetano, ininiã na nikamari Teoso paniãtakiti iõkatsopatakori iaõka. Ininiã nikamari maerekati. Ininiã maerekati xika nipina.

¹²Teoso paniãtakiti iõkatsopatakori !auari maerekati, kotxi Teoso kamari. Atãonoka itxa Teoso paniãtakiti. Erekari. ¹³Atxiĩti erekari txĩkitakano nipinini? Konapitini. Maerekanitxi txĩkitakano nipinini. Maerekanitxi txĩkitakano Teoso paniãtakiti iõkatsopatakori erekari nimakamakani, ininiã nikamari maerekati, ininiã iua maerekanitxi txĩkitakano nipinini. Ininiã aimarotari maerekanitxi kona xatiki apakata. Maerekatinoka, kotxi maerekanitxi txĩkitakano nipinini. Teoso paniãtakiti iõkatsopatakori oerekaua ikara atoko inakari.

¹⁴Aimarotari Teoso paniãtakiti iõkatsopatakori iaxiti ãkari ininiua. Txamari nota uaikirino. Maerekanitximoni vëtxitakori atoko nitxaua, maerekanitxi nitiri atoko nininiua ãkapani. ¹⁵Na nimarotari nikamakiti, kotxi na nikamari notaka nireẽkiti. Nikamari nimanirekakiniti, nomanatakiti. ¹⁶Ininiã maerekati nimanirekakiniti nikamakasaaki, iuasaaki nimarotari Teoso paniãtakiti iõkatsopatakori ereka inini. ¹⁷Ininiã na notani kamari maerekati. Maerekati nãkixinireẽ auakarira txĩkitakari nikaminiri iua maerekati. ¹⁸Nimarotari erekari !auari nãkixinireẽ. Maerekatinoka aua nãkixinireẽ, kotxi ninirekari erekari nikamini, txamari !niposotari. ¹⁹Na nikamari erekari ninireẽkiti. Nikamapikari maerekati nimanirekakiniti. ²⁰Ininiã nimanirekakiniti nikaminiã, kona notani kamari. Maerekati nãkixinireẽ auakarira txĩkitakano iua maerekati nikamini.

²¹Ininiã ia sãkiretxiti atão: Ninirekasaakiri erekari nikamini, maerekatinoka niposota nikamini. ²²Nãkixinireẽ iteene ninirekari Teoso paniãtakiti iõkatsopatakori iaõka nikamini. ²³Txamari aua ãti ninireẽkiti niĩto ãki. Iua niĩto nireẽkiti nirekari ixipokiniri nãkixinire nireẽkiti. Iua niĩto nireẽkiti xika nikamari maerekati nireẽkitinoka. !Niposotari erekari nikamini. Kateia ãki iaxirikakoni atoko nitxa. ²⁴!Erekano nota. Maerekati kamakarino nota. Kipa makatxakano, maerekati niĩto nireẽkiti nimakamakani ãkapani?

Niïto txĩkitakano nipinini. Kipa moianatano? ²⁵Aãũite Xesosi Kristokara moianatano. Iuara makatxakano nimapinakani ĩkapani. Peerekari Teoso, kotxi iua kamari ikara atoko nota ĩkapani.

Ininiã uatxa ia atoko inakari nisãpiretai. Nãkixinireẽ ninirekari Teoso paniãtakiti iõkatsopatakori nikamini. Txamari niïtoã maerekanitxi nireẽkitinoka niposota nikamini.

Erekari Matamatakoti Txĩkitakari Aãkixinire Auãki Inini

8 ¹Ininiã uatxa Teoso !itxaikaua ate: “Maerekati hĩkamakiti xika nimisiritaiko hĩte,” !itxaikaua ate, kotxi Kristo Xesosi nakitiakori atxapekua. !Akamaikari aïto nireẽkiti. Erekari Matamatakoti sikaposotiiretaua iua nireẽkiti akamini. ²Erekari Matamatakoti nireẽkiti akama, ininiã iua txĩkitakari aãkixinire auãki inini, kotxi Xesosi Kristo nakitiakori atxaua. Erekari Matamatakoti makatxakano maerekanitxi nireẽkiti nikamini, ininiã na nipina. ³Aïto maerekani xika Teoso paniãtakiti iõkatsopatakori !iposotari imakatxakiniri amaerekani, kotxi !aposotari akaminiri iua paniãtakiti. Iuaritika Teoso makatxakari amaerekani, kotxi iua iokanitari imi atemoni. Imi ãto ate ãto atoko, maerekati kamakari ãto atoko itxa. Teoso iokanitari imi atemoni ipinini ĩkapani, amaerekani imakatxakini ĩkapani. Ininiã ixipokari maerekati posotiire aïtoã auakari. ⁴Teoso kamari ikara, ininiã Xesosi kamari ikinika Teoso paniãtakiti iõkatsopatakori iaõka ate ĩkapani, kotxi ipaniãtakiti atão inakarinoka. Ininiã !akamaikari maerekati aïto nireẽkiti. Akamari Erekari Matamatakoti nireẽkiti.

⁵Ïtotxi nireẽkiti kamakani xinikapikari iïtona nireẽkitinoka. Erekari Matamatakoti nireẽkiti kamakani xinikapikari Erekari Matamatakoti nireẽkitinoka. ⁶Kãkiti xinikiniãri iïto nireẽkitinoka, ixinikakiti txĩkitakari iua ipinini, ininiãkara kona auapika Teosokata. Kãkiti auiritiniãri Erekari Matamatakoti txĩkitakiniri ixinikiniri Erekari Matamatakoti nireẽkitinoka, iua auapininiika Teosokata. Erekaxinireri iua. ⁷Kãkiti xinikiniãri iïto nireẽkitinoka, Teoso mokaiakariakori itxauana, kotxi !nirekarina Teoso paniãtakiti iaõka ikaminina. !Iposotarina Teoso paniãtakiti iaõka ikaminina. ⁸Ïtotxi nireẽkitinoka kamakani !iposotari ikamapoxokonitirina Teoso.

⁹Hĩtepekana, Erekari Matamatakoti hãkixinire auiniã, hĩkamari iua paniãtakiti. !Hĩkamari maerekati hiïto paniãtakiti. Erekari Matamatakoti kãkiti ãkixinireẽ mauakanisaaki, na Kristo nakitiakori !itxauana, kotxi Erekari Matamatakoti Kristo nakiti itxaua. ¹⁰Hiïto

ipinapitikako maerekati xika, iuaritika hīxinire auākiri itxaua Kristo hākixinireē auiniā. Hīxinire auākiri itxaua, kotxi Kristo kamari atāo inakarinoka ate ikapani. ¹¹Teoso ōkitikari Xesosi, iua ipīkasaaki. Erekarī Matamatakoti Teoso nakiti hākixinireē auiniā, Teoso Kristo ōkitikakari, txīkitakariko hīto ipinakari iuaikana auāki inini, kotxi Erekarī Matamatakoti Teoso nakiti aua hākixinireē.

¹²Ininiā nitariakori, auapitika akamakiti tīkane Teoso ikapani. !Auari akamakiti tīkane aito nireēkiti akamini ikapani. ¹³Hīto nireēkiti hīkaminiā, hīxinire ipīkari atoko itxa, ininiā ātipirika kona hāua Teosokata. Hamanainiāri Erekarī Matamatakoti maerekati hīto kamakiti ixipokini, iuasaaki hāupika ātipirika Teosokata.

¹⁴Erekarī Matamatakoti nireēkiti kamakani, Teoso anaakori itxauana, kotxi Erekarī Matamatakoti Teoso nakiti. ¹⁵Iua Erekarī Matamatakoti Teoso sikakiti hitemoni. !Itxīkitakai nitiritxi kapīkareri hininiua. Itxīkitakai Teoso anaakori hininiua. Erekarī Matamatakoti posotiireē aākiritari aīri Teoso: “Papai, niri,” atxari. ¹⁶Erekarī Matamatakoti sāpiretaua aākixinireē Teoso anaakori aniniua. ¹⁷Teoso anaakori aniniāua, aāpakapariko erekarī Teoso nīkatakiti ate ikapani. Kristo apakapari erekarī Teoso nīkatakiti iua ikapani, ininiā ate apakapari iuakata. Kristo misiritaākapeka. Ate misiritiko apaka auiniā Kristo sākire aāuikini xika, Kristo ikinimane auite inakasaakiua, ate apaka aua iuakata iuasaaki. Aātamatari iua iotximere. Peerekari iuasaaki iuakata aāuini.

Aāpakapariko Ikinipoko Erekarī

¹⁸Uai itixi aāuakasaaki, aātatsiirauata. Eereka !axinikaikari mitxi aātatsiirauatini, kotxi Teoso oerekauako ikinipoko erekarī. Iuasaaki peerekari. ¹⁹Ikinipoko Teoso kamakiti iātapari ipoxokoniritika Teoso keto ōti. Iuasaaki aimarotari Teoso anaakori. ²⁰Kotxi ikinipoko Teoso kamakiti misiritaākapeka, ixipokaāpotini tīkane. Ikinipoko Teoso kamakiti ixinireka !ixipokaāpota. Teoso txīkitakari ikinipoko xipokaāpotini. Iuaritika aimarotari, ipīkitxi xipokini ōti apokapitikako. ²¹Ikinika Teoso kamakiti iātapari iua ōti. Iuasaakiko itixi amaneri itxauako. !Ixi-pokaika. Iuasaaki ikinika amaneri. !Ixi-pokaika. Teoso anaakori misiritiko !uaika. Peerekari iuasaakiko.

²²Aimarotari uatxapiikama ikinika Teoso kamakiti atatsiirauata, amarini tsii sito atatsiitini atokokana. ²³Na itixi Teoso kamakitinanini atatsiirauata. Aākixinire apaka akiripireta, kotxi anirekarī Teoso keto

apokini. Iuasaaki iua apakapaua ate iua anaakori. Iuasaakiko aïto amaneri isikaua. Iuasaakiko aïto !kaxiporeikari. Merepanika Teoso sikakiti auapeka atemoni, kotxi iua sikapekari Erekarî Matamatakoti atemoni. ²⁴Teoso makatxakapekari amaerekani, aãuikasaakiri isãkire. Ininiã aiãtapari apikomoni isikaenetakiti atemoni. !Aãtamatanpanikari isikaenetakiti, ininiã aiãtapapanikari. Aãuikapitikari isikaenetakiti isikiniua, ininiã atão aãuikiniri. ²⁵Aiãtapari aãpakapakiti tïkane. !Aãpakapanikari, iuaritika aiãtapari apoxokoniritika, kotxi aimarotapitikari ikara apokini.

²⁶Erekarî Matamatakoti moianataua, kotxi na kataparaxinireua. !Aimarotari aamanaãkiti tïkane, Teoso amisãkiretakasaaki. Iuaritika, Erekarî Matamatakoti misãkiretari Teoso ate ïkapani. Asãkireẽ !aposotari asãpiretiniri Teoso ikinika anireẽkiti, ininiã Erekarî Matamatakoti misãkiretari Teoso ate ïkapani. Ipinimoni itxa isãpiretiniri Teoso. Kãkiti sãkireẽ !isãkirauata Teosokata. ²⁷Teoso imarotari kãkiti ãkixinire, ininiã iua imarotari Erekarî Matamatakoti xinikakiti, kotxi Erekarî Matamatakoti misãkiretari Teoso, Teoso nakitiakori ïkapani. Erekarî Matamatakoti amanaãri Teoso, Teoso nireẽkiti ikaminana inakitiakori.

Teoso Iteene Tiretiniua

²⁸Aimarotari ikiniõtika erekarî ikaminaua ate, kotxi iua tirketani, iua mereẽkini atxaua ate. Iuaritika aãtatsiirauatini auapitika. Iuaritika iuasaaki apaka erekarî ikaminaua. Iua mereẽua, kotxi inirekarî imereiniua. ²⁹Itixi kamiko apisapanika Teoso imarotapekuaa ate. Iua mereẽpekuaa ate, iua anaakori kaiãopokori aniniua ïkapani. Imereẽpekuaa, imi Xesosi atoko aniniua ïkapani. Ininiã Xesosi aïtari apiari. ³⁰Teoso akiritana imereẽkini. Apaka ikamaerekatana iua mereẽkini. Apaka itanapoko erekarî isika ninoa ikamaerekatakinimoni.

³¹Teoso kamari ikinipoko ikara erekarî ate ïkapani, ininiã natokopa itxa axinikakiti? Teoso kataparari moianatapitikaua, ininiã ate omanatakani tapara poiãoka. ³²Teoso sikari ikinipoko atemoni. Imi apaka isika atemoni, kotxi ipina ate akinika ïkapani. Isikari imi atemoni, ininiã aua atxiïti iua masakakiniti atemoni? !Auari. Ikinipoko erekarî isikapitikaua atemoni. Ikarone !auari. ³³Aua atxiïti Teoso mereẽkini maerekani sãpiretakari? !Auari. Teosora sãpiretari ninoa maerekani mauakani, kotxi iua kamaerekatapekana ninoa. ³⁴Aua atxiïti Teoso mereẽkini misiritiko sãpiretakari? !Auari. Kotxi Kristora

misäkiretari Teoso ate ïkapani, kotxi Teoso ikikomoni auakari itxaua. Iua ipina ate ïkapani, ininiã eereka Teoso õkitikari iua, auapika inini ïkapani. Iuara misäkiretari Teoso ate ïkapani. ³⁵Ininiã kipa atxiiti iotokakataro Kristo tiretiniua? !Auari, kotxi amaxikikosaaki, Kristo tiretapanikaua. Amauarenisaaki, Kristo tiretapanikaua. Amisiritikosaaki, Kristo tiretapanikaua. Natxi auakasaaki, Kristo tiretapanikaua. Amamãkanisaaki, Kristo tiretapanikaua. Monõkoro auakasaaki, Kristo tiretapanikaua. Neenamatchi auakasaaki, Kristo tiretapanikaua. ³⁶Teoso säkire iõkatsopatakoro txari:

Pisäkire aãuikini xika, pamonõkoniri ikiniõtika. Aõkiko monõkoni auapika. Soti auite apanakini okini atoko, apanakini nirekari okiniua ate,

itxa Teoso säkire iõkatsopatakoro. ³⁷Maerekati ikara atoko aua, iuaritika iteene akãiata, kotxi atiretakiri sikataparataua. ³⁸Ia nimarota. Kristo tiretiniua iotokakakari !auari. Apikasaaki, itiretapanikaua. Aãuapanika inakasaaki, itiretapanikaua. Teoso nitiriakoro iaxitikini !iotokakari itiretiniua. Satanasi nitiriakoro !iotokakari itiretiniua. ïkorsaaki auakani, katana auakani apaka !iotokakari Kristo tiretiniua. !Auari posotiiretxi, Kristo tiretiniua iotokakakari. ³⁹Iaxiti apiko nopinixiti auakani, iaxiti patapi auakani apaka, !iotokakari Kristo tiretiniua. Hinitiniãri Teoso tiretiniua iotokakakari, !hãpokari. Hinitiniãri ikinika Teoso kamakiti auiniãtaã, iuaritika kona hãpokari Teoso tiretiniua iotokakakari. !Auari. Aãuite Kristo Xesosi oerekaua Teoso iteene tiretiniua.

Teoso Mereëna Xoteoakoro Inakitiakoro ïkapani

9 ¹Atã nisäkire. Kristo nakiti nitxaua, ininiã na nisãpiretari misirieneretxi. Nãkixinireë nimarotari nisäkire atã inini, kotxi Erekaro Matamatakoti oerekari nisäkire atã inini. ²Ia nisäkire atã. Iteene nimatinaniuatapika. Nãkixinireë maerekaxiniretinoka nitxa, ninirimane Kristo säkire mauikakani xika. ³Ninirekamari Teoso misiritinino nota, ninoa nitariakoro imamisiritakani ïkapani. Ninirekamari Kristo manirekakanino nota, ninirimane Kristo nakitiakoro ininiua ïkapani. Niposotiniãri ikara atoko nikamini, nikamari ninirimane ïkapani. Txamari !niposotari. ⁴Ninirimane Isao apika mekaniriakoro itxauana. Teoso nirekana ninoa iua anaakoro ininiuana. Teoso oerekari iposotiire ninoamoni. Isãpiretana ninoa ikamaenetakiti ninoa ïkapani. Isikari ipaniãtakiti iõkatsopatakoro ninoamoni. Oerekana ninoa kiiniri atã ikaminina,

iuakata isãkirauatakasaakina. Teoso sãpiretana ninoa ikamakiti tĩkane ikinimane kãkiti ĩkapani. ⁵Ninirimane apika atokiriakorini Apraãoma, Isakima, Isaeoma pakini. Kristo uaimoni iponaniãkasaaki, ninoa apiko mekaniri itxaua, iuaritika Teoso itxaua. Ikinimane auĩte itxaua. “Peerekai,” matxari iua ãtipirika. Ameẽ.

⁶Atxiĩti Teoso kona kamari ikamaenetakiti Isaeo apika mekaniriakori ĩkapani? Ikamapitikariko. Txamari kona ikinikani Isaeo apika mekaniriakori Teoso nakiti !itxauana. ⁷Kona ikinikani Apraão apika mekaniriakori atão Teoso anaakori !itxauana, kotxi Teoso txari Apraão:

Papika mekaniriakori atão inakani Isaki mekaniriakori itxauana. ⁸Teoso sãpiretari Isaki auini, iua auini apisapanika. !Isãpiretari ãti Apraão ãkiri Isimaeo inakori auini, iua auini apisapanika. Isimaeo iponaniã, kotxi Apraão sirĩka Isimaeo inorokata. Ininiã kãkiti Isimaeo atoko, Teoso anaakori !itxauana. Teoso sãpiretari Apraão iua keene inini, ininiã isikaenetakininoka atão Apraão apika mekaniriakori itxauana. ⁹Teoso sikaenetari Apraão keene inini. Itxari:

Niketo manapi nikanapiriãko. Iuasaaki Sara keeneroko. Kiki oenetako.

¹⁰Apikomoni nisãpiretai. Hepeka anaakori iri ãtika. Aãpika atokirini itxaua Isaki inakori. ¹¹⁻¹²Oa anaakori iponaniã ipipe. Iponaniinina apisapanika, maerekati ikaminina apisapanika, erekari ikaminina apisapanika, Teoso sãpiretaro oa:

Merepanika iponaniãkari eereka iponaniãkari nitiri itxauako. Ininiã Teoso mereẽri iua eereka iponaniãkari Xakoo inakori apiari inini ĩkapani, iua auini apisapanika. Ininiã na Xakoo kamakitini txĩkitakari Teoso mereiniri iua. Teoso mereẽri iua, kotxi inirekari ikara atoko inini. ¹³Teoso sãkire iõkatsopatakori txari:

Xakoo nitireta. Isaoo nomanata.

¹⁴Ikara atoko ininiã, kanatokopa itxa axinĩkakiti? Atauako Teoso na kamari erekari? Ikamapitikari erekari. ãtipirika Teoso kamari erekari. ¹⁵Teoso txari Moisesi:

Ninirekiniãri ãti niamonĩkini, niamonĩkari. Ninirekiniãri ãti nimoianatini, nimoianatari.

¹⁶Ikara atoko ininiã, anireẽkiti !itxĩkitakari Teoso mereiniua. Akamakiti !itxĩkitakari Teoso mereiniua. Imereẽua, kotxi iamoniãkaua. ¹⁷Teoso txari Paraoo isãkire iõkatsopatakoriã:

Nota txĩkitakai auĩtetxi pininiua, niposotiire noerekini ĩkapani, niuãka ikini itixiti auakani imarotini ĩkapani,

itxa Teoso sākire iōkatsopatakori. ¹⁸Ininiā Teoso nirekiniāri iamoniākiniri āti, iua amoniākari iua. Apaka inirekiniāri, itxikitakari āti ākixinire kaikoxinire inini, Teoso nireēkiti imanirekakani tīkane.

Teoso Omanākare,

Iamonīkare Pakini

¹⁹Atxiīti hīte txano nota: “Teoso ikara atoko ininiā, na ate xikani kaikoxinireua ate. !Aposotari akaminiri Teoso manirekakiniti,” atxiīti hītxano. ²⁰Txamari !apakata ia atoko hinini. Kiriparai hīte ikara atoko ina sākiretakani Teosomoni? Kākiti hītxaua. Teoso kamakiti pitxaua. Atauako kamakori posotatari ikamakirimoni: “Kinirepa pikamano nota ia atoko ninini?” !Apakata ikara atoko hinini hīkamakirimoni. ²¹Hīxinikari kiki tiitxi kamakari. Ikamari inireēkiti. Atxiīti āti poriī katsariā, ikamari ipi kopiti. Atxiīti ianaka ikamari āti kopiti, peereri inini, kiiniri īkapani. Atxiīti ātipekana ikama patimari poiāo ereri, ikiniōtika iāriā iātiko īkapani.

²²Ikara atoko itxa Teoso kaminiri kākiti. Teoso kamari apanakini kākiti Teoso omanākare imarotinina īkapani imaerekanina xika. Iuusaaki oerekana iposotiire imarotininina īkapani. Teoso omanatana ninoa, iuaritika imīteenekana. Kona uatxa ixipokana ninoa. Txamari iketo manapi ixipokanako ninoa. Uatxa imīteenekapanikari ninoa maerekani. ²³Apaka ikamari apanakini iua amoniākakini. Uatxa imīteenekari iua omanatakini maerekani, kotxi inirekari iua amoniākakini imarotininiri iua ereka inini, kotxi peerekari iua. Iteene itiretari iamoniākakini. Ikamana ninoa erekari isikakiti apakapininina īkapani. ²⁴Hīte, ate pakini, iua amoniākakini atxaua. Iua akiritakini atxaua. Na Xoteonanini akirita. Akiritana Xoteo minakanuia apaka. ²⁵Teoso sākire iōkatsopatakori, Oséia iōkatsopatakitiā, Teoso sāpiretari ikara. Itxari:

Kākiti mitxi nota nakitiakori minakonimoni nitxako: “Uatxa nota nakitiakori hītxapekauako.” Ninoa mitxi nimatiretakinitimoni nitxako: “Uatxa nota tiretakini hītxapekauako,” nitxako.

²⁶Mitxi Teoso txana ninoa: “Na nota nakitiakorini !hītxaua.”

Ikara Teoso sākiretiniātaā, iuaātaātxikana: “Teoso ātipirika auāki inakari anaakori hītxaua,” inaāka ninoamoni, itxa Teoso sākire iōkatsopatakori.

²⁷Apaka Teoso sākire iōkatsopatakoriā, Isafá txari:

Isaeo apika mekaniriakori kaiãopokori, potxoari uiniti
kipatxite atoko itxana, txamari poiãonoka makatxakaãka
imapinakani ïkapani.

28 Patimari Teoso xipokiniri iparïka imisiritiniri kãkiti
imaerekani xika,
itxa Isaía. 29 Mitxipeka Isaía txari:

Apiananiri kaposotiireri nïkatari apanakini aãpika
mekaniriakori imapinakani ïkapani. Ininiã atenape
auapanika. Teoso manïkatakanimauako, axipokapiimako
kãkiti Sotoma sitatxiti auakani xipokini atoko, kãkiti
Komoha sitatxiti auakani xipokini atoko atxapiimako,
itxa Isaía sãkire.

Xoteo Mauikakaniri Teoso Sãkire

30 Ininiãkara aimarotari ia: Xoteo minakaniua manitakanisaakiri
Teoso txïkitakinina atão inakari kamakani ininiuana, iusaaki Teoso
txïkitakana atão inakari kamakani ininiuana, kotxi auikarina Teoso
sãkire. 31 Txamari Xoteoakori nitaãpotari paniãtakori ninoa atão
inakari kamakani txïkitakakari, txamari !apokarina. 32 Kinirepa
!apokarina ikara? Kinirepa Teoso na txïkitakana ninoa atão inakari
kamakani ininiuana? Kotxi !auikarina isãkire. Inirekarina iparïkana
txïkitakinina atão inakari kamakani ininiuana. !Inirekarina
auikinirina Xesosi sãkire. Ninoamoni Xesosi kai kimapori nopini
auakari atoko itxa, kotxi kai xika kãkiti mãkitita. 33 Teoso sãkire
iökatsopatakori kitxakapirïkari sãpiretari ia kai pirena. Itxari:

Pikenakotariko ia: Nota iokanatakiti kãkitimoni kai atoko itxa.
Nitakari iua kai Sião sitatxitiã Xoteoakori kimaporeẽ. Iua
kai xika kãkiti mãkitita. Iua kai xika kãkiti irika. Iuaritika
iua sãkire auiãkani lipëtauata nota apisatoõ.

10 1 Nitariakori, nãkixinireẽ iteene ninirekari Teoso makatxakiniri
nininiriane maerekani, Isaeo apika mekaniriakori maerekani.
Nimisãkiretari Teoso ninoa maerekani makatxakiko ïkapani.
2 Nimarotari ninirimane iteene nirekiniri iparïkauatini Teoso ïkapani.
Txamari ninoa kerokari, kotxi !imarotarina atão iparïkauatini Teoso
ïkapani. 3 !Imarotarina Teoso txïkitakiniri kãkiti atão inakari ikamini.
Ninoaka nirekamari atão inakari ikaminina, Teoso apakapinina
ïkapani. Ininiã !auritarina Teoso txïkitakinina ninoa atão inakari
ikaminina. 4 Kristo kamari ikinipoko Teoso paniãtakiti iökatsopatakori

iaõka, ininiã iuanoka txĩkitakari ikinimane kãkiti iua sãkire auiãkani atão inakari ikaminina.

Apiananiri Akiritakani

⁵Kitxakapirĩka Moisesi sãpiretari atão inakari akamini Teoso paniãtakiti. Iuasaaki itxari:

Ikinika Teoso paniãtakiti iõkatsopatakori ikiniõtika pikaminiã, pauapininiika pitxako, itxa Moisesi sãkire. ⁶Txamari !aposotari ikara atoko akamini. Aãuikasaakiri Xesosi sãkire, iua txĩkitakaua atão inakari akamini. Ininiãkara !apakata pãkixinireẽ pixinikiniri: “Kipa atxiĩti posotari iaxiti apiko nopinixitimoni isini, Kristo notamoni iminini ïkapani?” ⁷!Apakata pãkixinireẽ pixinikiniri: “Kipa atxiĩti posotari ipĩkani auiniãtaã isini, Kristo notamoni iminini ïkapani?” ⁸Xesosi sãkire auape hĩtemoni. Na hĩsa ãtiãtaã iua sãkire himarotini ïkapani. Hinamaãpekari. Hãkixinireẽpekari. Xesosi sãkire auikiko asãpiretapikari kãkiti. Ia atoko asãpiretari kãkiti: ⁹Pinamaã, “Xesosi niauĩte” pininiã, pãkixinireẽ pauikiniãri Xesosi ipinini Teoso õkitikiniri iua, iuasaaki pimaerekani makatxakaãkako. ¹⁰Kotxi aãkixinireẽ Xesosi sãkire aãuikiniã, ikamaerekataua. Anamaã “Maerekati kamakarino nota,” aniniã, iua makatxakari amaerekani. ¹¹Teoso sãkire iõkatsopatakori txari:

Iua sãkire auiãkari pẽtauatini !auari.

¹²Iua Kristo sãkire auiãkari atxiĩti Xoteo itxaua. Atxiĩti Xoteo minakatua itxaua. Xoteo auĩte itxaua Kristo. Xoteo minakanua auĩte apaka itxaua. Ikinimane auĩte itxaua Kristo Apiananiri. Isikari itanapoko erekari ikinimane iua akiritakanimoni. ¹³Teoso sãkire iõkatsopatakori txari:

Ikinimane akiritiniãri Apiananiri uãka imaerekanina imaktxakini ïkapani, iuasaaki imaktxakaãkako imaerekanina.

¹⁴Kiãtokopa itxa ninoa akiritiniri iua, isãkire imauikakanisaaki? Kiãtokopa itxa ninoa auikiniri isãkire, imakenakotakanisaakirina? Kiãtokopa itxa ninoa kenakotiniri isãkire, imasãpiretakonisaakina?

¹⁵Kiãtokopa itxa Teoso iokanapirena sãpiretiko, ate maiokanatakaniãri iua sãkire sãpiretakani kãkitimoni? Teoso sãkire iõkatsopatakori txari:

Erekapitikari Teoso iokanapirena erekari sãpiretakani apokini kãkitimoni, kotxi isãpiretarina Teoso kamaerekaxiniretiniri kãkiti. Isãpiretarina erekari Teoso sikakiti kãkitimoni. Ikara iminapiretakitina kamapoxokonitari kãkiti.

¹⁶Txamari na ikinimane kãkitini auikari Teoso iokanapirena erekari. Kotxi kitxakapirĩka Isafa txari:

Apiananiri, asãpiretamari piokanapirena kãkitimoni, txamari
!auikarina,

itxa Isafa. ¹⁷Kãkiti kenakotakasaakiri Teoso iokanapirena, Teoso txĩkitakari kãkiti auikiniri isãkire. Kristo sãkire akenakotakasaaki, akenakotari Teoso iokanapirena.

¹⁸Txamari nota pimaãi: “Atauako Xoteo kona kenakotari Teoso iokanapirena?” Ikenakotapitikarina, kotxi Teoso sãkire iõkatsopatakori txari:

Iaxiti apiko nopinixiti auakari oerekari Teoso ikini itixiti auakani.

Teoso sãkire atoko itxa iaxiti apiko nopinixiti auakari oerekakiti.

¹⁹Iuaĩkana nipimaãi: “Atauako Xoteo limarotari Teoso iokanapirena?”

Imarotapitikarina. Moisesi sãpiretapekari Teoso sãkire. Itxari:

Nimakatxakari Xoteo minakaniua maerekani, ininiã
nitxĩkitakaiko hĩte hĩxikotinina ninoa mitxi
nota nakitiakori minakaniua. Nitxĩkitakai hĩte
homanãkarauatini, ninoa mitxi mimaroreni xika.

²⁰Isafapekana sãpiretari Xoteo minakaniua pirena. Isãpiretari Teoso sãkire itaparaxinireritika:

Teoso txari: “Ninoa nota manitakani aõkitano nota. Nimotika nota makiritakanimoni.”

²¹Apikomoni isãpiretari Teoso sãkire Xoteo kamakiti:

Teoso txari: “Ikiniõtika namanaãri ninoa kanapiriini
notamoni, txamari !ikĩpitarina nisãkire. !Ikamarina
nisãkire iaõka. Inireẽkitinoka ikamana.”

Xoteo, Teoso Sãkire Auiãkani

11 ¹Ininiã nipimaãi: “Atauako Teoso !nirekaikari Xoteoakori?” Inirekapitikana. Nota apaka Xoteo nitxaua. Apraõ apika mekaniri nitxaua. Pẽxamiĩ apika mekaniri nitxaua. ²Teoso !itapanapari Xoteoakori. Iua mereẽna ninoa itixi kamiko apisapanika. Himarotari Teoso sãkire iõkatsopatakori, Eriasi tsoatakasaaki Teosomoni Xoteo maerekani isãpiretakasaaki. ³Iusaaki Eriasi txari: Apiananiri, ninoa okapekari kãkiti pisãkire sãpiretakani. Ikapirinikarina amesa pinakiti pitemoni sikakori takikoãtaã. Notanoka pisãkire sãpiretakarino auapanika. Ninoa asikatikinitano nota okinino !kapani,

itxa Eríasi. ⁴Kanatokopa Teoso apakapapiretari Eríasi? Teoso txari: Kona pitenanini auikari nisákire. Nota níkatari setxi mio kikiakori nota nakitiakori. Ninoa kona teosonetari kákiti kamakiti Paa inakori. Kona ikapotoreékauana iua apisatoõ, Teoso txari Eríasi. ⁵Ikara atokotxikana uatxa. Aua apanakini kákiti Teoso mereékini. Imereëna ninoa, kotxi iua nirekari ikinipoko erekari ikaminina ninoa. ⁶Maerekati kamakani kákiti, iuaritika Teoso mereëua ate. Isikari ikinipoko erekari ate íkapani maxikatiíka. Aparíka litxíkitakari iua sikiniri ikinipoko erekari atemoni. Aparíka txíkitakiniári ikinipoko erekari isikiniua, ininiã kona maxikatiíka isikarauata atemoni.

⁷Ininiã kanatokopa atxa asákire apikomoni? Xoteoakori kona apakapari inireékitina. Inirekarina Teoso apakapinina ninoa erekarini ininiuana. Teoso mereékininoka apakapari ikara inakari. Apanakinipekana Teoso laurita atão imarotinina. Mõsiãreni atoko itxana. ⁸Teoso sákire iõkatsopatakori txari:

Teoso txíkitakari ninoa ákixinire imakakari atoko inini, iua sákire imimarotakanina íkapani. Kokipitikamana, iuaritika !atamatarina Teoso kimapore. Kakenakokipitikamana, iuaritika !nirekarina Teoso sákire ikípitinina. Uatxapiima ikara atoko itxapanika,

itxa Teoso sákire iõkatsopatakori. ⁹Kitxakapiríka Tavii txari Teosomoni: Ninoa kiena kaiãopokori. Inipokotakasaakina, iuákatarina pite apokaerekatina ninoa, kotxi kaiãopokori ikienana. Ikienana takapiri atoko itxa imaíkinina ninoa. Itxíkitakana ikerokinina. Ikara xika ninirekari pimisiritinina.

¹⁰Ninirekari ninoa mõsiãreni atoko ininiuana, ininiã na atão atamatarina pikimapore. Kákiti tiitxi minari porikitakani atoko pitxíkitakanako ninoa átipirika, itxa Tavii sákire.

Xoteo Minakaniua Maerekani Makatxakiko

¹¹Iuaíkana nipimarauata: “Atauako Xoteoakori maerekani xika Teoso xipokana ninoa?” Konapitini. Xoteoakori kamari maerekati, ininiákara Teoso sápiretari Xoteo minakaniua imaerekanina imakatxakini, Xoteo xikotinina íkapani, iuaíkana Teosomoni ikanapiriinina íkapani.

¹²Xoteoakori kamari maerekati, ininiákara Teoso sikari erekari kiíkiri apanakini itixi auakanimoni. Xoteo mapakapakiniti Xoteo minakaniua

apakapa erekari kiikiri. Ininiã Xoteo kanapiriãkasaaki Teosomoni, iuaaaki apiaerekata Teoso sikakiti kãkitimoni.

¹³Uatxa nota misãkiretai hïte Xoteo minakanuia, kotxi Teoso iokanatano nota hïtemoni isãkire nisãpiretini ïkapani. Niuikari hïtemoni niokanatiko. ¹⁴Ikara atoko ininiã, atxiïti ninirimane Xoteo xikotai hïte, ininiã atxiïti apanakini ninoa kanapiriã Teosomoni, imaerekanina Teoso makatxakini ïkapani. ¹⁵Teoso takanapakasaakiri Xoteo, iua apakapari Xoteo minakanuia, ininiã ninoa Xoteo minakanuia kanapiriã Teosomoni. Teoso iuaïkana apakapakasaakiri Xoteoakori, iuaaakiko peerekari. Ipïkani iuaïkana auãki inini atoko itxako.

¹⁶Komiri akamakasaaki, ipixini Teosomoni asikasaaki, aimarotari ikinipoko iua komiri iua nakiti ininiua. Aamina kotsa Teoso nakiti ininiã, imina pori apaka iua nakiti. ¹⁷Xoteoakori oriva mina takakori atoko itxa, takakori Teoso nakiti. Åtikaka ipori kapatakaãka. Oriva ïtopakiri pori apaãka. Iapitaka inaãka ikapatakikoãtaã. Aneẽ takari katiã. Takari sikakienatari ïtopakiri pori. Hïte Xoteo minakanuia iua oriva ïtopakiri pori atoko hïtxaua. Hãpakapari Teoso sikakiti, kotxi hïte apotiitaua Xoteoakorikata, Teoso nakitiakorikata. ¹⁸Hïte Xoteo minakanuia, kona hïuikapeua Teoso apakapini hïte. “Iua aãpori kapatakiko atoko, Teoso takanapana Xoteoakori, ate apakapini ïkapani,” kona hïtxape, kotxi aãpori atoko hïtxaua. Na aãpori sikataparatarari aãkotsa. Aãkotsa sikataparatarari aãpori. Ininiã hïte apakapari Teoso sikakiti, kotxi hãpotiitaua Xoteokata.

¹⁹Atxiïti hïte Xoteo minakanuia txano nota: “Iua aãpori kapatakaãkori atoko Teoso takanapari Xoteoakori. Åti aãpori iapitakiko atoko, Teoso apakapaua ate,” hïtxano atxiïti.

²⁰Atãopitikara. Teoso takanapari Xoteoakori, kotxi ninoa !auikari isãkire. Iua apakapai hïte, kotxi hïte auikari iua sãkire. Iuaritika !hïuikapeua ikara atoko hinakasaaki. Erepaniko. ²¹Teoso takanapari Xoteoakori, takari pori sauakakori atoko. Ininiã erepaniko, kotxi ïtopakiri aãpori atoko hïtxaua. Atxiïti åti õti okanapai hïte apaka.

²²Aimarotari katiraõkiri ininiua Teoso. Aimarotari apaka kataparaxinireri ininiua. Kataparaxinireri iua, kãkiti kamakasaakiri maerekati. Katiraõkiri iua, itiraõki hinirekasaaki. Itiraõki himanirekakaniã, hïte apaka mapara hõkaãka, iua aãpori sauakakori atokokana. ²³Xoteo takanapiniãri imauikakaniri Xesosi sãkire, auikiniãri iuaïkana isãkire, Teoso iuaïkana mikanapiriãna, kotxi Teoso kaposotiireri ikara atoko ikamini.

²⁴Hĩte itopakiri pori sauakakori takarimoni iapitaãkori atoko hĩtxaua. Kona ixinireka aua ikara atoko. Pamimari ikara atoko. Xoteo atão oriva takakori atoko itxauana. Ininiã na kamimari mitxi auiniãtaã iuaĩkana Teoso takinina ninoa, iuaĩkana imikanapiriinina ninoa iuamoni.

Xoteo Maerekani Makatxakaãkapanikako

²⁵Nitariakori ninirekari himarotiniri apanakini mimarotakiniti, ininiã na hĩuikaua. Xoteo !nirekari auikiniri Teoso sãkire uatxa, iuaritika na ikara atoko !itxapani ãtipirika. Ikini itixiti auakani Teoso nireẽkini Xoteo minakaniua kanapiriãkasaaki Teosomoni, iuasaakiko Xoteo kanapiriãko Teosomoni. ²⁶Ininiã iuasaaki ikinimane Xoteo kanapiriãko Teosomoni. Iuasaaki Teoso makatxakari ninoa maerekani. Teoso sãkire iõkatsopatakori kitxakapirĩka auakari ikara atoko itxa. Itxari:

Xoteo itxauako maerekanitxi makatxakakari.

Imakatxakariko ikinika maerekati Xoteoakori kamakiti, Teoso manirekakiniti. Iuasaaki Teoso nireẽkitinoka inirekanako.

²⁷Nimakatxakariko maerekati ninoa kamakiti, kotxi kitxakapirĩka nikamaenetari ikara atoko inakari, itxa Teoso sãkire iõkatsopatakori.

²⁸Xoteoakori !nirekari Teoso iokanapirena erekari, ininiã Teoso takanapana ninoa. Ininiã Teoso iokanapirena erekari sãpiretaãka hĩte Xoteo minakonimoni. Uatxa Teoso mokaiakariakori atoko itxauana Xoteoakori, iuaritika Teoso mereẽna ninoa. Apraã, Isaki, Xakoo pakini apika mekaniriakori itxauana, ininiãkara Teoso tiretapanikana ninoa. ²⁹Teoso kona mamakari isãkire. Kãkiti iua mereẽkini ãtipirika iua mereẽkini itxauana. Isiãkiti erekari kãkitimoni !imakatxaka iuaĩkana. ³⁰Hĩte Xoteo minakaniua kitxakapirĩka !hĩkĩpitari Teoso sãkire, iuaritika uatxa Teoso amonĩkai hĩte, kotxi Xoteo kona kĩpitari Teoso sãkire uatxa. ³¹Uatxa Xoteoakori kona kĩpitari Teoso sãkire. Teoso amonĩkapekai hĩte Xoteo minakaniua, ininiã Teoso iuaĩkana amonĩkanako Xoteoakori apaka. ³²Ikinimane kãkiti na kĩpitari Teoso sãkire. Kona aposotari akĩpitiniri Teoso sãkire. Teoso txĩkitakaua ikara atoko anini, kotxi inirekari aimarotiniri maerekati kamakani aniniua, iuaritika !imisiritaua. Iamonĩkaua.

Peerekari Teoso

33Peerekari Teoso. Atãonoka ikama. Paimatireri iua. Kãkiti !imarotari ikamakiti tĩkane. Kãkiti !imarotari inireẽkiti tĩkane. 34!Kimarotikori Teoso xinikakiti. !Kõtãkikikori Teoso. 35Teosomoni ikinipoko aua, ininiã kipa asika atxiĩti iuamoni? Asikiniri !auari. Ininiã !auari ate nakiti, iuaĩkana Teoso sikiniua ĩkapani. 36Kotxi Teosokara kamari ikinipoko. Ikinipoko aua Teoso posotiireẽ. Ikamari ikinipoko iua ĩkapani. Atipirika matxariko Teoso: “Peerekai pite.” Ameẽ.

Teosomoni Sikakori Auãkiri

12 1Ininiã nitariakori Teoso amonĩkapitikaua. Ininiã nota iteene õtãkikai hĩte. Hĩteka hĩsikaua Teosomoni. Teosomoni sikakori auãkiri atoko hĩtxauako. Ininiã iua nakitinoka hĩtxaua. Ikara atoko hĩkaminiã, Teoso apokaerekatari. Ikara atoko inakari akaminari Teoso, ikara atão. 2!Hĩkamapinikariko Teoso sãkire mauĩãkani kamakiti atoko. Hãuiritariko Teoso txĩkitakiniri hĩxiniãkiti ereka inini, ininiãkara ipinipo hĩtxako. Iuasaakiko himarotari Teoso nireẽkiti. Himarotari Teoso nireẽkiti ereka inini. Himarotari hĩkamakiti tĩkane iua apokaerekatini. Himarotari atão hĩkamini. 3Teoso sikari ikinipoko erekari notamoni, ininiã nisãpiretari iua sãkire hĩtemoni. Ininiã nota õtãkikai hĩte hĩkinika. Na hũikapeua. Hĩteka atão himarotauako. Hĩteka hãtamakauako. Teoso txĩkitakai hãuikiniari isãkire. Iteene hãuikiniãri iua sãkire, iteene hĩteka himarotaua. 4Kãkiti ĩto ãtika, iuaritika ĩtotxiã auakari kaiãopokori. Aua ikanoke, itapike, oki, ikenakoki txaãpota. Ikinika iparĩka aua. Ikanoke parĩka ãtião. Oki parĩka ãtião. Itxaãpota. 5Iua atokokana atxa. ĩtotxi ãtika atoko atxa, iuaritika itoua ate. Kanoketxi, tapiketxi, okĩtxi, kenakokitxi, ĩtotxiã auakari atoko ate. Kristokata aãpotiitaua. Anakititakakaua. 6Nota parĩka Teoso ĩkapani ãtião. Āti parĩka Teoso ĩkapani ãtião. Āti parĩka Teoso ĩkapani ãtião, itxaãpota. Teoso sikari erekari ikininapemoni, ikara iparĩka ikamini ĩkapani. Atxiĩti Teoso sikaimaroretai iua sãkire apanakinimoni pisãpiretini ĩkapani, ininiãkara Teoso sãkire pauikini iaõka pisãpiretari Teoso sãkire kãkitimoni. 7Teoso sikaimaroretiniãi apanakini pimiparĩkatini, ininiã pimiparĩkatariiko apanakini. Teoso sikaimaroretiniãi isãkire poerekini, ininiã poerekarauatako. 8Teoso sikaimaroretiniãi ãti pisikataparaxiniretini, ininiã pisikataparaxiniretariko ãti. Teoso

nirekiniāri pisikiniri apanakini amonitakiti ninoamoni, ininiā ito pisikako pipoxokoniritika. Teoso sikaimaroretiniāi auñtetxi pininiua, ininiā auñtetxi erekari pitxauako. Teoso nirekiniāi apanakini piamonĩkini, ininiā pipoxokoniritika piamonĩkanako.

Tiraõkitxi

⁹Atão pitiretariko apanakini pākixinireẽ. Pomanatariko maerekanitxi. Na piotokakapiri erekari pikamini. ¹⁰Iteene hñtiretakakauako, kotxi Kristo txĩkitakapekuaa añtaritakakiniua. Piteka pipaxitiniua atokokana, apiata pipaxitariko ãti. ¹¹Pitaparaxinireritika piparĩkauatako. Na piarinouatape. Piparĩkauatako Teoso ãkapani pipoxokoniritika pākixinireẽ. ¹²Pipoxokoniatako, kotxi pimarotari Teoso kaminiri ikamaenetakiti. Pimiteenekariko pimisiritiko. ãtipirika pimisãkiretariko Teoso. ¹³Nipokori kaamatiniã pitariakorimoni, tiitxi kaamatiniã pitariakorimoni, auiniã pitemoni, piskanako. Papakapanako pipoxokoniritika ikinimane Xesosi sãkire auĩãkani paapoko apoãkani, ãtiãtaã ãkani.

¹⁴Pamanaãri Teoso erekari ikaminina pite misiritakani. Ari, pamanaãri Teoso erekari ikaminina ninoa. Na pamanaãpiri Teoso maerekati isikinina ninoa. ¹⁵Pipoxokoniatako poxokorinikata. Pitxiapata kaminanirinikata. ¹⁶ãti pitiretini atokotxikana, ikinimane pitiretako. Na piuikapeua. Pisãkirauatako kãkiti matxineirotenikata, katxineiroteni pimisãkiretini atokotxikana. “Kimaroreno nota,” na pitxape.

¹⁷Kãkiti kaminiãri maerekati pitemoni, na pikamapiri maerekati iuamoni. Atãonoka pikama ikinimane ãkapani. ¹⁸Pinirekariko pauini kãkiti sauaki ereka inini, ininiã maxikatĩka kona pitxitapiri ãti. ¹⁹Nitiretakini, na hñxikatxitapiri ãti. Teosora xikatxitariko, kotxi Teoso sãkire iõkatsopatakori txari:

Nota parĩka ãti nixikatxitini. Notara misiritari maerekati kamakari, itxa Apiananiri sãkire. ²⁰Ari, kona pixikatxitapiri ãti. Pikamariko ãtimoni ia Teoso sãkire iõkatsopatakori iaõka:

Pomanatakiri natxitiniã, pisikakienatari iua. Iposonatinã,
 pisikari iãtini. Ikara atoko pikaminiã, ipẽtauata maerekati
 pitemoni ikamini,

itxa Teoso sãkire iõkatsopatakori. ²¹Na paunitapiri maerekati piauñte atoko ininiua. Erekari pikamakasaaki, maerekati iokanatapeẽkaika.

Aãuĩteakori Nirekakiti Akĩpitini

13 ¹Akĩpitarike aãuĩteakori nirekakiti, kotxi Teosora auringana nino aũtetxiakori ininiuana. Teosora takari nino aũtetxiakori aãuĩteakori ininiuana ĩkapani. ²Aãuĩteakori nirekakiti amakamakaniã, Teoso nirekakiti apaka !akama, kotxi Teoso txĩkitakana nino aãuĩteakori ininiuana. Nino paniãtakiti amakamakaniã, amisiritaãkako. ³Erekari kamakani !ipĩkari iauĩtena. Maerekati kamakaninani pĩkana nino. Pinirekatari pimapĩkakaniri piauĩte? Ininiã erekari pikamako, ininiã iua txaike: “Erekai pite.” ⁴Teoso nitiri itxaua piauĩte, erekari pitemoni ikamini ĩkapani. Txamari maerekati pikaminiã, erepaniko. Pipĩkariko iua, kotxi iposotari imisiritinii. Iua Teoso nitiri itxaua kãkiti maerekati kamakani imisiritini ĩkapani. ⁵Ininiãkara pikamariko piauĩteakori nirekakiti, kotxi pimakamakanisaakiri, pimisiritiko auapitika. Apaka pikamariko nino a nirekakiti, kotxi pimarotari pãkixinireẽ ikara atoko atão pikamini.

⁶Piauĩteakori Teoso nitiriakori itxauana, ininiã erekari apaka pisikiniri txineiro ninoamoni iparĩkana ikaminina ĩkapani. ⁷Ininiãkara pĩikitxitana nino amanaãkiti, sitatxi pauini ĩkapani, pitii papakapini ĩkapani. Pipaxitanako nino. Pikamariko nino a nirekakiti.

Hĩtiretakiniua ĩkapani

⁸Pĩikitxitariko ikinika piamotakiti. !Erekari pimaĩkitxitakaniri ãti. ãtinoka tẽpito erekari. Ia tẽpito na txineironi. Ia tẽpito atiraõki. Ia atoko inakari tẽpito xipokini kona erekari. ãtipirika hĩtiretakakauako. !Erekari pixipokiniri pitiretiniri ãti. ãti tiretakari kĩpitapekari Teoso paniãtakiti iõkatsopatakori. ⁹Teoso paniãtakiti iõkatsopatakori txari: “!Pisirĩkape pĩtanoro minakotokatika. Na pokaniuatape. Na piĩtiriuatape. Na pinirekapiri apanakini tii.” Akĩpitari ikara Teoso paniãtakiti iõkatsopatakori, apanakini ipaniãtakiti apaka, ia Teoso paniãtakiti ãtika akĩpitiniã. Ia Teoso paniãtakiti paniãtaua: “Piteka pitiretiniua atokotxikana, pitiretariko ãti.” ¹⁰Pitiretiniãri ãti, maerekati !pikaminiri iua. Ininiã ãti pitiretiniã, pikamari Teoso paniãtakiti iõkatsopatakori ikinika.

¹¹Matiretari ãti, kotxi aimarotari kaiamapekari Kristo kanapiriini. Ininiã pimerekako. Kona pimakapeko. Piparĩkauatako Teoso ĩkapani,

kotxi itixine Xesosi anikiniua õti apokaãpotanapanoka. Akokaxiti aãuikari Xesosi sãkire. Uatxa paĩtiki ikanapiriã. ¹²İkanõkari xipokaãpotanapanoka. Pokamara apokaãpotanapanoka Kristo kanapiriãkasaaki. Maerekati ipiãkasaaki kamakori atoko itxa, ininiã maiotokakari ikara akamini. Matakanapari maerekati. Makamari erekari, kotxi erekari akamakiti kapakaua, ininiã maerekati !imaĩkaua. Pokamarari atoko itxa erekari akamakiti. ¹³Pokamara kãkiti kamari atão inakarinoka apanakini apisatoõ. Makamari ikara atoko inakari ãtipirika. !Erekari kiiniri maerekati akamini. !Erekari apoãtini. !Erekari asirĩkini sito aĩtanoro minakotokatika. !Erekari akaminiri maerekati aĩto nireẽkiti. !Erekari aneenamauatini. !Erekari axikotiniri ãti. ¹⁴Ikara atoko inakari akamini !erekari. Makamari ia atoko inakari: Maamanaãri Apiananiri Xesosi Kristo kapakiniua, sotato mãka paikori sotato ĩto kapakini atoko. !Hĩxinikapiri: “Kanatokopa nitxa nikaminiri niĩto nireẽkiti?” Kotxi maerekatinoka aĩto nireẽkiti.

Kona Hĩtaparakienatakapeua

14 ¹Hãuiritariko Xesosi sãkire poiãonoka auĩakari hĩtekata apotiitiniua. Na hĩtxitapiri iua, ixinikakiti na hĩte xinikakiti atoko iminakanisaaki. ²Kãkiti iteene auikiniãri Xesosi sãkire, atxĩiti inikari itanapoko nipokori. ãti kãkiti poiãonoka auikiniãri Xesosi sãkire, atxĩiti inikari takarinoka. ³!Erekari ikinipoko niãkari sãpiretiniri takarinoka niãkarimoni: “Pikerokari” ininiri. Apaka !erekari takarinoka niãkari sãpiretiniri ikinipoko niãkarimoni: “Pikerokari” ininiri, kotxi Teoso apakapapekari iua. ⁴Kinakariparai pite ãti nitiri pinitakarii: “Pikerokari” ãtimoni inakarii. Ikerokiniãri, iua patrãote pinitamariko. Maerekati !ikama, kotxi Apiananiri moianatari iua.

⁵Atxĩiti ãti sãkire: “Ia õti erekari iteene axinikiniri Teoso.” Atxĩiti ãtipekana: “İkiniõtika erekari iteene axinikiniri Teoso.” Hãkixinireẽ hĩxinikariko: “Natokopa itxa atão nikamini?” ininiã eereka atão hĩkamini tĩkane himarotape. ⁶Hĩte: “Ia õti apiaerekata iteene axinikiniri Teoso,” hininiã, ininiã ikara atoko hĩxinika Teoso hĩpaxitini ĩkapani, ininiã erekapitikari. İkinipoko niãkari nikari ikinipoko, Teoso ipaxitini ĩkapani, kotxi apisapanika itxari Teoso: “Erekapitikai ia nipokori pisikinino niniãkiti ĩkapani,” itxari. İkinipoko maniãkati apaka auikari Teoso nirekiniri iua nikiniri takarinoka. Iua apaka txari Teoso inipokotini apisapanika: “Erekapitikai ia kienatxi pisikinino niniãkiti ĩkapani,” itxari. Ininiã iua apaka paxitari Apiananiri. ⁷Kona

ateka auñtetaua. Kona aãua ateka ïkapaninanini. Kona apina ateka ïkapaninanini. ⁸Auapanika anakasaaki, aparïkauata Apiananiri ïkapani. Apïkasaaki, apina Apiananiri ïkapani. Ininiã auapanika anakasaaki, apïkasaaki apaka, Apiananiri nakiti atxaua. ⁹Kristo ipina, eereka ôkitikaua iuaïkana, auapanika inakani auñte ininiua ïkapani, ipïkani auñte apaka ininiua ïkapani. ¹⁰Ininiã !apakata pitxitiniri pitari. “!Kiïkitei,” kona pitxapiri, kotxi akinika aãpokako Teoso apisatoõ. Iuasaaki iua säpiretariko akamakiti, erekari inini atxiiti, maerekati inini atxiiti. ¹¹Teoso säkire iökatsopatakori txari:

Nota Apiananiri, ätipirika auakari nitxaua. Ikinimane kãkiti kapotoreëkauako nota apisatoõ. Ikinimane txanoko nota Teoso nininiua.

¹²Ininiã iuasaakiikarako akinika asäpiretari Teoso ikinika akamakiti ïkorapokoriti aãuakasaaki.

Masikataparaxiniretakakaua

¹³Ininiã hïtokakariko hïtaparakienatakakiniua. Hãkixinireë hïtxako: “!Nitxïkitakapaniri nitari kerokiniri ikamakiti. !Nitxïkitakapaniriko nitari kaminiri maerekati,” hïtxako. ¹⁴Xesosi Apiananiri nakiti nitxaua, ininiãkara nimarotari, apakatapitika Teoso säkire auiaãkari nikiniri ikinipoko nipokori, kotxi nipokori maerekati !uari. Iuaritika kãkiti auikiniãri iua nipokori maerekati inini, !apakata inikiniri. ¹⁵Hinikiniãri ikinipoko nipokori, atxiiti hïtari äkixinire maxirauata, ininiã na atão hïtaretari iua. Kristo ipina iua hïtari ïkapani, ininiã hïtakanapariko iua nipokori hinikini, kotxi atxiiti iua !auikaikari Xesosi säkire, iua nipokori hinikini xika. ¹⁶Erekari auakasaaki, !häuiritapiri äti säpiretinii ikara erekari maerekati inini. ¹⁷Teoso aãuñte ininiãua, kona nipokorinanini, kona iätakorinanini, axinika. Teoso aãuñte ininiãua, axinikari Erekari Matamatakoti sikakiti atemoni. Iua txïkitakaua atãonoka akamini. Ikamaerekaxiniretaua. Isikapoxokonitaua. Teoso aãuñte ininiãua, ikara atoko itxa aãuini. ¹⁸Ikara atoko aparïkauatiniã Kristo ïkapani, Teoso apokaerekataua. Kãkiti apaka apokaerekataua.

¹⁹Ininiãkara manirekari kãkiti auini ereka inini, neenamatchi mauakani ïkapani. Masikataparaxiniretakakaua. ²⁰Na himisiritapiri Teoso parïka nipokori xika. Ikinipoko nipokori erekari hinikini, txamari hïte nikakiti txïkitakiniãri äti takanapiniri Kristo, hïkerokari. ²¹Hïtari kerokiniãri ikamakiti hïte niãkiti xika, apiaerekata

himanikakaniri iua nipokori. Hītari kerokiniāri ikamakiti hīte iātakiti xika, apiaerekata iua iāriā himiātakani. Na xatiki hītxīkitakapiri hītari kaminiri maerekati. ²²Hītemoni ikinipoko nipokori nikiko erekari, txamari na hīsāpiretapiri apanakini. Erekari Teosonoka imarotiniri. Hīxinikasaakiri hīkamakiti atāo inini, hākixinireē himarotakasaakiri hīkamakiti atāo inini, iuasaaki hīpoxokoniuata. Ininiā kona hīteka apoītaua. ²³Hinikasaakiri nipokori, hākixinireē: “Erekari atxiīti ia nipokori ninikini?” hinakasaaki, iuasaaki Teoso txai: “Maerekati pikama,” kotxi kona pauikari pikaminiri erekari. Himauikakaniāri hīkamakiti ereka inini, ininiā maerekati itxaua hīkamakiti.

Āti Nireēkiti Kamiko Pirena

15 ¹Atxiīti ikinipoko Teoso sākire aāuika, ininiā amoianatariko Teoso sākire poiāonoka auīākari, imaposotakiniti ikamini īkapani. !Erekari ateka nireēkitinoka akamini. ²Erekari akaminiri aītari nireēkiti, iua amoianatini īkapani, Teoso sākire iteene auikini īkapani. ³Kristo apaka !ikamari iuaka nireēkiti. Iua kamari Teoso nireēkiti, kotxi Teoso sākire iōkatsopatakoriā Kristo txari iri:

Kākiti misākirepiretakasaakii pite, notara ninoa misākirepireta. ⁴Ikinika Teoso sākire iōkatsopatakori iōkatsopataāka ate oerekiko īkapani. Teoso sākire iōkatsopatakori aāuikasaaki, aiātapari apoxokoniritika erekari apokini. Aimarotari erekari apokapitikako. Teoso sākire iōkatsopatakori sikataparaxiniretaua.

⁵Teoso sikataparataua, ininiā apoxokoniritika aiātapari erekari apokini. Isikataparaxiniretaua. Ninirekari Teoso txīkitakiniri hīte nireēkiti ātinoka inini, Kristo Xesosi nireēkiti iaōka hīkamini.

⁶Erekari hinireēkiti hākixinireē ātinoka inini. Erekari hīsākire ātinoka inini. Ikara atoko hininiā, hīkinika txari Teoso: “Peerekai pite,” kotxi iua aāuīte Xesosi Kristo iri itxaua.

Xoteo Minakaniua Poxokoniuatini

⁷Hāpakapariko āti, Kristo apakapini atokokana, ininiā kākiti txari Teoso: “Peerekai pite,” txariko. ⁸Nisāpiretai. Kristo Xoteoakori nitiri atoko itxapekaua. Ikara oerekari Teoso sakiniri isikaenetakiti. Teoso sikaenetakiti Apraāomoni, Isakimoni, Xakoo pakinimoni, isikaenetakiti apokapeka Xesosi īkorapokoriti apokasaaki. ⁹Kristo Xoteoakori nitiri atoko itxapekaua, ininiā Xoteo minakaniua txari: “Kaamonīkareri Teoso. Peerekari iua,” itxana. Teoso sākire iōkatsopatakori txari:

Xoteo minakaniua auiniātaã nitxariko Teoso: “Peerekai pite.”

Nixikarauata pite ĩkapani, kotxi peerekai pite.

¹⁰Iuaĩkana Teoso sãkire iõkatsopatakori txari:

Hĩte Xoteo minakaniua hĩpoxokoniuaatoko Xoteoakorikata,
Teoso nakitiakorikata.

¹¹Iuaĩkana Teoso sãkire iõkatsopatakori txari:

Hĩte hĩkinika Xoteo minakaniua, “Peerekari Apiananiri” hĩtxako.

Hĩkinika itixi auakanii hĩxikarauatako Teoso ĩkapani.

¹²Iuaĩkana Teoso sãkire iõkatsopatakoriã Isaía txari:

Auako Xesee apika mekaniri. Xoteo minakaniua auĩte
itxauako. Ninoa imarotariko isãkire iaõka ikamini,

itxa Teoso sãkire iõkatsopatakori.

¹³Teosora txĩkitakai himarotiniiri isãkire iaõka ikamini. Ninirekari iua iteene kamapoxokonitini hĩte. Ninirekari ikamaerekaxiniretinii hĩte, kotxi hãuikari iua sãkire. Ininiã himarotari hãpakapapitikariko Teoso sãkire iaõka. Erekari Matamatakoti posotiireẽ himarotari ikara.

Paoro Teoso Iokanapirena Erekari Sãpiretakari Xoteo Minakonimoni

¹⁴Nitariakori, nota imarotari ereka hinini. Nimarotari hĩte iteene kimarore hinini hõerekakakiniua ĩkapani. ¹⁵Iuaritika ia niõkatsopatakitiã nõtãkikapekai hĩte nitaparaxinireritika. Himarotakiti, iuaĩkana nisãpiretai, iuaĩkana hĩxinikiniri ĩkapani. Teoso sikari erekari notamoni, ininiã ikara atoko niõkatsopata hĩtemoni. ¹⁶Teoso sikari erekari notamoni, kotxi itxĩkitakano Xesosi Kristo nitiri nininiua. Ipaniãtano niparĩkauatini Xoteo minakaniua ĩkapani. Sasetotxi apakapari kãkiti mĩkiti, ininiã sika itxari Teosomoni. Ikara atoko itxa sasetotxi parĩka. Nota sasetotxi atoko nitxaua. Nisãpiretari Teoso iokanapirena erekari Xoteo minakonimoni, ininiã ninoaka sikaua Teosomoni inireẽkiti ikaminina ĩkapani. Teoso apakapari ikara atoko inakari ninoaka iuamoni sikakaniua. Erekari Matamatakoti kamaerekatari kãkiti Teoso apakapinina ĩkapani.

¹⁷Ininiã Teoso ĩkapani niparĩkauatakasaaki, niuikari Xesosi Kristo. ¹⁸Nota kona iuikaua, kotxi Kristo posotiireẽ Xoteo minakaniua kamari Teoso nireẽkiti. Kristo paniãtano nota iua sãkire nisãpiretinina Xoteo minakaniua. Ipaniãtano inireẽkiti nikamini Xoteo minakonikata nauakasaaki, ininiãkara ninoa auikari nisãkire. Ininiã ikamarina Teoso nireẽkiti. ¹⁹Erekari Matamatakoti posotiireẽ noerekari Teoso takaõtxikare ninoamoni. Noerekari posotiiretxi kãkiti maposotakiniti

ninoamoni. Ininiākara ninoa kamari Teoso sākire iaōka. Kristo iokanapirena erekari ikinika nisāpiretapekari kākiti Xerosareē sitatxiti auakani. Eereka kākiti apikoxiti auakani nisāpireta. Eereka kākiti apikoxiti auakani nisāpireta. Nitxaāpota kākiti nisāpiretini. Imapotōkire Iríría tixinipeka napoka, Kristo iokanapirena erekari nisāpiretini ĩkapani. ²⁰Ātipirika ninirekari nisāpiretiniri Kristo iokanapirena erekari Kristo mimarotakoniātaā. Ininiā kona niparĩkauata Teoso ĩkapani āti parĩkauatiniātaā, kotxi āti sāpiretapekari Kristo iokanapirena kākiti iuaātaā. ²¹Kotxi Teoso sākire iōkatsopatakori txari:

Mitxi iua masāpiretakoni imarotariko iua sākire. Mitxi iua sākire makenakotakani imarotariko iua sākire, itxa Teoso sākire iōkatsopatakori.

²²Kaiōokataikani ninirekamari nisini hĩtemoni, txamari kona apakata, kotxi iuasaaki nisāpiretari Kristo sākire Kristo sākire mimarotakanimoni.

Paoro Seenetini Homamoni

²³Itokanani ninirekamari naōkitinii hĩte. Uatxaika apakata nisini hĩtemoni, kotxi nixipokapekari niparĩka ĩkorapokoriti. ²⁴Nirekari Espánia tixinimoni nisini. Iuaā nisikasaaki, ninirekari naōkitinii hĩte. Ninirekari mapaōti nikaikotini hĩtekata, kotxi nipotxitari hĩtekata nauini. Ninirekari hĩte moianatinino Espániamoni nisini ĩkapani, ininiā eereka Espánia tixinimoni nisa. ²⁵Uatxa hĩtemoni nisini apisapanika, nisa Xerosareēmoni, kotxi ninirekari nanikiniro txineiro kākiti Teoso nakitiakori iuaā auakani nisikini ĩkapani. ²⁶Kristo sākire auiākani, Xoteo minakanuia Masetónia tixini auakani, Akaia tixini auakani pakini sikaro oa txineiro. Inirekarina nisikiniro Teoso nakitiakorimoni, matxineirotenimoni, Xerosareē sitatxitiā. ²⁷Ninoa poxokoniuata oa txineiro isikinina Xerosareē auakanimoni. Erekari oa txineiro isikinina, kotxi Xoteoakori Kristo sākire auiākani sikari Teoso sikakiti Teoso iokanapirena erekari Xoteo minakonimoni. Ininiā erekari Xoteo minakanuia sikiniri ipixini itxineirotena Teoso sikakito, Xoteoakorimoni. ²⁸Ininiā oa txineiro nanika Xerosareē auakanimoni. Ninoamoni txineiro nisika atoko, ininiā eereka nipotorika Espániamoni nisini. Espánia napokini apisapanika nisako hĩtemoni. ²⁹Ereē napokasaaki, nisāpiretai ikini sereti erekari Kristo sikakiti hĩtemoni.

³⁰Nitariakori nota amanaāi hĩte, himisākiretiniri Teoso nota ĩkapani. Hĩkenakotatari namanaākiti? Himisākiretariko Teoso nota

Īkapani. Xesosi Kristo aãũite itxaua, ininiã namanaãi himisãkiretiniri Teoso nota ĩkapani. Erekarı Matamatakoti txĩkitakaua atiraõkiuatini, ininiã himisãkiretari Teoso nota ĩkapani. Ikara atoko hĩkaminiã, Teoso sikataparatanı nimisiritiko auakasaaki. ³¹Kristo sãkire mauĩãkani Xotẽia tõpa auakani nirekari imisiritinino nota. Himisãkiretari Teoso ninoa mamisiritakanino ĩkapani. Himisãkiretari Teoso, Teoso nakitiakori Xerosareẽ auakani apokaerekatiniro txineiro Xoteo minakaniua iokanatakito. ³²Ininiã Teoso nirekiniãri, napoka hĩtemoni nipoxokoniritika. Ininiã asikapoxokonitakakaua. ³³Teoso akamaerekaxiniretakiri aua hĩtekata. Ameẽ.

Paoro Akiriuãkaãpotana Ixinikakini

16 ¹Niokanataro aĩtaro Pepi inakoro hĩtemoni. Peerekaro oa. Omoianatana Xesosi sãkire auiãkani Sẽkireia sitatxiti auakani. ²Apiananiri nakito otxaua, ininiã hãpakaparoko hĩpoxokoniritika, kotxi iua nakitiakori apaka hĩtxaua. Onirekiniãri himoianatiniro, himoianataroko, kotxi omoianatapekana itomaneri kãkiti. Omoianatapekano nota apaka.

³Hĩsãpiretanako Pirisira, oĩtaniri Ākira pakini nixinikamanapitinina ninoa. Ninoa parĩkauatapeka Kristo Xesosi ĩkapani notakata. ⁴Okaãkanapanokana nota imoianatinina xika. Peerekana, kotxi erekari ikaminanona. Xoteo minakaniua, ikini Teoso misãkiretikoãtaã apotiitakaniua apaka imarotari erekari Pirisira, Ākira pakini kamakiti nota ĩkapani. ⁵Xesosi sãkire auiãkani apotiitaua ninoa aapoko Teoso imisãkiretinina ĩkapani, ininiã hĩsãpiretanako nixinikamanapitinina ninoa.

Hĩsãpiretariko nitiretakiti Epeneto inakori nixinikamanapitiniri iua. Āsia tixiniã iua merepitipanika auikari Kristo sãkire.

⁶Hĩsãpiretaroko Maria nixinikamanapitiniro oa. Oa iteene parĩkauata ate ĩkapani. ⁷Hĩsãpiretanako ninirimane Ātorõniko, Xõnia pakini nixinikamanapitinina ninoa. Mitxipe ninoa aua notakata kateia ãki. Teoso kãkitimoni iokanatakini iteene imarotana Ātorõniko, Xõnia pakini. Ninoa ipi auikari Kristo sãkire, iua sãkire nauikini apisapanika.

⁸Hĩsãpiretariko Āpirato nixinikamanapitiniri iua. Nitiretari iua. Nitari itxaua, kotxi Apiananiri anaakori atxaua. ⁹Hĩsãpiretariko Opano nixinikamanapitiniri iua. Iua parĩkauata Kristo ĩkapani atekata. Hĩsãpiretariko nitiretakiti Esitaki nixinikamanapitiniri iua.

¹⁰Hīsāpiretariko Aperi nixinikamanapitiniri iua. Imisiritiko sauaki iua likipatari Kristo sākire auikini. Hīsāpiretanako Arisitóporo aapoko auakani nixinikamanapitinina ninoa. ¹¹Hīsāpiretariko ninirimane Erotxião nixinikamanapitiniri iua. Hīsāpiretanako Apiananiri nakitiakori Nasiso aapoko auakani nixinikamanapitinina ninoa.

¹²Hīsāpiretanako sitoakoro Tipena, Tiposa pakini nixinikamanapitinina ninoa. Ninoa parīkauatapitipo Apiananiri ĩkapani. Hīsāpiretaroko nitiretakito Pesitxi nixinikamanapitiniro oa. Oa apaka parīkauatapitipo Apiananiri ĩkapani. ¹³Hīsāpiretanako Hopo, inoro pakini nixinikamanapitinina ninoa. Apiananiri mereēri iua. Iua inoro tīretano nota, ninoro tīretinino atokotxikana. ¹⁴Hīsāpiretanako Asīkiritō, Pirekōtxi, Émisi, Pataropa, Émasi, ikinika aītariakori ninoakata apotiitakaniua pakini nixinikamanapitinina ninoa. ¹⁵Hīsāpiretanako Piróroko, Xória, Nereo, Nereo itaro, Orīpa, ikinika Teoso nakitiakori ninoakata apotiitakaniua pakini nixinikamanapitinina ninoa.

¹⁶Himaaratakakauako, kotxi aītaritakakaua. Kristo nakitiakori ĩkini Teoso misākiretikoātaã apotiitakaniua xinikamanapitai hīte.

Paoro Ōtākikare Mapotōkire

¹⁷Nitariakori iteene nōtākikai hīte. Erepaniko kākiti neenamatzxi nireēkani. Ninoa nirekari Kristo sākire auīākani omanatinina apanakini Kristo sākire auīākani. Na atão ninoa oerekakiti sākiretxiti, ĩniniã atxiīti kākiti takanapari Kristo sākire auikini ninoa oerekakiti xika. Kristo sākire nota oerekakiti hītemoni atão. Ninoa oerekakiti koketakori sākiretxiti. Ninoa moianariakori kona hītxapeua. ¹⁸Kākiti ikara atoko inakani kona parīkauata aāuīte Kristo ĩkapani. Ninoa parīkauata iītona nireēkiti ĩkapani. Imisirienetarina kākiti sākire auīākani. Imisirienetarina kākiti ikara atoko inakani, kotxi kākiti potxitari isākirena. Kākitimoni peerekari ninoa sākire. ¹⁹Ikinika kākiti imarotari hīte kaminiri Kristo sākire iaōka, ĩniniã nota iteene poxokoniua hīte ikara atoko ĩniniã. Ninirekari kiīkite ĩnini erekari hīkamini ĩkapani. Ninirekari himimarotakaniri maerekati hīkamini. ²⁰Teoso akamaerekaxiniretakiri, paītiki xipokariko Satanasi posotiire, ĩniniã hīposotari hīokanatiniri Satanasi ĩsini.

Aāuīte Xesosi Kristo ātipirika sikari ĩkinipoko erekari hītemoni.

²¹Tximótxio, notakata parīkauatakari, xinikamanapitai hīte. Ninirimane Arósio, Xasão, Sosipato pakini xinikamanapitai hīte apaka.

²²Nota Tésio inakori iőkatsopatari ia iőkatsopari Paoro ãkapani. Nota apaka xinikamanapitai hĩte, kotxi Apiananiri nakiti nitxaua.

²³Nota Paoro aua Kaio aapoko. Kristo sãkire auĩãkani apotiitaua iua aapoko Teosokata isãkirauatinina ãkapani. Iua nirekari himarotiniri iua xinikamanapitini hĩte. Erásito inakori apaka xinikamanapitai. Txineiro nĩkatakari iua. Sitatxi auakani sikakito inĩkata iua. Aĩtari Koato inakori xinikamanapitai hĩte apaka.

²⁴Aãũite Xesosi Kristo ãtipirika sikari ikinipoko erekari hĩtemoni. Ameẽ.

²⁵“Peerekari Teoso,” matxako. Iua posotari ikamataparaxiniretinii hĩte, ininiã kona hĩotokakari hãuikiniri Kristo sãkire. Teoso iokanapirena erekari nota sãpiretakiti, Xesosi Kristo sãkire pakini sãpiretari ikara atoko inakari. Ikara Teoso sãkire kitxakapirĩka !kimarotikori. Uatxa imarotapeẽkaika. ²⁶ĩkorasaaki asãpiretapekari ikara Teoso sãkire, Teoso sãkire sãpiretakani iőkatsopatakiti kitxakapirĩka. Uatxa aimarotari ninoa sãpiretakiti. Teoso auapika inakari paniãtari isãkire sãpiretiko ikini itixiti auakanimoni. Ininiã apakata ikinimane auikiniri isãkire. Apakata ikinimane kaminiri inireẽkiti iaõka.

²⁷Iuanani Teoso txaua. Iuanokara imarotari atão ikinipoko. ãtipirika matxariko iua: “Peerekai pite, kotxi peerekari Xesosi Kristo.” Ameẽ.

1 KORÏTO

Merepanika Paoro Iokanatsopatakiti Korïto Auakanimoni

1 ¹Nota Paoro, Xesosi Kristo iokanatakitino. Teoso akiritano iua iokanatakiti nininiua ïkapani, kotxi inirekari iokanatinino kãkitimoni isãkire nisãpiretini ïkapani. Aïtari Sóseni inakori aua notakata uai. ²Niokanatsopata hïtemoni, kãkiti Xesosi sãkire auiãkani Korïto sitatxiti auakanimoni. Kristo Xesosi makatxakakini hïtxaua Teoso ïkapani. Teoso akiritai hïte iua nakitiakori hininiua ïkapani. Apaka niokanatsopata ikini tãpati auakanimoni, aãuïte Xesosi Kristo uãka akiritakanimoni. Ate auïte Xesosi, ninoa auïte apaka itxaua. ³Aïri Teoso, Apiananiri Xesosi Kristo pakini sikari ikinipoko erekari hïtemoni. Ninoa kamaerekaxiniretai hïte.

Paoro Misãkiretari Teoso Korïto Auakani ïkapani

⁴Ätipirika nimisãkiretari Teoso ia atoko: “Peerekai pite, kotxi Xesosi Kristo sikari ikinipoko erekari Korïto auakanimoni. Ikara erekari pite sikakiti. ⁵Peerekai pite, kotxi pite kamaerekatari ninoa auini. Pite oerekana ninoa sãkire atão inini ïkapani. Pite kamaimaroretana. Ininiã ninoa sãkire apiaerekata. Ninoa imarore apiaãpota.” Ia atoko nimisãkiretari Teoso.

⁶Hïtemoni asãpiretakiti Kristo pirena auapeka hãkixinireẽ. Ininiã ïteene hãuikari Kristo sãkire. ⁷Ininiã hiãtapakasaakiri aãuïte Xesosi Kristo kanapiriini, ikini sereti erekari Teoso sikakiti aua hïtemoni iua parïka hïkamini ïkapani. ⁸Hïte isikataparaxiniretiniritika ikanapiriini õti apokako. Ininiã maerekati hïtemoni !uari aãuïte Xesosi Kristo

apokasaaki. ⁹Teoso kamariko ikara hĩtemoni, kotxi ikinika isãkire iaõka ikamako. Iuakara akiritai hĩte, himoianatiniri imi aãuĩte Xesosi Kristo.

!Homanatakakapeua

¹⁰Nitariakori, aãuĩte Xesosi Kristo posotiireẽ nõtãkikai. Hĩsãkire ãtinoka hĩtxako. !Ninirekari homanatakakiniua. Ninirekari ãtika hĩxinikakiti auini. Ninirekari ãtika hinirekakiti auini. ¹¹Nitariakori, Kroee aapoko auakani sãpiretano hĩtekarika hinaiatatakiniua. ¹²Kotxi apanakini hĩte txari: “Paoro sãkirera nota kĩpita.” ãtipekana: “Aporo sãkirera nota kĩpita.” ãtipekana: “Petro sãkirera nota kĩpita.” ãtipekana: “Kristo sãkirera nota kĩpita.” ¹³!Apakata ikara atoko hĩkamini. Kristo !ikaiarikaãka. Kona Paoro ipina aamina ĩpiriãmitakari nopini hĩte ĩkapani. Kona Paoro uãkaã hĩpatxisataãka.

¹⁴Nisãpiretari Teoso ereka inini, kotxi kona notani patxisatai hĩte. Krispo, Kaio pakininanira nipatxisata. Apikomoni !nipatxisatari kãkiti. ¹⁵Ininiã kona kãkiti sãpiretari nipatxisatiniri kãkiti nota uãkaã. ¹⁶Ii. Nimaxinĩkaretari. Nipatxisatari Esitẽpana, iua aapoko auakani pakini. Apikomoni nipatxisatakini !nixinikaika. ¹⁷Kristo kona iokanatano nipatxisarauatini ĩkapani. Iokanatano Teoso iokanapirena erekari nisãpiretini ĩkapani. !Nirekari kãkiti sãkireẽ, kãkiti imaroreẽ nisãpirenauatini, kotxi kãkiti imarore !isãpiretari Kristo ipinini aamina ĩpiriãmitakari nopini amaerekani imaktxakini ĩkapani.

Teoso Imarore

¹⁸Teoso sãkire mauĩãkani uãkatari !kiĩkiteri kãkiti Kristo ipinini aamina ĩpiriãmitakari nopini sãpiretakani. Atepekana, Kristo ipinini sãpiretiko oerekari Teoso posotiire, kotxi Kristo ipinini maktxakari amaerekani. ¹⁹Teoso sãkire iõkatsopatakori kitxakapirĩka txari:

Nixipokariko ĩkorapokoriti kimarorerini imarore.

Nixipokariko kiĩkiterini iĩkite.

Itxa Teoso kitxakapirĩka. ²⁰Ītapari kimaroreri? Ītapari apaiaõkarauatakari? Naniparari kaxinikareri ĩkorapokoritikiri? Teoso oerekapekari ĩkorapokoritikiri imarore miĩkiteti imarore atokotxikana inini. ²¹Paimatireri Teoso, kotxi !auritari ĩkorapokoriti auakani imarotiniri iua ninoaka imaroreẽ. Apanakinimoni Kristo sãkire sãpiretiko !kiĩkiteri, iuaritika Teoso apokaerekatari imaktxakiniri kãkiti maerekani, Kristo sãkire sãpiretiko auikasaakina.

²²Xoteoakori nirekari atamatiniri Teoso takaõtxikare, isãkire auikinina ĩkapani. Krekoakoripekana nirekari imaroretxi apiari imarotini. ²³Iuaritika ate sãpiretari Kristo ipinini ĩpiriãmitakari nopini amaerekani imaktxakini ĩkapani. Xoteoakori !nirekari ikara asãkire auikinina. Krekoakoripekana uãkatari ikara asãkire miĩkiteti sãkire inini. ²⁴Iuaritika Teoso akiritakini aua Xoteoakori, Krekoakori pakini. Ninoamoni Kristo parĩka oerekari Teoso posotiire. Iua parĩka oerekari Teoso imarore. ²⁵Kãkiti uãkatari Teoso imarore !kiĩkiteri, iuaritika axapitiki Teoso imarore apiata. Ikinipoko kãkiti imarore poiãoka. Axapitiki Teoso tapara apiata. Ikinipoko kãkiti tapara poiãoka.

²⁶Nitariakori, Teoso akiritakasaakii, hĩxinikari kãkiti xinikakiti atokokana. Natokopa itxa hĩte iusaaki? Iusaaki !kimarorei. !Kaposotiirei iusaaki. Auĩttxi !hĩtxaua iusaaki. Itori hĩte ikara atoko inakani iusaaki. ²⁷Teoso mereẽri kãkiti. ĩkorapokoriti auakani uãkatari ninoa kãkiti Teoso mereẽkini miĩkiteni ininiuua. Imereẽna ninoa, kimaroreni ĩkorapokoriti auakani pẽtauatini ĩkapani. ĩkorapokoriti auakani uãkatari ninoa kãkiti Teoso mereẽkini iõkapetakani ininiuua. Imereẽna ninoa, katapararini ĩkorapokoriti auakani pẽtauatini ĩkapani. ²⁸Iua mereẽri kãkiti. ĩkorapokoriti auakani uãkatana ninoa Teoso mereẽkini minakani ininiuana. Imereẽri apanakini manirekakini. Imereẽri kãkiti omanatakoni. Kinirepa Teoso mereẽri kãkiti ikara atoko inakani? Teoso oerekari kãkiti, kãkiti uãkatakiti apiari inini na atão. ²⁹Ikara atoko ininiã, kãkiti !liposotari iuikiniua Teoso apisatoõ. ³⁰Teosora txĩkitakaua Xesosi Kristo nakitiakori aniniuua. Kristo nakiti aniniãua, aimarotari imaroretxi atão inakari. Kristo txĩkitakaua atão inakari akamini Teoso apakapiniua ĩkapani. Iua txĩkitakaua Teoso nakitiakori aniniuua ĩkapani. Iĩkitxirauata ate ĩkapani ipĩkasaaki.

³¹Teoso sãkire iõkatsopatakori txari:

!Apakata piuikiniua. Apakatapitika piuikiniri Apiananiri.

Xesosi Ipinini ĩpiriãmitakari Nopini

2 ¹Nitariakori, napokasaaki hĩtemoni, nisãpiretai Teoso sãpiretakiti. Kona nisãpiretai notaka sãkire nimatire. Iusaaki kona noerekai notaka imarore. Teoso sãkirenoka nisãpiretai hĩte. ²Hĩtekata nauakasaaki, na ninirekari ãti imaroretxi nimarotini. Ninirekari Xesosi Kristonoka nisãpiretini. Apiata ninirekari nisãpiretiniu iua ipinini kãkiti ĩkapani ĩpiriãmitakari nopini. ³Hĩtekata nauakasaaki kona kataparaxinireno. Nikikinanaka nipĩkarauatini xika. ⁴Iusaaki

kona kâkiti imaroreēni nisâkirauata. Kona kâkiti imaroreēni ninirekari hâuikiniiri Teoso iokanapirena nisâpiretakiti iuasaaki. Teoso iokanapirena nisâpiretakasaaki, kâkiti imarotari Erekarî Matamatakoti posotiireē nisâkirauata. ⁵Ininiã kona kâkiti imaroreēni hâuikari Teoso iokanapirena. Hâuikari Teoso iokanapirena Teoso posotiireē.

Erekari Matamatakoti Imarore

⁶Teoso sâkire auiãkani iteene âkixinireē aneēkani imarotari Teoso iokanapirena asâpiretakiti kimatireri inini. Ikara imaroretxi kona ïkorapokoriti auakani imaroreni. Kona auîtetxiakori imaroreni ikara imaroretxi. Kotxi ninoa imarore paîtiki !auaika. ⁷Asâpiretari Teoso imarore mitxi kâkiti mimarotakiniti, kotxi Teoso kipatari. Itixi kamiko apisa Teoso nirekaua asâpiretiniri ikara imarore kâkitimoni ate iotximere aâpakapini ïkapani. ⁸Auîtetxiakori ïkorapokoriti auakani !imarotari ikara Teoso imarore. Ninoa imarotaãkamariko, ininiã !okamarinako Apiananiri kaiotximereri aamina ïpiriãmitakari nopini. ⁹Kitxakapirîka Teoso sâkire iôkatsopatakori txari:

Kâkiti oki !amatapanikari Teoso kamakiti tîkane iua tiretakani ïkapani. Kâkiti kenakoki !ikenakotapanikari Teoso kamakiti tîkane iua tiretakani ïkapani. Kâkiti !ixinikapanikari Teoso kamakiti tîkane iua tiretakani ïkapani.

¹⁰Iuaritika Teoso oerekapekaua Erekarî Matamatakotiã. Ikinipoko imarotakari itxaua Erekarî Matamatakoti. Ikinipoko kipatakori Teoso imarore imarota. ¹¹Kâkiti âkixinirenoka imarotari iuaka ixiniãkiti. ãti !imarotari iua xiniãkiti. Iua atokokanera Erekarî Matamatakotinoka imarotari Teoso xiniãkiti, kotxi Teoso itxaua iua. ¹²Kona ate apakapari ãtião matamatakoti ïkorapokoritikiri. Ate apakapari Erekarî Matamatakoti, Teoso iokanatakiti atemoni, ininiãkara aposotari aimarotiniri Teoso sikakiti atemoni. Itori isikakiti.

¹³Atemoni isikakiti asâpireta. Kona kâkiti imaroreēni asâpiretari kâkiti. Erekarî Matamatakoti oerekaua asâpirenauatini. Ate atamatari Teoso oerekakiti isâkire iôkatsopatakoriã, eereka ãtiãtaã isâkire iôkatsopatakoriã aãmatari iua oerekakiti, ininiã iuasaaki aimarotari atão. Ikara atoko aõerekai hîte. ¹⁴Erekarî Matamatakoti mauakiniti !apakapari Erekarî Matamatakoti oerekakiti, kotxi iuamoni ikara sâkiretxi miikiteti sâkire. !Iposotari imarotiniri Erekarî Matamatakoti sâpiretakiti, kotxi Erekarî Matamatakoti !auari iuamoni. ¹⁵Erekarî Matamatakoti auakasaakiri kâkiti,

iuasaaki iposotari ataerekatiniri imakinika, ininiã kãkiti Erekarĩ Matamatakoti mauakinĩti !iposotari apoĩtiniri iua.

¹⁶Teoso sãkire iøkatsopatakori txari:

Kiripa imarotatari Apiananiri xiniãkiti iua oerekini ĩkapani? Iuaritika Kristo oerekaua iuaka xiniãkiti.

Teoso Nitiriakori Atxaua

3 ¹Nitariakori, hĩte !ikamari ikinipoko Erekarĩ Matamatakoti nireẽkiti. Hĩkamari hĩteka nireẽkiti ĩkorapokoriti auakani kamini atokokana. Ininiãkara nisãkirauata hĩtekata amarinikata nisãkirauatini atoko, kotxi poiãonoka hãuikari Kristo sãkire. ²Tinitxiã atoko inakari nisãkire nisikai. Xinitxi atoko inakari nisãkire kona nisikai, kotxi !himĩteenekari nisãkire kamimari. Uatxapiima hĩte !iposopanika noerekakiti kamimari himarotini. ³ĩkorapokoriti auakani xinikini atoko hĩxinikapanika. Ikara xika hĩxikotakakaua. Hinaiatakakaua. Homanatakakaua. Hĩteka nireẽkiti hĩkama, ĩkorapokoriti auakani kamini atokokana. ⁴Kotxi ãtikaka hĩte txari: “Paoro sãkire nikĩpita.” Apanakini txari: “Aporo sãkire nikĩpita.” Ikara atoko hininiã, kãkiti ĩkorapokoritikini sãkire atoko hĩsãkirauata. !Kũkitepanikai.

⁵Kiripa Paoro? Kiripa Aporo? Kristo nitiriakorinoka atxaua. Iua sãkire sãpiretakaninoka atxaua. Hĩte auikapekari Kristo sãkire asãpiretakasaakii. Apiananiri sikari parĩkatxi ikininapemoni akamini ĩkapani. ⁶Ia atoko itxa parĩkatxi Teoso sikakiti: Merepanika nota sãpiretari Teoso sãkire kãkitimoni, takariki nitakini atokokana. Eereka Aporo oerekari ninoa kãkiti apikomoni Teoso sãkire. Āparaã takari nireẽkiti atoko itxa apikomoni Teoso sãkire isãpiretakiti. Nota, Aporo pakini parĩkauata ikara atoko, iuaritika Teosonoka aneẽkakari takari. Iuanokara txĩkitakari kãkiti auikiniri isãkire. ⁷Takariki taãkari, āparaã siãkari pakini minakati ninoa, kotxi Teosonoka aneẽkakari takari. ⁸Teoso sãkire merepanika sãpiretakari nirekari iparĩkauatini Teoso ĩkapani. Teoso sãkire apikomoni sãpiretakari apaka nirekari iparĩkauatini Teoso ĩkapani. Ininiã Teoso sikariko ninoa parĩka ĩki ninoamoni iparĩkana iaõka. ⁹Teosokata parĩkauatakani atxaua. Teoso kikiote atoko hĩtxaua. Apaka Teoso aapoko atoko hĩtxaua.

¹⁰Teoso sikapekano ikinipoko erekarĩ niparĩka iua ĩkapani nikamini. Aapokotxi kamiko apisa aapokotxi kamakari kimaroreri takari kaikori, inopini aapokotxi ikamini ĩkapani. Iua aapokotxi kamakari kimaroreri atoko nitxaua. Merepanika nota parĩkauata Kristo sãkire nisãpiretini.

Kaikori aapokotxi kamakari takakiti atoko itxa ikara iua sãkire. Eereka apanakini oerekarauata apikomoni. Ninoa parĩka aapokotxi kamiko kaikori nopini atokokana itxa. Erepaniko akamakasaakiri ikara parĩkatxi. ¹¹Kaikori, aapokotxi kamakari takakiti atoko itxa Xesosi Kristo sãkire. Āti kaikori kãkiti sãkire !auari. Auape kaikori Xesosi Kristo sãkire, kotxi kataparari. ¹²Xesosi Kristo sãkire aãuikasaaki, kaikori aãuini ĩkapani iposope. Aapokotxi iua kaikori nopini atoko itxa aparĩka. Aparĩka atxiĩti oro atoko itxa. Atxiĩti pirata atoko itxa. Atxiĩti kai erekari atoko itxa. Atxiĩti aamina atoko itxa. Atxiĩti aãtsopa atoko itxa. Atxiĩti katsotati atoko itxa aparĩka.

¹³Itixi xipokini õti kãkiti imarotariko natokopa itxa iparĩka, kotxi iuasaakiko arikatxi ataerekatari iparĩka. ¹⁴Iparĩka marikakaniã, apakapari iparĩka ĩki. ¹⁵Iparĩka arikiniã, !apakapari iparĩka ĩki. Iuaritika Teoso auiritari iua auini ātipirika Teosokata, txamari iua xipokaarita.

¹⁶Kona hĩte imarotapanikari Teoso misãkiretiko aikoti hininiua? Kona hĩte imarotapanikari Erekari Matamatakoti auini hiĩto āki? ¹⁷Kãkiti xipokiniãri Teoso misãkiretiko aikoti, Teoso xipokariko iua. Teoso misãkiretiko aikoti iua nakiti. Hĩtera Teoso misãkiretiko aikoti hĩtxaua.

¹⁸Kona hĩteka misirienetapeuako. Atxiĩti ātikaka kãkiti hĩte sauaki uãkatari kimaroreni ininiua, kotxi imarotarina ĩkorapokoriti auakani imarore. ĩkorapokoriti auakani uãkatari Kristo sãkire auĩãkari miĩkiteti ininiua. Ininiã erekape kãkiti ĩkorapokoriti auakani akiritinii miĩkiteti hininiua, kotxi iuasaaki kimaroreri atão inakari hĩtxaua. ¹⁹Teosomoni !kiĩkiteri ĩkorapokoriti auakani imarore. Teoso sãkire iõkatsopatakori txari:

Teoso maĩkari kimarorerini ĩkorapokoriti auakani ninoaka imaroreẽ.

²⁰Apaka Teoso sãkire iõkatsopatakori txari:

Apiananiri imarotari ĩkorapokoriti kimarorerini imarore !itxapõ.

²¹Ininiã !apakata kãkiti iuikiniua imarore xika. Ikinika aua hĩtemoni. ²²Paoro aua hĩtemoni. Aporo aua hĩtemoni. Petro aua hĩtemoni. Itixi aua hĩtemoni. Hãuini, hĩpinini apaka aua hĩtemoni. Uatxa auakari, katana auakari apaka aua hĩtemoni. Ikinipoko aua hĩtemoni. ²³Kotxi hĩte Kristo nakiti hĩtxaua. Kristo, Teoso nakiti itxaua.

Kristo Iokanatakini Kākitimoni

4 ¹Erekari kākiti imarotiniri auĩtetxiakori aminakaniua. Kristo nitiriakori atxaua. Teoso iokanapirena nĩkatakani atxaua. Iua sikari iokanapirena atemoni apanakini asāpiretini ĩkapani. Iua Teoso iokanapirena !imarotaāka mitxi. ²Nitiritxi atāo inakari ātipirika kamari iauĩte paniātakiti. ³!Nimaākatari hĩte ataerekatino nota. !Nimaākatari apanakini ataerekatino apaka. Kona notaka ataerekataua apaka. ⁴Nākixinireē maerekati !uari, iuaritika nikamapekari maerekati. Apiananirinokara ataerekatano. ⁵Ininiā !hĩsāpiretapiri: “Kona erekari iua parĩka. Peerekari ikara parĩka,” kona hĩtxape Apiananiri apokini apisa. Apiananiri apokini hiātapako. Iua oerekariko ipiāmoni iomaātakori. Oerekariko kākiti nirekakiti ākixinireēna iparĩkauatakasaakina. Iuusaaki Teoso txariko kākiti: “Erekapitikari pikamakiti,” itxa.

⁶Nitariakori, ikara nota pirena, Aporo pirena pakini nisāpiretai atāo inakari himarotini ĩkapani, āti apiata himiuiakani ĩkapani. Ininiā hĩkamariko Teoso sākire iokatsopatakori iaōka, kotxi !apakata kākiti iteene iuikiniri āti, ātipekana imanirekakani inini. ⁷Pite apiananitakari !uari. Himapakapakiniti !uari. Kapakapare hininiā, kinirepa mapakapareni sākirauatini atoko hĩtxa? ⁸Ikinipoko hinireēkiti auapeka hĩtemoni atxiĩti? Katiipekai hĩte. Ate ereē mauakanisaaki, atxiĩti hĩteka kamari auĩtetxi hininiua. Ninirekari auĩtetxi atāo hininiua, ininiā ate auĩtetxi atxaua hĩtekata. ⁹Īkorasaaki neenamatz xi poka atoko, auĩtetxi kāiatakari kanapiriā isotatonekata. Ninoa mapotōkire kākiti auĩtetxi maĩkakini minaāka apanakini atamatinina ĩkapani, inapetinina ĩkapani. Eereka okaākana ninoa kākiti. Nota xinikari Teoso nirekari ate iua iokanatakini ikara kākiti maĩkakoni atoko aniniua. Ikinimane atamataua. Kākiti, Teoso nitiriakori iaxitikini apaka atamataua apininimoni asini. ¹⁰Hĩtemoni, miĩkiteni ate txaua, Kristo ĩkapani aparĩkauatakasaaki. Hĩtemoni, kimarorei hĩte, Kristo ĩkapani hĩparĩkauatakasaaki. Hĩtemoni, !kaposotiireua ate. Hĩtemoni kaposotiirei hĩte. Hĩte paxitaāka, txamari ate omanataāka. ¹¹Uatxapiima Kristo sākire ate auikini xika anatxita. Aponata. !Kamākaua. Amisiritaāka. !Kaapokoua. ¹²Iteene aparĩkauata anireēkiti aamotini ĩkapani. Kākiti takasaakiri maerekati atemoni, ate amanaāri Teoso erekari ninoamoni itakini ĩkapani. Amisiritikosaaki, iuusaaki amĩteenekari. ¹³Apanakini misākirepiretakasaakia, erekari ate

apakapapiretana ninoa. Uatxapiima apanakinimoni ĩkorapokoriti txiko atoko atxaua. Kasakari atoko atxaua ninoamoni.

¹⁴Kona niökatsopata ikara hĩpĕtauatini ĩkapani. Niökatsopata ikara nipinitinii ĩkapani monōkori apokini apisa, kotxi namariteni nota tiretakini atoko hĩtxaua. ¹⁵Hĩtemoni tesi mio Teoso sākire oereĕkani auaākamako, iuaritika poião hĩri atoko inakari aua. Notara hĩri atoko nitxapekaua, kotxi hāuikari Teoso iokanapirena erekari noerekasaakii Kristo Xesosi posotiireĕ. ¹⁶Ininiã nõtākikai: Nota kamakiti atokotxikana hĩkamako. ¹⁷Ikara ĩkapani niokanataru Tximótxio hĩtemoni. Iua namarite nitiretakiti atoko. Iua kamari Apiananiri paniātakiti iaōka. Iua txĩkitakai hĩxinikiniri nikamakiti ikiniōtika Kristo posotiireĕ. Ikini tōpati Kristo sākire auĩākani apotiitiniātaāua, noerekari kākiti erekari ikamini ikiniōtika, erekari nota kamini atokotxikana.

¹⁸Ātikaka hĩte iuikaua, kotxi hĩuākatari nota mapokakani hĩtemoni. ¹⁹Txamari Teoso auiritiniãno, paĩtiki napokako hĩtemoni. Iuasaakiko ĩnĩnĩrekari nĩmarotĩniri ninoa iuikakaniua sākire. Napokasaaki ereĕ, nĩnĩrekari nĩmarotĩniri Teoso posotiire. ²⁰Teoso auĩtetxi ininiātaāua kona sākiretxinani aua. Iposotiire apaka aua. ²¹Kĩripa hĩte nireka? Hĩnĩrekataru nĩnoropatĩnii aĩkeĕ, ereĕ napokasaaki? Hĩnĩrekataru nitiretinii, nĩmatxitakani, ereĕ napokasaaki?

Maerekati Xesosi Sākire

Auiākani Sauaki

5 ¹Isāpiretaāka kākiti ereĕ kaminiri maerekati ĩtotxi nireĕkiti āti kākítikata. Iua kākiti maerekani apiari, kotxi iua sirĩka iri ĩtanorokata. Teoso sākire mauĩākani kamari maerekati, iuaritika ninoa ĩkamari ikara atoko inakari maerekati, kiki hĩte sauaki auakari kamakiti atoko. Ninoa ĩnĩnĩrekari isākiretinirina ikara atoko inakari maerekati. ²Iuaritika hĩte iuikaua. ĩHĩmatĩnĩnĩuata hĩmaerekani xika. Apiaerekata ĩkora iri ĩtanorokata sirĩkakari hĩokanatinu itakanapĩnii. ³Nĩto kona ereĕ aua, iuaritika nĩxinikakiti auapitika ereĕ hĩtekata, ininiã nota ereĕ hĩtekata nauini atokokana, nĩmĩreĕpekari iua maerekati kamakari misiritiko. ⁴Aũũte Xesosi Kristo uākaã hāpotiitakasaakĩua, nota aua hĩtekata nĩxinikakitiã. Iuasaaki hĩmarotakasaakiri Xesosi Kristo posotiire, ⁵hĩsĩkariko iua Satanasimoni iua ĩto ipĩnini ĩkapani, ĩxinire ereka inini Xesosi kanapiriākasaaki.

⁶!Apakata hĩuikiniua. Himarotari axapiti pã tireẽkari tirekakari itori pã. Iua atokokana ãtika maerekati kamakari txĩkitakari kaiãopokori kãkiti kaminiri maerekati. ⁷Ininiã hõkanapariko maerekati mitxi hĩkamakiti, amaneri hinini ĩkapani. Ininiã pã miãtiãkati atoko hĩtxaua, kotxi ikoke !auari. Kitxakapirĩka kãkiti okari ipira soti auĩte, ininiã Teoso nitiri napaãpotakasaaki ninoa nopini, kona okana ninoa. Kristo, apira soti auĩte atoko itxa. Iua ipina ate mapinakani ĩkapani. ⁸Pãskoã kiiniritisaaki, Teoso !auritari pã ãtikakari nikiko, kotxi maerekati pã tirekakari atoko itxa. Ininiã maõkanapari maerekati mitxi akamakiti. Pã miãtiãkati atoko matxaua, ininiã makamari erekari. Masãkiretari atão inakarínoka. ⁹Niokanatsopatapeka hĩtemoni himapotiitakanuia maerekati kamakanikata, ĩtotxi nireẽkiti kamakanikata. ¹⁰Na nixinikari ĩkorapokoriti maerekati kamakani. Maerekati ĩtotxi nireẽkiti kamakani, kamanarerini, kamisirienererini, kamakori teosonetakani pakini ĩkorapokoriti auakani na nixinikanãta. !Hĩposota hĩtakanapinina ninoa, kotxi auapikana. Hĩpĩkasaakinokara, hĩtakanapana ninoa. ¹¹Uatxa niokanatsopata hĩtemoni, himapotiitakanuia maerekati kamakanikata, “Xesosi sãkire auĩãkarirano” inakanikata. ĩtanoro minakotokatika sirĩkakani, kamanarerini, kamakori teosonetakani, ãti misãkirepiretakani, ipoãtakani, kamisirienereri pakini hĩtakanapako. Kona hinipokotape ikara atoko inakanikata.

¹²Kona nota parĩkani Xesosi sãkire mauĩãkani misiritiko nisãpiretini. Hĩte parĩkakara Xesosi sãkire auĩãkani misiritiko hĩsãpiretini. ¹³Teosokara sãpiretariko Xesosi sãkire mauĩãkani misiritiko. Hĩte iokanatariko maerekati kamakari hĩte sauaki auakari isini.

Ãti Naiatakasaakiri Ãti

6 ¹Xesosi sãkire auĩãkari naiatiniãri ãti Xesosi sãkire auĩãkari, !apakata Xesosi sãkire mauĩãkani apisatoõ anikiko. Hanikana ninoa Xesosi sãkire auĩãkanimoni maerekati kamakari misiritiko himarotini ĩkapani. ²Kona himarotapanikari Xesosi sãkire auĩãkani mereẽriko Xesosi sãkire mauĩãkani misiritiko ãti õti? Hĩkamariko ikara atoko inakari xipokatxi õtisaaki, ininiã hĩposotapitikari uatxa himereiniri kãkiti misiritiko, ãti naiatakasaakiri ãti. ³Atxiĩti hĩte kona imarotapanikari himereiniri Satanasi nitiriakori misiritiko ãti õti? Ininiã hĩposotapitikari himereiniri kãkiti misiritiko ĩkorapokoriti uatxa. ⁴Txamari neenamtxi hĩte sauaki auiniã, hanikatari kãkiti Teoso sãkire auĩãkani mapaxitakanimoni? !Apakata, kotxi ninoa !imarotari Teoso

paniätakiti. ⁵Ikara atoko nitxai nikamapëtatiniî ïkapani. Atxiïti kona hïposotatari häpokiniri kimaroreri hïte sauaki neenamatchi xipokini ïkapani? Atxiïti kona ätika aua? ⁶Txamari äti Xesosi säkire auïäkari anikari äti Xesosi säkire auïäkari Xesosi säkire mauïäkani apisatoö maerekati kamakari misiritiko himarotini ïkapani. Ikara atoko !apakata.

⁷Ininiä iteene hïkerokari, kotxi hanikari hïtari käkiti misiritiko mereëkarimoni. Erecape häuiritiniri hïtari kaminiri maerekati hïtemoni. Erecape häuiritiniri hïtari ïtirïkiniri hïtii. ⁸Txamari hïitriuata. Hïkamari maerekati. Hïtariakorimonira hïkamari ikara. !Apakata. ⁹Kona himarotapanikari atäo minakati kamakani !isari Teoso auïtetxi ininiätaäua? Kona hïteka himisrienetapeua. Ia atoko inakari käkiti !isari Teoso auïtetxi ininiätaäua: maerekati ïtotxi nireëkiti kamakani, kamakori teosonetakani, ïtanoro minakotokatika sirïkakari, kiki sito ininiu nirekakari, kiki äti kikikata sirïkakari. Ninoa !isari Teoso auïtetxi ininiätaäua. ¹⁰Kiïtiririni, kamanarerini, poätakani, äti misäkirepiretakani, kamisirienererini pakini !isari Teoso auïtetxi ininiätaäua. ¹¹Ikara atoko mitxi hïtxaua hïte apanakini. Iuaritika himaerekani makatxakaäkapeka. Teoso kamai hïte inakitiakori hinini. Apiananiri Xesosi kamaerekatai. Erekar Matamatakoti, aTeosone nakiti, iua apaka txïkitakai hïte atäo inakari kamakani hininiu.

Maerekati ïtotxi Nireëkiti

¹²Nota posotari ikinipoko nikamini, txamari kona erekari ikinipoko nikamini. Nota posotari ikinipoko nikamini, txamari kona ninirekari nikamakiti niauïte ininiu. ¹³Nipokori kamaäka tikakotxi ïkapani. Tikakotxi nirekari nipokori. Txamari Teoso xipokariko nipokori, tikakotxi pakini. Teoso !inirekari akaminiri maerekati äito nireëkiti äti käkiti ïtokata. Apiananiri kamari äito iua nireëkiti akamini ïkapani. Äito Apiananiri nakiti.

¹⁴Teoso ökitikari Apiananiri ipïkani sauaki. Iua atokokana iua ökitikaua ate iposotiireë.

¹⁵Ininiä !apakata Kristo ïto hïsikini sito kanokareromoni. !Apakata. ¹⁶Kiki sirïkasaaki kanokarerokata, iusaaki ätinoka ïtotxi atoko itxauana ninoa. Teoso säkire iökatsopatakori säpiretaua:

Kiki sirïkini sitokata, ätika ïtotxi atoko itxauana.

¹⁷Käkiti moianatakasaakiri Apiananiri, ätika xiniretxi atoko itxauana ninoa xinire.

¹⁸Ātokata hĩsirĩkini hinirekasaaki, himitekako. Kona hĩkaikotape iuaã. Apanakini maerekati kãkiti kamakiti !imisiritari hiĩto. Imisiritari hãkixinire. Hĩkamakasaakiri maerekati hiĩto nireẽkiti sitokata, himisiritari hiĩto, hãkixinire pakini. ¹⁹Kona himarotapanikari hiĩto Erekarĩ Matamatakoti misãkiretiko aikoti atoko ininiua? Hĩte iĩtoãkarari iua. Teoso sikari iua hĩtemoni, ininiã hiĩto kona hĩte nakiti. ²⁰Teoso iamotapekai hĩte Xesosi ipĩkasaaki, ininiã hiĩto iĩki auapitika. Ininiã uatxa iua nakiti hitxaua. Ininiã uatxa hiĩtoã hĩpaxitariko Teoso.

Ītanorouatiko Sãkiretxiti

7 ¹Uatxa napakapapiretariko mitxi hiõkatsopatakiti notamoni. !Erekari kiki kaxirotinero sito. ²Txamari inirekasaakiri sitokata isirĩkini, erekari kiki auini iuaka ĩtanorokata. Erekarĩ sito auini oaka õtanirikata. ³Ininiã erekari kiki sikiniri iĩto ĩtanoromoni. Erekarĩ sito sikiniri oĩto oĩtanirimoni. ⁴Ītanorotxi iĩto kona oa nakitinanini. Ōtaniri nakiti apaka oĩto. Apaka ĩtaniritxi iĩto kona iua nakitinanini. Ītanoro nakiti apaka iĩto. ⁵Kona hĩtxape: “Kona ninirekarĩ nisirĩkini pĩtekata,” kona hĩtxape. Hinirekasaakiri nipokori himanikakani Teoso himisãkiretini ĩkapani, atxiĩti iuasaaki !hinirekarĩ hĩsirĩkini hĩtanorokata. Hĩtanoro apaka kona nirekarĩ osirĩkini hĩtekata iuasaaki, Teosonoka hĩxinikini ĩkapani. Ininiã ikara atoko hĩkaminiã erekari, txamari paĩtiki eereka iuaĩkana hĩsirĩkako hĩtanorokata. Ininiã ikara atoko Satanasi kona sikanireõtai maerekati hiĩto nireẽkiti hĩkamini ãto sitokata hĩsirĩkini. ⁶Ikara nota õtãkikai hĩte. Kona nipaniãtai ikara hĩkamini. ⁷Notamoni erekari nota atoko hinini. Iuaritika ikinimane aua Teoso siãkiti iparĩka kamini ĩkapani. Teoso sikari ãti isikakiti ãtimoni. Ātiã isikakiti isika ãtimoni.

⁸Uatxa nimisãkiretanako mĩtanirini, mĩtanoroni, tikinitakoni pakini. Erekarĩ himĩtaniriuatakani, himĩtanorouatakani nota atoko hinini. ⁹Txamari himaposotakaniãri hĩtakanapiniri hiĩto nireẽkiti, erekari hĩtanorouatini, erekari hĩtaniriuatini, kotxi kapatakari atoko itxa hiĩto nireẽkiti.

Hĩkamari Atão Hĩtaniriuatakasaaki

¹⁰Ia nipaniãtana kãkiti ĩtaniriuatakani: !Apakata sito takanapiniri oĩtaniri. Kona notani paniãtai. Apiananirira paniãtai. ¹¹Otakanapiniãri oĩtaniri, !apakata iuaĩkana oĩtaniriuatini. Erekarĩ oĩtanirimoni iuaĩkana okanapiriini. Iua atokotxikana !apakata kiki

takanapiniro ĩtanoro. ¹²Nõtākikari apanakini. Apiananiri paniātakiti apanakini ĩkapani !auari, ininiã nota õtākikana ninoa ia atoko: Xesosi sãkire auiãkari auiniã ĩtanoro Xesosi sãkire mauĩãkato, oa nirekiniãri okaikotini iuakata, !apakata iua iokanatiniro oa otakanapiniri iua. ¹³Iua atokotxikana, Xesosi sãkire auiãkaro auiniã õitaniri Xesosi sãkire mauĩãkati, iua nirekiniãri ikaikotini oakata, !apakata otakanapiniri iua. ¹⁴Iuasaaki ĩtaniritxi Xesosi sãkire mauĩãkati apakapari Teoso sãkire ĩtanoro kamakiti ereka atamatakasaaki. Iua atokotxikana, ĩtanorotxi Xesosi sãkire mauĩãkato apakapari Teoso sãkire õtaniri kamakiti ereka oãtamatakasaaki. Imakamakaniãrina ikara atoko, !erekana imiakori. Irĩtxi, inorotxi pakini kaminiãri nõtākikakiti iaõka, erekana imiakori. ¹⁵Xesosi sãkire mauĩãkati nirekiniãri itakanapiniri ĩtanoro, oa auiritariko isini. Xesosi sãkire mauĩãkato nirekiniãri otakanapiniri õitaniri, iua auiritaroko osini. Ikara atoko ininiã, ninoa sikakapeẽkaika. Ikara atoko ininiã erekari, kotxi Teoso !inirekari anenamauatini ikara xika. ¹⁶Pite ĩtanorotxi, pimarotatari? Atxiĩti pĩtaniri auikari Xesosi sãkire imaerekani makatxakiko ĩkapani, Xesosi sãkire pisãpiretakasaakiri iua. Pite ĩtaniritxi, pimarotatari? Atxiĩti pĩtanoro auikari Xesosi sãkire omaerekani makatxakiko, Xesosi sãkire pisãpiretakasaakiro oa.

Teoso Akiritakasaakiri Kãkiti

¹⁷Ininiã ikininape kamariko iparĩka Teoso sikakiti iuamoni, kotxi Apiananiri akiritaua ikara parĩkatxi akamini. Ikara nipaniãtari ikinimane Teoso mereẽkini apotiitiniãtaãua. ¹⁸Teoso akiritakasaakiri kiki, Teoso takaõtxikare ĩtoã auiniã, !apakata Teoso takaõtxikare makatxakiko. Teoso akiritakasaakiri kiki, Teoso takaõtxikare ĩtoã mauakaniã, !apakata Teoso takaõtxikare ĩtoã takiko. ¹⁹Teoso takaõtxikare hĩtoã auiniã, ikara kona txĩkitakai Teoso anaakori hininiua. Teoso takaõtxikare hĩtoã mauakaniã, ikara apaka kona txĩkitakai Teoso anaakori hininiua. Teoso nireẽkiti iaõka kamiko txĩkitakai Teoso anaakori hininiua. ²⁰Teoso akiritakasaakii, iuasaaki mitxi hĩparĩka hĩkamapanikako. ²¹Teoso akiritakasaakii, nitiritxi amotakori hininiãua, ininiã kona maerekaxinireti hĩtxapeua nitiritxi hininiua xika. Iuaritika hĩauĩte sikakiniãi, ininiã hĩsako. ²²Apiananiri akiritiniãri nitiritxi amotakori, Apiananiri sikakakiti itxaua iua. Apiananiri akiritiniãri nitiritxi minakatiua, Apiananiri nitiri iamotakiti itxaua iua. ²³Xesosi amotakini hĩtxaua, ininiã

iuãkana kãkiti nitiri iamotakoni !hĩtxapeuako. ²⁴Nitariakori, Teoso akiritakasaakii, iusaaki mitxi hĩparĩka hĩkamapanikako.

Mitxitakani, Tikinitakoni Pakini

²⁵Uatxa nõtãkikai hĩte mitxitakani. Apiananiri kona sãpiretano ipaniãtakiti hĩte ĩkapani, iuaritika nisãpiretai nixinikakiti, kotxi Apiananiri amonĩkapekano, ininiã kãkiti posota auikiniri nisãkire. ²⁶Īkorasaaki pamonõkoniri Xesosi sãkire auiãkanimoni, ininiã notamoni apiaerekata kãkiti mĩtanorouatakani. ²⁷Hĩtanorouatapeka hininiã, kona hĩtakanapapero hĩtanoro. Mĩtanorouatakatipanika hininiã, kona hinitapero hĩtanoro. ²⁸Iuaritika hĩtanorouatiniã, maerekati !hĩkama. Kãkiti ĩtanorouatiniã, apokapitikako ninoa maxikiko. Kona ninirekari ikara atoko hĩte ĩkapani.

²⁹Nitariakori, poião õtinoka aua aparĩkauatini Apiananiri ĩkapani. Ininiã hĩte kĩtanororini parĩkauatako Teoso ĩkapani mĩtanoroni parĩkauatini atokotxikana. ³⁰Txiapatakari parĩkauatako Teoso ĩkapani, kãkiti matxiapatakati parĩkauatini atokokana. Poxokori parĩkauatako mapoxokoniti parĩkauatini atokokana. Tiitxi amotakari parĩkauatako Teoso ĩkapani, tiitxi mauakiniti parĩkauatini atokokana. ³¹Īkorapokoriti tiitxi auakini !ixinikapiriko itiina, kotxi ĩkorapokoriti kãkiti potxitakiti xipokaãpota.

³²Ninirekari erekaxinire hinini. Kiki mĩtanoroti posotari ixinikiniri kanatokopa iparĩkauatini Apiananiri ikamapoxokonitini ĩkapani. ³³Txamari kiki kĩtanorori xinikari parĩkatxi ĩkorapokoritikiri, kotxi inirekari ikamapoxokonitiniro ĩtanoro. ³⁴Mĩtanirito, mitxitakaro pakini nirekari oparĩkauatini Apiananiri ĩkapani, kotxi onirekari oĩto, oxinire pakini osikini iuamoni. Txamari sito kĩtaniriro xinikari parĩkatxi ĩkorapokoriti auakari, kotxi onirekari õtaniri okamapoxokonitini. ³⁵Ikara atoko nisãpiretai hĩte, hĩte ereka hinini ĩkapani. Kona ninirekari nimauiritakanii erekari hãpakapini. Ninirekari atãonoka hĩkamini. Ninirekari hĩparĩkauatini Apiananirinoka ĩkapani.

³⁶Ãtokoro iri atxiĩti !auiritapanikaro oa ĩtaniriuatini, txamari oaneẽpeka. Ãtokori nirekiniãri itakiniro oa, erekari iua auiritiniri iua. !Ikamari maerekati. Erekari iua auiritinina ninoa ĩtaniriuatini. ³⁷Atxiĩti ãtokoro iri ãkixinireẽ !nirekaro oa ĩtaniriuatini. Atxiĩti !sikaenetaro oa ãtimoni. Iua xinikakiti omĩtaniriuatakani ĩkapani pataparari ininiã, ãkixinireẽ imarotiniãri inireẽkiti oa mĩtaniriuatakani, ininiã iua kiki kamari erekari. ³⁸Oa sikakari

oĩtaniriuatini ĩkapani kamari erekari. Iuaritika oa masakakati oĩtaniriuatini ĩkapani kamari apiaerekata.

³⁹Teoso paniĀtakiti iōkatsopatakori paniĀtaro sito kaikotini oĩtanirikata iua auapanika inakasaaki. Iua ipininiĀ, apakata oĩtaniriuatini onirekakitikata. Txamari Apiananiri sĀkire auiĀkarikatanoka apakata oĩtaniriuatini. ⁴⁰Notamoni oa apia poxokoniuaata omĩtaniriuatakaniĀ iuaĩkana. Ikara atoko inakari nōtĀkikaro sito, kotxi nimarotari Erekari Matamatakoti Teoso nakiti aua notamoni.

Nipokori Teoso Kamakori Sikiko

8 ¹Uatxa nisĀpiretai nipokori sikiko teoso kĀkiti kamakitimoni. Amakinika aimarotari ikara. Ikara inakari aimarotapeka ate. KĀkiti imaroretxi auiniĀ iuikaua. Apiaerekata kĀkiti auini tiraōkitxi, kotxi isikataparatarari kĀkiti xinire. ²“Kimaroreno nota” inakari !auari imaroretxi. KaiĀopokori imaroretxi imimarotakiniti aua. ³Iuaritika kĀkiti tiretiniĀri Teoso, Teoso imarotari iua.

⁴Maxinikari nipokori teoso kamakorimoni sikakori. Aimarotari teoso kĀkiti kamakiti !kakamareri. Aimarotari Ātika Teoso atĀo inakari aua. ⁵Aua kĀkiti kamakiti. KĀkiti takauĀkatari “teoso” itxaua. KĀkiti takauĀkatari teoso iaxiti auakani, ĩkorapokoriti auakani apaka. KaiĀopokori ikara atoko inakari teosoakori aua. KaiĀopokori ikara atoko inakari auĩtetxiakori aua. ⁶Atemoni Ātika Teoso aua. Iua aĩri iaxitikiri. Iua kamari ikinipoko. Aparĩkauata iuanoka ĩkapani. Ātika aĀuĩte aua, Xesosi Kristo. Ikini sereti kamakari iua. Iua posotiireĕ aĀuini aua.

⁷Apanakini !imarotapanikari kĀkiti kamakiti teoso minakanua, kotxi mitxi iteene itotarina teoso kĀkiti kamakiti. IniniĀ inikasaakirina nipokori teoso kamakorimoni siĀkori, iuĀkatarina ikara nipokori teoso atĀo inakarimoni siĀkori. Iuasaaki ninoa uĀkatari maerekati ikaminina, kotxi Ākixinireĕna liteene imarotarina atĀo inakari. ⁸Txamari nipokori !itxĩkitakaua Teosomoni asini. Ikara nipokori anikini !imisiritaua. Apaka !ikamari ereka anini.

⁹Iuaritika erepaniko. HinirekiniĀri ikara nipokori hinikini, hĩxinikariko apanakini Teoso sĀkire poiĀonoka auiĀkani. Ninoa imarotiniĀri hĩte nikiniri ikara nipokori, ininiĀ ninoa apaka nikari, txamari iuasaaki ninoa kamari Ākixinirena manirekakiniti. ¹⁰Teoso sĀkire poiĀonoka auiĀkari atamatiniĀi Teoso sĀkire iteene imarotakari nikiniri nipokori teoso kamakori misĀkiretiko

aikotiã, isikataparaxiniretari iua apaka nikiniri nipokori teoso kamakorimoni siãkori. ¹¹Ininiã pimarore xika, atxiĩti pitari Teoso sãkire poiãonoka auiãkari sari imisiritikomoni. Kristo ipina iua ãkapani apaka. ¹²Ikara maerekati hĩtarimoni hĩkaminiã, hĩkarotari ãkixinire. Hĩtari ãkixinire hĩkarotakasaaki, hĩkamari maerekati Kristomoni. ¹³Ininiã nipokori ninikini txĩkitakiniãri nitari kaminiri maerekati, itixi auapanika inakasaaki kona ninikaikari iua nipokori, kotxi kona ninirekari nitari kaminiri maerekati.

Teoso Iokanatakini Kãkitimoni

9 ¹Teoso iokanatakiti nitxaua. Ninireẽkiti niposota nikamini. Naõkitapekari Xesosi Kristo aãuĩte. Iparĩka nikamakasaaki, hĩte auikari Apiananiri sãkire. ²Atxiĩti apanakini !auikari Teoso iokanatakiti nininiua. Hĩtera auikari Teoso iokanatakiti nininiua. Hĩtera oerekari Apiananiri iokanatakiti nininiua, kotxi hĩte auikari Apiananiri sãkire, nota sãpiretakasaakii hĩte.

³Kãkiti mauikakaniãri Teoso iokanatakiti nininiua, napakapipiretana ninoa ia atoko: ⁴Apakata atxiĩti aãpakapiniri nipokori, iãriã pakini aparĩkauatini ãkapani? ⁵Apakata atxiĩti ate anikiniro ãtanoro Teoso sãkire auiãkaro atekata, apanakini Teoso iokanatakini, Apiananiri itariakori, Petro pakini anikinina ninoa ãtanoro atoktxikana? ⁶Atxiĩti apakata Panapee, nota pakininoka parĩkauatini anikakiti aãpakapini ãkapani?

⁷Sotato sikasaaki ineenamauatini ãkapani, iuaka liamotari anikakitina. Aua atxiĩti ova takakari. Ova itakakiti matximakati aua? !Auari. Kona auari kema auĩte piratakari ipira tiniã miãtakati.

⁸Ikara nisãkire kona kãkiti sãkirenanini. Iua atoktxikana Teoso sãkire. ⁹Moisesi iõkatsopatapekari Teoso paniãtakiti. Ia atoko itxa:

Kona hiĩtxikari kema auĩte nama trikopani ikamakasaaki.

Hãuiritariko inikini.

Teoso tiretatari kema auĩte? Itiretapitikari. ¹⁰Apiata isãpiretari ikara kãkiti parĩkauatakani ãkapani. Ininiã takarauatakari takarauata, kotxi inirekari ikiena inikini. Kienatxi apakari apari ikiena, kotxi inirekari ikiena inikini. ¹¹Katakareri takarauatini atokokana, ate takari Teoso sãkire hãkixinireẽ. Katakareri nikari ikiena itakakiti, ininiã atxiĩti apakata ate apakapiniri kienatxi hĩte sikakiti? Kotxi ate parĩkauata hĩte ãkapani. ¹²Apakatiniã apanakini apakapiniri iparĩkana ãki hĩte sikakiti, ininiã apiata apakata ate apakapiniri

ate parĩka ĩki, iuaritika kona aamanaãri hĩsikiniãua ate parĩka ĩki. Amĩteenekari ikinipoko, kotxi !anirekari aiotokakiniri Kristo iokanapirena erekari hĩkenakotini. ¹³Himarotari Teoso misãkiretiko aikoti ãki parĩkauatakani iuaãtaã apakapari ikiena. Teosomoni sikakori takikoãtaã parĩkauatakani apaka apakapari ipixini iuaãtaã siãkori inikinina ĩkapani. ¹⁴Iua atokotxikana Apiananiri paniãtari iua iokanapirena erekari sãpiretakani apaka apakapiniri iparĩkana ĩki.

¹⁵Ikara atãopitikara, iuaritika kona nipaniãtai ikara atoko hĩkamini. Kona niõkatsopataru ikara, niparĩka ĩki notamoni hĩsikini ĩkapani. Niparĩka ĩki namanainii apisa erekape nipinini. Niuikari niparĩkauatini hĩte ĩkapani hĩtxineirote nimapakapakanisaaki. ¹⁶Teoso iokanapirena erekari noereka, iuaritika !apakata niuikiniua, kotxi Teoso sikari ia parĩkatxi notamoni. Nimisiritiko auapitika, Teoso iokanapirena erekari nimasãpiretakaniã. ¹⁷Teoso iokanapirena erekari nisãpiretiniãri kãkiti, nãkixinireẽ iteene ninirekiniãri ikara nikamini, ininiã napakapapitikariko niparĩka ĩki. Nimanirekakaniãri ikara nikamini, iuaritika nikamari, kotxi Teoso sikari ikara parĩkatxi notamoni nikamini ĩkapani. ¹⁸Ia atoko niĩkitxitiko: Teoso iokanapirena erekari nisãpiretakasaaki, kona minakati napakapa. Ikara atoko kamapoxokonitari nãkixinire, kotxi maĩkitika nisãpiretai Teoso sãkire. Teoso iokanapirena erekari sãpiretakari nitxaua, ininiã niposotiire auapitika hiĩkitxitinino nota nipaniãtiniã hĩte, iuaritika !nĩnirekari ikara atoko nikamini nota nireẽkiti napakapini ĩkapani.

Parĩkatxi Ikinimane ĩkapani

¹⁹Nĩnireẽkiti nikama. Kãkiti nitiri iamotakori !nitxaua. Iuaritika notaka nitxĩkitakaua ikinimane nitiri nininiua, Teoso sãkire apikomoni kãkiti auikini ĩkapani. ²⁰Xoteoakori sauaki niparĩkauatakasaaki, Xoteo auini atoko nitxa nota auini. Ikara atoko ininiã, Xoteoakori auikari Xesosi sãkire. Moisesi paniãtakiti iaõka kamakani sauaki nauakasaaki, ninoa auini atokokana nitxa nota auini, kotxi ninirekari Moisesi sãkire auĩãkani auikiniri Xesosi sãkire. ²¹Xoteo minakanua !imarotari Moisesi paniãtakiti. Ininiã ninoakata nauakasaaki, kona nipaniãtari Moisesi paniãtakiti ikaminina, Xesosi sãkire auikinina ĩkapani. Iuaritika nikamari Teoso paniãtakiti, kotxi iuatxikana Kristo paniãtakiti nikamini. ²²Kãkiti mataparaxinirenikata nauakasaaki, nota apaka kona kataparaxinireno, Xesosi sãkire auikinina ĩkapani. Ikini kãkiti sauaki nauakasaaki, nikamari kãkiti auini atoko nitxa

nota auini, ininiã ikinipoko niposotakiti nikama apanakini maerekani makatxakiko ĩkapani. ²³Ikara atoko nikama Teoso iokanapirena erekari nisãpiretini ĩkapani. Nikamari ikinipoko, Teoso iokanapirena erekari nisãpiretini ĩkapani. Ikara atoko ininiã, nota apaka apakapari Teoso iokanapirena erekari hĩtekata.

Saporiẽta Apakapakari

²⁴Himarotari mitekatxi. Kãkiti miteẽkani miteka, iuaritika ãtinoka apakapari imitekini ĩki. Merepitipanika mitekatxi mapotõkire apokakarínoka apakapari imitekini ĩki. Ininiã miteẽkari atoko hĩtxako. Hısapitipo. Teoso parĩka hĩkamapitipo hĩparĩka ĩki hãpakapini ĩkapani. ²⁵Ikini miteẽkari parĩkauatapitipo ĩto tapara iteene auini ĩkapani. !Auritari ĩto misiritakari. Ikara atoko ikama, saporĩeta imitekini ĩki apakapini ĩkapani. Ikara saporĩeta kona okanani aua. Oxipokapitikako. Ate parĩkauatapitipo ãtião aãpakapakiti aãpakapini ĩkapani. Ikara aãpakapakiti !ixipoka. ²⁶Miteẽkari isinimoni mimarotakati atoko !nitxaua. Nimarotari nisinimoni. Nisapitipo mitekatxi mapotõkiremoni. Maxikatiũka !nineenamauata. Na neenamauata nisanõkakata. ²⁷Nitxĩkitakari nĩto ninitiri ininiua, nota nireẽkiti ikamini ĩkapani, kotxi nisãpiretapekari ikara apanakinimoni, ininiãkara kona ninirekari nimapakapakaniri notaka parĩka ĩki.

Kãkiti Isaeokini Aõerekini Pirena

10 ¹Nota nirekari hĩxinikiniri kitxakapirĩka, aãtokiriakorini takanapakasaakiri Exito tixini, ikinika ninoa aua katxiãri patapi. Iua katxiãri oerekana isinimonina. Apaka ikinika ninoa napari potxoari uiniti ãki. ²Ninoa sari Moisesikata, ininiã katxiãri patapi auakasaakina, potxoari uiniti patapi auakasaakina, iusaaki ninoa patxisatiko atoko aua iusaaki. ³Ninoa ikinikana nikari xinitxi Teoso iokanatakiti. ⁴Ninoa ikinikana iãtari ãparaã Teoso sikakiti. Ninoa iãtari ãparaã kai auĩteãkiriã. Kristo iua kai auĩte ãparaã potorikiniãtaã atokokana. Iua sari ninoakata. ⁵Txamari Teoso !apokaerekatari kaiãopokori ninoa, ininiã ipinana. Iĩtona iarika ãparaã makipakaniãtaã.

⁶Uatxa axinikana ninoa, ininiã aimarotari amanirekakaniri maerekati ninoa nirekiniri atoko. ⁷!Hĩteosonetapiri kãkiti kamakiti, ninoa apanakini teosonetiniri atokokana, kotxi Teoso sãkire iõkatsopatakori txari:

Ninoa topāka inipokotinina ĩkapani, iātinina ĩkapani, eereka ōkitikauana isarauatinina ĩkapani teoso ikamakitina apisatoō. ⁸!Apakata aanokarauatini ninoa apanakini anokarauatini atoko, kotxi āti ōtinokara vītxi tres mio ninoa okaāka ĩkora maerekati xika. ⁹!Apakata aātamakaerekatini Kristo ninoa apanakini kitxakapirīka atamakaerekatini atoko, kotxi iua xika imini okana ninoa. ¹⁰!Hītsoatape, ninoa apanakini kitxakapirīka tsoatini atokokana, kotxi eereka Teoso nitiri xipokana ninoa.

¹¹Ikara imisiritikona apoka ninoamoni apanakini pinitiko ĩkapani. Ikara imisiritikona iōkatsopataāka ate pinitiko ĩkapani, kotxi itixi mapotōkire ōti apokaāpota. ¹²Hītemoni ereka hinini, ininiā erepaniko, kotxi atxiīti paītiki hīkamari maerekati. ¹³Hīte atamakaerekataāka ikinimane atamakaerekataāka atoktxikana. Iuaritika Teoso ĩtakanapai hīte. Kona iua auiritari hātamakaerekatiko himamīteenekakiniti. Iuasaaki oerekai himitekini, ininiā hīposotari himīteenekini.

Teoso Kākiti Kamakiti

¹⁴Ininiā nitariakori nota tiretakini, himiteka teoso kākiti kamakiti hītakanapini. ¹⁵Hīte kākiti kimarorerini, ininiā iteene himixinikariko nisākire. ¹⁶Iāriā aātakasaaki, akinika aāpotiitakasaakiua, axinikari Xesosi ipinini. Iuasaaki atxari Teoso: “Erekapitikai, kotxi Xesosi arēka xiketa ate ĩkapani.” Amaxiōpekitakasaakiri komiri, anikasaakiri, aāpitiitakasaakiua, axinikari Kristo ĩto noropatiko ate ĩkapani. ¹⁷Iuasaaki itomaneua ate, iuaritika ātika komiri atokokana atxaua. Ātika ĩtotxi atokokana atxaua, kotxi amakinika anikari ātika komiri. Ikara komiri Kristo ĩto atokokana itxaua.

¹⁸Hīxinikanako kākiti Isaeokini ĩkorapokoritikini. Ninoa sikari Teoso xinitxi. Eereka ninoa nikari ikara xinitxi. Inikasaakirina ikara xinitxi, iuasaaki ninoa oerekari ĩTeosonetinirina iua. ¹⁹Kiripa ninireka nisāpiretinii? Nisāpiretari teoso kākiti kamakiti kona kakamareri. Iua teoso siākori kona itxa. ²⁰Iuaritika erepaniko. Ikara atāo maerekati. Xoteo minakanuia sikakiti teoso kākiti kamakitimoni ninoa sika Satanasi nitiriakorimoni. Kona Teoso atāo inakari isikana isiākitina. Ininiā na ninirekari hīte moianatiniri Satanasi nitiriakori. ²¹Kona hīposotari Apiananiri iākoanaā hiātini, apaka Satanasi nitirini iākoanaā hiātini. Kona hīposotari Apiananiri kiena hinikini, apaka Satanasi nitirini kiena hinikini. ²²Atauako anirekatari akaminiri Teoso naiatiniua? Ate tapara apiata atxiīti?

Xesosi Auiākani Kamakiti

²³Nota posotari ikinipoko ninireēkiti nikamini, txamari kona ikinika erekari nikamini. Ikinipoko ninireēkiti niposotapitika nikamini, txamari kona ikinipoko kamari nākixinire aneini.

²⁴!Hinitapiriko hĩteka nireēkiti hāpakapini. Himoianatariko āti iua nireēkiti apakapini.

²⁵Hĩposotari hinikiniri nipokori amotakoriātaā auakari. Iuasaaki kona hĩpimaāpiri: “Ia nipokori sikaākapeka teoso kākiti kamakitimoni?” !hĩtxapeko. Kotxi himarotakasaakiri hinikiniri nipokori teoso kākiti kamakitimoni sikiko, hākixinire karotaāka atxiĩti. ²⁶Teoso sākire sāpiretaua:

Itixi Apiananiri nakiti itxaua, ikinika itixi auakani pakini. ²⁷Xesosi mauĩākani aiatakasaakii hĩte hinipokotini ninoakata, hinirekiniāri hĩsa. Hinikariko isikakitina. Kona hĩpimaāpiri: “Ia nipokori teoso kākiti kamakiti sikaākapeka?” kona hĩtxape, hākixinire himakarotakaniri ĩkapani. ²⁸Txamari apanakini kākiti iuaā sāpiretakasaakii: “Ia nipokori sikaākapeka teoso kākiti kamakitimoni,” itxa. Iuasaaki kona hinikapiri, kotxi atxiĩti hĩkaroxiniretari ikara kākiti mataparaxinireti, kotxi:

Itixi Apiananiri nakiti itxaua, ikinika itixi auakani pakini. ²⁹Na nitxai: “Kona hinikapiri ikara, hĩteka ākixinire himakarotakani ĩkapani,” !nitxai. Nitxai: “!Hinikapiri ikara, āti kākiti ākixinire himakarotakani ĩkapani.” Nota ākixinireē nota nireēkiti nikamini ĩkapani erekari. Āti kākiti ākixinireē nota nirekakiti nikamini ĩkapani !erekari, ininiā iuamoni ikara nikamakasaaki, nikamari maerekati. Kinirepa !apakata nikaminiri nota ākixinire auiritakiti? ³⁰Napakapakasaakiri nipokori, ininiā iuasaaki nimisākiretari Teoso erekari isikakiti. Ininiā kinirepa nimisākirepiretaāka?

³¹Nisāpiretai hĩte. Hinikasaaki, hiatakasaaki, ikinipoko hĩkamakasaaki, hĩkamariko ikinika Teoso ereka inini imarotiko ĩkapani. ³²Kona hĩtxĩkitakapiri, Xoteoakori, Xoteo minakanuia, kākiti Xesosi sākire auiākani pakini kaminiri maerekati.

³³Ninirekari ikinimane kākiti nireēkiti nikamini, ikinika nikamakasaaki. !Ninirekari erekari notanani ĩkapani. Ninirekari erekari itomaneri ĩkapani, imaerekanina Xesosi makatxakini ĩkapani.

Sitoākini Xesosi Sākire Auiākani

11 ¹Hīkamariko nota kamakiti atoko inakari. Kristo kamakiti atoko nota kamini atokotxikana hīkamako. ²Nitariakori, peerekai hīte, kotxi iteene hīxinikano nota. Peerekai hīte, kotxi hīkamapanikari noereēkiti nisāpiretakiti iaōka.

³Ninirekari himarotiniri ia: Kiki auīte Kristo itxaua. Sito auīte kiki itxaua. Kristo auīte Teoso itxaua. ⁴Ininiā kiki ikii māka imamakatxakakaniā Teoso imisākiretakasaaki, apaka Teoso sākire oerekasaaki, kona ipaxitari iauīte Kristo.

⁵Sito okii māka mauakaniā Teoso omisākiretakasaaki, apaka Teoso sākire oerekasaaki, kona opaxitari oāuīte oītaniri. Okii māka omatakakaniā, oa kii kixākakori atoko itxa. ⁶Okii māka omanirekakaniā, ininiā okisauakaiākotaākako. Opētauatiniā, okii kixākiko xika, oiāko kisauakiko xika, ininiā iusaaki okii māka otaka. ⁷Kiki misākiretakasaakiri Teoso, kona erekari itakiniri ikii māka, kotxi Teoso atoko itxa iua. Ikamaāka Teoso ereka oerekini īkapani. Sito kamaāka oītaniri ereka oerekini īkapani. ⁸Merepitipanika Teoso kona kamari kiki sito ītoā. Teoso kamaro sito kiki ītoā. ⁹Kiki kona kamaāka sito īkapani. Sito kamaāka kiki īkapani. ¹⁰Ininiā oa takari okii māka. Ikara atoko ininiā, oerekari oauītetiniri oītaniri. Iusaaki Teoso nitiriakori iaxitikini apaka imarotari oauītetiniri oītaniri.

¹¹Kiki, sito pakini Apiananiri sākire auikasaaki, sito nirekari kiki. Kiki nirekaro sito. !Apakata sitonoka auiniā. !Apakata kikinoka auiniā. ¹²Kotxi sito ina kiki ītoā. Eereka ikinipoko kiki iponaniā sito ītoā. Ikara atoko itxapitikama, Teoso kamari ikinipoko. ¹³Hīteka hīxinikapiretari ia: Sito kii māka mauakaniā, iusaaki atāokani Teoso omisākiretini? ¹⁴Kākiti itotakiti oerekaua kiki ītanoiākori pētatico. ¹⁵Sito auiniā oiāko paītanori, oōuikari oiāko, kotxi oiāko sikaāka okii ipatakari īkapani. ¹⁶Kākiti nirekiniāri ineenamauatini iākotxi pirena xika, ininiā kona ate, ikinika Teoso sākire auiākani pakini !auari ikara. Ininiā !apaniātai ikara atoko inakari hīkamini.

Xesosi Ipinini Xinikiko Kiiniriti

¹⁷Uatxa niōkatsopatakitiā kona niuikai, kotxi hāpotiitakasaakiua, apia erekari kona hīkama. Apiata maerekati hīkama. ¹⁸Merepanika nikenakopiretari hāpotiitakasaakiua Teoso misākiretiko aikotiā

hĩtaparakienatakakiniua. Nixinikari ipixini ikara nikenakopiretakiti atão inini. ¹⁹Apanakini oerekakiti atão minakati auapitika hĩte sauaki. Akenakotakasaakiri ninoa oerekakiti, aimarotari Teoso !apokaerekatana ninoa. Iua apokaerekatana iua sãkire atão inakari oerekakani. ²⁰Hãpotiitakasaakiaua, kona atão hĩkamari kiiniri, Apiananiri ipinini xinikiko kiiniriti. ²¹Kotxi hinikasaaki, himixirikari hĩkiena apanakini nikiniri apisapanika. Ininiã apanakini natxita, apanakini poãta iuasaaki. ²²Auapitika haãpoko hinikini ĩkapani, hiãtini ĩkapani. Hãpotiitakasaakiaua, homanatarari apanakini Xesosi sãkire auĩãkani. Hĩkamapẽtatari aĩtariakori matiini. Kiripa nitxai hĩte? Atxiĩti hinirekari niuikini? Kona xatiki niuikai hĩte.

²³Apiananiri sãpiretakiti notamoni, iua atokotxikana nisãpiretapekai hĩte. Ia nisãpiretai: ĩkanõka Apiananiri Xesosi mĩkapiritiko õtisaaki, iua kosekari komiri. ²⁴Iuasaaki imisãkiretari Teoso: “Erekapitikari ia komiri pisikakiti atemoni,” itxa. Iposo atoko imaxiõpekarari iua komiri, sika itxari imoianariakorimoni. Itxana: “Apakapa, nika hĩtxako. Ia niĩto okaãka hĩte ĩkapani. Ia komiri hinikasaaki, hĩxinikanoko nota. Hĩxinikari nipinini hĩte ĩkapani,” itxa. ²⁵Ninoa nipokotaka atoko, mitxi komiri ikosekini atokokana, ikosekari iãkoanatxi. Iuasaaki itxana: “Ia iãkoanatxi oerekari Teoso kamapekarari ikamaenetakiti amaneri, kotxi niarẽka xiketa hĩte ĩkapani. Ia iãriã hiãtakasaaki, hĩxinikanoko nota. Hĩxinikariko nipinini hĩte ĩkapani,” itxa Xesosi.

²⁶Ia komiri hinikasaaki, ia iãkoanatxiãkiri hiãtakasaaki, hõerekari Apiananiri ipinini kãkiti ĩkapani. Ikara hõerekiniritika iua ĩkorapokoriti kanapiriãko.

²⁷Maxikatiĩka kãkiti nikiniãri ia komiri, maxikatiĩka iãtiniãri Apiananiri iãkoanaãkiri, ikamari maerekati, kotxi !ipaxitarari Apiananiri ĩto, iarẽka pakini. ²⁸Ia komiri hinikini apisapanika, ia iãkoanatxiãkiri hiãtini apisapanika, erekari hĩxinikiniri hãkixinireẽ auakari. Maerekati auakasaaki, hamanaãri Teoso imaktxakiniri ĩkapani. Eereka ia komiri hinika, ia iãriã hiãta. ²⁹Maxikatiĩka hinikiniãri, hiãtiniãri, ininiã hĩteka akiritari himisiritiko apokini, kotxi kona hĩpaxitarari Apiananiri ĩto. ³⁰Ikara xika itomaneri hĩte sauaki iõkapeta. Ikara xika apanakini amianata. Ikara xika apanakini ipĩpeka.

³¹Amaerekani anitiniã, aamanainiãri Teoso makatxakiniri amaerekani, ininiã amisiritiko kona apoka. ³²Txamarari Apiananiri apokiniãri amaerekani, imisiritaua ate uatxa, amaerekani atakanapini ĩkapani, ininiã eereka !imisiritaikaua iua sãkire mauĩãkanikata.

³³Ininiã nitariakori, hãpotiitakasaakiua Xesosi ipinini xinikiko kiiniriti ĩkapani, hiãtapana apanakini. ³⁴Hinatxitiniã, hinipokotako hãapoko. Ininiã hãpotiitakasaakiua !hĩkamari maerekati, ininiã Teoso !imisiritai. Apikomoni nõtãkikai ereẽ napokasaaki.

Erekari Matamatakoti Sikakiti Kãkitimoni

12 ¹Nitariakori, ninirekari himarotiniri Erekari Matamatakoti sikakiti. !Apakata himimarotakaniri. ²Mitxi Xesosi sãkire mauĩãkani hinakasaakiua, himisirienetaãka, ininiã hãuikari teoso kamakori masãkireti teoso atão inakari ininiuua. Ikara himarotape. ³Kãkiti sãpiretiniãĩ hĩte: “Maerekati kamakari itxaua Xesosi,” ininiã iuasaaki himarotari Erekari Matamatakoti !auari iuamoni. Kãkiti sãpiretiniãĩ hĩte: “Apiananiri itxaua Xesosi,” ininiã iuasaaki himarotari Erekari Matamatakoti auapitika iuamoni, kotxi ikara iua oerekakiti.

⁴Erekari Matamatakoti siãkiti ikini sereti aua, iuaritika Erekari Matamatakoti ãtinoka aua. ⁵Ikini sereti parĩkatxi Teoso ĩkapani aua, iuaritika Apiananiri ãtinoka aua. ⁶Ikini sereti Teoso kamakiti aua kãkiti ĩkapani, iuaritika Teoso ãtinoka aua.

⁷Erekari Matamatakoti iuaka oerekaua kãkitimoni, ikinimane ereka inini ĩkapani. ⁸Iua Erekari Matamatakoti sikari apanakinimoni isãkire kiĩkiterini ininiuana ĩkapani. Iua Erekari Matamatakoti sikari apanakinimoni isãkire kimarorerini ininiuana ĩkapani. ⁹Iua sikari apanakinimoni Teoso sãkire iteene auikinina ĩkapani. Isikari apanakinimoni amianatakani imakananitinina ĩkapani. Erekari Matamatakoti ãtinoka aua, iuaritika ikini sereti isika kãkitimoni. ¹⁰Apanakini isikaposotiireta posotiiretxi ikaminina ĩkapani. Apanakini isikaimaroreta Teoso sãkire isãpiretinina ĩkapani. Apanakini isikaimaroreta Erekari Matamatakoti sãkirauatakasaaki imarotinina ĩkapani, maerekati matamatakoti sãkirauatakasaaki imarotinina ĩkapani apaka. Apanakini isikaimaroreta ikini sereti kãkiti sãkire isãkiretinina. Apanakini isikaimaroreta ikara sãkiretxi mimarotakoti ikenakotakasaakina, isãpiretinirina iua kenakotakani ninoa sãkireẽ ninoa apaka imarotiniri ĩkapani. ¹¹Ãtinoka Erekari Matamatakoti aua. Iuanokara parĩkauata ikara atoko. Isikari ikara isikakiti kãkitimoni inireẽkiti iaõka.

Kristo Ĩto Pirena

12Kākiti ĩto ātinoka aua, iuaritika aua ikii, ikanoke, iuako, itapike, ikiti, txaāpota. Itori ikara atoko inakari aua ĩtotxiā, iuaritika ātinoka ĩtotxi aua. Iua atokokana itxa Kristo ĩto. Xesosi sākire auiākani Kristo ĩto atoko itxauana. 13Atxiĩti Xoteoakori atxaua. Atxiĩti Xoteo minakaniua atxaua. Atxiĩti nitiritxi amotakoni atxaua. Atxiĩti nitiritxi minakatiua atxaua. Iuaritika ātika ĩtotxi atoko atxaua, kotxi Erekarĩ Matamatakoti ātinoka inakari apoka atemoni. Iua apotiitaua ātika ĩtotxi atoko anini ĩkapani. Iua aua aākixinireē.

14Kākiti ĩto ātinoka aua, iuaritika aua ikii, ikanoke, iuako, itapike, ikiti, txaāpota. ĩtotxiā kaiāopokori aua. 15Ininiā !apakata kitĩtxi sāpiretiniā: “Uakōtxi !nitxaua, ininiā ĩtotxiā auakari !nitxaua.” Ikara atoko isāpiretiniā, iuaritika ĩtotxiā auakaripitikara kitĩtxi. 16Kenakokitxi sāpiretiniāri: “Okĩtxi !nitxaua, ininiā ĩtotxiā auakari !nitxaua.” Ikara atoko isāpiretiniā, iuaritika ĩtotxiā auakaripitikara kenakokitxi. 17Ĩtotxi okĩtxinoka auiniā, kanatokopa itxa kākiti kenakorauatini? ĩtotxi kenakokitxinoka auiniā, kanatokopa itxa kākiti imixikarauatini? 18Teoso kamari ikinika ĩtotxiā auakari. Iua inireēkiti iaōka ikaminana ninoa. 19Ātinoka ĩtotxi auakiti auiniā, ĩtotxi !auari. 20Ĩtotxiā auakani itori aua, iuaritika ĩtotxi ātinoka aua.

21Okĩtxi kona posotari isāpiretiniri uakōtxi: “Kona nota nirekai pite.” Apaka kiĩtxi kona posotari isāpiretiniri kitĩtxi: “Kona nota nirekai pite.” 22Kona ikara atoko itxa. Atxiĩti auākatari āti aĩto auakari !itxa, kotxi !kataparari, iuaritika ikara mauakaniā, aĩto !iparĩkauata atāo. 23Kākiti turetari iĩtoā auakari poiāori kākiti atamatakiti. Ipatari apanakini iĩtoā auakari kākiti matamatakani ĩkapani. 24Aĩtoā auakari apiata apotxitakiti aua apaka. Kona apatari ikara. Apanakini aĩtoā auakari Teoso takari aĩtoā iteene apaxitini ĩkapani. 25Ininiā Teoso kamari ĩtotxi ātinoka inini. Ikamari ĩtotxiā auakani itiretakiniuana ĩkapani. Apanakini ĩtotxiā auakari naiatiniāri apanakini ĩtoā auakari, !apakata. 26Āti ĩtotxiā auakari tsiika. Iuasaaki ikinika kākiti ĩto atatsiirauata. Āti ĩtotxiā auakari iuikaāka, ininiā ikinika ĩtotxi auakini poxokoniuata.

27Kristo ĩto atoko hĩtxaua hĩte. ĩtotxiā auakani atoko hĩtxaua Kristo ĩtoā. 28Teoso sākire auiākani ĩtotxiā auakani atoko itxauana. Ikini sereti parĩkatxi aua ĩtotxi ĩkapani akamini ĩkapani. Merepanika Teoso mereēri iua iokanatakini. Eereka imereēri kākiti Teoso sākire sāpiretakani.

Eereka imereēri kākiti Teoso sākire oereēkani. Eereka imereēri kākiti Teoso posotiire oereēkani, amianatakani makananitakani, kākiti moianatakani, auītetxiakori, kākiti sākire apanakini mimarotakinini sākiretakani pakini. Teoso takari ikara atoko inakani parīkauatakani iua sākire auiākani imoianatinina īkapani. ²⁹Kona ikinimaneni Teoso iokanatakini txaua. Kona ikinimaneni Teoso sākire sāpiretakani txaua. Kona ikinimaneni Teoso posotiire oereēkani txaua. ³⁰Kona ikinimaneni amianatakani makananitakani txaua. Kona ikinimaneni imarotari isākiretiniri kākiti sākire apanakini mimarotakinini. Ikinimane liposotari isāpiretiniri ikara sākiretxi iua kenakotakanimoni ninoa sākireē ninoa apaka imarotini īkapani. ³¹Auapitika ikara Erekarī Matamatakoti sikakiti aparīkauatini īkapani. Iuaritika hinirekariko isikakiti apiaerekatakari. Uatxa noerekaiko isikakiti apiaerekatakari.

Tiraōkitxi Pirena

13 ¹Atxiīti nimarotari ikini uāka sākire nisākiretini. Atxiīti nimarotari Teoso nitiriakori iaxitikini sākire nisākiretini, txamari iuasaaki nitiraōkiuatini !auari, ininiā !apakata nimarore. Metao āsokiko ene atoko nitxa. Ipi panera tore āsokiko ene atoko nitxa. ²Atxiīti nimarotari Teoso sākire nisāpiretini. Atxiīti nimarotari ikinipoko apanakini mimarotakinini. Atxiīti ikinipoko imaroretxi aua notamoni. Atxiīti iteene nauikari Teoso posotiire, ininiā niposotari ōtanoxiratarī nīpaniātini ātiātaā isini. Txamari iuasaaki nitiraōkiuatini !auari, ininiā minakati nitxaua. ³Atxiīti nisikari ikinipoko nitii, nitxineirote pakini matxineirotenimoni. Atxiīti nauritari niīto arikiko. Txamari iuasaaki nitiraōkiuatini !auari, ininiā !apakata.

⁴Pitiraōkiuatakasaaki, piposotari piātapiniri pinirekakiti apokini. Pitiraōkiuatakasaaki, pikamari erekarī ātimoni. Pitiraōkiuatakasaaki, kona pixikotari āti. Pitiraōkiuatakasaaki, kona pisāpiretari apanakini piuikiniri pikamakiti. Pitiraōkiuatakasaaki, !piuikaua. ⁵Pitiraōkiuatakasaaki, kona pitxīkitakari āti pētauatini. Pitiraōkiuatakasaaki, kona pinirekarī piteka nireēkitinani. Pitiraōkiuatakasaaki, !katimari pomanākarauatini. Pitiraōkiuatakasaaki, !pixinikapinikari maerekati apanakini kamakiti pitemoni. ⁶Pitiraōkiuatakasaaki, kona pipoxokoniua āti kamakasaakiri maerekati. Pitiraōkiuatakasaaki, pipoxokoniua atāo inakari pikenakotakasaaki. ⁷Pitiraōkiuatakasaaki, pimīteenekari ikinipoko. Pitiraōkiuatakasaaki, pauikari kākiti sākire. Pitiraōkiuatakasaaki,

pauikari kãkiti kamaenetakiti ikamini. Pitiraõkiuatakasaaki, !katimari pítakanapiniri piparĩka pikamini. ⁸Tiraõkitxi !ixipoka. Txamari kãkiti sãpiretakiti xipokapitikako. Kãkiti sãkiretiniri ãti uãka sãkire xipokapitikako. Kãkiti imarore ereẽkokapitikako. ⁹Kotxi poiãonoka aimarore. Poiãonoka Teoso sãkire aimarota asãpiretini. ¹⁰Ãti õti aimarotari ikinipoko atão inakari. Iuasaaki atão minakati !lauaika. ¹¹Amarini ninakasaakiua, nisãkirauata amarini sãkirauatini atokokana. Iuasaaki nimarotakiti amarini imarotakiti atoko itxa. Nixinikakiti amarini xinikakiti atoko itxa iuasaaki. Txamari kikipe ninakasaakiua, !ninarekaikari amarini atokokana nininiua. ¹²Uatxa aãtamatakiti Teoso oerekakiti !aposota iteene aãtamatini. Åtakaãri katxikoroã atamatakori atoko itxa aãtamatakiti, Teoso oerekakiti. Åti õti Teoso apisatoõ aãpoka. Uatxa poiãonoka nimarota. Åti õti Teoso apisatoõ aãpokasaaki, nimarotari ikinipoko, Teoso imarotinino atokokana.

¹³Ininiã aua ipi ãti pakini erekari aãkixinireẽ auakari. Aua Teoso sãkire auikiko. Aua Teoso kamaenetakiti ikamini auikiko. Aua tiraõkitxi. Ikara tiraõkitxi apiaerekatakari.

Erekari Matamatakoti Siãkiti

14 ¹Ininiã ikiniõtika hĩtiraõkiuatako. Hinirekariko Erekari Matamatakoti siãkiti. Apiata hinirekariko iua sikinii Teoso iokanapirena hĩsãpiretini. ²Kãkiti sãkire mimarotakoti sãkiretakari misãkiretari Teoso. !Imisãkiretari kãkiti, kotxi kãkiti !imarotari isãkire. Erekari Matamatakoti posotiireẽ isãpiretari atão inakari Teoso oerekakiti. ³Teoso sãkire sãpiretakaripekana misãkiretari kãkiti. Iua txĩkitakari kãkiti apiata auikiniri Teoso sãkire. Isikataparaxiniretana ninoa. Imĩkapiritari ninoa ãkixinire. ⁴Kãkiti sãkire mimarotakoti sãkiretakari, iua txĩkitakaua apiata auikiniri Teoso sãkire. Teoso sãkire sãpiretakaripekana, txĩkitakari ikinika Xesosi sãkire auĩãkani apiata auikinirina Teoso sãkire. ⁵Erekari hĩte hĩkinika sãkiretiniri kãkiti sãkire mimarotakoti. Iuaritika apiaerekata hĩsãpiretiniri Teoso sãkire, kotxi Teoso sãkire sãpiretakari apiari itxaua. Kãkiti sãkire mimarotakoti sãkiretakari poiãori itxaua. Iua sãpiretiniãri isãkire kenakotakani ninoa sãkireẽ ninoa apaka imarotiniri ĩkapani, iuasaaki erekari, kotxi iuasaaki itxĩkitakari Xesosi sãkire auĩãkani apiata auikiniri Teoso sãkire. ⁶Hĩtemoni napokasaaki, nisãkiretiniãri kãkiti sãkire mimarotakoti, nitxĩkitakatai hĩte apiata hãuikiniri Teoso sãkire? Konapitini. Ininiã kona itxa. Noerekiniãi Teoso oereẽkiti notamoni,

nisãpiretiniã Teoso imarore, nisãpiretiniã Teoso sãkire, noerekiniã Teoso sãkire atão hãuikini ìkapani, iusaaki nitxìkitakai hìte apiata hãuikiniri Teoso sãkire. ⁷Maxinikari xikari moianatakari atxiiti viorão, atxiiti xõkakori pakini. Kãkiti mimatireni kaminiãri ikara, iusaaki xikari atão inakari ìmarotaãka. Ienenoka aua.

⁸Ãtipekana noerekai. Trõpetã ene atão ininiã, sotatoakori kenakotakasaakiri, aiamatana ineenamauatini ìkapani. Trõpetã ene na atão ininiã, sotatoakori ìmarotari neenamãtxi manãpipe inini.

⁹Iua atokokana kãkiti sãkire imarotakiti himasãkiretakaniã, kiriãpa ninoa imarotari hīsãpiretakiti? Ikara atoko hīsãkirauatiniã, maxikatĩka hīsãkirauata. ¹⁰Itori uãkati sãkire aua ikini itixiti. Apakata ikinika imarotiko. ¹¹Kãkiti sãkire nimimarotakaniã, ininiã notamoni iua ãti tixinikiri atoko itxa. Apaka iuamoni nota ãti tixinikiri atoko nitxa. ¹²Hìte iteene nirekari Erekarì Matamatakoti siãkiti hãpakapini, ininiã apiata hinirekariko isikinii isikakiti Teoso sãkire auiãkani iua sãkire iteene auikinina ìkapani.

¹³Ikara atoko ininiã, erekari kãkiti sãkire mimarotakoti sãkiretakari amanainiri Teoso isikaimaroretiniri iua sãpiretiniri isãkire kenakotakani ninoa sãkireẽ ninoa apaka imarotiniri ìkapani. ¹⁴Teoso nimisãkiretiniã kãkiti sãkire mimarotakotiã, nixinire misãkiretari Teoso, txamari ìmarotari notaka sãkire. ¹⁵Ininiã kipa atão nikamini? Ia atão: Nimisãkiretari Teoso nixinireẽ. Apaka nimisãkiretari Teoso niĩkiteẽ. Nixikarauata nixinireẽ. Apaka nixikarauata niĩkiteẽ. ¹⁶Kãkiti sãkire mimarotakotiã hīsãpiretiniãri Teoso ereka inini, kãkiti ereẽ pisãkire mimarotakani sauaki, ìposotari “atãopitikara” inini, kotxi ìmarotari pisãpiretakiti. ¹⁷Atxiiti atão hīsãpiretiniri Teoso ereka inini, txamari iusaaki kona pitxìkitakari iua kãkiti apiata auikiniri Teoso sãkire.

¹⁸Peerekari Teoso, kotxi apiata isikaimaroretano nota nimisãkiretiniri iua kãkiti sãkire mimarotakotiã. Poiãonoka hìte imarotari kãkiti sãkire mimarotakotiã himisãkiretiniri iua. ¹⁹Iuaritika, Xesosi sãkire auiãkanikata nauakasaaki, apiaerekata nisãpiretinina sikonoka sãkiretxi ninoaka sãkireẽ, kotxi apakata ninoa imarotiniri nisãkire. Nipositiniãri siko mio sãkiretxi kãkiti sãkire mimarotakotiã nisãpiretiniri kãkiti, itori nisãkire, iuaritika maxikatĩka nisãkirauata, kotxi kãkiti ìmarotari.

²⁰Nitariakori, ìpakata himarore amarini xãpitikiri imarore atokokana inini. Iuaritika amarini xãpitikiri makamakaniri maerekati ãtimoni, iua atokotxikana amarini xãpitikiri atoko

lhĩkamapiri maerekati ātimoni. Aneēkari imarore atoko itxako hĩte imarore. ²¹Teoso sākire iōkatsopatakori txari:

Niokanatarĩ āti uāka hĩtemoni, hĩte nimisākiretini ĩkapani.

Āti tixinikini sākireē nimisākiretai hĩte. Iuaritika kona hĩkĩpitari nisākire,

itxa Apiananiri.

²²Ininiā Teoso sākire auiākari sākiretiniāri Teoso sākire mauĩākani sākire, iua mimarotakinĩti, Teoso sākire mauĩākani iuasaaki imarotari Teoso posotiire. Teoso sākire auiākari sāpiretiniāri Teoso sākire apanakini Teoso sākire auiākanimoni, ninoa iuasaaki imarotari Teoso posotiire. ²³Teoso sākire auiākanĩ apotiitiniāua, ikinimane sākiretiniāri kākiti sākire mimarotakotinani, iuasaaki kākiti Teoso sākire poiāopanika imarotakari ĩroiniā, Teoso sākire mauĩākati atxiĩti ĩroiniā, ininiā iua uākatai hĩte mapitxiritakani hininiua.

²⁴Txamari ikinimane sāpiretiniāri Teoso sākire iuasaaki, Teoso sākire mauĩākati ĩroiniā, kākiti Teoso sākire poiāopanika imarotakari ĩroiniā, ininiā iua imarotari maerekati kamakari ininiua. Iuasaaki imarotari imisiritiko auapitika āti ōti. ²⁵Iuasaaki ikinimane imarotari iua xinikakiti ākixinireē. Ininiā iuasaaki ikapotoreēkaua Teoso apisatoō. Itxari: “Ātāopitikara Teoso aua hĩte sauaki,” itxa.

Kākiti Apotiitakasaakiua

Teoso Apisatoō

²⁶Nitariakori, kanatokopa itxa Teoso sākire auiākani apotiitakasaakiua? Aāpotiitakasaakiua, akinika aminari xikari Teoso ĩkapani. Akinika iposope Teoso sākire aōerekini atāo aimarotini ĩkapani. Akinika iposope Teoso oerekakiti asāpiretini. Akinika iposope kākiti sākire mimarotakoti asākiretini. Akinika iposope iua sāpiretakiti asāpiretini ikinimane imarotiniri ĩkapani. Ikara atoko itxa aāpotiitakasaakiua Teoso apisatoō. Iuasaaki makamari ikinika, Teoso sākire Teoso nakitiakori apiata auikini ĩkapani. ²⁷Iuasaaki kākiti sākiretiniāri kākiti sākire mimarotakoti, ipinoka kākiti kamari ikara atoko inakari, atxiĩti ipi āti pakini kamari ikara atoko inakari. !Apakata apikomoni kākiti sākiretiniri kākiti sākire mimarotakoti iuasaaki. Āti sākirauatakasaaki, apanakini kenakotari. Ātinoka sākirauata iuasaaki. Isākirauataka atoko, āti sāpiretari isāpiretakiti isākire mimarotakani sākireē, isāpiretakiti imarotinina ĩkapani. ²⁸Iuasaaki

isãkire sãpiretakari mauakaniã, !apakata kãkiti sãkire mimarotakoti sãkiretakari sãkirauatini. Erekarĩ ãkixinireẽ isãkirauatini Teosokata.

²⁹Kãkiti apotiitakasaakia Teoso apisatoõ, iuasaaki ipi, atxiĩti ipi ãti pakini Teoso sãkire sãpiretakani sãpiretariko Teoso sãkire. Iuasaaki apanakini xinikariko iua sãpiretakiti, atão inini imarotini ĩkapani. ³⁰Topãkakari xinikasaakiri apikomoni Teoso oerekakiti, ininiã iuasaaki sãkirauatakari iotoka, Teoso oerekakiti topãkakari sãpiretini ĩkapani. ³¹Ikara atoko ininiã ikinimane posotari Teoso sãkire isãpiretinina. Teoso sãkire sãpiretakani ãti sãkirauata, eereka ãti sãkirauata. Ikara atoko itxaãpotana. Ininiã ikinimane oerekaãkako. Ikinimane sikataparaxiniretaãkako. ³²Teoso sãkire sãpiretakani posotari iãtapiniri Teoso oerekakiti isãpiretini ĩkapani. ³³Kotxi Teoso kona potxitari ienenoka auini. !Apakata kaiãopokori sãkirauatini, kotxi apanakini !imarotari ninoa sãpiretakiti. Neenamtxi atoko itxa. Teoso nirekari inakitiakori kamakiti atão inini apotiitakasaakia iua apisatoõ.

³⁴!Apakata sito sãkirauatini hãpotiitakasaakia Teoso apisatoõ. !Auritaãka osãkirauatini iuasaaki, kotxi Teoso sãkire iõkatsopatakori paniãtaro sito kaminiri kiki paniãtakiti. ³⁵Ninoa nirekiniãri ipimarauatinina imimarotakinini imarotinina ĩkapani, ininiã ninoa pimaãna ĩtanirina aapokona apokasaakina. Sito sãkirauatiniã kãkiti apotiitakasaakia Teoso apisatoõ, kãkiti pẽtauata oa sãkirauatini xika.

³⁶Hĩte kona apokaerekatatarĩ nisãpiretakiti? Atxiĩti hĩte kamari Teoso sãkire? Konapitini. Atxiĩti Teoso sãkire iokanataãka hĩtenanimoni? Konapitini.

³⁷Teoso sãkire sãpiretakani hininiãua, Erekarĩ Matamatakoti siãkiti auiniãi, ininiã iuasaaki himarotari ikara nisãkire niõkatsopatakiti Apiananiri paniãtakiti inini. Hĩsãpiretariko hãuikiniri ikara. ³⁸Himamaãkatakaniãri ikara nisãkire, apanakini ĩmaãkatari hĩte sãkire.

³⁹Ininiã nitariakori, iteene hinirekariko Teoso sãkire hĩsãpiretini. Apaka hãuiritariko kãkiti sãkire mimarotakoti sãkiretiko. ⁴⁰Ininiã hĩkamariko ikinika atão hãpotiitakasaakia Teoso apisatoõ, Teoso sãkire ikinimane kenakotini ĩkapani.

Xesosi Őkitikiniua Pirena

15 ¹Nitariakori, uatxa iuaĩkana ninirekari hĩte xinikiniri Teoso iokanapirena erekari hĩtemoni nisãpiretakiti. Hĩte

apakapapekari ikara nisāpiretakiti. Hĩte iteene auikari ikara. ²Ikara Teoso iokanapirena erekari oerekai himaerekani makatxakiko. Ininiā atāo hĩxinikariko ikara nisāpiretakiti. Itene hāuikiniāri Teoso iokanapirena erekari, himaerekani makatxakaāka. Atāo minakati hāuikiniā, ininiā maxikatiĩka hāuikari.

³Nisāpiretapekai mitxi nota apakapakiti, kotxi ia himimarotakaniā lapakata. Ia napakapakiti: Kristo ipina amaerekani imakatxakini ĩkapani. Teoso sākire iōkatsopatakori sāpiretaua ikara. ⁴Eereka ikataāka. Ipi ōti, āti ōtisaaki iuaĩkana ōkitikaua. Teoso sākire iōkatsopatakori sāpiretaua ikara. ⁵Eereka Petro atamatari iua. Eereka ikinika Kristo moianariakori atamatari iua. ⁶Eereka kiētosi aĩtariakori atamatari iua āti ōti apotiitakasaakiuana. Kaiāopanikani ninoa auapanika. Ātikaka ipĩpe. ⁷Eereka Txiako atamatari iua. Eereka ikinika Xesosi iokanatakini atamatari iua. ⁸Imapotōkire nota apaka atamatari iua. !Natamatari Xesosi ĩkorapokoriti itĩpokotakasaaki. Eereka iua apoka notamoni.

⁹Xesosi iokanatakiti poiāori nitxaua. Apanakini iua iokanatakini apiata. Mitxi !erekari nikamakiti, kotxi nimisiritana Xesosi sākire auiākani Teoso nakitiakori, iuaritika Xesosi akiritano iua iokanatakiti nininiua. ¹⁰Teoso sikari ikinipoko erekari notamoni, ininiākara iua iokanatakiti kākitimoni nitxaua. Kona maxikatiĩkani isikari ikinipoko erekari notamoni, kotxi iteene niparĩkauata Teoso ĩkapani. Apanakini Xesosi iokanatakini iteene parĩkauata, iuaritika nota parĩkauata apiata. Kona nota posotiireēni niparĩkauata. Ikinipoko erekari Teoso sikakiti notamoni sikaposotiiretano nota niparĩkauatini ĩkapani. ¹¹Atxiĩti nota sāpiretai ikara Kristo sāpiretakiti. Atxiĩti apanakini iua iokanatakini sāpiretai. Ikara Kristo sāpiretakiti ate sāpiretai. Ikara Kristo sāpiretakiti hĩte auika.

Ipĩkani Ōkitikiko Pirena

¹²Ate sāpiretai Kristo iuaĩkana ōkitikiniua. Ininiā kinirepa ātikaka hĩte txari ia? “!Auari ipĩkani iuaĩkana ōkitikiniua,” hĩtxa. ¹³Ipĩkani iuaĩkana ōkitikiniua mauakaniā, ininiā Kristo apaka kona ōkitikaua. ¹⁴Kristo mōkitikakaniāua, ininiā maxikatiĩka asāpiretai iua sākire. Kristo mōkitikakaniāua, maxikatiĩka hāuikari iua sākire. ¹⁵Kristo mōkitikakaniāua, na atāo asāpiretai Teoso kamakiti, kotxi ate sāpiretapekai iua ōkitikiniri Kristo. Ipĩkani iuaĩkana ōkitikiko mauakaniā, Teoso kona ōkitikari Kristo. ¹⁶Kotxi ipĩkani iuaĩkana mōkitikakaniāua, Kristo apaka kona ōkitikaua.

17Kristo iuaĩkana mōkitikakaniāua, maxikatiĩka hāuikari iua sākire, kotxi limaktxakari himaerekani. 18Kristo iuaĩkana mōkitikakaniāua, ipĩkani iua sākire auiaĩkani pĩpinanaka. 19Xesosi mōkitikakaniāua, iuaritika ikiniōtika ate auikari iua sākire ĩkorapokoriti aāuakasaaki, ininiā miĩkiteni apiarini atxaua ate.

20Ikara na atão. Uatxa maxinikari atão inakari. Kristo ipĩkaripeka ōkitikapeēkaika. Iua amātiiri merepitipanika auakari atoko itxa. Iua merepanika ōkitikaua, ininiākara aimarotari apĩkasaaki ate apaka ōkitikaua. 21Āti kiki kamakitiā ipĩkitxi apoka ikinimanemoni. Iua atokokana āti kiki kamakitiā, ipĩkani ōkitikiko apoka. 22Adão kamakitiā ikinimane ipina. Kristo kamakitiā iua sākire auiaĩkani auapininiika ātipirika. 23Kākiti ōkitikaāka ia atoko. Kristo mitxi ōkitikaua. Iua merepanika ōkitikakariua. Ikanapiriākasaaki iua nakitiakori ōkitikauako apaka. 24Eereka itixi xipokaāka. Iuasaaki ikinika auĩtetxi maerekati, ikinika kaposotiireri maerekati pakini ixipokako. Eereka ikinika iua nakitiakori isika iri Teosomoni. 25Kristo ikinimane auĩte itxauako. Iuasaaki ixipokari ikinika imokaiakari posotiire, kotxi ikiti patapi itakana ninoa. 26Imokaiakari atoko itxa ipĩkitxi. Imokaiakariakori ixipokasaaki, imapotōkire ixipokari ipĩkitxi. 27Teoso sākire iōkatsopatakori txari: Teoso takapekari ikinika iua kiti patapi.

Ikara Teoso sākireē “ikinika” aua, iuaritika aimarotari iuaka litakaua Xesosi kiti patapi, kotxi Teosora txĩkitakari Xesosi ikinimane auĩte ininiua. 28Kristo ikinimane auĩte inakasaakiua, iua Teoso ākiri auĩtetariko Teoso, kotxi mitxi Teoso txĩkitakari iua ikinimane auĩte ininiua. Iuasaaki Teosonoka ikinimane auĩte itxaua.

29Ipĩkani mōkitikakaniāua, kinirepa apanakini patxisataāka ipĩkani ōkitikiniua ĩkapani? 30Atepekana, ipĩkani mōkitikakaniāua, kinirepa ikiniōtika amĩteenekari monōkori? 31Nitariakori, nimarotari ipĩkitxi monōkori ikiniōtika. Ikara nisāpiretai, kotxi niuikai hĩte. Niuikari aāuini aāuĩte Kristo Xesosikata. 32Uai Épeso sitatxitiā kākiti ākiti kaneenamari atoko inakani nirekari imaĩkinino nota. Ipĩkani mōkitikakaniāua, kinirepa nimĩteenekari ikara atoko inakari? Ipĩkani mōkitikakaniāua, ininiā atxari:

Manipokota, maiāta, kotxi katana apinako.

33Kona hāuiritapiri āti misirienetini. Kākiti erekari moianatiniāri maerekati kamakani, ninoa txĩkitakari iua maerekati kamakari ininiua. 34Himerekako. Himarotariko atão inakari hĩkamini ĩkapani.

Maerekati !hĩkamapinikako. Hĩpẽtauatako, kotxi apanakini hĩte limarotari Teoso.

Kākiti Ĩto Ōkitikasaakia

³⁵Atxiĩti āti txari: “Kanatokopa itxa kākiti ōkitikiko? Iuasaaki kanatokopa inakaripa iĩto?” itxa. ³⁶!Kĩkiteri kākiti pimarauatini ikara atoko. Takariki, pimatakakaniāri kipatxi āki !ipitxaka. ³⁷Pitakarauatakasaaki, pitakari okinoka, atxiĩti triko, atxiĩti kimi. Takari aneēkari kona pitaka. Kona takariki atokoni itxa takari ipitxakasaaki. Ipitxere ipinimoni. ³⁸Teoso kamari takari pitxere inireēkiti iaōka. Ikini takariki Teoso sikari ipitxere. ³⁹Āti xinitxi kona āti xinitxi atokoni. Aua kākiti xini. Kaxipirini xini ipinimoni itxa. Kotipiriki xini ipinimoni itxa. Ximaki xini ipinimoni itxa.

⁴⁰Aua iaxiti apiko nopinixiti auakani, aua itixi takote auakani apaka. Peereri ikinipoko, iuaritika iaxiti apiko nopinixiti auakani ipinimoni, itixi takote auakani ipinimoni. ⁴¹Peereri atokatxi. Peereri kasiri apaka, txamari kasiri ātiāo. Peereri iōriki apaka, txamari iōriki ātiāo. Apaka āti iōriki āti iōriki atokotxikana !auari.

⁴²Iua atokokana itxa ipĩkani iuaĩkana ōkitikikosaaki. Ĩtotxi ixiti taākori !auaika. Iua ōkitikakori kona ipinaika. ⁴³Ĩtotxi katikosaaki, !erekari. Ĩtotxi iuaĩkana ōkitikikosaaki, peerekari. Ĩtotxi katikosaaki !kataparari. Iuaĩkana ōkitikikosaaki, kataparari. ⁴⁴Aĩto katikosaaki, aĩto itixi auakani ĩto atokotxikana. Aĩto iuaĩkana ōkitikikosaaki ātiāo aĩto. Ĩtotxi ĩkorapokoriti aāuini ĩkapani aua. Apaka aua ĩtotxi ipinimoni, Teoso sikakiti apĩkasaaki. Ikara ĩtotxi !ipina. ⁴⁵Teoso sākire iōkatsopatakori txari:

Teoso txĩkitakari kiki merepitipanika auakari Adāo inakori auāki inini.

Adāo imatonōkari auakari, Kristo inakori, txĩkitakari kākiti auāki inini, apaka imapinakani ĩkapani.

⁴⁶Teoso nireēkiti axinikini kona apoka merepanika. Merepanika axinikari ateka nireēkiti, eereka axinikari Teoso nireēkiti.

⁴⁷Kiki merepitipanika auakari kipatxi kamakori itxaua. Āti kiki Apiananiri, Teoso tixinekiri iua. ⁴⁸Ikinimane kākiti itixi auakani, iua Adāo kipatxi kamakori atokokana. Ikinimane kākiti Teoso tixine sikani, Kristo Teoso tixinekiri atokokana. ⁴⁹Aponaniākasaaki, kipatxi kamakori aĩto, Adāo ĩto atokokana itxa aĩto. Iua atokokana Teoso tixinekiri ĩto, Kristo ĩto atokokana itxako aĩto.

⁵⁰Nitariakori, nisãpiretai hĩte, !apakata kãkiti ĩto, iarẽka pakini sini Teoso auĩtetxi ininiãtaãua. Ipinakari kona auapininiika !itxa. ⁵¹Hĩkenakotariko nisãkire. Nisãpiretaiko kãkiti mimarotakinini mitxi. Kona ikinimaneni ipina. Iuaritika amakinika txĩkitakaãka ipinipo aniniua. ⁵²Iuasaaki imapotõkire trõpetakero xõkaãka. Iuasaaki mẽkokari katimari atoko itxa. Poki katimari matãkaãtini atoko itxa. Amakinika katimaritika txĩkitakaãka ipinipo aniniua. Iua trõpeta xõkikosaaki, iuasaaki ipĩkani õkitikaãka. Kona ipinaikanako. Iuasaaki atxĩkitakaãka ipinipo aniniua. ⁵³Kotxi arakakani txĩkitakaãkako miarakakani ininiua. Ipĩkani txĩkitakaãkako mipĩkani ininiua. ⁵⁴Arakakani txĩkitakikosaaki miarakakani ininiua, apaka ipĩkani txĩkitakikosaaki mipĩkani ininiua, iuasaaki Teoso sãkire iõkatsopatakoru apopeka. Ia atoko itxa Teoso sãkire kitxakapirĩka:

Ipĩkitxi xipokaãkako. Auape kãiatakarũ, ipĩkitxi xipokakarũ.

⁵⁵Ipĩkitxi tsii !auaika. Maerekani misiritikoãtaã anikakarũ kona kãiata.

⁵⁶Ipĩkitxi tsii mitxi aua amaerekani xika. Teoso paniãtakiti iõkatsopatakorũ oerekaua amaerekani. Teoso paniãtakiti iõkatsopatakorũ mauakaniã, !auari kãkiti misiritiko. Txamari maerekanitxi tapara aua, kotxi Teoso paniãtakiti iõkatsopatakorũ auapitika. ⁵⁷Erekapitikari Teoso, kotxi aãũite Xesosi Kristo txĩkitakaua akãiatini.

⁵⁸Ikara atoko ininiã, nitariakori nota tiretakini, kataparaxinire hĩtxako. Kona hãuiritapiri apanakini txĩkitakinii maerekati hĩkamini. Hĩparĩkauatako ikiniõtika Apiananiri ĩkapani, kotxi himarotari maxikatĩika !hĩparĩkauata iua ĩkapani. Hĩparĩka ĩki hãpakapapitikako.

Txineiro Sikiko Xesosi Sãkire Auiãkani ĩkapani

16 ¹Uatxa nisãpiretai txineiro himakatzakini Teoso nakitiakori ĩkapani. Hĩkamariko Karãsia tixini auakani nipaniãtini atokotxikana. Nipaniãtana ninoa Teoso misãkiretikoãtaã apotiitakanuia ia atoko: ²Ikini Tomĩko hĩkinika hĩte nĩkataro txineiro ninoa ĩkapani. Txineiro Teoso siãkiti iaõka, hinĩkatari ipixini ninoa ĩkapani. Ininiã ereẽ napokasaaki apikomoni txineiro kona apotiitaãka. ³Napokasaaki ereẽ, niokanatarũ kãkiti, txineiro hĩsikakito anikakarũ Xerosareẽmoni. Hĩsãpiretano hĩokanatsopatakitiã himereẽkini hĩtxineirote anikakarũ ĩkapani. ⁴Atxiĩti erekari nota sini apaka, ininiã ninoa moianatano nota.

Paoro Paniãtakiti Pirena

⁵Masetónia tixinimoni nisako, eereka napoka hĩtemoni, kotxi nisapitikako Masetóniamoni. ⁶Iuasaaki atxiĩti nikaikota hĩtekata. Atxiĩti nikaikota mitaãsaaki hĩtekata. Ininiã eereka hĩte posotari himoianatinino nota naiamatakasaaki apikoxiti nisini ĩkapani. ⁷Kona ninirekari mapaõtinoka nikaikotini hĩtekata uatxa. Apiananiri auiritiniãno, ninirekari apikomoni nikaikotini hĩtekata. ⁸Txamari nikaikota uai Épeso sitatxiti Pêtekósitxi kiiniriti manapi õti. ⁹Kotxi uatxa kaiãopokori kãkiti ĩkorapokoriti auakani nirekari nisãpiretiniri Teoso iokanapirena erekari ninoamoni. Txamari kaiãopokori kãkiti !inirekano.

¹⁰Atxiĩti Tximótxio sari hĩtemoni, ininiã hãpakapariko iua, imapĩkarauatakani ĩkapani hĩte sauaki, kotxi iua parĩkauata Apiananiri ĩkapani nota parĩkauatini atokokana. ¹¹Ininiã kona apakata kãkiti mamaãkatakaniri iua. Ikanapiriãkasaaki notamoni, iuasaaki hĩokanatari iua erekaxinire inini. Niãtapari iua aĩtariakorikata.

¹²Iteene ninirekari aĩtari Aporo apokini hĩtemoni aĩtariakorikata. Txamari uatxa !inirekari isini hĩtemoni, iuaritika iposotakasaaki isapitikako hĩtemoni.

¹³Araõkire hĩtxako. Iteene hãuikariko Teoso sãkire. Hĩtaparaxinireritika hãuako. Hĩtapararitika hãuako Teoso ĩkapani. ¹⁴Xesosi tiraõkiã ikinipoko hĩkamako.

¹⁵Hĩte imarotari Esitépana, inirimane pakini. Ninoa Akaia tixini auakani. Iuaãtaã ninoa merepitipanika auikari Xesosi sãkire. Ninoa iteene parĩkauata Teoso nakitiakori ĩkapani. Nitariakori, iteene nipaniãtai hĩte. ¹⁶Hĩkamariko kãkiti ikara atoko inakani paniãtakiti. Hĩkamariko ikinimane amoianari paniãtakiti, atekata parĩkauatakani paniãtakiti. ¹⁷Esitépana, Potonato, Akaiko pakini apokasaaki uai, nipoxokoniua, kotxi iminarina notamoni mauakati hĩte masikakiniti. ¹⁸Ninoa sikapoxokonitari nãkixinire, hĩte ãkixinire apaka. Erekari ate iuikiniri kãkiti ikara atoko inakani.

¹⁹Teoso misãkiretikoãtaã apotiitakaniua Ásia tixini auakani xinikamanapitai hĩte. Ákira inakori, Pirisira inakoro pakini iteene xinikamanapitai hĩte, kotxi Apiananiri nakiti hĩtxaua. Apaka Xesosi sãkire auĩãkani ninoa aapoko apotiitakaniua xinikamanapitai hĩte. ²⁰Ikinimane aĩtariakori uai auakani

xinikamanapitai hĩte. Haõkitakakasaakiua, himaratakakauako, kotxi Teoso nakitiakori hĩtxaua.

²¹Nota Paoro iõkatsopatari ia nitakapiretanapini niuakoã.

²²Kãkiti matiretakaniãri Apiananiri Xesosi Kristo, maerekati takaãka iua nopini.

“Apiananiri, uai pina atemoni,” atxari Xesosi.

²³Apiananiri Xesosi Kristo sikari ikinipoko erekari hĩtemoni.

²⁴Nitiretai hĩte hĩkinika, kotxi Kristo Xesosi nakitiakori atxaua. Ameẽ.

2 KORÏTO

Paoro Iokanatsopatakiti Iuaĩkana Korïto Auakanimoni

1 ¹Nota Paoro, Xesosi Kristo iokanatakitino. Teoso nirekari iokanatinino kãkitimoni isãkire nisãpiretini ïkapani. Ia aãtsopa niõkatsopata. Aĩtari Tximótxio aua notakata. Ia iõkatsopari niokanata kãkiti Teoso mereëkinimoni, Korïto sitatxiti auakanimoni. Apaka ia iõkatsopari niokanata kãkiti Teoso nakitiakorimoni, Akaia tixini auakanimoni. ²Aĩri Teoso, Xesosi Kristo Apiananiri pakini sikari ikinipoko erekari hĩtemoni. Ikamaerekaxiniretai hĩte.

Teoso Mĩkapiritiniua Pirena

³Peerekari Teoso. Aãũte Xesosi Kristo iri itxaua. Kaamonĩkareri iua. ãti kãkiti amonĩkakareri iua atoko inakareri !auari. Amaerekaxinirenisaaiki, iua atekata aua. Amaerekaxinireni imaktxakinaua. Iuusaaki imĩkapiritaua. ⁴Imĩkapiritaua amaerekaxinirenisaaiki, ininiã apanakini maerekaxinirenisaaiki, iua atokotxikana ate mĩkapiritana ninoa apaka, kotxi aimarotari Teoso mĩkapiritiniua ate. ⁵Kristo iteene misiritaãka, ininiã ate misiritaãka apaka. Iua atokokana Teoso moianatari Kristo, ininiã iua moianataua ate apaka. ⁶Apanakini misiritaua, kotxi anirekari Teoso mĩkapiritinii hĩte. Anirekari Teoso maktxakiniri himaerekani. Teoso mĩkapiritaua ate, ininiã hĩte apaka imĩkapirita. Teoso mĩkapiritakasaakii hĩte, isikataparatai himisiritiko hĩpoxokoniritika himĩteenekini ïkapani. Hĩte misiritiko ate misiritiko atokokana. ⁷Aimarotapitikari erekari

Teoso sikinii hīte, kotxi himisiritaāka ate misiritiko atokokana, ininiā Teoso mīkapiritai hīte, ate imīkapiritini atokokana.

⁸Aītariakori, anirekari hīxinikiniri ate misiritiko Ásia tixini aāuakasaaki. Iuasaaki iteene amaxikaāka. Kona amīteenekari. Auākatari aōkiko. ⁹Iuasaaki aākixinireē atxa: “Apinapitikako,” atxa. Ikara atoko ininiā, aimarotari kona ate posotiire !auari. Aimarotari Teosonoka sikataparataua, kotxi iua posotari ōkitikiniri ipīkari. ¹⁰Pamonōkoniri iuasaaki, iuaritika Teoso makatxakaua amapinakani ĩkapani. Iua makatxakapanikaua amapinakani ĩkapani. Ate auikari iua sākire, iuaīkana imakatxakiniua tīkane. ¹¹Hīte moianataua ate, kotxi himisākiretari Teoso ate ĩkapani. Ininiā Teoso kamari hamanaākiti iaōka, kotxi Teoso kamari erekari atemoni. Eereka kaiāopokori kākiti sāpiretari Teoso iua ereka inini, kotxi ikamari ninoa amanaākiti iaōka ate ĩkapani.

Paoro Masikani Korītomoni

¹²Ate poxokoniuata, kotxi ate kamari erekarinoka Teoso oerekakitinoka, kākitimoni, hītemoni apaka. Atāonoka anireka akamini kākitimoni. Aimarotari ikara aākixinireē, ininiā apoxokoniuata. Ikara atoko aāuini, kotxi ikinipoko erekari Teoso sikakiti sikataparataua. Kākiti imaroreē liposotari ikaminiri iua auini ereka inini, kotxi !kiīkiteri kākiti. ¹³Hātatsopatakasaakiri aiōkatsopatakiti hītemoni, himarotari axinikakiti aākixinireē. Axinikakiti, asākire pakini ātinoka itxaua. ¹⁴Hīte na iteene imarotapanikaua ate, iuaritika ninirekari hīuikiniua ate, Apiananiri Xesosi uai ikanapiriini ōtisaaki, ate iuikini atokotxikana.

¹⁵Ikara nimarota, ininiā ninirekamari hītemoni nisini, ipikata hīpoxokoniuatini ĩkapani. ¹⁶Masetónia tixinimoni nisini apisapanika, ninirekamari hītemoni nisini. Eereka nikanapiriākasaaki uaimoni, ninirekamari hītemoni iuaīkana nisini, ininiā iuasaaki ninirekamari hīte iokanatinino nota Xotéia tōpamoni. Txamari na nisa. ¹⁷Atxiīti hīte txano nota: “Pixinikasaakiri uai papokini, na iteene pinirekari uai papokini,” hītxano. Txamari ninirekapitikari napokini hītemoni. Na nota xinikari Teoso sākire mauīākani xinikakiti atoko, kotxi ninoa sākire: “Ari, nisapitika,” txamari ākixinireē itxana: “Na nisapani,” itxana. ¹⁸Nota sākire hītemoni ninamaā: “Ari nisapitika,” ninakasaaki, nākixinireē apaka txari: “Ari, nisapitika,” nitxa. Teoso atāonoka sākirauatakarari imarotari ikara nisākire atāo inini. ¹⁹Sírasi

inakori, Tximótxio inakori, nota pakini sãpiretapekai hĩte Teoso ãkiri, Xesosi Kristo sãkire. Xesosi sãkire inamaã auakari, isãkire ãkixinireẽ auakaritxikana isãkireta. “Nikamapitikariko,” inakasaaki, ãkixinireẽ inirekapitikari ikaminiri. Ikamari isãkire iaõka. ²⁰Teoso sikaenetakiti kãkitimoni kaiãopokori aua. Iua Kristo sikaua ikinipoko Teoso sikaenetakiti, ininiãkara atxari: “Ameẽ.” Peerekari Teoso, kotxi Kristo sikapitikaua Teoso sikaenetakiti. ²¹Teosokara sikataparaxiniretai hĩte, ate apaka, Xesosi Kristo amatakanapakani ikapani. Teosokara mereẽua iua nakitiakori aniniua ikapani. ²²Apaka Teosokara sikaua Erekari Matamatakoti, Teoso nakiti aniniua aimarotini ikapani. Iua Erekari Matamatakoti aua aãkixinireẽ. Teoso takaõtxikare itxaua iua. Iua Erekari Matamatakoti merepitipanika Teoso sikakiti atemoni, ininiã aimarotari apikomoni isikapanikaua itanapoko inĩkatakiti ate ikapani.

²³Kona nisari hĩte Korĩto sitatxiti auakanimoni, kotxi kona ninirekari hĩte matinaniuatini hĩte maerekani nisãpiretini xika. Teoso imarotari ikara atão inini. ²⁴Hĩauĩte kona ate txaua. Kona apaniãtai: “Ia atoko inakari hãuika. Kona ikara atoko inakari kona hãuikape.” Kona ikara atoko !atxai hĩte, kotxi hĩte auikapitikari Teoso sãkire atão inakari. Aparĩkauata hĩtekata hĩpoxokoniuatini ikapani.

2 ¹Nãkixinireẽ nitxari: “Na nisa iuaĩkana ninoamoni nikamamatinanitinina ikapani.” ²Nota xika maerekaxinireninoka hininiã, kiripa kamapoxokinitano nota? Hĩtenoka aua nota kamapoxokonitakani. Ininiã kona nota nirekari maerekaxinireni hinini nota xika. ³Kona ninirekari hĩtemoni napokini, maerekaxiniretikano ninini, hĩte maerekani xika, ininiãkara nota iokanatsopatarari ikora mitxi niõkatsopatakiti hĩtemoni ereẽ napokini apisapanika. Kotxi nikamapoxokonitakini hĩtxaua hĩte. Nimarotari ia. Nota nienenĩkasaaki, hĩte himakinika eneniãka apaka. ⁴Niokanatsopatarari ikora niõkatsopatakiti hĩtemoni, kotxi himaerekani xika maerekaxiniretinoka nitxa. Nitxiapata. Niokanatsopatarari ikora niõkatsopatakiti hĩtemoni, iteene nitiretinii himarotini ikapani. Na ninirekari nikamamatinanitinii.

Maerekanitxi Maxinĩkaretiko

⁵Iua kiki maerekati kamakari maerekaxinireti txĩkitakano. Iua apia maerekaxinireti txĩkitakai hĩte, maerekati ikamini xika. Na iteene ninirekari nitxitiniri iua. ⁶Uatxa atokopeka homanatiniri. Iua txitaãkapeka imaerekani xika. ⁷Uatxa himaxinĩkaretariko maerekati ikamakiti, ininiã hãpakapariko iua. Himisãkiretariko

iu. Hîkamapoxokonitari iua. Ikara atoko himinakaniãri, iua kona erekaxinireri. Ikara atoko himinakaniãri, atxiiti itakanapari Teoso kimapora. ⁸Ininiãkara nota ôtãkikai hite nitapararitika. “Atiretapitikai,” hîtxariko iua, hîtiretiniri imarotini îkapani. ⁹Ininiã mitxi niokanatsopata hîtemoni, kotxi iusaaki nataerekatai hite. Ninirekari nimarotiniri, hîkîpitatari nôtãkikinii atxiiti? ¹⁰Himaxinîkaretakasaakiri maerekati ãti kamakiti, nota apaka maxinîkaretari. Maerekati ãti ereẽ kamakiti auiniã, nimaxinîkaretari, kotxi nitiretai hite. Kristo nirekari nimaxinîkaretiniri maerekati ikamakiti. ¹¹Axinikasaakiri maerekati ãti kamakiti, akamari Satanasi nireẽkiti. Ininiãkara !akamari Satanasi nireẽkiti. Paimatireri iua. Inirekari akerokiniri. Aimarotari iua nireẽkiti, ininiã apia imatirerini matxaua.

Txito Paoro Nitini

¹²Tóatxi sitatxiti napokasaaki Kristo iokanapirena erekari nisãpiretini tîkane, kãkiti iuaã auakani nirekari nisãkire imarotinina, kotxi Apiananiri sikanireõtana nisãkire imarotinina îkapani. ¹³Iuaritika !erekaxinireno, kotxi ninitapiimari aĩtari Txito inakori. Kona napokari. Ininiã nitakapiretanapana kãkiti iuaã auakani: “Ereẽpiko. Masetónia tixinimoni nisako,” nitxana.

Kamariãro Atoko Atxa

¹⁴Peerekari Teoso kamakiti ate îkapani. Kristo nakiti aniniãua, Teoso txîkitakaua ãtipirika akãiatini, ikinimane imarotini îkapani. Teosokata akãiata. Teoso paniãtaua Kristo pirena imarotiko ikini tõpati iaripiretini, kamariãro iarikatxiãtini atokokana Kristo pirena iaripiretini îkapani. ¹⁵Kristo sikaua Teosomoni, ininiã Teoso apokaerekataua, kotxi kamariãro arikiko Teoso îkapani atokokana atxa. Kamariãro arikasaaki omari samariãpota ikini tõpati. Iua atokokana asaãpota kãkitimoni, kãkiti apokakonimoni, kãkiti pîpinanaãkanimoni apaka. ¹⁶Kãkiti pîpinanaãkanimoni kanaiatxiãri atoko atxa, kotxi asãpiretana Kristo sãkire imauikakaniãna, ipinana. Kãkiti Teoso apokakinimoni kamariãro eretxiãro atoko atxa, kotxi asãpiretana Kristo sãkire auikiniãna, auapininiika itxanako Teosokata. Kiripa posotari ikara atoko inakari parîkatxi ikamini Teoso îkapani? ¹⁷Ate posotari Teoso îkapani aparîkauatini, kotxi kona apanakini atokoni !atxa ate. Kaiãopokori kãkiti sãpiretari Teoso sãkire txineiro apakapini îkapani. Ninoamoni Teoso sãkire tiitxi vêtxitiko atoko itxa. Kona

ikara atokoni !akama, kotxi Teoso iokanataua ate kãkitimoni. Teoso atamataua, ininiã atãonoka asãkirauata, kotxi Kristo nitiriakori atxaua.

Iøkatsopari Atoko Hĩtxa

3 ¹Atxiĩti iuaĩkana ate sãpiretatari erekari akamakiti asãkire hãuikini ĩkapani? Atxiĩti hinirekatari apanakini iøkatsopatiniri erekari ate kamakiti ate sãkire hãuikini ĩkapani? Atxiĩti ate nirekatari apanakini iøkatsopatiniri erekari hĩte kamakiti hĩte sãkire ate auikini ĩkapani? Apanakini kamari ikara atoko. Ate kona kamari ikara atoko. ²Kona ninirekari iøkatsopari ikara atoko inakari, kotxi iua iøkatsopari atoko hĩtxa hĩte. Ate ãkixinireẽ iøkatsopari atoko hĩtxa. Ikinimane atatsopitari ikara iøkatsopari, ininiã imarotarina erekari hĩte kamakiti. ³Iøkatsopari Kristo iøkatsopatakiti ate mĩkiti atoko hĩtxa. Kona txĩtaã iøkatsopataãka. Erekari Matamatakoti Teoso Mapinakati iøkatsopitari. Kona aãtsopaã iøkatsopataãka. Kãkiti ãkixinireẽ iøkatsopataãka.

⁴Ikara atoko atxai hĩte, kotxi iteene aimarotari Teoso, Kristo nakitiakori aniniua. ⁵!Kimaroreua ate. Ateka !aposotari aparĩkauatini Teoso ĩkapani. Teosora sikaposotiiretaua. Isikari imarore atemoni. ⁶Isikaposotiiretaua Teoso ĩkapani aparĩkauatini ĩkapani, isãkire amaneri kãkiti asãpiretini ĩkapani. Ikara isãkire amaneri oerekaua Erekari Matamatakoti aãkixinireẽ auini. Isãkire amaneri !oerekaua ipaniãtakiti iøkatsopatakori Moisesimoni isikakiti. Ipaniãtakiti iøkatsopatakori Moisesimoni isikakiti paniãtari kãkiti ipinini imaerekani xika. Erekari Matamatakoti aãkixinireẽ auiniã, itxĩkitakaua aãuapininiika anini.

Teoso Parĩka Amaneri

⁷Teoso paniãtakiti tesi pakini iøkataãka kai nopini. Teoso sikasaakiri ikara Moisesimoni, Teoso iotximere iteene aua. Moisesi toõ iuasaaki apakapari Teoso iotximere. Itene iotximere aua Moisesi toõ, ininiã kãkiti Isaeo auakani kona posotari atamatiniri. Iotximere poiãõpotakasaaki, liposotapanikarina itoõ atamatinina. Ininiã Teoso iotximere auakasaaki, isãkire iøkatakori apoka itiximoni kãkiti ipinini ĩkapani. ⁸Uatxa iua Erekari Matamatakoti txĩkitakari kãkiti ãtipirika auini ĩkapani, ininiã uatxa Teoso parĩka apiata. Peerekari ikara iparĩka. ⁹Peerekari Teoso parĩka ipaniãtakiti iøkatakori kãkitimoni isikasaaki, txamari iuasaaki oerekari kãkiti misiritiko imaerekani xika. Uatxa Teoso parĩka apiaerekata, kotxi

Kristo kamaerekatari kâkiti. ¹⁰Uatxa Teoso parîka apiata. Peerekari. Iotximere apiari atoko itxa, ininiã iua parîka kitxakapirîka iotximere napakari atoko itxa. ¹¹Kitxakapirîka Teoso parîka ipaniãtakiti iökatakori isikasaaki peerekari, txamari ikara Teoso parîka xipope. Ìkorasaaki iparîka kâkiti ikamaerekatini !ixipoka, ininiã apiaerekata.

¹²Ia Teoso parîka !ixipoka, ininiã ataparaxinireritika asãkirauata. ¹³Moisesi atoko !atxaua, kotxi iua ipatoõtua mãkatxi mataã, itoõ iotximere Isaeo auakani matamatakani ìkapani. Itoõ iotximere poiãota, iuaritika !iposotarina atamatinirina. ¹⁴Moisesi ipatoõtiniua atokokana ninoa Isaeo auakani oki ipataãka, kotxi !imarotarina atão Teoso nireëkiti. Uatxapiima okina ipataãkapanika atatsopatakasaakirina Teoso sãkire iökatsopatakori, Xesosi apokini apisapanika auakari sãkiretxiti. !imarotarina Teoso nireëkiti. Kristo sãkire auikikosaaki, iua ipatoõtiko makatxakaãka, ininiã iuasaaki kâkiti imarotari Teoso nireëkiti. ¹⁵Ìkorasaaki apaka Moisesi iökatsopare atatsopatakasaakina, !imarotarina. Okina ipataãkapanika. ¹⁶Kâkiti akiritakasaakiri Apiananiri, ipatoõtiko makatxakaãka. ¹⁷Erekari Matamatakoti itxaua Apiananiri. Erekari Matamatakoti auiniã aãkixinireë, !aparîkauataika amaerekani makatxakiko ìkapani, kotxi Xesosi makatxakapekari amaerekani. ¹⁸Xesosi sãkire auiãkani atxaua, ininiã atoõ kona ipataãka. Ìtakaãri atoko atxaua. Kâkiti atamatakasaakiua ate, atamatari Apiananiri iotximere. Apiananiri Erekari Matamatakoti aãkixinireë txïkitakaãpotaua ikara atoko aniniua, ininiã apiaãpota aiotximere.

Teoso Iokanapirena Erekari Pokamara Atoko Itxa

4 ¹Teoso amonîkaua ate, ininiã iua paniãtaua ia parîkatxi akamini, iokanapirena erekari apanakinimoni asãpiretini. Ikara atoko ininiã, isikataparaxiniretaua, ininiã !anirekari atakanapiniri ikara parîkatxi. ²Kâkiti kipatari ikamakiti, maerekati ikamakasaaki, kotxi ipëtaua. Ikara atoko inakari maerekati !akamaika. Atakanapapekari. !Amisirienetari kâkiti. Kona akoketari ate sãkire Teoso sãkirekata. Teoso kenakotari asãkire, ininiã atãonoka asãkire, ininiã kâkiti ãkixinireë imarotari akamakiti atão inini. ³Kâkiti mimarotakanisaakiri Teoso iokanapirena erekari asãpiretakiti, kâkiti pîpinanaãkari atoko itxa. ⁴Kâkiti pîpinanaãkari !imarotari Teoso iokanapirena, kotxi kâkiti teosone, Satanasi inakori, ipatari ninoa oki, ininiã !atamatarina pokamara ninoa iopiniãkari. Teoso iokanapirena erekari pokamara atoko itxa. Peerekari ikara

Teoso iokanapirena. Iua erekari pirena sãpiretari Kristo Apiananiri ininiua, kotxi Teoso itxaua. ⁵Ate kona sãpiretari kãkiti ateka pirena. Ate sãpiretari Xesosi Kristo Apiananiri ininiua. Ate hĩte nitiriakori atxaua, kotxi Xesosi nirekari hinitiriakori aniniua. ⁶Kitxakapirĩka ipiãnoka auakasaaki, Teoso txari: “Piopinikaxitita.” Iuasaakipeka iopinikaxitita. Iua Teosotxikana iopinikari aãkixinire. Ikara iopinikare kamaimarorettaua Teoso Apiananiri kaiotximereri ininiua. Kristo aãtamatakasaaki, aãtamataru Teoso iotximere.

Xesosi Sãkire Auiãkani Misiritiko

⁷Kopiti maikoti atoko atxaua, kotxi atapara !uari. Iuaritika atemoni auari Teoso iokanapirena erekari katireri. Ininiã aimarotari Teosonoka kaposotiireri, kataparari ininiua. Atepekana !aposotari. Atapara !uari. ⁸Asinimoni amaxikakini aua, iuaritika !okaua ate. Atxiĩti !aimarotari akamakiti tĩkane, iuaritika kona aiotokakari Kristo sãkire aãuikini. ⁹Amisiritiko aua, iuaritika Teoso kona takanapaua ate. Atxiĩti akarotaãka, iuaritika kona aõkaãka. ¹⁰Ikiniõtika aĩto okiko monõkoni aua Xesosi sãkire aãuikini xika. Xesosi atatsiirauata. Ipina. Iua atokotxikana ate atatsiirauata. Atxiĩti aĩto ipina iua sãkire aãuikini xika. Xesosi auapika, kotxi ipĩpe, eereka õkitikaua, ininiã iua atokokana aĩto auapika. ¹¹Auapanika anakasaaki, aõkiko monõkoni aua Xesosi sãkire aãuikini xika. Aĩto ipinapitikako, iuaritika aãuapanika, kotxi Xesosi auapanika. ¹²Xesosi iokanapirena asãpiretini xika, apanakini nirekari okiniua ate. Xesosi iokanapirena asãpiretakasaakii, hĩte auikari, ininiã hĩte auapika himaxipokakani.

¹³Teoso sãkire iõkatsopatakori txari:

Nota auikari Teoso sãkire, ininiã nisãpiretari kãkiti. Iua atokotxikana ate auikari Teoso sãkire, ininiã ate sãpiretari kãkiti. ¹⁴Teoso õkitikari Apiananiri Xesosi, iuaĩkana auini ĩkapani, ininiã aimarotari Teoso õkitikiniua ate apaka, iuaĩkana aãuini ĩkapani. Eereka Teoso anikauako ate hĩtekata Xesosi aaõkitini Teoso apisatoõ. ¹⁵Amĩteenekari ikinipoko amisiritiko Xesosi sãkire hĩtemoni asãpiretini ĩkapani. Kãkiti apikomoni, apikomoni, apikomoni, txaãpota apakapari ikinipoko erekari Teoso sikakiti, ininiã ninoa kãkiti kaiãopokori txari Teoso: “Erekapitikari pisikakiti notamoni.” Ikara atoko ininiã, kãkitipokoni txari: “Peerekari Teoso,” itxako.

Maerekaxinireni !Atxaua

¹⁶Ininiākara maerekaxinireni !atxaua. Aĩto xipokaãpota, iuaritika aãkixinire ikiniõtika apiataparaãpota. ¹⁷ĩkorasaaki amaxikiko auapitika Xesosi sãkire aãuikini xika. Kona okanani auu amaxikiko. Eereka Teosokata ãtipirika aãuapika, kotxi aãuikari isãkire. Peerekari iuasaakiko. !Axinikaikari mitxi amaxikiko, kotxi iuasaakiko peerekari. ¹⁸Kona amaãkatari aãtamatakiti. Amatamatakiniti axinika. Atamatakori xipokako. Matamatakoti kona xipoka.

Aãuapoko Teoso Tixineẽ

5 ¹ĩkorapokoriti aãuakasaaki, aĩto aãuapoko itxaua aãkixinire ĩkapani. Aĩti õti aĩto xipoka. Ixipokasaaki, Teoso sikari ãtião aãuapoko. Iua aĩto isikaua, itixine aãpokasaaki. Iua aĩto kona xipokaika. Iua aãuapoko kona uakõtxiã kamakorini. ²ĩkorasaaki aãtatsiirauatakasaaki, atxari: “Ninirekari ãtião niĩto, niĩto Teoso sikakiti itixine napokasaaki.” ³Anirekari ãtião aĩto, ininiã maĩtotika !atxaua. ⁴ĩkorasaaki ia aĩto auapanika inakasaaki, aãtatsiitari katsiiri. Kona kataparari ia aĩto. Anirekapitikamari aĩto. Anirekari ãtião aĩto, ininiã aĩto maxipoãkati makatxakari aĩto xipoãkari. ⁵Teoso kamari aĩto maxipoãkani ĩkapani. Isikapanikauako aĩto ikara atoko inakari. Aimarotari ikara atão inini, kotxi isikapekari Erekari Matamatakoti atemoni. Ipixini Teoso sikaenetakiti isikapekua, ininiã apikomoni isikaenetakiti isikapitikauako.

⁶Ininiã kataparaxinirepitikaua ate. Aimarotari aãuapoko ia aĩto ininiãua, kona aãpokapanika Apiananiri tixinemoni. ⁷Xesosi sãkire auikiko oerekaua atão aãuini tĩkane. Aõkinoka kona oerekaua atão aãuini tĩkane. ⁸Kataparaxinirepitikaua ate. Kona ate pĩkari apinini. Apiaerekata apinini, kotxi iuasaakiko Apiananirikata aãua. ⁹Anirekari amiinitiniri Apiananiri, ia aĩto ãki aãuakasaaki, ia aĩto xipokasaaki apaka. ¹⁰Ãti õti ate amakinika sariko Kristomoni. Iuasaaki Kristo sãpiretaua aparĩka ĩki. Iua imarotari ikinipoko akamakiti ia aĩto ãki aãuakasaaki. Atxiĩti akamari erekari. Atxiĩti akamari maerekati. Akamakiti iaõka isikaua aparĩka ĩki.

Kākiti Mikanapiriĩko Teosomoni

¹¹ Aimarotari Apiananiri katapara inini, kotxi imisiritari kākiti imaerekani xika. Ininiã asãpiretari kākiti auikiniri iua sãkire. Aparĩkauata, iua sãkire kākiti auikini ĩkapani. Teoso iteene imarotaua. Imarotari axinikakiti aãkixinireẽ. Ninirekari hĩte apaka iteene imarotiniua ate hãkixinireẽ. ¹² Kona ate nirekari iuaĩkana asãpiretinii hĩte ereka anini. Anirekari asãpiretinii, apakatapitika hũuikiniua ate, kotxi atãonoka akama. Ikara atoko inakari himarotiniã, himarotari kākiti hãpakapapiretini, ninoa misãkirepiretakasaakiaua ate. Ninoa kākiti ate misãkirepiretakani iuikari atamatakorinoka. Kona imaãkatari kākiti ãkixinire ereka inini. ¹³ Atxiĩti kãkitimoni kona kiĩkiteua ate. Ikara atoko atxa Teoso ĩkapani. Atxiĩti paĩkiteua ate. Ikara atoko atxa hĩte ĩkapani. ¹⁴ Kristo iteene tiretaua, ininiãkara anirekari iua nireẽkiti akamini, kotxi aimarotari iua ipina ikinimane ĩkapani, kotxi ikinimane ipĩkani atoko itxauana. ¹⁵ Kristo ipina ikinimane kākiti ĩkapani, kākiti mapinakani ĩkapani, kākiti ãtipirika auini ĩkapani. Ininiã iua kākiti kona kamaikariko iuaka nireẽkiti ikiniõtika. Ikamariko Kristo nireẽkitinoka, kotxi Kristo ipina iua ĩkapani. Iuaĩkana õkitikapekaua.

¹⁶ Ininiã uatxa !axinikaikari kākiti ĩkorapokoriti auakani xinikakiti atokokana. Mitxi axinikari Kristo ninoa xinikiniri atoko. Uatxa !axinikaikari Kristo ninoa xinikiniri atoko. ¹⁷ Kristo sãkire auiãkari ãkixinire amaneri itxaua. Mitxi maerekati ikamakiti kona ikamaika. Amanerinoka ikama. ¹⁸ Ikara atoko inakari Teosora kaminaua. Mitxi amokaiakari atoko itxa Teoso, iuaritika imikanapiriãua ate iuamoni, kotxi Kristo ipina ate ĩkapani. Ipaniãtaua ate asãpiretiniri ikinimane kākiti, Teoso nirekari imikanapiriinina ninoa iuamoni. ¹⁹ Teoso mikanapiriãri kākiti ikini itixiti auakani iuamoni, kotxi Kristo ipina kākiti ĩkapani. Teoso mikanapiriãkasaakiri kākiti iuamoni, kona iaõtari maerekati ikamakitina. Kona ixinikaikari imaerekanina, ininiã kona imisiritana imaerekani xika. Ia pirena, kākiti imikanapiriini pirena, ipaniãtaua asãpiretiniri ikinimane kākiti.

²⁰ Asãpiretari Kristo sãkire kãkitimoni. Asãkirauata iua ĩkapani, ininiã Teoso iteene õtãkikai hĩte ate sãkireẽ. Kristo nireẽkiti iaõka ate õtãkikai hĩte. Hikanapiriãko Teosomoni. ²¹ Kristo kona kamari maerekati, iuaritika Teoso misiritari iua maerekati kamakari imisiritini atokokana. Ininiã Xesosi sãkire aũuikiniã, Teoso apakapaua ate, maerekati makamakani apakapini atoko, kotxi iua kamaerekataua ate.

6 ¹Ate parīkauata Teosokata, ininiã ate iteene õtākikai hīte. Teoso sikari ikinipoko erekari hītemoni, ininiã !apakata mamaākatakinitika hininiri Teoso. ²Kotxi Teoso sākire iōkatsopatakori txari:

Erekari kākitemoni nisika. Niketo apokasaaki, iusaaki nikenakotari hākiritinino nota. Kākiti maerekani nimakatzakini õtisaaki, nimoianatai hīte.

Nisāpiretai. Uatxa apokapeka Teoso keto erekari kākitemoni isikini. Uatxa Teoso makatzakari kākiti maerekani.

Teoso Nitiriakori Atão Inakani

³Kona xatiki akerokari akamakiti kākitemoni, ininiã kākiti kona txari: “Ninoa kerokari ikamakitina, atão minakati isāpiretinia,” !itxana. ⁴Teoso nitiriakori atão atxaua. Aãuini ikiniõtika oerekari kākiti Teoso nitiriakori atão inakani aniniua, kotxi amīteenekari amaxikiko. Amīteenekari amisiritiko. Amīteenekari katsiiri. ⁵Teoso nitiriakori atão atxaua, kotxi Teoso parīka akamini xika anoropataãkapeka. Kateia āki atakaãkapeka. Ahoaãtaã kākiti apotiitakaniua naiatapekaua. Teoso parīka akamini, pasāpaniri aparīka. Itokata !aimaka. Itokata anatxita. ⁶Kākiti imarotari ate Teoso nitiriakori aniniua, kotxi kona akamari maerekati. Aimarotari Teoso sākire. Kona katimari aomanākarauatini. Amoianatari kākiti. Erekari Matamatakoti oerekaua atão akamini. Atão atiretari kākiti. Ikara atoko aniniã, kākiti imarotari Teoso nitiriakori aniniua. ⁷Ate Teoso nitiriakori atão atxaua, kotxi atão inakarinoka asāpireta. Teosora sikaposotiiretaua. Erekari akamakiti aīkeeko akikomoni, asanaremoni pakini atoko itxa, kotxi erekari akamakasaaki, maerekati iokanataãka. ⁸Teoso nitiriakori atxaua, ininiã apanakini kākiti paxitaua. Txamari apanakini kākiti kona paxitaua. Apanakini sākire: “Peerekana ninoa.” Txamari apanakini sākire: “!Erekana ninoa.” Apanakini sākire: “Kamisirienererini ninoa,” iuaritika atão inakarinoka asākire. ⁹Minakaniua ate, iuaritika ikinimane imarotaua. Kaiõokatani apinaarita, iuaritika aãuapanika. Amisritaãka, iuaritika kākiti kona okapanikaua. ¹⁰Amatinaniuatakasaaki, Apiananiri kamapoxokonitaua ate. Kona katxineiroteua ate, iuaritika atxīkitakari kaiõopokori kākiti ikini sereti erekari Teoso sikakiti apakapinina. Minakani atxaua, iuaritika ikinipoko erekari Apiananiri sikakiti aua atemoni.

¹¹Hīte Korīto sitatxiti auakani asāpiretai ikinipoko axinikakiti. Nikipatakiti !auari. Iteene atiretai hīte. ¹²Ate nirekari atiretinii hīte,

txamari kona hĩte nirekari hĩtiretiniua ate. ¹³Uatxa nimisākiretai hĩte namariteakori nimisākiretini atokotxikana. Hĩtiretauako ate, ate tiritinii atokotxikana. Hõerekaua hĩtiretiniua ate.

Xesosi Sākire Mauiākani Moianariakori !Hĩtxapeua

¹⁴Xesosi sākire mauiākani moianariakori !hĩtxapeua, kotxi !apakata erekari kaikotini maerekatikata. !Apakata pokamara ĩkanõkarikata auini. ¹⁵Kona Kristo moianatari Satanasi. Xesosi sākire auĩakari nireēkiti āti. Xesosi sākire mauiākati nireēkiti ātiāo. Ininiā !apakata Xesosi sākire auĩakari auini Xesosi sākire mauiākatikata. ¹⁶Teoso misākiretiko aikoti āki !uari kākiti kamakiti teoso. Aĩto Teoso misākiretiko aikoti atoko itxa. Teoso ātipirika auakari itxaua. Iua txari:

Nota auako ninakitiakorikata. Nitĩpokota ninoa sauaki. Ninoa Teosone nitxauako. Nota nakitiakori itxauanako ninoa.

¹⁷Ininiākara hĩtakanapanako nisākire mauiākani. Kona ninoakata !hãuape. !Hĩkaikotape maerekati takote, ininiã napakapai hĩte.

¹⁸Ininiã hĩri nitxauako. Namariteakori, namariteakoro hĩtxauako hĩte, itxa Apiananiri, Kaposotiireri sākire.

7 ¹Nitiretakini ikara atoko itxa Teoso kamaenetakiti ate ĩkapani. Ininiã matakanaipari ikinipoko maerekati aĩto txikotakari, aākixinire txikotakari pakini. Teoso nakitiakorinoka matxaua. Erekarinoka makama Teoso apaxitini.

Paoro Poxokoni

²Hĩtiretauako ate. Kona amisiritari kākiti. Kona aõerekari kākiti maerekati ikamini. Kona amisirienetari kākiti. ³Kona ikara atokoni nitxa hĩte nitxitini ĩkapani. Kona nitxitai, kotxi nisãpiretapekai iteene atiretinii hĩte. Ininiã ipĩkitxi kona oiarikaua. Auakari kona oiarikaua. Ate oiarikakari !uari. ⁴Nimarotari hĩte kaminiri nota õtãkikakiti iaõka. Nota iuikai hĩte. Hĩte kamataparaxiniretano nota. Amaxikaãkapika, iuaritika iteene nipoxokoniua.

⁵Masetónia tixini ate apokasaaki, kona aiotoka. Kona atomata, kotxi asinimoni aua kākiti ate misiritakani. Kākiti naiataua. Aākixinireē apĩkarauata. ⁶Teoso, mĩkapiritari kākiti matinaniuatakani, ininiã imĩkapiritaua ate Txito apokasaaki. ⁷Iua apokini kamapoxokonitaua. Apaka isākire kamapoxokonitaua, kotxi isãpiretaua hĩte kamapoxokonitiniri iua. Isãpiretaua ate hĩte kinirão aõkitaka ininino nota. Isãpiretaua, hĩte maerekaxinireni,

kotxi hĩtxĩkitakano maerekaxinire ninini. Isãpiretaua hĩte ãtipirika sãpiretiniri apanakini nota kamakiti ereka inini. Txito sãpirena nikenakotakasaaki, apia nipoxokoniuaata.

⁸Mitxi niokanatsopatakiti hĩtemoni maerekaxinireti txĩkitakai hĩte, iuaritika erekari niokanatiniri iua niõkatsopatakiti hĩtemoni. Merepanika nota matinaniuata, kotxi nimarotari niokanatsopatakiti hãtatsopatini xika hĩte matinaniuata. Mapaõtinoka maerekaxinireni hĩtxaua. ⁹Uatxa poxokopekano nota. Na nipoxokoniuaata hĩte maerekaxinireni nitxĩkitakini ĩkapani. Nipoxokoniuaata, kotxi maerekaxinireni hinini xika, hĩtakanapari maerekati hĩkamakiti. Iuasaaki hĩkanapiriã Teosomoni. Teoso apokaerekatari ikara atoko inakari himaerekaxinireni, ininiã kona ate misiritai. ¹⁰Erekari Teoso txĩkitakiniri kãkiti matinaniuatini, kotxi iuasaaki kãkiti takanapari maerekati ikamakiti. Ikanapiriã Teosomoni, ininiã Teoso makatxakari iua maerekani. Ikara atoko inakari matinanitxi erekari. Txamari kãkiti Teoso manirekakani matinani ãtião, ininiã ninoa ipinapikako. ¹¹Hĩte matinaniuata himaerekani xika, ininiã Teoso kamaerekatai. Ininiãkara uatxa erekarinoka hinireka hĩkamini. Uatxa iteene hinirekari hĩkaminiri Teoso nireẽkiti. Hinirekari ikinimane imarotiniri hĩkamakiti ereka inini. Uatxa homanatarari maerekati mitxi hĩkamakiti. Maerekaxinireti hĩtxaua himaerekani xika. Uatxa iteene hĩtiraõki aua. Hinirekari himarotiniri nota pirena, nota ereka ninini himarotini ĩkapani. Uatxa hinirekari maerekati kamakari misiritiko. Ininiãkara kona hĩkerokari, iua kiki maerekati ikamakasaaki.

¹²Iua iõkatsopari mitxi niokanatakiti hĩtemoni, niõkatsopata hĩte ĩkapanikara. Kona iua maerekati kamakari ĩkapanini niokanatsopata. Kona iua maerekati kamakari misiritakiti ĩkapanini niokanatsopata. Niokanatarari iua iõkatsopari hĩtemoni atiraõki himarotini ĩkapani. Teoso imarotari atiretinii.

¹³Ininiã ate kamataparaxiniretaãka, kotxi hĩte kamataparaxiniretaãka apaka. Apaka apoxokoniuaata, kotxi Txito poxokoniuaata. Iua poxokoniuaata, kotxi hĩte himakinika kamapoxokonitari iua. ¹⁴Txito hĩtemoni isini apisapanika, nota sãpiretari iua niuikinii hĩte, kotxi peerekai hĩte. Atão nisãkire, kotxi kona nipẽtauaata hĩkamakiti xika, kotxi hĩkamakiti atão. Atãonoka asãkire hĩtemoni. Atãonoka asãkire Txitomoni apaka ate iuikinii hĩte. ¹⁵Apiaãpota Txito tiretinii, kotxi hĩkamari iua sãkire iaõka. Imarotari hãpakapiniri iua hĩpaxitiniritika. ¹⁶Nipoxokoniuaata, kotxi nimarotapitikari hĩkaminiri nõtãkikinii iaõka.

Txineiro Apanakini Sikakito

8 ¹Nitariakori, anirekari asāpiretinii Teoso misākiretikoōtaā apotiitakaniua Masetónia tixini auakani. Peerekari Teoso kamakiti ninoa ĩkapani, kotxi ikinipoko erekari isika ninoamoni. ²Ninoa ĩteene kauarena. Pasāpaniri ninoa misiritiko, iuaritika ienenĩkana ninoa. Na katxineiroteni, iuaritika ipotxitarina itiina isikinina kākiti kaamonirinimoni. ³Nota imarotari ninoa minakati auiniāna, isikarauatana apanakinimoni. ĩteene isikarauatana, ininiā kaiāokatani inatxitana. ⁴Nota kona amanaāri ninoa txineirote kākiti Teoso nakitiakori Xerosareē sitatxiti auakani ĩkapani, iuaritika ninoaka txano: “Ate nirekari txineiro asikini ninoamoni. Pauiritaua asikiniro ninoamoni. Asikiniāro apoxokoniuata, kotxi ikara atoko akamini amoianatari kākiti Teoso nakitiakori,” itxana. ⁵Kona ikarananini ninoa nireka. ĩteene ninoa kamapoxokonitaua ate, kotxi mitxipe ninoa txaua: “Ate nirekari Apiananiri nireēkiti akamini,” itxana. “Īua oerekiniāri inireēkiti hĩtemoni, ate nirekari hĩte paniātakiti apaka akamini,” itxana Masetónia tixini auakani. ⁶Txito amanaāpekai hĩte txineiro hĩsikini Xerosareē sitatxiti auakani ĩkapani, ininiā apaniātari iua sini hĩtemoni hĩsikakiti apakapini ĩkapani, hĩtiraōki ninoa Teoso nakitiakori hōerekini ĩkapani. ⁷Hĩte ĩteene auikari Xesosi sākire. Apanakini poiāoka. Hĩte imarotari Xesosi sākire hĩsāpiretini kākitimoni. Apanakini na ĩteene imarotari. Hĩte ĩteene imarotari Xesosi sākire. Apanakini poiāonoka imarota. Hĩte ĩteene nirekari Teoso parĩka hĩkamini. Apanakini poiāonoka nirekari. Hĩte ĩteene tiretaua ate. Apanakini poiāoka tiretaua. Hĩte apiaerekata, ininiākara ninirekari hĩsikakiti apaka apiari inini, kotxi ikara atoko hĩkaminiā, hōerekari Xerosareē sitatxiti auakani hĩtiretinina.

⁸Kona nipaniātai nitapararitika hĩsikiniro hĩtxineirote ninoamoni. Nataerekatari hĩtiraōki. Atāo atxiĩti hĩtiretari apanakini? Masetónia tixini auakani atāo tiretari apanakini. Hĩte tiraōki ninoa tiraōki atoko atxiĩti? ⁹Himarotari Apiananiri Xesosi Kristo sikari ikinipoko erekari hĩtemoni. Itanapoko auiniri Xesosi Teoso tixine auakasaaki. Iuaritika itakanapari ikinipoko. Minakati mauakinitinoka itxapeka hĩte ĩkapani. Ininiākara ikinipoko itakanapini xika, ikinipoko aua hĩtemoni.

¹⁰Uatxa nota ōtākikai hĩte, erekari hĩkaminiri hĩsākire iaōka, kotxi kita anokanani hĩte merepanika xinikari: “Natokopa itxa akaminiri Xerosareē sitatxiti auakani ĩkapani?” hĩtxa. Hĩte merepanika nirekari txineiro hĩsikinina ninoa. ¹¹Ininiā nōtākikai

uatxa. Hĩkamariko mitxi hĩsãkire iaõka. Hĩpoxokoniritika hinirekariko hĩokanatiniro txineiro ninoamoni, ininiã erekari hĩpoxokoniritika hĩkaminiri hĩsãkire iaõka. Ipixini txineiro hĩtemoni auakaro hĩsikako ninoamoni. ¹²Hĩpoxokoniritika hinirekiniãri hĩsikarauatini Teosomoni, iua apakapapitikari hĩsikakiti. Poiãoka auiniãi, ininiã erekapitikari poiãonoka hĩsikini Teosomoni. Iua apakapapitikari. Iua imarotari !apakata apikomoni hĩsikiniri.

¹³Kona ate nirekari hĩte kaamoni hinini, ikinipoko ninoamoni auini ikapani. Erekari ninoa auakiti hĩte auakititxikana. ¹⁴Uatxa hĩte txineirote auapitika ninoa hĩsikini ikapani. Āti õti hĩte txineirote mauakanisaaki, atxiĩti ninoa txineirote aua, ininiã ninoa sikai hĩte. Ininiã hĩte moianatinina atokotxikana, ninoa moianatai hĩte. Ikara atoko inakari atão. ¹⁵Teoso sãkire iõkatsopatakori txari:

Kiki kaiãopokori apakapakari itetakori !auari. Kiki poiãoka apakapakari !kaamoniri.

Txito Iokanatiko Korĩtomoni

¹⁶“Peerekai,” atxari Teoso, kotxi iua sikanireõtari Txito itiretinii hĩte, nota tiretinii atokotxikana. ¹⁷Txito nirekapitikari ate paniãtakiti ikamini, hĩtemoni isini. Apaniãtiniri apisapanika, inirekari hĩtemoni isini, ininiã ipoxokoniritika isa hĩtemoni. ¹⁸Aiokanatarari ãti aĩtari iuakata. Ikinimane Teoso misãkiretikoãtaã apotiitakaniua iteene apokaerekatarari iua, kotxi isãpiretarari Teoso iokanapirena erekari ikinimanemoni. ¹⁹Ninoa mereẽri iua aĩtari atekata isini Xerosareẽmoni, oa txineiro aanikasaaki. Oa txineiro asikakito oerekana Xerosareẽ auakani Apiananiri ereka inini. Oerekana apoxokoniritika amoianatinina.

²⁰Oa txineiro kaiãopokoro aua, ininiã iua aĩtari siniã atekata, iua imarotari atão asikiniro oa txineiro Xerosareẽ auakanimoni.

²¹Anirekari atão akamini oa txineiro asikasaaki ninoamoni. Anirekari Apiananiri imarotininiri atão akamini. Anirekari kãkiti apaka imarotininiri atão akamini.

²²Iuaĩkana aiokanatarari ãtipekana aĩtari hĩtemoni. Aãtaerekatapekari iua. Ipxokoniritika imoianatarari kãkiti. Apiapoxokonita iua, kotxi imarotari hĩte kaminiri mitxi hĩsãkire iaõka. ²³Txitopekana, nota moianari itxaua. Iua miparĩkatano nota, hĩte amoianatini ikapani. Xesosi sãkire auiãkani mereẽna aĩtariakori Txitokata sikani hĩtemoni. Kãkiti imarotakasaakina ninoa, “Peerekari Kristo,” itxana kãkiti.

²⁴Ininiākara hõerekanako ninoa kikiakori atão hĩtiretinina, ininiã ikinimane Xesosi sãkire auĩākani imarotari atão hĩtiraõkiuatini. Iuasaakiko ninoa imarotari ate sãkire atão inini ate iuikinii hĩte.

9 ¹Nisãpiretai hĩte txineiro asikakito tĩkane Teoso nakitiakorimoni, Xerosareẽ auakanimoni. Nimasãpiretakaniãi hĩte, iuaritika hĩte nirekari hĩtxineirote hĩsikini ninoamoni. Nimarotari ikara.

²Nimarotari iteene hinirekari himoianatinina ninoa. Nitxapekana Masetõnia tixini auakani: “Nota iuikana aĩtariakori Korĩto sitatxiti auakani, Akaia tixini auakani, kotxi kita anokanani ninoa iposope txineiro iokanatinina Xerosareẽmoni,” nitxana. Hĩte poxokoni txineiro hĩokanadini, sikanireõtana Masetõnia tixini auakani apaka iokanatiniro txineiro. ³Uatxa niokanatanana ninoa aĩtariakori ipi ãti pakini hĩtemoni. Hĩte iposope hininiã hĩtxineirote hĩokanadini, erekapitikari, kotxi ikara nisãkire iaõka. Ininiã atão ate iuikinii hĩte. ⁴Masetõnia tixini auakani siniã notakata, hĩtxineirote miposonitipanika, ininiã ate pẽtauata, kotxi ate auikari hĩsãkire. Hĩtepekana apia pẽtauata hĩsãkire iaõka himakamakani xika. ⁵Ininiākara ninirekari ninoa aĩtariakori sini hĩtemoni nota ereẽ napokini apisapanika. Ninoa moianatai txineiro kaiãopokoro hĩsikaenetakito hãpotiitini ĩkapani. Ininiã napokasaaki ereẽ, iposope hĩsikakito nanikini. Ininiã iuasaaki aimarotariko kinirão sikaenetaka hinakito txineiro. Iuasaaki aimarotariko hĩpoxokoniritika hĩsikiniro hĩtxineirote.

Takari Itori Auini

⁶Ia nisãkire hĩxinika. Poiãoka komiri pitakiniã pitakarauatakasaaki, poiãonoka iri pimaporoka. Kaiãopokori pitakiniã, kaiãopokori pimaporoka. ⁷Ininiã pãkixinireẽ pixinikari atão pisikakiti ãtimoni. Kona erekari pimanirekasikatakainiti pisikini. ãti itapararitika paniãtiniãi pisikarauatini, !apakata. Teoso apokaerekatari kãkiti ipoxokoniritika isikarauatini ãtimoni. ⁸Teoso posotari ikinipoko erekari isikinii hĩte, ininiã ikiniõtika ikini sereti hiamonitakiti auiniã, hãpakapari ikinika hinireẽkiti. Ininiã ikinipoko erekari hĩkama. ⁹Teoso sãkire iõkatsopatakori txari:

Teoso sikari itori erekari matxineirotenimoni. Teoso kamakiti atão inakari !ixipoka. Auapikako.

¹⁰Teosora sikari takariki katakarerimoni itakarauatini ĩkapani, ininiã eereka iposope inakasaaki, auari kienatxi inikakiti ĩkapani. Iua atokokana Teoso sikari kaiãopokori takariki hĩtemoni. Iua

anekakari hĩtakare, ininiã eereka iposope inakasaaki, kaiãopokori auari, ininiã kaiãopokori hĩkamakiti atão inakari apanakinimoni. ¹¹Teoso sikai ikini sereti erekari, ininiã ikinipoko auape hĩtemoni. Ininiãkara kãkiti mauarenimoni hĩsirikariko kaiãopokori. Ate anikasaakiro hĩsirikakito apanakinimoni, ninoa txariko: “Peerekari Teoso, kotxi ninoa sikaua ate aamonitakiti,” itxanako.

¹²Ikara atoko inakari hĩkaminiã, hĩsikari Teoso nakitiakori amonitakiti ninoamoni. Apaka hĩsikasaakiri hĩsirikakiti ninoamoni, ninoa kaiãopokori txari: “Peerekari Teoso,” itxanako. ¹³Ninoa poxokoniyatako, kotxi hĩte sikari kaiãopokori ninoamoni, apanakinimoni apaka. Ninoa txariko: “Peerekari Teoso,” kotxi imarotarina erekari hĩte kamakiti. Imarotarina hĩte kaminiri Kristo paniãtakiti iaõka. Imarotarina hĩte atão auikiniri Kristo iokanapirena erekari. ¹⁴Ininiã ninoa misãkiretari Teoso hĩte ĩkapani, kotxi iteene ninoa tiretai hĩte, kotxi Teoso sikari ikinipoko erekari hĩtemoni. ¹⁵Matxari Teoso: “Peerekai pite, kotxi pite sikaua pamarite. Āti pisikakiti iua atoko inakari !auari.”

Paoro Apakapapiretari Apoĩtiko

10 ¹Kataparaxinireri Kristo, iuaritika ianaka õtãkikari kãkiti, ininiã nota Paoro ianaka nõtãkikai. Txamari apanakini hĩte sauaki auakani txari: “Paoro ĩtakoxiti auakasaaki, itapararitika itxitaua ate, atemoni iõkatsopatakasaaki. Txamari iua atekata auakasaaki, ipĩkarauata amaerekani isãpiretiniua,” itxana. Ikara apanakini sãkire na atão, kotxi ĩtakoxiti nauanãta, iuaritika amaãtiki nõtãkikai hĩte. ²Kona ninirekari noerekinii hĩte apanakini nitxitini ereẽ napokasaaki. Niposotapitikari nitapararitika nitxitiniri apanakini ereẽ napokasaaki, kotxi ninoa txari: “Paoro kamakiti Teoso sãkire mauĩãkani kamakiti atokotxikana,” itxana. Txamari na atão ninoa sãkire. ³Aĩto tapara poiãoka, kotxi kãkiti atxaua, ininiã aĩto taparaã !apakata anaiatiniri maerekati. Teosora sikataparataua aãkixinireẽ, maerekati anaiatini ĩkapani. ⁴Ate ikeeko kona Xesosi sãkire mauĩãkani ikeeko atokoni. Teoso ikeeko isika atemoni. Kaposotiireri Teoso ikeeko, ininiã aposotari Satanasi kamakiti axipokini aiko kaikori axipokini atokokana. ⁵Kãkiti iuikaua. !Nirekarina auikinirina Teoso imarore. “Paimatireua ate,” itxanãtana. Teoso sikaimaroretãu ate, ninoa sãkire paxirari inini aõerekini ĩkapani. Ikinipoko axinikakiti anireka Kristo nireẽkiti iaõka axinikini, ininiã axinikakiti

ãtião auiniã, atxĩkitakari iua axinikakiti imamakini Kristo nireẽkiti iaõka inini ĩkapani. ⁶Hĩte iteene kamakasaakiri Kristo nireẽkiti iaõka, ate misiritariko kãkiti ereẽ Kristo nireẽkiti imakamakanisaaki.

⁷Hĩte xinikari hãtamatakitinoka. Kona hĩxinikari kãkiti ãkixinireẽ auakari. Kãkiti ereẽ uãkatiniãri Kristo nakiti ininiuana, erekari imarotnirina ate apaka Kristo nakitiakori aniniuua, ninoa Kristo nakiti ininiuana atokotxikana. ⁸Atxĩiti iteene niuikari Apiananiri sikaposotiiretiniua ate, iuaritika kona nipẽtauata niuikiniri ikara, kotxi Apiananiri sikaposotiiretaua ate, hĩte akamataparaxiniretini ĩkapani. Kona ate nirekari hĩte ãkixinire tapara poiãõãpotini. ⁹Kona ninirekari hĩpĩkarauatini, iõkatsopari niokanatsopatakiti hãtatsopatini xika. ¹⁰Apanakini txari: “Paoro txitaua itapararitika iokanatsopatakitiã, txamari iua atekata auakasaaki, isãkire ãtião. Iuasaaki kona kataparaxinireri iua. Iuasaaki ipĩkarauata ate itxitini,” itxana apanakini. Na atão ninoa sãkire. ¹¹Itakoxiti ate auakasaaki, asãkire aiokanatsopatakiti iuatxikana asãkireta, ereẽ hĩtekata aãuakasaaki.

¹²Ninoa ate misãkirepiretakani iteene iuikaua. Atauako ninoa apiaerekata? Atauako !erekaua ate? !Kĩĩkitena ninoa. Ninoa uãkatari ninoa kamakitinoka erekari inini, ininiã ninoa iaõtari apanakini kamakiti. Apanakini kamakiti ninoa kamakiti atoko ininiã, ninoa uãkatari apanakini kamakiti apaka erekatxikana. Txamari na atão.

¹³Atepekana, kona ate iuikari ateka kamakiti. Ate iuikari parĩkatxi Teoso sikakiti atemoni akamini ĩkapani. Iuanoka ate iuika. Iua paniãtaua aparĩkauatini hĩte ĩkapani. Iua aparĩka ate iuikapitika.

¹⁴Teoso paniãtakitinoka akama. Ia aparĩka, ininiã ate sari hĩtemoni Kristo iokanapirena erekari asãpiretini ĩkapani. Ininiã apakatapitika ate iuikiniri ikara aparĩka. ¹⁵Apanakini parĩka Teoso ĩkapani ate kona txari: “Iua parĩkatxi ate kamakiti,” kona atxa. Ate nirekari hĩte auikaãpotiniri Kristo sãkire, Kristo sãkire iteene hãuikini ĩkapani, ininiã ate nirekari aparĩkauatini Teoso ĩkapani hĩte auiniãtaã, Kristo sãkire apanakini auikini ĩkapani. ¹⁶Ate nirekari Kristo iokanapirena erekari asãpiretiniri kãkiti, hĩte tixine apiko auakani Xesosi sãkire masãpiretakotipanika ininiãtaã. Ininiã kona aparĩkauata apanakini parĩkauatiniãtaã. Ininiã apanakini parĩka: “Ate parĩkakara iua,” kona atxari.

¹⁷Teoso sãkire iõkatsopatakori txari:

Pinirekatari piuikarauatini? Pinirekiniãri, ininiã piuikariko Apiananiri kamakitinoka.

¹⁸Teoso kona apokaerekatari kâkiti iuaka, “Erekapitikano,” inakari. Teoso sâpiretiniâri: “Erekapitikari iua kâkiti,” ininiâ Teoso apokaerekatari iua.

Teoso Maiokanatakini

11 ¹Atxiîti miîkiteti sâkirauatini atoko nimisâkiretai hîte, iuaritika hâuiritano nota. ²Teoso nirekinii hîte iua nakitiakorinani hininiua, iua atokotxikana nota nirekai hîte Teoso nakitiakorinani hininiua. Nisikaenetai Kristomoni hîtaniri atoko inini îkapani. Iuamoninani nisikaenetai. Ninirekari iuamoni nisikinii, âtokoro kikikata masirîkakato atoko inakaro. ³Kitxakapirîka Satanasi auaitotari imini. Iua imini misirienetaro Eva, kotxi paimatireri Satanasi sâkire. Nipîkari Satanasi misirienetini hîte apaka, ininiâ eereka hîxinikakiti na atâoni. Nota pîkari Xesosi hîtakanapini. Mitxi iteene hîtiretari iua. Iuananira hîtireta. ⁴Kotxi hîte apakapari hîpoxokoniritika ikinimane ereê apokakani, “Ate Xesosi sâkire sâpiretakaniua” inakani, txamari Xesosi pirena ninoa sâpiretakiti na atâoni. Kona ate sâpiretari ikara atoko inakari, iuaritika hâuikari ninoa sâkire. Hâuikasaakiri ninoa sâkire, atxiîti hâpakapari matamatakoti, txamari kona hâpakapari Erekarî Matamatakoti ate sâpiretakiti. Ate sâpiretai hîte atâo Kristo iokanapirena erekari, txamari hîte auikari âtiâo.

⁵Hîtemoni, Teoso iokanataka ninoa kâkitimoni. Hîtemoni, ninoa Teoso iokanatakini apiarini. Nota poiâo atxiîti? Ninoa apiata atxiîti? Konapitini. ⁶Atxiîti kona nota iteene imarotari nisâkirauatini, iuaritika nimarotapitikari Teoso sâkire. Himarotapekari ikara atoko inakari, kotxi asâpiretapekai.

⁷Teoso iokanapirena erekari nisâpiretakasaakii hîte, maxikatiîka nisâpiretai. Kona ninirekari hiîkitxitinino, ininiâ nota poiâotakaua, hîte atâo inakari himarotini îkapani. Ikara atoko nikerokatari atxiîti? ⁸Hîtekata niparîkauatakasaaki, kâkiti âtiâtaâ Xesosi sâkire auîâkani iokanataro txineiro notamoni, txamari kona nota moianatana ninoa iusaaki. Hîtekara nimoianata iusaaki. ⁹Hîtekata nauakasaaki, nota nirekamaro txineiro. Txamari kona nota amanaâi hîtxineirote. Aîtariakori Masetônia tixinikini mininano itanapoko niamonitakiti. Iua atokotxikana kona namanaâpaniro hîtxineirote nota îkapani, kotxi atxiîti nota minari atoko nitxa hîporikiâ. Kona ninirekari ikara atoko inakari nininiua. ¹⁰Kristo atâonoka isâkire. Isâkire nâkixinireê auape, ininiâ nota sâkire apaka atâo. Nisâpiretapanikari kâkiti hîtxineirote

nimanirekakani pirena. !Auari ikara nisãkire iotokakakari ikinika Akaia tixiniã. ¹¹ Kinirepa ikara atoko nitxa sãkireta? Atxiĩti kona nitiretai hĩte? Teoso imarotari nota iteene tiretinii hĩte.

¹² Uatxa iuaĩkana nisãpiretai hĩtxineirote nimapakapakani. Nanera kãkiti uatxa hĩtekata auakani Teoso maiokanatakini txari: “Ate kamari Paoro parĩkatxikana,” itxana. Ikara atoko ininiã iuikauana. Txamari ninoã parĩka ãtiã, kotxi ninoã apakaparo hĩtxineirote. Ate kona apakaparo hĩtxineirote. ¹³ Teoso kona iokanatana nanera hĩtemoni. Na atã Teoso iokanatakini !itxauana. Imisirienetaina hĩte, “Aparĩkauata Teoso ĩkapani,” inakasaakina. Nanera txari: “Kristo iokanatakiniraua ate,” itxana. Txamari na atã nanera sãkire. ¹⁴ Ikara atoko inakari auapitika, kotxi Satanasi sari kãkitimoni. Itxari: “Nota Teoso nitiri nitxaua. Nota oerekai atã inakari.” Ininiã iua sãkire auiãkani auapitika. ¹⁵ Ininiãkara nanera kikiakori Satanasi nitiriakori txari: “Atã inakari kamakaniuã ate. Teoso nitiriakori atxaua,” itxana. Xipokatxi õtisaaki imisiritaãkanako ninoã maerekati ikamakitina xika.

Paoro Misiritiko Pirena

¹⁶ Iuaĩkana nisãpiretai. Miĩkiteti !nitxaua, iuaritika hĩte potxitari kãkiti miĩkiteni, ininiã miĩkiteti atoko niuikaua, kotxi nota posotari niuikiniua. ¹⁷ Apiananiri kona sãkirauata ia atoko. Miĩkitetinoka sãkirauata ia atoko iuikiniua. ¹⁸ Nanera kikiakori iuikaua, Teoso sãkire mauĩãkani iuikiniua atokokana, ininiã nota apaka sãpiretari niuikiniua. ¹⁹ Hĩte auiritari kãkiti miĩkiteni himoianarini ininiua, kotxi !kiĩkitei hĩte. ²⁰ Nanera hĩtekata auakani txĩkitakai hĩte initiriakorina hininiua. Hĩte auiritari ikara atoko inakari. Nanera amanaããpotari ikini sereti hĩte nakiti. Ikamarina inireẽkitina hĩtemoni. Ipaniãtaina ikiniõtika inireẽkitina hĩkamini. Imisiritaina hĩte. Hĩte auiritari ikara atoko inakari ikaminina. ²¹ Erekari nipẽtauatini atxiĩti? Kotxi kona kataparaxinireno nota nanera kamakiti atoko nikamini hĩtemoni. Kataparaxinirena nanera.

Ikamakitina iukana, ininiã miĩkiteti atoko kataparaxinireno nota. Nikamakiti niuikako. ²² Nanera Epireoakorikani? Ari. Nota apaka Epireo nitxaua. Nanera Isaeo apika mekaniriakorikani? Ari. Nota apaka Isaeo apika mekaniri nitxaua. Nanera Aprão apika mekaniriakorikani? Ari. Aprão apika mekanirikanarano nota apaka. ²³ Nanera Kristo nitiriakorikani? Atxiĩti. Miĩkiteti iuikiniua atoko nitxa: “Kristo nitiri apiaerekatakari nitxaua nota.” Nota apia

parĩkauata Teoso ĩkapani. Apiata nimisiritiko, kotxi kaiãokatani kateia ãki nitakaãka. Kaiãokatani nota noropataãka aãpitsaã. Kaiãokatani nipinaarita. ²⁴Ipi ipi ãti pakinikata Xoteoakori noropatano aãpitsaã. Iuasaaki inoropatanona trĩta novi pakinikata. ²⁵Ipi ãti pakinikata Homanoakori noropatano aãkeẽ. ãtikata kai soroã nikiporonakaãka. Ipi ãti pakinikata maporoã nisikasaaki, maporo sakika apanĩkakiã. ãti ĩkanõkati, ãti pokamarariti pakini ninapa potxoari uiniti nipimakaãtini. ²⁶Nianaxititapika. Natamonõkonitari uini torõkani. Natamonõkonitari kiĩtiririni. Natamonõkonitari ninirimane. Natamonõkonitari ninirimane minakanuia. Natamonõkonitari sitatxi nauakasaaki, kãkiti mauakaniãtaã nauakasaaki, potxoari uiniti nĩpiriãtakasaaki pakini. Natamonõkonitari kãkiti, “Xesosi sãkire aãuika” inakanikata nauakasaaki, kotxi na atão ninoa sãkire. ²⁷Kaiãokatani nisãpaka itori parĩkatxi xika. Kaiãokatani nitsii aua. Kaiãokatani kona apakata nimakini ĩkanõka. Kaiãokatani ninatxita, niposonata. Kaiãokatani nipokori !auari. Kaiãokatani nimĩteenekari katxĩkareri. Kaiãokatani nimãka !auari. ²⁸Ikara atoko inakari monõkari auapika notamoni. Apaka niparĩka kasãpaniri aua, kotxi ikiniõtika niparĩkauata kãkiti Teoso misãkiretikoãtaã apotiitakanuia ĩkapani. ²⁹ãti iõkapetiniã, nota apaka niõkapeta. ãti txĩkitakaãka maerekati ikamini, ininiã nota maerekaxiniretinoka nitxa.

³⁰Hĩte nirekiniãri niuikiniua, ininiã niukari niõkapere. ³¹Aãũite Xesosi Kristo iri, Teoso imarotari nisãkire atão inini. ãtipirika matxari: “Peerekai.” ³²Tamásiko sitatxiti nauakasaaki, kãkiti auĩte apiari Areta inakori auakasaaki, Tamásiko auakani auĩte paniãtari sotatoakori kaikotini sitatxi kãkiti ĩronakiniãtaã nota imaĩkinina ĩkapani. ³³Txamari kona nota pokĩka sitatxi toreãtaã. Nĩroã kotari mitari ãki. Iuasaaki aĩtariakori iokatxakano aapokotxi sonaã sitatxi pirikere mapara. Ixitipe apoka nitxa. Ikara atoko itxa nimatekini, ininiã kona ninoa maĩkano iuasaaki.

Taponetxi Teoso Sikiniri Paoro

12 ¹Hinirekatari apikomoni niuikiniua? !Apakata, iuaritika hinirekiniãri, niuikapanikauako, kotxi Apiananiri sikano taponetxi peereri. Iua oerekano imarore. ²Akokaxiti katosi anokanani inakasaaki, nanikaãka Teoso tixinemoni iaxiti apiko nopinixiti. Iuasaaki nitaponeuataako? Atxiĩti niĩto atão anikaãkauako? Kona iteene nimarotari. Teosonokara imarotari. ³Ianoka nimarota.

Nanikaãka Teoso tixinemoni nitaponeẽ atxiĩti, atão niĩto anikaãka atxiĩti. Teosonoka imarotari. ⁴Iuaxiti nikenakotari sãkiretxi erekari. Ikara kona nimarota iuaĩkana nisãpiretini. Apaka !auritaãka nisãpiretiniri kãkiti. ⁵Ninirekiniãri, niuikari nitapone ikara atoko inakari, txamari !apakata notaka niuikiniua. Niõkaperenoka niuika. ⁶Ninirekiniãri niuikiniua, atãonoka nisãpireta, kotxi kona miĩkiteti !nitxaua. Txamari kona ninirekari niuikiniua, kotxi atxiĩti kãkiti uãkatari nota apiari nininiua. Ninirekari kãkiti atão imarotinino. Erekari kãkiti imarotinino nisãkireẽ, nikamakitiã pakini.

Paoro Misiritiko Inako Tsii

Atoko Inini

⁷Peerekari nitikakiti Teoso tixine nanikikosaaki, iuaritika Teoso kona nirekari niuikiniua, ininiãkara Teoso auiritari Satanasi misiritinino niĩtoã. Katsiiri. Inako atoko itxa niĩtoã, ininiã niuikiniua !auari. ⁸Ipi ãti pakinikata namanaãri Apiananiri ia nitsii imaktxakini. ⁹Txamari itxano: “Kona nimaktxakari. Ikinipoko erekari nisikakiti sikataparatai. Iuanoka pinireka. Piõkapetakasaaki, nota tapara pãkixinireẽ apiata,” itxano. Ininiãkara nipoxokoniritika niuikari niõkapere, kotxi iusaaki nimarotari Kristo posotiire nãkixinireẽ auini. ¹⁰Niõkapetakasaaki, nipoxokoniua. Nixiniketikosaaki, nipoxokoniua. Nimaxikikosaaki, nipoxokoniua. Nimisiritikosaaki, nipoxokoniua. Nikamakiti tĩkane nimimarotakanisaaki, nipoxokoniua. Ikara atoko inakari nimĩteeneka nipoxokoniritika, kotxi Kristo nakiti nitxaua. Niõkapetakasaaki, nitapara nãkixinireẽ apiata.

Paoro Nirekari Erekari Koríto Auakanimoni

¹¹Miĩkiteti sãkirauatini atoko nisãkirauata, txamari hĩte xika nisãkirauata miĩkiteti sãkirauatini atoko, kotxi hĩte iuikaãkamanoko nota, kona nota nirekamariko niuikiniua. Minakati nitxaua, iuaritika nanera Teoso maiokanatakini hĩtekata auakani kona apiaerekata. ¹²Hĩtekata nauakasaaki, nikamakiti oerekai atão Teoso iokanatakiti nininiua, kotxi iusaaki noerekai Teoso oerekakiti kãkitimoni. Noerekai kãkiti maposotakinini. Noerekai posotiiretxi iusaaki. !Asãpaka ikara atoko inakari aõerekinii hĩte. ¹³Atxiĩti apiata nitiretari apanakini Teoso misãkiretikoãtaã apotiitakaniua ãtiãtaã auakani? Konapitini. Ninoa nitiretini atoktxikana nitiretai hĩte. Namanaãna ninoa txineirote

niamonitakiti ĩkapani. Hīte txineirote kona xatiki namanaāi, ininiā nikerokatari atxiīti? Himaxinīkaretariko ia nikerokakiti.

¹⁴Ipikata nisipeka hītemoni. Naiamatapeka iuaīkana hītemoni nisini tīkane. Kona hītxineirote kona namanaāpanii. Hītxineirote kona ninireka. Hītera ninireka. Amarini kona nīkatana iri, inoro pakini. Iri, inoro pakinira nīkatana imiakori. Nota hīri atoko nitxaua. ¹⁵Nipoxokoniuata ikinika nota nakiti nisikinii hīte. Notaka nisikaua hītemoni. Nipoxokoniritika nisikai. Txamari nota tiraōki hīte ĩkapani apiaāpotakasaaki, hīte tiraōki nota ĩkapani poiāōāpota.

¹⁶Atāokani ikara atxiīti? Iuaritika ia nimarota. Kona xatiki namanaāi hinakiti hīsikinino. Atxiīti āti ereē auakari txari: “Paoro misirienetaua ate. Paxirari isākire,” itxa atxiīti. Txamari ikara na atāo. ¹⁷Natokopa nitxa nimisirienetini? Atauako kikiakori hītemoni nota iokanatakini misirienetai hīte? !Imisirienetaina. ¹⁸Nōtākikari Txito hītemoni isini tīkane. Nipaniātari āti aītari iuakata isini. Atauako Txito misirienetai hīte? Konapitini. Erekarī Matamatakotira anikano nota. Iua apaka anikari Txito. Nota sari Xesosi nirekinimoni. Txito apaka sari iua nirekinimoni.

Paoro Pīkare

¹⁹Atxiīti hīte xinikari ikara asāpiretai, ate ereka anini himarotini ĩkapani. Konapitini. Ate sākirauata hītekata Kristo sākirauatini atokokana, kotxi Teoso atamataua. Ate tirketakini hītxaua hīte, ininiā ikinipoko akamakiti akaminii hīte, hīte ākixinire tapara auini ĩkapani. ²⁰Nipīkarauata ereē napokini, kotxi atxiīti hīte kamari nimanirekakiniti. Atxiīti napokasaaki ereē, kona hīte apokaerekatano nota. Ereē napokasaaki, nipīkari nimarotini hīte txitakakiniua, hīxikotakakiniua, homanatakakiniua, hīpotxinani auini, himisākirepiretakakiniua, aāpirena hīsāpiretini, hīuikiniua, hineenamauatini. Ikara nimarotini nipīka, ereē napokasaaki. ²¹Ininiā hītemoni napokasaaki, nipīkari Teoso kamapētatinino nota hīte maerekani xika. Nipīkari nitxiapatini maerekati hīkamakiti xika, kotxi kaiāopokori kamari maerekati akokaxiti, iuaritika !itakanapapanikari iua maerekati. Ixinikakitina maerekatnoka. Maerekati ikini sereti iītona nireēkiti aua. Ītanoro minakotokatika isirīkana. Ikara atoko inakari kona itakanapapanikana.

Paoro Sākire Imapotōkire Ōtākikare

13 ¹Iplikata nota sari hītemoni. Iuaĩkana hītemoni nisako. Teoso sākire iōkatsopatakori txari:

Ipi āti pakini kākiti atamatiniāri maerekati āti kamakiti, ninoa sākire auikaāka, ininiā iua maerekati kamakari misiritaākako. Ipi kākiti atamatiniāri maerekati āti kamakiti, ninoa sākire apaka auikaāka, ininiā iua maerekati kamakari misiritaākako,

itxa Teoso sākire. ²Akokaxiti hītekata nauakasaaki, nōtākikapekai himaerekani hītakanapini. Iuasaaki nōtākikana mitxi maerekati kamakani, apanakini apaka. Nitxana: “Ātikata uai napokasaaki, nimisiritapitikari ikinimane maerekati kamakani,” nitxapekana. Iuaĩkana uatxa itakoxiti nauakasaaki, ikara nisākiretxikana nisāpiretai hīte. ³Hīte nirekari himarotiniiri: “Atāokani atxiīti Paoro sāpiretari Kristo sākire?” hītxa. Napokasaaki ereē, himarotapitikariko atāo nisāpiretiniri Kristo sākire. Kristo liōkapeta. Oerekepekai iposotiire hīte sauaki. ⁴Kristo okikosaaki aamina ĩpiriāmitakari nopini, iito iōkapere aua. Uatxa kataparari iua, kotxi Teoso sikataparatarari iua. Ate ĩto apaka iōkapeta, mitxi Kristo ĩto iōkapetini atoko, iuaritika Teoso sikataparataua Kristokata aāuini hīte amoianatini ĩkapani.

⁵Hīxinikariko hākixinireē auakari. Atāokani hāuikatari Teoso sākire? Hīteka ataerekatauako. Himarotatarari Xesosi Kristo hākixinireē auini? Teoso sākire hākixinireē mauakaniā, Kristo Xesosi !auari hākixinireē. ⁶Ninirekari himarotiniiri Kristo Xesosi auini ate ākixinireē. ⁷Ate misākiretari Teoso, maerekati hīte makamakani ĩkapani. Kona ate nirekari kākiti sākire: “Peerekari Paoro. Iua imarotapitikari Teoso sākire oerekini, kotxi Korĩto sitatxiti auakani kamari Teoso sākire iaōka.” Ikara kona ate nireka, ate iuikiniua ĩkapani. Atxiīti kākiti uākatari Xesosi Kristo !auari ate ākixinireē, iuaritika ate nirekari hīte kaminiri atāonoka. ⁸!Apakata aiotokakiniri atāo inakari. Atāo inakari auapika. Atāo inakari lixipoka. Apakata aōerekiniri atāo inakari. ⁹Atxiīti ate iōkapeta, iuaritika apoxokoniuaata hītaparaxinire akenakoenetakasaaki. Ate misākiretari Teoso hīte atāonoka hīkamini ĩkapani ikiniōtika, Xesosi sākire iaōka hīkamini ĩkapani.

¹⁰Ikara atoko inakari niõkatsopata hĩte ĩkapani hĩtekata nimauakanisaaki, kotxi ereẽ napokasaaki, kona ninirekari nitxitinii hĩte. Niposotapitikari nitxitinii, kotxi Apiananiri sikaposotiiretapekano atão nikamini hĩtemoni. Txamari kona ninirekari Xesosi sãkire hĩtakanapini, nota txitinii xika. Ninirekari hĩte kataparaxinire hinini, Xesosi sãkire iteene hãuikini ĩkapani.

¹¹Nitariakori, xipope niõkatsopare. Ereẽpiko. Ikiniõtika atãonoka hĩkamako. Xesosi sãkire iaõka hĩkamako. Hĩkamariko nisãpiretakiti iaõka. Hĩxinikakiti ãtinoka itxauako. Kona hĩtxitakakapeua. Ininiãkara Teoso katiraõkiri, kauãreri, auapikako hĩtekata.

¹²Haõkitakakasaakiua, hĩpoxokoniritika hãpakapakakauako, kotxi Apiananiri nakitiakori hĩtxaua.

Ikinimane Teoso nakitiakori uai auakani xinikamanapitai hĩte.

¹³Apiananiri Xesosi Kristo sikari ikinipoko erekari hĩtemoni. Teoso iteene tiretai. Erekari Matamatakoti moianatai hĩte hĩkinika. Ameẽ.

KARÁSIA

Paoro Iokanatsopata Karásia Auakanimoni

1 ¹Nota Paoro iokanatsopata ia aätsopa hitemoni. Nota Teoso iokanatakitino kãkitimoni Teoso iokanapirena nisãpiretini ãkapani. Kona kãkitini iokanatano nota. Xesosi Kristora iokanatano nota. Aãri Teoso, Xesosi ipinaãka atoko õkitikakarira, iuara iokanatano nota kãkitimoni. ²Ikinika aãtariakori notakata auakani, nota apaka xinikanãtai hãte. Hãte ikini aikoti Teoso misãkiretikoõtaã apotiitakaniua Karásia tixini auakani axinikanãtapika.

³Aãri Teoso, Xesosi Kristo aãuãte pakini sikari ikinipoko erekari hitemoni. Ninoa kamaerekaxiniretai hãte.

⁴Xesosi ipina amaerekani imaktxakini ãkapani. !Erekari uatxa auakani. Maerekati kamakani sauaki aãuakasaaki, Xesosi ipina ate imaktxakini ãkapani, amapinakani ãkapani. Xesosi ipãpe ate ãkapani, kotxi aãri Teoso nirekari Xesosi ipinini ate maerekani imaktxakini ãkapani. ⁵Ikiniõtika: “Peerekai,” matxari Teoso. Aãtipirika kãkiti txapikari Teoso: “Peerekai.” Ameã.

Ãti Iokanapirena Erekari !Auari

⁶Nikenakopiretari Teoso hãtakanapaãpotini. Iuasaaki nitsorãkaãnãta. Kinirepa hãtakanapari Teoso sãkire? Kotxi mapa kasiritinoka hãte auikari Teoso iokanapirena erekari. Kristo iteene tiretai hãte, ininiã akiritai hãte inakitiakori hininiua ãkapani. Kinirepa hãuikatari ãti iokanapirena? ⁷Atão nisãpiretai hãte. Ãti iokanapirena erekari !auari. Nikenakopiretari kãkiti hãte oereẽkani. Ninoa nirekari

ikoketinirina isākirena Kristo iokanapirenakata. Uatxa !himarotaikari atão sãpirenatxi. ⁸Atão asãpiretapekai Teoso iokanapirena erekari. Ātião sākiretxiti asãpiretiniāi, Teoso iokanataua ate kākiti misiritikomoni, ātipirika misirikaretxi auiniātaã. Teoso nitiri iaxitikiri apaka sãpiretiniāi ātião iokanapirenatxi, Teoso iokanataru iua iniriti imisiritikomoni ātipirika misirikaretxi auiniātaã. ⁹Hĩte auikapekari Teoso iokanapirena erekari. Ātião iokanapirenatxi sãpiretakari sãpiretiniāi Teoso iokanapirena atão minakati, iokanataãkako imisiritikomoni ātipirika misirikaretxi auiniātaã. Asãpiretapekai ikara inakari sākiretxiti. Uatxa iuaĩkana nisãpiretai.

¹⁰Ikara atoko nitxai hĩte, ininiã himarotari kona ninirekari: “Peerekari Paoro kamakiti,” niniko. Nota nirekari Teosonoka: “Peerekari Paoro kamakiti” ininino. Nanera atão minakati sãpiretakani txai hĩte: “Paoro nirekari kākiti apokaerekatini iua.” Ikara na atãoni. !Ninirekari kākiti apokaerekatini nota. Ninirekiniãri kākiti apokaerekatini, kona Kristo nitiri !nitxaikaua.

Teoso Akiritari Paoro

¹¹Nanera atão minakati sãpiretakani hĩte oereẽkani: “Paoro iokanapirena kona Teoso iokanapirenani,” itxana ninoa sãkire. Nitariakori atãopitikara nisãpiretai hĩte. Iokanapirenatxi hĩtemoni nisãpiretakiti kona kākiti sãkireni. Teoso sãkirera. ¹²Kona kãkitini sãpiretano ia iokanapirenatxi. Kona kãkitini oerekano. Xesosi Kristora sãpiretano nota iua iokanapirenatxi.

¹³Hĩte imarotari mitxi nauakasaaki, Xoteo kiomanekorini oerekakiti nauikasaaki, iusaaki kona nitiretana Xesosi sãkire auĩãkani. Iteene nimiritana ninoa. Ninirekari nixipokini Xesosi sãkire kĩpitakani. ¹⁴Iusaaki nimarotari Xoteokori kitxakapirĩkarini paniãtakiti. Nikamari imakinika ninoa paniãtakiti. Iusaaki nimoianariakori apaka kamari ninoa kitxakapirĩkarini paniãtakiti. Nota apiata kamari ninoa sãkire iaõka. Iteene ninirekari nikaminiri kitxakapirĩkarini paniãtakiti.

¹⁵Teoso iteene tirtano nota. Iua mereẽno nota nauini apisapanika. Iusaaki akiritano nota iniriti nininiua tĩkane. ¹⁶Teoso keto manapi apokasaaki, oerekari imi notamoni, imi Xoteo minakonimoni nisãpiretini ĩkapani. Iusaaki kona nisãpiretari kākiti Teoso oerekakiti sākiretxiti, ininiã na kãkitini sãpiretano nikamakiti tĩkane. ¹⁷Iusaaki kona nisari Xerosareẽ sitatxitimoni, ininiã nota apisapanika Teoso

iokanatakini kona õtãkikano. Kona kãkitimonini nisa noerekiko ïkapani. Arápia tixinimoni nisapitipo. Eereka nikanapiriã Tamásiko sitatxitimoni.

¹⁸Ïpi anokanani, ãti anokanani pakinikanani napaãka atoko, nisa Xerosareẽmoni Petro nimisãkiretini ïkapani. Ïpi semanati ninapa Petrokata. ¹⁹Apanakini Teoso iokanatakini isãkire sãpiretakani kona naõkita. Apiananiri itari Txiako inakorinoka naõkita. Ininiãkara kona kãkiti sãkireni nisãpiretai hïte. Teoso iokanapirenakara nisãpiretai hïte.

²⁰Ia niõkatsopatakiti nisãpiretakiti hïtemoni atão inakari. Teoso imarotari atão inakari nisãpiretinii.

²¹Xerosareẽmoni nisaãka atoko, nisari Síria tixini, Sirísia tixini apaka. ²²Iuasaaki Kristo sãkire auĩãkani, Xotéia tãpa auakani, !aõkitapanikano nota iuasaaki. ²³Ninoa imarotari apanakini minapiretakiti. Apanakini sãkire: “Kiki mitxi ate misiritakari, uatxa sãpiretari Xesosi sãkire. Mitxi iua nirekari ixipokiniri Xesosi oereẽkiti sãkiretxiti, iuaritika uatxa inirekari oerekiniri Xesosi oerekakiti sãkiretxiti kãkitimoni,” itxana apanakini sãkire. ²⁴Ininiãkara ninoa: “Peerekari Teoso,” itxana, kotxi nota auikapekari Xesosi sãkire.

Xesosi Iokanatakini

Apakapari Paoro

2 ¹Katosi anokanani napaãka atoko, nikanapiriã Xerosareẽmoni nimoianari Panapee inakorikata. Nanikari nimoianari Txito inakori apaka notakata. ²Xerosareẽmoni nisa, kotxi Teoso oerekano nisini iuamoni. Iuaã napokasaaki, nisãkirauata Xesosi sãkire auĩãkani auĩteakorikata. Ninoakatanoka nisãkirauata. Teoso iokanapirena erekari Xoteo minakonimoni nisãpiretakiti nisãpiretana ninoa. Nota nirekari ninoa imarotiniri nisãpiretakiti atão inini. Apaka ninirekari ninoa imarotiniri iuaĩkana katana nisãpiretakiti atão inini ïkapani. Nisãpiretakiti ikenakotakasaakina, ninoa: “Atãopitikara pisãpiretakiti Xoteo minakonimoni,” itxana. ³Txito nimoianari na Xoteo !itxaua. Krekora itxaua, ininiãkara Teoso takaõtxikare !uari iuamoni, iuaritika Xesosi sãkire auĩãkani auĩteakori na paniãtari itsiki mata kisauakiko. ⁴Mitxi apanakini kikiakori apoka iuaã. Ninoa sãkire: “Ate auikari Xesosi sãkire,” itxana ninoa. Txamari na atão ninoa sãkire. Ninoa apotiitaua Xesosi sãkire auĩãkanikata. Inirekarina Txito ïtoã Teoso takaõtxikare takiko. Ninoa nirekari imarotininirina kitxakapiriĩkarini

Xoteo kiomaneakorini paniãtakiti atakanapini, kotxi atakanapapekari ipixini ninoa paniãtakiti, kotxi Kristo Xesosi nakitiakori atxapekaua. Ninoa nirekari imarotini ikinika ate oerekakiti sãkiretxiti. Ninoa nirekari ate kaminiri ikinika kitxakapirĩkarini Xoteo kiomaneakorini paniãtakiti. Ninoa nirekari ikinika Xesosi sãkire auiãkani, Xoteo minakaniua apaka kaminiri Xoteo kiomaneakorini paniãtakiti. Ninoa nirekari nitiritxi amotakoni atoko aniniua. ⁵Kona xatiki akamari ninoa nireẽkiti, kotxi inirekarina Teoso iokanapirena atão inakari akoketini Xoteo kiomaneakorini paniãtakitikata. Ate nirekari Teoso iokanapirena atãonoka inakari asãpiretinii.

⁶Xesosi sãkire auiãkani auĩteakori txari notamoni: “Xoteo minakonimoni pisãpiretakiti erekapitikari. Apikomoni ate sãkire !auari ninoa pisãpiretini ĩkapani,” itxana. Ninoa auĩtetxiakori itxauana, iuaritika Teosomoni ninoa apanakini kãkiti poiãorini atokotxikana itxauana, kotxi Teoso atamatari aãkixinire. Ininiãkara nota !nipĩkari auĩtetxi. ⁷Ninoa Xesosi sãkire auiãkani auĩteakori apokaerekatari niparĩka. Ninoa imarotari Teoso sikano nota ia parĩkatxi, ia iokanapirenatxi erekari nisãpiretinina Xoteo minakaniua. Iua atokotxikana Teoso sikari parĩkatxi Petromoni, iokanapirenatxi erekari Xoteoakori isãpiretini ĩkapani. ⁸Teoso iokanatari Petro Xoteoakorimoni, ininiã isikaposotiiretari iua ninoa sauaki iparĩkauatakasaaki. Iua atokotxikana Teoso iokanatano nota Xoteo minakonimoni. Nota apaka isikaposotiireta ninoa sauaki niparĩkauatakasaaki. ⁹Iuasaaki ninoa auĩteakori Txiako, Petro, Xoão pakini imarotari Teoso sikinino notamoni ia parĩkatxi, ininiãkara imaĩkarina niuako, Panapee uako pakini, kotxi akinika aparĩkauata Teoso ĩkapani. Akinika aãpokaerekatari nota, Panapee pakini sãpiretiniri Teoso sãkire Xoteo minakonimoni. Akinika aãpokaerekatari Txiako, Petro, Xoão pakini sãpiretiniri Teoso sãkire Xoteoakorimoni. ¹⁰Ninoa paniãtaua ate matxineiroteni atiretini. Iuanoka ipaniãtaua. Napokaerekatari ninoa sãkire, kotxi ninirekapitikari matxineiroteni nitiretini.

Paoro Ôtãkikari Petro

¹¹Eereka Petro motikaẽtaua ate Ãtxiokia sitatxiti aãuakasaaki. Iuasaaki Petro kamakiti na atãoni. Ininiãkara nota sãkirauata Petro apisatoõ: “Petro, pite kerokari,” nitxari iua. ¹²Merepanika Petro nipokota ikiniõtika aĩtariakori Xoteo minakonikata. Eereka ãtikaka

kikiãkini apoka Txiako iokanatakini. Iuusaaki Petro pĩkana ninoa, ininiã kona inikaika aĩtariakori Xoteo minakonikata, Xoteo kiomaneakorini sãkire xika, kotxi ninoa sãkire: “Kãkiti Teoso takaõtxikare iĩtoã mauakaniã, !pinipokotape ninoakata,” itxana ninoa sãkire. Petro pĩkana Txiako iokanatakini, kotxi ninoa nirekari Teoso takaõtxikare auini aĩtariakori iĩtoã, Xoteo minakanuia iĩtoã. ¹³Apanakini Xoteoakori Xesosi sãkire auiãkani apaka kamari Petro kamakiti atokokana, ininiã ninoa apaka kerokari. !Inipokotaikana aĩtariakorikata, Xoteo minakanikata. Ninoa kerokiniri xika Panapee apaka kerokari. Iua apaka !inipokotaika aĩtariakorikata, Xoteo minakonikata. ¹⁴Nimarotakasaakiri ninoa kerokiniri ikamakitina, nota misãkiretari Petro ikinimane õkiãtaã, kotxi ninoa !ikamari atão inakari. Teoso iokanapirena erekari iaõka !ikamana. Nĩtxari iua: “Xoteokarai, iuaritika pauanãta Xoteo minakanuia sauaki, ininiã Xoteo kamakiti atoko !pikamaika. Xoteo minakanuia atoko pitxaua. Ininiãkara kinirepa pite paniãtana Xoteo minakanuia: ‘Hĩkĩpitariko Xoteo kiomaneakorini sãkire?’ !Erekari,” nitxa Petromoni.

Xesosi Sãkire Auikiko Kamaerekatari Kãkiti

¹⁵Ate Xoteo atxaua, kotxi aĩri, ainoro pakini Xoteo txaua apaka. Xoteo kiomaneakorini sãkire: “Xoteo minakanuia maerekati kamakani itxauana,” itxana isãkirena. Xoteo minakanuia !atxaua ate. ¹⁶Aimarotari, aãuikiniãri Xesosi Kristo sãkire, iua kamaerekatari aãkixinire, ininiãkara Teoso apakapaua. Kitxakapirĩka Teoso sãpiretari Moisesi ipaniãtakiti kãkiti kamini tĩkane. Ininiãkara Moisesi iõkatsopatarikara Teoso sãkire. Txamari !aposotari akaminiri imakinika Teoso paniãtakiti, Moisesi iõkatsopatakiti, ininiãkara !ikamaerekatari aãkixinire. !Apakapaua ate. Ate auikari Xesosi sãkire ereka anini ikapani, ininiã Teoso apakapapitikaua ate. Teoso paniãtakiti iõkatsopatakori ikinika !aposota akamini, ininiã Xesosi kamaerekatari aãkixinire Teoso apakapiniua ikapani, Kristo sãkire aãuikasaaki. ¹⁷Anirekasaakiri Teoso kamaerekatina, aãpoka Kristomoni. Iuusaaki aimarotari maerekati kamakani aniniua. Iuaritika Kristo makatxakari amaerekani Teoso apakapiniua ikapani. Ikara atoko ininiã, atxiĩti Kristo nirekatari maerekati akamini, imaktxakiniri ikapani? Konapitini. ¹⁸Atxiĩti kãkiti imarotari Xoteo kiomaneakorini paniãtakiti kamiko na kamaerekatari kãkiti aãkixinire, ininiã itakanapari ninoa paniãtakiti ikamini. Atxiĩti ãti õti iuaĩkana ikamari ninoa Xoteo kiomaneakorini paniãtakiti iaõka, ininiã iuusaakiikarako ikerokari. ¹⁹Moisesi iõkatsopatakiti oerekano

nota ipĩkari atoko nininiua, kotxi nota kona posotari ikinika Moisesi iõkatsopatakiti iaõka nikamini, ininiã nimisiritiko auapitikako. Ininiã nimarotari Moisesi iõkatsopatakiti kona makatxakari nimaerekani. Ininiã nimarotari Xesosi sãkire auiãkarinokara auapininiika. Ininiã uatxa ikiniõtika ninirekari Teoso nireẽkitinoka nikamini. ²⁰Xesosi okaãka aamina ipiriãmitakari nopini. Aamina ipiriãmitakari nopini okakori atoko nitxaua, kotxi maerekati mitxi nikamakiti lninirekaikari nikaminiri. Mitxi ninireẽkiti kona auaika. Iuaritika auãkipanika nitxaua, kotxi Kristo aua nãkixinireẽ. Teoso ãkiri sãkire nauikiniã, auãkipanika nitxa. Iua taretano nota. Iua ipĩpe nota ikapani. ²¹Moisesi iõkatsopatakiti kamiko kamaerekatiniãua ate, kinirepa Xesosi ipina? Moisesi iõkatsopatakiti kamiko na xatiki kamaerekataua ate. Teoso tiraõkinokara kamaerekatari aãkixinire.

Natokopa Itxa Teoso Kamaerekatiniua?

3 ¹Hĩte Karásia tixini auakanii kona kiĩkitei hĩte. Kipa misirienetai hĩte atão inakari himakamakani ikapani? Kotxi himarotapitikari atão inakari. Himarotari Xesosi Kristo ipina aamina ipiriãmitakari nopini amaerekani imaktxakini ikapani. Ate oerekapekai ikara atão inini. ²Ianoka nipimaãi hĩte: Kisaakipa hãpakapari Erekar Matamatakoti? Hãpakapatari iua, Moisesi paniãtakiti hĩkamakasaaki? Konapitini. Hãpakapatari Erekar Matamatakoti Teoso iokanapirena erekari hãuikasaaki? Ari, Teoso iokanapirena erekari hãuikasaaki, iusaakiikara hãpakapari iua Erekar Matamatakoti. ³Kipa iomaiĩkitetai hĩte? Merepanika Teoso sikari Erekar Matamatakoti hĩtemoni, ininiã Erekar Matamatakoti sikaposotiiretai hĩte Teoso paniãtakiti hĩkamini ikapani. Uatxa hĩxinikatar Teoso paniãtakiti hĩkamini hĩteka posotiireẽkani? Konapitini. Kona hĩte posotari. ⁴Himisiritapeẽkaika Xesosi sãkire hãuikini xika. Kinirepa himĩteenekatar himisiritiko? Atauako uatxa kona hãuikaikari mitxi hãuikakiti Xesosi sãkire? ⁵Kirisaakipa Teoso sikari Erekar Matamatakoti hĩtemoni? Kirisaakipa Teoso oerekari iposotiire hĩtemoni? Atauako ikara atoko itxa Moisesi paniãtakiti hĩkamakasaaki? Konapitini. Isikai Erekar Matamatakoti, oerekai iposotiire, Teoso iokanapirena hãuikasaaki.

⁶Hĩxinikariko Apraãoni. Apraão auikari Teoso sãkire, ininiãkara Teoso kamaerekatari iua, ininiã Teoso apakapari iua. ⁷Ininiã ninirekari himarotiniiri, kãkiti Teoso sãkire auiãkani Apraão apika mekaniriakori atão inakani itxauana ninoa. ⁸Teoso kamaerekatari

Xoteo minakaniua, kotxi ninoa auikari Xesosi sãkire. Kitxakapirĩka Teoso sãkire iõkatsopatakori sãpiretapekari ikara Teoso iokanapirena erekari Apraõomoni. Ikara iõkatsopari txari: “Nota sikariko erekari ikinimane kãkitimoni, kotxi pite Apraõo auikari nota sãkire.” ⁹Apraõo kĩpitari Teoso sãkire, ininiãkara Teoso takari erekari iuamoni. Iua atokotxikana Teoso takari erekari iua sãkire kĩpitakanimoni.

¹⁰Apanakini uãkatari Teoso apakapinina ninoa, kotxi ikĩpitarina Moisesini sãkire. Txamari Teoso misirikare pamonõkonipaniriko ninoamoni, kotxi Teoso sãkire iõkatsopatakori txari: “Teoso misiritariko kãkiti ikinika Moisesi paniãtakiti ikiniõtika imakamakanisaaki.” ¹¹Teoso sãkire iõkatsopatakori txari: “Teoso kamaerekatariko kãkiti, iua sãkire auiãkani. Ininiã isãkire auiãkani auapininiika itxako Teosokata,” itxa Teoso sãkire iõkatsopatakori. Ininiãkara aimarotari Moisesi paniãtakiti kĩpitiko kona kamaerekatari kãkiti. ¹²Moisesini iõkatsopatakiti kona paniãtaua aãuikiniri Xesosi ipinini amaerekani imakatzakini ãkapani. Moisesi iõkatsopatakiti paniãtaua akaminiri ikinika Teoso paniãtakiti. Teoso sãkire iõkatsopatakori txari: “Kãkiti, Teoso paniãtakiti iõkatsopatakori ikinika makerokakatirako auapininiika itxako Teosokata,” itxa Teoso sãkire iõkatsopatakori.

¹³Txamari ãtika Teoso paniãtakiti Moisesi iõkatsopatakiti akerokiniã, amisiritaãkako. Kristo makatzakaua ate ikara misirikaretxi monõkori, kotxi Teoso misiritari Xesosi Kristo aamina ãpiriãmitakari nopini ate maerekani xika ate mapinakani ãkapani. Teoso sãkire iõkatsopatakori txari:

Kãkiti aamina nopini okakori Teoso misiritakiti itxaua.

¹⁴Teoso sikaenetari erekari Apraõomoni. Kristo ipĩpe hĩte Xoteo minakaniua ikara erekari hãpakapini ãkapani. Ininiã Xesosi Kristo sãkire aãuikasaaki, aãpakapari mitxi Teoso sikaenetakiti. Aãpakapari aãkixinireẽ Erekari Matamatakoti, Teoso sikaenetakiti atemoni.

Teoso Sikaenetakiti Sãkiretxiti

¹⁵Nitariakori, ikinimane kãkiti imarotakiti nisãpiretaiko hĩte, noereẽkiti sãkiretxiti iteene himarotini ãkapani. Ipi kãkiti aua itiina isikaenetakakana. Iuasaaki, iõkatarina iuãkana isikaenetakitina tsopaã. Eereka lauiritaãkana imaxinĩkaretinirina isikaenetakitina. Apaka lauiritaãka sãkiretxi apikomoni itakinina isikaenetakitina tsopaã. Teoso sikaenetakiti inakitiakorimoni ikara atoko itxa. ¹⁶Himarotariko

ia. Teoso sikaenetari erekari Apraãomoni, Apraão apika mekanirimoni apaka. Teoso sãkire iõkatsopatakori na txari: “Apika mekaniriakori.” Teoso sãkire iõkatsopatakori txari: “Apika mekaniri.” Ininiã átika apika mekaniri. Kristo itxaua iua. ¹⁷Ia ninireka nisãpiretinii. Kitxakapirika Teoso sikaenetakiti Apraãomoni apokapeka. Koatrosëtosi tríta pakini anokanani Apraão auaka atoko, Teoso sãpiretari Moisesi ipaniãtakiti iõkatsopatiní ìkapani kãkiti kamini ìkapani. Moisesi iõkatsopatakiti kona xipokari Teoso sikaenetakiti Apraãomonikari. ¹⁸Teoso sikari Kristo kãkitimoni, kotxi mitxi isãpiretari isikaenetakiti Apraãomoni. Teoso sikasaakiri ipaniãtakiti sãkiretxiti Moisesimoni ikara iaõka kãkiti kamini ìkapani, isikaenetakiti auapeka iuasaaki. Ipaniãtakiti sikiko !ixipokari isikaenetakiti.

¹⁹Ininiãkara kininiãpa Teoso sikari ipaniãtakiti Moisesimoni kãkiti kamini ìkapani? Teoso paniãtakiti iõkatsopatakori oerekaua maerekati kamakanuia ate, kotxi !aposotari ikinika ipaniãtakiti akamini. Kristo, Apraão apika mekaniri ìkorapokoriti apokini apisapanika, Moisesi iõkatsopatakiti oerekaua Teoso nireëkiti akamini ìkapani. Teoso sikaenetakiti itxaua Xesosi Kristo. Teoso sikasaakiri ipaniãtakiti sãkiretxiti Moisesimoni, Teoso nitiriakori aua iuaãtaã. Teoso sãpiretari isãkire Moisesimoni. Eereka Moisesi sãpiretari kãkiti. ²⁰Teoso sãpiretakasaakiri Apraão isikaenetakiti, !ipaniãtari ãti kãkiti sãpiretiniri Apraão. Teosonokara sãpiretari Apraão.

Moisesi Iõkatsopatakiti

²¹Moisesi iõkatsopatakiti aãuikiniã, atxiiti !anirekaikari Teoso sikaenetakiti? Anirekapitikari. Akiomaneakorini paniãtakiti sãkiretxiti, kona txikitakaua aãuapininiika anini tìkane. Ininiãkara akiomaneakorini sãkire kona kamaerekataua ate, ininiã Teoso kona apakapaua ate, ininiãkara kona aãuapininiika !atxa Teosokata. !Auari mauritakoti sãkiretxiti kãkiti auapininiika inini txikitakakari. ²²Teoso sãkire iõkatsopatakori txari: “Ikininape kãkiti kamari maerekati.” Kateia ãki auakani atoko atxaua, kotxi !aposotari erekari akamini. Teoso sikaenetakiti sikaãka Xesosi Kristo sãkire auiãkanimoni.

²³Xesosi Kristo sãkire auikiko apisa, kãkiti kateia ãki auakani atokokana itxauana. Kãkiti moiaãkari atoko itxaua Teoso paniãtakiti Moisesimoni sikakori. !Aposotari anirekinimoni asini. Uatxara aposotapitikari anirekinimoni asini, kotxi Xesosi apokapeka ìkorapokoriti. Ipinapeka kãkiti ìkapani, ininiã uatxa aãuikiniãri iua

sãkire, kona Teoso misiritaikaua uatxa. ²⁴Kristo mapokakani apisa, ate oerekakari atoko itxaua Teoso paniãtakiti iõkatsopatakori. Kristomoni anikakari atoko itxaua ikara. Kristo apokasaaki, Teoso kamaerekataua ate, kotxi aãuikari Kristo sãkire. ²⁵Uatxa apokapeka Xesosi Kristo sãkire auikiko. Ininiãkara Teoso paniãtakiti iõkatsopatakori limoiaãikaua ate.

²⁶Teoso anaakori hĩtxaua, kotxi hãuikari Kristo Xesosi sãkire. ²⁷Hĩte patxisatapeẽkaika, ininiãkara hĩpatxisatiko oerekari apanakini Kristo ãtipirika himoianatini ãkapani. Ininiãkara Kristo atokopeka hĩtxa. ²⁸Ikara atoko aniniã, akinika Kristo Xesosi nakiti atxaua, kotxi akaikotapika iuakata. Xoteoakori, Xoteo minakanuia, nitiritxi, nitiritxi minakanuia, kiki, sito, amakinika Kristo nakiti atxaua. ²⁹Kristo nakiti pininiãua, Apraão apika mekaniri pitxaua apaka. Ininiã pite apakapapitikariko Teoso sikaenetakiti.

Teoso Anaakori

4 ¹Apikomoni nisãpiretaiko hĩte ãti sãkiretxiti. Amarini !apakapari irini tii itakanapakiti iua ãkapani, kotxi xapitipanikari. Ikinipoko irini nakiti imi nakiti txapekua, iuaritika na apakapapanikari. Axapitipanika inakasaaki, nitiritxi atoko itxaua. ²Axapitipanika inakasaaki apanakini moiaãri iua. Ninoa nĩkatari itxineirote. Irini ketotiniri manapi apokasaaki, imi apakapari ikinika irini tii itakanapakiti. ³Mitxi iua eenetxi atoko atxaua ate. Nitiritxi atoko atxaua ate. Akiomaneakorini paniãtakiti sãkiretxiti amoiaãkiri atoko itxaua, kotxi oerekaua akamakiti tĩkane. ⁴Teoso iokanatarari imi kãkitimoni iketo manapisaaki. Sito ãto ãki aua merepanika, ikinimane kãkiti atoko. Iua kĩpitari ikinika Teoso paniãtakiti iõkatsopatakori. ⁵Amakamakaniãri ikinika Teoso paniãtakiti iõkatsopatakori, amisiritiko auapitika. Xesosi makatxakaua ate amamisiritakoni ãkapani. Ininiã Teoso anaakori atxaua.

⁶Teoso anaakori aniniãua, Teoso iokanatarari Erekarri Matamatakoti imi nakiti aãkixiniremoni. Ininiã iua Erekarri Matamatakoti aãkixinireẽ auiniã, aãkiritari Teoso: “Papai, niri,” atxariko. ⁷Ininiã nitiritxi atoko !atxaikaua. Teoso anaakori atxapekua. Iua anaakori aniniãua, ikini isikaenetakiti isikaua atemonikari, kotxi Kristo makatxakapekari amaerekani.

!Erekaxinireri Paoro Karásia Auakani Xika

⁸Mitxi hĩte !imarotari Teoso. Iuasaaki nitiritxiakori amotakoni atoko hĩtxaua. Hĩparĩkauata teoso minakanuia ĩkapani. ⁹Uatxa hĩte imarotari Teoso. Ari, uatxa Teoso imarotai hĩte. Ininiã kinirepa hĩte nirekari hĩkanapiriini mitxi hĩauĩteakorimoni. Kona kaposotiirena ninoa. !Kiĩkitena ninoa. Kinirepa hĩte nirekari iuaĩkana ninoa nitiriakori amotakoni atoko hininiãua? Kinirepa hĩte nirekatari iuaĩkana hĩuikiniri ninoa oereẽkiti sãkiretxiti? ¹⁰Hĩte nirekari Xoteo kamakiti atoko inakari hĩkamini. Hĩuãkatari Teoso apokaerekatinii hĩte, kotxi ninoa kiinirite atokotxikana hĩte apaka kama. ¹¹Ininiã !erekaxinireno nota ikara nikenakoenetini. Atauako maxikatiĩka nota sãpiretari Teoso sãkire hĩtemoni?

¹²Nitariakori, nota iteene õtãkikai hĩte. Hĩtakanapariko Xoteo ki maneakorini paniãtakiti hĩkamini. Nota atoko hĩtxako, kotxi hĩte sauaki nauakasaaki nota hĩte atoko nitxaua. Xoteo minakanuia atoko nitxaua. Hĩtekata nauakasaaki, !himisiritano nota. Hĩtoretano nota. ¹³Hĩxinikari merepitipanika Teoso iokanapirena erekari hĩte nisãpiretakasaaki, namianare xikara nisãpiretai hĩte, hĩtekata nauakasaaki. ¹⁴Iuasaaki namianatakasaaki, hĩparĩkauatapitipo nota ĩkapani. !Hinaiakakano. !Hĩokanatanano nisini namianare xika. Hĩte apakapano nota Teoso nitiri iaxitikiri hãpakapini atokokana. Hĩte apakapano nota, Kristo Xesosi hãpakapini atokokana. ¹⁵Iuasaaki hĩte iteene hĩpoxokoniua. Nimarotari ereka hinini, kotxi noki amianatakasaaki, hĩposotaãkamariko, himakatzakamariko hĩteka oki notamoni hĩsikini ĩkapani. ¹⁶Atauako uatxa himokaiakari nitxataua nota, atão inakari nisãpiretinii xika?

¹⁷Ninoa kamisirienererini iteene turetãpitikamai hĩte, txamari ninoa ãkixinire nireẽkiti !erekari hĩte ĩkapani. Inirekarina hĩte omanatinuia ate. Inirekarina hĩte apokaerekatinina ninoanoka. ¹⁸Erekari kãkiti iteene turetini hĩte, ãkixinire inireẽkiti erekari inakasaaki. Nota hĩtekata nimauakanisaaki apaka, erekari kãkiti iteene turetini, ãkixinire inireẽkiti erekari inakasaaki. ¹⁹Hĩte namariteni nota turetãkini atoko hĩtxa. Hinoro atokotxikana nitxa nota. Kaiamapeka auãnetakaro atoko nitxa, kotxi nota atatsiirauata hĩte xika. Kristo kamakiti atokotxikana hĩkamakasaaki, iuasaakinoka nitsii nãkixinire auakari iotoka. ²⁰Kinirão auaka nitxa hĩtekata uatxa. Ninirekari aãpisatoõtakakiniua, ininiã nixinikakiti ipinimonipo itxa atxiĩti. !Erekaxinireno nota hĩte xika.

Akaa, Sara Pakini

21 Hīte Xoteo kiomaneakorini paniātakiti nireēkani, himarotatari ninoa sākire? 22 Teoso sākire iōkatsopatakori sāpiretaua, ipi Apraão anaakori aua. Sito niterotxi iamotakitokata aua imi āti. Niterotxi minakotokata ĩtanorokata aua āti imi. 23 Akaa inakoromoni, niterotxi iamotakitomoni imi aua, kotxi Apraão sirīka oakata. Imi aua Saramoni niterotxi minakotomoni, kotxi Teoso sikaenetari iua imi. 24 Apraão anaakori oerekaua Teoso parīka kākiti ĩkapani. Iparīka ipi aua, naia sito ipi atoko. Akaa inakoro ākiri nitiritxi amotakori itxaua. Teoso parīka ōtanoxiratari Sinai inakori iua auakasaaki, niterotxi Akaa atoko itxa. Teoso paniātakiti iusaaki amakamakaniā, amisiritiko auapitikako, nitiritxi amotakori atokotxikana. Nitiritxi makamakaniāri ipatrāote paniātakiti imisiritiko auapitikako. 25 Ininiākara ōtanoxiratari Sinai inakori Arápia tixini auakari Akaa atoko itxa. Apaka ĩkorasaaki Xerosareē sitatxiti oa atokokana itxa, kotxi Xerosareē auakani Akaa anaakori atoko itxana ninoa. Nitiritxiakori amotakoni atoko itxana. Ninoa Xerosareē auakani !ikamari ikinika Teoso paniātakiti, ininiā Teoso misiritapitikanako ninoa. 26 Āti Xerosareē auapitika, iaxiti auakari Xerosareē, Teoso tixine. Xerosareē iaxiti auakari Sara atoko, kotxi Sara niterotxi amotakoro !otxaua oa. Ate inoro atoko otxaua oa. Sara ākiri atoko atxaua, kotxi amisiritiko !auaika. Aāuikiniāri Xesosi sākire, akiomaneakorini kona paniātaikaua ate ninoa nireēkiti akamini. 27 Teoso sākire iōkatsopatakori txari:

Pite sito meenetoi pipoxokoniuatako. Pite sito pauākitakarauatini tsii mimarotakatoi, pixikarauata pipoxokoniritika, kotxi pite takanapakoroi, itori pamariteakori auako. Kĭtaniriro poiāoka oamariteakori auako, itxa Teoso sākire iōkatsopatakori.

28 Ininiā nitariakori, Sara ākiri, Isaki inakori atoko atxaua, kotxi Teoso sikaenetari Apraão imi Saramoni auini. Iuatxikana Teoso sikaenetaua Xesosi amaerekani imakatkakini ĩkapani, Teoso anaakori aniniua ĩkapani. 29 Akaa ākiri Isimaeo inakori iponaniā, kotxi Apraão nirekari imi, ininiā iua sirīka Akaakata. Sara ākiri Isaki inakori iponaniā Erekar Matamatakoti posotiireē. Eereka Isimaeo misiritari Isaki. Iua atokokana itxa uatxa. Teoso anaakori minakaniua misiritari Teoso anaakori. 30 Teoso sākire iōkatsopatakori txari:

Hïokanataroko niterotxi iamotakoro osipinini imikata, kotxi niterotxi ãkiri kona apakapapaniri ipixini iri tii. Niterotxi minakoto ãkirinoka apakapari iri tii, itxa Teoso sãkire iõkatsopatakori. ³¹Ininiã nitariakori, niterotxi amotakoro ãkiri atoko !atxaua. Niterotxi minakoto ãkiri atoko atxaua.

Takaõtxikari !Ikamaerekatari Kãkiti

5 ¹Nitiritxi kamari ipatrãote nireëkitinani. Ikara atoko uatxa !atxaika, kotxi aãuikari Kristo sãkire. Kristo makatxakapekaua amisiritiko monõkoni. Ininiãkara nitiritxi amotakoni atoko iuaïkana !hïtxapeua. !Hãuiritapiri kãkiti paniãtinii ninoa auiãkiti hãuikini.

²Hïkenakotako. Nota Paoro sãpiretaiko hïte. Hãuiritiniãri takaõtxikari takiko hïtoã Xoteo atoko, ininiã hãuikari takaõtxikari kamaerekatinii hïte Teoso apakapiniã ikapani. Txamari na atão. Kristonoka kamaerekatari kãkiti Teoso apakapiniã ikapani. Erepaniko, pinirekiniãri takaõtxikari, !pinirekaikari Kristo. ³Iuaïkana nota õtãkikai hïte. Hãuiritiniãri takaõtxikari takiko hïtoã Xoteo atoko, ininiã Moisesi paniãtakiti ipixini hïkamapeka. Ikara atoko hininiã, ikinika ipaniãtakiti hïkamako. ⁴Ãtikaka hïte nirekari Moisesi paniãtakiti hïkamini Teoso kamaerekatinii ikapani. Txamari ikara atoko hinirekiniã, hïtakanapari Kristo. Ininiãkara Teoso !iposotari ikinipoko erekari isikinii. ⁵Atepekana, ate auikari Xesosinoka txïkitakiniri kãkiti ereka ininiã ikapani, Teoso apakapapiniã ikapani. Ikamaerekataua Erekari Matamatakoti posotiireë, kotxi aãuikari Xesosi sãkire. ⁶Takaõtxikari hïtoã auiniã, iua takaõtxikari !ikamaerekatai hïte. Takaõtxikari hïtoã mauakaniã, takaõtxikari mauakaniã !ikamaerekatai apaka. Kristo Xesosi nakitiakori aniniãua, Teosora kamaerekataua, kotxi aãuikari Xesosi sãkire, ininiã atiretari iua.

⁷Merepanika hïte auikapitikari Xesosi sãkire. Kipa xipokatari atão inakari Teoso sãkire hãuikini? Natokopa itxa Teoso sãkire atão inakari hïtakanapiniã? ⁸Hïte akiritakari itxaua Teoso. Kona iuani xipokari hãuikiniri atão inakari isãkire. ⁹Kãkiti sãkire txari: “Pão ãtikaãkari axapitiri ipani, iuaritika iãtikakakiti itori ipe.” Iua atokokana ãtika maerekati kamakari xika kaiõpokori kãkiti kamari maerekati. ¹⁰Teoso kamaimaroretano nota hïte takanapiniri hïkerokakiti, atão inakari hïkaminiã ikapani. Hïte nitariakori hïtxaua, kotxi Apiananiri nakitiakori atxaua, ininiãrako nimarotari nota õtãkikinii iaõka hïkamapanikako.

!Nimarotari iua kiki himisirienetakiri. Ia nimarota. Teoso misiritapanikariko iua.

¹¹Apanakini sãpirenãtari: “Paoro paniãtari Xoteo minakanuia takiniri takaõtxikari iitoãna.” Na atão ninoa sãkire. Nipaniãtaãkamariko takaõtxikari takiko, nimisiritiko !uamakako. Kona nipaniãtari Xoteo minakanuia takiniri takaõtxikari iitoãna. Ikara xika nimisiritaãka. Nisãpiretari ia: Kristo aamina ipiriãmitakari nopini ipipe amaerekani imakatzakini ikapani. Kristonoka kamaerekataua Teoso apakapiniua ikapani. Ikara noerekakiti xika nimisiritaãka.

¹²Ninoa kamisirienererini nirekiniãri itsiki mata kisauakiko, erekari itsikipati tsotatiko apaka. Nomanãkarauata, ninoa misirienetini xika.

¹³Nitariakori, Teoso akiritai hite iua nakitiakori hininiua ikapani, ininiãkara uatxa hiposotari hitoka nireekiti hikamini. Iuaritika !hikamapiri maerekati hiito nireekiti. Ia hikamako: Hitiretakakauako atipirika. Ikara atoko hininiã, himoianatakakauako. ¹⁴Teoso paniãtakiti txari: “Pitiretana apanakini piteka pitiretiniua atokokana.” Ikara paniãretxi pikaminiã, pikamapekari ikinika Moisesi paniãtakiti. ¹⁵Kaxipiri itopa auakani atoko !hitxape. Ninoa karotakakaua, okakakaua itxana. Erepaniko. Kaxipiri itopa auakani atoko hininiã, hixipokakauako.

Aïto Nireekiti

¹⁶Nõtãkikare ia atoko itxapaniko: Hãuiritariko Erekari Matamatakoti oerekinii iua kimapore ikiniõtika. Iua hikimapore oereekari ininiãua, !hikamapiri maerekati hiito nireekiti. ¹⁷Aïto !nirekari Erekari Matamatakoti nireekiti. Iuatxikana Erekari Matamatakoti !nirekari hiito nireekiti. Erekari Matamatakoti mokaiakari itxaua aïto. Ininiã aãkixinire nireekiti !aposota akamini aïto nireekiti xika. ¹⁸Iua Erekari Matamatakoti oerekiniãri pikimapore ikiniõtika, pikaminiãri iua nireekiti, ininiã Xoteo kiomaneakorini paniãtakiti !oerekaikari pikimapore.

¹⁹Aimarotapitikari kãkiti ito nireekiti. Inirekari itaniritxi minakotikatika osirĩkini, itanorotxi minakotokatika isirĩkini, mitxitakari atokata isirĩkini. Kãkiti ito nirekari kãkiti xinikaxititini maerekati iito nireekiti. Kãkiti ito nirekari ati kãkiti ito, maerekati ikaminina ikapani. ²⁰Kãkiti ito nirekari teoso kãkiti kamakiti iteosone ikapani. Kãkiti ito nirekari maerekani matamatakoni paniãtakiti ikamini. Kãkiti ito nirekari omanãkaretxi, neenamatchi, xikoretxi,

norikaretxi, iuikaretxi. Käkiti ñto nirekari käkiti omanatiniri apanakini. ²¹Käkiti ñto nirekari äti käkiti tii. Inirekari okanitxi, poätakatxi, maerekati kiiniriti ikamini. Ikara atoko inakari maerekati käkiti ñto nireëkiti. Uatxa nipinitai hñte, mitxi nipinitinii atokotxikana. Ikara maerekati kamakani !auapani Teoso auñtetxi ininiätañua.

Erekari Matamatakoti Nireëkiti

²²Iua Erekari Matamatakoti aäkixinireë auiniä, !ikara atokoni itxa akamakiti. Iua Erekari Matamatakoti aäkixinireë auiniä, atiraõkiuata. Apoxokoniua. Erekaxinireua. !Katimari aomanäkarauatini. Aamonïkarauata. Erekaua. Akamaenetakiti akamapitika. ²³Ate !iuikaua. !Akamari maerekati añto nireëkiti. Ikara atoko atxa, Erekari Matamatakoti aäkixinireë auiniäua. Ikara atoko aniniä, amisiritiko !auari. ²⁴Kristo nakitiakori aniniäua, !anirekaikari akaminiri maerekati añto potxitakiti, añto nireëkiti. Amanirekakiniti aõkini atokokana, aõkapekari maerekati añto nireëkiti. ²⁵Erekari Matamatakoti txïkitakari axinire auäki inini, ininiäkara makamari ikinipoko iua nireëkiti ikiniõtika. ²⁶!Apakata aäuikiniua. !Apakata aneenamauatini. !Apakata axikotakakiniua.

Himoianatakakiniua

6 ¹Nitariakori, hñte Erekari Matamatakoti nireëkiti kamakanii, himarotakasaakiri añtari kaminiri maerekati, hõtäkikariko iua imaerekani itakanapini ñkapani. Hõtäkikariko hñtiraõkiritika. Iuasaaki erepaniko, kotxi atxiñti hñte apaka nirekari iua maerekani atokotxikana hñkamini. ²Himoianatakakauako hñtapara poiãonoka inakasaaki. Ikara atoko hininiä, hñkamari Kristo paniätakiti apanakini hñtiretini. ³!Erekari ate iuikiniua. Käkiti minakati: “Apiari nota,” inakari, iuanika misirienetaua. ⁴Erekari nataerekatiniiri notaka kamakiti. Erekari atxiñti? Nikamakiti ereka ininiä, nipoxokoniua. !Apakata näkixinireë nixinikiniri: “Iua äti kamakiti apiaerekata. Nota kamakiti poião erekari.” !Apakata ikara atoko ninini. ⁵Ikininape käkiti aua iparïka kasãpaniri. Iuanoka posotari ikaminiri.

⁶Teoso säkire oereëkari oerekiniäi pite Teoso säkire, iuasaaki minakati auiniäi pisikari iuamoni. Nipokori atxiñti, txineiro atxiñti, pisika iuamoni, kotxi iua kikiote !auari. ⁷Piteka !pimisirienetapeuako, kotxi !piposotari Teoso pimisirienetini. Teoso misirienetakari !auari. Pikikioteë mitxi pitakakiti iaõka papakapa. Iua atokokana

pikamakiti ereka inini, papakapari erekari. Pikamakiti maerekati inini, papakapari maerekati. ⁸Piito nireekiti pikaminiã, papakapari piito siãkitinoka. Piito sikai ipikitxinoka. Teoso misiritapitikai. Erekar Matamatakoti nireekiti pikaminiã, papakapari iua siãkiti. Iua siãkiti Teosokata átipirika pauini íkapani. ⁹!Apakata asãpakini erekari ikiniõtika akamini. Makamari erekari ikiniõtika, maiotokakanikaua anini. Erekar akamini amaiotokakaniã, erekari Teoso sikakiti aãpakapini apokapitikako. ¹⁰Ininiã aposotakasaakiri, makamari erekari ikininapemoni. Merepanika makamari erekari aítariakorimoni Xesosi sãkire auíãkanimoni.

Imapotökire Ôtãkikaretxi

¹¹Hãtamariko ia niõkatsopare mitari. Ia iõkatsopari imapotökire nota niuakoã niõkatsopatakiti. ¹²Apanakini híte sauaki nirekar ninoaka apokaerekatiko, ininiã isãpiretari kãkiti potxitakitinoka. Ninoakara paniãtai hítakiniri takaõtxikari hiitoã. Kininiãpa ninoa nirekatari takaõtxikari hítakini? Ninoa misiritiko monõkoni xika, ninoa paniãtari Xoteo minakanuia takiniri takaõtxikari iitoãna, ininiã Xoteoakori potxitari ninoa oereekiti sãkiretxiti. Inirekarina Xoteoakori apokaerekatinina ninoa. Txamari Kristonoka kamaerekatari kãkiti, kotxi ipípe aamina ípiriãmitakari nopini kãkiti maerekani imakatzakini íkapani. ¹³Ninoa kamisirienererini kamari Moisesi paniãtakiti takaõtxikari itakinina iitoãna. Txamari ikinika Moisesi paniãtakiti !ikamana. Ninoa nirekar híte takiniri takaõtxikari hiitoã, ininiã eereka ninoa iuikaua, kotxi híte kamari ninoa paniãtakiti. ¹⁴Kona ninirekar niuikiniua. Teoso !nirekar niuikiniua. Nota iuikari aãuíte Xesosi Kristo. Iuanokara niuika, kotxi iua ipina aamina ípiriãmitakari nopini ate íkapani. Ininiã nota !nirekaikari Xesosi sãkire mauíãkani nireekiti. Iuatxikana ninoa !nirekar nota nireekiti. ¹⁵Takaõtxikari hiitoã auiniã, iua takaõtxikari !ikamaerekatai híte. Takaõtxikari hiitoã mauakaniã, takaõtxikari mauakani !ikamaerekatai. Teoso txíkitakiniã iua anaakori hininiãua, iusaaki ikamaerekatai híte. Ininiãkara hãkixinire amaneri itxaua. Ininiã mitxi hinireekiti !hinirekaika. ¹⁶Teoso kamaerekaxiniretai híte, ikara sãkiretxiti hãuikasaaki. Iua amoníkai híte. Ikara atoko Teoso kamari kãkiti iua nakitiakori ininiuana, atão Isaeo mekaniriakori ininiuana.

¹⁷Ixipope ia iõkatsopari. Nipinitana nota kamamaxiretakani. !Hĩkamamaxiretapeno, kotxi nimisiritaãkapeka. Nikaro mata auapeka niĩtoã. Auĩtetxi nitiri amotakori karo mata atoko itxa nikaro mata, kotxi Apiananiri Xesosi nitiri nitxaua.

¹⁸Nitariakori, aãũte Xesosi Kristo sikari ikinipoko erekari hĩte ãkixiniremoni. Ameẽ.

ÉPESO

Paoro Iokanatsopatakiti Épeso Auakanimoni

1 ¹Nota, Paoro. Niökatsopataria ia aätsopa. Teoso nirekano Xesosi Kristo iokanatakiti nininiua. Ininiã niokanatsopata Teoso nakitiakorimoni Épeso sitatxiti auakanimoni. Kristo Xesosi säkire auiãkanimoni, ipaniãtakiti kamakanimoni niokanatsopata. ²Añri Teoso, Apiananiri Xesosi Kristo pakini sikari ikinipoko erekari hitemoni. Ninoa kamaerekaxiniretai hite.

Teoso Mereëua Itixi Kamiko Apisapanika

³Masãpiretari Teoso, aãuïte Xesosi Kristo iri: “Erekapitikai,” kotxi itakapekari ikinika erekari ate ãkixiniremoni, kotxi Kristo nakitiakori atxaua. Ikara erekari isikakiti Teoso tixinekiri. ⁴Itakari ikara erekari ate ãkixiniremoni, kotxi itixi kamiko apisapanika Teoso mereëpekaua Kristo nakitiakori aniniua. Imereëua Teoso nireëkitinoka akamini ïkapani, maerekati amakamakani ïkapani, atiraõkiuatini ïkapani. ⁵Itixi kamiko apisapanika, Teoso mereëua iua anaakori aniniua ïkapani. Xesosi Kristo ipïpe ate ïkapani, ininiã iua txïkitakaua Teoso anaakori aniniua. Teoso txïkitakaua iua anaakori aniniua, kotxi iua potxitari ikara atoko ikamini. Inirekari ikara atoko ikamini. Erekari ipotxitakiti ikamini tïkane.

⁶Teoso txïkitakaua iua anaakori aniniua, kotxi inirekari asãpiretiniri: “Peerekari ikinipoko erekari pisikakiti kãkitimoni.” Teoso sikaua ikara erekari, kotxi iua tiretakiti nakitiakori atxaua.

⁷Xesosi iikitxitari amaerekani, kotxi iarêka xiketa ate ïkapani, ininiã Teoso maxinïkaretari amaerekani. Uatxa ïmisiritaikaua amaerekani xika. Teoso kamari ikara ate ïkapani, kotxi ikinipoko erekari isika atemoni. ïixipoka ikara erekari Teoso sikakiti. Ikinipoko erekari aua iuamoni. ⁸Kãkiti kona posotari iaõtiniri erekari Teoso sikakiti ate maerekati kamakanimoni. ïKaiãotikori. Ikinipoko imaroretxi aua iuamoni. Atão inakaranoka imarota ikamini, ininiã ikara erekari ikaminiãua. ⁹Mitxi ïaimarotari Teoso inireêkiti ikamini tïkane. Uatxa ikamaimaroretãua. Ipotxitari oerekiniua inireêkiti. Peerekari iua potxitakiti. Ækixinireê ixinikari ikara ikamini. ¹⁰Teoso ketotini õti manapi, ikinipoko iposope inakasaaki, iua apotiitariko ikinimane itixine auakani, itixiã auakani pakini.

¹¹Xesosi Kristo nakitiakori atxaua, ininiã aãpakapari ate ïkapani inïkatakiti. Itixi kamiko apisapanika ixinikari ikamakiti ate ïkapani. Ikamari ikinika inirekakiti iaõka. ¹²Iua mereëua ate, merepitipanika Kristo sãkire auiãkaniua, ikinimane asãpiretini ïkapani: “Peerekari Teoso. Erekapitikari ikamakiti.”

¹³Hïtepekana auikari Xesosi sãkire, atão inakari hïkenakotakasaaki. Ikara atão inakari Teoso iokanapirena erekari itxaua, kotxi iua iokanapirena oerekai himaerekani makatxakiko. Xesosi sãkire hãuikasaaki, Erekari Matamatakoti apoka hãkixinireê. Iua Teoso takaõtxikare itxaua. Iua oerekai hïte Teoso nakitiakori hininiua. Xesosi sikaenetapekari Erekari Matamatakoti atemoni iokanatini. ¹⁴Isikaenetakiti Erekari Matamatakoti atemoni auape, ininiã aimarotapitikari aãpakapiniri ikinika isikaenetakiti, inïkatakiti ate ïkapani. Iuasaaki Xesosi apakapaua ate iua nakitiakori, iua iamotakini, kotxi imakatxakapekari amaerekani. Ikara atoko ininiã, ikinimane kãkiti txari iua: “Peerekai pite. Erekapitikari ikinipoko pikamakiti.”

Paoro Misãkiretiniri Teoso

¹⁵Ikara atoko ininiã, nota kenakopiretakasaakiri Apiananiri Xesosi sãkire hãuikini, ikinimane Teoso nakitiakori hïtoretini nikenakopiretakasaaki, ¹⁶nimisãkiretapikari Teoso hïte ïkapani. Nitxari iua: “Erekapitikai, kotxi pite makatxakari ninoa Épeso sitatxiti auakani maerekani,” nitxa. ¹⁷Teoso, aãuïte Xesosi Kristo Teosone itxaua. Xesosi iri itxaua. Kaiotximereri iua Teoso. Nimisãkiretari Teoso hïte ïkapani ia atoko: “Pisikaimaroretana ninoa Ækixinire. Ninirekari Erekari Matamatakoti oerekinina pite iteene imarotinina ïkapani.

¹⁸Piopinikariko ninoa ākixinire atāo inakari imarotinina ĩkapani. Pite akiritana ninoa ĩkinipoko erekari apakapinina ĩkapani. Ikara poerekana ninoa imarotininina ĩkapani, iātapinirina ĩkapani. Pikamaimaroretana ninoa pite nĩkatakiti pite nakitiakori ĩkapani. Ikara pinĩkatakiti, pisikaenetakiti, peerekari. Itori pinĩkatakiti. !Ixipoka pinĩkatakiti. !Kaiāotikori pinĩkatakiti pinakitiakori ĩkapani. ¹⁹Pikamaimaroretana ninoa kaposotiire pinini. Ininiā piposotari iteene pisikaposotiiretinua ate pisākire auĩākani. Ikara piposotiire !auari ātimoni. Pataparari pite posotiire.” Ia atoko nimisākiretari Teoso hĩte ĩkapani.

²⁰Ikara Teoso posotiire ōkitikari Kristo ipĩkani sauaki auakasaaki. Iposo atoko iposotiireē itakari Kristo apiari topākiniātaā, ikikomoni itixineē. ²¹Ininiā Kristo Apiananiri itxaua. Iua posotiire apiata. Maerekani matamatakoni auĩteakori posotiire poiāoka. ĩkorapokoriti auĩtetxiakori posotiire poiāoka. Kristo posotiire apiata. ĩkorasaaki Kristo Apiananiri. Apaka katana Kristo atoko inakari !auari. !Auari āti kaposotiireri Kristo atoko. Kristo apiata. ²²Teoso txĩkitakari Kristo ĩkinimane auĩte ininiua. Itakari ĩkinimane imokaiakariakori ĩkiti patapi, ininiā Xesosi paniātakitinoka ikamana. Imokaiakari !auaika. Ininiā ĩkinipoko Teoso kamakiti auĩte itxaua Kristo. Teoso sikari iua isākire auĩākani auĩte ininiua. Inakitiakori kii atoko itxa Xesosi. ²³Iua ĩto atoko itxa inakitiakori, ininiā ĩkinimane inakitiakori sauaki iua aua. Itxĩkitakari ĩkinipoko atāo inini.

Mitxi Ipĩkani Atoko Atxaua

2 ¹Hĩtepekana, Xesosi txĩkitapekari hĩxinire auāki inini. Mitxi, isākire hāuikini apisapanika, ipĩkani atoko itxa hākixinire, Teoso manirekakiniti hĩkamini xika, himaerekani xika. ²Iuasaaki hĩte kamari ikini sereti maerekati, ĩkorapokoriti auakani maerekani atokokana. Iuasaaki hĩkĩpitari Satanasi sākire, maerekani matamatakoni auĩte sākire. Iua, initiriakorikata aua ĩtima auiniātaā. Iua parĩkauata Teoso sākire makĩpitakani xinire āki. ³Mitxipeka amakinika ate Teoso sākire makĩpitakani atxaua, kotxi akamari maerekati aĩto paniātakiti. Iuasaaki akamari maerekati aĩto nireĕkiti. Akamari maerekati axinikakiti iaōka iuasaaki. ĩkinimane itixi auakani atoko, ate, apanakini apaka maerekati kamakani atxaua iuasaaki, ininiā Teoso omanākarauata amaerekani xika. Iposope amisiritiko.

⁴Iuaritika Teoso iteene amonĩkaua. Kaamonĩkareri Teoso atoko inakari !auari. Iua iteene tirtetaua. Ate maerekati kamakani atxaua,

iuaritika itiretaua. ⁵Ipīkani atoko anakasaaki, maerekatinoka akamakasaaki, iuasaaki itxīkitakaua auāki anini, Kristo auāki inīkitakini atoko. Iuasaaki imakatzakari amaerekani, kotxi inirekari ikinipoko erekari isikiniua. ⁶Ininiā Teoso ōkitikaua ipīkani sauaki aāuakasaaki, Kristo ōkitikini atokokana. Ininiā itixineē Teoso takaua ate aītopākini Kristo Xesosikata, kotxi iua nakitiakori atxaua. ⁷Ininiā katanarako ātipirika inirekari oerekiniri ikinipoko erekari atemoni. Erekari isikakiti !ixipoka. !Kamapotōkireri. Kona erekaua, iuaritika iteene itiretaua, kotxi Xesosi Kristo nakitiakori atxaua. ⁸Atemoni erekari isikakitinokara makatzakari amaerekani, isākire aāuikasaaki. Ininiā !aposota ateka maerekani amakatzakini, kotxi maerekati kamakani atxaua. Teoso sikakitinokara makatzakari amaerekani. ⁹Akamakiti erekari !iposotari amaerekani imakatzakini. Ininiā kākiti iuikiniua !uari. Teosonokara posotari imakatzakiniri kākiti maerekani. ¹⁰Peerekari Teoso parīka aākixinireē, kotxi ikamaua ate ereka anini. Ininiā Xesosi Kristo nakitiakori atxaua. Ikara iparīka amaneri. Ikamaua ate amaneri anini, erekari akamini īkapani. Ikara ikamini apisapanika Teoso xinikari ikara. Iuasaaki inirekari erekarinoka akamini.

Kristo Nakitiakori Ātika Nirimanetxi

¹¹Xoteo minakaniua hītxaua, kotxi ikara atoko hīponaniā. Teoso takaōtxikare auaitotakini takauākatai hīte: “Teoso takaōtxikare mauaitotakini.” Xoteoakori auari ikara Teoso takaōtxikare, kotxi ikisauakarina amarini tsiki mata axapiti. Ikara oerekari Teoso nakitiakori ininiuana. ¹²Hīxinikariko mitxi, Kristo sākire hāuikini apisa, Kristo !uari hītemoni. Iuasaaki maparakini atoko hītxaua. Isaeokini !hītxaua. Ātiāo hītxaua. Ikara xika kona hīte posotari hāpakapiniri Teoso sikaenetakiti iuasaaki. Iuasaaki !himarotari Xesosi makatzakiniri himaerekani. Iuasaaki !himarotari Teoso.

¹³Uatxa Kristo Xesosi apakapapekai hīte. Mitxi itakoxiti auakani atoko hītxaua, iuaritika uatxa iua minai hīte Teosomoni, kotxi Kristo arēka xiketa hīte īkapani.

¹⁴Iuanokara kamaerekaxiniretaua, ininiā ixipokari Xoteo, Xoteo minakaniua pakini omanatakakiniua. Ikara omanākaretxi paretxi atoko itxa. !Auiritari Xoteo sini Xoteo minakonimoni. Uatxa ātika nirimanetxi atxaua. ¹⁵Kristo ipīkasaaki, ixipokari ikara omanākaretxi, kotxi iuasaaki ikamari ikinika paniātakori iōkatsopatakori ikinimane īkapani. Ikara Xoteoakorimoni sikakori. !Isikaāka Xoteo

minakonimoni. Ininiã Kristo ipíkasaaki, itxíkitakana Xoteoakori, Xoteo minakanuia pakini átika kákiti amaneri atoko inini. Neenamtxi !lauaika, kotxi Kristo kamaerekaxiniretaua amakinika. ¹⁶Ipina aamina ipiriãmitakari nopini, ininiã iusaaki iuaíkana iminana Xoteoakori, Xoteo minakanuia pakini Teosomoni. Átika nirimanetxi atoko iminana Teosomoni. Iusaaki ixipokari Xoteoakori, Xoteo minakanuia omanatakiniua. ¹⁷Xesosi apoka íkorapokoriti Teoso iokanapirena erekari isãpiretiniri kákiti. Isãpiretari kákiti, Teoso omanatiniri kákiti imaerekani xika xipope, Xesosi sãkire auikasaakina. Isãpiretai híte Xoteo minakanuia. Apaka isãpiretari Xoteoakori. Mitxi ôtadoxiti auakani atoko hĩtxaua, kotxi iusaaki !himarotari Teoso sãkire. Mitxi Xoteoakori imarotari Teoso sãkire, ininiã Teoso takote auakani atoko itxauana. ¹⁸Erekari Matamatakoti átinoka aua. Kristo sãkire aãuikasaaki, iua Erekari Matamatakoti anikaua aĩri Teosomoni. Anikari Xoteoakori, Xoteo minakanuia pakini iuamoni.

Teoso Aapoko Atxaua

¹⁹Uatxa Teoso mimarotakani !hĩtxaikaua. Uatxa áti uãka !hĩtxaikaua. Teoso tixine auakani hĩtxaua, apanakini Teoso sãkire auiãkanikata. Iua aapoko auakani hĩtxaua.

²⁰Teoso aapoko atoko atxaua. Aapokotxi kamaãka kaikori nopini imirikakani íkapani. Xesosi moianariakori tosi pakini, iua iokanatakini kãkitimoni, ninoa sãpiretakiti iua kaikori atoko itxa. Kitxakapiríka Teoso sãkire sãpiretakani sãpiretakiti apaka iua kaikori atoko itxa. Aapokotxi aua átika kai mitari, apanakini kai soro maĩkakari. Xesosi Kristo iua kai mitari atoko itxa. ²¹Ininiã iua maĩkaua. Iuakata aãua, ininiã kákiti itoãpotari auikiniri Xesosi sãkire. Apiananiri aapoko aneeãpotini atoko itxa. Iua Apiananiri aapoko atoko atxa. Imisãkiretiko aikoti atoko atxa. ²²Ininiã iua apotiitai híte hĩkinika iua aapoko hininiua íkapani, kotxi Teoso auiniãtaã hĩtxaua. Erekari Matamatakoti auiniãtaã hĩtxaua apaka.

Paoro Sãpiretari Teoso Sãkire Xoteo Minakonimoni

3 ¹Ikara atoko ininiã, nota Paoro kateia áki naua, híte Xoteo minakanuia Xesosi Kristo sãkire nisãpiretini xika. Kateia áki naua, kotxi nauikari Xesosi sãkire.

²Híkenakopiretapekari paríkatxi Teoso sikakiti notamoni, isãkire Xoteo minakanuia nisãpiretini íkapani. Ikinipoko erekari

isika notamoni, hīte nisāpiretini īkapani. ³Teoso oerekapekano kākiti mitxi mimarotakiniti. Mitxi axapitiki ikara Teoso oerekakiti niōkatsopatapeka hītemoni. ⁴Uatxa ia hātatsopatakasaaki, hīposotari himarotiniri nimarotakiti, kākiti mitxi mimarotakiniti, Kristo parīka kākiti īkapani. ⁵Kitxakapirīka kākiti kona imarotari ikara Kristo parīka kākiti īkapani. Uatxa Erekarī Matamatakoti oerekari ikara Xesosi iokanatakinimoni. Apaka oerekari ikara Teoso sākire sāpiretanimoni. Teoso parīkanoka ikamana ninoa. ⁶Nisāpiretai hīte kākiti mitxi mimarotakiniti. Xoteo minakaniua apakapariko Teoso nīkatakiti itixineē, Xoteoakori apakapiniri atokotxikana. Xoteo minakaniua, Xoteoakorikata Kristo īto atoko itxauana. Xoteo minakaniua apakapariko Teoso sikaenetakiti, Xoteoakori apakapiniri atokotxikana. Teoso iokanapirena erekari sāpiretari kākiti isikaenetakiti, kotxi isikari Kristo, Xoteoakori maerekani, Xoteo minakaniua maerekani apaka imaktxakini īkapani. Ikara kākiti mitxi mimarotakiniti.

⁷Teoso iokanatano nota kākitimoni iua iokanapirena erekari nisāpiretini īkapani. Ikara parīkatxi isikano, kotxi ikinipoko erekari Teoso sikano nota iposotiireē. ⁸Itomaneri Teoso nakitiakori poiāorini, iuaritika nota poiāori nininiua atoko inakari !uari. Iuaritika Teoso sikano ikinipoko erekari, kotxi iokanatano Xoteo minakonimoni erekari Kristo auakiti nisāpiretinina īkapani. Ikara erekari !ixipoka. Itori. !Kimarotikori ikinipoko erekari Kristo auakiti. ⁹Apaka Teoso nirekari noerekiniri ikinimane, ikara mitxi imimarotakiniti, Teoso nakitiakori tiretakakiniua. Itixi kamikosaaki, Teoso kipatari ikara kākiti mimarotakiniti. Ikipatiniritika uatxa ikara noerekari ikinimane. Teoso kamakasaakiri itixi, Xesosi Kristokata ikamari ikinipoko. Mitxi kona xatiki !uari. ¹⁰Uatxa Teoso nirekari imereēkini oerekiniri ikinipoko Teoso imarore auītetxiakori matamatakonimoni, Teoso tixine auakanimoni. ¹¹Itixi kamiko apisapanika, ātipirika Teoso nirekari aāuīte Kristo Xesosi kaminiri ikinika inirekakiti kākiti īkapani. ¹²Kristo kamakiti ate īkapani aāuikiniā, aposotapitikari aāpokini Teosomoni, ininiā !kapīkareua Teosomoni aāpokini. Ataparaxiniriritika asari iuamoni. ¹³Ininiākara nōtākikai hīte. !Himatinaniuatape nimisiritiko xika. Nimisiritaāka hīte īkapani, Xesosi sākire hāuikini īkapani, ininiā hūiukariko nimisiritiko. Teoso auiritari nimisiritiko, kotxi iua itene tiretai hīte.

Iuaĩkana Paoro Misākiretiniri Teoso

¹⁴Teoso nirekakiti kākiti ĩkapani nixinikasaaki, nikapotoreēkaua aãũite Xesosi Kristo iri apisatoõ, nimisākiretiniri ĩkapani.

¹⁵Ikinimane Teoso nakitiakori, itixine auakani, apaka ikinimane ĩkorapokoriti auakani apakapari iua uãka. ¹⁶Ia atoko nimisākiretari Teoso hĩte ĩkapani: “Peerekai pite. Ikinipoko erekari aua pitemoni. !Ixipoka ikara erekari. Ininiãkara, pisikaposotiiretana Épeso auakani ãkixinire. Ninirekari Erekari Matamatakoti iteene sikataparatinina ninoa ãkixinire. ¹⁷Ninirekari iteene auikinirina Kristo sãkire, ininiã Kristo auapika ãkixinireẽna. Ninirekari ninoa iteene imarotiniri pite tiraõki. Takari kotsa kipatxi erekari ãki auini atokokana, ninirekari ninoa kaikotini pitekata pitiraõki sikataparatinina ĩkapani. Imarotiniãrina pitiraõki, !irikana. !Ikamarina maerekati. ¹⁸Ninirekari ninoa, pinakitiakori, apanakini pinakitiakori pakini, imarotiniri Kristo tiraõki kākiti ĩkapani, kotxi Kristo tiraõki !ixipoka. !Kaiãotikori iua tiraõki. ¹⁹Kākiti kona posotari imarotiniri ikinika Kristo tiraõki. Ninirekari ninoa Épeso auakani apakapiniri ikini sereti erekari pisikakiti ãkixinireẽna, pite atão imarotinina ĩkapani.” Ikara atoko nimisākiretari Teoso hĩte ĩkapani.

²⁰Ininiã uatxa maxinikariko iua. Kaposotiireri apiatakari itxaua. Ikinipoko iposota ikamini. Imaposotakiniti !auari, ininiã ikinika aamanaãkiti, ikinika axinikakiti pakini, iposota ikamini. Ari, apikomoni iposota ikamini ate ĩkapani. Axinikakiti, aamanaãkiti poiãoka. Apiata iposotiire. Iua posotiire parĩkauata aãkixinireẽ. ²¹Ininiã Teoso mereẽkini kitxakapirĩka auakani, uatxa auakani, katana auakani pakini ãtipirika txariko Teoso: “Peerekai pite. Apiananiri pitxaua.” Ikara atoko itxana, kotxi Xesosi Kristo makatxakari amaerekani Teoso anaakori aniniua ĩkapani. Ameẽ.

Xesosi Auiãkani ãtika Iĩto Atoko Itxauana

4 ¹Kateia ãki naua, kotxi nauikari Apiananiri sãkire. Ininiã nota iteene õtãkikai hĩte ikinĩõtika atão hĩkamini, kotxi Teoso akiritai hĩte iua anaakori hininiua ĩkapani. Ikara atoko hininiã, iua kamakiti atokokana hĩkamako. ²Ininiãkara !hũikapeua. !Hinirekapiri hinirekakitinoka hĩkamini. Hãuiritariko ãti kaminiri iua nirekakiti. Katima homanãkarauataka !hĩtxapeko. Himĩteenekakakauako hĩkerokasaakiri hĩkamakiti. Hĩtiretakakauako. ³Erekari Matamatakoti

txíkitakari axinikakiti, anireēkiti pakini ātinoka inini, kotxi iua kamaerekaxiniretaua. Ininiākara hīparīkauatako ikara atoko auini īkapani. ⁴Xesosi īto atoko atxaua. Ātika īito, ininiā ītotxi ātika atoko atxaua. Erekarī Matamatakoti ātinoka aua. Teoso akiritakasaakii inakitiakori hininiua, hiātapariko hāpokinī iua tixine iuakata hāuini īkapani. Ininiā ātinoka hiātapakiti. ⁵Ātinokara Apiananiri aua. Ātinokara aāuiākiti sākiretxiti aua. Ātinokara apatxisatiko. ⁶Ātika Teoso aua. Iua ikinimane iri ātika aua. Iua ikinimane apisatoō apiatakari itxaua. Ikini itixiti iua aua. Amakinika aākixinireē iua aua.

Teoso Sikakiti Atemoni

⁷Kristo sikapekari iposotiire ate amakinimoni iparīka akamini īkapani. Iposotiire isikaua aparīka akamini īkapani. Aparīka pamimari, ininiā apiata isika iposotiire atemoni. ⁸Kotxi Teoso sākire kitxakapirīka txari:

Ikanīkasaaki itixinemoni, imikanapiriāna kākiti mitxi imokaiakari maīkakini. Iuasaaki isikari erekari kākitimoni.

⁹Iua kanīka, kotxi mitxipe iua katxaka itixi patapixiti ipīkani auiniātaā. ¹⁰Iua itixi patapixiti katxakakari, iuatxikana kanīka iaxiti apiko nopinixiti, ininiā uatxa iua aua ikini itixiti, iaxiti, Teoso tixine pakini. !Auari iua mauakaniātaā.

¹¹Iposotiire isikasaaki isākire auiākanimoni, isikari ia atoko parīkauatakani ininiuana īkapani: Kristo iokanatakini kākitimoni, Teoso sākire sāpiretakani, Teoso iokanapirena erekari sāpiretakani, Teoso nakitiakori ōtākikakani, Teoso sākire oerekakani pakini isikaua. ¹²Ikara atoko isikaua, kotxi inirekari ninoa oerekiniua inakitiakori iparīka atāo akamini īkapani. Ikara atoko isikaua, kotxi ninoa sikataparaxiniretaua. ¹³Ninoa sikataparaxiniretiniritika ātika aāuiākiti auako. Ipinimoni inakari aāuiākiti !auaika, kotxi atāo aimarotariko Teoso ākiri sākire. Ininiā kiūkiteua, kimaroreua iuasaaki. Kristo atoko atxauako, kotxi paimatireri iua.

¹⁴Ininiā iuasaaki amarini atoko !atxaikaua, kotxi amarini !imarotari atāo inakari. Tsakati anikakiti atoko, ītima anikakiti atoko itxana kākiti kamisirienereri sākire auiākani. !Imarotarina atāo Teoso sākire. Ninoa kamisirienereri xinikaxitita atāo minakati oerekini īkapani. ¹⁵Atāo inakaranoka asāpiretako kākiti atiraōkiritika. Ikara atoko akaminiā, aimarore aneeāpota. Kristo sākire iteene aāuikaāpota. Erekarī akamakiti aneeāpota. Ininiā

Kristo atoko atxaua, kotxi iua ito atokotxikana atxaua. Ate kii atoko itxaua Kristo. ¹⁶Itotxi kamari ikii paniätakiti. Iua atokokana ate kamari Kristo paniätakiti. Ininiã aãpotiitaua. Amoianatakakaua Kristo parîka akamini îkapani, kotxi itotxi âtika atoko atxaua. Kristo sikataparataua amoianatakakiniua. Ininiã ikinika Kristo nakitiakori atão parîkauatiniã iua îkapani, apiaãpota aimarotari iua imarore atão akamini îkapani. Akinika atão aparîkauatiniã Kristo îkapani, ikamataparaxiniretaua. Iuusaaki atiretakakaua. Iuusaaki itotxi erekari, mamianatakati atoko itxaua Kristo nakitiakori.

Aãuini Amaneri

¹⁷Ikara atoko ininiã, ia nisãpiretai. Apiananiri imaroreẽ iteene nõtãkikai. !Hîkamapinikariko apanakini Xoteo minakanuia kamakiti atoko. !Kiîkiteri ninoa kamakiti. !Kiîkiteri ixinikakitina. ¹⁸!Imarotarina atão inakari. Mapiãri atoko itxa iîkitena. Ikara atoko ininiã, !kimarorena. Teoso !itxîkitakana auapininiika ininina, kotxi âkixinireẽna !nirekarina atão inakari imarotininna. ¹⁹Ninoa âkixinire âpatapeka, ininiã !ipêtauatana maerekati ikamakasaakina. Ininiãkara ninoaka sikaua Satanasimoni iïtona nireëkitinoka ikaminina îkapani. Ininiã ikamarina ikinika maerekati. Itori maerekati inireka ikaminina. !Nirekarina iotokakinirina ikara maerekati ikaminina.

²⁰Hîtepekana, ikara maerekati !hõerekaãka, Kristo himarotakasaaki. ²¹Iuusaaki hîkenakotapitikari iua sãkire. Iua oerekai atão inakari, kotxi Xesosi imarotari ikinipoko atão inakari. ²²Hõerekaãka hîtakanapiniri maerekati mitxi hîkamakiti, hîxinikakiti pakini. Himãka kitxakari hõkini atokokana hîtxapaniko himaerekani hîtakanapini. Hîtakanapariko ikara kitxakari hinireëkiti, kotxi ikara maerekati hinireëkiti misirienetai. ²³Ininiã eereka hamanaãriko Teoso txîkitakiniri hîxinikakiti, hinireëkiti pakini amaneri inini. ²⁴Ininiã himãka amaneri hîeretakini atokokana, amanerinoka atão inakarinoka hîkamako, kotxi Teoso txîkitakai hîxinire amaneri inini, Teoso atoko hinini îkapani. Ininiã atão inakari himarota. Erekarinoka hîkama. Teoso îkapaninanira hîparîkauatako.

²⁵Ininiã aãpirena kona hîkamape hîtariakorimoni. Atão inakarinoka hîsãkiretao, kotxi amakinika ate âtika itotxi atoko atxaua. ²⁶Hinaiatakasaakiua, !hãuiritapiri homanãkare txîkitakinii maerekati hîkamini. Himakini apisapanika, hîotokakariko homanãkaruatini. ²⁷Ikara homanãkare himatakanapanisaaki,

hãuiritari Satanasi txĩkitakinii maerekati hĩkamini, ininiã !hãuiritapiriko iua.

²⁸Atxiiti hiitiriuatapeka, ininiã !hiitiriuatapinikako. Hĩparĩkauatako. Erekarĩ parĩkatxi hũuakoã hĩkamako, hĩparĩka ĩki hãpakapini ĩkapani. Ininiã eereka aua minakati hĩtemoni, kãkiti minakati mauinakinimoni hĩsikini ĩkapani. ²⁹Maerekati sãkiretxiti !hĩsãpiretapiri kãkiti. Erekarinoka hĩsãpiretako, hĩsãkire kenakotakani hĩsikataraxiniretini ĩkapani, ikinipoko erekari Teoso sikakiti ninoa apakapini ĩkapani. ³⁰Kona hĩkamamatinanitapiri Erekarĩ Matamatakoti Teoso nakiti himaerekani xika. Erekarĩ Matamatakoti Teoso takaõtxikare itxaua. Teoso sikapekari iua atemoni, ininiã aimarotapitikari aãpakapiniri ikinipoko Teoso sikaenetakiti Kristo uai kanapiriãkasaaki. Iuasaaki imakatzakaua ikinika maerekati auiniãtaã. ³¹!Hinĩkatapiri homanãkare hãkixinireẽ. Katima naiataka !hĩtxapeko. Ātipirika apanakini homanatinini, hĩtakanapako. !Hĩtxitapiri āti. !Himĩsãkirepiretapiri āti. Ikini sereti maerekati ikara atoko inakari hĩtakanapako. ³²Erekarĩ hĩkaminakakauako. Hiamonĩkakauako. Himaxinĩkaretariko maerekati āti kamakiti hĩtemoni, maerekati ate kamakiti Teoso maxinĩkaretini atokotxikana. Teoso maxinĩkaretari amaerekani, kotxi Kristo ipina ate ĩkapani.

Hĩtiraõkiuatako Ikiniõtika

5 ¹Teoso anaakori itiretakini hĩtxaua, ininiã hĩkamariko Teoso kamakiti atokotxikana. ²Hĩtiraõkiuatako ikiniõtika, Kristo tiretiniua atokotxikana. Iuaka isikaua Teosomoni, kotxi ipina ate ĩkapani. Teoso apokaerekatari Kristo ipinini ate ĩkapani. Peerekari isikiniua Teosomoni.

³Teoso nakitiakori hĩtxaua, ininiã kona ninirekari nikenakopiretiniri pĩtaniri minakotikatika, pĩtanoro minakotokatika pisirĩkini. !Apakata maerekati hiito nireẽkiti hĩkamini. !Apakata maerekati hiito nireẽkiti hĩxinikini, hĩsãpiretini. Ikara hĩxinire txikotakari hĩtakanapako. Txineiro potxitakani !hĩtxapeuako. ⁴!Hĩsãpiretapiriko sãkiretxi maerekati. Sãkiretxi miĩkiteti apaka !hĩsãpiretape. !Hinapetapiri āti. Hĩsãkirauatakasaaki, hĩtxariko: “Peerekari Teoso, kotxi isikaua ikinipoko erekari.” ⁵Aimarotari ia: Ītanoro minakotokatika sirĩkakari, maerekati iito nireẽkiti kamakari, txineiro potxitakani pakini liteosonetari Teoso. Teoso kamakori misãkiretakani atoko itxana. Ikara atoko inakani !apakapari Teoso

sikaenetakiti iua anaakorimoni, Kristo, Teoso pakini auítetxi ininiãtaãua.

⁶Kona hãuiritapiri kãkiti misirienetini hĩte miĩkiteti sãkirextitiã. Kona !hãuikapiri ninoa sãkire, kotxi ikara atoko inakari maerekati xika, Teoso misiritariko isãkire makĩpitakani. ⁷Ininiã ikara atoko inakani moianariakori !hĩtxapeuako.

Pokamara Atoko Hĩtxaua

⁸Mĩtxi hĩte mapiãri atoko hĩtxa, kotxi !himarotari Apiananiri iuasaaki. Uatxa hĩte imarotapitikari iua, ininiã pokamara atoko hĩtxaua. Ininiãkara erekarinoka hĩkamako ikiniõtika. ⁹Erekari Matamatakoti auakasaaki kãkiti ãkixinireẽ, erekarinoka inireka ikamini. Atãonoka ikama. Atão inakaranoka isãpireta. Ikara atoko inakari Erekari Matamatakoti sikakiti. ¹⁰Hinitariko Apiananiri nireẽkiti hĩkamini ĩkapani. ¹¹Ikara atoko ininiã, kona himoianatapiri kãkiti maerekati kamakani, kotxi ikara parĩkatxi ipiaã potoricakari. Ikara atoko inakari parĩkatxi !iminari erekari atemoni. Ininiã maerekati !hĩkamape. Ia hĩkamako. Hõerekariko kãkiti maerekati makamakani. ¹²Apẽtauata asãpiretiniri Teoso sãkire makĩpitakani kamakiti ipiaã, kotxi apia maerekati ĩkora. ¹³Ikinika tirikapĩ kamara auiniãtaã atamataãka, ¹⁴kotxi tirikapĩ iopinikari ikinika. Ininiã ãti txari: “Himereka, imakakani atoko inakanii. Hõkitikauako ipĩkani atoko inakanii. Ininiã iuasaaki Kristo iopinikariko hãkixinire.”

Miĩkiteti !Hĩtxapeua

¹⁵Erepaniko. Atão inakari hĩkamako ikiniõtika. !Hĩkamapiri miĩkiteti kamakiti atoko. Hĩkamariko kãkiti kiĩkiteri kamakiti atoko. ¹⁶Hĩkamariko erekari, kotxi poiãonoka hãuini. Hĩkamariko erekari ikiniõtika, kotxi maerekati auapitika ĩkorasaaki. ¹⁷Ininiã miĩkiteti !hĩtxapeua. Himarotariko Apiananiri nireẽkiti.

¹⁸Kona hiãtapero iãriã kapoãro hĩpoãtini ĩkapani, kotxi itxĩkitakai maerekati hĩkamini. Hãuiritariko Erekari Matamatakoti txĩkitakinii erekarinoka hĩkamini. ¹⁹Hĩsãpiretakakaua xikari Teoso ĩkapani, xikari kitxakari, xikari ĩkorapokoriti auakari pakini. Hĩxikaretari ikara atoko inakari xikari Teoso ĩkapani. Hãkixinireẽ apaka hĩxikarauata Teoso ĩkapani. ²⁰Ãtipirika hĩtxariko aĩri Teoso: “Erekapitikai pite, kotxi erekari ikinipoko pisikakiti atemoni.” Xesosi Kristo aãũite ininiua, asãpiretari Teoso ikara atoko inakari.

Tanorotxi Pirena.

²¹Hĩpaxitakakauako, āti nirekakiti hĩkamini, kotxi hĩpĩkariko Teoso manirekakiniti hĩkamini. ²²Ininiã hĩte sitoakoro hĩkamariko hĩtaniri nireẽkiti. Apiananiri nireẽkiti hĩkamini atokokana hĩkamariko hĩtaniri nireẽkiti, ²³kotxi pĩtāniri pikii atoko itxaua. Ininiã iua piauĩte itxaua. Iua atokokana Kristo inakitiakori kii atoko itxaua Kristo. Iua ĩto atoko atxaua. Aãũite itxaua. Amaerekani makatxakakari itxaua. Ininiã sito kamariko oĩtaniri paniātakiti. ²⁴Ininiã kākiti Kristo nakitiakori kamari Kristo nireẽkiti. Iua atokotxikana sito kamariko ikinipoko oĩtaniri nireẽkiti.

Taniritxi Pirena

²⁵Hĩte taniritxi, hĩtiretaroko hĩtanoro. Kristo tiritinina inakitiakori atokokana, hĩtiretaroko hĩtanoro. Iua iteene tirtana, kotxi ipina inakitiakori ĩkapani. ²⁶Iua ipina, kotxi inirekari itxĩkitakinuia ate iua nakitiakori aniniua. Inirekari imakatxakiniri amaerekani. Āparaã makatxakiniri aĩto txiko atokokana, iua sākire makatxakari amaerekani aākixinireẽ auakari. ²⁷Kristo ipina inakitiakori ĩkapani, kotxi inirekaua iposope anini ate apakapini ĩkapani. Iuusaaki peerekaua. Ātika amaerekani !auaika. Ātika akerokakiti !auaika. Ikara atoko inakari maerekati !auaika. Iuusaaki atão Teoso nakitiakori atxaua. Erekarinoka akama iuusaaki. ²⁸Ikara atoko ininiã, kiki tirtetaroko ĩtanoro, ĩto itiretini atokokana. ĩtanoro tirtetakari iuaka itiretaua. ²⁹Kākiti !omanatari iuaka ĩto. Isikakienatari. Itiretari. Apiananiri tiritiniri inakitiakori atokokana, kākiti tirtetari iuaka ĩto. ³⁰Apiananiri ĩto atoko atxaua. Ixini atoko atxaua. Api atoko atxaua. Ikanoke atoko atxaua. Iuako atoko atxaua. Itxaãpota. ³¹Iua ĩto atoko atxaua, ininiãkara kiki ĩtanorouatakasaaki, itakanapana iri, inoro pakini ĩtanorokata ikaikotini ĩkapani. Ininiã ātinoka ĩtotxi atoko itxauana. ³²Nisāpiretai mitxi !kimarotikori. Kristo inakitiakorikata ātika ĩtotxi atoko itxauana. Kākiti !imarotari ikara mitxi. ³³Ininiã pitiretaroko pĩtānoro piteka ĩto pitiretini atokokana. Pite tanorotxipekana, pipaxitariko pĩtaniri.

Amarini Pirena

6 ¹Hĩte amariniakori, hĩkĩpitanako hĩri, hinoro pakini sãkire, kotxi ikara Apiananiri paniãtakiti. Atão pikĩpitanako ninoa sãkire. ²Kitxakapirĩka Teoso sãkire paniãtaua:

Hĩpaxitanako hĩri, hinoro pakini.

Ikara Teoso paniãtakiti hĩkaminiã, Teoso sikaenetakiti isika hĩtemoni. Mĩtxi Teoso paniãtakiti !auari Teoso sikaenetakiti.

³Hĩri, hinoro pakini sãkire hĩkĩpitiniã, ia isikaenetakiti apokapitikako hĩtemoni. Hĩkĩpitiniãri ninoa sãkire, erekari hãuini. Hĩkĩpitiniãri ninoa sãkire, hãuiniritika kiomãtxi hĩtxauako.

Irĩtxi Pirena

⁴Hĩtepekana irĩtxiakori, kona hĩtxĩkitakapena hamariteakori omanãkarauatini atão minakati hĩkamini xika. Hõerekanako Apiananiri nireẽkiti ikaminina. Hõerekanako Apiananiri sãkire imarotinina.

Nitiritxi Pirena

⁵Hĩtepekana nitiritxiakori amotakoni, hĩkamariko hĩauĩteakori ĩkorapokoriti auakani paniãtakiti. Hĩpaxitanako ninoa. Hĩpĩkariko ninoa manirekakiniti hĩkamini. Hãkixinireẽ hinirekariko ninoa nireẽkitinoka hĩkamini. Kristo paniãtakiti hĩkamini atokokana, hĩkamariko ninoa paniãtakiti. ⁶!Hĩparĩkauatapeko hĩparĩka erekari apanakini atamatini ĩkapani ĩkapani, kotxi iusaaki hinirekari ninoa poxokotini. Kristo nitiriakori hĩtxaua, ininiã hĩparĩkauata Teoso nireẽkiti hĩkamini, kotxi hãkixinireẽ ikaranoka hinireka hĩkamini. ⁷Hĩkamariko hĩparĩka ikinika hĩpoxokoniritika, hinirekiniritika. Apiananiri ĩkapani hĩparĩkauatini atokokana, hĩparĩkauatako hĩauĩte ĩkorapokoriti auakari ĩkapani. ⁸Kotxi himarotari Apiananiri sikariko parĩkatxi ĩki kãkitimoni, ikinipoko erekari ikamakiti ĩki. Nitiritxi iamotakoni, apaka nitiritxi miamotakoni Kristo nakitiakori apakapariko erekari ikamakitina ĩki.

Patrão Pirena

⁹Hĩtepekana patrão, ia atoko inakari hĩkamako hinitiriakorimoni. !Hĩtxapiri hinitiriakori: “Ikinika nota paniãtakiti himakamakaniã, iteene nimisiritai hĩte,” kotxi hĩte patrãote aua apaka iaxiti. Iua Teoso. Teoso kamakiti poiãorimoni, iua atokotxikana ikamakiti auĩtetximoni.

Kākiti Xinire Tokapare

- ¹⁰Nitariakori, ia nisākire mapotōkire: Katapara hītẏako. Hīkosekataparatariko Apiananiri tapara, kotxi kaposotiireri iua.
- ¹¹Sotato ieretakari iīto tokapare, neenamatchi ikamini apisapanika. Iua atokokana Teoso sikaua axinire tokapare, ininiā maeretakariko ikinika ikara axinire tokapare, kotxi neenamatchi auapitika Satanasikata. Iua paimatireri. Ixinikaxititapekari itxīkitakinia maerekati akamini.
- ¹²!Aneenamauata kākitekata. Aneenamauata maerekani matamatakoni auīteakorikata, ikinika maerekani matamatakoni kaposotiireririkata. Aneenamauata auītetiakorikata iīkorapokoriti ipiaā auakanikata. Aneenamauata ikinipoko maerekani matamatakoni iaxiti auakanikata.
- ¹³Ininiākara hīeretakariko ikinika Teoso sikakiti hīxinire tokapare. Ininiā maerekati apokasaaki, !inokai. Kona hīrika. Kona himiteka. Hīokanitari Satanasi isini. Hīte kāiata.
- ¹⁴Sotato iposope ineenamauatini atoko hītẏako. Sotato takari ipakiomatare. Ipakiomatare maīkari ikinipoko iīto tokapare. Sotato pakiomatare atoko itxa hīxinire tokapare maīkiko. Atāo inakari sākiretxiti itxaua iua. Ininiā hītakariko ikara hīpakiomatare.
- Sotato takari itorota koana, itorota tokapare iīkapani. Sotato torota koana atoko itxa hīkamakiti atāo inakarinoka. Ininiā hīeretakariko ikara hītorota tokapare.
- ¹⁵Sotato kiti apaka iposope ineenamauatini, kotxi itakari ikiti mata ikiti tokapare iīkapani. Sotato kiti mata atoko itxa Teoso iokanapirena erekari aanikapiretakiti kākitimoni. Ikara iokanapirena sāpiretaua Teoso !imisiritaikaua, isākire aūuikasaaki. Ininiā hīeretakariko ikara hīkiti mata.
- ¹⁶Sotato maīkari itokapare, iīto imokaiakari xiripi minokakani iīkapani. Xiripitxi tirinakari itokaparemoni apokasaaki, oaka. Iua tokaparetxi atoko itxa Teoso sākire auikiko. Iteene hāuikiniāri Teoso sākire Satanasi liposotari inokinii maerekatiā. Ininiā himaīkariko ikara tokaparetxi.
- ¹⁷Sotato takari ikii tokapare metao kamakori. Sotato kii tāta atoko itxa amaerekani makatxakiko aimarotini. Ikara imaroretxi axinikakiti akii tokapare itxaua. Ininiā hītakariko ikara hīkii tāta.
- Sotato anikaro iouata mitaro. Oa iouata mitaro atoko itxa Erekari Matamatakoti sāpiretiniua Teoso sākire. Ininiā himaīkaroko oa iouata mitaro.

¹⁸Himisākiretariko Teoso ātipirika. Hamanaāriko, Erekarī Matamatakoti nireēkiti iaōka hāpakapini. Araōkire hītxako. !Hītakanapapiri hīsākirauatini Teosokata. Hamanaāriko Teoso, ikinimane inakitiakori nireēkiti isikinina.

¹⁹Himisākiretari Teoso nota īkapani apaka. Hamanaāri Teoso, isākire isikinino nisākirauatakasaaki, nitaparaxinireritika nisākirauatini īkapani, kotxi ninirekari Teoso iokanapirena erekari nisāpiretiniri kākiti. Mitxi Teoso iokanapirena erekari !kimarotikori. ²⁰Uatxa Teoso iokanatano nota kākitimoni, iokanapirena erekari nisāpiretini īkapani. Ikara nisāpiretini xika, kateia āki naua nota uatxa. Hamanaāri Teoso, isākire nitaparaxinireritika nisāpiretini, kotxi ikara inakari niparīka.

²¹Niokanatarī Txíkiko inakori hītemoni. Aītari atiretakiti iua. Apiananiri nitiri itxaua. Atāo iparīkauata Apiananiri īkapani. Iua sāpiretaiko hīte nota pirena. Ikara atoko himarotariko nauini, nikamakiti pakini. Iua sāpiretai ikinipoko nota pirena. ²²Ininiā niokanatarī iua hītemoni ate pirena himarotini īkapani, isikataparaxiniretinii hīte īkapani. ²³Nitariakori, āiri Teoso, Apiananiri Xesosi Kristo pakini kamaerekaxiniretai. Itiretaina hīte. Itxīkitakaina Teoso sākire iteene hāuikini. ²⁴Teoso sikari ikinipoko erekari aāuīte Xesosi Kristo ātipirika tirketanimoni. Ameē.

PIRIPOSI

Paoro Iokanatsopatakiti Piriposi Auakanimoni

1 ¹Nota Paoro, Tximótxio pakini, Kristo Xesosi nitiriakori iua amotakini atxaua. Niõkatsopata ikini kãkiti Kristo Xesosi nakitiakorimoni, Piriposi sitatxiti auakanimoni aiokanapireta. Niõkatsopata hĩte kõtãkikarerinimoni, kotxi hĩte õtãkikana Xesosi sãkire auiãkani. Hĩtepekana, kamiparĩkarerini, niõkatsopata hĩtemoni, kotxi hĩte moianatana Xesosi sãkire auiãkani.

²Ereẽkai hĩte. Aĩri Teoso, Xesosi Kristo Apiananiri pakini sikai ikinipoko erekari. Ninoa kamaerekaxiniretai.

Paoro Misãkiretari Teoso Piriposi Auakani Īkapani

³Hĩte nixinikasaaki: “Erekapitikari aTeosone,” nitxa. ⁴Teoso nimisãkiretakasaaki hĩte himakinika ĩkapani, nipoxokoniritika nimisãkiretari Teoso. ⁵Nipoxokoniuata, kotxi hĩte miparĩkatano nota Teoso iokanapirena erekari nisãpiretini ĩkapani, kotxi hĩte iokanataro txineiro notamoni. Teoso iokanapirena erekari hãuikasaaki, hĩpotorika himiparĩkatinino. Eereka kona hĩte iotokaika himiparĩkatinino nota. Uatxa auapika himiparĩkatinino nota. ⁶Teoso sikari erekari hĩtemoni merepanika isãkire hãuikasaaki, ininiã nota imarotapitikari Teoso sikari erekari hĩtemoni ikiniõtika. Ikara Teoso parĩka hĩtemoni. Erekarĩ isikiniritika Xesosi kanapiriã ĩkorapokoriti. ⁷Atãopitika nixinikinii hĩte nipoxokoniritika, kotxi iteene nitiretai hĩte himakinika. Atxiĩti kateia ãki naua. Atxiĩti mapara naua, kãkiti Teoso iokanapirena erekari atão ininiua noerekini ĩkapani. Atxiĩti nisãpiretari Teoso iokanapirena

erekari, kākiti iteene imarotini ĩkapani. Kateia āki nauakasaaki, mapara nauakasaaki, ĩkiniōtika hīte notakata apakapari ĩkinipoko erekari Teoso sikakiti. ⁸Nota iteene tiretai hīte. Kristo Xesosi tiretini atokokana nitiretai hīte. Teoso imarotari ĩkara nisākire atāo ĩnini.

⁹Nota misākiretari Teoso hīte ĩkapani ia atoko: Ninirekari hītiraōkiuatini apiaāpotini ĩkiniōtika. Hītiraōki aneeāpotakasaaki, ninirekari himarore apaka aneeāpotini. Imaroretxi himaroāpotakasaaki, ninirekari atāonoka himarotini. ¹⁰Ikara atoko hininiā, himereēri apia erekari hīkamini. ĩniniā maerekati !hīkama. Maerekati na apanakinimoni !hīkama. ĩkara atoko hininiā, iposopeka hītixa Kristo kanapiriākasaaki. ¹¹Ikara atoko hininiā, ĩkinipoko hīkamakiti erekari. Xesosi Kristonokara kamaerekatai hīte hīkamakiti ereka ĩnini ĩkapani. Apanakini atamatakasaakiri erekari hīkamakiti, ninoa imarotari Teoso posotiire, ĩniniā eereka ninoa: “Peerekari Teoso,” itxanako.

Paoro Misiritiko Pirena

¹²Nitariakori, himarotari nota iteene misiritaāka. Iuaritika Teoso iokanapirena erekari iaripiretapeka. Ninirekari himarotini, nimisiritiko xika apikomoni kākiti imarotari Teoso iokanapirena erekari. ¹³ĩniniā nimisiritiko xika ĩkinika sotatoakori, Homanoakori auīte aapoko ĩnīkatakani, ĩkinimane kākiti mapara auakani apaka imarotari nota uai kateia āki nauakasaaki Kristo sākire nisāpiretini xika. ¹⁴Itori aītariakori Apiananiri sākire auiākani, sikataparaxiniretaāka, kotxi imarotarina Teoso nīkatinino nota kateia āki nauakasaaki. ĩniniā ninoa sāpiretari Teoso sākire itaparaxinireritikana. Mapīkaretika itxana.

¹⁵Ninoa sāpiretari Kristo sākire, kotxi ĩnirekarina erekari ĩkaminina. Txamari apanakinipekana sāpiretari Kristo sākire nota xikotiko xika. ĩnirekarina kākiti auikiniri ninoaka sākire, nota sākire poiāoka auikinina ĩkapani. Ninoa sāpiretari Kristo iokanapirena, kotxi ninoa potxitari kākiti taparakienatakakiniua. ¹⁶Aītariakori, erekarinani nirekakani, sāpiretari Kristo iokanapirena, kotxi ninoa tiretano nota. Ninoa imarotari Teoso sakinino nota ia parīkatxi, Teoso iokanapirena erekari atāo ĩnini noerekini ĩkapani. ¹⁷Nota xikotakani sāpiretari Kristo sākire, txamari ĩnirekarina ninoaka nireēkiti ĩkaminina. !ĩnirekarina Teoso nireēkiti. ĩnirekarina nota apia atatsiitiniri nimisiritiko uai kateia āki nauakasaaki.

18 Atxiiti Kristo iokanapirena sãpiretakani ãkixinire erekari. Atxiiti ninoa ãkixinire kona erekari. Iuaritika erekapitikari, kotxi Kristo iokanapirena sãpiretapeẽkaika. Ininiãkara nipoxokoniuaata nota. Ari, !niotokapani nipoxokoniuatini. 19 Nipoxokoniuaata, kotxi nimarotari nitakanapiniri kateia, kotxi hĩte misãkiretari Teoso nota ĩkapani. Nimakatzakaãkako kateia ãki, kotxi Erekari Matamatakoti Xesosi Kristokata auakari moianatano nota. 20 Kona ninirekari nipẽtauatini, Kristo iokanapirena nisãpiretakasaaki. Ninirekari kataparaxinire ninini, Kristo apanakini nisãpiretini ĩkapani. Ikara atoko nininiã, apanakini imarotari Kristo Apiananiri ininiua. Ikiniõtika nauapanika ninakasaaki, ninirekari kãkiti imarotiniri Kristo Apiananiri ininiua. Ari, nipĩkasaaki apaka, ninirekari apanakini imarotiniri Kristo Apiananiri ininiua. 21 Auapanika ninakasaaki, ninirekari Kristo nireẽkitinoka nikamini. Erekapitikari nipinini, kotxi eereka Kristokata nauapika. 22 Auapanika ninakasaaki, nipaĩkauatapitipo Teoso sãkire nisãpiretini, ininiãkara erekari nipaĩka. Kipa ninireka? Nota auapanika nininikani? Nipininikani? !Nimarotari ninireẽkiti. 23 Ninirekari auapanika ninini. Apaka ninirekari nipinini. Apiata ninirekari nipinini Kristokata nauini ĩkapani. Ikara atoko apiaerekata. 24 Txamari hĩte noerekini ĩkapani, ninirekari auapanika ninini, kotxi hĩte nirekapanikano nota. 25 Ikara nimarotapitika, ininiã auapanika nitxa, himakinika noerekini ĩkapani, kotxi nota nirekari himarõãpotiniri Teoso sãkire. Ninirekari hãuikiniri hĩpoxokoniritika. 26 Ininiã eereka hĩtxari: “Erekapitikari Kristo Xesosi, kotxi Paoro iuaĩkana apoka atemoni,” hĩtxapaniko. Ininiã iteene hĩpoxokoniuaata iusaaki.

27 Atxiiti auapanika nitxa, atxiiti nipina, iuaritika ikiniõtika ereka hĩtxako hãuini. Erekari Kristo iokanapirena, ininiã hĩte apaka ereka hĩtxako hãuini. Atxiiti nisa hĩtemoni. Atxiiti kona nisa. Atxiiti nikenakopiretai hĩte uai kateia ãki nauakasaaki. Iuaritika, hãuini ereka inakasaaki, nimarotariko hĩte himakinika iteene auikiniri Kristo sãkire iua iokanapirena erekari. Hãuini ereka inakasaaki, nimarotari hĩte himakinika sãpiretiniri Kristo iokanapirena iaõka apanakinimoni. 28 Hãuini ereka inakasaaki, na hĩpĩkana hĩte omanatakani. Hĩtaparaxiniriritika hãuiniã, ninoa hĩte omanatakani imarotari ixipokinina ãti õti. Hĩtaparaxiniriritika hãuiniã, ninoa imarotari Teoso makatzakinii hĩte himapinakani ĩkapani. 29 Ininiã Teoso sikari erekari hĩtemoni, kotxi iua auiritai hĩte auikiniri Kristo iokanapirena. Apaka erekari isikai hĩte, kotxi iua auiritai hĩte

atatsiitiniri himisiritiko Kristo ĩkapani. ³⁰Hĩte atamatapekari nota misiritiko, hĩte sauaki nauakasaaki. Hĩkenakopiretari nimisiritiko auapanika uatxa. Uatxa hĩte nota atoko, kotxi hĩte apaka misiritaāka.

Kristoka Poiāotakaua.

2 ¹Kristo sikataparaxiniretaua ate, iua nakiti aniniāua. Kristo mĩkapiritaua ate, amarini axapitiri inoro mĩkapiritini atoko itxa, kotxi iua tiretaua. Ātipirika iua Erekari Matamatakoti amoiانari itxaua. Kristo iteene tiretaua. Iua amonĩkaua. ²Ininiākara nota ōtākikai hĩte hĩkinika. Hĩxinikariko Teoso nireēkitinoka hĩkamini, ininiā hĩxinikakiti ātinoka txauako. Hĩtiretakakauako Teoso tiretiniua atokokana. Hinireēkiti ātinoka txauako. Ikara atoko hininiā, iteene hĩkamapoxokonitano nota. ³Kona kapotxinaniri hĩtxapeua. !Hĩuikapeua. Hĩteka minakati hĩtxauako. Hĩxinikariko: “Apanakini apiata, nota poiāoka”. ⁴!Hĩxinikapiri pite nireēkitinani. Himiparĩkatanako apanakini, ninoa nireēkiti ikaminina ĩkapani.

⁵Xesosi Kristo xiniākitikanerako hĩxinikako. Kristo kamakitikanerako hĩkamako. ⁶Teoso itxaua Kristo Xesosi, ininiā iposotari ipaniātiniri ikinimane inireēkiti ikaminina. ⁷Iuaritika itakanapari auĩtetxi ininiua. Nitiritxi atoko itxapekaua. Iuaka minakati itxĩkitakaua, kotxi kãkitipeka itxaua uai itixi iponaniākasaaki. ⁸Iuasaaki kiki inakasaakiua, iuaĩkana iuaka ipoiāotakaua, kotxi ikĩpitari Teoso sãkire ipinini ĩkapani. Imarotari okiko tĩkane, kokaniri okiko atoko inaākako aamina ĩpiriāmitakari nopini. Iuaritika ikĩpitari Teoso sãkire ipinini ĩkapani. ⁹Ikara atoko ininiā, Teoso txĩkitakari iua Apiananiri ininiāua. Āti iua atoko inakari !auari. Teoso takari iuāka. Āti uāka iua atoko inakari !auari, ¹⁰kotxi kãkiti ikininape kenakotakasaakiri iuāka Xesosi, ikapotreēkauako Xesosi apisatoō. Ikinimane Teoso tixine auakani, ikinimane itixi auakani, ikinimane ipĩkani auiniātaā pakini kapotreēkauako Xesosi apisatoō, kotxi iauĩtena itxaua Xesosi. ¹¹Ikinipoko kãkiti txako: “Xesosi Kristo Apiananiri itxaua,” itxanako. Ikara atoko ininiā ikinimane: “Peerekari aĩri Teoso,” itxanako.

Iōriki Atoko Hĩtxako

¹²Ininiā nota tiretakini, hĩkĩpitariko nisãkire uatxa, mitxi hĩtekata nauakasaaki nisãkire hĩkĩpitini atokokana hĩtxako. Uatxa kona hĩtekataikano, iuaritika ninirekari apiata hĩkĩpitiniri

nisākire. Teoso makatxakapekari himaerekani itixine hīsini ĩkapani, ininiākara ikiniōtika hīparĩkauatako Teoso ĩkapani. Hīpĩkariko maerekati hĩkamini. Erekarinanira hĩkamapikako. ¹³Hīposotari ikara atoko hĩkamini, kotxi Teosokara moianatai hĩte. Iua kamanirekaretai hĩte iua nireēkiti hinirekini ĩkapani. Iua sikaposotiiretai hĩte iua nireēkiti hĩkamini ĩkapani.

¹⁴Hīparĩkauatakasaaki, !hĩtsoatape, !hĩtxitakakapeua. ¹⁵Ikara atoko hĩkaminiā, hĩkerokiniri !auari, himaerekani !auari, ininiā erekarinoka hĩkama apanakinimoni. Ininiā Teoso anaakori erekarini hĩtxaua. Kākiti kamisirienererini sauaki hāuanāta hĩte. Kākiti maerekani sauaki hāuanāta. Iōriki iopinikari iaxiti ĩkanōka. Iōriki atoko hĩtxako. Hīopinikariko maerekati auiniātaā, atāo inakari kākiti imarotini ĩkapani. ¹⁶Hĩte iopinikari ipiā, Teoso sākire apanakinimoni hīsāpiretakasaaki. Teoso sākire txĩkitakari kākiti ātipirika auāki inini tĩkane, Teosokata auini ĩkapani. Hĩte Teoso anaakori erekarini hininiāua, nota iuikaiko hĩte, Kristo uaimoni kanapiriākasaaki, kotxi hĩte auikapekari Teoso sākire nisāpiretakiti. Kona maxikatĩkani nīparĩkauatapitipo hĩte ĩkapani, kotxi hĩte auikapekari Teoso sākire nisāpiretakiti.

¹⁷Atxiĩti nota okaāka Teoso sākire nisāpiretini xika. Atxiĩti niarēka oxikepoakataāka, Teosomoni sikakori atoko inakari, Teoso sākire nisāpiretinii xika, Teoso sākire hāuikini xika. Nokaāka atxiĩti, iuaritika nīpoxokoniuata. Nīpoxokoniuata hĩtekata. ¹⁸Ininiā erekari hĩte apaka poxokoniuatini. Erekarini hīpoxokoniuatini notakata.

Tximótxio Pirena

¹⁹Xesosi Apiananiri nirekiniāri nota iokanatiniri Tximótxio hĩtemoni, ininiā mapaōtipeka inakasaaki niokanatarini iua. Ininiā eereka iua minapiretari hĩte pirena, nota apaka poxokoniuatini ĩkapani. ²⁰Āti Tximótxio atoko inakari uai !auari, kotxi iua iteene tiretai hĩte. Iua nirekari hāuini ereka inini. ²¹Apanakini kākiti xinikari ninoaka nireēkitinoka. !Ixinikarina Xesosi Kristo nireēkiti. ²²Himarotari iua Tximótxio parĩkauatape notakata, imi irikata parĩkauatakari atoko itxa. Iparĩkauata notakata Teoso iokanapirena erekari apanakini asāpiretini ĩkapani. Ininiākara himarotari Tximótxio atamakaākapeka, ininiā himarotari erekapitikari iua. ²³Kiatokopa ninataāka? Uatxa !nimarotari. Nimarotakasaakiri, niokanatarini Tximótxio hĩtemoni. ²⁴Apiananiri kamaimaroretano nota, Tximótxio tikinimoni nota apaka apoka ereē hĩtemoni.

Eparotxito Pirena

25 Notamoni erekari iuaĩkana niokanatiniri hĩokanapirena mĩkari, Eparotxito inakori. Hĩte iokanatapekari iua notamoni nota itiretini ĩkapani. Iua nitari atoko itxa. Imiparĩkatapitipono nota, Teoso iokanapirena asãpiretakasaaki. Iua, nota pakini sotato atoko atxaua, kotxi ate neenamauata Teoso ĩkapani. 26 Iua ipiãtai hĩte hĩkinika. Iua maerekaxiniretinoka itxa, kotxi ikenakopiretari hĩte imaropiretiniri iua amianatini. 27 Atãopitikara iua amianatapitika. Iua ipinaarita, iuaritika Teoso amonĩkari iua. Itxĩkitakari iua iuaĩkana ereka inini. Ininiã Teoso amonĩkano nota apaka, kotxi Eparotxito ipinaãkamako, apia maerekaxiniretinoka nitxamako. 28 Ininiãkara iteene ninirekari niokanatiniri iua hĩtemoni, hĩpoxokoniuatini ĩkapani haõkitakasaakiri. Ikara atoko ininiã, nota maerekaxiniretinoka ninini !auaika. 29 Ininiã hĩpoxokoniritika hãpakapariko iua, kotxi iua Eparotxito aĩtari itxaua, kotxi Apiananiri nakitiakori atxaua. Hĩpaxitariko kãkiti Eparotxito atoko inakari, 30 kotxi Kristo ĩkapani iparĩkauatini xika ipinaarita. Iuaka monõkorimoni isa nota imoianatini ĩkapani, kotxi iua imarotari hĩte nirekapitikamari himoianatinino, txamari !hĩposota himoianatinino, ininiã iua iteene moianatano.

Kiatokopa Kãkiti Atão Ereka Inini?

3 1 Nitariakori, apikomoni nisãpiretai. Hĩpoxokoniuatako, kotxi Apiananiri nakitiakori atxaua. !Nisãpaka iuaĩkana nisãpiretakitipeka nisãpiretinii hĩte. Iuaĩkana nõtãkikai hĩte, atão minakati himauikakani ĩkapani. 2 Erepaniko kãkiti maerekati kamakani, atão minakati sãpiretakani, kotxi ninoa sãpiretari kãkiti: “Teoso takaõtxikare piĩtoã mauakaniã, kona Teoso nakiti !pitxaua,” itxana. 3 Ninoa auapitika Teoso takaõtxikare iĩtoãna, txamari kona Teoso nakitiakori !itxauana. Atera Teoso nakitiakori, kotxi atemoni aua atão inakari Teoso takaõtxikare ate ãkixinireẽ, kotxi Erekar Matamatakoti oerekaua amisãkiretiniri Teoso. Kristo Xesosinokara ate iuika. Aimarotari ateka kamakiti !itxa. Teoso kamakitinokara apakata. 4 Hĩuãkatari atxĩiti hĩte kamakiti ereka inini Teoso apakapinii ĩkapani? Konapitini. Nota kamakiti apiaerekata, iuaritika nikamakiti !txĩkitakano Teoso apakapinino ĩkapani. Hĩkenakotariko erekari nota kamakiti: 5 Teoso takaõtxikare niĩtoã takaãka oito õti nauakasaaki. Nirini, ninoroni pakini Xoteo itxauana. Natokiri kitxakapirĩka

Pêxamiĩ inakori. Kitxakapirĩka natokiriakorini, nakiroakoroni pakini ikinika Xoteoakori itxauana, ininiã atão Xoteo nitxaua. Nota kĩpitari aãuĩteakori kitxakapirĩkarini paniãtakiti, kotxi nota pariseo nitxaua, ininiã Teoso sãkire iõkatsopatakori oerekakari nitxaua. ⁶Nota iteene nirekari Teoso nireẽkiti nikamini, ininiã nimisiritari kãkiti Xesosi sãkire auiãkani, kotxi niuãkatari Teoso nirekari ikara nikamini. Aãtokiriakorini paniãtakiti ikinika nikĩpita. !Nikerokari.

⁷Mitxi niuãkatari ikara atoko nininiã erekapitikari, ininiã, “Teoso apakapapitikano nota,” nitxa. Uatxa nimarotari Kristo, ininiã nimarotari mitxipe minakati nininiua nota. ⁸Uatxa nimarotari niauĩte Kristo Xesosi. Ikara apiaerekata. Xesosi nimarotini apisapanika, nikamakiti !itxa xatiki. Nitakanapapekari mitxi nikamakiti. !Itxaika. Mitxi nikamakiti itiki atoko, kotxi !ninarekaikari. Kristo nakiti uatxa nitxaua. ⁹Nitakanapapekari mitxi nikamakiti Kristokata ãtipirika nauini ĩkapani. Nota kĩpitari Moisesini paniãtakiti. Ikara atoko inakarinani kona ereka txĩkitakano nota. Teosonokara kamaerekatano nota, kotxi nauikari Kristo sãkire. ¹⁰Ninarekari Kristo iteene nimarotini. Ninirekari nimarotiniri Teoso posotiire, kotxi iposotiireẽ õkitikari Kristo, iuaĩkana auãki inini ĩkapani. Kristo atatsiirauatape, ininiã nota apaka nirekari natatsiirauatini atão imoianari nininiua ĩkapani. Ninirekari nota nireẽkiti ipinini, Kristo aamina ĩpiriãmitakari nopini ipinini atoko. Ninirekari Xesosi nireẽkitinoka nikamini, ininiã iua atoko nitxaua. ¹¹Ininiã itixi xipokini õti Teoso õkitikanoko, iuaĩkana auãki ninini tĩkane.

Mitekakari Atoko Nitxa

¹²Ikara ikinika !nimarotapanika. Nimaroãpotapanikariko. Teoso kamapanikari iparĩka nota ãkixinireẽ. !Xipokapanikari, ininiã !niotokakari niparĩka Teoso ĩkapani. Niparĩkauatapitipo. Mitekakari mitekini atoko, !niotoka. Mitekakari nirekari mitekaxi mapotõkire apokini. Iua atokokana nota nirekari niparĩka mapotõkire napokini, kotxi Kristo Xesosi mereẽno nota ikara atoko nikamini ĩkapani. ¹³Nitariakori, niparĩka mapotõkire !napokapanika. Ia nikamako: !Nixinikaikari mitxi nikamakiti. Mitekakari masapotorikakati atoko nitxa. Nitapararitika nisa apikomoni, niparĩka mapotõkire napokini ĩkapani. ¹⁴Mitekakari iteene nirekari mitekaxi mapotõkire apokini imitekini ĩki apakapini ĩkapani, ininiã imitekapatipo. !Iotoka. Iua atokokana nota parĩkauatapitipo Teoso ĩkapani, niparĩka

mapotōkire napokini ĩkapani, niparĩka ĩki Teoso sikakiti napakapini ĩkapani, kotxi Teoso pĩkapiretano nota Kristo Xesosiã itixine nisini ĩkapani, niparĩka ĩki napakapini ĩkapani.

¹⁵Akinika ate Kristo iteene imarotakani xinikamariko nota oerekakiti atoko inakari. Ikara atoko himaxinikakanisaaki, Teoso oerekaiko hĩte atão inakari. ¹⁶Mitekaxi kamakari paniãtakiti iaõka mitekakari kama imitekasaaki. Iua atokokana makamariko Teoso paniãtakiti. Uatxaika akamakiti atokokana makama.

¹⁷Nitariakori, hĩkamariko nota kamakiti atoko inakari, kotxi ate oerekapekai hĩte ikara atoko inakari hĩkamini. Hĩkĩpitariko nota kamakiti atoko inakari kamakani sãkire. ¹⁸Kaiãopokori kãkiti !auikari Kristo ipinini amaerekani imaktxakini ĩkapani. Kristo omanatakani itxauana ninoa. Itokatapeka ikara nisãpiretai hĩte, ininiã iuaĩkana uatxa ikara nisãpiretai. Iteene nimatinaniuata ninoa xika. ¹⁹Itixi mapotōkire õtisaaki ninoa iokanataãkako maerekani misiritikoãtaã. Iĩtona iteasonena atoko itxana, kotxi iĩtona nireẽkitinoka ikamana. Ikamakitina !erekari, iuaritika iuikarina ikamakitina. !Ipẽtauatana. Ninoa xinikapikari ĩkorapokoriti. !Ixinikarina Teoso. ²⁰Atepekana, Teoso tixine auakani atxapekaua. Aiãtapari apoxokoniritika kãkiti maerekani maktxakakari iuaxitikiri uaimoni apokini. Iua Xesosi Kristo Apiananiri itxaua. ²¹Iuasaakiko inoãkari aĩto mataparati. Itxĩkitakari aĩto iua ĩto erekari atoko inini. Iposotari, kotxi kaposotiirer itxaua iua. Ikinimane kamapitikariko ipaniãtakiti, kotxi kataparari iua Xesosi.

Õtãkipirenatxi

4 ¹Nitariakori, nota iteene tiretai hĩte. Nipiãtai hĩte. Hĩkamapoxokonitano nota. Niuikai hĩte, kotxi niparĩka ĩki atoko hĩtxa. Nitiretakini, hĩxinikariko ikara nota õtãkikinii uatxa. Nota õtãkikinii hĩkĩpitiniã, !hĩtakanapari Apiananiri.

²Nota õtãkikai hĩte Epótxia inakoro, Sĩtxiki inakoro pakini. Hĩkĩpitariko Apiananiri sãkire. Hĩtokakariko hĩtxitakakiniua.

³Pitepekana nimoianari erekari, nota nirekai pite õtãkikinina naia sito ipi, kotxi ninoa parĩkauatapeka notakata Teoso iokanapirena erekari asãpiretakasaaki. Ninoa parĩkauata notakata, Kremẽtxi inakori pakinikata, apanakini nimoianariakorikata apaka. Ninoa uãka Teoso aãtsopeãẽ iõkatapeẽkaika, Teosokata auapininiika ininina tũkane.

⁴Hienenĩkapikako, kotxi Apiananiri nakiti hĩtxaua. Iuaĩkana nitxai. Hienenĩkako.

⁵Erekari hīkamako apanakinimoni. !Hītxitapena. Erekari apanakini imarotiniri hīte ereka hinini. Apiananiri kaiamapeka ikanapiriini uaimoni. ⁶Na xatiki maerekaxiniretika !hīttxape. Maerekaxinireti hinakasaaki, himisākiretariko Teoso. Hamanaāri hinireēkiti. Himisākiretakasaakiri Teoso, hīttxariko: “Erekapitikari notamoni pikamakiti,” hīttxariko. ⁷Ikara atoko aniniā, Teoso kamaerekaxiniretaua. Kiātokopa ininiāpa Teoso kamaerekaxiniretaua? !Kimarotikori, iuaritika peerekari. Hākixinire erekaxinirepeka ininiā, maerekati !īroā hākixinireē. !Hinirekaikari maerekati hīxinikini. !Hinirekaikari maerekati, kotxi Kristo Xesosi nakiti hīttxapekaua.

⁸Nitariakori, nisāpiretakiti xipokini apisa, nisāpiretapanikaiko hīte. Hīxinikariko atāo inakari sākiretxiti. Hīxinikariko atāo inakari hīsāpiretini. Hīxinikariko atāo inakari hīkamini. Hīxinikariko erekarinoka. Hīxinikariko tiraōkitxi. Hīxinikariko potxitakori. Ikara atoko inakarinoka hīxinikako, kotxi erekapitikari ikara. Peerekari ikara. ⁹Hīkamapikariko noerekakiti iaōka. Hīsāpiretanako apanakini hītemoni nisāpiretakiti. Hīkamariko nota kamakiti hītiākiti atokokana. Ininiā Teoso kākiti kamaerekaxiniretakari kaikota hītekata.

Paoro Potxitari Ninoa Sikakiti

¹⁰Apiananiri nakiti nitxaua, ininiā iteene nipoxokoniua. Iuaīkana hīte oerekari hītiretinino, txineiro hīsikakito hīokanatinano, ininiā nipoxokoniua. Ātipirika hīxinikano, kotxi iteene hītiretano. Txamari mitxi !hīposotari hīsikakiti hīokanatinini notamoni. ¹¹!Namanaāi iuaīkana txineiro hīokanatinini notamoni. Ikinipoko ninireēkiti auakasaaki, nipoxokoniua. Ikinipoko ninireēkiti mauakanisaaki, iuaritika nipoxokoniua. ¹²Nota napapekari nimamākani, nimanipokoreni, nimatxineiroteni pakini. Apaka nimarotari ātikataā ninireēkiti ikinipoko auinano. Teoso oerekapekano ikiniōtika nipoxokoniuatini. Nienenīka nipokori auakasaaki. Nienenīka ninatxitakasaaki apaka. Nienenīka ikini sereti auinakasaakino. Nienenīka minakati mauinakanisaakino. ¹³Ikinipoko niposota nikamini, kotxi Kristo sikano iposotiire.

¹⁴Erekapitikai hīte, kotxi nimatxineirotenisaaki, hīokanatarini txineiro notamoni. ¹⁵Teoso iokanapirena erekari merepitipanika hīkenakotakasaaki, ereē Masetónia tixini nosipikasaaki, hīte Piriposi auakaninokara iokanataro txineiro napakapini īkapani. Apanakini Xesosi sākire

auiãkani ãtiãtaã auakani, liokanatinano nota. Himarotapekari ikara. ¹⁶Tesarónika sitatxiti nauakasaaki, ninirekakiti auakasaaki, itokata txineiro hïokanatinano. ¹⁷Niãtaparo txineiro hïsikininino. Niãtapari Teoso sikinii erekari, kotxi hïte tiretapekano nota. ¹⁸Napakapapekari ikinipoko hïokanatakiti. Kaiãopokori hïokanatakiti. Epararotxito inakori mininano hïsikakiti, ininiã ikinika ninireëkiti uatxa auinano nota. Teosomoni sikakori kamariri atoko itxa hïte sikakiti notamoni. Teoso potxitari hïsikakiti notamoni. ¹⁹NiTeosone sikaiko hïte hinireëkiti ikini sereti, kotxi ikinipoko aua iuamoni. Isikaua, kotxi Kristo Xesosi nakitiakori atxaua. ²⁰ãtipirika matxari Teoso: “Peerekai aïri, aTeosone. Ameë.”

Takanapapirenatxi

²¹Hïspïretanako ikinimane ereë auakani Kristo Xesosi nakitiakori, nixinikamanapitinina ninoa. Aïtariakori uai notakata auakani xinikamanapitai hïte apaka. ²²Ikinimane uai auakani Teoso nakitiakori iokanapireta hïtemoni ixinikiniina. Homanoakori auïte aapoko auakani, Teoso nakitiakori, iokanapireta hïtemoni iteene ixinikiniina.

²³Xesosi Kristo Apiananiri sikari ikinipoko erekari hïtemoni. Ameë.

KOROSO

Paoro Iokanatsopatakiti Koroso Auakanimoni

1 ¹Nota Paoro. Niokanatsopata hītemoni. Teoso mereēno nota, kotxi inirekari nota Xesosi Kristo iokanatakiti nininiua. Aītari Tximótxio apaka iokanapireta hītemoni. ²Ininiã aiokanatari ia iōkatsopari Teoso nakitiakorimoni, ikinika Teoso paniātakiti kamakanimoni Koroso sitatxiti auakanimoni. Aītariakori hītxaua. Aīri Teoso, Apiananiri Xesosi Kristo pakini sikari ikinipoko erekari hītemoni. Ninoa kamaerekaxiniretai hīte.

Teoso Misākiretiko Koroso

Auakani Īkapani

³“Erekapitikai,” atxari Teoso, aãuīte Xesosi Kristo iri, iua amisākiretakasaaki hīte ĩkapani. Ātipirika amisākiretari Teoso hīte ĩkapani. ⁴Ikara atoko atxari Teoso, kotxi ate kenakopiretari hīte auikiniri Kristo Xesosi sākire. Apaka akenakopiretari hīte tiretiniri ikinika kākiti Teoso nakitiakori. ⁵Teoso iokanapirena erekari atão sākiretxiti itxaua. Ikara hīkenakotakasaaki, hīkenakotari Teoso sikaenetakiti ipotetakiti itixineē hīte ĩkapani, ininiã hiātapari hāpakapiniri Teoso sikaenetakiti. Himarotari hāpakapiniri, ininiã Teoso sākire hāuikini aua, hītiraōkiuatini pakini aua. ⁶Teoso iokanapirena erekari hīkenakotakiti iaripiretapeka ikini itixitimoni. Ikiniōtika apikomoni kākiti kenakotari. Iuasaaki kākiti auikaāpotari Teoso iokanapirena. Ikiniōtika kākiti apakapari erekari Teoso

sikakiti. Iua atokokana hĩte kenakotari Teoso iokanapirena erekari. Iuasaaki himarotari ikinipoko erekari Teoso sikakiti. Iuasaaki himarotari Teoso atão sikiniri ikinipoko erekari kãkitimoni.

⁷Amoianari, atiretakiti, Epápara inakori, iuara oerekai Teoso sikiniri ikinipoko erekari kãkitimoni. Iua Kristo nitiri itxaua. Ātipirika iparĩkauata Kristo ĩkapani, ininiã ātipirika iparĩkauata hĩte ĩkapani.

⁸Iua sãpiretaua ate hĩtiraõki, Erekar Matamatakoti siãkiti hĩtemoni.

⁹Hĩte pirena akenakopiretakasaaki, ātipirika amisãkiretari Teoso hĩte ĩkapani. Ate nirekari hĩte iteene imarotiniiri Teoso nireẽkiti hĩkamini ĩkapani. Anirekari kiĩkiteni hininiãua. Anirekari himarotiniiri Teoso imarore Erekar Matamatakoti siãkiti.

¹⁰Ininiã ate misãkiretari Teoso hĩte atão hĩkamini ikiniõtika, kotxi Apiananiri anaakori hĩtxaua. Anirekari hĩkamakiti kamapoxokonitiniiri Teoso. Ininiã hĩkamakiti ikiniõtika erekarinoka, amãtiiri erekari atoko. Ininiã ikiniõtika himaroãpotari apikomoni Teoso nireẽkiti. ¹¹Anirekari Teoso sikataparaxiniretinii hĩte iposotiireẽ, kotxi kaposotiireri iua. Ininiã iuasaaki hiãtapari himisiritiko xipokini. Iuasaaki !hinaiaataua. Iuasaaki hĩposotari himĩteenekiniri himisiritiko hĩpoxokoniritika. ¹²Iuasaaki hĩtxariko aĩri: “Erekapitikai,” kotxi iua kamaerekataua. Ininiã aãpakapari iua potetakiti inakitiakori ĩkapani Teoso tixineẽ, ipiã mauakaniãtaã. ¹³Iua sikakaua ipiã posotiireẽ aãuakasaaki, maerekati posotiireẽ aãuakasaaki. Iua anikaua imi itiretakiti auiniãtaã. Iuaãtaã auakani auĩte itxaua imi. ¹⁴Imi Kristo ĩĩkitxitari Teoso amaerekani ĩki ipĩkasaaki, ininiã Teoso makatxakari amaerekani. ĩxinikaikari amaerekani.

Kristo Apiananiri

¹⁵Kãkiti kona posotari atamatiniiri Teoso. Teosotxikana itxaua Kristo, iuaritika aposotari Kristo aãtamati. Ikinipoko kamiko apisa, Kristo aua Teosokata. ¹⁶Iua kamari ikinipoko. Ikamari iaxiti auakani, uai itixi auakani apaka. Ikamari ikinipoko kãkiti atamatakiti, kãkiti matamatakiniti apaka. Ikamari ikinika kaposotiirerini, auĩtetxiakori matamatakoni, ikinika Teoso nitiriakori pakini. Ikamari ikinika. Ikinika kamaãka iua ĩkapani. ¹⁷Kristo aua ikinipoko apisa. Iua maĩkari ikinika imaxipokakani ĩkapani. Ikara atoko ininiã, ikinipoko auapanika. Iua mauakaniã, ikinika iarika. Iua mauakaniã, ikinipoko xipoka.

¹⁸Kãkiti Teoso mereẽkini Kristo ĩto atoko itxauana. Teoso mereẽkini kii atoko itxa Kristo. Merepitipanika ipĩkari õkitikakariua

iua. Ininiã õkitikasaakiua, oerekari kãkiti Apiananiri ininiua. ãti kaposotiireri iua atokokana inakari !auari. ¹⁹Teosotxikana iua. Ikinika Teosomoni auakari aua iuamoni. Ikara atoko Teoso apokaerekatari. ²⁰Kristo arêka xiketakasaaki aamina ãpiriãmitakari nopini, iusaaki Kristo xipokari Teoso omanãkarauatini kãkiti maerekani xika. Kotxi Teoso nirekari Kristo mininiri ikinipoko iuaĩkana iuamoni, ãkorapokoriti auakani, iaxiti auakani pakini. Ininiã uatxa Teoso apakapari Kristo sãkire auiãkani.

Kristo Kamakiti Koroso

Auakani Īkapani

²¹Hĩtepekana, mitxi !himarotari Teoso. Iusaaki !hãuari Teosokata. Maerekati hĩkamakiti xika homanatarari Teoso hãkixinireẽ. Teoso mokaiakariakori hĩtxaua iusaaki. Uatxa Teoso apakapai hĩte, ²²kotxi Kristo ãto ipina hĩte ĩkapani. Ininiã iua anikai hĩte Teosomoni iua makatxakakini hininiua ĩkapani. Teosomoni himaerekani !auaika, kotxi Kristo makatxakapekari imakinika himaerekani. Teoso apisatoõ hãpokasaaki, kona ãti posotari apoĩtinii himaerekani xika. ²³Ikara atoko aua hĩtemoni, iteene hãuikiniãri Kristo sãkire ikiniõtika, Kristo sãkirenoka hãuikiniã, isãkire himatakanapakaniã. Ikara atoko hĩkaminĩã, apanakini kona txĩkitakai hĩtakanapiniri hiãtapiniri ikinika Teoso kamakiti hĩte ĩkapani. Teoso iokanapirena erekari sãpiretaua ikinika Teoso kamakiti inakitiakori ĩkapani. Hĩte kenakotapekari Teoso iokanapirena erekari. Isãpiretaãkapeka ikinika itixi auakanimoni. Nota Paoro Teoso nitiri, iua iokanapirena erekari ikinimane nisãpiretini ĩkapani.

Paoro Parĩkauata Kãkiti Teoso Mereẽkini Īkapani

²⁴Uatxa nipoxokoniua hĩte ĩkapani natatsiirauatini, kotxi natatsiirauatini xika hĩte auikari Kristo sãkire. Natatsiirauata niĩtoã Teoso mereẽkini ĩkapani. Kristo ãto atoko itxauana kãkiti Teoso mereẽkini. Natatsiirauatapitika, iuaritika Kristo atatsiirauatini apiata. ²⁵Teoso iokanatano nota imereẽkini nitiri nininiua. Ipaniãtano nisãpiretiniri ikinika isãkire hĩtemoni. ²⁶Ipaniãtano nisãpiretinii mitxi kãkiti mimarotakiniti. Okananipeka Teoso !oerekari ikara kãkiti mimarotakiniti. Kristo ipinini apisa ikini itixiti auakani !imarotari ikara.

Mitxi kākiti mimarotakiniti uatxa oerekaãka Teoso nakitiakorimoni. ²⁷Uatxa Teoso nirekari inakitiakori Xoteo minakanuia imarotiniri mitxi kākiti mimarotakiniti, kotxi peerekari. Natokopa itxa ikara kākiti mimarotakiniti? Nisãpiretai. Kristo posotari kākiti ãkixinireẽ auini. Ia mitxi kākiti mimarotakiniti. Kristo aua hãkixinireẽ. Ininiã himarotari hĩsini Teoso tixinemoni. ²⁸Ininiã asãpiretari kākiti Kristo pirena. Aõtãkikari ikinimane Teoso imaroreẽ. Aõerekari ikinimane Teoso imaroreẽ, kotxi Teoso sikaimaroretua. Iua aua ikinika imaroretxi. Ikara atoko aanikana Kristo nireẽkitinoka kamakani Teosomoni. ²⁹Ikara nikamini ĩkapani, niparĩkauatipitipo. Pasãpaniri. Kristo posotiireẽ niparĩkauata, kotxi kaposotiireri iua. Iua iteene sikataparatarari nãkixinire, ininiã niposotari iteene niparĩkauatini iua ĩkapani.

Paoro Nirekakiti

2 ¹Ninirekari himarotiniri iteene nimisiritiko hĩte ĩkapani. Apaka iteene nimisiritaãka Araotxiséia sitatxiti auakani ĩkapani. Nimisiritaãka apanakini nimataõkitakini ĩkapani apaka. ²Ninirekari ikinimane ninoa kataparaxinire ininina. Apaka ninirekana itiretakiniuana, ininiã ãtika ninoa nireẽkiti. Ikara atoko ininiãna, iteene imarotarina ikinika Teoso sãkire. Iuasaaki imarotarina Kristo, mitxi kākiti mimarotakiniti, mitxi aĩri Teoso moerekakiniti. ³Paimatireri Kristo. Iua mimarotakiniti !auari. Ikinipoko imarota. ⁴Ikara atoko nisãpiretai hĩte, apanakini mamisirienetakani tĩkane kākiti imaroreẽ. ⁵Nĩto !auari hĩtekata, iuaritika nixinikapikai hĩte nãkixinireẽ. Nipoxokoniuaata, kotxi nimarotari hĩkamakiti atão inini. Apaka nipoxokoniuaata, kotxi hĩte iteene auikari Kristo sãkire.

Atão Kristo Sãkire Auiãkani Kamakiti

⁶Hãpakapapekari Kristo Xesosi hãauĩte ininiua ĩkapani, ininiã hĩkamariko inirekakiti ikiniõtika. ⁷Iua taparanoka hĩkosekako. Aãkotsa kosekiniri ãparaã atoko hĩtxako. Ikara atoko hininiã, kataparari hĩxinire. Ininiã atão hãuikari Kristo sãkire mitxi aõerekakiti atoko, ininiã kataparaiko. Ininiã iteene hĩtxariko Teoso: “Ikinika pikamakiti ate ĩkapani peerekari,” hĩtxako.

⁸Erepaniko. Kona hãuiritapiri kākiti makatxakinii Teoso kimaporeẽ. !Hãuikapiri ninoa sãkire, kotxi ãtião ninoa sãkire. Na atão isãkirena. Kākiti imarorenoka imarotana. Kamisirienererini ninoa. Maxikatĩka isãkirauatana. Kitxakapirĩka auakani

sāpiretakiti ninoa sākire. Īkorapokoriti auakani nireēkiti maerekati isāpiretana kākiti. Kona Kristo sākireni.

Apiananiri Itxaua Kristo

⁹Kristo aua iĭto, iuaritika Teosotxikana iua. Kristo aua ikinipoko Teoso posotiire, ikinipoko itiraōki, ikinipoko imarore, txaāpokata, kotxi Teoso itxaua. ¹⁰Kristo aua hākixinireē, ininiā ikinipoko aua hĭtemoni. !Auari apikomoni hinirekakiti, kotxi auĭtetxiakori iaxiti auakani auĭte itxaua. Apiananiri itxaua. Kaposotiireri iua atoko inakari !auari.

Kristo Kamakiti Hĭte ĩkapani

¹¹Hāpakapapekari Teoso takaōtxikare kākiti mataākiniti. Hākixinireē Teoso takari itakaōtxikare. Kristo makatxakasaakiri himaerekani hĭito nireēkiti, iusaaki hāpakapari Teoso takaōtxikare. ¹²Hĭpatxisatikosaaki, Kristokata ikatakoni atoko hĭtxaua. Eereka hōkitikaāka Kristo ōkitikiko atoko. Hĭte ōkitikaākako, kotxi hĭte auikari Teoso posotiire Kristo ōkitikini ipĭkasaaki.

¹³Mĭtxi ipĭkani atoko hĭtxaua himaerekani xika. Xoteo minakaniua hĭte, ininiā mĭtxi kona himarotari Teoso nireēkiti. Hĭponaniākasaaki, maerekati auape hĭtemoni. Iuaritika Teoso txĭkitakai auāki hinini Kristokata. Teoso makatxakari ikinipoko himaerekani. !Ixinikaikari himaerekani. ¹⁴Iua oakari iōkatsopatakori amaerekani sāpiretiko. Ikara iōkatsopatakori sāpiretari amisiritiko amaerekani xika. Amitekini !auari. Amisiritiko auapitika. Iuaritika iua oakari ikara iōkatsopatakori. Imakatxakari ikara iōkatsopatakori. Īpiriāmitakari nopini Kristo tokakitikosaaki, ikara iōkatsopatakori tokakitaāka apaka iuaā, ininiā !itxaika. Iusaaki amisiritiko !auaika. ¹⁵Kristo ĩpiriāmitakari nopini ipĭkasaaki, iusaaki imakatxakari ikinika Satanasi posotiire, inĭtiriakori posotiire pakini. Iua oerekari ikinimane !kaposotiirena ninoa. Iua ōkitikasaakiua, oerekari ikinimane iuananira Apiananiri ininiua. Iusaaki Kristo oerekari ikinimane ikāiatini.

¹⁶Ininiā kona hāuiritapiri apanakini txitinii hinikakiti xika, hiātakiti xika pakini. Kona hāuiritapiri apanakini txitinii kiiniri Teoso ĩkapani hĭkamini xika, kiiniri kasiri itopaĭtakasaaki hĭkamini xika, kiiniri tomatiko ōti hĭkamakiti xika pakini. ¹⁷Kiiniri Teoso ĩkapani ĩkorasaaki sanōkatxi atoko itxa. Oerekaua atāo inakari, txamari na iteene oerekaua. Iteene oerekaāka atemoni, Kristo aōkitakasaaki. ¹⁸Erepaniko kākiti

ia atoko inakari: Ninoa iuikari imiukakaniuana. Ninoa teosonetari Teoso nitiriakori matamatakoni. Ninoa sápiretari kákiti matamatakoni aókitinina itaponeēna. Ixinikarina ninoaka nireēkitinoka. Ixinikarina kimarorerini ininiuana, ininiã iuikauana. Erepaniko kákiti ikara atoko inakani. Hãuikiniãri ninoa sákire, !auaika hĩparĩka ãki. ¹⁹Kákiti ikara atoko inakani !inirekari Kristo iauĩtena ininiu. Kotxi Kristo akii atoko itxa. Ate iua ãto atoko atxaua. Ikara atoko ininiã, isikataparataua. Aãpotiĩtaua. Asikataparatakakaua. Átika ãtotxi atoko atxaua. Ikara atoko aniniã, aimaroãpotari isákire. Aaneē, kákiti ãto aneini atoko.

Apinini, Aãuini Pakini Kristokata

²⁰Mitxi hinireēkiti itixi auakani nireēkiti atoko. Hãuikasaakiri Kristo sákire, mitxi hinireēkiti !auaika. Ipĩpe. Txamari hĩkamapanikari ãkorapokoriti auakani kamakiti atoko. Ninoa nireēkiti iaóka hĩkamapanika. ²¹Ninoa txari: “Kona pimaĩkapiri ikara. Kona pinikapiri ikara nipokori. Kona piouãtakapiri ikara.” Kinirepa hĩkĩpitari ikara isákirena? ²²Ninoa paniãtakiti xipokapitikako. Ikara atoko !itxa, kotxi ikara atoko inakari paniãtakori kákitinoka paniãtakiti. Kákiti oerekakiti sákiretxitinoka ikara. ²³Kákiti uãkatari ninoa paniãtakiti kimarorerini paniãtakiti atoko. Ninoa xinikakiti iaóka inirekarina Teoso. “!Erekano,” itxana, txamari ãkixinireēna itxana “Peerekano.” Ninoaka misiritaua ãtoãna. Ikamarina ikinika ãtona nireēkiti.

Atão Hĩkamakiti Erekarĩ

Hãuini Ĩkapani

3 ¹Hĩte ókitikaãka Kristokata hãuini amaneri inini ĩkapani, ininiã hinirekariko hĩkaminiri Teoso tixine auakani kamakiti iaóka. Iuaã Kristo topãkanãta Teoso kikomoni. Apiananiri itxaua Teoso kikomoni topãkakari. ²Hĩxinikariko Teoso tixine. Kona hĩxinikapiri ãkorapokoriti. ³Ipĩkani atokopeka hĩtxa, kotxi hãuini kitxakari !auaika, ininiã kona hĩxinikaikari ãkorapokoriti auakari. Teoso sákire mauĩãkani !imarotari hãuini amaneri Kristokata Teoso auiniãtaã. ⁴Kristo txĩkitakari aãuini amaneri inini. Iua uai apokasaaki iuaĩkana atamataãka. Iuasaaki hĩte apaka atamataãka iuakata. Iuasaaki hĩtemoni auari Kristo iotximere atokokana. ⁵Hĩxipokariko hĩto nireēkiti, kotxi ãkorapokoriti auakari nirekari ãtotxi nireēkitinoka. Hókariko. Kipa aua aãkixinireē aókini ĩkapani? Auari anokaretxi.

Auari aĩto nireẽkitinoka kamiko nirekiko. Auari aĩti ĩto nirekiko. Apaka auari aĩti nakiti nirekiko aãkixinireẽ. Iteene anirekiniãri aĩti nakiti, ateosone atoko itxaua anireẽkiti. ⁶Ikara maerekati xika, Teoso omanãkare apokapitakako Teoso paniãtakiti makĩpitakanimoni. ⁷Mitxi hĩte kamari maerekati ikara atoko inakari. Iuasaaki hĩtotapekari ikara atoko inakari hĩkamini. ⁸Uatxa ia atoko inakari hĩtakanapako: omanãkaretxi, aĩti iteene txitiko, Teoso misãkirepiretiko, maerekati sãkiretxiti pakini. ⁹Kona himisirienetakapeua, kotxi hĩtakanapapekari maerekati mitxi hĩkamakiti. Himãka kitxakari hõkini atoko, hĩtakanapapekari ikara maerekati.

¹⁰Uatxa hĩkamakiti amaneri. Himãka amaneri hĩeretakini atoko, hĩkamakiti uatxa amaneri. Teoso txĩkitakari hĩkamakiti amaneri inini, ininiã himarotari atão inakari imaroretxi. Ininiã Teoso kamakiti atokokana hĩkama, kotxi hĩte kamakari itxaua. ¹¹Uatxa kãkiti apiari !auari. Kreoakori, Xoteoakori, Teoso takaõtxikare auaĩtotakini, Teoso takaõtxikare mauaĩtotakini, mimaroreni, kãkiti ĩtopa auakani, nitiritxi amotakoni, kãkiti miamotakoni pakini !auari kãkiti apiari. Aĩti kãkiti aĩti kãkititxikana, kotxi Kristonoka Apiananiri. Iua aua ikinimane isãkire auiãkani ãkixinireẽ.

¹²Ininiãkara hiamonĩkariko aĩti. Hĩkamariko erekari aĩtimoni. !Hĩuikapeua. Kaneenama !hĩtxape. !Katimari homanãkarauatini. Ikara atoko hãuako, kotxi Teoso mereẽkini, iua nakitiakori, itiretakini hĩtxaua. ¹³Himĩteenekakakauako. Himaxinĩkaretariko apanakini kamakiti, hĩte mapokaerekatakiniti. Kristo maxinĩkaretapekari maerekati hĩte kamakiti, ininiã iua atokotxikana himaxinĩkaretariko maerekati apanakini kamakiti hĩtemoni. ¹⁴Ikara erekari hĩkamako. Erekari apiari hĩkamini, hĩtiraõkiuatini. Hĩtiraõkiuatako. Hĩtiraõkiuatakasaaki, ininiã iuasaaki ikinika hĩkamakiti atão.

¹⁵Kristo kamaerekaxiniretai, ininiã erekari hãkixinire. Hãuiritariko ikara erekari kaikotini. !Hĩkamapiri ikara erekari makatxakiko ĩkapani. Hĩkinika aĩtika ĩtotxi atoko hĩtxaua. Teoso akiritai hĩte hãkixinire ereka inini ĩkapani. Hĩtxariko Teoso aĩtipirika: “Erekapitakari pikamakiti nota ĩkapani,” hĩtxako. ¹⁶Hãuiritariko ikinika Kristo sãkire kaikotini hãkixinireẽ, ininiã iuasaaki himarore iteene aua. Hõerekakakaua. Hõtãkikakakaua. Hĩxikaretari xikari Teoso ĩkapani. Hĩxikaretariko xikari Teoso sãkire iõkatsopatakori xikariti. Hĩxikaretariko xikari kitxakari, amaneri pakini Teoso ĩkapani. Hĩxikarauatakasaaki,

hākixinireē hītchariko Teoso: “Erekapitikari pikamakiti nota ĩkapani.” ¹⁷Ikinika hĳkamakiti hĳkamako Apiananiri Xesosi ĩkapani. Hĳsākirauatakasaaki, hĳsākirauata Apiananiri Xesosi ĩkapani. Iuasaaki hītchariko aĳri Teoso: “Erekapitikari pikamakiti nota ĩkapani,” hītchariko.

Kākiti Aapoko Auakani Ōtākikiko

¹⁸Hĳte ĳtanorotxi, hĳkĳpitariko hĳtaniri sākire, kotxi Apiananiri nakiti hĳtxaua, ininiā ikara atāo hĳkamini.

¹⁹Hĳte ĳtaniritxi, hĳtĳretaroko hĳtanoro. Kona hĳtĳtapero oa. Kona homanatapero.

²⁰Hĳte amarini, hĳkĳpitariko hĳri, hinoro pakini sākire. Ikinika ninoa paniātakiti hĳkamako, kotxi Teoso apokaerekatari ikara atoko inakari.

²¹Hĳte irĳtxi, kona hĳkamanaiamanetapena hamariteakori, kotxi eereka maerekaxinireti aua ninoamoni, ininiā ĳnĳrekaikarina hĳte paniātakiti ikaminina.

²²Hĳte nitiritxi, hĳpatrāote ĳkorapokoriti aua, ininiā hĳkamariko ikinika ninoa paniātakiti. Apanakini iteene parĳkauata ipatrāote apisatoō, iua apokaerekatiniri ĩkapani. Iua mauakanisaaki apaka iteene hĳparĳkauatako. Ikini hĳxinĳreritika hĳkamariko hĳparĳka. Ikara atoko ininiā, atāo hĳpaxitari Teoso. ²³Ikinika hĳkamakiti hĳkamako hĳtaparaxinĳreritika. Hĳparĳkauatakasaaki, parĳkatxi Apiananiri ĩkapani hĳkamini atokotxikana, hĳparĳkauata kākiti ĩkapani. ²⁴Hĳparĳkauatako ikara atoko, kotxi himarotari Apiananiri sikinii ipotetakiti iaxitikiri hĳparĳka ĳki. Itixine hĳpokasaaki, hĳpakapariko. Apiananiri Kristo nitiriakori hĳtxaua. ²⁵Maerekati kamakari apakapariko imisiritiko. Teoso misiritari āti maerekati kamakari, āti maerekati kamakari imisiritini atokotxikana.

4 ¹Hĳte patrāo, hĳkamariko atāo inakari hĳnitiriakori ĩkapani. Kona himisĳrienetapena ninoa. Kotxi hĳte apaka aua hĳpatrāote Teoso tixineē.

Apikomoni Paoro Ōtakikakiti

²Kona hĳtakanapapiri Teoso himisākiretini. Araōkire hĳtxako maerekati mapokakani ĩkapani. Ātipirika hĳtchariko Teoso: “Erekapitikari ĳkinipoko pikamakiti nota ĩkapani,” hĳtchariko iua.

³Apaka himisākiretariko Teoso ate ĩkapani. Hamanaāriko Teoso, iua oerekiniua isākire apanakinimoni asāpiretini ĩkapani,

kotxi anirekari asāpiretiniri kākiti Kristo pirena, mitxi kākiti mimarotakiniti. Ikara nisāpiretini xika, kateia āki naua.

⁴Himisākiretariko Teoso, Kristo pirena atāo nisāpiretini ĩkapani, kākiti atāo imarotini ĩkapani.

⁵Kimarorerini hĭtxauako Teoso sākire mauĩākani sauaki hāuakasaaki. Aāuini poiāo, ininiā ikiniōtika hinitari kākiti Teoso sākire hīsāpiretini ĩkapani.

⁶Teoso sikapekai ikinipoko erekari, ininiā hīsākirauatakasaaki, hōerekari kākiti hīsākireē hĭtiretinina. Iōkira mauakaniā nipokoriā, !kaposeri. Iua atokotxikana erekari mauakaniā hīsākireē, kākiti !nirekari ikenakotiniri hīsākire. Erekari hīsākire ininiā, himarotari hāpakapapiretiniri kākiti.

Paoro Iokanapiretini Pirena

⁷Txĭkiko inakori sāpiretaiko ikinika nota pirena. Aĭtari, atiretakiti itxaua. Iua parĭkauatapitipo Apiananiri ĩkapani. Apiananiri nitiri itxaua atekata. ⁸Niokanatarari iua hĭtemoni, hĭte imaropiretini ĩkapani, hĭte isikataparaxiniretini ĩkapani. ⁹Niokanatarari Onésimo inakori apaka iuakata. Koroso sitatxitikiri iua, hĭte atoko. Aĭtari atiretakiti itxaua apaka. Ātipirika atāo iparĭkauata Kristo ĩkapani. Ninoa sāpiretaiko hĭte ikinipoko Kristo sākire auĩākani kamakiti uai.

¹⁰Arisitako inakori, notakata kateia āki auakari, xinikamanapitai hĭte. Panapee itaro ākiri Marko, xinikamanapitai hĭte apaka. Nisāpiretapekai hĭte Marko pirena. Ininiā ereē iua apokasaaki, hĭpoxokoniritika hāpakapariko iua. ¹¹Xosoe Xósito inakori xinikamanapitai hĭte apaka. Ninoa ipi āti pakini Xoteoakori notakata parĭkauatakani itxauana. Ninoa parĭkauata notakata, Teoso auĭtetxi ininiua pirena asāpiretini ĩkapani. Isikataparaxiniretanona nota.

¹²Epápara inakori apaka xinikamanapitai hĭte. Ereĕkiri iua. Kristo nitiri itxaua. Ātipirika imisākiretari Teoso hĭte ĩkapani, Teoso nireĕkitinoka hĭkamini ĩkapani, ikinika hĭkamakiti atāonoka hĭkamini ĩkapani. ¹³Nota imarotari iteene iparĭkauatini hĭte ĩkapani. Apaka nimarotari iparĭkauata kākiti Araotxiséia sitatxiti auakani ĩkapani. Apaka nimarotari iparĭkauata Ierapori sitatxiti auakani ĩkapani.

¹⁴Aĭtari atiretakiti, amianari imarotakarari Arókasi inakori apaka xinikamanapitai hĭte. Témasi inakori apaka xinikamanapitai hĭte. ¹⁵Hīsāpiretanako aĭtariakori Araotxiséia auakani nixinikinina

ninoa. Hīsāpiretaroko Nīpa inakoro, Teoso mereēkini oaāpoko apotiitakaniua pakini, nixinikinina ninoa. ¹⁶Ia niokanatsopatakiti hātatsopatako hīkinika hīkenakotini īkapani, eereka hīpaniātariko atatsopatiko Araotxiséia sitatxitiā, Kristo sākire auiākani kenakotiniri īkapani. Apaka hīte atatsopatariko Araotxiséia auakani iokanatsopatakiti. ¹⁷Hītxariko Akipo inakori: “Pikamariko ikinipoko parīkatxi Apiananiri paniātakiti pikamini.” ¹⁸Nota Paoro niōkatsopatari ia niuakoā: Hīxinikariko kateia āki nauini. Teoso sikari ikinipoko erekari hītemoni. Ameē.

1 TESARÓNKA

Merepanika Paoro Iokanatsopatakiti Tesarónika Auakanimoni

1 ¹Paoro, Síراسи, Tximótxio pakini iokanatsopata Teoso mereëkinimoni Tesarónika sitatxitiã. Aïri Teoso nakitiakori hïtxaua. Apiananiri Xesosi Kristo nakitiakori hïtxaua. Aïri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hïte.

Paoro Misäkiretari Teoso Tesarónika Auakani Ìkapani

²Amisäkiretari Teoso hïte ìkapani. Ìtipirika atxari Teoso: “Peerekai pite, kotxi Tesarónika auakani auikari pisäkire,” atxari.

³Aïri Teoso amisäkiretakasaaki, axinikapikari hïte parïka Teoso ìkapani. Atão hïparïkauata, kotxi iteene hãuikari iua sãkire. Axinikari hïparïka Teoso ìkapani, kotxi iteene hïtoretari iua. Axinikari himarotiniri Apiananiri Xesosi Kristo sãkire iaõka hïkamini. Hïpoxokoniritika hiãtapari isãkire iaõka apokini.

⁴Nitariakori, Teoso turetapatikai hïte. Iua mereëi hïte iua nakitiakori hininiua ìkapani. Aimarotari ikara. ⁵Teoso iokanapirena erekari hïtemoni asãpireta Teoso posotiireë. Ate sãkirenoka !kaposotiireri. Erekari Matamatakoti oerekai asãkire atão inini. Hïte iteene imarotari asãkire atãonoka inini. Hãtamatarari aparïka hïte ìkapani hïte sauaki aãuakasaaki, ininiã himarotapitikaua ate. ⁶Ininiã hïte kamari ate kamakiti atokotxikana. Hïkamari Apiananiri kamakiti atokotxikana. Himisiritiko aua, iuaritika hãuikari Xesosi sãkire. Himisiritiko aua, iuaritika Erekari Matamatakoti kamapoxokonitai.

7Ininiãkara Masetónia tixini auakani, Akaia tixini auakani pakini nirekari hïte atoko ininina. 8Inirekarina hïte atoko ininina, kotxi hïte sãpiretari Apiananiri sãkire Masetónia auakanimoni, Akaia auakanimoni pakini. Apaka ikini itixiti iaripireta hïte iteene auikiniri Teoso sãkire. Ininiã kona ate sãpiretari kãkiti iteene hãuikiniri Teoso sãkire, kotxi ikinimane imarotape. 9Ikinimane sãpiretari hïpoxokoniritika hãpakapiniua ate. Ninoa sãpiretari hïte takanapiniri teoso kamakori. Isãpiretarina hïparïkauatini uatxa Teoso atão inakari ïkapani, auãkipika inakari ïkapani. 10Ninoa sãpiretari, hïte iãtapiniri Teoso ãkiri itixine auakari kanapiriini ïkorapokoriti. Iua Xesosi. Ipïkani sauaki Teoso ôkitikakiti iua. Iua makatxakapekari amaerekani, ininiã amisiritiko !auaika kãkiti misiritiko ôti apokasaaki.

Paoro Parïka Tesarónika Sitatxitiã

(Atosi 17.1-9)

2 1Nitariakori, himarotari maxikatiïka kona ate sari hïtemoni. 2Himarotari amisiritiko Piriposi sitatxiti aãuakasaaki, hïtemoni aãpokini apisa. Iuaã auakani ãsokaua, kateia ãki taka itxauana. Iuaritika Teoso sikataparaxiniretaua asãpiretiniri Teoso iokanapirena erekari hïtemoni. Itori kãkiti !nirekari asãkire, iuaritika ate sãpiretari Teoso iokanapirena erekari hïtemoni. 3Ate oerekakiti !akeroka. Teoso nireëkitinoka anireka akamini. ãTi anireëkiti !auari. !Anirekari amisirienetini hïte.

4Teoso auiritaua iua iokanapirena erekari asãpiretiniri kãkiti. Teoso auikari atão asãpiretiniri isãkire kãkitimoni, ininiã asãpiretari isãkire kãkitimoni. Asãkirauata, kona kãkiti akamapoxokonitini ïkapanini. Anirekari akamapoxokonitini Teoso, kotxi iua ataerekatari aãkixinire. 5!Asãpiretai erka hinini, ate nireëkiti hïkamini ïkapani. Asãpiretari Teoso sãkire hïtemoni, kona hïte nakiti anirekini ïkapanini. Ikara himarotape. Teoso apaka imarotari ikara nisãkire atão inini. 6Ate !anirekari kãkiti iuikiniua ate. !Anirekai hïte iuikiniua ate. !Anirekari apanakini iuikiniua ate. Kristo iokanatakiniraua ate hïtemoni, ininiã aposotari apaniãtini ikinipoko anireëkiti hïsikiniua. Iuaritika !anirekari ikara atoko akamini. 7Hïte sauaki aãuakasaaki iteene atiretai hïte. Sito tiritiniri oimi atokokana, ate tiretai hïte. 8Iteene atiretai, ininiã anirekari asikinii Teoso iokanapirena erekari. Kona iuananini anireka asikinii hïte. Axinire, aïto pakini anireka asikinii, kotxi ate tiretakini hïtxapekaua. 9Nitariakori, hïxinikari aparïka

hĩte sauaki. Pasãpaniri. Īkanõka, pokamara pakini aparĩkauatapitipo, akiena, anireẽkiti pakini aãpakapini ĩkapani, kotxi !anirekari aamanainii hĩte aamonitakiti ĩkapani. !Anirekari hĩte parĩka apiatini ate ĩkapani, Teoso iokanapirena erekari asãpiretakasaakii.

¹⁰Hĩte Kristo sãkire auiãkani sauaki aãuakasaaki, hĩte itikari aãuini ikiniõtika. Teoso apaka itikari. Himarotari Teoso nireẽkitinoka akama iusaaki. Himarotari erekarinoka akama iusaaki. Himarotari !akamari maerekati iusaaki. ¹¹Hĩri atoko atxaua iusaaki, kotxi aõtãkikai hĩte. Amĩkapiritai, imi iri mĩkapiritini atokokana. Apaniãtai atão inakaranoka hĩkamini. ¹²Ikara atoko akaminii, kotxi Teoso anaakori hĩtxaua, ininiã anirekari hĩte kaminiri hĩri kamakiti iaõka. Iua akiritai hĩte hĩauĩte inini ĩkapani. Inirekari hãtamatini iua iotximere itixine hãuakasaaki. ¹³Ininiã ãtipirika amisãkiretari Teoso: “Erekapitikai, kotxi Tesarónika auakani auikari pisãkire, ninoamoni asãpiretakiti. Ninoa imarotari kona ate sãkireni asãpiretana. Ninoa imarotari asãpiretana atão pite sãkire,” nitxari Teoso. Teoso sãkire parĩkauata hĩte Xesosi sãkire auiãkani ãkixinireẽ isãkire hãuikini ĩkapani. ¹⁴Xotẽia tixini auakani, Kristo Xesosi nakitiakori, Teoso sãkire auiãkani, ninoa kamakiti atoko hĩkamako hĩte nitariakori. Xoteoakori misiritana ninoa. Iua atokotxikana hĩte nirimane misiritapekai hĩte. ¹⁵Ninoa Xoteoakori okari Apiananiri Xesosi. Ninoa apaka okana ninoaka nirimane, Teoso sãkire sãpiretakani. Ninoatxikana misiritapekua ate. Teoso !apokaerekatari ninoa kamakiti. Ninoa omanatari kãkiti. ¹⁶Kotxi !auritarina Xesosi sãkire asãpiretini Xoteo minakanuia, imaerekanina makatxakiko ĩkapani. Uatxa ninoa maerekani xãpoka. Uatxa Teoso omanãkare apokapeka ninoamoni.

Paoro Ipiãtinina Tesarónika Auakani

¹⁷Ãtiãtaã ate auakasaaki, ãtipirika axinikapikai. Aĩto hĩtekata mauakanisaaki, aãkixinire xinikapikai. Ate ipiãtai. Iteene anirekari iuaĩkana aõkitinii. ¹⁸Anirekapitikamari hĩtemoni akanapiriini. Nota Paoro itokata nirekamari napokini hĩtemoni, txamari Satanasi !auritaua asini hĩtemoni. ¹⁹Aãuĩte Xesosi ãti õti ikanapiriãkasaaki, aãpotiitaua iua apisatoõ. Iusaaki aiãtapakiti apokapeka. Kipa aiãtapakiti? Hĩtera. Iusaaki iteene apoxokoniuatoko. Kinirepa apoxokoniuata? Kotxi hĩte aua iuaã. Iusaaki aãpakapari aparĩka ĩki. Kinirepa aãpakapari aparĩka ĩki? Kotxi hĩte auikari Xesosi sãkire ate sãpiretakiti. Ininiã

peerekari iusaaki. ²⁰Atãopitikara nisãkire. Ate iukai hïte. Hïte kamapoxokonitaua ate.

3 ¹Iusaaki !amïteenekari amimaropiretakanii hïte, ininiã axinikari atenoka kaikota uai Atena sitatxitiã. ²Ininiã iusaaki aiokanatarì aïtari Tximótxio hïtemoni. Teoso nitiri itxaua. Imoianataua Kristo iokanapirena erekari asãpiretakasaakiri kãkiti. Aiokanatarì iua hïtemoni, Xesosi sãkire iteene hãuikini ìkapani, isikataparaxiniretinii ìkapani. ³Ikara atoko ininiã, kona hïxinikari Teoso sãkire hïtakanapini, kãkiti misiritinii xika, kotxi himarotari amisiritiko apokapitikako. Teoso auiritari. ⁴Hïtekata aãuakasaaki, asãpiretapekai amisiritiko apokini. Uatxa himarotapitikari atão asãkire, kotxi uatxa apopeka asãkire iaõka. ⁵Ininiã apikomoni !nimïteeneakaikari nimimaropiretakanii hïte. Ininiã iusaaki niokanatarì Tximótxio hïtemoni, Xesosi sãkire hãuikini nimarotini ìkapani. Nipïkari Satanasi sikanireõtini hïte, Xesosi sãkire hãuikini hïtakanapini. Nipïkari maxikatiïka Xesosi sãkire asãpiretinii hïte, hïtekata aãuakasaaki.

Tximótxio Sãpiretakiti Ikanapiriãkasaaki

⁶Uatxa Tximótxio kanapiripeka atemoni. Iua minapiretai hïte. Erekari isãpiretakiti. Iua txaua ate: “Tesarónika auakani iteene auikari Xesosi sãkire. Ninoa tiraõkiuatapika. Ipotxitarina ixinikiniina hïte. Ipiãtaina hïte, ninoa hïpiãtini atokotxikana,” itxa Tximótxio atemoni. ⁷Nitariakori, ate amaxikiko auapitika. Ate misiritiko auapitika, iuaritika hïkamapoxokonitaua, kotxi iteene hãuikari Xesosi sãkire. ⁸Uatxa peerekari ate auini, kotxi Apiananiri sãkire iaõka hïkama. ⁹Iteene apoxokoniua Teoso apisatoõ, kotxi hãuikari iua sãkire. Axinikasaakii, apoxokoni iteene auapitika. Ininiã ãtipirika atxari aTeosone: “Peerekai pite, kotxi Tesarónika auakani iteene auikari pisãkire, ininiã ikamapoxokonitauana ate,” atxari. ¹⁰Ìkanõka, pokamara pakini iteene aamanaãri Teoso hïte iuaïkana aaõkitini, kotxi anirekari apikomoni Teoso sãkire himimarotakiniti aõerekinii.

¹¹Anirekari aïri Teoso, aãuïte Xesosi Kristo pakini oerekiniãua aãpokini hïtemoni. ¹²Anirekari Apiananiri txïkitakinii himarotiniri hïtoretakiniua. Anirekari hïtiraõki aneini. Anirekari iteene hïtiraõkiuatini. Anirekari ikinimane apaka hïtiretini, ate tìretinii hïte atokotxikana. ¹³Anirekari Apiananiri sikataparaxiniretinii hïte. Ininiã Apiananiri Xesosi Kristo ikinika inakitiakorikata ìkasaaki uai, iusaaki maerekati !auaika hïtemoni

aĩri Teoso apisatoõ. Iuasaaki hĩte apoĩtakari !auari. Iuasaaki erekai hĩte.

Akamakiti Teoso Apokaerekatakiti

4 ¹Nitariakori, apikomoni nisãpiretai. Asãpiretapekai hĩkamakiti tĩkane, hãuini Teoso apokaerekatini ĩkapani. Ikara atoko inakari hĩkamapitika uatxa. Erekari hãuini uatxa, ininiã nõtãkikai Apiananiri Xesosi posotiireẽ, apikomoni iua apokaerekatakiti ikiniõtika hĩkamini ĩkapani. ²Himarotapitikari aõereẽkiti hĩkamini ĩkapani. Apiananiri Xesosi paniãtaua ikara aõerekinii hĩte.

³Teoso nirekari himaerekani xipokaãpotini hãkixinireẽ. Ininiãkara hĩtaniri minakotikatika, hĩtanoro minakotokatika, !hĩsirĩkape. ⁴!Hãuiritapiri hĩito nireẽkiti ikamini. Hĩito auĩte hĩtxauako, ininiã maerekati hĩito nireẽkiti !hĩkama. Atão hĩpaxitariko hĩteka ĩto, apanakini ĩto apaka. ⁵!Apakata hĩxinikiniri ãtipirika maerekati hĩito nireẽkiti ãti ĩtokata hĩkamini. Xoteo minakanuia, Teoso mimarotakani, xinikari ikara atoko inakari. ⁶!Apakata hĩtxĩkitakiniri ãti aĩtari maerekati ĩtotxi nireẽkiti ikamini, kotxi Apiananiri misiritariko kãkiti ikara atoko inakari maerekati ikaminiã. Asãpiretapekai ikara. Apinitapekai. ⁷Teoso kona akiritaua iuamoni, maerekati aĩto nireẽkiti akamini ĩkapani. Akiritaua iua nakiti aniniua ĩkapani, erekarinoka akamini ĩkapani. ⁸Ininiã ikara asãkire manirekakati, !omanataua ate. Omanatari Teoso. !Nirekari Teoso sãkire, kotxi Teoso sikari Erekari Matamatakoti kãkitimoni.

⁹Hĩtariakori hĩtiretini pirena kona aiõkatsopata hĩtemoni, kotxi Teoso oerekapakai hĩtiretakiniua. ¹⁰Nimarotari hĩtiretiniri ikinika hĩtariakori Masetónia tixini auakani. Iuaritika nitariakori, aõtãkikai apiata hĩtiretiniri kãkiti ikiniõtika. ¹¹Hãpaiaõkariko hĩtsorĩkaãtini. Apanakini parĩka !himaãkatape. Hĩkamariko hĩteka parĩka hãuini ĩkapani. Ikara atoko asãpiretapekai hĩte. ¹²Ikara atoko hĩkaminiã, Xesosi sãkire mauiãkani paxitai. Ikara atoko hĩkaminiã, !auari hiamonitakiti.

Apiananiri Kanapiriini

¹³Nitariakori, anirekari himarotiniri atão inakari ipĩkani pirena. Kona anirekari himatinaniuatini Xesosi sãkire mauiãkani matinaniuatini atoko, kotxi ninoa ipĩkasaaki, !imarotarina isinimonina. ¹⁴Aãuikari Xesosi ipinini. Aãuikari iuaĩkana õkitikiniua.

Ininiākara aãuikari ipīkani Teoso sākire auiākani apaka ōkitikiniua. Teoso minana ninoa Xesosikata ikanapiriākasaaki. ¹⁵Iuasaaki ate auākipanika inakanuiua Apiananiri kanapiriākasaaki, !asari ninoa mitxi ipīkani apisapanika. Mitxi ninoa sa. Iposo atoko ate sa Apiananirimoni. Apiananirira sãpiretapekaua ikara. ¹⁶Iuasaaki Apiananiri potorika itixine. Iuaka katxaka uaimoni. Iuasaaki akiripoakata iua apokasaaki, ininiã kãkiti kenakotariko Teoso nitiriakori auite sākire. Teoso trōpetane xōkiko kenakotaãka. Iuasaaki mitxi ipīkani, Kristo sākire auiākani, merepanika ōkitikauako. ¹⁷Eereka ate auapanika inakanuiua anikaãkako ipīkanikata Apiananiri aaōkitini ĩkapani. Aaōkitari iua itanoxiti katxiãriã. Ininiã eereka iuakata aãuapininiika. ¹⁸Ikara sãkiretxiti hīsãpiretakakauako, ininiã hĭkamataparaxiniretakakauako.

Apiananiri Kanapiriini Ôti

5 ¹Nitariakori, kona asãpiretari Xesosi kanapiriini ôti. !Asãpiretari apokini kasiriti, ikanapiriinikanani pakini. ²Kotxi atão himarotari, Apiananiri uai apokini, kiitiriri ĩkanõka apokini atokokana itxako. Ininiã kãkiti !imarotari Apiananiri apokini ôti. ³Iuasaaki kãkiti sākire: “Neenamtxi !uari. Erekaua. Imonõkoni !uari,” inakasaaki, iuasaakipeka katimaritika Teoso xipokari ikinipoko. Katimari sito amarini tsiikini atoko itxako. Oa sito tsii apokasaaki, omitekini !uari. Iua atokokana kãkiti mitekini !uari iuasaaki Xesosi kanapiriākasaaki. ⁴Nitariakori, kãkiti ipiã auakani atoko !hĭtxaua. Himarotapitikari äti ôti Apiananiri uai kanapiriini, ininiã hiãtapari ikanapiriini ôti apokini, himatikokakani ĩkapani, kiitiriri tikokakiniri kãkiti atoko himinakani ĩkapani ikanapiriākasaaki. ⁵Hĭte hĭkinika kaiotximereri anaakori hĭtxaua. Pokamarari anaakori atoko hĭtxaua. !Akaikota ipiã. !Akaikota ĩkanõka, kotxi !anirekaikari maerekati akamini. ⁶Ininiākara apanakini imakakani atoko !himapeko. Araõkire matxako, maerekati mapokakani ĩkapani. Aĭto auite matxaua. ⁷Imakakani imaka ĩkanõka. Poãtakani poãta ĩkanõka. !Iãtapari Xesosi kanapiriini. Ikara atoko !hĭtxapeko.

⁸Pokamarari anaakori atxaua, ininiã aĭto auite matxaua. Sotato takari itorota koana, itorota tokapare ĩkapani. Sotato torota koana atoko itxa Teoso sākire iteene hãuikini. Sotato torota koana atoko itxa apaka hĭtiraõki. Ininiã hãuikasaakiri Teoso sākire, hĭtiraõkiuatakasaaki, hãkixinire tokapare auape. Sotato takari ikii tãta ikii tokapare ĩkapani. Sotato kii tãta atoko itxa amaerekani makatxakiko aimarotini. Ikara imaroretxi axinikakiti akii tokapare

itxaua. ⁹Teoso mereëua ate kona imisiritiniua ïkapanini. Iua mereëua ate amaerekani aäuïte Xesosi Kristo makatxakini ïkapani. ¹⁰Iua ipina kãkiti ïkapani. Ipina iuakata aäuïni ïkapani. Ikanapiriãkasaaki, isãkire auiãkani auãkipanika inakani, ipïkani pakini aua iuakata. ¹¹Ininiã hïsikataraxiniretakakauako. Himoianatakakauako Teoso sãkire iteene hãuïkini ïkapani. Uatxa ikara atoko inakari hïkamapeka.

Paoro Ôtãkikare Mapotõkire

¹²Nitariakori, aõtãkikai himarotinina hïte sauaki parïkauatakani, Apiananiri sãkire sãpiretakani, hïte ôtãkikakani. ¹³Ininiã iteene hïpaxitanako. Hïtiretanako ninoa, kotxi ninoa iteene parïkauata hïte ïkapani. !Hïtxitakakapeua. !Hineenamauatape. ¹⁴Nitariakori, iteene aõtãkikai hïte ia atoko: Hïpinitariko kãkiti paniãtakiti makïpitakani. Hïsikataraxiniretariko pïkarauatakani. Himoianatariko mataparani. Katima !hïtxapeko homanãkarauatini kãkiti kerokasaaki. ¹⁵Kona hãuiritapiri misiritakori misiritiniri imisiritakiri. ãtipirika hïkamariko erekari hïtariakorimoni, Xesosi sãkire mauïãkanimoni apaka.

¹⁶ãtipirika hïpoxokoniuatako. ¹⁷Himisãkiretapikariko Teoso. ¹⁸Hïpoxokoniuatakasaaki, hïtxariko Teoso: “Erekari pikamakiti nota ïkapani,” hïtxako. Himatinaniuatakasaaki, iuaritika hïtxariko Teoso: “Erekari pikamakiti nota ïkapani,” hïtxako. Ikara atoko Teoso nirekari ãtipirika hïsãpiretiniri iua, kotxi Kristo Xesosi nakitiakori hïtxaua. ¹⁹!Hïotokakapiri Erekari Matamatakoti parïkauatini hãkixinireë. Hïkamariko ipaniãtakiti. ²⁰!Homanatapiri Teoso sãkire kãkiti sãpiretakiti. ²¹Hãtaerekatariko ikinika. Erekarinoka hïkamako. ²²!Hïsipeko maerekati kamikoãtaã, kotxi hïsiniã, apanakini xinikari atão maerekati hinireka hïkamini.

²³Anirekari Teoso, kãkiti kamaerekaxiniretakari, iua iteene kamaerekatinii hïte iua nakitiakorinoka hininiua ïkapani. Nimisãkiretari Teoso hïte ïkapani, hïxinire, hãkixinire, hïïto pakini ereka inini, ininiã aäuïte Xesosi Kristo uai apokasaaki maerekati !auaika hïtemoni, ininiã hïte apoïtiko !auari. ²⁴Hïte akiritakari kamari isãkire iaõka.

²⁵Nitariakori, himisãkiretariko Teoso ate ïkapani. ²⁶Haõkitakakasaakiua, hïtiraõkiritika hãpakapakauako, kotxi hïtariakori itxauana. ²⁷Apiananiri posotiireë nipaniãtai hãtatsopatiniri ia niokanatsopatakiti ikinika aïtariakori kenakotini ïkapani. ²⁸Aäuïte Xesosi Kristo sikari ikinipoko erekari hïtemoni. Ameë.

2 TESARÓNKA

Paoro Iokanatsopatakiti Iuaĩkana Tesarónka Auakanimoni

1 ¹Paoro, Sírası, Tximótxio pakini iokanatsopata Teoso mereẽkinimoni Tesarónka sitatxitiã. Aĩri Teoso nakitiakori hĩtxaua. Apiananiri Xesosi Kristo nakitiakori hĩtxaua. ²Aĩri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hĩte.

Xesosi Kanapiriini Pirena

³Nitariakori, ãtipirika atxari Teoso: “Erekapitikari pikamakiti Tesarónka auakani ĩkapani,” atxa. Ikara atoko asãpiretari Teoso, kotxi ikiniõtika Teoso sãkire hãuikini apiaãpota. Apaka hĩtiretakakiniua ikiniõtika apiaãpota. ⁴Ininiã apanakini Teoso sãkire auiãkanikata aãuakasaaki, asãpiretana ninoa ate iuikinii hĩte. Ate iuikari himisiritiko himĩteenekini. Ate iuikari hãuikiniri Teoso sãkire. Iteene himaxikiko, himisiritiko pakini, iuaritika himĩteenekari. Iteene hãuikari Teoso sãkire.

⁵Himisiritiko himĩteenekini oerekari Teoso misiritiniri maerekati kamakani, kotxi ikara atão. Hĩte misiritaãka, kotxi hĩkamari hĩauĩte Teoso paniãtakiti, ininiãkara iuamoni apakatapitika hãuini Teoso auĩtetxi ininiãtaãua. ⁶Teoso kamari atão inakaranoka. Ininiã imisiritariko hĩte misiritakani. ⁷Ixipokariko hĩte misiritiko, ate misiritiko apaka. Iuasaaki hĩtomata atekata. Ikara atoko inakari ikama, Apiananiri Xesosi oerekikosaaki Teoso tixine ipotorikasaaki, initiriakori kaposotiireririkata. ⁸Xamina tirinakariã imisiritanako Teoso mimarotakani, aãuĩte Xesosi Kristo iokanapirena erekari

makĩpitakani. ⁹Ninoa misiritaãkako ãtipirika. Ikinipoko xipope ninoa ìkapani. !Auiritaãkana Apiananiri auiniãtaã apokinina. !Atamatarina iua iotximere. !Atamatarina iposotiire. ¹⁰Ninoa misiritaãka, Apiananiri kanapiriini õtisaaki. Iuasaaki inakitiakori, isãkire auiãkani, txariko: “Peerekai. Peerekai. ãti kaposotiireri pite atoko inakari !auari,” itxanako. Ikara atoko hĩte apaka sãpiretari iua iuasaaki, kotxi hĩte auikari asãpiretakiti hĩtemoni.

¹¹Ininiã amisãkiretapikari aTeosone hĩte ìkapani. Ia atoko atxari iua: “Pite akiritari Tesarónika auakani pinakitiakori ininiuana ìkapani, ininiã ninirekari pite apokaerekatiniri ninoa kamakiti pite ìkapani. Pisikaposotiiretana ninoa ikinipoko inireẽkitina erekari ikaminina ìkapani. Ninoa auikari pisãkire, ininiã iparĩkauatana pite ìkapani. Ininiã pisikaposotiiretana ninoa ikara iparĩkana ikaminina ìkapani.” ¹²Ikara atoko amisãkiretari Teoso, kotxi apanakini atamatakasaakiri erekari hĩkamakiti, itxarinako aãũite Xesosi Kristo: “Peerekai pite,” itxanako, ininiã Xesosi uãka iuikaãka. Apaka Xesosi txaike hĩte: “Peerekai hĩte,” itxaiko. Ikara atoko aua, kotxi aTeosone, Apiananiri Xesosi Kristo pakini sikari ikinipoko erekari hĩtemoni.

Apia Maerekati Apokini

2 ¹Nitariakori, maxinikari aãũite Xesosi Kristo kanapiriini. Maxinikari iuakata aãpotiitiniua. Ikara axinikasaaki, aõtãkikai hĩte. ²Apanakini sãpiretai: “Apiananiri kanapiriini õti apokapeka,” itxana. Maerekaxiniretika !hĩtxape. Ikara atoko inakasaakina, !hĩpĩkarauatape. Paxirari ninoa sãkire. Atxiĩti ninoa txari: “Erekari Matamatakoti sãpiretano ikara.” Atxiĩti ninoa txari: “Paoro sãpiretari ikara.” Atxiĩti ninoa txari: “Paoro iõkatsopatari ikara.” Paxirari ninoa sãkire. Kona hãuikapiri ikara atoko inakari. ³Kona xatiki hãuiritapiri kãkiti misirienetini. Apiananiri kanapiriini apisapanika, kãkiti !nirekari Teoso sãkire ikĩpitini. Iuasaaki maerekati kamakari apiatakari apoka. Xipokatxi ãkiri akiritaãka. Iua xipokaãkapitikako. ⁴Iua apia maerekati !nirekari Teoso paniãtakiti ikamini. Iuikauako. “Kãkiti teosonetakini posotiire poiãoka. Nota posotiire apiata,” itxako. Iuasaaki iitopãka Teoso misãkiretiko aikoti ãki. “Teosorano nota. Notanokara Teoso txaua. ãti Teoso !auari,” itxako iuasaaki. ⁵Hĩtekata nauakasaaki, nisãpiretapekai ikara. Atxiĩti hĩte xinikapanikari nisãpiretakiti? ⁶Uatxa kona apakatapanika iua

apia maerekati apokini. Himarotari Teoso !auiritari iua apokini uatxa. Iketo ötinokara Teoso auiritari iua apokini. Iuasaaki iuaka oerekaua. ⁷Maerekati kipatakori posotiire auape uatxa, iuaritika maerekati mauiritakati !auiritapanikari iteene maerekati iarikini. Äti öti maerekati mauiritakati makatxakaãka. ⁸Iuasaaki iua apia maerekati oerekaua kãkitimoni. Apiananiri kanapiriãkasaaki, okari iua. Ixökare, isinanirenani xipokari iua. Iotximere xipokari iua apia maerekati. ⁹Iua apia maerekati apokasaaki, Satanasi posotiire auuamoni. Ikamariko ikini sereti posotiiretxi kãkiti maposotakiniti. Iua oerekari ikara, kãkiti imisirienetini ïkapani, isãkire kãkiti auikini ïkapani. ¹⁰Ikini sereti maerekati ikama kãkiti pïpinanaãkani imisirienetini ïkapani. Ninoa pïpinanaãkani xipokapitikako, kotxi !nirekarina atão inakari itiretinina, ininiã imaerekanina makatxakiko !uari. ¹¹Ininiã iuasaaki Teoso txïkitakana auikinirina ninoa misirienetakani sãkire, ininiã auikarina atão minakati apiatakari. ¹²Ininiã atão inakari mauikakati misiritaãkako, kotxi iteene ipotxitari imaerekani.

Iteene Hãuikariko Teoso Sãkire

¹³Nitariakori, Apiananiri tiretakini, ätipirika erekari amisãkiretiniri Teoso hïte ïkapani ia atoko: “Erekapitikai, kotxi pite mereëna Tesarónika auakani imaerekanina pimakatxakini ïkapani.”

Itixi kamiko apisapanika, iua mereëi hïte. Imakatxakari himaerekani, kotxi Erekari Matamatakoti txïkitakai Teoso nakitiakori hininiua. Imakatxakari himaerekani, kotxi hãuikari atão inakari. ¹⁴Teoso iokanapirena erekari asãpiretakiti hïtemoni hãuikasaaki, iuasaaki Teoso akiritai hïte. Ininiã aãuïte Xesosi Kristo iotximere hïte apaka apakapako. ¹⁵Ininiã nitariakori, iteene kataparaxinire hïtxako. Iteene hãuikariko Teoso sãkire asãpiretakiti, aiökatsopatakiti pakini. !Hïtakanapapiri.

¹⁶Anirekari aãuïte Xesosi Kristo, aïri Teoso pakini sikataparaxiniretinii hïte. Ninoa iteene tirtaua. Ätipirika isikataparaxiniretaua. Isikaua erekari aiãtapini ïkapani. Aimarotari ikara erekari apokapitikako. Ikara atoko inakari ikama ate ïkapani, kotxi isikaua ikinipoko erekari. ¹⁷Erekari hïsäkiretakasaaki, erekari hïkamakasaaki, anirekari isikataparaxiniretinii hïte apikomoni erekari hïkamini ïkapani.

Himisäkiretariko Teoso Ate Īkapani

3 ¹Nitariakori, nisäkire mapotökire apoka. Himisäkiretariko Teoso ate Īkapani Apiananiri säkire katima iaripiretini Īkapani. Himisäkiretariko Teoso Apiananiri säkire auikiko Īkapani, hĭte auikiniri atokotxikana. ²Himisäkiretariko Teoso imakatzakiniua ate amapinakani Īkapani, maerekati kamakani sauaki aġuakasaaki, kotxi apanakini !auikari Teoso säkire. ³Apiananiri kamari ikinika isäkire iaōka. Iua sikataparaxiniretai hĭte. Itokapakeētai, ininiā Satanasi !inokai. ⁴Apiananiri txĭkitakaua ate aimarotiniri ate paniġtakiti hĭkamini. Ate imarotari, katana apaka hĭkamapanikariko asäkire iaōka. ⁵Anirekari Apiananiri oerekinii Teoso tiraōki. Anirekari himĭteenekiniri ikinika himisiritiko, Kristo imisiritiko imĭteenekini atokokana.

Kġkiti Paniġtakiti Makĭpitakani

⁶Nitariakori, aġuĭte Xesosi Kristo nireĕkiti iaōka asġpiretai hĭte, ininiā apaniġtai ia atoko. Hĭtari kġkiti paniġtakiti makĭpitakati, aġereĕkiti iaōka imakamakaniā, ininiā iua moianari !hĭtxapeuako. Hĭtakanapariko iua. ⁷Hĭte imarotari akamakiti iaōka hĭkamini, kotxi hĭtekata aġuakasaaki ate kĭpitari kġkiti paniġtakiti. ⁸Kona anikari nipokori amaĭkitxitakinini. Iuasaaki iteene aparĭkauata. Īkanōka, pokamara pakini aparĭkauata akiena aiomotini Īkapani, kotxi !anirekari hĭte kaamatini hĭte kiena. ⁹Apakatapitika kġkiti ĭkitxitiniua aparĭka Īkapani, iuaritika !anirekari hiĭkitxitiniua, kotxi anirekari hĭte parĭkauatini ate parĭkauatini atokokana. ¹⁰Hĭtekata ate auakasaaki, ate paniġtai hĭte ia atoko: “Kġkiti manirekakaniġri iparĭkauatini, !inikapani.”

¹¹Ate kenakopiretari hĭte sauaki auari kġkiti paniġtakiti makĭpitakani. !Iparĭkauatana. Ātipirika ipotxitarina imarotininina āti kġkiti kamakiti. ¹²Aġuĭte Xesosi Kristo posotiireĕ, apaniġtana kġkiti ikara atoko inakani iparĭkauatinina. Aōtġkikana iparĭkanoka ikaminina ikienana apokinina Īkapani. !Himaġkatapiri apanakini kamakiti. ¹³Nitariakori, !hĭsġpakape erekari hĭkamini.

¹⁴Kġkiti ereĕ makamakaniġri ate ōtġkikakiti ia iġkatsopariġ, erepaniko iua. Iua moianari !hĭtxapeuako. Hĭtakanapariko iua, ininiā iuasaaki atxiĭti ipĕtauata. Iuasaaki atxiĭti iuaĭkana atġo ikama. ¹⁵Imoianari !hĭtxapeuako, iuaritika himokaiakari !itxaua. Hĭpinitariko iua, kotxi hĭtari itxaua.

Paoro Sákire Mapotókire

¹⁶Anirekari Apiananiri, kākiti kamaerekaxiniretakari, kamaerekaxiniretinii hīte ikiniōtika. Anirekari iua kaikotini hītekata.

¹⁷Nota Paoro iōkatsopata nisákire mapotókire niuakoã. Ia nitakaōtxikare, ininiã himarotari atão ia nota iokanatsopatakiti. Ia atoko inakari niōkatsopata. ¹⁸Aãuīte Xesosi Kristo sikari ikinipoko erekari hīte hīkinikamoni. Ameẽ.

1 TXIMÓTXIO

Merepanika Paoro Iokanatsopatakiti Tximótxiomoni

1 ¹Nota Paoro iokanatsopata pite Tximótxiomoni. Xesosi Kristo iokanapirena sãpiretakari nota. Teoso amaerekani makatxakakari itxaua. Aimarotari Xesosinoka anikaua Teoso tixinemoni. Apiananiri itxaua. Teoso, Xesosi Kristo pakini iokanatano nota kãkitimoni, iokanapirena nisãpiretini ïkapani. ²Pite Tximótxio, nota ãkiri atoko pitxaua, kotxi merepitipanika pauikari Xesosi sãkire nota sãpiretakasaakii. Aïri Teoso, aãuïte Xesosi Kristo pakini sikai ïkinipoko erekari. Iamonïkaina. Ikamaerekaxiniretaina pite.

Atão Minakati Oerekakani

³Masetônia tixinimoni nisikasaaki, nipaniãtai pite Épeso sitatxiti pikaikotini. Uatxa iuaïkana nipaniãtai ereë Épeso pikaikotini. Ikara ninireka, kotxi apanakini ereë auakani oerekari Teoso sãkire kãkitimoni, txamari na atãoni ninoa oerekakiti. Ninirekai pite pinitinina ninoa atão minakati imoerekakanina ïkapani, ⁴kotxi ninoa sãpiretapikari kitxakapirïkari pirena. Ninoa xinikapikari aãtokiriakorini uãka, ininiãkara kãkiti taparakienatakakaua iuãkana ixinikasaakina. Põtãkikanako ninoa ikara atoko inakari sãkiretxiti itakanapinina, kotxi ikara sãkiretxiti !oerekari kãkiti Teoso nireëkiti. Teoso sãkire aãuikiniã, aimarotari Teoso nireëkiti. ⁵Nipaniãtai pite ikara atoko, kotxi ninirekari ereë Teoso sãkire auiãkani tiretakakiniua. Kãkiti ãkixinire maerekati mauakaniã, ininiã itiretakakaua. Kãkiti imarotakasaakiri ikamakiti ereka

inini, itiretakakaua. Kākiti ikara atoko inakari atão auikari Xesosi sākire. ⁶Kākiti, Teoso sākire atão masāpiretakani, takanapari ikara erekari kimaporiti. Pīpinanaākani atoko itxauana, kotxi !imarotaikarina Teoso kimapore. Maxikatiika isākirauatapikana. ⁷Ninoa kākiti nirekamari Teoso paniātakiti oerekakani ininiuana, txamari !imarotarina Teoso paniātakiti. !Imarotarina isāpiretakitina, iuaritika ninoa: “Atāopitika asākire,” itxanātana.

⁸Kākiti atão sāpiretakasaakiri Teoso paniātakiti iōkatakori, iuusaaki aimarotari ipaniātakiti ereka inini. ⁹Mauiritakoti aua, kona kākiti atão inakari kamakani !kapanini. Mauiritakoti aua, kotxi maerekati kamakani auapitika. Aua mauiritakoti manireēkani. Aua Teoso manireēkani. Aua maerekati kamakani. Aua erekari manireēkani. Aua Teoso paniātakiti napetakani. Kākiti aua iri okakani. Kākiti aua inoro okakani. Aua kokanirini. Mauiritakoti aua, kākiti ikara atoko inakari !kapani. ¹⁰Aua kākiti āti !tanorokata sir!kakari. Aua kākiti āto tanirikata sir!kakaro. Aua kiki āti kikikata sir!kakari. Aua sito āto sitokata sir!kakaro. Aua kākiti āti kākiti !tiriākani ivētxitiniri !kapani. Aua aāpirenaāri. Aua kākiti āti apo!takani. Mauiritakoti aua ikara atoko inakari kākiti !kapani. Ninoa !auikari Teoso sākire atão inakari. ¹¹Ikara Teoso iokanapirena erekari sāpiretaua. Peerekari Teoso. Peerekari iua iokanapirena. Iua paniātano nota iua iokanapirena nisāpiretini ikininapemoni.

Teoso Amon!kiniri Paoro

¹²Nitxari aāu!te Kristo Xesosi: “Erekari pite kaminano, kotxi pisikataparaxiniretano nota pite !kapani nipar!kauatini !kapani. Erekari pauikiniri nisākire. Erekari pimereinino nota pisākire ikininapemoni nisāpiretini !kapani,” nitxari Kristo Xesosi. ¹³Meresaaki nota misākirepiretari iua Xesosi. Nasikatikinitana iua sākire au!ākani nokinina !kapani. Kaneenamari nitxaua iuusaaki. Iuaritika Teoso amon!kano. !Imisiritano nota, kotxi iuusaaki !nimarotari nikamakiti Xesosi sākire nimauikakani xika. ¹⁴Iuusaaki !erekano. Maerekati nitxaua. Iuaritika aāu!te Kristo Xesosi sikari ikinipoko erekari notamoni. Kristo Xesosi nakiti nitxapekaua, ininiākara nauikari isākire. Iua nakiti nininiāua, nitiretari iua. Nitiretari apanakini apaka. Mitxi !nimarotari nitiraōkiuatini. ¹⁵Nisāpiretaiko ia sākiretxiti atão inakari, pauikiniri !kapani, ikinimane auikiniri !kapani. Nitxai: “Kristo Xesosi apoka !korapokoriti maerekati kamakani maerekani

imakatxakini ĩkapani,” nitxa. Maerekati apiata kamakari nitxaua nota. ¹⁶Maerekati apiata kamakari nitxaua, iuaritika Teoso !imisiritano. Iamonĩkano, kotxi inirekari apanakini imarotiniri Kristo matima omanãkarauatakani kãkiti maerekani xika. Xesosi nirekari nota eereka auakani, isãkire auiãkani imarotiniri Xesosi amonĩkinina ninoa, kotxi iua amonĩkano nota maerekati apiata kamakarino. Ninoa auikari isãkire, ininiãkara auapininiika Teosokata. ¹⁷Nitxari Teoso: “Ari Teoso, peerekai. ãtipirika ikinimane auĩte pitxaua. Pipinini !uari. Matamatakoti pitxaua. Pitenokara Teoso txaua. Pitenokara kimaroreri. Ikinimane paxitaiko ãtipirika. Ikinimane ãtipirika sãpiretaiko ereka pinini. Atãopitikara nisãkire. Ameẽ.”

Xesosi Sãkire Iteene Auikiko

¹⁸Tximótxio, namarite atoko pitxaua. Nisãpiretai noerekakiti sãkiretxiti pikaminiri ĩkapani. Pixinikariko akokaxiti Teoso sãkire sãpiretakani sãpiretakiti. Ninoa sãpiretai Teoso nirekakiti pite kamini tĩkane. Nota sãkire uatxa ninoa sãkire atokotxikana. Ikara ninoa oerekakiti sãkiretxiti pikamapikako, ininiãkara pite sotato erekari atoko pitxaua Satanasi pinaiatini. ¹⁹Pauikapikariko Xesosi sãkire. Ikara pikeeko atoko itxa. !Pikamapiri pãkixinire mapokaerekatakiniti. Ikara apaka pikeeko atoko itxa. Apanakini kamapekari ãkixinirena mapokaerekatakiniti, ininiã eereka !auikaikarina Xesosi sãkire. Kanaua sakikini atoko itxa ninoa auikiniri Xesosi sãkire. ²⁰Imeneo inakori, Arexãtri inakori apaka ikara atokokana itxana. Ninoa misãkirepiretari Teoso, ininiãkara nota sikanapana ninoa Satanasi moni. Satanasi misiritakasaakina ninoa, atxiĩti itakanaparina Teoso imisãkirepiretinina.

Teoso Misãkiretiko Ikinimane ĩkapani

2 ¹Merepanika nõtãkikai pimisãkiretiniri Teoso ikininape kãkiti ĩkapani. Pimisãkiretariko Teoso ninoa nireẽkiti ĩkapani. Pamanaãriko Teoso sikiniri erekari ninoamoni. Pitxariko Teoso: “Peerekai pite, kotxi erekari pisikakiti kãkitimoni.” ²Teoso pimisãkiretako auĩtetxiakori apiari ĩkapani, auĩtetxiakori poiãori ĩkapani apaka. Pamanaãriko Teoso ninoa ĩkapani, aũuni ereka inini ĩkapani, neenamtxi mauakani ĩkapani. Ikara atoko aniniã, akamari Teoso nireẽkiti erekarinoka. ³Ikara akaminiã erekapitikari. Teoso, amaerekani makatxakakari, apokaerekatari asãkire ikara atoko inakari akamini. ⁴Teoso nirekari imakatxakiniri ikinimane

maerekani. Inirekari ikinimane imarotiniri atão inakari sãkiretxiti. ⁵Ñatinokara Teoso aua. Ñti kikinokara mikanapiriãri kãkiti Teosomoni. Xesosi Kristonokara mikanapiriãri kãkiti Teosomoni, kotxi iuanoka misãkiretari Teoso kãkiti ïkapani. ⁶Iua ipina ikinimane kãkiti ïkitxitini ïkapani. Teoso ketotini õti manapi Xesosi ipina. Xesosi ipinini oerekaua Teoso nirekiniri imaktxakiniri ikinimane maerekani. ⁷Ininiãkara Teoso akiritano nota isãkire ikinimanemoni nisãpiretini ïkapani. Ininiã Teoso iokanatakiti kãkitimoni nitxaua nota. Ikara nisãkire atão. Kona paxirarini. Teoso akiritano Xoteo minakaniuua noerekini ïkapani. Akiritano atão inakari sãkiretxiti noerekinina ïkapani. Akiritano noerekinina Teoso sãkire auikinina ïkapani.

⁸Ininiã ninirekari kikiakori erekarinoka kamakani, ikini itixiti auakani, misãkiretiniri Teoso. Ninirekari Teoso imisãkiretakasaakina, iusaaki ninirekari isãkire auikinina apaka, ãti imomanatakanina.

Sitoakoro Xesosi Sãkire Auiãkani

⁹Ninirekari sito mãka atão inini, kiki paxitiniro ïkapani. !Apakata oõuikiniua omãka ereka inini xika. !Erekari sito ãtipirika oeretiniri oiãko kãkiti xikaueretiniro ïkapani. Oro, pérora pakini otakiniã oiõõ kãkiti xikaueretiniro ïkapani, !erekari. !Erekari mãkatxi kakaroneri oieretakini. ¹⁰Sito Teoso nireëkiti nireëkaro kaminiãri erekari, erekapitikari. Mãkatxi peereri atoko itxa erekari okamakiti, kotxi kãkiti atamatari okamakiti. ¹¹Teoso sãkire sãpiretakari oerekarauatakasaaki, erekari sito kenakotiniri. !Apakata iusaaki osãkirauatini. Erekari opaxitiniri iua, isãkire okĩpitini ïkapani. ¹²Nota !auiritaro sito oerekinina kikiakori, ikamakitina tĩkane opaniãtinina. Erekari masãkiretoka onini. ¹³Ikara atoko itxa, kotxi merepitipanika Teoso kamari kiki Adão inakori. Eerekaikara ikamaro sito Eva inakoro. ¹⁴Kona Adãoni misirienetaãka. Sitora misirienetapeëka. Oa kamari maerekati, kotxi !okamari Teoso paniãtakiti, ininiãkara !apakata sito paniãtiniri kiki ikamakiti tĩkane. ¹⁵Sito auikiniãri Teoso sãkire, otiretiniãri apanakini, maerekati omakamakaniã, omasarauatakaniã, Teoso makatxakari omaerekani, kotxi ãto sito eenetari Xesosi, amaerekani makatxaãkari.

Kõtākikarerini Pirena

3 ¹Ia nisākire atão. Kiki nirekiniāri kõtākikarerini ininiua, Teoso sākire auaiākani ôtākikini inirekiniā, iua nirekari parīkatxi erekari. ²Ia atoko kõtākikarerini txauako: !Ikamari maerekati, ininiā iua apoitiko !auari. Ātonanirako itanoro. Kūikiteri itxauako. !Katimari omanākarauatini. Ipaxitaākako. Kākiti ātiātaā ĩkani apakapako aapoko. Imarotariko oerekarauatini. ³Ipoātapeko. Kaneenamari !itxapeuako. Katiraōkiri itxauako. !Ipotxitapiriko neenamaxi. Txineiro iteene !ixinikaperoko. ⁴Iua nīkatanako aapoko auakani, ninoa auini ereka ininina tīkane. Itxīkitakanako imiakori ipaniātakiti ikīpitinina ĩkapani, ininiā ninoa paxitari iua. ⁵Ikara atoko itxako kõtākikarerini, kotxi aapoko auakani imamimatanīkaretakaniā, ininiā !imarotari kākiti Xesosi sākire auaiākani inīkatini. ⁶Kiki mapaōtinoka auikiniāri Xesosi sākire, !apakata iua Xesosi sākire auaiākani ôtākikakari ininiua. Xesosi sākire auaiākani ôtākikakari ininiāua, iuikaua atxiīti. Iuikiniāua, Teoso misiritari iua, kitxakapirīka Satanasi iukasaakiaua imisiritini atokokana. ⁷Kiki Xesosi sākire auaiākani ôtākikakari paxitaākako, Xesosi sākire mauaiākani apaka paxitari iua. Ikara atoko ininiā, !ikamapaniri kākiti kamapētatakari. Ininiā Satanasi !imaīkari iua itakapiremoni.

Kamiparīkarerini Pirena

⁸Ātipekana, Xesosi sākire auaiākani miparīkatakanipekana nisāpiretaiko: Iua kamariko erekari, ipaxitiko tīkane. Ātika isākire itxauako. !Ipoātapeko. !Apakata txineironoka ixinikini. ⁹Kamiparīkarerini iteene auikariko Teoso sākire atão inakari. Ākixinire imarotariko ikaminiri Teoso sākire iaōka. ¹⁰Xesosi sākire auaiākani ataerekatariko kiki, kamiparīkarerini ininiua nireēkari. Erekarinoka ikaminiā, ininiā iua auiritaāka ninoa miparīkatakari ininiua. ¹¹Iua atokokana kamiparīkarerini itanoro kamariko erekari opaxitiko ĩkapani. Aāpirena !okamapeko. !Opoātapeko. Okamariko okamaenetakiti iaōka. Ininiā kākiti auikari osākire. ¹²Ātonanirako kamiparīkarerini itanoro. Inīkatariko imiakori, kākiti iua aapoko auakani apaka, ninoa auini ereka ininina ĩkapani. ¹³Kamiparīkarerini atão parīkauatiniā, iteene ipaxitaāka. Apanakini apokaerekatari iparīka. Ininiā itaparaxinireritika isāpiretari Kristo Xesosi sākire auikiko kākitimoni. ¹⁴Uatxa pitemoni niōkatsopatakasaaki, ninirekari paītiki nisini hītemoni. ¹⁵Atxiīti uai okanani nauapanika, ininiā ia iōkatsopari

oerekaiko pite Teoso nakitiakori atão auini ikiniõtika, kotxi Teoso aapoko atoko atxaua, iua auiniãtaã ìkapani. Teoso auãki itxapika. Kãkiti iua nakitiakori nìkatari iua sãkire. !Auiritana apanakini koketiniri atão minakati Teoso sãkirekata. Isãpiretana ikinimane Teoso sãkire atão inakari. ¹⁶Peerekari Teoso parîka kãkiti ìkapani. Merepanika kãkiti !imarotari, eereka Teoso oerekari iparîka. Ia atoko Teoso kaminaua ate:

Kãkiti itxapekaua. Iua Xesosi. Erekari Matamatakoti oerekari kãkiti Xesosi sãkire atão inini. Teoso nitiriakori iaxitikini atamatari iua. Isãkire sãpiretaãka ikini itixiti auakanimoni. Kãkiti auikari isãkire. Eereka Xesosi anikaãka iaxiti Teoso tixinemoni.

Ikara atoko inakari Teoso parîka kãkiti ìkapani.

Atão Minakati Oerekakani

4 ¹Iua Erekari Matamatakoti sãpiretaua, apanakini !auikaikari Xesosi sãkire itixi mapotõkire õti takote. Ikara atão. Iuasaaki ninoa auikari maerekani matamatakoni misirienere. Auikarina Satanasi nitiriakori oerekakiti. ²Kãkiti ikara atoko inakani sãpiretari atão minakati. Ninoa sãkire ãti, txamari ninoa xinikakiti ipinimoni. Ninoa ãkixinire sãkire !auaika. !Isãpiretaikarina maerekati imakamakanina ìkapani. Kapatakari arikakiti atoko itxa ninoa ãkixinire sãkire. ³Kãkiti ikara atoko inakani !auiritari kãkiti ìtanorouatini. “!Erekari kãkiti ìtanorouatini,” itxa ninoa sãkire. Teoso kamari ikini nipokori kãkiti nikini ìkapani. Txamari ninoa kamisirienererini !auiritari kãkiti apanakini nipokori inikinina. Teoso nirekari Xesosi sãkire auiaãkani, atão inakari imarotakani, nikiniri ikara nipokori Teoso imisãkiretaka atoko: “Erekapitikai ia nipokori pisikiniãua.” ⁴Ikinika Teoso kamakiti erekari. !Apakata kãkiti manirekakaniãri apanakini nipokori. Ikinipoko nipokori hinikasaaki, himisãkiretariko Teoso. Hìtxariko: “Erekapitikai ia nipokori pisikiniãua.” ⁵Teoso sãkire sãpiretaua ikinipoko nipokori anikini. Nipokori anikasaaki, amisãkiretiniãri Teoso, nipokori isikakiti eereka inini asãpiretiniãri, ininiã ikara nipokori erekari anikini.

Kristo Xesosi Nitiri Erekari Inakari

⁶Aõtariakori põtãkikiniã ikara atoko, Xesosi Kristo nitiri erekari pitxaua. Nipokori sikataparatarari kãkiti ìto. Teoso sãkire aãuiãkiti, oerekaretxi atão inakari, nipokori atoko itxa,

kotxi isikataparatarari axinire. Pite auikapikari oerekaretxi atão inakari. ⁷!Pimaãkatapiri miikiteti sãpiretakiti, sãkiretxi Teoso mapokaerekatakiniti. Ikiniõtika piteka poerekauako Teoso paniãtakitinoka pikamini, ininiã Teoso nireëkititxikana pikama. ⁸Piïto parĩkauatakasaaki, piïto tapara apiaãpota, ininiã erekari piparĩkauatini. Apiaerekata pixinire parĩkauatini pixinire auãki inini ïkapani. Pixinire ïkorasaaki auãki ininiã, pauapikako Teosokata ätipirika. ⁹Ikara nisãkire atão. Erekari ikinimane aukiniri ikara. Erekari ikinimane kaminiri ikara. ¹⁰Ininiãkara iteene aparĩkauata Teoso ïkapani. Pasãpaniri, iuaritika aparĩkauatipitipo, kotxi aãuikari Teoso sãkire, Teoso mipĩkati sãkire. Iua ikinimane kãkiti maerekani makatxaãkari itxaua. Iua makatxakari isãkire auiãkani maerekani, maerekani misiritikoãtaã imasikanina ïkapani.

¹¹Pipaniãtariko kãkiti noerekakiti sãkiretxiti iaõka ikaminina. Poerekana noerekakiti.

¹²Pite ätokoripanika, iuaritika pimarotapitikari Teoso sãkire, ininiã !pauiritapiri kãkiti napetiniri poerekakiti sãkiretxiti. Atão inakaranoka pikamako Xesosi sãkire auiãkani atamatini ïkapani, ininiãkara ninoa auikapitikariko pisãkire, ininiã ninoa nirekari pite atoko ininina. Erekarinoka pisãpiretako. Erekarinoka pikamako. Kãkiti pitiretako. Iteene pauikariko Teoso sãkire. Maerekati !pikamapeko. Ikara atoko pininiã, ninoa nirekari pite atoko ininina. ¹³Ereë nimapokakanisaakipanika, patatsopatariko Teoso sãkire iõkatsopatakorì, apanakini kenakotiniri ïkapani. Pisãpiretanako Teoso sãkire. Teoso sãkireë põtãkikanako. Poerekana Teoso sãkire atão imarotinina ïkapani. Ikara atoko pitxapikanako, ereë napokini apisapanika. ¹⁴Akokaxiti kõtãkikarerini sãpiretai piparĩka Teoso ïkapani. Iuasaaki ninoa takari iuakona pite nopini, pite ïkapani imisãkiretakasaakirina Teoso. Ikara atoko ininiãkara, pikamapikariko ikara piparĩka Teoso ïkapani. ¹⁵Ätipirika pixinikariko ikara nõtãkikinii. Ikiniõtika pikamariko piparĩka Teoso ïkapani. Ininiã apanakini imarotari Teoso sãkire apiaãpota pauikini. ¹⁶Erepaniko pikamakiti ereka inini ïkapani. Erepaniko poerekakiti sãkiretxiti Xesosi oerekakiti iaõka inini. Ikara ätipirika pikaminiã, piteka makatxakaua pimapinakani ïkapani. Apaka pimakatxakana pisãkire auiãkani imapinakani ïkapani.

Ötākipirenatxi Pirena

5 ¹!Pitxitapiri kiki aneēkari. Pötākikariko, piri pimisākiretini atokokana. Pötākikariko kikiakori pite tikini auakani, pitariakori pimisākiretini atokokana. ²Pötākikaroko sito aneēkaro pinoro pötākikini atokokana. Pötākikaroko ātokoro, pitaro pötākikini atoko. Iusaaki pipaxitaroko.

Sitoākini Tikinitakoni

³Pinīkatanako sitoākini tikinitakoni onirimane matiretakini. ⁴Tikinitakoro oimiakori auiniā, oītariakori anaakori auiniā, ninoa nīkatamaroko oa. Ikara ikaminiāna, erekari Teosomoni. Teoso poxokotana ninoa. Merepanika ninoa kaminiāri erekari ninoaka aapoko āki, aimarotari ninoa atāo auikiniri Teoso sākire, kotxi meresaaki irina, inorona pakini nīkatana ninoa. ⁵Tikinitakoro minīkatakoto auikari Teoso inīkatiniro oa. Oa misākiretari iua pokamara, īkanōka pakini inīkatiniro īkapani. ⁶Tikinitakoro osarauatininoka nireēkaro, ipīkaro atoko otxaua. ⁷Pisāpiretanako ereē auakani, Xesosi sākire auīākani nīkatinina inorona, inorona itaro tikinitakoro pakini. Inīkatiniāna, !apoītaākana. ⁸Xesosi sākire auīākani manīkatakaniāri inirimane, itakanaparina Teoso sākire auikinina. Apia maerekanita iua aapoko āki auakani imanīkatakaniā. Kākiti Teoso sākire mauīākati maerekati itxaua. Apia maerekati itxaua iua aapoko āki auakani manīkatakati.

⁹Apanakini sito tikinitakoni moianatana Xesosi sākire auīākani. Pitakariko ninoa tikinitakoni uāka aātsopaā himoianatini īkapani. Sito ikara atoko inakaro sesēta ano apiko auakaro oa. Ātinoka oītanirini. ¹⁰Oa imarotaāka, kotxi erekarinani okama. Atāo oōerekari oimiakori. Osikakienatana ātiātaā īkani. Oimarotaāka, kotxi oa arokakititari kākiti Teoso nakitiakori. Oimarotaāka, kotxi kākiti maerekaxinireni otireta. Oimarotaāka, kotxi ikini sereti erekari ātipirika okama. Tikinitakoro ikara atoko inakoro uāka aātsopaā pitaka himoianatini īkapani.

Tikinitakoni Ātokoropanika Inakani Ötākikiko

¹¹!Pitakapiri tikinitakoro uāka iua aātsopaā, ātokoropanika inakaro, kotxi iuaīkana onirekari kikiakata osirīkini, ininiā onirekari iuaīkana oītaniriuatini, ininiā !onirekaikari Kristo. ¹²Ikara atoko okaminiā, okamari maerekati, kotxi mitxi osākire: “Nikamariko parīkatxi Teoso īkapaninani. !Nītaniriuataikako,” otxama. ¹³Tikinitakoro

ãtokoropanika inakaro itotari oiarinauatini. Oianapokotapika. Apia maerekati okama, kotxi ototari aãpirena okamini. Onirekari ikinika apanakini kamakiti oimarotini, txamari ikara atoko !apakata. !Apakata ãti kamakiti osãpiretini apanakinimoni. ¹⁴Ikara atoko ininiã, !pitakapiri tikinitakoro ãtokoro inakaro uãka iua aãtsopaã. Nota õtãkikana ãtokoroakoro tikinitakoni iuaĩkana taniriuatini. Erekarı keene ininina, aapokona iparĩkauatinina. Ikara atoko ininiã, Xesosi sãkire mauĩãkani kona misãkirepiretana Xesosi sãkire auĩãkani. ¹⁵Nota ikara atoko nisãpiretai, kotxi ãtikaka tikinitakoni ãtokoroakoro inakani takanapapekari Xesosi sãkire auikinina, Satanasi paniãtakiti ikaminina ĩkapani. ¹⁶Xesosi sãkire auĩãkani inirimanena tikinitikoã, inĩkatanako ninoa. !Erekari imanĩkatakanirina inirimanena tikinitakoni. !Erekari inirekinirina apanakini Xesosi sãkire auĩãkani nĩkatinina inirimanena, kotxi ninoa nĩkatana kaiãopokori tikinitakoni manirimaneni. Pasãpaniri ninoa parĩka.

Kõtãkikarerini Pirena

¹⁷Kõtãkikarerini atão kaminiãri iparĩka Xesosi sãkire auĩãkani ĩkapani, erekari hisikinina iparĩkana ĩki apiata. Teoso sãkire isãpiretiniãna apanakinimoni, Teoso sãkire oerekiniãna, ininiãkara erekapitikari apiata iparĩkana ĩki hiĩkitxitinina. ¹⁸Teoso sãkire iõkatsopatakori txari:

!Hĩaxirikanamatapiri kema auĩte iparĩkauatakasaaki,
triko ikatxaratakasaaki. Pauritariko inikiniri triko iki,
iparĩkauanãtakasaaki.

Teoso sãkire iõkatsopatakori txari apaka:

Erekapitikari parĩkauatakari apakapiniri iparĩka ĩki.
¹⁹ãti apoĩtiniãri kõtãkikarerı, !pimaãkatapiri isãpiretakiti. Ipi, atxiĩti ipi ãti pakini kãkiti atamatiniãri kõtãkikarerı kaminiri maerekati, isãpiretiniãna pite, pikenakotapitikari ninoa sãpiretakiti. ²⁰Põtãkikanako Xesosi sãkire auĩãkani maerekati kamakani apanakini Xesosi sãkire auĩãkani apisatoõ, ininiãkara apanakini pĩkari maerekati ikaminina.

²¹Tximótxio, nota paniãtai ikara noerekakiti iaõka pikamini. Teoso apisatoõ, Apiananiri Xesosi Kristo apisatoõ apaka, Teoso nitiriakori iaxitikini imereẽkini apisatoõ apaka, nipaniãtai ikara noerekakiti iaõka pikamini. Ninoa kenakotari nisãkire pitemoni. ãtinokarako pisãkire txauako ikininape kãkitimoni. Erekarı pikamako ikininape

kākitimoni, kākiti pipotxitakinimoni, kākiti pimapotxitakinimoni apaka. ²²Atxiiti aua Teoso sākire auiākari iteene pimimarotakiniti. Ininiã !pimereēpiri iua Xesosi sākire auiākani ôtākiākari ininiua. Atxiiti ikamapanikari maerekati. Pimereiniāri iua, pite moianatari iua maerekati ikamini. Erepaniko maerekati pimakamakani ikapani.

²³Pite itokata amianata. Pitsii iriko, ininiākara kona āparaānanini piāta. Ovaã poiãoka apaka piātako pipini ikapani.

²⁴Apanakini !ikipatari maerekati ikamakiti, ininiã ikinimane imarotari. Apanakinipekana maerekati ikamakitina !atamataãka ikamakasaakina. Ninoa kipatari. Okananixiti atokoikara imarotaãka ninoa maerekani. ²⁵Iua atokokana erekari apanakini kamakiti atamataãka. Erekari apanakini kamakiti !atamataãka ikamakasaaki. Iuaritika okananixiti atokoikara imarotaãka.

Nitiritxi Amotakoni Pirena

6 ¹Nitiritxi amotakoni, Xesosi sākire auiākani, iteenerako iparīkauatana ipatrãotena ikapani. Ninoa paxitanako ipatrãotena. Ikara atoko ininiãna, Teoso uãka !imisākirepiretaãka. Iua sākire ate oerekakiti apaka !imisākirepiretaãka iusaaki. ²Nitiritxi patrãote Xesosi sākire auiākari ininiãua, initiri paxitariko iua, kotxi itari apaka itxaua iua. !Apakata poiãonoka ipaxitiniri ipatrãote, itari ininiua xika. Erekari iteene iparīkauatini ipatrãote ikapani, kotxi ipatrãote auikari Xesosi sākire. Teoso tiretakiti ipatrãote. Tximótxio, ikara noerekakiti sākiretxiti poerekariko apanakinimoni. Põtākikanako ikara iaõka ikaminina.

Txineiro Potxitakani Pirena

³Aua kākiti atão minakati oereēkani. Ninoa !auikari aãuĩte Xesosi Kristo sākire atão inakari. !Auikarina atão inakari oerekakori, Teoso sākire. ⁴Kākiti ikara atoko inakari iuikaua, txamari !kimaroreri. Ipotxitari isākirauatini apanakinikata itaparakiēnatakakiniuana ikapani. Ininiākara xikoretxi aua, neenamati aua, misākirepiretakatxi aua. Ininiã kākiti !auikari āti sākire. Iuākatari āti kaminiri maerekati. ⁵Ninoa txitakakapikaua, kotxi ixinikakitina maerekatinoka. !Imarotaikarina Teoso sākire atão inakari mitxi imarotakitina. Ninoa oerekari Teoso sākire kākitimoni txineiro ito apakapinina ikapani. Txamari na atão ninoa oerekakiti sākiretxiti. !Pimaākatapiri kākiti ikara atoko inakari.

⁶Teoso nireēkitinoka pinirekiniã, ikinipoko pinireēkiti auape, ininiã pākixinire poxokoniuata. Kipa apikomoni pinireka? !Auari. ⁷Kiripa

ate mina uai itixi aponaniākasaaki? !Kaminareua. Kiripa aanika atekata apīkasaaki? !Kanikareua. ⁸Kamāka aniniā, kanipokore aniniā, apakatape. ⁹Satanasi oerekari kākiti maerekati ikamini txineiro apakapini ikapani. Ininiā tiitxi nireēkari mokatanitika kamari Satanasi oereēkiti. !Erekari tiitxi nireēkari nireēkiti. !Kīikiteri iua. Inireēkiti txikatoro atoko, kotxi imaīkari iua. Eereka !auaika itii, itxineirote, ipoxokoni pakini xipope. Inireēkiti xika Teoso iokanatari iua kākiti misiritikomoni. ¹⁰Kākiti iteene potxitiniāri txineiro, ikamari maerekati. Takari aneē, kotxi ikotsa aua. Iua atokokana maerekati aua ikotsa. Txineiro potxitiko maerekati kotsa itxaua. Txineiro potxitiko auiniā, ikini sereti maerekati aneē. Apanakini txineiro potxitakani takanapaāpotari Teoso sākire, ininiākara txineiro potxitakari iuaka karotapekaua ākixinireē. Iuaka maerekaxinireti itxīkitakaua.

Paoro Ōtākikiniri Tximótxio

¹¹Pitepekana Tximótxio, Teoso paniātakiti kamakari pitxaua, ininiākara ikara maerekati xatiki !pikamape. Atāo inakarinanirako ikiniōtika pikamako. Teoso nireēkitinoka pikamako. Iteene pauikariko Teoso sākire. Katiraōkiri pitxauako. Pimisiritiko auakasaaki, pimīteenekariko. Teoso nireēkitinoka pinirekako. Kona pinirekapiri piteka nireēkiti. ¹²Pineenamauatako Teoso ikapani. Ikara neenamati erekari, Satanasi piokanadini, kākiti Teoso sākire auikini ikapani. Papakapariko Teoso sikakiti, kotxi iua akiritai iuakata pauapininiika pinini ikapani. Kaiāopokori kākiti imarotari Xesosi sākire iteene pauikini, kotxi ikenakotapekari pisāpiretinina. Peerekari pisākire ninoamoni. ¹³Tximótxio, nimisākiretai pite Teoso apisatoō, Kristo Xesosi apisatoō apaka. Ninoakara kenakotari nisākire uatxa. Teoso ikinimane auāki inini txīkitakakari iua. Kristo Xesosi Homano auīte Pōsio Pirato inakori apisatoō auakasaaki, isāpiretari atāo Teoso sākire. ¹⁴Nipaniātai ikara noerekakiti sākiretxiti iaōka pikamini. !Pimamakapiri ikara noerekakiti. Ikara noerekakiti iaōka pikaminiritika aāuīte Xesosi Kristo kanapiriāko. ¹⁵Teoso ketotari Xesosi kanapiriini ōti. Iuasaaki Teoso akiritari Xesosi ikorapokoriti ikanapiriini ikapani. Iuanokara kaposotiireri. Peerekari iua. Auītetxiakori auīte itxaua. Apiarini sauaki iuanokara Apiananiri txaua. ¹⁶Iuanoka !lipina. Iuanokara ikinipoko auāki inini txīkitakakari. Iua auiniātaā iotximere auapika, ininiākara kākiti !iposota imatokotiniri Teoso. !Katamatikori. Kākiti

liposotari atamatiniri iua. Iuanokara kaposotiireri ātipirika. Ātipirika maākiritari: “Peerekari Teoso.” Ameẽ.

Xesosi Sākire Auiākani Katxineiroterini

¹⁷Pipaniātanako kākiti katxineiroterini: “Katii hininiã, !hĩuikapeuako. !Hĩpoxokotapero hĩtxineirote, kotxi āti ōti atxiĩti hĩtxineirote !luaika. Hĩpoxokotariko Teoso, ātipirika auākiri, kotxi iuara sikaua ikinipoko apotxitakiti. Kaiāopokori isikaua. ¹⁸Erekari hĩkamako. Hĩtxineirote kaiāopokoro auini atokokana, erekari kaiāopokori hĩkaminanako apanakini. Kaiāopokori hĩtii auiniã, hĩsika kākiti kaamonirimoni. Himarotakasaakiri, matxineiroteni amonitakiti hĩsikanako ninoa. ¹⁹Ikara atoko hininiã, hāpotiāpotari erekari Teoso tixinekiri. Iuaã apotiitakori !lixipoka. Ipinaākana atoko, auinapanikana. Ikara atoko hĩkaminiã, hāpakapari Teoso sikakiti. Iua txĩkitakai hāuapininiika hinini Teosokata.”

Ikara pisāpiretako katxineirotenimoni.

Paoro Iōkatsopare Mapotōkire

²⁰Ari, Tximótxio, atāo pikamariko parĩkatxi Teoso sikakiti pitemoni pikamini ĩkapani. !Pimaākatapiri sākiretxi Teoso mapokaerekatakiniti. !Pimaākatapiri kākiti, “Kimaroreno nota,” inakari, kotxi !imarotari imaroretxi atāo inakari. ²¹Ninoa sākire: “Imaroretxi auapitika notamoni,” itxa. Txamari na xatiki imarotari Teoso imarore. Ikara xika ninoa takanapaāpotari Teoso sākire auikinina.

Teoso sikai ikinipoko erekari. Ameẽ.

2 TXIMÓTXIO

Paoro Iokanatsopatakiti Iuaĩkana Tximótxiomoni

1 ¹Tximótxio, nota Paoro iokanatsopata pitemoni. Teoso mereẽno nota, Kristo Xesosi iokanatinino ĩkapani, isãkire nisãpiretini ĩkapani. Kãkiti Kristo Xesosi nakiti ininiãua, Teoso txĩkitakari ĩxinire auãki inini, kotxi Teoso kamaenetapekari ikara ikamini.

²Pite Tximótxio namarite nitiretakiti atoko pitxaua. Aĩri Teoso, aãũite Kristo Xesosi pakini sikai ikinipoko erekari. Iamonĩkaina. Ikamaerekaxiniretaina.

Paoro Ôtãkikiniri Tximótxio

³Nota parĩkauata Teoso ĩkapani. Ninirimane kitxakapirĩkarini parĩkauatini atokokana niparĩkauata. Nãkixinireẽ nimarotari maerekati nimakamakani, Teoso ĩkapani niparĩkauatakasaaki. Nota txari Teoso: “Erekapitikari pikamakiti Tximótxio ĩkapani,” nitxa. Nimisãkiretapikari Teoso pite ĩkapani, ĩkanõka, pokamara, ĩkanõka, pokamara nitxapika. ⁴Nipiãtai. Nixinikari pite txiapatini nitakanapakasaakii, ininiã ninirekari naõkitinii iuaĩkana nipoxokoniuatini ĩkapani. ⁵Nixinikari pite atão auikiniri Teoso sãkire. Merepanika pakiro Aróitxi inakoro, pinoro Eonisi inakoro pakini atão auikari Teoso sãkire. Nimarotapitikari pite apaka auikiniri Teoso sãkire ninoa auikiniri atokotxikana. ⁶Ininiãkara nõtãkikai. Akoka niuako nitakasaakiri pikiiã, Teoso sikai parĩkatxi iua ĩkapani pikamini. Iuasaaki isikaposotiiretai ikara parĩkatxi pikamini ĩkapani. Iteene pikamariko ikara parĩkatxi iua ĩkapani.

⁷Teoso sikapekaua Erekarí Matamatakoti, ininiã !kapĩkareua. Iua Erekarí Matamatakoti sikataparatarí aãkixinire. Iua oerekaua atiraõkiuatiñi. Oerekaua maerekati aĩto nireẽkiti amanirekakani.

⁸Ininiã !pipẽtatapiri aũũite sãkire pisãpiretini. Apaka !pipẽtatapeno nota, kotxi kateia ãki naua Xesosi sãkire nisãpiretini xika.

Maãtatsiirauata, Teoso iokanapirena erekarí asãpiretini xika, kotxi Teoso sikataparataua amisiritiko amĩteenekini !kapani. ⁹Teoso makatxakapekarí amaerekani. Iua akiritapekaua inakitiakori aniniua !kapani. Aparĩka kona txĩkitakari Teoso makakatxakiniri amaerekani. Imakatxakari amaerekani, kotxi inirekarí ikara atoko ikamini. Imakatxakari amaerekani, kotxi inirekarí ikinipoko erekarí isikiniua. Itixi kamiko apisapanika Kristo Xesosi sikari ikara erekarí atemoni. Iuasaaki imakatxakari amaerekani. Iuasaaki akiritaua inakitiakori aniniua !kapani. ¹⁰Uatxa Teoso oerekari ikara erekarí kãkitimoni, kotxi amaerekani makatxakakari Xesosi Kristo apokapeka !korapokoriti. Iua xipokapekarí ipĩkitxi. Isãpiretari Teoso iokanapirena erekarí, kãkiti mapinakani !kapani, Teosokata ãtipirika auini !kapani.

¹¹Teoso mereẽno nota ikara iokanapirenatxi sãpiretakari nininiua tĩkane. Imereẽno iua iokanatakiti kãkitimoni nininiua. Imereẽno Xoteo minakaniua oereẽkarí nininiua. ¹²Teoso iokanapirena erekarí nisãpiretini xika, natatsiirauata. Iuaritika !nipẽtauata, kotxi nimarotari Xesosi. Iteene nauikari iua sãkire. Nimarotapitikari iua nĩkatinino nota. Inĩkatiniritikano ikanapiriãko. ¹³Teoso sãkire pitemoni noerekakiti iaõka poerekako apanakini, kotxi noerekakiti atão. Pauikapikariko Kristo Xesosi sãkire. Katiraõki pitxako, kotxi Xesosi nakiti atxaua. ¹⁴Pimarotari Teoso iokanapirena erekarí. !Pauiritapiri ikoketiko. Teoso sikari ikara iokanapirena pitemoni, apanakini pisãpiretini !kapani. Erekarí Matamatakoti auaĩtotaua. Iua posotiireẽ pinĩkatariko Teoso iokanapirena pitemoni isikakiti.

¹⁵Pimarotari kãkiti Xesosi sãkire auiãkani Ásia tixine auakani takanapano nota. Aĩtariakori Pixero inakori, Emoxeni inakori pakini takanapano nota. ¹⁶Onesĩporo inakori !itakanapano. Ninirekarí Teoso tiritinina iua aapoko auakani. Itokata ikamapoxokonitano nota. !Ipẽtatano kateia ãki nauakasaaki.

¹⁷Homa sitatxiti apokasaaki, initaãpotano nota, eereka apokano.

¹⁸Pite imarotari iua iteene moianatinino nota, Épeso sitatxiti nauakasaaki. Ininiã nitxari Apiananiri: “Ninirekarí piamonĩkiniri Onesĩporo itixi xipokini õti manapisaaki.”

Misirikaretxi Miteenekiko

2 ¹Pitepekana namarite Tximótxio, kataparaxinire pitxako. Kristo Xesosi nakitiakori atxaua, ininiã iua sikari ikinipoko erekari atemoni. Ikara erekari sikataparatarari axinire. ²Pite kenakotapekari nisãkire noerekakiti kãkitimoni. Ininiã poerekariko ikara iaõka apanakinimoni atão inakari kamakanimoni. Eereka ninoa posotari oerekiniri nisãkire noerekakiti apanakinimoni apaka.

³Sotato erekari miteenekari imisiritiko. Kristo Xesosi sotatone atoko atxaua, ininiã pimiteenekariko pimisiritiko sotato erekari miteenekiniri atoko. ⁴Sotato parĩkauatakasaaki, !ixinikaikari iparĩka mitxi ikamakiti sotato iminakanisaaki. Ixinikapikari sotato auĩte nireẽkiti ikamini, iauĩte poxokotiniri ikapani. Ikaranokara ixinikanãta.

⁵Ãtipekana nisãpiretai. Miteẽkari mitekatxi mapotõkire merepanika apoãkari apakapari imitekini ãki. Mitekatxi paniãtakari paniãtini iaõka imitekiniã, apakapari imitekini ãki.

⁶Ãtipekana nisãpiretai. Katakarereri poparĩkari nikari itakare merepanika, kotxi iteene iparĩkauata. ⁷Pixinikariko ikara nisãkire. Apiananiri kamaimaroretai ikara.

⁸Pixinikariko Teoso iokanapirena erekari nisãpiretakiti kãkitimoni. Xesosi Kristo nisãpireta ikinimanemoni. Iua ipinaka atoko, iuaĩkana auãki itxĩkitakaãka. Iua Taviini apika mekaniri. ⁹Natatsiirauata Teoso iokanapirena erekari nisãpiretini xika. Nota omanatakani iaxirikapekano kohẽtxiã, kokaniri iaxirikinina atoko, nota masikani ikapani. Teoso sãkire !iaxiriãka. Iaripireta ikini tõpati. ¹⁰Teoso mereẽpekari kãkiti, imaerekani imakatzakini ikapani. Ininiã nota miteenekari nimisiritiko Teoso iokanapirena ninoa kenakotini ikapani, imaerekanina Kristo Xesosi makatzakini ikapani, ãtipirika Teosokata auinina ikapani. Iuusaaki peerekari.

¹¹Nisãpiretaiko ia sãkiretxi atão inakari:

Xesosi Kristo ipina ate ikapani, ininiã amanirekakaniãri mitxi anireẽkiti, Xesosi nireẽkitinoka anirekiniã, ininiã aãuapika iuakata ãtipirika.

¹²Amiteenekiniãri amisiritiko Xesosi sãkire aãuikini xika, auĩtetxi atxauako iuakata. Akipatiniãri iua aimarotini, iua apaka kipatarari ate imarotini.

¹³Atxiĩti !akamari akamaenetakiti. Xesosi kamapitikari iua kamaenetakiti, kotxi iua !iposotari maerekati ikamini.

Teoso Nitiri Atão Inakari

¹⁴Ikara nisäkire pikamaxinikaretana Xesosi säkire auiäkani. Ninoa Apiananiri apisatoõ apotiitakasaakia, põtäkikanako: “!Hĩtxitakapeua maxikatiĩka kākiti säkire xika, kotxi !erekari,” pitxako ninoamoni. Kākiti kenakotiniāri hĩtxitakakiniua, ininiã linirekaikarina Xesosi säkire auikinina.

¹⁵Tximótxio, pite Teoso nitiri pitxaua, ininiã iteene papaiaõkariko isäkire iõkatsopatakori Teoso apokaerekatinii ĩkapani. Ininiã !pipētauata, kotxi atão poerekari Teoso säkire iõkatsopatakori apanakinimoni. Teoso säkire iõkatsopatakori atão inakarinoka itxa. ¹⁶Apanakini sākirauatakasaaki, isäkiretarina sākiretxi Teoso mapokaerekatakiniti. Ikara atoko !pisäkiretape. Kākiti ikara atoko inakani takanapaāpotari Teoso. ¹⁷Ninoa oerekakiti sākiretxiti karõtxi arakakari atoko itxa. Ikara atoko inakari amianari iarikaāpota. Ikara amianari iarikini atoko, ninoa oerekakiti iarikaāpota. Itxĩkitakari kākiti maerekati ikamini. Imeneo inakori, Pireto inakori pakini oerekakiti sākiretxiti ikara atoko itxa. ¹⁸Ninoa takanapapekari Teoso säkire atão inakari. Ninoa säkire: “Teoso õkitikapekana Xesosi säkire auiäkani ixinirena auãki inini ĩkapani. !Õkitikapanina iĩtona itixi xipokini õti,” itxana. Ikara ninoa säkire xika, apanakini !auikaikari Xesosi säkire.

¹⁹Aapokotxi tsota paikori inakasaaki, itsota iriko paĩtanori inakasaaki, iua aapokotxi !irika. Teoso säkire ikara aātsota atoko. Auapika. !Ixipoka. Teoso säkire txari: “Apiananiri imarotari inakitiakori.” Apaka Teoso säkire txari: “Kākiti, ‘Nota Kristo nakiti’ inakari takanapariko imaerekani.”

²⁰Ikini sereti tiĩtxi aua aapokotxi mitari āki. Aua apiata karonetakari oro kamakori, pirata kamakori pakini. Apaka aua poião ĩki aamina kamakori, kipatxi kamakori pakini. Apanakini tiĩtxi āki kaapokori takari nipokori kiiniri ĩkapani. Apanakini tiĩtxi āki itakari nipokori ikiniõtika kākiti nikini ĩkapani. ²¹Ikara tiĩtxi atoko itxa kākiti. Kākiti takanapiniāri imaerekani, tiĩtxi apiata karonetakari atoko itxa iua. Teoso nirekari iua. Imereēri iua iparĩka erekari ikamini ĩkapani. Ininiã kākiti iua atoko inakani iposope Teoso parĩka ikamini ĩkapani.

²²Ātokoripanika pinakasaakia, apanakini nirekiniāi maerekati pikamini, pimitekako, maerekati pimakamakani ĩkapani. Pinirekariko atão inakarinoka pikamini ikiniõtika. Pinirekariko

Xesosi sākire iteene pauikini. Pinirekariko iteene katiraõki pinini. !Pinirekapiri neenamtxi. Ikara atoko kākiti kaminiā, erekaxinireri. Iua akiritari Apiananiri imoianatiniri ĩkapani.

²³Tximótxio, kākiti txitakakasaakiua sākiretxi miĩkiteti mimaroreti xika, !pikamapiri ikara atoko inakari, kotxi eereka ninoa neenamauata isākirena xika. ²⁴Apiananiri nitiri atão inakari ia atoko itxako: “!Itxitari āti. Itiretari ikinimane. Koerekareri erekari itxaua. !Katimari omanākarauatini. ²⁵Õtākikanako isākire mauikakani momanākaretika.” Ikara atoko Apiananiri nitiri ininiāua, atxiiti Teoso oerekana isākire mauikakani atão inakari imarotinina ĩkapani, imaerekani itakanapinina ĩkapani. ²⁶Ininiā uaiĳkana kiĩkitepeka itxana. Teoso sikakana ninoa txikatoro Satanasi takakitiā, kotxi mitxi Satanasi maĩkana, iua nireĳkiti ikaminina ĩkapani.

Itixi Xipokini Őti Apisa

3 ¹Tximótxio, pimarotariko ia nisākire. Itixi xipokini ōti apisa pamonōkopianiriko. ²Iuasaaki kākiti ia atoko inakari: Kapotxinaniri iua. Txineiro tirketani iua. Isāpiretari iposotiire ikinimanemoni. Iuikaua. Imisākirepiretari Teoso, kākiti pakini. !Ikamari iri paniātakiti. Inoro paniātakiti apaka !ikama. Āti kamakasaakiri erekari iuamoni, !itxari: “Erekapitikari pikamakiti nota ĩkapani,” !itxari. !Inirekari Teoso. ³!Itiretari inirimane. !Ikamari ikamaenetakiti. Imisākirepiretari āti maxikatiĩka. !Iposotari erekari ikamini. Paneenamari. Omanatana erekari kamakani. ⁴Imĩkapiritari āti. Ikamakiti ikamini apisa, !ixinikari ikamakiti tĩkane. Iuaka ixinikapikaua. Isarauatininokara itireta. !Itiretari Teoso. ⁵Iua sākire: “Nauikari Teoso sākire,” txamari !auikari Teoso posotiire. !Pauikapiri kākiti ikara atoko inakari sākire. ⁶Kākiti ikara atoko inakari ianapokota sitomoni oaāpokomoni. Sito ikara atoko inakaro miĩkiteto. Maerekatnoka okama. Oĩto nireĳkiti maerekati onirekapika. Iua ianapokotapika oamoni, ininiā oa auikaāpotari iua oerekakiti sākiretxiti. ⁷Sito ikara atoko inakaro nirekari oimarotiniri oerekaretxi, txamari !oimarotari oerekaretxi atão inakari.

⁸Kitxakapirĩka Moisesi Exito tixine auakasaaki, Xani inakori, Xāpiri inakori pakini !inirekari auikinirina Moisesi sāpiretakiti. Ninoa atokokana kākiti itixi xipokini ōti apisa auakani, !inirekari atão inakari. Ixinikapikarina maerekatnoka. Teoso !inirekari kākiti ikara atoko

inakari, kotxi iua kākiti !auikari Teoso sākire. ⁹Poiāonoka kākiti auikari ikara atoko inakari sākire, kotxi imarotari mīikiteti iua. Iua atokokana kitxakapirīka apanakini imarotari Xani, Xāpiri pakini mīikiteni ininiua.

Teoso Nakitiakori Misiritiko

¹⁰Pitepekana, pimarotapitikari noereēkiti sākiretxiti. Pimarotari nikamakiti ikiniōtika. Pimarotari ninireēkiti nikamini. Pimarotari iteene nauikiniri Xesosi sākire. Pimarotari nimiteenekiniri nimisiritiko. Pimarotari nitiretiniri āti. Pimarotari !katimari nomanākarauatini. ¹¹Pimarotari nimisiritiko. Pimarotari natatsirauatini. Pimarotari nimiteenekiniri nimisiritiko Ātxiokia sitatxiti nauakasaaki, Ikónio sitatxiti apaka nauakasaaki, Arisitara sitatxiti apaka nauakasaaki. Iteene natatsirauata, iuaritika Apiananiri makatxakano ikinika nimisiritiko. ¹²Ari, ikininape kākiti nirekiniāri Kristo Xesosi nakiti ininiāua, inirekiniāri Teoso nireēkitinoka ikaminiā, atatsiitariko imisiritiko. ¹³Iusaaki maerekati kamakani maerekani, komisirienenerini maerekani, apiaāpotako. Ninoa misirienetari apanakini. Apaka apanakini misirienetana ninoa.

Teoso Sākire Iōkatsopatakori

¹⁴Pitepekana Tximótxio, pauikapikariko atāo inakari poerekiko. Ikara pauikapitika, kotxi pimarotana pite oerekakani. Pimarotari atāonoka ninoa oerekakiti. ¹⁵Pite axapitipanika pinakasaaki, pimarotari Teoso sākire iōkatsopatakori. Iua sākire iōkatsopatakori txīkitakaua kimatire anini. Isākire iōkatsopatakori oerekaua Teoso makatxakiniri amaerekani Kristo Xesosi sākire aūikasaaki. ¹⁶Teoso oerekana isākire iōkatsopatakani atāonoka iōkatsopatinina, ininiā ikinika Teoso sākire iōkatsopatakori atāonoka. Ininiā apakata Teoso sākire iōkatsopatakori oerekiniua atāo Teoso sākire aūikini iġapani. Oerekaua ikinipoko Teoso sākire iōkatsopatakori atāo inini. Isākire iōkatsopatakori ōtākikaua amaerekani atakanapini. Oerekaua atāo inakarinnoka akamini. ¹⁷Ininiā kākiti Teoso nakiti imarotiniāri Teoso sākire iōkatsopatakori, iposotari ikinika parīkatxi Teoso paniātakiti ikamini. Erekarī iparīka.

Tximótxio Ōtākikiko

4 ¹Tximótxio, nōtākikai Teoso apisatoō, Apiananiri Xesosi Kristo apisatoō apaka, kotxi āti ōti Kristo Xesosi kanapiriākasaaki,

isãpiretari ikininape kãkiti sinimoni. Isãkire auiãkani sari Teosomoni ikaikotinina ïkapani. Isãkire mauiãkani sari kãkiti misiritikomoni ikaikotinina ïkapani. Isãpiretari kãkiti auapanika inakani, kãkiti mitxi ipïkani apaka. Xesosi kanapiriã ikininape auïte ininiua ïkapani, ininiãkara nipaniãtai ia: ²Pisãpiretariko Teoso sãkire kãkitimoni. Iposope pitxako Teoso sãkire ikiniõtika pisãpiretini kãkitimoni, piïto tapara auakasaaki, pisãpakasaaki apaka. Põtãkikanako imaerekani itakanapinina, erekarinoka ikaminina ïkapani. Pisikataparaxiniretanako, Teoso sãkire poerekinina. Pisãkirauatakasaaki, !katimari pomanãkaruatini. ³ãTi õti apokako. Iuasaaki kãkiti !inirekaikari oerekaretxi atão inakari ikenakotinina. Ninoaka nireẽkitinoka inirekana, ininiã apotiããpotana ninoakata koerekarerini ninoa potxitakiti oerekaretxiti oereẽkani. ⁴!Inirekaikarina atão inakari. Auikarina sãkiretxi atão minakati.

⁵Pitepekana, ikinika pikamako piïkiteritika. Pimïteenekariko pimisiritiko. Pikamariko piparïka Teoso iokanapirena erekari pisãpiretini kãkitimoni ninoa auikiniri ïkapani. Teoso nitiri pitxaua, ininiã pikamariko ikinika piparïka Teoso paniãtakiti.

⁶Notapekana, nipinini õti manapi apokaãpotape. Nipinako Teoso ïkapani. Pirãtxi Teoso ïkapani okiko atokokana, notaka sikauako Teosomoni. Niketo apokapeka itixi nosipikini ïkapani. ⁷Neenamtxi erekari inakari nikamapeka Satanasi ninaiatini. Miteẽkari mitekatxi mapotõkire apokini atokokana, nota apokapeka niparïka mapotõkire. !Nitakanapari Xesosi sãkire nauikini. ⁸Uatxa Teoso nïkatari niparïka ïki nota kãiatakiti napakapini ïkapani. Miteẽkari merepanika mitekatxi mapotõkire apokakari apakapari imitekini ïki. Apakapari saporïeta. Iua atokokana Apiananiri sikanoko niparïka ïki, kotxi nota nirekari atão inakaranoka nikamini. Apiananiri imarotari atão, ininiã imarotari parïkatxi ïki apakapakani. Imarotari imisiritiko apakapakani apaka. Niparïka ïki isikano notamoni uai ikanapiriini õtisaaki. Na notananini apakapari. Isikari parïkatxi ïki ikininapemoni ikanapiriini nirekakanimoni.

Paoro Iõkatsopatakiti Mapotõkire

⁹Piposotiniã, katima pitxako notamoni papokini. ¹⁰Témasi inakori asikapekano, kotxi itiretari Xesosi sãkire mauiãkani nireẽkiti. Isipeka Tesarónika sitatxitimoni. Kiresẽtxi inakori sari Karásia tixinimoni iparïkauatini ïkapani. Txito inakori sari Taomásia

tixinimoni iparĩkauatini ĩkapani. ¹¹Arókasinokara moianatano uatxa. Pakiritariko Marko. Piminari iua pitekata. Iua posotari imiparĩkatinino, Xesosi sãkire nisãpiretakasaaki kãkitimoni.

¹²Txíkiko inakori nipaniãta Épeso sitatxitimoni isini. ¹³Tóatxi sitatxiti nauakasaaki, nitakanapari nimãka ãti nimãka nopini nitakakiti. Nitakanapari iua nimãka Kapo inakorikata. Pite uai ĩkasaaki piminariko. Apaka piminariko atatsopari ninakiti aãtsopa kamakori. Apia ninirekari pimininiri atatsopari ninakiti aamata kamakori.

¹⁴Arexãtri inakori iteene misiritano. Iua Arexãtri tiitxi kamakari iua. Tiitxi metao kamakorinoka ikama. Iua misiritinino xika, Teoso misiritari iua. ¹⁵Erepaniko iua. Pamonõkoniri iua, kotxi iua iteene misãkirepiretari aõereẽkiti sãkiretxiti.

¹⁶Merepitipanika nota apoĩtakani anikasaakino auĩtetxiakori apisatoõ, nisãkire ikenakotinina ĩkapani, na ãti nimoianari kaikota notakata iusaaki. Ikinimane nimoianariakori takanapano, iuaritika na ninirekari Teoso misiritinina itakanapinino xika. ¹⁷Ninoa takanapano, iuaritika Apiananiri kaikota notakata. Iua sikataparaxiniretano, ininiã niposotari Teoso iokanapirena ikinika nisãpiretinina ninoa Xoteo minakaniua ikenakotinirina ĩkapani. Ininiã ãkiti namaã takote nauakasaaki, Teoso tokapakeẽtano nota. ¹⁸Nimarotapitikari Apiananiri tokapakeẽtapanikano nota ikini sereti maerekati auakasaaki. Iua nĩkatano. Anikano itixinemoni, iua auĩtetxi ininiãtaãua. Ikinimane ãtipirika sãpiretari iua: “Peerekai. Pitenokara erekari.” Ameẽ.

¹⁹Pisãpiretana Pirisira inakoro, Ákira inakori pakini nixinikamanapitana. Apaka Onesíporo inakori aapoko auakani nixinikamanapita. ²⁰Erásito inakori kaikota Korĩto sitatxiti. Tópimo inakori nitakanapa Mireto sitatxitiã, kotxi iua amianata.

²¹Tximótxio, piposotiniã, mitaã apisapanika papokako uaimoni. Eoporo inakori, Porotẽtxi inakori, Arino inakori, Karáotxia inakori pakini ikini aĩtariakorikata iokanapireta pitemoni ixinikamanapitiniina.

²²Apiananiri Xesosi Kristo ãtipirika kaikota pitekata pãkixinireẽ. Ikinipoko erekari isika pitemoni. Ameẽ.

TXITO

Paoro Iokanatsopatakiti Txitomoni

1 ¹Nota Paoro. Teoso nitiri amotakori nitxaua. Xesosi Kristo iokanatakiti nitxaua. Iua iokanatano kăkitimoni Teoso mereėkini auiaċkiti săkiretxiti nisăpiretini ĩkapani. Iokanatano kăkitimoni atăo inakari imarotinina ĩkapani. Atăo inakari imarotiko oerekaua Teoso nireėkiti akamini ĩkapani. ²Aăuikari aăuapiniika anini Teosokata, kotxi kitxakapirĳka itixi kamiko apisa Teoso kamaenetari ikara. Ininiă apokapitikako, kotxi atăonoka iua săkire. Iposotari atăo minakati isăpiretini. ³Iketotiniri manapi oerekari isăkire. Isăkire săpiretakani săpiretari isăkire. Ininiă Teoso săkire notamoni isikakiti nisăpiretai, kotxi Teoso amaerekani makatxakakari paniătano nota nisăpiretiniri isăkire.

⁴Niokanatsopata pite Txitomoni. Namarite atăo inakari atoko pitxaua, kotxi pite auikari Xesosi săkire nota auikiniri atokotxikana. Aĳri Teoso, aăuĳte Xesosi Kristo amaerekani makatxakakari pakini, sikari ikinipoko erekari pitemoni. Ninoa iamoniĳkai. Ikamaerekaxiniretaina.

Kôtăkikarerini

⁵Nitakanapai pite Kreta pokomiriĳti, kotxi aparĳka iuaătaă kona xipokapanika, ininiă ninirekari pite kaminiri ikara parĳkatxi. Pimereėna kôtăkikarerini ikini sitatxitiă Teoso săkire auiaċkani ôtăkikakani tĳkane. Pimereėna mitxi nisăpiretakiti iaôka. ⁶Ia atoko inakari kăkiti pimereė kôtăkikarerini ĩkapani: Iua kamari erekari, ininiă maerekati auakasaaki, kona iua xikani maerekati apoka. Ătonokara ĳtanoro aua. Imiakori auikari Xesosi săkire. Ninoa Ileenamauata. Ikamarina iri paniătakiti iaôka.

⁷Teoso sikari iparĩka kõtākikarerimoni ikamini ĩkapani, ininiã kõtākikareri kamari erekarinoka. Maerekati auakasaaki, kona iua xikani maerekati apoka. !Iuikaua. !Katimari omanãkarauatini. !Ipoãta. Kona kaneenamari. !Itiretaro txineiro. ⁸Kõtākikareri atão inakari potxitari apakapiniri kãkiti iua aapoko ãki. Ipotxitari kãkiti erekari kamakani. !Katima omanãkarauatini. Erekarinoka ikama. !Ikamari maerekati. Erekarim arotakiti !itakanapari ikamini. ⁹Kõtākikareri atão inakari oerekaãkapeka Teoso sãkire. Imarotari Teoso kaminiri isãkire iaõka, ininiã iteene inĩkatari Teoso sãkire. !Imamakari Teoso sãkire. Ininiãkara imarotari õtãkikiniri apanakini. Iteene imarotari Teoso sãkire, ininiã imarotari oerekiniri apanakini Teoso sãkire manirekakani, Teoso sãkire auikinina ĩkapani.

Erepaniko, Atão Minakati Oerekakani

¹⁰Kaiãopokori kãkiti kona nirekari Teoso nireẽkiti ikaminina. Maxikatiĩka isãkirauatapika. Kamisirienenerini ninoã. Ikara atoko inakani nirekari Teoso takaõtxikare Xoteo minakaniua ĩtoã auini. ¹¹Matxĩkitakari ninoã iotokakiniri atão minakati isãpiretinina, kotxi kãkiti aapoko ãki auakani naiatakakaua ninoã oerekakiti sãkiretxiti xika. !Apakata ninoã oerekakiti sãkiretxiti. Iuaritika ninoã oerekari atão minakati, txineiro apakapinina ĩkapani. ¹²Ninoã atokirini kitxakapirĩka, koerekareri, uai Kreta pokomiriĩti auakarini, txari: “Kreta auakani ãtipirika misirienetari kãkiti. Maerekati kamakani itxauana. Kaneenamari ĩtopa auakari atoko ikamana. Iarinouatana. Paixonina,” itxa iua.

¹³Isãpiretakiti atãopitikara. Ininiã pitaparaxinireritika pipinitana ninoã imasãpiretakanirina ikara atão minakati, Xesosi sãkire atão auikinina ĩkapani. ¹⁴Ininiã pisãpiretana: “!Himaãkatapiriko Xoteoakori kiomaneakorini sãkire atão minakati. !Himaãkatapena atão inakari manirekaãkani paniãtakiti.” ¹⁵Kãkiti Teoso kamaerekatakiti, ikamakiti erekari. Ikinipoko ikamakiti erekari, kotxi Teoso makatxakapekari imaerekani. Kãkiti imaerekani auapanika inakari, Teoso sãkire iaõka makamakati, ikinipoko ikamakiti aua imaerekani. Imaerekani txikotari ixinikakiti. Imaerekani txikotari iua ãkixinire, ininiã ãkixinire !õtãkikari iua maerekati imakamakani ĩkapani. ¹⁶Ninoã txa: “Ate imarotari Teoso,” txamari ikamarina Teoso manirekakiniti, ininiã !imarotarina Teoso. !Inirekarina Teoso. Arakakani atoko itxana, maerekati ikamakitina xika. !Ikamarina Teoso nireẽkiti, ininiã !iposotarina erekari ikaminina.

Txito Õtākikiko

2 ¹Ininiã poerekariko ikinika atão inakari Teoso oerekiko sãkiretxiti.

Kiki Aneẽkani Õtākikiko

²Ia atoko põtākikana kiki aneẽkani: “Hĩxinikariko hĩkamakiti tĩkane hĩkaminiri apisapanika. Erekarĩ hĩkamako apanakini paxitiniĩ ĩkapani. Kona hĩkamapiri hiĩto nireẽkiti. Iteene himarotariko hãuiãkiti. Iteene hĩtiraõkiuatako. Katima omanãkarauataka !hĩtxape.” Ikara atoko põtākikana kiki aneẽkani.

Sito Aneẽkani Õtākikiko

³Ia atoko põtākikana sito aneẽkani: “Hĩkamariko Teoso pĩkakani kamakiti atoko. Maxikatiĩka !hãpoĩtapiri ãti. Kona iteene hiãtapiri iãriã kapoãro. Erekarinoka hõerekako.” Ikara atoko põtākikana ninoa. ⁴Apaka põtākikana sito aneẽkani õtākikinina ãtokoroakoro ia atoko: “Hĩtiretanako hĩtaniri, hamariteakori pakini. ⁵Kona hĩkĩpitapiri hiĩto paniãtakiti. Erekarinanira hĩkamako. Hĩkamariko hĩparĩka haãpoko ãki. Erekarĩ hĩkamako apanakini ĩkapani. Hĩtaniri nireẽkiti hĩkamako, ininiã iuasaaki Teoso sãkire mauĩãkani !imisãkirepiretari Teoso sãkire.” Ikara atoko sito aneẽkani oerekanako ãtokoroakoro.

Ãtokoriakori Õtākikiko

⁶Ininiã iua atokokana põtākikana ãtokoriakori ia atoko: “!Apakata hĩkaminiri hiĩto nireẽkiti.”

Txito Õtākikiko

⁷Txito, ikini pikamakiti pikamako kãkiti erekarĩ kamiko imarotini ĩkapani. Poerekarauatakasaaki, poerekari kãkiti pitiretiniri atão inakari sãkiretxitinoka. Poerekanako Teoso sãkirenoka apiari inini. Poerekarauatakasaaki, poerekariko kãkiti pimakoketakaniri atão minakati pisãkirekata. ⁸Poerekariko atão inakarinoka, ininiã !auari papoĩtiko, kotxi !pikerokari pisãkire. Ikara atoko ininiã, pimokaiakarini pẽtauata, kotxi !ĩposotarina imisãkirepiretinii.

Nitiritxi Amotakoni Õtākikiko

⁹Ia atoko poerekanako nitiritxi amotakoni: “Hĩkĩpitariko hĩpatrãote sãkire. Hĩkamariko hĩpatrãote apokaerekatakitinoka.

Kapakapaenere !hĩtxape. ¹⁰!Hiitirĩkapiri hĩpatrãote tii. Hõerekariko hĩpatrãote pisãkire atão inini. Ininiã hĩpatrãote nirekari imarotininirina Teoso oerekiko, amaerekani makatxakakari oerekiko.”

Ikinipoko Erekari Teoso Sikakiti

¹¹Ikinimanemoni Teoso oerekapekari erekari isikakiti kãkiti maerekani imaktxakini. ¹²Teoso sikakiti erekari oereka atakanapiniri Teoso manirekakiniti. Teoso sikakiti erekari oereka amanirekakaniri ĩkorapokoriti auakani ĩto nireẽkiti. Teoso sikakiti erekari oereka aĩto paniãtakiti atakanapini, atão inakaranoka akamini, Teoso nireẽkiti akamini ĩkorapokoriti aũuakasaaki. ¹³Ĩkorapokoriti aũuakasaaki, aiãtapari poxokonitxi õti Apiananiri aTeosone apokini õti. Iuasaaki Xesosi Kristo, amaerekani makatxakakari, motika atemoni. ¹⁴Iuaka sikaua Teosomoni ate ĩkapani ipĩkasaaki. Iuasaaki iĩkitxitari Teoso, ininiã Teoso makatxakaua ikinika maerekanitxi sauaki. Ikara atoko ininiã, ikamaerekataua ate. Ininiã itxĩkitakaua inakitiakori aniniua, ininiã anirekari erekari akamini.

¹⁵Auĩtetxi pininiua atoko pipaniãtariko kãkiti kĩpitiniri ikara nisãpiretakiti. Põtãkikana nisãkire makĩpitakani. Kona pauiritapiri kãkiti sãpiretiniri pisãkire atão minakati inini.

Teoso Nireẽkiti Kamiko

3 ¹Txito, ia atoko poerekariko kãkiti: “Hĩpaxitariko ĩkorapokoriti auĩtetxiakori paniãtakiti, poiãori auĩtetxiakori paniãtakiti apaka. Iposope hĩtxako ikinika erekari hĩkamini. ²Kona himisãkirepiretapiri apanakini. !Hineenamauatape. Merepanika hĩxinikariko apanakini, eereka hĩteka hĩxinika. Hõerekariko kãkiti, hĩxinireẽ hinirekiniri erekari hĩkamini ikinimanemoni.” Ikara atoko poerekana.

³Teoso aimarotini apisapanika miĩkiteni atxaua. Kona akĩpitari kãkiti sãkire, Teoso sãkire apaka. Iuasaaki ate misirienetaãka. Iuasaaki akamari aĩto nireẽkitinoka. Ikini sereti maerekati akama apoxokoniuatini ĩkapani. Iuasaaki ikiniõtika axinikari maerekati akamini. !Apakata akamakiti. Kaxikororini atxaua iuasaaki. Ate omanataãka. Apaka ate omanatari apanakini iuasaaki.

⁴Ininiã eereka Teoso tiraõki, amaerekani makatxakakari tiraõki, iua amonĩkare, apoka atemoni. ⁵Ateka parĩka erekari !imaktxakari amaerekani. Iua amonĩkarenokara makatxakari amaerekani. Iuasaaki na atão akama, iuaritika imaktxakari amaerekani, kotxi

itiretaua. Iuasaaki iua arokari aãkixinire. Itxĩkitakaua ate aponaniini iuaĩkana. Iuasaaki Erekarí Matamatakoti kamarí ikinika amanerí axinireẽ. ⁶Teoso iokanatarí Erekarí Matamatakoti kaposotiirerí atemoni, kotxi Xesosi Kristo, amaerekani makatxakakari, ipina ate ĩkapani. ⁷Iua sikari ikinipoko erekari atemoni, ininiã ikamaerekataua. Ininiã itxĩkitakaua Teoso anaakori aniniua, ininiã aãpakapariko ipotetakiti ate ĩkapani. Iua atoko ininiã, aiãtapari ãtipirika Teosokata aãuini ĩkapani. ⁸Atãopitikara ia nisãpiretakiti.

Ininiã ninirekarí ãtipirika pisãpiretinirí ikinika nisãpiretakiti Teoso sãkire auiãkanimoni. Ikara atoko Teoso auiãkani itaparaxinireritika kamariko erekari apanakini ĩkapani. Kona maxikatiĩka ikamarina erekari. Teoso atão ĩkitxitariko kãkiti. Ikara atoko kãkiti kaminiã, ininiã erekari ikinimane ĩkapani.

⁹Kona pimaãkatapirí miĩkiteti sãkire. !Hĩtaparakienatakapeua kitxakapirĩkarini uãka xika. Kona himaãkatapenako kãkiti kiomãtxiakori oerekakiti xika tsoatakani. Ikara sãkiretxiti !itxĩkitakai erekari hininiua. !Itxa ikara sãkiretxiti.

¹⁰Kãkiti oerekiniãri atão minakati Teoso manirekakiniti, põtãkikari iua ipikata. Iposo atoko !pimaãkataikari. ¹¹Ikara atoko inakari atão iĩkite !auari. Maerekati ikama. Ikamakiti oerekari apanakini, maerekati kamakari ininiua. Iuaka imaerekani xika imisiritiko apokako.

Paoro Sãpiretakiti Mapotõkire

¹²Niokanatarí Atemasi inakori, atxiĩti Txĩkiko inakori apaka pitemoni. Ninoa apokasaaki, paiamata pisini ĩkapani, katimari notamoni Nikõporí sitatxitiã hãpokini ĩkapani. Ninirekarí ia mitaãti nikaikotini iuaã.

¹³Pimoianatarí Sena inakori, Aporo inakori pakini. Auĩtetxiakori paniãtakiti imarotakari iua Sena. Pimoianatanako ninoa aiamatini. Iamonitakitina pisikanako. ¹⁴Aĩtariakori Xesosi sãkire auiãkani apaiãõkariko erekari ikaminina, kãkiti minakati mauakiniti imoianatinina ĩkapani. Makamaretika hinini !apakata.

¹⁵Notakata auakani xinikapikai pite. Pisãpiretanako ate tirketakani ereẽ Xesosi sãkire auiãkani nixinikamanapitana ninoa.

Ikinika erekari Teoso sikai hĩte hĩkinika. Ikara atoko niõkatsopata pitemoni. Ameẽ.

PIREMÕ

Paoro Iokanatsopatakiti Piremõmoni

¹Nota Paoro. Kateia āki naua, Kristo Xesosi sākire nauikini xika. Nota, aītari Tximótxiokata aiokanatsopata pitemoni Piremõmoni. Ate iteene tiretai pite. Atekata parīkauatakari pitxaua. ²Aiokanapireta Xesosi sākire auiākanimoni, paapoko apotiitakanimoni. Aiokanapireta aītaro Ápiamoni, Akipo pakinimoni. Iua Akipo Xesosi sotatone itxaua, ate Xesosi sotatone atokotxikana.

³Aīri Teoso, Xesosi Kristo Apiananiri pakini sikai ikinipoko erekari. Ikamaerekaxiniretaina.

Piremõ Tiraōkiuatini Pirena

⁴Nitari Piremõ, Teoso nimisākiretakasaaki, ātipirika nisākirauata pite īkapani. Nisāpiretari Teoso ereka inini, kotxi iua kamaerekatai pite. ⁵Ikara atoko itxa nisākire, kotxi nikenakopiretari iteene pauikiniri Apiananiri Xesosi sākire. Nikenakopiretari ikinimane kākiti Teoso nakitiakori pitiretini. ⁶Nimisākiretari Teoso pite īkapani, kotxi ninirekari pisāpiretiniri pauīākiti sākirextiti ikiniōtika apanakinimoni, ininiākara pimarotari ikini sereti erekari Teoso siākiti Kristo nakitiakorimoni. ⁷Ate poxokoniua, kotxi pite tiretana kākiti Teoso nakitiakori. Pitiraōki iteene sikataparaxiniretaua ate. Pite aītari kamapoxokonitana Teoso nakitiakori ākixinire.

Paoro Amanaãkiti Säkiretxiti

⁸Kristo sikaposotiiretano, ininiã nitapararitika niposotapitikari nipaniãtini atão inakari pikamini. ⁹Iuaritika nitapararitika na nipaniãtai atão inakari pikamini. Nõtãkikai Kristo tiraõkiã pikaminiri atão inakari. Nota Paoro kiomãtxipekano. Kateia ãki nauanãta, Kristo Xesosi sãkire nauikini xika. Notakara õtãkikai pite atão pikamini. ¹⁰Nota amanaãi pinitiri Onésimo inakori piamonĩkini ĩkapani. Namarite atoko inakari iua, kotxi iua kĩpitari nisãkire uai kateia ãki nauakasaaki. Uatxa iua auikari Xesosi sãkire. ¹¹Nimarotari iuãka poparĩkari uãka itxaua. Mitxi !iparĩkauata, pitekata auakasaaki. Paiariniri. Uatxa poparĩkari itxapekua iuãka atokokana. Uatxa iparĩkauatapitikako pite ĩkapani, nota ĩkapani iparĩkauatini atokokana.

¹²Niokanatariko Onésimo, ikanapiriini pitemoni. Ininiã papakapariko iua. Nitiretari iua nota niĩto nitiretini atokokana. ¹³Ninirekamari notakata uai ikaikotini, nota imoianatini ĩkapani, kotxi pite kona posotari pimoianatinino uai kateia ãki nauakasaaki, kotxi pite auini maioakari. Nota uai aua Teoso iokanapirena erekari nisãpiretini xika. ¹⁴Ninirekamari Onésimo uai, txamari !ninirekari nikaminiri pite mauritakiniti. !Ninirekari nitapararitika nipaniãtini pauiritiniri Onésimo notakata ikaikotini. Pite nirekiniãri, imoianatano.

¹⁵Akokaxiti Onésimo miteka. Mapakanani itakanapai. Atxiĩti Teoso auiritari poiãoka itakanapini, ãtipirika pitekata iuaĩkana ikaikotini ĩkapani. ¹⁶Iua pinitiri piamotakiti itxapanikaua. Uatxa apiaerekata iua. Pitari pitiretakiti itxapekua, kotxi iua auikari Kristo sãkire. Iteene nota tiretari iua. Pite apia tiretariko iua, kotxi iua pinitiri itxaua. Apaka iua pitari itxaua, kotxi Apiananiri nakiti hĩtxaua.

¹⁷Nota pimoianari nininiãua, nota papakapini atokokana pitxariko papakapiniri iua. ¹⁸Akokaxiti maerekati ikaminiã, ĩtiriuatiniã, pisãpiretano. Nota ĩkitxitaiko. ¹⁹Nota Paoro, uatxa niuakoã niõkatsopataria sãkiretxiti. Notakarako ĩkitxitai pite. Pite imarotari pite xinire auãki inini, kotxi notara akokaxiti nisãpiretai Xesosi sãkire pauikini ĩkapani. Ininiã atxiĩti erekape pite ĩkitxitinino nota? ²⁰Ininiãkara nitari, pikaminano ninirekakiti, kotxi Apiananiri nakitiakori atxaua. Pikamapoxokonitariko nãkixinire, kotxi Kristo nakitiakori atxaua. ²¹Niõkatsopataria pite ĩkapani, kotxi nimarotapitikari pikaminiri namanaãkiti. Ari, nimarotari apiata pikaminano.

²²Apikomoni nitxai. Poeretari ereẽ nimakiniãtaã ìkapani. Hìte misãkiretapekari Teoso kateia nitakanapini ìkapani, ininiã nimarotari Teoso auiritano iuaìkana nikanapiriini hìtemoni.

Itakapiretanapini Pirena

²³Epápara inakori notakata kateia ãki aua, kotxi iua parìkauata Kristo Xesosi ìkapani. Iua xinikamanapitai hìte.

²⁴Markoma, Arisitakoma, Témasima, Arókasima pakini notakata parìkauatakani, ninoa apaka xinikamanapitai hìte.

²⁵Aãuìte Xesosi Kristo sikari ikinipoko erekari hãkixiniremoni. Ameẽ.

EPIREO

Teoso Ākiri Apiatini Pirena

1 ¹Teoso kitxakapirīka sãpiretari isãkire kaiãokataikani, isãkire sãpiretakanimoni. Ininiã ninoa sãpiretana aãtokiriakorini Teoso sãpiretakiti. Kiriãpa Teoso misãkiretana ninoa? Kaiãopokoriã imisãkiretana ninoa: Itaponeëna, ixinireëna, isãkire iõkatsopatakoriã, initiri itixine auakari sãkireë, txaãpota imisãkiretinina ninoa.

²Uatxa ìkorasaaki, Teoso misãkiretaua iua ãkiri sãkireë. Teoso mereëri iua ãkiri ikinipoko apakapini ìkapani. Teoso ãkiri kamari ikinipoko. Ikamari itixi, ikinipoko iaxiti apiko nopinixiti auakari apaka. ³Iua iotximere Teoso iotximeretxikana. Teosotxikana iua. Kaposotiireri iua, kotxi isãkireënoka imaikari imakinika auini ìkapani. Iuanokara makatxakari amaerekani. Amaerekani imakatxakasaaki, iuaaaki iitopãka ikinimane auite Teoso kikomoni itixineë.

Teoso Ākiri Apiata, Initiriakori Poiãoka

⁴Ininiã Teoso ãkiri iteene apiaerekata. Apiananiri iua. Teoso nitiriakori iaxitikini poiãorini. Teoso mereëri iuãka apiari. Ninoa uãka poiãorini itxauana.

⁵Teoso !isãpiretari initiriakori ia isãkire kitxakapirīkari:
Pite nota ãkiri pitxaua. Uatxa pite iri nitxaua nota, litxa initiriakorimoni.

Apaka Teoso !isãpiretana ninoa ia isãkire kitxakapirīkari:
Nota iua iri nitxauako. Iua nota amarite itxauako, litxa initiriakori itixine auakanimoni.

⁶Ātipekana. Teoso mīkasaakiri iua ãkiri imatonõkari ìkorapokoritimoni, iponaniini ìkapani, iuaaaki Teoso txari initiriakori:

Ninitiriakori, hīkapotoreēkauako iua apisatoō. Hīteosonetariko iua, itxa. Ikara atoko Teoso paniātari initiriakori.

⁷Teoso sākire iōkatsopatakori, initiriakori pirena txari:

Itxīkitakana initiriakori matamatakoni ininiuana, itima atoko ininiuana. Xamina tirinakari atoko itxauana ninoa, kotxi kaposotiirerini ninoa,

itxa. ⁸Iua amaritemoni Teoso txari:

Teoso pitxaua. !Ixipoka auītetxi pininiāua. Ātipirika pite atāo mīkiiikari pite auītetakani.

⁹Pite taretari atāo inakari. Pomanatari maerekati. Ikara atoko ininiā, nota piTeosone mereēi pite apiari pininiua īkapani, pimoianariakori poiāorini ininiuana īkapani, kotxi apiata nikamapoxokonitai pite. Iitxiā nimereēkiti nopini nitakini atokokana, nitakari poxokonitxi pite nopini. Nimereēi pite auītetxi pininiāua.

Ikara atoko itxa Teoso kitxakapirīka. ¹⁰Iuaīkana Teoso sākire iōkatsopatakori txari:

Apiananiri, merepitipanika pite kamari itixi. Apaka pikamari iaxiti piuakoā.

¹¹Īkorapokoriti, iaxiti pakini xipokapitikako. Iuaritika pite auapanika. Mākatxi kitxakariāpotakari atoko itxa ikinika.

¹²Mākatxi atoko piapirikariko iaxiti, itixi pakini. Ininiā ipinimoni itxako. Iuaritika pite mitxi atoko pitxapikako. !Pixipoka.

Itxa Teoso sākire.

¹³Teoso txari imi:

Nota kikomoni piitopākiniritika nixipokariko pimokaiakariakori. Nikamariko ninoa pikiti pitakiniātaā atoko ininiuana.

Ikara atoko !itxari initiriakori iaxitikini.

¹⁴Ininiā kipa Teoso nitiriakori iaxitikini? Ninoa erekari matamatakoni. Iparīkauatana Teoso īkapani. Teoso iokanatana ninoa imoianatinirina kākiti iua sākire auīākani, kotxi Teoso maktxakari ninoa kākiti maerekani.

Erepaniko

2 ¹Ininiā iteene mamixinikari ikinika atāo sākiretxiti mitxi akenakotakiti. Amakamakaniāri ikara atoko, kanaua tiokaāpotakari atoko atxaua. Ininiā iuasaaki !aimarotaikari atāo. Maxinikari atāo inakari. ²Kitxakapirīka Teoso nitiriakori

iaxitikini sãpiretari atão inakari ate apiko atokiriakorimoni. Kãkiti makamakaniãari ninoa paniãtakiti, ininiã ninoa kãkiti apakapari Teoso misirikare. Atão ninoa apakapiniri imisiritikona. ³Ininiã uatxa amitekini lauari, amanirekakaniãari amaerekani makatxakiko. Peerekari Teoso makatxakiniri kãkiti maerekani. Merepitipanika Apiananiri sãpiretari ikara maerekanitxi makatxakiko. Iua sãkire kenakotakani apaka sãpiretaua ate iua sãpiretakiti atoktxikana. ⁴Teoso apaka oerekaua ninoa sãkire atão inini, kotxi oerekari itakaõtxikare. Ikamari kãkiti mimarotakiniti. Ikamari ikini sereti posotiiiretxi. Erekari Matamatakoti siãkiti isika inirekakinimoni. Kãkiti isika inirekaka iaõka. Ikara atoko Teoso oerekaua ninoa sãkire atão inini.

Xesosi Kãkiti Atoko Itxa

⁵Teoso litxĩkitakana initiriakori iaxitikini itixi amaneriã auakani auĩteakori ininiuana. Iua itixi amaneri ãkari asãpiretai hĩte.

⁶Kitxakapirĩka Teoso sãkire iõkatsopatakori Xikari oitoãtaã txari:

Kipa kãkiti? Kinirepa pite xinikana ninoa? Ate minakati.

Kinirepa aĩtari iaxitikiri maãkatatari kãkiti?

⁷Mapakanani pikamari kãkiti itari iaxitikiri poiãori ininiãua.

Iuasaaki pinitiriakori iaxitikini apiatakani txaua. Eereka pitxĩkitakari iua auĩtetxi ininiuua. Pitxĩkitakari iua kaiotximereri ininiuua. Pitxĩkitakari ikinimane paxitiniri iua. Pitxĩkitakari iua ikinipoko auĩte ininiuua.

⁸Pitxĩkitakari ikinimane kaminiri iua paniãtakiti. !Auari ãtika iua paniãtakiti makamakati.

Ikara atoko Teoso sãpiretaua ate itxĩkitakiniri ikinipoko auĩtetiniri iua. !Auari ãtika iua maauĩtetakati. Txamari kona ate atamatapanikari iua ikinipoko auĩte ininiuua. ⁹Iuapitikara aãtamatakiti Xesosi. Mapakananinoka Teoso txĩkitakari iua poiãori ininiuua. Iuasaaki Teoso nitiriakori iaxitikini apiata. Teoso txĩkitakari iua poiãori ininiuua, kotxi iuasaaki Xesosi atatsiirauata. Iuasaaki ipina. Uatxa Teoso txĩkitakari iua auĩtetxi ininiuua. Itxĩkitakari iua kaiotximereri ininiuua. Itxĩkitakari ikinimane paxitiniri iua. Teoso kamari ikara atoko inakari, kotxi Xesosi ipina kãkiti mapinakani ãkapani. Iuasaaki Teoso oerekari ikinipoko erekari isikini kãkitimoni.

¹⁰Ikinika Teoso nakiti. Ikinika iua kamakiti. Apakata iua txĩkitakiniri kãkiti maerekani makatxakakari atatsiirauatini, kotxi iuasaaki iposope kãkiti maerekani makatxakiko, kotxi iuasaaki

Xesosi kamari ikinipoko iri paniātakiti. Ininiākara Teoso anikari iua anaakori iotximere auiniātaā. Kaiāori ninoa. ¹¹Kākiti kamaerekatakari iritxikana iua kamaerekatakini iri. Ikara atoko ininiā, Xesosi !ipētataru iua itariakori akiritiniua ate. ¹²Itxari Teosomoni:

Nisāpiretariko piuāka nitariakorimoni. Pitemoni
apotiitakaniua sauaki nixikaretari ereka pinini.

¹³Iuaīkana kitxakapirīka Teoso sākire iōkatsopatakori txari:

Nauikariko Teoso sākire.

Iuaīkana Xesosi txari Teoso:

Uai nota aua pamariteakorikata. Pite sikana ninoa notamoni.
itxa.

¹⁴Kaītori Teoso anaakori. Ninoa aua ixini, iarēka pakini. Ininiā kaītopekari Xesosi ninoa atokokana. Ininiā ipīkasaaki ixipokari ipīkitxi posotiire auakiti. Satanasi inakori iua. ¹⁵Ikara atoko inakasaaki, isikakari kākiti ipīkitxi pīkakani. Mītxi ninoa iaxirikakoni atoko itxana. ¹⁶Aimarotari, iusaaki limoianatana initiriakori iaxitikini. Iusaaki imoianatana Apraō apika mekaniriakori. ¹⁷Ikara atoko ininiā, Xesosi txīkitakaāka itariakori atokokana ininiua, ininiā iposotari sasetotxi auīte apiatakari ininiua kākiti īkapani. Iparīkauatakasaaki Teoso īkapani, ikamari ikinipoko ikamaenetakiti. Maerekati kamakani kākiti, iuaritika iamoniakari kākiti. Kākiti itxapekaua Xesosi, ininiā iua ipina kākiti maerekani imaktxakini īkapani, iuaīkana kākiti imikanapiriini Teosomoni īkapani. ¹⁸Īkorapokoriti Xesosi auakasaaki, imarotari Satanasi atamakaerekatini iua. Ininiā Satanasi atamakaerekatakasaakina kākiti, iua posotari isikataparatinina ninoa.

Xesosi Apiatakari, Moisesi Poiāori

3 ¹Ininiā nitariakori, Teoso mereēkini, hīte akiritaāka Teoso tixine hāuini īkapani. Iteene hīxinikariko Kristo Xesosi, kotxi iua Teoso iokanatakiti itxaua. Apaka iua sasetotxi auīte apiatakari itxaua. Iuara asāpiretari apanakini. ²Moisesi kamari ikinika Teoso paniātakiti inirimane apisatoō, Teoso aapoko aamata kamakori ikamakasaaki. Iua atokokana Xesosi kamari ikinika iua mereēkari paniātakiti. ³Apiarekata Xesosi, ininiā iua apakapari apiata ipaxitiko, Moisesi poiāo, kotxi aapokotxi kamakari apakapari apiata ipaxitiko. Poiāo aapokotxi paxitiko aua. Iua atokokana, Xesosi aapokotxi kamakari atoko itxaua. Moisesi aapokotxi atoko itxaua. ⁴Ikinika kākiti aapokona kamakani auapitika, iuaritika Teoso

ikinipoko kamakari itxaua. ⁵Moisesi Teoso nitiri itxaua. Iua ātipirika kamari ikinipoko Teoso nirekakiti inirimane apisatoō. Ikara erekari ikamakiti oerekari Teoso sākire iua sāpiretakiti atāo inini.

⁶Kristo Teoso ākiri itxaua. Iua ātipirika kamari ikinipoko Teoso paniātakiti Teoso aapoko inīkatini. Teoso aapoko atoko atxaua ate, iteene aāuikiniāri iua sākire, apoxokoniritika ātipirika aiātapiniāri Xesosi kanapiriini ōti.

Erepaniko, !Hītakanapapiri Hāuikakiti

⁷Ininiā Erekarī Matamatakoti txari:

Uatxa ōti hīkenakotakasaakiri nisākire,

⁸kona hīkamapiriko hīxinire paikori inini hātokiriakorini atoko hinini. Āparaā makipakaniātaā auakasaakina, iuaā ninoa !auikari nota sākire. !Ikamarina nipaniātakiti. Iuasaaki ninoa ataerekatapikano nota.

⁹Koarētakanani, ikiniōtika hīte apika atokiriakori ataerekatapikano nota. Ninoa atamatari niposotiire. Txamari ikiniōtika ninoa ataerekatano nota. !Auikarina nisākire.

¹⁰Ikara xika nomanatana ninoa. Iuasaaki nitxa: “Ātipirika ninoa sapika apanakini sākire tikini. !Imarotarina nixinikakiti, nikamakiti pakini.”

¹¹Nomanatakasaakina ninoa imaerekanina xika, iuasaaki nitxako: “Atāo nisāpiretana ninoa. Ninoa maīroāpekaniikarako nikamakiti tomatikoātaā,”

itxa Erekarī Matamatakoti.

¹²Ininiā nitariakori, erepaniko. Atxiīti ātikaka hīte aua hīxinire maerekati mauikareti. Ikara atoko inakasaaki, hītakanapapekari Teoso ātipirika auāki inakari, maerekati tikini hīsini ikapani.

¹³Ininiā ikiniōtika hīkamataparaxiniretakakauako. Uatxapanika inakasaaki hōtākikakauako. Ininiā maerekanitxi kona misirienetai. !Ikamari kaikoxinire hinini. ¹⁴Aāuini mapotōkire manapi iteene aāuikiniāri Kristo sākire merepitipanika aāuikiniri atokotxikana, atāo iuakata parīkauatakani atxaua. ¹⁵Uatxa nisāpiretai kitxakapirīka iōkatsopatakiti:

Uatxa ia ōti hīkenakotakasaakiri iua sākire, kona

hīkamapiriko hīxinire paikori inini, hātokiriakorini atoko hinini, āparaā makipakaniātaā auakasaakina. Ninoa !auikari nota sākire.

¹⁶Ninoa kenakotari Teoso sākire, txamari !nirekarina ikaminirina isākire iaōka. Kipa ninoa? Exito tixini Moisesi makatxakakinira ninoa. ¹⁷Kikākititipa kamari Teoso naiatiniua koarētakanani? Ninoa maerekati kamakani. Ikara xika ninoa ipīpeka āparaā makipakaniātaā. ¹⁸Kirimonipa Teoso txari ia? “Atāo nisāpiretai hīte. Kona himaīroāpekaniiarako nikamakiti tomatikoātaā.” Teoso sāpiretari ikara iua sākire mauikakanimoni. ¹⁹Ininiā aimarotari, ninoa !īroā iuaā, Teoso sākire imauikakanina xika.

Tomatikoātaā Aua Teoso Nakitiakori Īkapani

4 ¹Auapitika Teoso kamaenetakiti kākiti tomatiniātaā Teoso kamakiti aīroini tīkane, ininiā erepaniko. Atāo inakari hīkamako iuaā hīroini ĩkapani. ²Teoso iokanapirena erekari sāpiretaāka atemoni, kitxakapirīka Moisesi auakasaaki auakanimoni apaka. Txamari maxikatiīka ninoa kenakotari Teoso sākire, kotxi ninoa !auikari ikenakotakitina. ³Ate, Teoso sākire auiākanuia, ĩroā ikara Teoso kamakiti tomatikoātaā. Ininiā Teoso sāpiretakiti iaōka auapeka. Ia atoko Teoso txari:
 Nomanatakasaakina ninoa imaerekanina xika,
 iusaaki nitxako: “Atāo nisāpiretana ninoa. Ninoa maīroāpekaniiarako nikamakiti tomatikoātaā,”
 itxa Teoso. Ikara atoko itxama, iuaritika ikara tomatikoātaā iposope iparīka ixipokasaaki, itixi ikamakasaaki. Ikara atoko ikama ate ĩkapani. ⁴Teoso sākire iōkatsopatakori sāpiretari itomatini ōti pirena. Itxari:
 Iparīkauata seisi ōti, ininiā eereka apikomoni āti ōti
 inakasaaki itomata. Iusaaki itakanapari ikinika iparīka,
 itxa Teoso sākire iōkatsopatakori. ⁵Teoso sākire iōkatsopatakori txari:
 Ninoa maīroāpekaniiarako nikamakiti tomatikoātaā.
⁶Iuaritika apanakini ĩroāpanikako iua tomatikoātaā. Txama apanakini kitxakapirīka auakani !īroā. Ninoa merepitipanika sāpiretaāka Teoso iokanapirena erekari, txamari !īīroāna, kotxi !ikamarina Teoso paniātakiti. ⁷Ininiā Teoso kamari iketo ōti apanakini iuaātaā apokini ĩkapani. Iusaaki Teoso akiritari iketo ōti “uatxa.” Ikara atoko Teoso misākiretari Tavii:
 Uatxa ōti hīkenakotiniāri nisākire, ininiā kona hīkamapiriko hīxinire paikori inini.
⁸Aātokiri kitxakapirīka auakari Xosoe inakori, iuara anikari kākiti itixi Teoso sikaenetakitimoni. Txamari !īīroāna atāo inakari

tomatikoãtaã Teoso sikakiti, kotxi eereka Teoso sãpiretari ãti òti tomatikoãtaã ãroïko òti. ⁹Ikara atoko ininiã, auapanikako Teoso kamakiti tomatikoãtaã inakitiakori ãkapani. ¹⁰Ininiã kãkiti ãroãkasaaki Teoso kamakiti tomatikoãtaã, iotokakari iparïka, Teoso iparïka iotokakini atokokana. ¹¹Ininiã nitariakori makamariko ãkinika atão inakari iua tomatikoãtaã aïroini ãkapani. Erepaniko, kotxi apanakini !ãroã, Teoso sãkire imauikakanina xika. Ininiã !hïkamapiri ninoa kamakiti atokokana.

¹²Teoso sãkire kaposotiireri. Isãkire auãki itxapika, kotxi Teoso ãtipirika auãki inakari sãpiretakiti. Saasara ipi auanaro auakaro, iteene kauanaro, ininiã iposotari ikisauakiniri inirekiniãtaã. Iposotari ikisauakiniri kãkiti pakaki, iua ãki auakari axïpe imakatzakini ãkapani. Apiata Teoso sãkire, kotxi Teoso sãkire posotari apokini kãkiti ãkite kãkiti xinirekata apotiitiniãtaãua. Teoso sãkire imarotari ãkinika axinikakiti, anireẽkiti pakini aãkixinireẽ. Teoso sãkire atamakaerekatari ikara aãkixinireẽ auakari. ¹³Teoso atamatari ãkinipoko akamakiti, ininiã !auari iomaãtakori. ãkinipoko !ipataãka. Aãuïte Teoso apisatoõ ãkinipoko kasarori.

Xesosi Sasetotxi Auïte Apiatakari

¹⁴Ininiã atemoni auari sasetotxi auïte apiatakari, Xesosi, Teoso ãkiri. Apiananiri iua. Iua sari iaxiti Teoso auiniãtaã. Ininiã iteene maãuikari iua sãkire. ¹⁵Ate nakiti sasetotxi auïte apiatakari imarotari ate ãkixinire iõkapetini. Imarotari ate maposotakiniti. Imarotari ate tsii. Ikara atoko inakari imarota, kotxi Satanasi iteene atamakaerekatari iua, ate atamakaerekatiko atoko. Iuaritika maerekati !ikama. ¹⁶Ininiã ataparaxinireritika masa Teosomoni. Aãuïte topãkiniãtaã masa ãkinipoko erekari isikakiti aãpakapini ãkapani, iamoniãkiniua ãkapani. Isikaua ãkinipoko erekari. Isikataparataua amaxikiko auakasaaki.

Xesosi Sasetotxi Auïte Apiatakari Mereïko

5 ¹Ëkinimane sasetotxi auïte apiatakari mereeëka kãkiti sauaki. Iua misãkiretari Teoso kãkiti ãkapani. Isikari kãkiti sikakiti iuamoni. Kitxakapirïka iua okari pirãtxi Teoso apisatoõ kãkiti maerekani ãkitxitini ãkapani. ²Iamoniãkari mimaroreni, Teoso takanapakani pakini, kotxi imarotari kãkiti ãkixinire iõkapetini, kotxi iua apaka kãkiti itxaua. ³Sasetotxi apaka maerekati kamakari itxaua. Ikara xika merepanika iua okari pirãtxi Teoso apisatoõ

iuaka maerekani iĩkitxitini iƙapani. Eereka iua okari pirãtxi kãkiti maerekani iĩkitxitini iƙapani.

⁴Kãkiti paxitari sasetotxi, iuaritika ninoa kona mereẽri sasetotxi parĩka. Teosonoka mereẽri kãkiti sasetotxi ininiua iƙapani, sasetotxi Arão inakori Teoso mereini atokokana kitxakapirĩka.

⁵Xesosi iuaka !ikamaua sasetotxi auĩte apiatakari ininiua. Kona itxari: “Apakatapitika sasetotxi nininiua.” Iuaritika Teoso txari iua:

Pite namarite. Uatxa noerekariko kãkiti nota pite iri nininiua, itxa Teoso.

⁶Iuaĩkana Teoso txari:

Åtipirika sasetotxi pitxaua. Sasetotxi Meokisiteki inakori atoko inakari pitxaua,

itxa Teoso Xesosimoni. ⁷Xesosi iƙorapokoriti auakasaaki, iua iteene misãkiretari iri. Ipinini apisapanika iteene amanaãri iri imapinakani iƙapani. Imisãkiretakasaakiri iua, iteene itxiĩta. Irinokara posotari itxĩkitakiniri imapinakani. Iri kenakotari isãkire, kotxi Xesosi txari: “Pinirekakitinokara ninireka.” ⁸Xesosi Teoso ãkiri, iuaritika atatsiirauatakasaaki, imaroãpotari Teoso nireẽkiti iaõka ikamini. ⁹Iua kamari ikinipoko iri paniãtakiti. Ikara atoko ininiã, kãkiti maerekani makatxakakari itxapekaua. Imakatxakari ipaniãtakiti kamakani maerekani, ininiã ninoa auapininiika itxanako Teosokata. ¹⁰Teoso mereẽri iua sasetotxi auĩte apiatakari ininiua, Meokisiteki inakori sasetotxi ininiua atokokana.

Erepaniko, Atão Sãkiretxiti !Hítakanapape

¹¹Aua apikomoni kaiãopokori ikara atoko inakari asãpiretinii hĩte, txamari pamimari ikara asãpiretinii hĩte, kotxi !katimari himarotiniiri Teoso sãkire. ¹²Akokaxiti hĩte auikari Xesosi sãkire, ininiã uatxa apiaerekata Xesosi sãkire oereẽkani hininiua. Txamari hĩte nirekari åti oerekinii iuaĩkana merepitipanika atão inakari Teoso sãkire iõkatsopatakoriiã auakari. Hĩte eenetxi xapitikiri atoko. Hinirekari Teoso sãkire tinitxiã atoko inakari. Teoso sãkire nipokori atoko inakari !hĩposotapanika hãpakapini. ¹³Teoso sãkire imarotakari tinitxiãnoka nirekakari atoko inakari, iteene !imarotapanikari Teoso sãkire. !Imarotari atão inakarínoka ikamini, kotxi iua eenetxi xapitiri atoko inakari. ¹⁴Kãkiti aneẽkari nikari xinitxi. Kataparaxinireri nirekari Teoso sãkire, xinitxi aneẽkari nirekini atokokana. Kãkiti ikiniõtika kenakotiniãri Teoso

sākire, ininiã imarotari atão inakari. Imarotari atão minakati apaka.

Maãpaiaõkarauata Apikomoni

6 ¹!Apakata ikiniõtika merepitipanika Kristo sākire oerekakorinoka axinikini, kotxi aimarotapekari. Aimarotapekari atakanapiniri maerekati akamakiti. Aimarotapekari ateka kamakiti txīkitakaua apinini. Aimarotapekari Teoso sākire aãuikini. ²Aimarotapekari apatxisarauatini. Aimarotapekari atakauakotiniua ãti nopini. Aimarotapekari ipīkani iuaīkana õkitikiniua. Aimarotapekari Teoso misiritinina maerekati kamakani ãtipirika. !Apakata ikara ãtipirika aõerekinii. ³Apikomoni auapitika, ininiã maãpaiaõkarauata apikomoni. Teoso auritiniãua, apikomoni maxinika. ⁴Kākiti takanapiniãri Teoso sākire auikini, !apakataika ikanapiriinina Teosomoni. Mitxi ninoa imarotari Teoso sākire atão inakari. Mitxi ninoa imarotari erekari iaxitikiri. Mitxi imarotari Erekari Matamatakoti parīka ãkixinireẽna. ⁵Mitxi imarotarina Teoso sākire ereka inini. Mitxi imarotarina Teoso posotiire itixi amaneri apokasaaki. ⁶Ikara atoko ninoa imarota, iuaritika ninoa takanapari Teoso. Ininiãkara !apakata iuaīkana ikanapiriinina Teosomoni, kotxi iuaīkana imisiritarina Teoso ãkiri aamina ipiriãmitakari nopini imisiritiko atoko. Iuasaaki ninoa txīkitakari kākiti iuaīkana napetiniri Xesosi.

Kikio Atoko Anini Pirena

⁷Teoso takari erekari itixi ia atoko inakari nopini: Āparaã ikipa kaiãokatani iuaã, ininiã iminaua kienatxi katakareri nirekakiti. ⁸Txamari itixi inako, aanaia pakini auiniã, !itxa. Ikara xika atxiĩti imisiritaãka. Ininiã arikaãkako. Ikara atoko inapeẽkanako kākiti. Maerekati aniniãua, ininiã pamonõkoniri atemoni. Ikara atoko ininiã, imapotõkire õti Teoso !inirekaikaua ate. Ixipokaua aanaia xipokiko atoko.

⁹Nitariakori, ikara atoko asãpiretai hĩte, iuaritika ate imarotari kona hĩte ikara atokoni. Aimarotari hãpakapiniri erekari, kotxi Teoso makatxakapekari himaerekani. ¹⁰Teoso kamari ikinika atão. Iua !imaxinīkaretari hīparīka iua īkapani. Hītiraõki iuamoni !imaxinīkareta, kotxi himoianatapekari iua nakitiakori. Uatxa himoianatapanikana ninoa. ¹¹Ate nirekari ikinika hīkaminiritika Teoso īkapani imapotõkire õti manapi apokini. Ikara atoko ininiã,

himarotari hiãtapakiti apokapitikako hĩtemoni. ¹²Kona apakata hĩarinuatini. Apanakini Teoso sãkire auiãkani kamakiti atoko hĩkamako, kotxi ninoa iãtapari Teoso sikaenetakiti apakapinina.

Teoso Sikapitikariko Isikaenetakiti

¹³Kitxakapirĩka Teoso sãpiretari isikaenetakiti Apraãomoni. Apiatakari Teosonokara aua. ãti apiatakari iua atoko inakari !auari, ininiã iuaka uãkaã isãpiretari isikaenetakiti isikini Apraãomoni. ¹⁴Ininiã Teoso txari Apraão: “Nitakapitikari erekari pitemoni. Nisikaiko itomaneri papika mekaniriakori,” itxa. ¹⁵Ininiã Apraão kenakotakasaakiri ikara, iteene iãtapari Teoso sãpiretakiti apokini. Eereka Apraão apakapari Teoso sikaenetakiti.

¹⁶Kãkiti sãpiretakasaakiri isikaenetakiti ãti kãkitimoni, iusaaki ninoa apoka ãti apiatakari apisatoõ isikaenetakiti isãpiretinina ĩkapani. Ininiã iusaaki kãkiti imarotapitikari isãkire atão inini. Ikara atoko ininiã, aãpirena !auari isikaenetakiti xika. ¹⁷Teoso nirekari inakitiakori iteene imarotiniiri imatakanapakaniri isikaenetakiti isikinina ninoa. Ininiã isikaenetakiti isãpiretakasaaki, isikari isãkire iuaka uãkaã. ¹⁸Ininiã ipi aua: Teoso, Teoso sãkire pakini. Teoso mitxi atoko itxapikako. Teoso sãkire mitxi atoko itxapikako. Ininiã Teoso !iposotari atão minakati isãpiretini. Amiteka iuamoni, iua nĩkatiniua ĩkapani, aiãtapakiti aãpakapini ĩkapani. Ininiã asikataparaxiniretaãka.

¹⁹Ikara atoko inakasaaki, aposotari iteene aãuikiniri Teoso sãkire. Aiãtapari ikinipoko iua sãkire iaõka apokini. Teoso sãkire aãuikini, minari maporo maĩkakari atoko itxa. Maporo maĩkakari !auritari maporo tiokini. Teoso sãkire aãuikini maĩkari axinire. Isikataparatarari axinire. !Auiritaua atiokini maerekanitximoni. Teoso sãkire aãuikini anikaua Teosonani Auini Pakitaãtaã, mãkatxi mata arõkakari apikomoni auakari pakitamoni. Kitxakapirĩka sasetotxiakori auĩte apiatakarinoka ĩroã iuaã. ²⁰Iuaã Xesosi ĩroã ate ĩroini apisa. Iuaã imisãkiretari iri ate ĩkapani. Sasetotxiakori auĩte apiatakari itxapekuaã ãtipirika ate ĩkapani. Meokisiteki inakori sasetotxi ininiua atoko itxa Xesosi.

Meokisiteki Pirena

7 ¹Meokisiteki inakori Sareẽ tixini auakani auĩte itxaua. Iusaaki sasetotxi itxaua apaka. Teoso, Apiananiri, kamari iua sasetotxi ininiua. Kitxakapirĩka Apraão kamari neenamtxi

āti tixini auakani auñteakorikata. Iua kanapiriākasaaki, aōkitari Meokisiteki. Iuasaaki Meokisiteki takari erekari Teoso sikakiti iuamoni. ²Iuasaaki Apraão sikari iua tiitxi imaktxakakiti ipixini. Tesi tiitxi auiniã, isikari āti Meokisitekimoni. Meokisiteki akiritaāka “Auñtetxi Atão Inakari Kamakari.” Apaka akiritaāka “Auñtetxi Kākiti Kamaerekaxiniretakari.” ³!Kimarotikori Meokisiteki iri, inoro pakini. !Kimarotikori apika atokiriakori. !Kimarotikori iponaniini, ipinini pakini. Teoso ākiri atoko itxa. Sasetotxi ātipirika itxaua.

⁴Hīxinikariko iua Meokisiteki. Apiatakari iua. Apraão iteene paxitari iua, ininiã isikari ipixini tiitxi iua makatxakakiti iuamoni. ⁵Eereka āti ōti Apraão tikini Teoso paniātari Arevii apika mekaniriakori, sasetotxiakori, apakapiniri ipixini kākiti apakapakiti, txineiro, tiitxi pakini. Ninoa apakapari kākiti sikakiti Teoso ĩkapani. Ikinimane ninoa Apraão apika mekaniriakori itxauana. Iuaritika sasetotxiakori apakapari inirimane sikakiti. ⁶Iua Meokisiteki Arevii nirimane !itxaua. Iua aua kitxakapirīka Arevii apisapanika. Iuaritika iua apakapari ipixini Apraão makatxakakiti. Eereka Meokisiteki takari erekari Teoso sikakiti Apraōmoni, Teoso sikaenetakiti apakapakarimoni. ⁷Iua Apraão poiāori. Apiatakari Meokisiteki, kotxi apiari takari erekari Teoso sikakiti poiāorimoni. ⁸Ikinika Arevii apika mekaniriakori, Teosomoni kākiti sikakiti apakapakani, ipinanipeka. Ātipirika auakari atoko itxa Meokisiteki. ⁹Atxiīti aposotari asāpiretiniri ia atoko: “Arevii sikari isikakiti Meokisitekimoni Teoso ĩkapani, kotxi iua ina Apraão ĩto āki.” ¹⁰Kotxi Apraão aōkitakasaakiri Meokisiteki, iuasaaki Arevii kona auapanika. Ininiã iua auini apisapanika Apraão ĩtoã aua, kotxi Apraão apika mekaniri itxaua Arevii.

Xesosi Meokisiteki Atoko Inini

¹¹Arevii apika mekaniriakori sasetotxiakori itxauana. Iua apika mekaniri Arão inakori. Arão apika mekaniriakori apaka sasetotxiakori itxauana. Teoso sikari ipaniātakiti iōkatsopatakori ninoamoni, isākire kākiti imarotini ĩkapani. Iuaritika ninoa sasetotxiakori parīka !oerekari kākiti kamaerekatiko. Ininiã ātiã sasetotxi nirekaāka. Sasetotxi Arão atoko inakari !inirekaāka. Sasetotxi Meokisiteki atoko inakari nirekaāka.

¹²Ātiã sasetotxi auakasaaki, ātiã Teoso paniātakiti iōkatsopatakori aua iuasaaki. ¹³Xesosi kona Arevii apika mekanirini. Iua Xotaa apika mekaniri. Xotaa mekaniriakori kona sasetotxiakorini.

Ninoa kona okari pirãtxi Teoso ïkapani. Kona iparïkauatana Teosomoni sikakori takikoãtaã. ¹⁴Ikinimane imarotari aãuïte Xesosi Xotaa nirimane ininiuua. Moisesi iökatsopatakiti !auiritana ninoa sasetotxi ininiuana. ¹⁵Ate säpiretapekari Meokisiteki pirena. Aimarotari auapitika ãti sasetotxi, Meokisiteki atoko inakari. Uatxa aimarotari Xesosi Meokisiteki atoko itxaua.

¹⁶Kitxakapirïka sasetotxi pitxaua, kotxi pikiomaneakori sasetotxi apaka itxauana. Teoso kamari Xesosi sasetotxi ininiuua, kotxi iua auapikako. Kaposotiireri iua. !Ixipoka. ¹⁷Teoso txari Xesosi isãkire iökatsopatakoriã:

Ätipirika sasetotxi pitxaua. Sasetotxi Meokisiteki atoko inakari pitxaua,

itxa.

¹⁸Ininiã mitxi auakari sasetotxiakori parïka !auaika, kotxi itapara !uari. Xipope ikara. ¹⁹Moisesi paniãtakiti iökatsopatakori !ikamari kãkiti ereka inini. Uatxa apiaerekatakari aiãtapakiti apokapeka ïkorapokoriti. Ininiã iua anikaua Teosomoni.

²⁰Teoso isãkireë txïkitakari Xesosi sasetotxi ininiuua. ²¹Teoso !isãkirauata ikara atoko kãkiti sasetotxipeka inakasaaki. Teoso txïkitakari Xesosi sasetotxi ininiuua isãkireë, kotxi itxari Xesosi:

Nota Apiananiri säpiretapekari nikamaenetakiti. Ikara nikamapitikako, ininiã ätipirika sasetotxi pitxaua, sasetotxi Meokisiteki atoko inakari pitxaua,

itxa Teoso. ²²Ininiã ikara Teoso säkireë, aimarotari Teoso kamapitikariko ikamaenetakiti apiari, kotxi iposope isikiniua Xesosi.

²³Auapeka itori sasetotxiakori. Ninoa kona posotari ätipirika iparïkauatinina, kotxi ikoriãpekana. ²⁴Xesosi auapikako, ininiã ätipirika sasetotxi itxaua. ²⁵Ininiã iposotari imakatzakiniri ikinika amaerekani, Teosomoni anikasaakiua, kotxi ätipirika aua, ininiã ätipirika imisãkiretari Teoso ate ïkapani.

²⁶Ininiã ikara atoko inakari sasetotxi auïte apiatakari anirekapitika. Apiaerekatakari iua. !Kaneenamari. Ikerokakiti !uari. Itxiko ixinireë !uari. Maerekati !ikama. Iaxiti apiko nopinixiti auakari, auïtetxi Apiatakari itxaua. Ikara atoko inakari sasetotxi anirekapitika. ²⁷Apanakini sasetotxi auïte apiatakani ïkorapokoriti auakani atoko !itxaua. Ninoa ikiniötika okari pirãtxi, merepanika ninoaka maerekani makatzakiko ïkapani. Eereka ninoa okari pirãtxi kãkiti maerekani makatzakiko ïkapani. Kona ikara atokoni

itxa Xesosi. Ātikatanokara Xesosi oxiketari iarēka kākiti ĩkapani. Iuaka ipina kākiti ĩkapani. ²⁸Mitxipe sasetotxi auĭte apiatakani mereeēka Moisesi paniĭtakiti iōkatsopatakori iaōka. Ninoa tapara !auari. Moisesi sākire tikini Teoso mereēri imi ātipirika sasetotxi ininiua ĩkapani. Ātipirika erekarinoka kamakari iua.

Xesosi Sasetotxi Auĭte Apiatakari

8 ¹Ia atoko asāpiretakiti: Atemoni auapitika atāo sasetotxi auĭte apiatakari. Iaxiti iua topāka aāuĭte Teoso kikomoni, auĭtetxi auiniĭtāā. ²Iuaā Teoso auiniĭtāā, imisākiretari iua ate ĩkapani. Iuaā aua atāo inakari Teoso aapoko, Apiananiri kamakiti. Kona kākiti kamakitini. ³Ikinika sasetotxi auĭte apiatakari auari iparĭka. Isikari kākiti siākiti Teosomoni. Isikari pirĭtxi okakori Teosomoni. Ininiĭ Xesosi parĭka apaka aua isikarauatini. Iuaka isikaua Teosomoni. ⁴Īkorapokoriti Xesosi auakasaaki, sasetotxi !itxaua, kotxi auape ĩkorapokoriti sasetotxiakori kākiti siākiti sikakani Teosomoni. Moisesi iōkatsopatakiti atokotxikana ikamana. ⁵Sasetotxi ĩkorapokoriti auakani kamakiti atāo, txamari ninoa parĭka !nirekaākaika. Ninoa parĭka sanōkatxi atoko itxa, Xesosi parĭka iaxitikiri aimarotini ĩkapani. Kitxakapirĭka Teoso paniĭtakasaakiri Moisesi Teoso aapoko aamata kamakori ikamini ĩkapani, Teoso txari Moisesi:

Pikamariko naapoko nipaniĭtakiti iaōka ixirata auĭte nopini aāuakasaaki noerekakiti. Ipinimoni inakari !pikamape, itxa Teoso.

⁶Xesosi parĭka Teoso sikakiti apiaerekata. Kitxakapirĭka sasetotxiakori parĭka poiāo erekari. Iua atokokana Teoso kamaenetakiti amaneri apiaerekata. Kitxakapirĭka ikamaenetakiti poiāo erekari. Xesosi txĭkitakari Teoso kamaenetakiti amaneri apokini kākiti ĩkapani, kotxi iua ipina kākiti ĩkapani. Teoso kamaenetakiti amaneri apiaerekata, kotxi ikamaenetari kaiāopokori erekari apiaerekatakari.

⁷Teoso kamaenetakiti Moisesimoni apakatiniĭ maerekati imaktxakini ĩkapani, ininiĭ kona ikamari āti ikamaenetakiti apiatakari. ⁸Txamari Teoso !apokaerekatari kākiti, kotxi kākiti kamapanikari maerekati. Ininiĭ Apiananiri txari kākiti:

Āti ōti nisāpiretariko nikamaenetakiti amaneri Isaeo nirimanemoni, Xotaa nirimanemoni pakini.

⁹Kitxakapirĭka nisāpiretari mitxi nikamaenetakiti ninoa atokiriakorinimoni. Iuasaaki nota makatxakana ninoa

imisiritikosaakina Exito tixiniã. Txamari ninoa !ikamari nisãkire iaõka. Ininiã nitakanapana ninoa. Nikamaenetakiti amaneri kona mitxi nikamaenetakiti atokoikani.

10 Æti õti !kari nikamaenetakiti amaneri nisãpiretariko Isaeo tixini auakani. Ia atoko inakari nikamaenetakiti amaneri: Nitakariko nipaniãtakiti kãkiti iikiteẽ. Niõkatariko nipaniãtakiti ninoa ãkixinireẽ. Iuasaaki ninoa Teosone nitxauako. Iuasaaki ninoa nota nakitiakori itxauanako.

11 Iuasaaki kãkiti kona oerekari æti imarotiniri Apiananiri. Kona kãkiti oerekari itari imarotiniri Apiananiri, kotxi iuasaaki ikinimane imarotanoko nota. Poiãoka inakani, apiatakani pakini imarotanoko nota.

12 Nimaxin!karetariko ikinika maerekati ikamakitina. Kona nimisiritaikanako ninoa. Kona nixinikaikariko maerekati ikamakitina,

itxa Apiananiri. 13Teoso kamakasaakiri ikamaenetakiti amaneri, iuasaaki oerekari kãkiti mitxi ikamaenetakiti Xoteoakorinoka !kapani ikamape, ininiã inapape. Tiitxi kitxakari patimari xipokini atoko, ikara mitxi Teoso kamaenetakiti xipoka.

Teoso Aapoko Aamata Kamakori

9 1Kitxakapirika Teoso kamaenetakiti isãpiretakasaakiri Moisesi, Teoso oerekari Moisesi oerekiniri kãkiti Teoso apisatoõ apokini. Iua apaka sãpiretari kãkiti iua aapoko !korapokoriti ikaminina !kapani. 2Ininiã ninoa kamari Teoso aapoko aamata kamakori. Sasetotxiakori !roiniãtaã aua tirikapi takiko tiitxiti. Iuaã aua apaka komiri Teosomoni siãkori amesa nopini. Iua pakita ninoa takauãkatari “Teoso Auini Pakitaãtaã.” 3Apan!kaki mãkatxi mata kasipiri arõkakari aua. Iua mãkatxi mata apikomoni auakari pakita ninoa takauãkatari “Teosonani Auini Pakitaãtaã.” 4Iuaã aua kamariãro arikiko amesati oro kamakoro. Iuaã aua Teoso kaixane. Iua kaixa akiritaãka “Teoso kamaenetakiti kaixati.” Iua kaixa nopini mapara itaãka oronokara. Iua ãki itakaãka kopitipaki oro kamakoro. Iua kopitipaki ãki itakaãka xapitiri komiri manaa inakori. Iua kaixa ãki aua apaka Arão tsonareke. !kora mitxi pitxaka iua!kana. Apaka iua kaixa ãki aua ipi kaita. !kora kaita nopini aua Teoso paniãtakiti iõkatakori. 5Iua kaixa nopini aua ipi Teoso nitiriakori iaxitikini atoko inakani. Oro kamakori ninoa. Akiritaãka Keropi! inakoni.

Keropii matameekari imikita iua kaixa tore nopini. Iuaã Teoso maxinikaretari kãkiti maerekani.

Uatxa !apakata apikomoni noerekinii ikara pirena.

⁶Teoso Auini Pakitaãtaã sasetotxiakori iroã ikiniõtika iparĩkana ikaminina Teoso ikapani. ⁷Sasetotxi auite apiatakarinoka iroã Teosonani Auini Pakitaãtaã. ãtikanani ãtikatika iroã. Iua anikari arẽkatxi iuakata. Arẽkatxi imanikakaniã, !iĩroã. Iua arẽkatxi isika Teosomoni merepanika iuaka maerekani Teoso makatxakini ikapani. Eereka ikamari ikara apanakini kãkiti maerekani Teoso makatxakini ikapani. ⁸Iuasaaki Teoso kona auritari kãkiti iroini Teosonani Auini Pakitaãtaã. Ikara atoko Erekar Matamatakoti oerekaua ate, kotxi kona Teoso oerekapanikari ikinimane kãkiti iroini Teoso apisatoõ. Teoso aapoko aamata kamakori auapanika inakasaaki, Teoso kona oerekari kãkiti iuamoni apokini. ⁹Ikara Teoso aapoko kitxakapirĩka auakari ate oerekiko itxaua uatxa. Oerekari ia. Kãkiti sikakiti Teosomoni, pirãtxi okiko Teoso ikapani apaka, kona posotari oeretiniri Teoso teosonetakani ãkixinire. ¹⁰Ikara Teoso oerekakiti kitxakapirĩka oerekari kãkiti iniãkiti atão inakari, iãtakiti atão inakari pakini. Oerekari kãkiti iĩto arokiko, itii arokiko pakini Teoso apisatoõ apokini iposope inini ikapani. Teoso kamaenetakiti amaneri apokasaaki, kona akamaikari ikara mitxi Teoso oerekakiti.

Kristo Arẽka

¹¹Kristo apokapeka. Sasetotxi auite apiatakari itxaua. Oerekaua erekari Teoso sikakiti. Iparĩkauata Teoso aapoko apiaerekatakari ãki. Iua Teoso aapoko kãkiti makamakiniti. Iua aapoko !uari ikorapokoriti. ¹²Iua iroãkasaaki iuaãtaã, !anikari potxi arẽka, kema auite ãkiri arẽka iĩroini ikapani. Iua iroãkasaaki Teosonani Auini Pakitaãtaã iaxiti auakariãtaã, anikari iuaka arẽka, kotxi ikitakari iarẽka ãtikatika ikinimane kãkiti ikapani. Ininiã iĩkitxitari Teoso ãtikatika kãkiti maerekani iki, ininiã kãkiti aua Teosokata ãtipirika. ¹³Potxi arẽkaã, kema auite arẽkaã, kema auite ãkiri ariãkari paniã pakiniã, kitxakapirĩka sasetotxi tseẽtari maerekati kamakani Teoso apisatoõ apokinina ikapani. Ininiã iuasaaki maparanoka oeretaãka. ãkixinirena !oeretaãka.

¹⁴Apiaerekata Kristo arẽka, kotxi iua posotari oeretiniri aãkixinire. Maerekati !uari Kristomoni. Iuaka sikaua Teosomoni Erekar Matamatakoti posotiireẽ, ãtipirika auakari posotiireẽ. Iuara oeretari

aākixinire. Imakinika akamakiti apinini txīkitakakari imakatzaka. Ininiā uatxa aposota aparīkauatini Teoso ātipirika auāki inakari īkapani.

¹⁵Ininiā iua Kristo txīkitakari Teoso kamaenetakiti amaneri apokini. Ininiā kākiti Teoso akiritakini posotari apakapiniri ātipirika Teoso sikaenetakiti iua anaakori īkapani. Kristo ipīkasaaki, isikakana ninoa imaerekanina itakanapinina īkapani. Iuasaaki iikixitari Teoso imaerekanina īki. Ikara imaerekanina ikamana Teoso kamaenetakiti mitxipe auakari auakasaaki.

¹⁶Kākiti ipinini apisa, iōkatsopataritari itii apakapakani uāka, ininiā ipīkasaaki itii apakapakani imarotaāka. Ininiā iua ipinini imarotiko tsopa auiniā, iuasaaki itii apakapakani apakapari ipīkari tii. ¹⁷Ipīkari tii apakapakani imarotiko tsopa nirekaāka kākiti ipīkasaakinokara. Ikara !nirekaāka ipinini apisa. Iua auākipanika inakasaaki, kākiti !apakapari itii. ¹⁸Ininiākara mitxi Teoso sikaenetakiti isika kākitimoni, arēkatxi auakasaaki, ipīkari auakasaaki. ¹⁹Kitxakapirīka Moisesi merepitipanika sāpiretari kākiti ikinika Teoso paniātakiti iōkatsopatakori. Eereka ikosekari kema auīte ākiri arēka, potxi arēka pakini. Ikara ikoketa āparaākata. Iposo atoko itseētari Teoso sākire aātsopate, ikinimane kākiti pakini isopo inakori poriā, soti auīte piti pōkamarariā pakiniā. ²⁰Iuasaaki itxari: “Ia arēkatxi oerekaua Teoso kaminiri ikamaenetakiti. Teoso paniātai hīkīpitiniri iua sākire.” ²¹Iua atokokana Moisesi tseētari Teoso aapoko aamata kamakori, ikinika iua āki auakari pakini arēkatxiā. ²²Teoso sākire iōkatsopatakori paniātari kākiti, tiitxi pakini oeretiko arēkatxiā. Okakori mauakaniā, arēkatxi kitaākori mauakaniā, Teoso !imakatzakari kākiti maerekani.

²³Ininiā Moisesi takari pirātxi arēka ikinika Teoso aapoko āki auakari nopini oeretiniri īkapani. Ikinika Teoso aapoko āki auakari īkorapokoritikiri, iaxitikiri oerekiko īkapani itxa. Sanōkatxi atoko itxa. Pirātxi arēka kona apakata iaxiti īkapani. Teoso nirekakari arēkatxi apiatakari. ²⁴Kristo iparīka ikamakasaaki ate īkapani, kona iiroā Teoso aapoko kākiti kamakitiā. Īkorapokoriti kākiti kamari Teoso aapoko atoko inakari, txamari na atāo iua aapoko. Kristo iroā atāo Teoso aapoko Teoso tixineē. Uatxa iuaātaā Teoso apisatoō iua misākiretari Teoso ate īkapani. ²⁵Sasetotxiakori auīte apiatakari iroā Teosonani Auini Pakitaātaā ikinikanani. Iuasaaki anikari pirātxi arēka. Kristo !ikamari ikara atoko. Ātikatika Kristo oxiketari iarēka. ²⁶Iua ninoa atoko inaākamako, itokata imisiritaākamako itixi kamikosaakipekamako. Uatxa imapotōkire ōti takote iua apokapeka

maerekati ātikatika imakatzakini ĩkapani. Iuaka isikaua ipinini ĩkapani, amaerekani ixipokini ĩkapani. ²⁷Teoso kamari ikinimane kākiti ātikatika koriini. Eereka ikinimane sari Teoso apisatoō. Iuasaaki apanakini apakapari imisiritiko. Apanakini apakapari iparĩkana ĩki. ²⁸Ininiã Kristo okaãka ātikatika kaiãopokori kākiti ĩkapani, imaerekanina imakatzakini ĩkapani. Iuaĩkana iua kanapiriã. Iuasaaki !imisiritaãkaikako kākiti maerekani xika. Iua ĩkasaaki, imakatzakariko iua iãtapakani, maerekani sauaki auakani. Anikana itixinemoni ātipirika Teosokata auinina ĩkapani.

Pirãtxi Arẽka Kona Apakata

10 ¹Kitxakapirĩka Teoso paniãtakiti Xoteoakorimoni sanõkatxi atoko itxa. Ikara oerekari kākiti iuasaaki auakani atão inakari apokini āti õti. Ikinipoko atão inakari !apokapanika ninoamoni. Ininiã pirãtxi okiko ātipirika kona txĩkitakari kākiti iposope Teosomoni apokini. !Ikamaerekatana ninoa. ²Pirãtxi arẽka makatzakiniãri kākiti maerekani, ininiã ninoa takanapamariko pirãtxi okinina, kotxi Teosomoni apokakani oeretapeẽkaika, ininiã imarotamarina ãkixinireẽna imaerekanina mauakani. ³Txamari pirãtxi arẽka !imakatzakari kākiti maerekani. Ininiã ikinikanani pirãtxi okakori oerekari kākiti imaerekani auapanika. ⁴Kema auĩte arẽka, potxi arẽka pakini kona posotari imakatzakiniri kākiti maerekani.

⁵Kristo apokasaaki ĩkorapokoriti, itxari Teoso:

Pirãtxi okakori pitemoni siãkori kona pinireka. Ininiã pite kamari ĩtotxi nota ĩkapani.

⁶Pirãtxi arikiko pite ĩkapani, pite !apokaerekatari. Kākiti sikiniri isikakiti pitemoni imaerekani pimakatzakini ĩkapani, pite !apokaerekatari. !Ikamapoxokonitai.

⁷Iuasaaki nitxai. “Uaikarano nota. Paãtsopateẽ iõkatapeẽkaika nota pirena. NiTeosone uai napoka pinireẽkiti nikamini ĩkapani,”

itxa Xesosi.

⁸Merepanika Xesosi txari iri: “Pirãtxi okakori pitemoni siãkori kona pinireka. Pirãtxi arikiko pite ĩkapani, pite !apokaerekatari. Kākiti sikiniri isikakiti pitemoni, pite !apokaerekatari. !Ikamapoxokonitai,” itxa. Iuaritika Teoso sãkire iõkatsopatakori kitxakapirĩka paniãtari ikara kamiko. ⁹Eereka Kristo txari iri: “Uaikarano nota. Uai napoka pinireẽkiti nikamini ĩkapani,” itxa.

Ikara atoko inakasaaki, Xesosi xipokari pirãtxi okiko, kotxi iua apoka uai Teoso nireẽkiti ikamini ïkapani.

¹⁰Teoso nireẽkiti iaõka ikamini kamaerekataua ate, kotxi Xesosi Kristo ipina ãtikatika ikinimane ïkapani.

¹¹Sasetoxiakori ïkorapokoriti auakani sapika ikiniõtika Teoso apisatoõ iparĩkana ikaminina ïkapani. ãtipirika iua okari pirãtxi Teoso isikini ïkapani. Itxama, ikara !iposotari maerekati imaktxakini. ¹²Iuaritika Kristo, ate sasetotxine, iuaka sikapekaua ikoriini kãkiti maerekani imaktxakini ïkapani. Ikamari ikara ãtikatika. Iposo atoko, iitopãka Teoso kikomoni. Ikara atoko ininiã, ixipokari iparĩka. ¹³Iuaã iãtapari ikinika imokaiakari xipokini. Ikiti itakiniãtaã atoko ninoa. ¹⁴Ininiã ãtikatika okaãka kãkiti ereka inini ïkapani. Iua kamaãpotana ninoa erekaãpo ininina ïkapani.

¹⁵Erekari Matamatakoti apaka txaua ate ikara atão inini. Merepanika itxari:

¹⁶Apiananiri txari: “Ia nikamaenetakiti nikamako ninakitiakori ïkapani ãti õti. Ia nikamaenetakiti: Nipaniãtakiti nitakako ninoa ãkixinireẽ. Nipaniãtakiti niõkatakato iikiteẽna.”

Itxa Erekari Matamatakoti. ¹⁷Apikomoni itxa:

Kona nixinikaikari maerekati ikamakitina. Apaka nipaniãtakiti ninoa takanapakiti, !nixinikaikako.

¹⁸Teoso maktxakasaakiri maerekati akamakiti, ininiã amaerekani maktxakaãkapeka. Ininiã !auaika okakori kãkiti maerekani maktxakini ïkapani.

Maãpoka Teosomoni

¹⁹Ininiã nitariakori uatxa !hĩpĩkarauatape hiĩroini Teosonani Auini Pakitaãtaã, kotxi Xesosi iĩkitxitapekari aĩroini ïkapani iuaka arẽkaã.

²⁰Xesosi ipikasaaki, iua kamari kimapori amaneri, maxipokati, Teosomoni asini ïkapani. Ipikasaaki, imaktxakari mãkatxi mata Teosonani Auini Pakitaãtaã arõkakari, Teosomoni aĩroini ïkapani.

²¹Atemoni aua sasetotxi apiatakari Teoso aapoko nĩkatakari. ²²Ininiã maãpoka Teosomoni. Maãuiritari atão inakarínoka kaikotini aãkixinireẽ. Maãuikari ikinika iua sãkire. Kãkiti kitxakapirĩkarini tseẽrauata arẽkatxiã, maerekati maktxakiko ïkapani. Ininiã maamanaãri Xesosi tseẽtiniri aãkixinire oeretiniri ïkapani. Kitxakapirĩka kãkiti kipaãtaua Teoso aapoko ïroini ïkapani. Iua atokokana maamanaãri Xeosi aĩto arokini ãparaã ereriã. Ikara atoko aniniã, maãpoka Teosomoni. ²³Iteene

maãuikari aimarotakiti asãpiretakiti, kotxi Teoso kamapitikariko ikamaenetakiti. ²⁴Maxinikariko ia. Natokopa itxa aõtãkikakakiniua atiraõkiuatini ïkapani, erekari akamini ïkapani apaka? ²⁵!Apakata atakanapiniri aãpotiitiniua Teoso ïkapani. Apanakini !litotaikari apotiitiniua Teoso ïkapani. Masikataparaxiniretakakaua. Apiata masikataparaxiniretakakaua, kotxi aãuïte kanapiriini ïkorapokoritimoni kaiamapeka.

²⁶Atão inakari aimarotiniã, atão inakari aãpakapiniã, eereka maerekati akamapika, kotxi anirekari maerekati akamini. Iuasaaki !luaika amaerekani ïkitxitiko. Iuasaaki !luaika amaerekani makatxakiko. ²⁷Iuasaaki aimarotari kãkiti ikara atoko inakani misiritaãkako, kotxi Teoso mokaiakariakori itxauana. Arikatxi apiatakari xipokanako ninoa. Pïkaretxinoka aua ninoa ïkapani. ²⁸Kitxakapiriãka kãkiti makïpitakaniãri Moisesi paniãtakiti okapeëkaika. Ipi, atxiïti ipi ãti pakini kãkiti atamatiniãri iua kaminiri maerekati, ininiã okaãka. !Auiritaãka imitekini. ²⁹Ininiã natokopa itxa kãkiti misiritiko Teoso ãkiri sãkire imakïpitakaniã? Apiata iua misiritiko, kotxi Teoso ãkiri ikatxaratini atoko itxa imakïpitakaniri iua sãkire. Iuasaaki !ipaxitari iua arëka amaerekani makatxakakari Teoso sikaenetakiti. Iuasaaki imisãkirepiretari Erekari Matamatakoti, ïkinipoko erekari sikakari. ³⁰Aimarotari ia sãpiretakari. Iua txari:

Notanoka xikatxirauata. Notanoka misiritanako ninoa
imaerekanina xika,

itxa Teoso.

Apaka Teoso sãkire iõkatsopatakori txari:

Apiananirinoka sãpiretari kãkiti inakitiakori misiritiko.

³¹Kãkiti maerekati kamakani apokasaaki Teoso ãtipirika auãki inakari apisatoõ, iuasaaki pamonõkoniri, kotxi kãkiti misiritakari itxaua.

³²Hïxinikariko merepitiapanika Teoso sãkire hãuikini õti. Hiïkite iopinikiko atoko itxa iuasaaki. Iuasaaki himarotari Teoso sãkire. Iuasaaki iteene hãtatsiirauata Xesosi sãkire hãuikini xika. Iuaritika iuasaaki hïtaparaxinireritika hãua. Iuasaaki !hïtakanapari Xesosi sãkire hãuikini. ³³Iuasaaki kãkiti apisatoõ apanakini napetai. Ninoa misãkirepiretai hïte. Imisiritaina hïte. Iuasaaki hïte moianatari apanakini Teoso sãkire auiaãkani, kãkiti misiritakini. Ininiã iuasaaki hïte apaka misiritaãka. ³⁴Hïtoretana apanakini Teoso sãkire auiaãkani kateia ãki auakani. Apanakini mixirikari hïtii Kristo sãkire hãuikini xika, iuaritika hïpoxokoniua, kotxi

iuasaaki himarotapekari auapitika iaxiti hītii Teoso sikakiti. Īkora tiitxi kona xipoka. Apiaerekata tiitxi iuaxiti auakari.

³⁵Ininiã kona hītakanapapiri hītaparaxinire, kotxi āti ōti Teoso iikitxitai hītaparaxinire auiniã. ³⁶Himīteenekariko ikinika Kristo ĩkapani. Hikamariko ikinika hītaparaxinireritika. Ininiã Teoso paniãtakiti hīkamakasaaki, hāpakapariko isikaenetakiti. ³⁷Teoso sākire iōkatsopatakori txari:

Apikomoni mokatanitika iua kanapiriãko. Iketo ōti ikanapiriãpitika.

³⁸Kākiti atão inakari kamakari auini erekari, kotxi auikari nota sākire. Kākiti sipikapapiretiniãri nisākire, nota !apokaerekatari iua,

itxa Teoso. ³⁹Ate kona sipikapapiretari Teoso sākire. Ininiã !axipokaãka. Teoso sākire auiaãkani atxaua ate. Iua makatxakari amaerekani aãkixinireẽ auakari.

Teoso Sākire Auikiko Pirena

11 ¹Atão aũukasaakiri Teoso sākire, iuasaaki aimarotapitikari aãpakapiniri aiãtapakiti. Atão aũukasaakiri Teoso sākire, iuasaaki aimarotari amatamatakiniti auapitika. ²Kitxakapirĩka Teoso apokaerekatana isākire auiaãkani, kotxi iteene auikarina isākire.

³Teoso sākire aũukasaaki, aimarotari iua kamari itixi, iaxiti pakini isākireẽnokara. Aãtamatakitiã !ikamari itixi, iaxiti pakini. Isākireẽnokara ikamari ikinipoko.

Teoso Sākire Auiãkari Apeo Inakori

(Xénesisi 4.2-12)

⁴Apeo inakori auikari Teoso sākire, ininiã Teosomoni isikakiti apiaerekata, kotxi Apeo sikari Teosomoni Teoso sākire iaõka. Itari Kaiĩ inakori sikakiti poião erekari. Apeo auikari Teoso sākire, ininiã Teoso apokaerekatari iua sikakiti. Teosomoni atão inakari kamakari itxaua Apeo. Kitxakapirĩka Apeo koriã, uaritika iua auikiniri Teoso sākire oerekapanikaua Teoso tiretiniri kākiti isākire auiaãkani.

Teoso Sākire Auiãkari Enoki Inakori

(Xénesisi 5.21-24)

⁵Enoki inakori apaka auikari Teoso sākire. Ininiã Teoso anikari iua iaxiti. Kona ipina. Mapĩkatipanika anikaãka Teosomoni. Iuasaaki kākiti !apokaikari iua, kotxi Teoso anikapekari iua. Isini apisa kākiti

imarotari Teoso apokaerekatiniri iua. Iua kamapoxokonitari Teoso. ⁶Teoso sākire amauikakaniā, kona akamapoxokonitari Teoso. Kākiti Teosomoni apoākari, merepanika auikariko Teoso auini. Apaka ninoa auikariko Teoso sikiniri erekari kaiāopokori iua nitakarimoni.

Teoso Sākire Auiākari Noee Inakori

(Xénesisi 5.28-9.29)

⁷Noee apaka auikari Teoso sākire. Teoso sāpiretari iua kākiti mimarotakiniti monōkoni. Iuasaaki iua pīkarauata, ininiā ikamari maporo mitari iua aapoko āki auakani mapinakani īkapani. Noee auikari Teoso sākire, ininiā isāpiretari Teoso misiritiniri kākiti imaerekani xika. Teoso txīkitakari iua atāo inakari ikamini, kotxi iua auikari Teoso sākire.

Teoso Sākire Auiākari Apraão Inakori

⁸Apraão apaka auikari Teoso sākire, Teoso paniātakasaakiri iua ātiātaā isini. Iua kīpitari Teoso sākire, ininiā iua sari, txamari kona imarotari isinimoni. ⁹Iua auikari Teoso sākire, ininiā iua aua Teoso sikaenetakiti tixitiā. Iuaā iua aapoko aamata kamakori, kotxi āti tixinikiri itxaua. Apaka Isaki, Xakoo pakini aua aapokotxi aamata kamakori. Ninoa apaka apakapari itixi Teoso sikaenetakiti. ¹⁰Apraão iātapari Teoso sitatxine apokini, kotxi Teoso kamari ikara sitatxi. Ixinikakiti iaōka ikamari. Ikara sitatxi kamaāka kaikori nopini, ininiā !lixipoka.

¹¹Apraão auikari Teoso sākire. Iua imarotari ikiomaneēpeka inini. Apaka imarotari itanoro Sara kona posotaikari keene onini. Iuaritika auikari Teoso sākire irītxi ininiua īkapani. Imarotari Teoso sikapitikariko isikaenetakiti. ¹²Ininiā iua kiki iteene kiomātxi inakariua, iuaritika irītxi itxaua. Iua aua itomaneri imekaniriakori, itomaneri apika mekaniriakori pakini. Itomaneri apika mekaniriakori iōriki iaxiti auakani atoko itxanako. Ikipatxite atoko itxanako apika mekaniriakori. Kaiāopanina ninoa.

Teoso Sākire Auiākani Iātapakiti

¹³Ikinika ninoa kākiti Apeo, Enoki, Noee, Apraão pakini auikari Teoso sākire. Ikoriākasaakina, ninoa kona apakaparina ikinika Teoso sikaenetakiti. Ninoa imarotari Teoso sikaenetakiti ōtakopanikari apokini tīkane. Ninoamoni īkorapokoriti kona atāo ninoa

tixine. Maparakini atoko itxauana. ¹⁴Kākiti ikara atoko inakani oerekari ninoa nitiniri ninoaka tixine. ¹⁵Itixi itakanapakitina ixinikaākamanako, ininiā iuaīkana ikanapiriāmanako iuaātaā. ¹⁶Ninoa kona kanapiriā, kotxi inirekarina apiaerekatakari itixiti, iaxiti auakari. Ininiā Teoso lipētauata ninoa Teosone ininiua īkapani, kotxi iua kamapekari sitatxi ninoa īkapani.

Apraão Okaaritiniri Imi

¹⁷Apraão auikari Teoso sākire, Teoso ataerekatakasaakiri iua. Iuasaaki iposope okiniri Isaki Teoso īkapani. Teoso sikaenetakiti apakapakari iua Apraão. Iposope imatonōkari imi okini Teoso īkapani. ¹⁸Teoso sāpiretapekari iua: “Isakimoni auako pimekaniriakori, papika mekaniriakori pakini,” itxari. ¹⁹Iuasaaki Apraão xinikari Isaki ipininiā, Teoso ōkitikari iua iuaīkana. Iuasaaki Isaki ipinaarita, ininiā kākiti ipīkari iuaīkana ōkitikiniua atoko itxa Isaki iuasaaki.

Isaki, Xakoo, Xosee Pakini Auikiniri Teoso Sākire

²⁰Isaki apaka auikari Teoso sākire, kotxi itakari erekari imi Xakoo, Isao pakinimoni, Teoso nireēkiti iaōka ikaminina tīkane. ²¹Xakoo apaka auikari Teoso sākire. Ikoriini apisa itakari erekari Xosee anaakorimoni. Iuasaaki isāpiretari Teoso iua ereka inini. Iuasaaki iioītekaua itsonarekeē. ²²Xosee apaka auikari Teoso sākire. Ipinini apisa isāpiretana Isaeokini Exito osipikinina īkapani. Ininiā iua paniātana ninoa anikiniri iua api Teoso siākiti itixitimoni.

Moisesi Auikiniri Teoso Sākire

²³Moisesi iri, inoro pakini auikari Teoso sākire. Iponaniāka atoko, ninoa kipatari iua ipi āti pakini kasiriti. Iuasaaki imarotarina Moisesi kona āti eenetxi atokoni. Ipinimoni itxa. Ninoa imarotari Paraoo paniātiniiri amarini okiko, iuaritika !ipīkarina Paraoo paniātakiti.

²⁴Moisesi auikari Teoso sākire. Mitapeka inakasaaki, kona inirekari kākiti akiritiniri iua Paraoo ākero ākiri ininiua. ²⁵Iua mereēri imisiritiko Teoso nakitiakorikata. Ininiā iua sari ninoakata. !Inirekari poxokonitxi maerekati kamakiti, kotxi ikara poxokonitxi mokatanitika xipoka. ²⁶Iuamoni apiaerekata ninoa xinitiniri iua Kristo sākire auikini xika. Kona iua nirekari katiiri ininiua Exito auakanikata, kotxi imarotari āti ōti Teoso sakiniri iua iparīka īki.

27 Exito ipotorikasaaki, iua auikari Teoso sākire. Iuasaaki Exito auakani auīte omanākarauata. Iuaritika lipīkari iua. Imīteenekari ikinipoko, kotxi auikari Matamatakoti sākire. Atamatakiti sākire auikini atokotxikana, auikari imatamatakiniti sākire. 28 Iua auikari Teoso sākire, ininiā ipaniātari kākiti okiniri soti auīte. Eereka ipaniātari itakiniri iarēka ĩronakikoātaā tinikata. Ininiā Teoso nitiri ipīkitxi mīkari iaxitikiri ninoa nopini inapaāpotakasaaki, kona okari Isaeokini merepanika auakani, kotxi atamatari arēkatxi.

29 Kākiti Isaeokini auikari Teoso sākire, ininiā ĩpiriātarina potxoari uiniti Pōkamarariā inakori sonākakari kimaporiti nopini. Kākiti Exitokini apaka nirekari inapinina ninoa napini atoko. Txamari iuasaaki āparaā kanapiriāpe iua kimapori nopini, ininiā ikinika ninoani axāpoātape.

Teoso Sākire Auiākani Kāiatini

30 Isaeokini auikari Teoso sākire, ininiā Xerikoo sitatxiti iakirokana setxi pakini ōti. Iuasaaki pirikeri sitatxi ākitakari irikapoakata, kotxi ninoa kamari Teoso sākire iaōka.

31 Haapi inakoro kanokarero otxaua mitxi. Eereka oāuikari Teoso sākire, kotxi oāpakapana kākiti iuaātaā apokakani, Teoso iokanatakini, ininiā kona okoriā kākiti Teoso sākire mauīākanikata.

32 Kiripa apikomoni nisāpiretai? Auapitika apikomoni itomaneri kākiti Teoso sākire auiākani. Kona apakata uatxa nisāpiretinii hīte Kitxiāo pirena, Paraki pirena, Sāsāo pirena, Xepitee pirena, Tavii pirena, Samoeo pirena, apanakini Teoso sākire sāpiretakani pirena pakini. 33 Ninoa kākiti auikari Teoso sākire. Ininiā inaiatakasaakina Teoso sākire mauīākani, ninoa kāiata. Ninoa kamari atāo inakaranoka. Iuasaaki apakaparina Teoso sikaenetakiti. Ninoa okaāka ākitimoni. Iuaritika kona ākiti okana. Ākiti nama totaāka iuasaaki. 34 Xaminamoni okapeēkana, iuaritika xamina !arikana. Kona apakata okikona iouata mitaroā. Ninoa mataparani, iuaritika kataparaxinirepeka itxana, kotxi auikarina Teoso sākire. Neenamatzxi auakasaaki, pataparana ninoa, ininiā āti uāka sotatoakori miteka.

35 Sitoakoro Teoso sākire auiākani iuaīkana aua imiakori, kotxi Teoso ōkitikana ninoa ipīkasaakina. Apanakini Teoso sākire auiākani noropataāka. Imatakanapakaniārina Teoso sākire auikinina, okaākana, iuaritika ninoa ĩnirekarina itakanapinirina, kotxi ninoa imarotari āti ōti Teoso ōkitikana ninoa. Iuasaaki apiaerekata ninoa apakapakiti.

³⁶Apanakini Teoso sākire auiākani napetaāka. Inoropataākana aāpitsaā. Apanakini Teoso sākire auiākani iaxirikaāka, kateia āki taka inaākana. ³⁷Apanakini kiporonakaāka kai soroā. Apanakini kākiti sehotxiā kitxirākaāka apanīkaki iītona, auākipanika inakasaakina. Apanakini okapeēka iouata mitaroā. Apanakini māka soti auīte mata, potxi mata pakini. !Kamākana. !Katiina. Maerekati kamakani nitana ninoa okinina īkapani. Imisiritapeēkana.

³⁸!Apakata īkorapokoriti ninoa īkapani, kotxi ninoa iteene erekari.

Ninoa miteēkata āparaā makipakaniātaā, ōtanoxiratari auiniātaā apaka. Aariko itixiākiriā, kai iriko āki apaka apanakini Teoso sākire auiākani aua, kotxi aapokona !auari.

³⁹Teosomoni peerekana ninoa, kotxi iteene auikarina iua sākire. Iuaritika ninoa !apakapapanikari Teoso sikaenetakiti iusaaki.

⁴⁰Teoso nirekari apiari erekari ate īkapani. Inirekana ninoa atekata aāpakapiniri isikaenetakiti.

Teoso Oerekari Atāo Iua Anaakori Aniniua

12 ¹Ininiā kaiāopokori Teoso sākire auiākani itixine apokakani atamataua ate uatxa. Ininiā matakapanari ikinika ate iomakotetakari. Matakapanari maerekati akamakiti, kotxi ikara patimari iaxirikiniri axinire. Ataparaxinireritika maūuako. Mamīteenekari ikinipoko. Mitekakani mitekini atoko mamitekako Teoso oerekinimoni. ²Ātipirika maātamatari Xesosi. Maūuikari iua sākire, kotxi iuanoka amaerekani makatxakakari. Iua txīkitakaua ate atāo aūuikiniri Teoso sākire. Xesosi xinikari poxokonitxi apokini ōti, ininiā iusaaki imīteenekari aamina ĩpiriāmitakari nopini ipinini. !Imaākatari pētatxi ikara atoko ipinini. Ikinipoko iposo atoko iitopāka iri kikomoni, kotxi iparīka ate īkapani iposope. ³Hīxinikariko Xesosi. Itene imīteenekari maerekati kamakani manirekakaniri iua. Hīxinikariko iua, ininiā kataparaxinirei hīte. Iusaaki !hiōkapeta.

⁴Hīarēka kona xiketapanika maerekati hītakanapini xika. Ininiā hīte kona naiatari maerekati iua Xesosi naiatiniri atoko. ⁵Atxiīti himaxinīkaretari Teoso sāpiretakiti ate isikataparaxiniretini īkapani. Iua akiritaua iua anaakori aniniua. Ia isākire:

Namarite, Apiananiri auiritai pite atatsiirauatini atāo inakari pimarotini īkapani, ininiā kona pimatinaniuatape iua misiritakasaakii pimaerekani xika.

⁶ Kotxi Apiananiri misiritana itiretakini maerekati ikamakasaakina, imaerekani itakanapinina ĩkapani. Imisiritana ikinimane iua anaakori atão inakari imarotinina ĩkapani.

⁷ Ininiã himiteenekariko hĩri iaxitikiri misiritinii himaerekani xika. Ikara himisiritiko oerekai Teoso anaakori hininiua, kotxi inĩkatoi hĩte amarini irĩtxi nĩkatini atokokana. Ikini irĩtxi ĩkorapokoriti auakari misiritari iua anaakori atão erekari ikaminina ĩkapani. ⁸ Teoso mamisiritakaniã hĩte maerekati hĩkamakasaaki, ininiã iua anaakori atão inakani !hĩtxaua. Teoso hĩri !itxaua iuasaaki. Ikinimane Teoso sãkire auiãkani misiritaãka, maerekati ikamakasaakina. ⁹ Akinika ate irĩtxi aua ĩkorapokoriti. Ninoa misiritaua maerekati akamakasaaki. Iuaritika ate paxitana ninoa. Apiata apaxitari aĩri iaxiti auakari imisiritakasaakiaua ate, maerekati akamakasaaki, kotxi axinire iri itxaua. Ininiã akamakasaakiri aĩri iaxiti auakari nireẽkiti, aãuapininiika atxako. ¹⁰ ĩkorapokoriti auakani irĩtxi misiritaua maerekati akamakasaaki. Mapakananinani ikara atoko ikamana. Imarotakitina iaõka ikamana. Teoso misiritaua maerekati akamakasaaki ereka anini ĩkapani iua atoko anini ĩkapani. ¹¹ Amisiritikosaaki, kona apoxokoniuata, kotxi patsiiri. Iuaritika eereka akamari atão inakaranoka. Iuasaaki erekaxinireua, kotxi Teoso oerekepekaua atakanapiniri amaerekani imisiritakasaakiaua.

¹² Ininiã hõkitikari hĩuako sãpakakari. Hĩkamataparatarari hĩpotoriki iõkapetakari. ¹³ Hõeretariko kimapori atão hĩsini ĩkapani. Ikinika himaerekani hĩtakanapako. Ininiã hĩkamakiti atão inakari aua. Ininiã apanakini hĩte atamatakani !irika hĩte maerekani xika. Ininiã maerekati !ikamana, kotxi hĩte oerekepekana erekari imarotinina ĩkapani. Ininiã erekepekana ninoa.

¹⁴ Ikinipoko hĩkamako apanakinikata himaneenamauatakani ĩkapani. Ikinipoko hĩkamako erekarinoka hĩkamini ĩkapani. Kãkiti makamakanisaakiri erekari, kona atamatapaniri Apiananiri. ¹⁵ Erepaniko, kotxi atxĩiti kona hãpakapari ikinipoko erekari Teoso siãkiti. Kona hãuiritapiri kapixi inakari aneini hãkixinireẽ, kotxi ikara maxikari kaiãori kãkiti. Itxikotari ninoa ãkixinire. ¹⁶ Kona hãuiritapiri anokaretxi kamakani auini hĩtekata. Kona hãuiritapiri Teoso manirekakiniti kamakari Isao atoko inakari auini hĩte sauaki. Merepitipanika iponaniãkari iua Isao, txamari isikari iri sikaenetakiti itarimoni axapitiki nipokori apakapini ĩkapani. ¹⁷ Eereka iuaĩkana inirekamari ikara iri sikaenetakiti. Inirekari iri takiniri erekari iuamoni, txamari !apakataika iua apakapiniri. Itxiapata, kotxi

mitxi ikamakiti inirekari imamakini, txamari iposope itarimoni iri sikaenetakiti isikini.

¹⁸Kitxakapirika kākiti Isaeokini sari ixirata Sinai inakorimoni Teoso paniātakiti apakapinina ikapani. Iuasaaki ixirata arika. Ipiā, itima kataparari apaka aua iuasaaki. Ikara atoko inakari ixiratamoni kākiti maātakakitimoni !haāpoka. ¹⁹Ixirata Sinai inakoriātaā kākiti kenakotari trōpeta. Ikenakotari iaxitikiri sākire. Iuasaaki iteene ipikarena auana, ininiā !nirekaikarina ikenakotinirina apikomoni ikara sākiretxi. ²⁰Kotxi iuasaaki !imiteenekarina ia Teoso paniātakiti, kotxi iuasaaki Teoso txari: “Kākiti, pirātxipeka apaka maātakiniāri oxiratari, ikiporonakaākana kai sorōā ipininina ikapani.” ²¹Iua xirata auite kamari kākiti pīkarauatini. Iuasaaki Moisesi txari: “Nititinanaka. Iteene nipīkarauata,” itxa.

²²Hīte kona apoka oxiratari Sinai inakorimoni. Hīte apokapeka ixirata auite iaxitikiri Siāo inakorimoni. Hāpokapeka Xerosareē sitatxiti iaxitikirimoni, Teoso ātipirika auāki inakari sitatxineātaā. Hīte apokapeka Teoso nitiriakori iaxitikini apotiitiniātaāua. Ninoa iaōtiko !uari, kotxi kaiāopokori. ²³Hīte apopeka Teoso mereēkini apotiitiniātaāua. Ipoxoniuatana. Teoso anaakori itxauana. Iuākana iōkatsopatapeēkaika Teoso aātsopateē itixineē. Hīte apopeka Teosomoni. Iuara sāpiretari kākiti misiritiko. Apaka iua ikitxitana atāo inakari kamakani erekari ikamakiti ikapani. Hīte apopeka erekari kamakanimoni. Teoso txīkitakana ninoa atāo inakari ikaminina. ²⁴Hīte apoka Xesosimoni. Iuara txīkitakari Teoso kamaenetakiti amaneri apokini. Xesosi arēka xiketakasaaki, hīte apoka Teosomoni. Apeo oxiketari pirātxi arēka imaerekani makatxakiko ikapani. Kristo oxiketari iuaka arēka ātikatika amaerekani imaktxakini ikapani, ininiā Kristo arēka apiaerekata.

²⁵Ininiā erepaniko. Hīkenakotariko Teoso sākire isākirauatakasaaki. Kitxakapirika kākiti manirekakaniāri Teoso sākire sāpiretakari ikorapokoriti auakari, imisiritaākana. Imitekinina !uari. Teoso tixine auakari sākire amanirekakaniā, apiata amisiritiko. Amitekini !uari, ininiā erepaniko. ²⁶Teoso misākiretakasaakiri Moisesi, itixi iakeka. Uatxa Teoso sāpiretari ikamaenetakiti. Itxari: “Iuaikana niōkokariko itixi. Niōkokariko iaxiti apaka,” itxa. ²⁷Isākire “iuaikana,” kotxi iōkokariko ikinipoko ikamakiti. Ninoa makatxakaākako. Auapitikako maiōkokaeētakoni. Ikara kaikotako.

28Teoso auñtetxi ininiãtaãua, ate sinimoni, !iõkokaãka. Iuaãtaã xipokini !uari. Ininiã mapoxokoniua. Masãpiretari iua: “Peerekai pite.” Atão maparĩkauata Teoso ïkapani. Makamari iua apokaerekatakiti. Mapaxitari iua. Mapĩkari iua manirekakiniti akamini. 29Kotxi aTeosone xipokari imanirekakiniti, xamina tirinakari xipokiniri atokokana.

Iõkatsopari Mapotõkire Pirena

13 1Ininiã hĩtoretakakauako. Itaritxi atoko hĩtxako, kotxi Teoso anaakori hĩtxaua. 2Ãtiãtaã ïkani apokiniã, hãpakapanako ninoa haãpoko. Apanakini apakapakasaakina ãtiãtaã ïkani, apakapana Teoso nitiriakori itixinekini. Iuasaaki !imarotarina ninoa Teoso nitiriakori ininiuana. 3Hĩtoretanako Teoso sãkire auĩãkani kateia ãki auakani. Kateia ãki ninoakata hãuini atokokana, hĩxinikanako ninoa. Ininiã hĩtoretanako misiritakoni. Kãkiti misiritiniã hĩte, iuasaaki hinirekari apanakini tiretinii. Iua atokotxikana hĩtoretanako misiritakoni.

4Hĩpaxitaroko ãti ïtanoro. Hĩpaxitariko ãto ïtaniri. Pĩtanirikatanani pisirĩkako. Pĩtanorokatanani pisirĩkako. Teoso misiritanako ikinika kanokarero, kanokareri pakini.

5Txineiro !hĩtoretape. !Hinirekapiri ãti kãkiti nakiti. Hĩpoxokotariko hĩteka tii, hĩteka txineirote pakini. Apikomoni !hinirekape, kotxi Teoso txari:

Nimatakanapapekaniikaraiko hĩte. Nimasikapekaniikaraiko hĩte, itxa. 6Ininiã ia Teoso sãkire iõkatsopatakori aãuika:

Apananiri nimoianari itxaua, ininiã kona nipĩkari kãkiti kaminiri maerekati notamoni.

7Hĩxinikariko hãuĩteakori Teoso sãkire hĩtemoni sãpiretakani. Hĩxinikariko ninoa auini, ninoa ipinini apaka. Hãuikariko Teoso sãkire ninoa auikiniri atokotxikana. 8Xesosi Kristo kitxakapirĩka atokotxikana uatxa. Xesosi Kristo uatxa atokotxikana ãtipirika.

9Kona hãuikapiri apanakini oerekakiti atão minakati, kotxi ikini sereti oerekakori atão minakati auapitika. Hãuiritariko ikinipoko erekari Teoso sikakiti sikataparatiniri hãkixinire. Anikakiti !sikataparatarari aãkixinire, ininiã !hãuikapiri kãkiti sãpiretinii apanakini nipokori erekari hĩxinire ïkapani, apanakini nipokori !erekari hĩxinire ïkapani.

10Sasetotxiakori Teoso aapoko aamata kamakori ãki parĩkauatakani Teosomoni sikakori takikoãtaã !apakaparina erekari Teoso sikakiti ate apakapiniri atokokana.

¹¹ Teoso aapoko aamata kamakori auakasaaki, sasetotxiakori auíte apiatakari anikari pirãtxi arẽka Teosonani Auini Pakitaãtaã. Iuaã isikari pirãtxi arẽka Teosomoni kãkiti maerekani Teoso makatxakini ïkapani. Iua pirãtxi ïto anikaãka aapokotxi mapotõkire. Iuaã arikaãka. ¹² Xesosi pirãtxi okakori atoko itxa, kotxi anikaãka sitatxi mapotõkire okiko ïkapani. Ininiã iua arẽkaã imakatxakari kãkiti maerekani, ikamaerekatinina ïkapani. ¹³ Ininiã masa iuamoni ipininiãtaã. Iua napetiko atokokana maãpakapa. ¹⁴ Ìkorapokoriti kona aua sitatxi maxipoãkati. Aiãtapari sitatxi iaxiti ïkari.

¹⁵ Kipa asika Xesosimoni Teoso ïkapani? Ætipirika masikari asãkire erekari. Matxari: “Peerekari Teoso.” Ikara asikakiti Teosomoni, kotxi asãpiretari kãkiti iua aãuíte ininiua. ¹⁶ !Himaxinïkaretapiri erekari hïkamini apanakinimoni. !Himaxinïkaretapiri himoianatakakiniua. Ikara atoko akaminiã, Teosomoni asikakiti inireẽkiti atoko itxa, ininiã ikara atoko inakari akaminiã, ikamapoxokonitari Teoso.

¹⁷ Hïkïpitariko hïauíteakori sãkire. Hïkamariko ninoa paniãtakiti, kotxi ninoa nïkatari hïxinire. Teoso sikari ikara parïkatxi ninoamoni, ininiã ãti õti ninoa sãpiretari Teoso ikamakitina. Ininiã hïkamariko ninoa paniãtakiti, ininiã iusaaki ninoa poxokoniuata iparïkauatakasaaki. Himakamakaniãri ninoa paniãtakiti, ninoa matinaniuata, ininiã ikara atoko inakari !erekari hïte ïkapani.

¹⁸ Himisãkiretariko Teoso ate ïkapani. Aimarotari aãkixinire ereka inini, kotxi anirekari ikiniõtika atão inakarínoka akamini. ¹⁹ Iteene namanaãi himisãkiretiniri Teoso, iua paítiki iokanatinino iuaïkana hïtemoni.

Teoso Misãkiretiko

²⁰ Nimisãkiretari Teoso, kãkiti kamaerekaxiniretakari. Aãuíte Xesosi ipïkaripeka inakasaaki, Teoso õkitikari iua. Soti auíte atoko atxaua. Soti auíte nïkatakari apiari atoko itxa Xesosi, ininiã iua iteene nïkataua. Xesosi ipïkasaaki, iusaaki kãkiti apakapari Teoso sikaenetakiti. Ætipirika Teoso sikari ikara isikaenetakiti kãkitimoni. ²¹ Nimisãkiretari Teoso isikiniri ikinika erekari hinireẽkiti hïtemoni, iua nireẽkiti hïkamini ïkapani. Namanaãri iua Xesosi Kristo uãkaã, ikaminaua ate iua apokaerekatakiti. Ætipirika kãkiti txari Xesosi: “Erekai pite.” Ameẽ.

²² Nitariakori, iteene hïkenakotariko ikara nisãpiretakiti. Ia niõkatsopatakiti xapitinoka.

²³Ninirekari himarotiniri aĩtari Tximótxio kateia āki auakari sikakaāka. Mokatanitika iua apokiniā uai, nota sari iuakata hĩtemoni. ²⁴Hĩsāpiretari hĩauĩteakori ate xinikamanapitinina ninoa. Hĩsāpiretari ikinimane Teoso nakitiakori axinikamanapitinina. Xesosi sākire auiākani uai Itária tixini auakani xinikamanapitai hĩte. ²⁵Ikinipoko erekari Teoso sikakiti aua hĩtemoni. Ameẽ.

TXIAKO

Txiako Iokanatsopatakiti

1 ¹Nota Txiako. Teoso nitiri nitxaua. Apiananiri Xesosi Kristo nitiri nitxaua apaka. Niökatsopatari ia aätsopa hitemoni, Xoteoakori tosi nirimanetximoni Xesosi sãkire auiãkanimoni. Hite iarikape ikinika itixiti.

Ereëkai hite.

Auiãkori Ataerekatiko

²Nitariakori, ikini sereti maerekati apokasaaki hitemoni, hienenikako, kotxi ikara ataerekatai hite. ³Kotxi himarotari hãuiãkiti ataerekatikosaaki, hãtaparaxinireritika hãua. Himiteenekari imakinika himisiritiko hãpoxokoniritika. ⁴Ininiã imakinika himiteenekasaaki, hãxinikakiti, hãsãkire, hãkamakiti pakini erekari. Kona apikomoni pinireka ereka pinini ãkapani.

⁵Himarore mauakanisaaki, hamanaãri Teoso imarore isikinii ãkapani. Ininiã isikaiko hite hamanaãkiti. Itori Teoso sikakiti ikinimanemoni. !Isãpaka ate ätipirika aamanainiri iua. !Itxitai. Isikapitikari hamanaãkiti. ⁶Hamanaãkasaakiri, hãuikariko Teoso sikinii hamanaãkiti. !Erekari hãxinikiniri: “Atxiiti iua sikano namanaãkiti. Atxiiti kona isikano namanaãkiti.” Ikara atoko !hãxinikape. Ikara atoko xinikakari, tsakati potxoari uinitikiri atoko itxa. ãtima anikari tsakati itano, eereka ixitika. Kãkiti ikara atoko inakari, äti öti auikari Teoso sãkire, äti öti kona auikari Teoso sãkire. Itxaãpota. ⁷Kãkiti ikara atoko inakari kona xatiki apakapari Apiananiri siãkiti, ⁸kotxi ipi ixinikakiti aua, ininiã apanakini !auikari isãkire ikamakiti tãkane.

Matiiti, Katiiri Pakini Poxokoniuatini

⁹Pite aītari Teoso sākire auiākarii, atxiīti poiāori pitxaua, iuaritika pipoxokoniuatato, kotxi Teoso txīkitakai pite apiari pininiua.

¹⁰Pite katiirii, pipoxokoniuatato, kotxi Teoso kamapoiāotakai pite, kotxi katimari pixipokini aāui katimari xipokini atoko. ¹¹Atokatxi kanīkasaaki, kapatakari itxaua. Iuasaaki katsotati txiaroka. Iiui katxaka. !Erekaikaro. Iua atokokana kākiti katiiri xipokini. Paītiki ipinako, ininiā itakanapariko imakinika itii, iparīka pakini.

Misirikaretxi Mīteenekakani

¹²Teoso takari erekari kākitimoni imisiritiko mīteenekakarimoni, Teoso sākire matakanaapakatimoni. Ikinipoko imīteenekasaaki, Teoso txīkitakari iua ātipirika auini Teosokata. Apiananiri sikaenetari ikara iua tirketanimoni.

¹³Pinirekasaakiri maerekati pikamini, kona pitxapiri: “Teoso sikanireōtano maerekati nikamini,” kotxi Teoso kamanireōtiko maerekati ikamini īkapani !auari. Apaka kona Teoso sikanireōtari kākiti maerekati ikamini īkapani. ¹⁴Kākiti sikanireōtaāka maerekati ikamini, kotxi iua īto nireēkiti kosekari iua maerekati ikamini. Iuasaaki iteene inirekari inireēkiti ikamini. ¹⁵Maerekati piīto nireēkiti pikamakasaaki, maerekati itxaua. Ininiā eereka maerekati pikamapika. Eereka iua maerekati txīkitakari pixinire ipinini.

¹⁶Nitariakori nota tirketakini, kona hāuiritapiri āti misirienetini. ¹⁷Ikinipoko sikakori erekari atāo inakari, iaxitikiri itxaua. Aīri sikakiti ikara. Iuara kamari atokatxi, kasiri, iōriki pakini ponikini. Iua ātipirika kamari erekarinoka. Kita, uatxa, katana pakini, iua atokotxikana aīri Teoso. ¹⁸Aponaniā iuaīkana aākixinireē, kotxi aāuikari iua sākire. Iua nirekari aponaniini ikara atoko. Teoso kamari ikinipoko. Ikamakini, merepanika iuaīkana ponaniākani, atxaua ate.

Teoso Sākire Kīpitiko Pirena

¹⁹Ininiā nitariakori nota tirketakini, iteene himixinikariko āti sākire. Eereka iteene hīxinikariko hīkenakotakiti, hīsākirauatini apisapanika. Katima !hītxape hinaiatiniua. Hinaiatiniua apisa hīxinikariko hīkamakiti tīkane, ²⁰kotxi kākiti omanākarauatakasaaki, !ikamari atāo inakari Teoso paniātakiti iaōka. ²¹Ininiā hōkariko ikinika maerekati hākixinire txikotakari. Hītakanapariko

ikinipoko maerekati. Hãuikariko Teoso sãkire hãkixinireẽ takakori. Himarotariko iuanoka makatxakiniri himaerekani.

²²Teoso sãkire akenakotakanani atxa, !hĩtxape. Hĩkamariko isãkire iaõka apaka. Teoso sãkire kenakotakani makamakaniãri ipaniãtakiti, ninoaka misirienetaua. ²³Teoso sãkire kenakotakari makamakaniãri isãkire iaõka, kiki ãtakaãriã atamatoõtakari atoko itxa. ²⁴Iua itoõ atamataka atoko, isa. Iuasaakipeka imaxinĩkaretoõtapekua. Isanõka !ixinikaika. ²⁵Ikinika Teoso paniãtakiti erekari. Maerekati kamakani iaxirikakoni atoko. !Iposotarina erekari ikaminina. Ininiã kãkiti kamakasaakiri Teoso paniãtakiti, Teoso paniãtakiti sikakari kãkiti erekari ikamini ikapani. Kãkiti iteene imarotiniãri Teoso paniãtakiti, imamaxinĩkaretakaniãri, ãtipirika ikaminiãri, ininiã Teoso takari erekari iuamoni, ikamakitimoni.

²⁶Kãkiti sãpiretiniãri: “Nota auikari Teoso sãkire. Nikamari iua sãkire iaõka,” txamari kãkiti nini iauĩte atoko itxa. !Iposotari iotokakiniri maerekati isãpiretini. Iuaka misirienetaua. Iua auiãkiti na atão. Ikamakiti na atão apaka. ²⁷Kãkiti auiãkiti atão inakari auakasaaki, ikamakiti atão inakari auakasaaki, aãri Teoso apokaerekatari. Iua kãkiti kamari ia atoko: Itiretana imenõkariakori, tikinitakoni pakini, kotxi mauareni ninoa. !Auiritari !korapokoriti maerekati txikotiniri iua ãkixinire.

Hĩpaxitana Ikini Kãkiti

2 ¹Nitariakori, Xesosi Kristo aãuĩte Apiananiri itxaua. Iua sãkire atão auiãkani hininiãua, ininiã hĩpaxitariko ikinimane kãkiti. !Apakata hĩpotxitakininani hĩtoretini. ²Maxinikariko. Atxiĩti hãpotiitakasaakiaua, kiki apoka eremãkari. Iuakokiã aneo oro kamakoro aua. Apaka iusaaki apoka ãti kiki matiiti. Kitxakari imãka. ³!Apakata hĩpaxitiniri eremãkarinoka. Hĩsãpiretiniãri: “Uai iitopanatxi ereri nopini piitopãka,” pitxari. Txamari hĩsãpiretari matiiti: “Ikiraã pitima.” Atxiĩti hĩsãpiretari iua: “Uai ixiti nikititi takote piitopãka,” pitxari. Ikara atoko hĩkaminiã, !apakata. ⁴Ikara atoko hĩkamakasaaki, hĩxinikari katiiri apiaerekatini, matiiti poião ereka inini. Iusaaki hĩxiniãkiti na atão itxaua. Hãkixinire maerekati itxaua.

⁵Nitariakori nota tirketakini, hĩkenakotariko nisãkire. Teoso mereẽpekari matiini !korapokoriti auakani isãkire iteene auikinina ikapani. Ininiã ninoa Teoso tirketakani sariko Teoso auĩtetxi ininiãtaãua. Ikara isikaenetapeka iua tirketanimoni. ⁶Txamari

hĩte kona paxitana matiini. !Apakata. Katiirinira misirienetai hĩte. Ninoa anikai hĩte kākiti misiritiko mereēkanimoni. ⁷Ninoa katiirini misākirepiretari Teoso. Peerekari iua uāka, iuaritika ninoa kona paxitari iuāka. Ninoa misākirepiretakiti nakitiakori hĩtxaua hĩte.

⁸Kitxakapirĩka Teoso sākire iōkatsopatakori txari:

Piteka pitiretiniua atokokanera, pitiretanako pite takote auakani. Ikara ikinimane auĩte paniātakiti hĩkaminiā, hĩkamari atāo inakari. ⁹Hĩtiretiniāri hĩpotxitakininani, maerekati hĩkama. Ikara Teoso paniātakiti oerekai maerekati kamakani hininiāua. ¹⁰Ikinika Teoso paniātakiti hĩkaminiā, txamari ātinoka Teoso paniātakiti himakamakaniā, ininiā ikinika ipaniātakiti makamakani atoko hĩtxaua. ¹¹Teoso txari:

Kona pisirĩkape pĩtanoro minakotokatika.

Apaka itxari:

Kona pokaniuatape.

Atxiĩti kona pisirĩka pĩtanoro minakotokatika, txamari pokaniuata, ininiākara !pikamari ikinika Teoso paniātakiti. Ātika Teoso paniātakiti pimakamakaniā, !apakata. Ikara atoko ininiā, Teosomoni maerekati kamakari pitxaua.

¹²Teoso sākire iaōka akaminiā, aposotari erekari akamini. Ōpoĩkakoni atoko atxaua. Maerekati !imaĩkaikaua. Ininiākara atāo hĩsākirauatako. Atāo inakari hĩkamako, kotxi Teoso kamariko hĩtemoni isākire iaōka. ¹³Himaamonĩkakaniāri āti, Teoso kona amonĩkai hĩte. Imereēri himisiritiko. Apiaerekata hiamonĩkiniri āti, maerekati ikamakasaaki. Poiāo erekari himisiritiniri iua imaerekani xika.

Kākiti Sākire, Kākiti Kamakiti Pakini Pirena

¹⁴Nitariakori, kākiti txari: “Nota Teoso sākire auiākari nitxaua,” itxamari, likamari Teoso nirekaākiti. Atauako iua auikari Teoso sākire? Atauako, iua sākire posotari imaktxakiniri imaerekani Teosomoni isini ikapani? Konapitini. ¹⁵Atxiĩti hĩtari, atxiĩti hĩtaro Teoso sākire auiākani imākana !uari. Atxiĩti nipokori !uari ninoamoni. ¹⁶Iuasaaki atxiĩti hĩtxana: “Hĩsipiniikaua, erekaxinire hinini. Kamākaiko. Iteene hinikako,” hĩtxana atxiĩti. Txamari iuasaaki mākatxi !hĩsikana, nipokori !hĩsikana. Ikara atoko hĩkaminiā, !apakata hĩkamakiti. Hĩsākirenanira hĩsikiniā, ininiā maxikatiĩka hĩsāpiretakiti. ¹⁷Atxiĩti ikara atoko atxa. Asāpiretari aũuikiniri Xesosi sākire. Txamari kona akamari ipaniātakiti. Ikara

atoko aniniã, asãkire kona itxa. Aãuiãkiti sãkiretxiti ipinakari atoko itxa. !Kakamareri iua.

¹⁸Kãkiti atxiiti txari: “Pite aukari Teoso sãkire. Nota parĩkauata Teoso ïkapani.” Puposotari atxiiti poerekinino pauĩakiti, Teoso paniãtakiti pimakamakanisaaki? Kona piposota, kotxi atão pauĩakiti lauari. Notapekana, nota posotari noerekiniri nisãkire nauĩakiti nikamakitiã Teoso paniãtakiti nikamakasaaki. Ikara atoko nininiã, kãkiti imarotapitikari atão nauikiniri Xesosi sãkire. ¹⁹Pite aukari ãtinani Teoso auini. Ininiã erekapitikari pauikakiti. Txamari ikara ïmakatxakari pimaerekani Teosomoni pisini ïkapani, kotxi Satanasi nitiriakori apaka aukari ãtinani Teoso auini. Iua xika ninoa titinanaka ipĩkarauatiniãna. Ninoa imarotari ãti õti ixipokinina.

²⁰!Kiĩkitei pite. Pinirekatari noerekinii !apakata pisãkireẽ pauikiniri Xesosi sãkire, iua paniãtakiti iaõka pimakamakanisaaki. Iuasaaki pisãkire na atão. Ipĩkari atoko itxa. ²¹Maxinikariko ate apika atokirini, Apraõo. Kitxakapirĩka isikasaakiri amarite Isaki inakori Teosomoni sikakori takikoãtaã, iuasaaki Teoso apokaerekatari ikamakiti, kotxi ikamakiti oerekari Teoso, iua auikiniri isãkire, ininiã Teoso kamaerekatari iua. ²²Ininiã himarotari atão iua auikiniri Teoso sãkire. Ikamakiti oerekari isãkire atão inini. Hĩxinikari iua. Atão ikamari Teoso paniãtakiti, ininiã atão iua aukari Teoso sãkire. ²³Ininiã Teoso sãkire iõkatsopatakori apokapeka. Itxari:

Apraõo aukari Teoso sãkire, ininiã Teoso txĩkitakari iua atão inakari ikamini, Teoso apakapiniri ïkapani.

Ininiã iua akiritaãka Teoso moianari. ²⁴Ininiãkara ia himarota. Teoso kamaerekatari kãkiti ãkixinire isãkire iaõka ikamakasaaki. Kona Teoso kamaerekatari kãkiti ãkixinire, isãkirenoka auakasaaki. Inirekari atamatiniri kãkiti parĩka apaka.

²⁵Ãto atão Teoso sãkire auĩãkaro nisãpiretai hĩte. Kitxakapirĩka kanokarero Haapi inakoro aua. Teoso kamaerekatari oa ãkixinire, kotxi oa apakapana Xosoe iokanatakini otixine apokasaakina. Oaãpoko okipatana ninoa. Iuasaaki oa oerekana ãti kimaporiti imitekinina ïkapani.

²⁶Kãkiti ïtoã ixinire mauakanisaaki, iua ipĩpe. Iua !kakamareri. Ininiã iua atokokana iua sãkire iua auĩãkiti ipinakari atoko, erekari imakamakanisaaki. Iua auĩãkitinani, isãkirenani, !imakatxakari imaerekani.

Kākiti Nini Pirena

3 ¹Nitariakori, !apakata itori hīte Teoso sākire oerekakani hininiua, kotxi ate Teoso sākire oerekakani maerekati akamakasaaki, apiata Teoso misiritaua ate. ²Amakinika ate kerokapanikari. Kākiti makerokakaniāri isākire, ininiā erekari iua. !Auiritari iito kaminiri maerekati.

³Anirekasaakiri kavaro kīpitiniri anireēkiti, atakari inamaā metaoke ipiriāketakari. Ininiā iuasaaki ikamariko anireēkiti. Ia metaoke axapitikeri, iuaritika aposotari akakiriokiniri kavaro, ininiā isari anirekinimoni.

⁴Apaka hīxinikaroko maporo. Maporo mitaro. Ītima kataparari anikaro. Maporo oerekakire axapitiki, iuaritika kākiti kakiriokaro maporo oerekakireē, ininiā maporo sari kākiti nirekinimoni.

⁵Iua atokokana, aītoā auakari anini apaka axapitiki, iuaritika iposotari iteene maerekati ikamini. Hīxinikariko. Xaminaminiki axapitiki, iuaritika iposotari iotikiniri itori kikio. ⁶Iua atokokana ninitxi. Xamina tirinakari atoko itxa, ininiā kona erekari. Maerekati ninitxi sāpiretakiti. Iarika kākiti xinireē ikinika, xamina ĩtopa iarikini atoko. Ininiā iua maerekatinoka itxa, ininiā ikinipoko ikamakiti maerekatinoka. Maerekani misiritikoātaā ĩkari itxa asākire maerekati. Xamina tirinakari iuaātaākiri atoko itxa asākire maerekati.

⁷Kākiti piratari ikini sereti kaxipiri ĩtopakiri, kotipiriki, imini, iaā auakari pakini. Itori kākiti piratapeka. ⁸Txamari ninitxi paneenamari. Kākiti !iposotari imīkapiritiniri inini. Kona ikamari anireēkiti. Imini katiiri atoko itxa. Imini tsii posotari okiniri kākiti. Iua atokokana, kākiti sāpiretakiti posotari okiniri kākiti.

⁹Anini posotari isāpiretiniri erekari aīri aāuitemoni. Apaka iposotari maerekati isāpiretini kākitimoni. Īkora atoko !erekari, kotxi Teoso kamari kākiti iuaka atoko inakari ĩkapani. ¹⁰Anamaā potorika erekari, maerekati pakini. Nitariakori, ia koketakori na atāo. !Apakata. ¹¹Amomo !oposotari āparaā ponikoāri, posiāri pakini otxīkitakini. ¹²Nitariakori, atauako māka mina iritari iōpeta? Atauako iōpeta mina iritari māka? Konapitini. Apaka amomo āparaā ponikoāri !auari āparaā maxiāri pakini. Iua atokokana kākiti sākire. !Apakata kākiti āti ōti isākire ereka inini, āti ōti isākire maerekati inini.

Imaroretxi Pirena

¹³Kiripa kimaroreri hīte sauaki auakari? Kākiti atāo kimaroreri inakari, oerekari imarore ikamakiti erekari ikamakasaaki. Erekari ikamakasaaki, !uikaua, kotxi atāo imaroretxi auiniā kākitemoni, !auritari iua iuikiniua. ¹⁴Txamari pinīkatiniāri xikoretxi papixiri pākixinireē, piteka nireēkitinani pinirekiniā pākixinireē, kona pitxape: “Kimaroreno nota.” Iuasaaki kona pikipatapiri atāo inakari. ¹⁵Īkora pimarore !iaxitikirini. Īkorapokoritikirinokara ikara pimarore. Ikara pimarore piīto nireēkitikara. Imaroretxi ikara atoko inakari Satanasi oerekakiti. ¹⁶Xikoretxi auakasaaki, piteka nireēkitinani pinirekini auakasaaki, ikara atoko inakasaaki, neenamatzinoka aua, ikini sereti maerekati aua apaka.

¹⁷Imaroretxi iaxiti ĩkari kona ikara atokoni itxa. Iua imaroretxi imarotakari, erekarinoka ikama. !Nirekari neenamatzxi. Merepitipanika ixinikari apanakini kākiti nireēkiti. Apiananiri nireēkiti ikama. Iamonīkari āti. Erekarinoka ikama ātitemoni. Apiarimoni isākire atokotxikana isākire poiāorimoni. Ikamakiti isākire iaōka itxa. ¹⁸Kauaīreri otākikari apanakini imaneenamauatakani, ininiākara itori kākiti kamari atāo inakarinoka.

Īkorapokoriti Auakani Nireēkiti !Hinirekape

4 ¹Neenamatzxi auakasaaki hītemoni, hītxitakakasaakiua, nāpa ikara atoko inakari potorika? Hākixinireē ipotorika neenamatzxi. Hinireēkiti maerekati xika hineenamauata. ²Hinireēkiti kona hāpakapa, ininiā hōkari āti. Iteene hinirekari āti nakiti, txamari !hāpakapari hinireēkiti. Hītxitakakaua. Hineenamauata. Txamari kona hāpakapari hinireēkiti. Kona hamanaāri Teoso hinireēkiti hāpakapini ĩkapani. Ikara xika kona hāpakapari hinireēkiti. ³Atxiiti Teoso hamanaāksaaki, kona hāpakapari hinirekakiti, kotxi hamanaāksaaki, maerekati hīxinikapnika. Hinirekari hāpakapiniri hamanaākiti hītenani ĩkapani, hītenoka poxokoniuatini ĩkapani. Ikara xika Teoso lisikai hinireēkiti.

⁴Kanokarero, kanokareri pakini atoko hīttxaua. Hīte takanapari Teoso, ĩkorapokoriti auakaninoka hītiretini ĩkapani. Hītiretiniāri ĩkorapokoritinoka, iuasaaki homanatarari Teoso. Hinirekiniāri ĩkorapokoriti auakani nireēkiti, ininiā Teoso mokaiakari hīttxaua.

⁵Kona maxikatiīka Teoso sākire iōkatsopatakori sāpiretaua ia atoko inakari:

Erekari Matamatakoti aākixinireẽ auakari nirekari iteene
anirekiniri Teoso turetiniua. Iua linirekari anirekiniri
ĩkorapokoriti auakaninoka turetiniua.

⁶Teoso sikari iteene erekari atemoni, kotxi Teoso sākire
iōkatsopatakori txari:

Teoso !apokaerekatari kākiti iuikakaniua. !Imoianatana ninoa.
Kākiti miuikakaniua, ikinipoko erekari isika ninoamoni.

⁷Ininiã hāuiritariko Teoso hāuĩte ininiua. Iua nireēkitinoka
hĩkamako. Kona hĩkamapiri Satanasi nireēkiti. Kona hĩkĩpitapiri iua
sākire, ininiã eereka iua miteka. ⁸Teosomoni hāpokako, ininiã iua apoka
hĩtemoni. Maerekati kamakani hininiãua, hĩtakanapariko himaerekani.
Kona hāuiritapiri hĩuako kaminiri maerekati. Hĩtepekana, hĩte sākire
ipinimoni itxa. Hākixinire xinikakiti ipinimoni itxa. Ininiākara
hĩokanatariko maerekati hākixinire auakari, erekarinoka kaikotini
ĩkapani. ⁹Himatinaniuatako, hĩtxiapatako iteene, maerekati hĩkamakiti
xika. Hĩtakanapariko hĩsiroatini hĩtxiapatini ĩkapani. Hĩtakanapariko
hĩpoxokoniuatini himatinaniuatini ĩkapani. Ikara atoko hĩkamako,
maerekati hĩkamakiti xika. ¹⁰Apiananirimoni hĩtxariko: “Nimaerekani
xika !erekano nota. Minakati nitxaua. !Niposotari erekari nikamini.
Piamonĩkano,” hĩtxariko Teoso. Eereka iua sikataparaxiniretai hĩte.

!Himisākirepiretapiri Hĩtari

¹¹Nitariakori, !himisākirepiretakakapeua. Āti misākirepiretiniãri
ãti, kona ipaxitari Teoso paniãtakiti. Āti akiritiniãri ãti: “Maerekati
kamakarii,” akiritari Teoso paniãtakiti: “maerekati.” Ikara atoko
inakasaaki, iuamoni iuaka sākire apiata, ininiã iua !ikamari Teoso
paniãtakiti iaõka. ¹²Teosonokara atão inakari imarotakari aua. Iuanoka
posotari isãpiretiniri kākiti: “Pite kamakiti kona erekari. Pitepekana
kamakiti erekari.” Iuanoka posotari ikara atoko ininii, kotxi iuanoka
posotari kākiti maerekani imaktxakini. Iuanoka posotari iokanatiniri
kākiti imisiritikomoni. !Apakata ikara atoko hĩte ininiri apanakini.

Katana Kamaenetakori

¹³Atxiĩti hĩte txari: “Atxiĩti uatxa, atxiĩti katana asa sitatximoni.
Anapariko ãtikanani iuaãtaã. Aparĩkauata itomane txineiro aãpakapini
ĩkapani,” hĩtxama. ¹⁴Txamari kona himarotari katana auakari tĩkane.
Kanatokopa itxa kākiti? Ianiĩ atoko itxa kākiti. Ianiĩ apoka, eereka
patimari ixipokini. Ikara atoko kākiti auini. ¹⁵Apiaerekata hĩsākire ia

atoko hinini: “Teoso nirekiniāri, nauapanika ninakasaaki, nikamariko ikara parīkatxi,” hītxako. ¹⁶Ikara atoko himasākirauatakaniā, hīuikaua, kotxi hīuikari hīkamakiti tīkane. Maerekati ikara atoko inakari. ¹⁷Ininiā erepaniko. Kākiti erekari imarotakani makamakaniāri ikara erekari imarotakiti, ikamari maerekati.

Katiiri Pirena

5 ¹Hīkenakotariko nisākire. Ikinika katiirini kapotxinanirini hīkenakotariko nisākire. Hītxiapatako. Hākiripoatako, kotxi itori hātatsiire apokako hītemoni. ²Hītii paiakapeka. Kapite nikapekari himāka. ³Hinakiti oro kamakori, pirata kamakori pakini oereēkatapeka. Ikara oerekari hīkamakiti !apakata. Hītii xipokini atoko, hīte apaka xipokako. Apiata himisiritiko. Maxikatīka hāpotiitari hītii, kotxi itixi xipokini ōti apokanapanoka. ⁴Himarotariko ia. Kākiti hīte kikioteē parīkauatakasaaki, himisirienetana ninoa. Na atāo hīikitxitana iparīkana īki. Ininiā ninoa akiritari Teoso. Iusaaki Apiananiri kaposotiireri kenakotari ninoa sākire. ⁵Īkorapokoriti hāuakasaaki, ikinipoko aua hītemoni. Hiamotari ikinika hīto potxitakiti. Kākiti sikari kema auīte ito kienatxi, okiko ōti manapi paīperi inini īkapani. ⁶Hīte iokanatapekari kākiti erekarini ipininimoni. Hōkapekana ninoa maxikatīka. Ninoani kona naiatai hīte, iuaritika hōkana ninoani.

Apiananiri Kanapiriini Hiātapini

⁷Nitariakori, atxiīti hītemoni !katimari Apiananiri kanapiriini, iuaritika hiātapariko hīpoxokoniritika, kotxi himarotapitikari āti ōti iua kanapiriini. Hīxinikariko katakareri. Iua iātapapikari itakare aneini, ikiena iposope inikini īkapani. Iātapari āparaā kipini itakare aneini īkapani. Iua imarotapitikari ikiena aneini, ininiā iātapari. ⁸Iua atokokana hiātapariko Apiananiri kanapiriini. Hītaparaxinireritika hiātapari, kotxi Xesosi kaiamapeka ikanapiriini. ⁹Nitariakori, kona hītxitakakapeua. Hītxitakakiniāua, hāpakapariko himisiritiko. Kākiti misiritiko mereēkari kaiamapeka apokini hītemoni.

¹⁰Nitariakori, hīxinikariko Teoso sākire sāpiretakani, kitxakapirīka auakani, sāpiretari Teoso sākire Teoso posotiireē. Ninoa misiritaāka, iuaritika ninoa mīteenekari imakinika. Ninoa oerekaua amīteenekiniri imakinika. ¹¹Ari, aimarotari Teoso takari erekari misirikaretxi mīteeneēkanimoni. Hīxinikari Xo inakori. Iua iteene atatsiirauata,

iuaritika, !itakanapari Teoso. Atatsiirauataka atoko, Apiananiri sikari ikini sereti erekari iuamoni, kotxi katiraõkiri, kaamonĩkareri itxaua iua.

¹²Nitariakori, “Ari,” hinakasaaki, “Kona,” hinakasaaki, kona maxikatiĩka hĩsãkirauatape. Hĩkamariko hĩsãpiretakiti iaõka. Hĩkamaenetakiti hĩsãpiretakasaaki, kona hãkiritapiri Teoso tixine auakani uãka, kona hãkiritapiri itixi auakani uãka, hĩsãpiretakiti apanakini atão imarotini ĩkapani. Na atão hĩsãkire ininiã, Teoso misiritapitikai.

Teoso Misãkiretiko Kãkiti ĩkapani

¹³Hãtatsiirauatakasaaki, himisãkiretariko Teoso. Hĩpoxokiniuatakasaaki, hĩxikarauata Teoso ĩkapani. ¹⁴Ãti amianatakasaaki, hĩpĩkapiretanako kõtãkikarerini Xesosi sãkire auiãkani Teoso imisãkiretinina amianatakari ĩkapani. Iuasaaki itakarina iĩtxi iua amianatakari nopini Apiananiri uãkaã. ¹⁵Hãuikiniãri Teoso posotiire himisãkiretakasaakiri Teoso, iua makananitapitikari iua amianatakari. Ininiã Apiananiri õkitikariko iua. Maerekati ikaminiã, Teoso makatxakari imaerekani apaka. ¹⁶Ininiã hĩkerokakiti hĩsãpiretakakauako. Himisãkiretariko Teoso ãti ĩkapani. Ininiã apanakini misãkiretariko Teoso hĩte ĩkapani. Iua atokokana, Teoso txĩkitakari hãkixinire ereka inini. Atão inakarinoka kamakari sãkire kataparari, Teosokata isãkirauatakasaaki, kotxi Teoso kamapitikari iua amanaãkiti iaõka.

¹⁷Kitxakapiriĩka Erĩasi inakori, ate atoko inakari iua. Iua misãkiretari Teoso itapararitika ãparaã makipakani ĩkapani. Ikara atoko inakasaaki, ãparaã likipa ipi ãti pakini anokanani, seisi kasiriti. ¹⁸Iuaĩkana imisãkiretari Teoso ãparaã iuaĩkana ikipini ĩkapani. Ininiã ãparaã kipa. Iuaĩkana itixi iriuata.

¹⁹Nitariakori, ãti takanapiniãri atão inakari Teoso sãkire, hõtãkikariko iua Teosomoni ikanapiriini ĩkapani. ²⁰Maerekati kamakari takanapiniãri imaerekani, iua põtãkikasaaki, ininiã pite makatxakapekari iua ipinini. Teoso makatxakari ikinipoko maerekati ikamakiti.

1 PETRO

Merepanika Petro Iokanatsopatakiti

1 ¹Petro nitxaua nota. Xesosi Kristo iokanatakiti nitxaua. Niokanatsopata hīte Xesosi sākire auīākanimoni. Hīte iarikape Pōto tixiniā, Karásia tixiniā, Kapatósia tixiniā, Ásia tixiniā, Pitxínia tixiniā pakini. Hītakanapari hīteka tixine Xesosi sākire hāuikini xika. Áti uākakata hāuanāta.

²Aīri Teoso mereēi hīte iua nakitiakori hininiua īkapani. Itixi kamiko apisa, iua imarotapekari hīte iua anaakori hininiua. Erekarī Matamatakoti parīkauata hākixinireē Teoso nireēkitinoka hīkamini īkapani. Ininiā uatxa hīposotiire aua Xesosi Kristo paniātakiti hīkamini īkapani, kotxi Xesosi Kristo arēka xikepoata hīte īkapani. Teoso sikari ikinipoko erekari hītemoni. Itori isikai. Iteene ikamaerekaxiniretai.

Kākiti Maerekani Makatxakiko

³Mamisākiretari Teoso: “Peerekai pite. Aāuīte Xesosi Kristo Teosone pitxaua. Iua iri pitxaua,” matxari. Maerekati kamakaniua, iuaritika iteene iamoniākaua. Itxīkitakari axinire iuaīkana iponaniini, kotxi Xesosi Kristo ipina, iuaritika iuaīkana ōkitikaua. Ininiā ikiniōtika aimarotari Teoso kaminiri ikinipoko ikamaenetakiti.

⁴Iuaīkana axinire iponaniā, ininiā iua anaakori atxaua. Ininiā aīri potetakiti erekari aua itixineē aāpakapini īkapani. Ikara ipotetakiti lixipoka. !Oerēkata. Auapika. Teoso nīkatari ikara hīte īkapani.

⁵Hīte auikari Teoso sākire, ininiā iposotiire tokapakeētai hīte. Hīte itokapakeētiniritika Xesosi kanapiriāko xipokatxi ōtisaaki.

⁶Ikara himarota, ininiã iteene hîpoxokoniyata. Uatxa atxiîti !erekaxinirei hîte, kotxi ikini sereti maerekati apoka hîtemoni. ⁷Ikini sereti himaxikiko apoka hîtemoni, kotxi iusaaki Teoso imarotari atão hãuikiniri iua sãkire, himîteenekiniãri himaxikiko. Iusaaki Teoso ataerekatai hîte, oro ataerekatiko atokokana. Kãkiti axitaro oro otxiko makatxakiko îkapani, oronoka kaikotini îkapani. Iusaaki peerekaro. Pakaronero. Iuaritika âti ôti oxipokaãkako. Erekaro oro, iuaritika apiaerekata hãuikiniri Teoso sãkire, kotxi isãkire hãuikini !ixipoka. Xesosi Kristo kanapiriãkasaaki îkorapokoriti, Teoso sãpiretaiko hîte: “Erekari hãuikiniri nisãkire, kotxi himîteenekari ikinipoko. Peerekai hîte,” itxaiko hîte. Iusaaki hiito iotximere auape Xesosi iotximere atokokana.

⁸Hîte kona aõkitapanikari Teoso, iuaritika hîtiretari iua. Kona hãtamapanikari, iuaritika hãuikari iua sãkire. Ininiã hîte iteene poxokoniyata. Kãkiti sãkireẽ !apakata hîsãpiretiniri hîpoxokoni. ⁹Hîpoxokoniyata, kotxi himaerekani makatxakaãkapeka. Ininiã hîxinire !ipinaika, kotxi hãuikari Xesosi sãkire.

¹⁰Kitxakapirîka Teoso sãkire sãpiretakani nirekamari imarotininirina kãkiti maerekani makatxakiko. Initarina ikara imarotininina Teoso sãkire iõkatsopatakoriã. Iteene apaiãkarauatana ikara imarotininina îkapani. Ninoa sãpiretari ikara erekari, Teoso âti ôti sikiniri kãkiti. ¹¹Inirekarina imarotininirina ikara erekari apokini ôti. “Kisaakipa apoka atxiîti? Natokopa itxa apokini?” itxanãtana. Iusaaki Erekari Matamatakoti oerekana ninoa ãkixinireẽna Kristo atatsiirauatini tîkane. Oerekana ninoa Kristo atatsiirauatini xipoka atoko, ikinimane auîte itxauako. Peerekari iusaaki. ¹²Kitxakapirîka Teoso sãpiretari ikamakiti tîkane isãkire sãpiretanimoni, kona ninoanoka imarotini îkapanini. Ninoa sãpiretari Teoso kamakiti tîkane hîte îkapani, kotxi uatxa apokapeka ninoa sãkire iaõka. Kitxakapirîka Teoso sãpiretari ikamakiti tîkane ninoamoni, ate uatxa imarotini îkapani. Teoso iokanapirena erekari sãpiretakani sãpiretapekai uatxa ikara Teoso sãpiretakiti kitxakapirîka. Teoso paniãtari Erekari Matamatakoti potirikini itixine uai apokini îkapani. Erekari Matamatakoti posotiireẽ ninoa sãpiretari Teoso iokanapirena erekari. Teoso nitiriakori iaxitikini iteene nirekamari imarotininirina hîte imarotakiti.

Ereka Hĩtxako

13Ininiã iposope hĩtxako hĩxinikiniri atão inakari hĩkamini. !Hĩkamapiri maerekati hiito nireẽkiti. Iteene hãuikariko hãpakapiniri ikinipoko erekari Teoso sikakiti Xesosi Kristo kanapiriãkasaaki. 14Amarini kaminiri iri paniãtakiti atokotxikana, hĩkamariko Teoso paniãtakiti. Xesosi sãkire himimarotakanisaaki, hĩkamari maerekati hinireẽkiti. Uatxa !hĩkamapinikariko. 15Hĩte akiritakari kamari erekarinoka, ininiã iua atokokana erekarinoka hĩkama ikiniõtika. 16Teoso sãkire iõkatsopatakori txari:

Erekarinoka hĩkamako, kotxi nota kamari erekarinoka, itxa Teoso kitxakapirĩka.

17Himisãkiretari hĩri iaxiti auakari. Atãonoka ikaminana ikinimane kãkiti iparĩkana atamatakasaaki. Ininiã kãkiti kamakasaakiri maerekati, aĩri misiritiniri ãti atokotxikana, imisiritari ãti. Himitekini !auari. Hĩxinikariko, haãpoko atão inakari ãkorapokoriti !auari. Teoso tixineẽ aua haãpoko. Ininiã ãkorapokoriti hãuakasaaki, iteene hĩpaxitariko Teoso. Hĩpĩkariko iua manirekakiniti hĩkamini. 18Mitxi !apakata hãuini, kotxi iuasaaki hĩkamari hãtokiriakorini sãkire iaõka. Uatxa Xesosi oerekai ãtião hãuini, kotxi iamotai hĩte, iua nakitiakori hininiua ãkapani. Himarotari iamotini. !Iamotai pirataã. !Iamotai oroã. !Iamotai txineiroã, kotxi pirata, oro, txineiro pakini xipokako. 19Kristo arẽkaã iamotai hĩte, kotxi ipĩkasaaki iamotai hĩte. Peerekari iua arẽka, kotxi iua arẽka makatxakari amaerekani. Soti auĩte erekari atoko itxa Kristo. Kona maerekati aua iuamoni. 20Itixi kamiko apisa, Teoso mereẽri iua. Iua apoka uai himaerekani imakatzakini ãkapani. 21Xesosi txĩkitakai hĩte auikiniri Teoso auini, kotxi Teoso iuaĩkana õkitikari Xesosi ipĩkani sauaki. Iuasaaki isãpiretari Xesosi ikinika ikamakiti ereka inini. Ikara atoko ininiã, hãuikari Teoso sãkire. Himarotari isãkire iaõka ikamini. 22Erekari Matamatakoti oerekapekai atão inakari, ininiã uatxa hĩkamari atão inakari. Ikara atoko ininiã, hãkixinire erekari. Ininiãkara atão hĩtiretari hĩtariakori. Ininiã iteene hĩtiretakakauako hãkixinireẽ.

23Hĩte xinire iuaĩkana iponaniãpeka. Teoso sãkireẽ hĩxinire iponaniã iuaĩkana. Teoso sãkire auapika. !Iixipoka. Ininiã iua anaakori hĩtxaua. Hĩri ãkorapokoriti auakani xipoka. Hĩri iaxiti auakari !ixipoka, ininiã hĩte iua anaakori !ixipoka apaka. 24Teoso sãkire iõkatsopatakori txari:

Kākiti katsotati atoko itxa. Katsotati paītiki ipinini. Iua atokokana patimari kākiti ipina. Ikinika erekari ikamakiti, aāui atoko itxa. Aāui patimari ipinini. Iua atokokana patimari kākiti kamakiti xipokini.

²⁵ Iuaritika Teoso sākire auapika. !Kaxiporeri, itxa Teoso sākire iōkatsopatakori. Teoso sākirepitikara sāpiretaākapeka hītemoni, hīkenakotakasaakiri Teoso iokanapirena erekari.

2 ¹ Ininiākara hītakanapariko ikinipoko maerekati hīkamakiti. !Himisirienetapiri āti. Hīkamariko hīsākire iaōka. !Hīxikotapiri āti. !Himisākirepiretapiri āti. Ikini sereti maerekati kākiti kamakiti hītakanapako.

² Hinirekariko Teoso sākire makoketakoti. Tinitxiā imi axapitiri nirekini atokokana, hinirekariko Teoso sākire. Teoso sākire hāpakapakasaaki, himaroāpotari iua, ininiā apiaāpota hāuikiniri iua sākire. ³ Kotxi uatxa himarotapekari Apiananiri ereka inini.

Kai Atoko Itxa Xesosi

⁴ Ininiā hīsako Xesosimoni, kotxi auapika inakari itxaua. Kai aapokotxi kamakari manirekakiniti atoko itxa Xesosi. Kākiti linirekari iua. Iuaritika Teoso mereēri iua. Teoso tiretakiti itxaua Xesosi. ⁵ Hīte apaka kai atoko hītxaua Teoso aapoko ikapani. Itxīkitakari hīxinire auāki inini, kotxi iua nakitiakori hītxaua. Ininiā, Teoso aapoko atoko hītxaua. Ininiā iua aapoko āki sasetotxi hītxaua, iua ikapani hīparīkauatini. Ininiā hīsikariko iua amanaākiti, iua nireēkiti. Iua apakapariko hīsikakiti, kotxi Xesosi Kristo makatxakapekari himaerekani. ⁶ Teoso sākire iōkatsopatakori txari:

Hātamata. Nitakari kai Siāo sitatxitiā. Iua kai apiari, Teoso mereēkiti. Apiaerekata iua. Iua kai atoko inakari sākire auīākani !ipētauata, itxa Teoso sākire.

⁷ Iua kai atoko inakari itxaua Xesosi. Peerekari Xesosi hītemoni, kotxi hīte auikari iua sākire. Āti iua atoko inakari !uari. Txamari isākire makīpitakani linirekari iua. Teoso sākire iōkatsopatakori txari:

Aiko kamakani txari: “!Apakata ia kai. !Anirekari.” Iuaritika iua kai apiari. Itakaāka aiko kamikosaaki, apanakini kai soro maīkakari ininiua ikapani.

⁸ Iuaīkana Teoso sākire iōkatsopatakori txari:

Iua kai xika kākiti mākitita. Iua kai xika kākiti irika,

itxa Teoso sākire. Imākititana, kotxi !auikarina Teoso sākire. Teoso txīkitakana ninoa irikini, kotxi !auikarina iua sākire.

⁹Hītepekana, Teoso mereēkini hītxaua. Sasetotxi hītxaua. Hīparīkauata Apiananiri īkapani. Hīte makatxakaāka maerekani sauaki erekarinoka hīkamini īkapani. Teoso nakitiakori hītxaua. Imereēi hīte iua ereka inini kākiti hōerekini īkapani, kotxi ipiā hāuakasaaki, iuara akiritai hīte ipiā hītakanapini īkapani. Itakai ikamaraā atāo inakari himarotini īkapani. Peerekari iua kamara. ¹⁰Mitxi Teoso nakitiakori !hītxaua. Uatxa Teoso nakitiakori hītxapekaua. Mitxi Teoso !amonīkapanikai. Uatxa Teoso amonīkapekai.

Teoso Nitiriakori Iamotakoni Pirena

¹¹Nitiretakini, uai itixi hāuakasaaki, āti tixinikini atoko hītxa. Atāo hāapoko Teoso tixine aua. Īkorasaaki hīsaāpota hāapokomoni. Ininiā ikini nixinireritika nōtākikai hīte himakamakaniri maerekati hīito nireēkiti. Hīito nireēkiti hīxinire mokaiakari atoko itxa. Hīito !inirekari hīxinire nireēkiti. ¹²Teoso sākire mauīakani sauaki hāuakasaaki, ikiniōtika erekarinoka hīkamako. Atxiīti ninoa maxikatiīka apoītai maerekati hīkamini, iuaritika iuasaaki ninoa imarotari erekarinoka hīkamini. Ininiā Teoso ketotini ōti manapi iua oerekariko atāo inakari ninoamoni. Ininiā iuasaaki ixinikarinako erekari hīkamakiti. Ininiā itxarinako Teoso: “Peerekai pite,” itxana.

Hīkamariko Hīauīte Paniātakiti

¹³Hīkamariko kākiti auītetakini paniātakiti, kotxi Apiananiri nirekari ikara atoko hīkamini. Ikinimane hīauīteakori paniātakiti hīkamako. Hīauīte apiari paniātakiti hīkamako. ¹⁴Hīauīte poiāori paniātakiti apaka hīkamako, kotxi hīauīte apiari paniātana hīauīte poiāorini maerekati kamakani imisiritinina īkapani. Ipaniātana ninoa isāpiretinina erekari kamakani: “Erekapitikari hīkamakiti.” ¹⁵Teoso nirekari hīkaminiri erekari, ininiā iuasaaki miīkiteni !iposotari imisākirepiretinii hīte. !Kasākirena iuasaaki, kotxi apanakini imarotari erekarinoka hīkamini. ¹⁶Hīposotari ikinipoko hinireēkiti hīkamini, kotxi Teoso sikakai hīte. Iuaritika kona hinirekapiri maerekati hīkamini. Teoso nitiriakori hītxaua, ininiā iua paniātakinoka hīkamako. ¹⁷Hīpaxitariko ikinimane. Hītiretanako ikinimane aītariakori Teoso sākire auīākani. Hīpīkariko Teoso. Hīpaxitariko hīauīte apiari.

Hīkamariko Hīpatrāote Paniātakiti

18 Nitiritxiakori, hīkamariko hīpatrāote paniātakiti. Hīpaxitariko iua. Atxiīti iua tiretai. Atxiīti imisiritai. Iuaritika hīpaxitariko iua. 19 Erekapitikari himīteenekiniri kākiti misiritinii maxikatiīka. Himīteenekiniāri, Teoso nireēkiti hīkamini īkapani, erekapitikari. 20 Erekarī hīpatrāote misiritinii hīte, maerekati hīkamakasaaki. Iuasaaki himīteenekiniri himisiritiko kona txīkitakari Teoso apokaerekatinii. Erekarī hīkamakasaaki, himīteenekiniāri himisiritiko, iuasaaki Teosomoni erekapitikai.

Kristo Misiritiko

21 Teoso akiritai hīte inakitiakori hininiua īkapani, himisiritiko himīteenekini īkapani. Kristo misiritaāka hīte īkapani, ininiā iua nirekari amīteenekiniri amisiritiko iua misiritiko imīteenekini atokokana.

22 Maerekati !ikama. !Imisirienetari āti. 23 Ninoa misākirepiretakasaakiri iua, !apakapaenetana. Imisiritakasaakirina iua, !itxitana. !Isāpiretana imisiritinina imaerekanina xika. Iua auikari iri nīkatiniri iua, kotxi atāonoka kamakari itxaua Teoso. Atāo imarotari kākiti kamakiti. 24 Aamina ĩpiriāmitakari nopini Xesosi ĩto misiritaāka ate maerekani xika. Ipina ate īkapani, apikomoni maerekati akamini amanirekakani īkapani. Inirekari anireēkiti maerekati ipīkari atoko inini. Itxīkitakari axinire auāki inini atāo inakarinoka akamini īkapani. Xesosi karo txīkitakaua erekape anini. 25 Xesosi himarotini apisapanika, soti auīte pīpinanakakani atoko hītxa. Uatxa hīkanapiriāpeka hīpitikirimoni. Hīxinire nīkatarimoni hāpokapeka uatxa.

Taniritxi, Tanorotxi Pakini Ōtākikiko Pirena

3 1 Nitiritxi kaminiri ipatrāote paniātakiti atokokana, hīte tanorotxi hīkamariko hītaniri nireēkiti. Atxiīti hītaniri !auikari Teoso sākire, ininiā erekarinoka hīkamako. Amatakasakirina erekari hīkamakiti, ninoa auikari Teoso sākire. Hīkamakiti erekari txīkitakana auikinirina Teoso sākire. Hīsākirenoka !itxīkitakana auikinirina. 2 Maerekati himakamakanisaaki ikiniōtika, Teoso iteene hīpaxitiniā ikiniōtika, iuasaaki ninoa auikari Teoso sākire atāo inini.

³Apanakini sito xinikapikari oiãko oõeretini, oro oiãtoã otakini, omãka ereri oieretakini, oiãto ere inini ikapaninani oxinika. Sito erero !oxinikari ikaranani. ⁴Sito erero oiãkixinire ereri apaka. Hãkixinire ereri inakasaaki, ikara ereri !ixipokapani. Hãkixinire ereri inakasaaki, !hĩtxitapiri hĩtaniri. Hĩkamari iua nireẽkiti. Teosomoni apiaerekata hãkixinire ereri inini.

⁵Kitxakapirĩka sitoãkini ererini, Teoso sãkire auĩãkani, ikara atoko inakani. Ninoa ãkixinire erekari, kotxi ikĩpitarina itanirina sãkire. ⁶Sara inakoro kamari Apraão sãkire iaõka. Oa kamari Apraão paniãtakiti, kotxi oamoni oa auĩte itxaua Apraão. Sara anaakoro atoko hĩtxaua atãonoka hĩkaminiã, himapĩkarauatakaniã.

⁷Hĩte taniritxi, iua atokokana hĩxinikariko erekari hĩkaminana hĩtanoro. Hĩpaxitaroko hĩtanoro, kotxi !katapararo. Oa apaka hĩtekata apakapariko Teoso sikakiti erekari. Iua txĩkitakai hãuapininiika hinini iuakata. Hĩtiretaroko hĩtanoro, ininiã Teoso kenakotariko himisãkiretiniri iua.

Himisiritiko Pirena

⁸Ia nisãkire mapotõkire nisãpiretai. Hĩxinikakiti ãtika xinikakiti atoko hĩtxako. Hiamoniãkakuako. Hĩtiretariko ãti, hĩtari hĩtiretini atokotxikana. Hĩkamariko erekari ãtimoni. !Hĩuikapeua. ⁹Ãti kaminiãri maerekati hĩtemoni, !hĩkamapiri maerekati iuamoni. Ãti misãkirepiretakasaakii, kona hĩte misãkirepiretapiri iua. Ãti kaminiãri maerekati hĩtemoni, iusaaki hamanaãri Teoso sikiniri erekari iuamoni, kotxi Teoso paniãtai ikara atoko inakari hĩkamini, erekari Teoso sikakiti hĩte apaka apakapini ikapani. ¹⁰Teoso sãkire iõkatsopatakori txari:

Pinirekiniãri pauini ereka inini, pinirekiniãri ikiniõtika pipoxokoniuatini, !pauiritapiri pisãkire maerekati inini. !Pimisirienetapiri ãti.

¹¹Pinirekiniãri pauini ereka inini, pitakanapariko maerekati pikamini. Erekarinoka pikamako. Pitakanapariko pineenamauatini. Pinirekariko kãkiti auini ereka inini.

¹²Apiananiri nĩkatari kãkiti atão inakari kamakani. Teoso imisãkiretakasaakina, Teoso kenakotapitikari isãkirena. Txamari Apiananiri misiritari maerekati kamakani, itxa Teoso sãkire kitxakapirĩka.

¹³Erekari hĩkamakasaaki, kãkiti !inirekari imisiritinii. ¹⁴Atão inakari hĩkamakasaaki, kãkiti misiritiniãi, hãpakapariko erekari

Teoso sikakiti. Ininiã !hĩpĩkapena ninoa. Maerekaxiniretinoka !hĩtxape. ¹⁵Hãkixinireẽ hĩtxako: “Teosonoka niauĩte. Apiananiri itxaua. Iua nireẽkitinoka nikamako.” Ikara atoko hĩtxako. Hãpaiaõkariko Teoso sãkire, isãkire iteene himarotini ĩkapani. Ininiã kãkiti pimainiã: “Kinirepa hãuikari Teoso sãkire?” Iuasaaki himarotari hãpakapapiretiniri iua. Hãpakapapiretakasaakiri iua, !hĩtxitapiri. Hĩpaxitariko iua iuasaaki. ¹⁶Hĩsãkirauatakasaaki, !hĩsãpiretapiri hãkixinire manirekakiniti. Hinirekariko erekari hãkixinire nireẽkiti hĩkamini. Apanakini misãkirepiretai. Ninoa atamatakasaakiri erekari hĩkamakiti Kristo paniãtakiti, ipõtatarı imisãkirepiretinii. ¹⁷Teoso nirekiniãri hãtatsiirauatini erekari hĩkamini xika, ininiã erekari, kotxi iuasaaki hĩkamari erekari. Txamari hãtatsiirauatiniã himaerekani hĩkamini xika, !erekari, kotxi iuasaaki hĩkamari maerekati.

¹⁸Xesosi Kristo ipina kãkiti maerekani imakatzakini ĩkapani. Iuasaaki iposope imakatzakiniri kãkiti maerekani. Iuaĩkana !atatsiirauataika kãkiti maerekani imakatzakini ĩkapani. Erekarinoka kamakari ipĩpe maerekati kamakani ĩkapani. Ipĩpe, Teosomoni ate anikini ĩkapani. Iĩto ipĩpe, iuaritika Erekarı Matamatakoti txĩkitakari iua iuaĩkana auãki inini. ¹⁹Iuasaaki Erekarı Matamatakoti posotiireẽ isari ipĩkani auiniãtaãmoni. Iuaã kateia ãki ipĩkani aua. Iuaã isãpiretana Teoso misiritinina ninoa, kotxi iuaka kãiata. ²⁰Kitxakapiriĩka ninoa ipĩkani, auãkipanika inakasaakina, !nirekarina Teoso paniãtakiti ikaminina. Iuasaaki Noee kamanãtari maporo. Teoso iãtapana imaerekanina itakanapinina ĩkapani. Txamari !itakanaparina. Iuasaaki poiãonoka !ipina. Oitonoka !ipina, xirataãtxi apokasaaki. Teoso nĩkatana ninoa imapinakani ĩkapani. ²¹Ikara xirataãtxi hĩpatxisatiko atokokana. Hĩpatxisatiko oerekari kãkiti, Teoso makatzakapekai himapinakani ĩkapani. Hĩpatxisataãka hĩtoãkiri txiko makatzakiko !ĩkapanini, kona maerekati hĩkamakiti makatzakiko ĩkapanini. Hĩpatxisatikosaaki, hĩtxari Teoso: “Nãkixinireẽ ninirekarı nikaminiri ikinika pite nireẽkiti iaõka,” hĩtxariko. Xesosi iuaĩkana õkitikasaakiua, imakatzakai himapinakani ĩkapani. ²²Iua kanapiriã Teoso tixinemoni. Uatxa iri kikomoni iitopãka. Iuaã Teoso nitiriakori, auĩtetxiakori, kaposotiirerini pakini auĩte itxaua. Ninoa ikinika kamari Xesosi paniãtakiti.

Hĩkamariko Ikinipoko Teoso Nireẽkiti

4 ¹Xesosi atatsiirauata iĩtoã hĩte ĩkapani. Ininiã hinirekariko Xesosi xinikakiti iaõka hĩkamini. Ikara atoko hinirekiniã, hĩxinikakiti

sikataparatarari hākixinire. Kākiti atatsiirauatakasaaki iitoā, linirekaikari maerekati ikamini. ²Ininiākara ikorapokoriti auakasaaki, linirekaikari maerekati iito nireēkiti ikamini. Ikamari Teoso nireēkiti iaōka ikiniōtika. ³Mitxi maerekati hīkamakiti iaōpe. Mitxi Teoso sākire mauīākani nireēkiti iaōka hīkama. Ikini sereti maerekati hīkama iusaaki. Iusaaki hīkamari ikini sereti hīto nireēkiti. Hinirekari āti kākiti ito. Hīpoāta. Ikinipoko maerekati hīkama hīpoātakasaaki. Hīkamari kiiniri maerekati. Hīteosonetari kākiti kamakiti, Teoso mauritakiniti.

⁴Ninoa Teoso sākire mauīākani txai: “Kinirepa kona hīpotxitari ate kamakiti iaōka hīkamini? Peerekari akamakiti,” itxaina. Ininiā ninoa nireēkiti iaōka himanirekakani xika, ninoa misākirepiretai hīte. ⁵Txamari āti ōti ninoa apakapapiretariko Teoso, kotxi Teoso iposope isāpiretiniri maerekati kamakani misiritiko. Isāpiretari kākiti auākipanika inakani, apaka kākiti mitxi ipīkani. ⁶Ininiā Teoso iokanapirena erekari sāpiretaākapeka kākiti. Uatxa ninoa ipīpe. Auākipanika inakasaaki, isāpiretaāka ninoamoni kākiti misiritiko imaerekani xika. Isāpiretaāka ninoamoni kākiti kaminiri Teoso nireēkiti ākixinireē ikiniōtika.

⁷Imakinika xipokini ōti imatokotapeka. Ininiā kona hāuiritapiri hīto kaminiri inireēkiti. Araōkire hītxako, ininiā hīposotari himisākiretiniri Teoso. ⁸Iteene hītiretakakauako. Ia apiata Teoso nirekakiti. Iteene hītiretakakauako, kotxi iteene hītiretiniāri āti, poiāo hīxinikari maerekati ikamakiti. ⁹Kākiti apokasaaki hāapoko, hīpoxokoniritika hāpakapanako. Kona hītsoatape hākixinireē ninoa apokini xika. ¹⁰Hīkinika hāpakapapekari imaroretxi Teoso parīka hīkamini ikapani. Ikara Teoso sikakiti hītemoni. Ininiā ikara himaroreē hīparīkauata apanakini ikapani. Iusaaki Teoso nitiriakori erekarini hītxaua. Hīskariko ātimoni ikini sereti erekari Teoso sikakiti. ¹¹Hīsākirauatakasaaki, hīsāpiretariko Teoso sākire kākitimoni. Himoianatakasaakiri āti, himoianatariko Teoso posotiireē, ininiā iusaaki kākiti txari Teoso: “Peerekai pite, kotxi Xesosi Kristo nakitiakori atxaua,” itxari Teoso. Ātipirika ikinimane txapikari Teoso: “Peerekai pite. Ikinipoko posotiiretxi aua pitemoni.” Ameē.

Xesosi Sākire Auiākani Misiritiko

¹²Nitiretakini, !hītikokape himisiritiko apokasaaki, kotxi ikara ataerekatai. Iteene himisiritaākako, kotxi ikara atoko inakari apokapitikako. ¹³Iusaaki hīpoxokoniuatako, kotxi

Xesosi atatsiirauatape, ininiã hĩte apaka atatsiirauatako. Xesosi kanapiriãkasaaki, peerekari iusaaki. Hĩte amatariko ikara, ininiã iusaaki iteene hĩpoxokoniua. ¹⁴Kãkiti xinitakasaakii hĩte, Kristo nakitiakori hininiua xika, hĩpoxokoniuaatako, kotxi iusaaki himarotari Teoso aua hĩtekata. Himarotari Erekaru Matamatakoti aua hãkixinireẽ. ¹⁵Kokaniri, kiĩtiriri, maerekati kamakari, aãpirena kamakari pakini !hĩxapeuako. Ikara atoko inakari hininiãua, apakatapitika hãtatsiirauatini, kotxi hãtatsiirauata maerekati hĩkamini xika. ¹⁶Iuaritika hãtatsiirauatiniã Xesosi sãkire hãuikini xika, ininiã iusaaki erekapitikari. !Hĩpẽtauatape. Hĩtxariko Teoso: “Peerekai pite, kotxi Xesosi nakiti nitxaua,” hĩtxako. ¹⁷Apokapeka Teoso anaakori misiritiko õti. Merepanika Teoso misiritari iua anaakori imaerekanina xika. Teoso misiritiniãua ate isãkire auĩãkani amaerekani xika, ininiã Teoso iokanapirena erekari manirekakani mitekini !uari. Iteene imisiritana ninoa. ¹⁸Kitxakapiriãka Teoso sãkire iõkatsopatakori txari:

Pamimari atão inakari kamakani sini Teoso tixinemoni.

Ininiãkara Teoso manirekakani mitekini, maerekati kamakani mitekini !uari. Imisiritaãkapitikanako, itxa Teoso sãkire. ¹⁹Apanakini atatsiirauata, kotxi Teoso nirekari atatsiirauatini. Ikara atoko hãtatsiirauatiniã, iuaritika erekari hĩkamapanikako. Hãuikariko ikinipoko kamakari sãkire, kotxi iua kamari ikinipoko isãkire iaõka.

Kõtãkikarerini, ãtokoriakori Pakini

5 ¹Kõtãkikareri nitxaua nota, ininiã nõtãkikai hĩte kõtãkikarerini. Nota amataru Kristo misiritiko. Ikanapiriãkasaaki, natamataru iua iotximere ikinimane auĩte inakasaakia. ²Ininiã nota õtãkikai hĩte. Hinĩkatanako Teoso sãkire auĩãkani ereẽ. Soti auĩteakori ipitikiri nĩkatini atokokana, hinĩkatana. Hĩsãpiretanako Teoso sãkire, kotxi ikara sikakienataru ninoa ãkixinire. Teoso sikana ninoa hĩtemoni hinĩkatinina iãapani. Atão hinirekariko hinĩkatinina ninoa. Kona hĩtxape hãkixinireẽ: “!Ninirekaru ninĩkatinina ninoa, iuaritika ninĩkatana, kotxi ikara nipaãka.” Kona hĩxinikapiri ikara atoko inakari. !Hĩpaãkauatape txineiro hãpakapini iãapani. Hĩpaãkauatako apanakini himoianatini iãapani. ³Ninoa auĩte atoko !hĩtxapeua. Teoso sikana ninoa hĩtemoni hinĩkatinina iãapani, soti auĩteakori ipitikiri nĩkatini atokokana, ininiã erekari hĩkamako, hĩte kamakiti iaõka ninoa kamini iãapani. ⁴Ininiã ipitikiri apiari apokasaaki, Xesosi apokasaaki, hãpakapariko hĩpaãka

ĩki. Iuasaaki hãpakapariko saporĩeta atoko inakari. Ikara Teoso sikakiti peerero, ininiã ikara apakapakani auapininiika. Atamatapikarina Teoso iotximere. Iuasaaki erekari hãpakapakiti !ixipoka.

⁵Hĩte ãtokoriakoripekana, hĩkamariko aneẽkani paniãtakiti. Hĩkinika, himoianatakakauako. !Hĩuikapeua, kotxi Teoso sãkire iõkatsopatakori txari:

Teoso iotokakari iuikakaniua kaminiri inireẽkitina. Iua sikari ikinipoko erekari miuikakaniuamoni.

Itxa Teoso sãkire. ⁶Ininiã hĩteka poiãotakauako, kotxi Teosonoka kaposotiireri. Iketo manapi Teoso iuikai hĩte, erekari hĩkamakiti isãpiretiniri ikinimane. ⁷Maerekaxiniretinoka hinakasaaki, imakinika himaerekaxinire hĩsãpiretariko iua. Hĩsìkariko himaerekaxinireni iuamoni, kotxi iua tiretai.

⁸Kona hĩkamapiri hĩito nireẽkiti. Araõkire hĩtxako, kotxi himokaiakari Satanasi inakori ãkiti monõkori atoko itxa. Isaãpota initiniri ikiena. ⁹Satanasi apokasaaki hĩtemoni, iteene hãuikariko Teoso sãkire. Iuasaaki hĩtaparaxinireritika hãuako. !Himitekape. !Hĩkamapiri inireẽkiti. Himarotari hĩtariakori ikini itixiti auakani atatsiitiniri imisiritikona hĩte atatsiirauatini atokotxikana. ¹⁰Hĩte atatsiirauatako poiãonoka, eereka Teoso parĩka hãkixinireẽ iposope ikamini. Iua sikataparaxiniretai. Iteene hãuikari Teoso sãkire iuasaaki. Satanasi !iposotari itxĩkitakinii maerekati hĩkamini iuasaaki. Teoso, ikinipoko erekari sikakari, kamari ikara atoko inakari hĩte ãkapani. Iua akiritai itixine hĩsini, ãtipirika hãuini ãkapani, iua iotximere ãtipirika hãtamatinì ãkapani, kotxi Kristo Xesosi nakitiakori hĩtxaua. ¹¹Ãtipirika ikinimane txari iua: “Peerekai pite.” ãtipirika ikinimane auĩte itxaua. Ameẽ.

Petro Takapiretanapini

¹²Sĩrasi moianatano ia niõkatsopatakiti axapitiri niõkatsopatini hĩte ãkapani. Iua aĩtari. Iua iteene auikari Xesosi sãkire. Niõkatsopata hĩte nisikataparaxiniretini ãkapani. Ninirekari himarotiniri atã asãpiretinii erekari Teoso sikakiti pirena. !Hĩtakanapapiriko erekari Teoso sikakiti hĩtemoni. ¹³Teoso nakitiakori, Papirõnia sitatxiti auakani, xinikamanapitai hĩte. Teoso mereẽna ninoã hĩte imereini atokotxikana. Marko, namarite atoko inakari, xinikamanapitai hĩte apaka. ¹⁴Haõkitakakasaakiua, himaratakakauako, kotxi hĩtiretakakaua. Teoso kamaerekaxiniretai hĩte Kristo Xesosi sãkire auĩãkani. Ameẽ.

2 PETRO

Petro Iuaĩkana Iokanatsopatakiti

1 ¹Nota Simão Petro nitxaua. Xesosi Kristo nitiri, iua iokanatakiti nitxaua. Niokanatsopata hĩtemoni, kotxi hĩte auikari Xesosi Kristo sãkire, ate auikiniri atokotxikana. Peerekari iua sãkire aũuikini. Aũuikari iua sãkire, kotxi atãonoka kamakari itxaua. ATeosone, amaerekani makatxakakari itxaua Xesosi Kristo.

²Himaroãpotakasaakina Teoso, aũuĩte Xesosi pakini, hãpakapari ikinipoko erekari ninoa sikakiti. Itori hãpakapa. Ninoa iteene kamaerekaxiniretai hĩte.

Erekari Akamini

³Teoso posotiireẽ isikaua imakinika anireẽkiti ĩkorapokoriti aũuini ĩkapani, Teoso paniãtakiti akamini ĩkapani. Aãpakapari iua posotiire, iua aimarotakasaaki. Iua akiritaua iua nakitiakori aniniua ĩkapani. Aãpoka iuamoni akiritakasaakiua, kotxi peerekari iua. Aãpoka iuamoni, kotxi erekarinoka ikama. ⁴Ikara atoko ininiã, isikaua apia erekari isikaenetakiti. Isikaenetakiti anirekakiti apiari. Ikamaenetari ikamakiti erekari ikaminaua. Teoso nirekari ikara atoko ikaminiãua, atão inakaranoka akamini ĩkapani, atão inakaranoka Teoso kamini atokotxikana. Kristo sãkire mauĩakani nirekari maerekati iĩtona nireẽkiti ikaminina. Hĩte linirekaikari ninoa nireẽkiti iaõka hĩkamini, ininiã ikara maerekati linokai hĩte.

⁵Ininiã ikinika hãkixinire taparaã hãuikariko Teoso sãkire. Hãuikiniãri Teoso sãkire, hĩkamariko erekarinoka. Erekarinoka hĩkaminiã, hinirekariko Teoso sãkire iteene himarotini. ⁶Iteene

himarotiniári Teoso sãkire, hiïto auïte hïtxauako. Hiïto auïte hininiãua, himïteenekariko himisiritiko. Himisiritiko himïteenekiniã, hïkamariko erekari Teoso kaminiri atokokana. ⁷Hïkaminiári erekari Teoso kaminiri atokokana, hïtiretanako hïtariakori, Teoso sãkire auïãkani. Hïtariakori, Teoso sãkire auïãkani, hïtiretiniã, hïtiretari ikinimane. ⁸Ikara atoko hininiã, ikara atoko apiaãpotiniã, aãuïte Xesosi Kristo himarotakasaaki, erekari hïparïka iua ïkapani. Iuasaaki makamareti atoko !hïtxapeuako. Himinariko ito kãkiti Kristomoni isãkire auïkinina ïkapani. ⁹Ikara erekari mauakaniã hïtemoni, mïsiãreni atoko hïtxaua. !Himarotari atão inakari. !Hïxinikari Teoso kamakiti katana. Himaxinïkaretapekari Xesosi makatxakiniri himaerekani mitxi hïkamakiti.

¹⁰Ininiã nitariakori, ikara atoko !hïtxapeko. Hïkamariko ikinipoko Teoso paniãtakiti, ininiã iteene himarotari Teoso akiritinii inakitiakori hininiua ïkapani. Iuasaaki himarotari Teoso mereinii hïte iua anaakori hininiua ïkapani. Ikara atoko inakari hïkaminiã, !hïkamari maerekati. ¹¹Ikara atoko hïkaminiã, Teoso ipoxokoniritika apakapai hïte aãuïte Xesosi Kristo auïttxi ininiãtaãua hãuini ïkapani. Iuaã Xesosi, amaerekani makatxakakari, ãtipirika ikinimane auïte itxauako.

Atão Inakari Teoso Sãkire

¹²Ninirekari ikara noerekakiti ãtipirika nisãpiretinii. Himarotapekari ikara noerekakiti, iuaritika iuaïkana nisãpiretai. Hïte imarotari ikara noerekakiti atão inini, iuaritika kona nitakanapari ikara nisãpiretinii. ¹³Nota auapanika ninakasaaki, notamoni atãopitika nitxïkitakinii hïte ikara noerekakiti hïxinikini. ¹⁴Kotxi nimarotari païtiki nipinini. Aãuïte Xesosi Kristo oerekapekano païtiki nipinini. ¹⁵Ininiã uatxa Teoso sãkire nisãpiretapikai, ininiã kona himaxinïkaretari noerekakiti nipïkasaaki.

¹⁶Asãpiretai aãuïte Xesosi Kristo posotiire. Asãpiretai iua iuaïkana kanapiriini. Ikara asãpiretakiti hïtemoni kona kãkiti sãkireni. Kona kãkiti kimarorerini xinikakitini asãpiretai. Atão inakari ate sãpiretai hïte, kotxi ateka atamatari Xesosi ikinimane auïte ininiua. ¹⁷Aïri Teoso oerekari iuïkiniri iua. Oerekari iua ereka inini, kotxi itxari iua: “Ere namarite, nitiretakiti. Iua iteene kamapoxokonitano,” itxa Teoso kaposotiireri. ¹⁸Ateka kenakotari ikara Teoso sãkire, itixineẽ isãkirauatakasaaki. Iuasaaki ate aua Xesosikata õtanoxiratari Teoso nakiti nopini.

¹⁹Ininiã aimarotapitikari Teoso sãkire sãpiretakani sãpiretakiti kitxakapirïka atão inini. Himixinikariko ninoa sãpiretakiti. Ninoa

săpiretakiti tirikapi ipiã iopinikini atoko itxa, kăkiti sinimoni atamatini ĩkapani, kotxi axinikasaakiri ninoa oerekakiti, aimarotari atăo inakari, atăo minakati pakini. Teoso săkire săpiretakani săpiretakiti hĭxinikiniritika Xesosi kanapiriăko. Iuasaaki iua txĭkitakai Teoso iteene himarotini. Iuasaaki atokatxi ponikini atoko itxa Xesosi apokini. Iŕiki ĩkanŕkapanika pokĭkini atoko itxa iuasaaki Xesosi apokini. ²⁰Merepanika ninirekari iteene himarotini Teoso săkire săpiretakani săpiretakiti Teoso săkire iŕkatsopatakoriă. Kona ninoa săkireni. Kona ninoa xinikakitini. ²¹Kitxakapirĭka Teoso săkire săpiretakani kona iŕkatsopatari kăkiti nireĕkiti săkiretxiti. Erekarari Matamatakoti txĭkitakari kăkiti Teoso nakitiakori săpiretiniri atăo inakari Teoso săkire.

Atăo Minakati Oerekakani

2 ¹Kitxakapirĭka Teoso săkire săpiretakani auakasaaki, auari apaka atăo minakati oerekakani. Iua atokotxikana uatxa aua atăo minakati oerekakani hĭte sauaki. Kăkiti mimarotakanisaakiri, oerekari atăo minakati. Kona erekari ninoa oerekakiti. Na atăo ninoa oerekari Teoso săkire. Ninoa !auikari Apiananiri ipinini kăkiti ĩkapani Teoso ĩkitxitini ĩkapani. Ikara xika mokatanitika Teoso xipokanako ninoa. ²Itori kăkiti auikari isăkirena, ininiă ikamarina ninoa kamakiti atokokana. Ikamarina maerekati ĩtona nireĕkiti, maerekati ninoa kamini atokotxikana. Ininiă ikara xika, apanakini misăkirepiretari Teoso săkire atăo inakari auikiko. ³Kapotxinanirini ninoa atăo minakati oerekakani. Isăkirena atăo minakati xika, imisirienetai. Ninoa nireĕkiti iaŕka ikaminiina hĭte. Kitxakapirĭka Teoso săpiretapekari imisiritinina ninoa imaerekanina xika. Ixipokinina ŕti paĭtiki apokapitikako. Teoso !imaka. Ninoa xipokini ŕti apokapitikako.

⁴Teoso nitiriakori iaxiti auakani kamakasaakiri maerekati, imisiritana. !Auiritana imitekinina. Iokanatana maerekani misiritikoătaă. Iuaă itakana kateia âki ipiã. Iuaă iătaparina Teoso misiritinina ninoa imaerekanina xika.

⁵Kitxakapirĭka Teoso xipokari ikininmane kăkiti iua nireĕkiti manirekakani xirataătxiă. Teoso !auiritana ninoa mitekini. Noee, apikomoni setxi kăkitikata nĭkataăka. Ninoanoka !xipokaăka. Iua nĭkatari Noee, kotxi atăo inakari săpiretakari itxaua.

⁶Apaka ixipokari Sotoma sitatxiti auakani, Komoha sitatxiti auakani pakini arikatxiă. Atapaninoka kaikota iuasaaki. Ininiă ikara pinitari kăkiti Teoso nireĕkiti manirekakani. ⁷Iuasaaki Teoso makatxakari

Aroo inakori imapinakani ïkapani, kotxi erekari kamakari itxaua. Maerekati kamakani txïkitakari Aroo matinaniuatini, kotxi ikiniõtika iua atamatari maerekati ninoa kamakiti, maerekati ninoa ïto nireëkiti. Itxiko atoko itxa ninoa kamakiti. ⁸Aroo, atão inakari kamakari, aua ninoa sauaki. Ikiniõtika atamatari maerekati ninoa Teoso paniätakiti manirekakani kamakiti. Ikiniõtika ikenakotari maerekati ninoa sãpiretakiti. Ininiäkara äkixinireë Aroo maerekaxiniretinoka itxa ninoa maerekani xika, kotxi iua äkixinireë inirekari atão inakarinoka ikamini.

⁹Ikara atoko ininiä, Apiananiri imarotari iua nireëkiti nirekakani imaktxakini imisiritikosaakina. Iua apaka imarotari imisiritiniri atão minakati kamakani uatxa. Apaka imarotari imaïkinina ninoa, kãkiti misiritiko sãpiretiko õtisaaki imisiritinina ïkapani. ¹⁰Iteene Teoso misiritari kãkiti, maerekati ïto nireëkiti kamakani. Ninoa maerekani txikotari ninoa äkixinire. Apaka iteene imisiritari auïtetxi paniätakiti makamakani.

Ninoa atão minakati oerekakani iteene iuikaua. !Ipaxitarina äti. !Ipïkarina imisãkirepiretinirina iaxiti auakani. ¹¹Teoso nitiriakori iaxitikini iteene kaposotiireni. Apiataparata ninoa. Iuaritika Teoso nitiriakori !apoïtana ninoa atão minakati oerekakani. !Imisãkirepiretana Teoso apisatoõ.

¹²Ninoa atão minakati oerekakani misãkirepiretari ikinika imimarotakininitina. Kaxipiri ïtopa auakari atoko itxana, kotxi ikamarina iïtona nireëkitinoka. Kaxipiri ïtopa auakari iponaniä, eereka imaïkaäka, oka inaäka. Iua atokokana ninoa atão minakati oerekakani xipokaäkako imaerekanina xika.

¹³Ininiä ninoa misiritaäka, kotxi na atão ninoa kamakiti. Kona ïkanõkananini ikamarina maerekati. Ipotxitarina maerekati iïtona nireëkiti ikaminina pokamara, ikinimane atamatini ïkapani. Ninoa kamapikari maerekati, iuaritika apotiitauana hïtekata kiiniri Teoso ïkapani hïkamakasaaki. Ininiä apanakini !auikari hïte sãkire ninoa maerekani xika. Itxiko mäkatxi kasarori nopinikiri atoko itxana ninoa. Karõtxi kãkiti toõä auakari atoko itxana ninoa. ¹⁴Inirekapikarina sito ïtanoro minakotokatika isirïkinina. Kona iposotarina iotokakinirina maerekati ikaminina. Anikarina kãkiti mataparaxinireni, maerekati ikaminina ïkapani. Kapotxinanixinirena ninoa. Ininiä Teoso misiritapitikanako ninoa. ¹⁵Ninoa osipikari kimapori atão inakari. Ipïpinanakana. Ikamarina maerekati Paraão inakori maerekani atokokana. Iua Paraão, Peoo inakori äkiri. Kitxakapirïka aua. Iua

nirekaro txineiro maerekati ikamini ikapani. ¹⁶Txamari ipira txitari iua imaerekani xika, kotxi Teoso txikitakari poho sākirauatini kākiti sākirauatini atokokana. Ininiã ipira iotokakari iua atão minakati sãpiretakari kaminiri maerekati miikititi.

¹⁷Ninoa atão minakati oerekakani liposotari ikaminirina ikamaenetakitina. Aariko ãparaã mauakiniti atoko itxana. Kākiti nirekari ãparaã, txamari !auari. Katxiãri itima anikakiti atoko itxana ninoa. Kākiti nirekari ãparaã kipini, txamari !kipa. Teoso mereëri ipiaãtaã ninoa ãtipirika kaikotini ikapani. Kākiti atamarauatini iuaãtaã !auari. ¹⁸!Kiikiteri ninoa sãkire. Iuikauana isãkirauatakasaakina. Isãpiretarina kākiti, erekari akaminiri aito nireëkiti. Ininiã isikanireõtari kākiti ikara maerekati ikamini. Imisirienetarina Teoso sãkire poiãopanika auiaãkani. Ninoa !okananipanikani auikari Teoso sãkire. !Okananipanikani imarotarina atão inakari. Atão minakati oerekakani sikanireõtana ninoa ikara maerekati ikaminina.

¹⁹Itxana: “Kateia ãki auakani atoko hitxaua. !Erekari ikara atoko hinini. Hĩkamariko hinirekakiti. Ininiã ikara atoko hĩkaminiã, hĩsikakaãka,” itxana. Txamari ninoaka kateia ãki auakani atoko itxauana, kotxi ninoa liposotari itakanapinirina imaerekanina. Imaerekanina iauitena itxaua, kotxi ikamarina imaerekanina paniãtakitinoka. ²⁰Mitxi ninoa imarotari Apiananiri Xesosi Kristo sãkire, kākiti maerekani makatxakakari sãkire. Iuusaaki ninoa iotokakari ikaminirina Xesosi sãkire mauiaãkani kamakiti, kākiti xinire maerekati inini txikitakakari. Txamari eereka iuaikana ikamarina ikara maerekati. Eereka liposotaikarina ikara maerekati itakanapinina. Ininiã uatxa apiata imisiritikona. ²¹Erekamariko atão inakari kamiko ninoa mimarotakanimako, kotxi ninoa imarotari, iuaritika !inirekaikarina Teoso paniãtakiti, iua iokanatakini sãpiretakiti. Uatxa ninoa misiritiko apiata. ²²Atãopitikara kitxakapirĩka sãkiretxiti:

Anãpa kanapiriã okanakakitimoni onikiniri ikapani. Irari ipitikiri arokakito kanapiriã iãropemoni osirĩkini ikapani. Ininiã iuaikana ninoa atão minakati oerekakani kamari maerekati, mitxi ninoa takanapakiti.

Apiananiri Kanapiriini

3 ¹Nitiretakini, mitxi niokanatsopatapeka hĩtemoni. Iuaikana niõkatsopatari ia aãtsopa. Imakinika niõkatsopata, kotxi ninirekari hĩte iuaikana hĩxinikiniri erekari mitxi himarotakiti.

²Ninirekari hīxinikiniri Teoso sākire sāpiretakani sākire kitxakapirīka, kotxi Teoso nakitiakori itxauana. Apaka ninirekari hīxinikiniri ate paniātakiti, kotxi Apiananiri iokanatakini atxaua. Kākiti maerekani makatxakakari iokanatakini atxaua.

³Merepanika himarotariko ia: Imapotōkire ōti takote auako kākiti Teoso sākire napetakani. Ninoa kamari maerekati iītona nireēkiti. ⁴Ia atoko itxanako: “Ītapari iua? ‘Nikanapiriāko,’ itxa iua. Txamari kona apoka. Aātokiriakorini ipīkasaakipanika, itixi kamikosaakipanika iuatxikana. Mitxi itixi, uatxa iuatxikana,” itxana.

⁵Ninoa nirekari imaxinīkaretinirina Teoso kamakiti kitxakapirīka auakari, kotxi Teoso txīkitakari iaxiti apiko nopinixiti auini isākireē. Apaka ikamari itixi āparaā kamakori. Ikamari itixi āparaā sauaki.

⁶Apaka ninoa maxinīkaretari ia: Teoso iokanataru iua āparaā, ininiā xirataātxi xipokari itixi mitxi auakari, ikinimane kākiti iuasaaki auakani apaka. ⁷Uatxa isākireē inīkatari iaxiti apiko nopinixiti, itixi pakini arikatxi xipokiniri īkapani. Imakinika inīkatiniritika Teoso manirekakani misiritiko isāpiretako. Iuasaaki ninoa xipokaākako. Iuasaaki ixipokari iaxiti apiko nopinixiti, itixi pakini.

⁸Nitiretakini, kona himaxinīkaretapiri ia nisākire: Teosomoni āti ōti, mio anokanani atokotxikana itxa. Iuamoni mio anokanani, āti ōti atokotxikana itxa. ⁹Apiananiri kamapitikari ikamaenetakiti. Apanakini kākiti xinikari !katimari ikaminiri ikamaenetakiti. Kona ikara atokoni. Iātapari kākiti auikiniri isākire, kotxi linirekari kākiti sini imisiritikomoni. Inirekari ikinimane takanapiniri imaerekani.

¹⁰Apiananiri kanapiriākasaaki, kiītiriri īkanōka apokini atokokana. Iua apoka kākiti mimarotakanisaakiri. Iuasaaki iaxiti apiko nopinixiti ereēkoka itaparakieneritika. Iuasaaki ikinipoko xipokaāka arikatxiā. Iuasaaki iteene ipataka aua. Imakinika itixi xipokako iuasaaki.

¹¹Ikara atoko itxako ikinipoko xipokini, ininiākara natokopa itxa hāuini ikiniōtika ereka hinini? Erekarinoka hīkamako ikiniōtika, kotxi iua nakitiakori hītxaua. Teoso nireēkitinoka hīkamako ikiniōtika. ¹²Iuasaaki hiātapari hīpoxokoniritika Teoso keto apokini. Iteene hinirekariko ikara ōti apokini. Iuasaaki iaxiti apiko nopinixiti xipokaāka arikatxiā. Ikinika iākokako kapatakari xika. ¹³Iuaritika aiātapari iaxiti apiko nopinixiti amaneri, itixi amaneri apaka atāo inakari kamakani īkapani. Ikara atoko inakari Teoso sikaenetakiti.

¹⁴Ininiã nota tiretakini, hinirekasaakiri Xesosi kanapiriini õti apokini, iteene hīparīkauatako maerekati himakamakani īkapani. Ininiã iua kanapiriākasaaki, iua imarotari himakamakaniri maerekati. Iuasaaki imarotari hīkerokiniri !auari. Iuasaaki imarotari erekaxinire hinini. ¹⁵!Katimari iua kanapiriini, kotxi iātapari kākiti takanapiniri maerekati ikamakiti, imisiritiko mapokakani īkapani. Iua atokokana aītari atiretakiti Paoro iōkatsopata hītemoni Teoso imaroreē. ¹⁶Ikinika Paoro iokanatsopatakitiã isāpiretari Apiananiri kanapiriini õti Teoso imaroreē. Ipixini iua iōkatsopatakiti pamimari kākiti imarotiniri īkapani. Aua kākiti miīkiteni. !Apakata aāuikiniri ninoa sākire. Kākiti ikara atoko inakani oerekari Paoro iōkatsopatakiti, apanakini Teoso sākire iōkatsopatakori pakini, txamari na atāo ninoa sāpiretakiti. Ipinimoni ninoa oerekakiti. Imamakarina Teoso sākire, ininiã ikara xika ixipokaākanako.

¹⁷Nitiretakini, himarotapekari pamonōkoniri ninoa atāo minakati oerekakiti. Ininiã araōkire hītxako. Kona hāuikapiri Teoso sākire kerokakani sākire, kotxi Teoso paniātakiti makamakani itxauana. Kona hītakanapapiri Teoso sākire atāo inakari, uatxa iteene hāuikakiti. ¹⁸Ikiniōtika himarotariko ikinipoko erekari aāuīte Xesosi Kristo sikakiti hītemoni, amaerekani makatxakakari sikakiti hītemoni. Ikiniōtika himaroāpotariko iua. Ninirekari ikinimane uatxa sāpiretiniri iua: “Peerekai pite.” Ninirekari ikinimane ātipirika sāpiretiniri iua: “Peerekai pite.” Ameē.

1 XOÃO

Merepanika Xoão Iokanatsopatakiti

Xesosi “Teoso Sãkire” Inakori

1 ¹Nota iøkatsopata hĩte ĩkapani, iua “Teoso sãkire” inakori asãpiretini ĩkapani. Ātipirika auakari itxaua. Itxĩkitakari ikinipoko auãki inini. Itixi kamiko apisa iua aua. Atera kenakotari isãkire. Aõkiã ate atamatari iua. Auakoã amaãtakari iua. Ininiã atãopitika ate imarotari iua. ²Iua ikinipoko auãki inĩkitaãkari. Iuaka oerekaua atemoni. Ate imarotapekari iua, ininiã asãpiretai aãtamatakiti, akenakotakiti pakini. Ate sãpiretai hĩte iua ātipirika auakari, kãkiti auãki inĩkitaãkari, ininiã kãkiti auapikako Teosokata. Iua Xesosi Kristo inaãka akiritiko. Iua aua irikata, Teosokata. Iuaka oerekaua atemoni. Aãtamatari iĩto. ³Ate sãpiretai hĩte aãtamatakiti, akenakotakiti pakini, amoianatakakiniua ĩkapani. Atão nisãpiretai. Amoianatakakaua Teosokata, Xesosi Kristo pakinikata. ⁴Ia sãkiretxiti aiokanata hĩtemoni, iteene hĩpoxokoniuatini ĩkapani.

Teoso Pokamara Atoko Itxa

⁵Teoso pokamara atoko itxa, kotxi maerekati !ikama. Ipiã !uari Teoso auiniãtaã, kotxi maerekati !ikama. Ikara iokanapirena imi sãpiretaua ate. Ininiã ate sãpiretai hĩte. ⁶Maerekati akamakasaaki, ipiã auakani atoko atxa. Iuasaaki, “Teoso amoianata,” aniniã, paxirari asãkire. Kona atão akamakiti iuasaaki. ⁷Teoso aua ikamaraã, kotxi erekarinoka ikama. Ate ikamaraã aũuniã Teoso atoko aniniã, erekarinoka akaminiã, ininiã ate Teoso sãkire

auiãkani moianariakori atxaua, ininiã amoianatakakaua. Ikamaraã aãuiniã, Teoso arokaua Xesosi arêkaã. Imaktxakari ikinika maerekati akamakiti, kotxi imi Xesosi Kristo ipina ate ìkapani. Iarêka xikepoakata ate maerekani imaktxakini ìkapani.

⁸“Na nota kamari maerekati,” aniniã, ateka misirienetaua. Ikara atoko aniniã, ate ìmarotari atão Teoso sãkire aãkixinireẽ.

⁹Amaerekani Teosomoni asãpiretiniã, iua maktxakapitikari amaerekani. Oeretari ate ãkixinire. Imaktxakari ikinipoko amaerekani. Ikamari ikara atoko, kotxi imaktxakaenetari amaerekani. Ikamapitikari ikamaenetakiti. Ikamapikari atão.

¹⁰“Uatxapiima maerekati !nikama,” pininiã, pitemoni Teoso sãkire paxirari atxiiti? Kotxi Teoso txapekari kãkiti: “Maerekati kamakari kãkiti.” “Maerekati !nikama,” pininiã, !pimarotari Teoso sãkire pãkixinireẽ. !Pikamari Teoso sãkire iaõka iuasaaki.

Kãkiti Teoso Atão Imarotakari

2 ¹Namariteni nota tirketakini atoko hĩtxaua hĩte. Ikara niõkatsopata, maerekati himakamakani ìkapani. Maerekati akamakasaaki, masãpiretari Xesosi Kristo. Aĩri Teoso misãkiretakari itxaua Xesosi. Atão inakarinoka kamakari itxaua iua. Iua misãkiretari Teoso ate ìkapani, amaerekani imaktxakini ìkapani. ²Iua maktxakari maerekati akamakiti. Kona ate maerekaninanini imaktxaka. Ipina ikini itixiti auakani maerekani imaktxakini ìkapani.

³Teoso paniãtakiti akĩpitiniã, atão aimarotari Teoso. ⁴Teoso paniãtakiti makĩpitakati, “Nota imarotari Teoso,” inakari, paxirari isãkire. ãkixinireẽ !imarotari atão inakari Teoso sãkire. ⁵Teoso sãkire kĩpitakari iteene tirketari Teoso. Kininiãpa aimarotatari iua nakiti aniniãua? ⁶Akamakiti ikiniõtika Xesosi kamakiti atokokana akaminiã, iuasaaki aimarotari Teoso nakiti aniniãua. “Teoso nakiti nitxaua,” pininiã, pikamariko Xesosi kamakiti atokokana.

Iteene Matiretakakaua

⁷Nitiretakini, Apiananiri paniãtaua atiretakakiniua. Ia paniãtxi niõkatsopatakiti hĩtemoni, kona amaneriikani. Hĩkenakopiretapekari ikara paniãtxi merepitipanika Xesosi sãkire hĩkenakotakasaaki. Iuasaaki hĩkenakotari ikara paniãtxi hĩtirketakakiniua tĩkane. Ikara paniãtxi kitxakapirĩkari itxaua. Hĩkenakotapekari ikara paniãtxi. ⁸Iuaritika ikara paniãtxi amaneri itxaua. Xesosi kĩpitari

ikara paniãtxi, kotxi itiretari kãkiti. Hĩte apaka tiretari kãkiti, ininiã aimarotari ikara paniãtxi ereka inini. Ininiã ipiã napaãpota, kotxi kãkiti imaroãpotari atão Teoso sãkire. Atão inakari kãkiti imarotakasaaki, pokamarari atoko itxa kãkiti ãkixinireẽ.

9“Pokamara naua,” pininiã, txamari iuasaaki pomanatari pitari Xesosi sãkire auĩãkari, ikara atoko pininiã, uatxapiima ipiãã pauapanika. 10Pitari Xesosi auĩãkari pitiretiniã, pokamara pauapitika. Ininiã erekari pãkixinire, ininiãkara pãkixinireẽ auakari kona txĩkitakai maerekati pikamini. 11Pitari Xesosi sãkire auĩãkari pomanatiniã, ipiãã auakari atoko pitxaua. Iuasaaki pitĩpokotapika ipiãã. !Pimarotari pisinimoni. Mõsiãreti atoko pitxaua, kotxi !apakata patamarauatini ipiã xika.

12Namariteni nota tiretakini, niõkatsopata hĩte ãkapani, kotxi Xesosi makatxakapekari himaerekani, kotxi kãkiti maerekani makatxakakari itxaua.

13Hĩte irĩtxiakoripekana, niõkatsopata hĩte ãkapani, kotxi hĩte iteene imarotari Xesosi, itixi kamikosaaki auapeka inakari.

Hĩte ãtokoriakoripekana, niõkatsopata hĩte ãkapani, kotxi homitikapekari Satanasi hĩtapararitika.

Namaritenipekana, niõkatsopata hĩte ãkapani, kotxi himarotari aĩri Teoso.

14Hĩte irĩtxiakoripekana, niõkatsopata hĩte ãkapani, kotxi himarotari Xesosi. Itixi kamikosaaki auakaripeka itxaua.

Hĩte ãtokoriakoripekana, niõkatsopata hĩte ãkapani, kotxi pataparari hãkixinire. Teoso sãkire auapika hãkixinireẽ. Homitikapekari Satanasi hĩtapararitika.

!Hinarekapi Itixi Auakani Nireẽkiti

15Itixi auakani nireẽkiti atoko inakari !hinirekape, kotxi ninoa nirekari maerekati ikaminina. Hĩtiretiniãri ninoa kamakiti, !hĩtiretari aĩri Teoso. 16Maerekati kãkiti kamakiti ia atoko itxapaniko: Inirekarina maerekati iĩtona nireẽkiti ikaminina. Inirekarina maerekati okina nireẽkiti ikaminina. Iuikauana, katii ininiãuana. Iuikarina ikamakitina. Ikara maerekati kãkiti kamakiti potorika ãkorapokoriti. Kona Teosomonikirini ikara. 17Itixi xipokako. Ikinipoko tiitxi kãkiti nireẽkiti apaka xipokako. Kãkiti Teoso nireẽkiti kamakarirako !ixipoka. Auapininiika Teosokata.

Kristo Omanatakani

18 Namariteni nota tirketakini, itixi xipokini õti katanapananoka apoka. Kristo omanatakani auite apokako itixi xipokini õti apisa. Ikara himarotapeka. Uatxa Kristo omanatakani itomane apokapeka. Ikara atoko ininiã, aimarotari itixi xipokini õti takotepeka inini.

19 Ninoa Kristo omanatakani, mitxi atekata apotiitaua, Teosokata aãpotiitakasaakiua. Txamari ninoa !auikari Xesosi sãkire ate auikiniri atokokana, ininiã ninoa sipe. Ninoa atão Xesosi sãkire auikaãkamako, atekata ikaikotapikamanako. Itakanapaua, kotxi ate auikari Xesosi sãkire. Ninoa !auikari.

20 Teoso, erekarinoka kamakari, sikapekai hite Erekaru Matamatakoti himoianari tĩkane. Ininiã hite imarotari atão inakari Xesosi sãkire. 21 Hite imarotari atão inakari Xesosi sãkire, iuaritika niõkatsopata hitemoni. Niokanatsopata hitemoni, kotxi himarotari atão inakari. Paxiene kamakari !imarotari atão inakari sãkiretxiti.

22 Natokopa itxa iua paxiene kamakari? Paxiene kamakari txari: “Xesosi kona Teoso mereẽkitini.” Kãkiti ikara atoko inakari Kristo omanatakari itxaua iua. Iua !inirekari aĩri Teoso. Imi apaka !inireka. 23 “Xesosi kona Teoso ãkirini” inakari, na kaikota Teosokata. “Teoso ãkiripitikara Xesosi” inakarirako kaikotapitikako Teosokata.

24 Hãuiritariko merepitipanika Xesosi sãkire hĩkenakotakiti kaikotini hãkixinireẽ. Ikara kaikotiniã hãkixinireẽ, Teoso ãkirikata hĩkaikotapikako. Aĩri Teosokata hĩkaikota apaka. 25 Xesosi sikaenetapekaua aãuapininiika anini Teosokata.

26 Niõkatsopata hite nõtãkikini ĩkapani, kotxi aua kãkiti Xesosi hĩtakanapini nireẽkani. 27 Erekaru Matamatakoti, Xesosi sikakiti, auapanika hite ãkixinireẽ, ininiã hite na nirekari ãti koerekareri. Iua Erekaru Matamatakoti oerekai ikinipoko. Iua oerekakiti atãopitika. Kona paxieneni iua. Ininiã hĩkaikotako Xesosikata, Erekaru Matamatakoti oereẽkiti hĩkĩpitini.

28 Ininiã namariteni nota tirketakini, himoianatapikariko Xesosi. Ininiã uaimoni ikanapiriãkasaaki, hĩpĩkarauatini !uari. Ininiã na hĩpẽtauata haõkitakasaakiri iua. 29 Xesosi kamari atão inakarınoka. Ikara himarotapeka. Ininiãkara himarotari, kãkiti atão inakarınoka kamakani Xesosi anaakori ininiuana.

Teoso Anaakori

3 ¹Aĩri Teoso iteene tiretaua ate. Hĩxinikariko iua tiraõki. Iua iteene tiretaua ate, ininiã, “Namariteni,” itxaua ate. Ari, atãopitikara Teoso anaakori atxaua. Ninoa Teoso anaakori minakanuia !auikari Teoso anaakori aniniua, kotxi ninoa !imarotari Teoso. ²Nitiretakini, Teoso anaakori atxapekaua uatxa. Eereka !aimarotari kanatokoako atxapaniko. Ia aimarotapitika. Xesosi kanapiriãkasaaki, Xesosi atoko atxapekauako, kotxi iusaaki aãtamatariko iua. ³Kãkiti ikara auiãkani, !nirekarina maerekati ikaminina, kotxi Xesosi !ikamari maerekati.

⁴Maerekati kamakari !ikamari Teoso paniãtakiti. Amakamakanisaakiri Teoso paniãtakiti, iusaakipeka akamari maerekati. ⁵Himarotari Xesosi apokapeka !korapokoriti maerekati akamakiti imaktxakini !kapani. Xesosi !ikamari maerekati. ⁶Kãkiti Xesosi ãtipirika moianatakari !nirekaikari maerekati ikamini. Iua ãtipirika maerekati kamakari !aõkitapanikari Xesosi. !Imarotapanikari Xesosi.

⁷Namariteni nota tiretakini, !hãuiritapiri apanakini misirienetiniĩ hĩte. Atão inakarinoka kamakari kamapitikari Teoso nireẽkitinoka, Xesosi kaminiri atokokana, kotxi Xesosi kamari atão inakarinoka. ⁸Ãtipirika maerekati kamakari Satanasi nakiti itxaua, kotxi Satanasi kamapikari maerekati. Itixi kamikosaakipekara ikamaãpokatapitiporiri maerekati. Uatxa ikamapanikari. Teoso ãkiri apoka !korapokoriti maerekati Satanasi par!ka ixipokini !kapani.

⁹Teoso anaakori !nirekaikari maerekati ikaminina, kotxi Teoso aua ãkixinireẽna. Ininiã !liposotarina maerekati ikamaãpotinina, kotxi iritarina Teoso. ¹⁰Ininiã kipa Teoso anaakori txataua? Atão inakarinoka kamakanira Teoso anaakori txaua. ãti tiretakanira Teoso anaakori txaua. Ininiã kipa Satanasi anaakori txataua? Erekari makamakanira Satanasi anaakori txaua. ãti matiretakanira Satanasi anaakori txaua.

Kãkiti Tiretakakiniua Pirena

¹¹Matiretakakaua. Merepitipanika Xesosi sãkire hĩkenakotakasaaki, hĩkenakotari ikara õtãkiprenatxi, hĩtiretakakiniua. ¹²Kaiĩ inakori atoko !hĩtxape. Maerekatinoka kamakari nakiti itxaua iua Kaiĩ. Satanasi nakiti itxaua. Kaiĩ okari atão itarika. Kixikapa okari? Ixikotiniri xika okapiri, kotxi itari kamari erekarinoka. Kaiĩ kamari maerekatinoka.

¹³Nitariakori, Xesosi sãkire mauiãkani omanatakasaakii hĩte, !hĩtsorĩkaãtapeko. “Kixikapa ninoa omanataua ate?” !hĩtxapeko, kotxi ikara atoko inakari apokapitikako. ¹⁴Atiretiniãri aĩtariakori Xesosi sãkire auiãkani, aimarotari !apinaika. Aãuapininiika Teosokata. Matiraõkiti ãkixinire ipĩkari atoko itxa. ¹⁵Kãkiti itari omanatakari, Xesosi sãkire auiãkari omanatakari, kokaniri atoko itxaua. Himarotari kokaniri !auari ãtipirika Teosokata.

¹⁶Xesosi Kristo ipina amaerekani imaktxakini ĩkapani, ãtipirika Teosokata aãuini ĩkapani. Ikara oerekaua atão tiraõkitxi. Ininiã erekari aĩtariakori atiretini. Xesosi turetiniua ate atokokana, erekari atiretiniri aĩtariakori. Atxiĩti apina aĩtari mapinakani ĩkapani. ¹⁷Pitii, pikiena pakini auiniãi, pitari, Teoso sãkire auiãkari tii, ikiena pakini mauakaniã, pisikariko iuamoni. Pimasikakaniãri iuamoni, Teoso tiraõki pãkixinireẽ !auari. ¹⁸Namariteni nota turetakinii, “Apanakini ate tureta,” atxaua, txamari kaamoni inakasaakina na asikana minakati, ininiã na atão atiretana. Atão matiretana apanakini. Kaamoni inakasaakina, masikana ninoa amonitakitina.

Teoso Sãkire Kĩpitakari

¹⁹Ikara atoko akaminiã, aimarotari Teoso anaakori aniniãua. Aimarotari atão inakari sãkiretxiti akĩpitini. Ikara atoko akaminiã, erekapitikari aãkixinire. Ikara atoko akaminiã, !apĩkari Teoso amisãkiretini. ²⁰“Kona erekano,” pininiã pãkixinireẽ, mitxi pimaerekani pikamini xika, !pipĩkarauatape, kotxi Teoso iteene imarotai, iuaritika iteene iamoniĩkai. Poiãoka aimarotari aãkixinireẽ auakari. Teoso imarotari ikinipoko.

²¹Nitiretakini, pãkixinireẽ: “Namanaãpekaru Teoso imakinika nimaerekani imaktxakini,” pininiã, kataparaxinirepitikai Teoso pimisãkiretini. ²²Ininiã iua sikaua aamanaãkiti, kotxi ate kamari ipaniãtakiti iaõka. Iua apokaerekatakatinoka akama. ²³Teoso paniãtaua ate: “Hãuikariko namarite Xesosi Kristo sãkire.” Apaka Teoso paniãtaua: “Hitiretakakauako.” Teoso paniãtaua ikara akamini. ²⁴Teoso sãkire iaõka kamakari kaikotapika Teosokata ãtipirika. Teoso kaikotapika iuakata ãtipirika apaka. Aimarotari Teoso kaikotini atekata, kotxi iua sikaua Erekari Matamatakoti aãkixinireẽ auini ĩkapani.

Atamakaerekarauatini

4 ¹Nitiretakini, lhãuikapiri ikinimane kãkiti sãkire, “Erekari Matamatakoti aua nota ãkixinireẽ,” inakani. Hãtaerekatanako ninoa. Atão Erekari Matamatakoti auatana atxiĩti ãkixinireẽna? Atxiĩti matamatakoti ãkixinireẽna auakari kona Teosomoni ïkarini. Itomaneri kãkiti, “Nota Teoso sãkire sãpiretakarino,” inakani, txamari na atão ninoa sãkire. Kãkiti ninoa atoko inakani aua ikini itixitika. !sãpiretarina atão Teoso sãkire. Imisirienetarina kãkiti. ²Kãkiti sãpiretiniãua: “Teoso ãkiri Xesosi Kristo apokapeka ïkorapokoriti. Kãkitipeka itxaua,” ininiã iuasaaki aimarotari Erekari Matamatakoti auapitika iua ãkixinireẽ. Ikara atoko aimarotari Erekari Matamatakoti Teoso sikakiti auaĩtotiniri kãkiti. ³Kãkiti sãpiretiniãua: “Xesosi na atão kãkiti !itxaua,” ininiã iuasaaki aimarotari Erekari Matamatakoti !uari iua kãkiti ãkixinireẽ. Matamatakoti iua kãkiti ãkixinireẽ auakari Satanasi nakiti itxaua. Kristo omanatakari nakiti itxaua. Iua Erekari Matamatakoti Teoso nakiti itxaua. Hikenakopiretapekari: “Maerekati Matamatakoti Kristo omanatakari iokanatakiti apokapitikako ïkorapokoriti,” itxa. Uatxa apokapeka.

⁴Hĩte namariteni, Teoso nakitiakori hĩtxaua. Ininiã hĩte !auikari atão minakati sãpiretakani sãpiretakiti, kotxi Erekari Matamatakoti hĩte ãkixinireẽ auakari apia posotiireri itxaua iua. Maerekati matamatakoti, Xesosi sãkire mauĩãkani ãkixinireẽ auakari, kaposotiireri itxaua, iuaritika Erekari Matamatakoti hĩte ãkixinireẽ auakari apia sikaimaroretai hĩte. ⁵Ninoa atão minakati sãpiretakani xinikakiti, itixi auakani xinikakiti atokotxikana, ininiãkara itixi auakani auikari ninoa sãkire. ⁶Atepekana, Teoso nakitiakori atxaua. Teoso imarotakari auikari asãkire. Teoso nakiti minakatua !auikari asãkire. Ininiãkara aimarotari kãkiti Erekari Matamatakoti auaãkixiniretakini. Iua Erekari Matamatakoti atãonoka isãkirauata. Aimarotari kãkiti ãti matamatakoti auaãkixiniretakini. Iua ãti matamatakoti kamisirienereri itxaua.

Teoso Tiraõki

⁷Nitiretakini, matiretakakaua, kotxi tiraõkitxi Teosomoni potorikakari itxaua. Katiraõkirini Teoso anaakori itxauana. Ninoa atão imarotari Teoso. ⁸Matiraõkiti !imarotari Teoso, kotxi Teoso tiraõkiuatapika. Tiraõkitxi Teosomoni potoriãkari itxaua. ⁹Teoso iokanatarari imatonõkari imi atemoni, Teosokata ãtipirika aũuini

ĩkapani. Ikara atoko ininiã, Teoso oerekaua itiretiniua. ¹⁰Ikara tiraõkitxi atão inakari itxaua. Mitxi ate !atiretari Teoso. Iuaritika iua tiretaua ate, ininiã iokanatarari imi atemoni ipinini ĩkapani, maerekati akamakiti imakatzakini ĩkapani.

¹¹Nitiretakini, ikara atokorako itxa Teoso tiretiniua, ininiã matiretakakaua. ¹²!Auari Teoso atamatakari, iuaritika Teoso auari aãkixinireẽ, atiretakakiniãua. Ininiã Teoso oerekaua atão atiraõkiuatini.

¹³Aimarotari Teosokata akaikotini ãtipirika. Aimarotari Teoso ãtipirika kaikotini atekata. Aimarotari ikara atoko inakari, kotxi iua sikari Erekarari Matamatakoti atemoni. ¹⁴Aãtamatapekari Xesosi kamakiti. Akenakotapekari isãpiretakiti. Ininiã asãpiretarari ikinimane, aĩri Teoso iokanatarari imi kãkitimoni, amaerekani makatzakakari ininiua ĩkapani, kãkiti ãtipirika Teosokata auini ĩkapani. ¹⁵“Xesosi Teoso ãkiripitikara,” ina sãkiretakani, Teoso kaikotapika ninoakata. Apaka ninoa kaikota Teosokata ãtipirika. ¹⁶Aimarotari Teoso tiretiniua. Aãuikapiretapitikari Teoso tiretiniua.

Teoso tiraõkiuatapika. Kãkiti katiraõkiri kaikota Teosokata ãtipirika. Teoso kaikota ãtipirika iuakata apaka. ¹⁷Teoso oerekapekaua atão atiraõkiuatini iua tiraõkiuatini atokokana. Ininiã kataparaxinireua Kristo apisatoõ aãpokasaaki, kãkiti misiritiko õtisaaki. Aimarotari !imisiritaua iuasaaki, ininiã kataparaxinireuako, kotxi ĩkorapokoriti aãuakasaaki Kristo atoko atxaua. ¹⁸Atiraõkiuatakasaaki, !apĩkarauata. Atão atiraõkiuatiniã, !auari apĩkare. Apĩkarauatakasaaki, amaãkaua.

¹⁹Atiretari Teoso, kotxi mitxipeka iua tiretaua ate. ²⁰Iua itari omanatakari, “Nota tiretari Teoso” ina sãkiretakari, paxirari isãkire. !Itiretari itari iuakata auakari. Ininiã !iposotari itiretiniri Teoso imaõkitakiniti. ²¹Ininiã Teoso paniãtaua: “Teoso tiretakari tiretariko itari apaka.”

Teoso ãkiri Auikiko

5 ¹Xesosi Teoso mereẽkiti itxaua. Ikara auiãkani Teoso anaakori itxauana. Aĩri Teoso atiretiniã, aĩtariakori apaka atireta, kotxi Teoso anaakori ninoa apaka txaua. ²Teoso atiretiniã, inireẽkiti iaõka akaminiã, aimarotari Teoso anaakori apaka atiretini. ³Teoso atiretiniã, akĩpitari ipaniãtakiti. Aposotari akaminiri ipaniãtakiti, kotxi na kamimari ipaniãtakiti. ⁴Aposotari akaminiri iua paniãtakiti, kotxi iua anaakori atxapekaua, ininiã isikataparataua, maerekati itixi

auakani nireẽkiti amakamakani ĩkapani. Kininiãpa isikataparataua maerekati ninoa nireẽkiti amakamakani ĩkapani? Isikataparataua, kotxi Xesosi sãkire aãuika. ⁵Kipa posotari maerekati itixi auakani nireẽkiti imakamakani? Kãkiti auikiniãri Xesosi Teoso ãkiri ininiãua, iuanokara posotari maerekati imakamakani.

⁶Xesosi Kristo Teoso ãkiri itxaua. Teoso oerekapekua Xesosi iua ãkiri ininiãua. Kãuaãriã Xesosi patxisatikosaaki isãpiretaua. Iuaĩkana Teoso sãpiretaua Xesosi iua ãkiri ininiãua, Xesosi ipĩkasaaki iarẽka ixikepoatakasaaki. Teoso sãpiretaua kona Xesosi patxisatikosaakinanini. Iua oerekaua Xesosi Teoso ãkiri ininiãua ipĩkasaaki apaka. Erekaru Matamatakoti sãpiretaua Xesosi Teoso ãkiri ininiãua. Iua atãonoka isãkire. ⁷Teoso tixini auakani ipi, ãti pakini oerekaua Xesosi Teoso ãkiri ininiãua, aĩri Teosoma, “Teoso Sãkire” inakorima, Erekaru Matamatakotima pakini. Naia ipi, ãti pakini ãtinoka. ⁸Ĩkorapokoriti auakani ipi, ãti pakini, Erekaru Matamatakotima, Xesosi patxisatikoma, Xesosi ipininima pakini oerekaua Teoso ãkiri ininiãua Xesosi. ⁹Kãkiti erekarini sãpiretakiti aãuikapitika, ininiã apiata maãuikari Teoso sãpiretakiti, kotxi atãonoka isãkire. Iuara sãpiretaua Xesosi iua ãkiri ininiãua. ¹⁰Teoso ãkiri auĩãkari ãkixinire imarotari ikara Teoso sãpiretakiti atão inini. Teoso sãpiretakiti mauĩãkati txari: “Paxirari Teoso sãkire,” kotxi !auikari Teoso sãpiretakiti Xesosi iua ãkiri ininiua. ¹¹Kiripa Teoso sãpiretaua? Iua sãpiretaua: “Nitxĩkitakai auãki hinini notakata hãuapininiika hinini tĩkane. Ikara atoko nitxĩkitakai namarite nakitiakori hinakasaakia.” ¹²Iua Teoso ãkiri nakiti Teosokata ãtipirika auako. Iua Teoso ãkiri nakiti minakatiaua, lauapani ãtipirika Teosokata.

Aãuini ãtipirika Anini Tĩkane

¹³Hĩte auikari Xesosi Teoso ãkiri ininiua. Niokanatsopata hĩtemoni, Teosokata ãtipirika hãuini himarotini ĩkapani. ¹⁴Teoso nireẽkiti atokotxikana aamanainiãri Teoso, aimarotari ikenakotari amisãkiretiniri, ininiã kataparaxinirepitikaua amisãkiretiniri, kotxi aimarotari iua apakapapiretapitikaua. ¹⁵Ikara atoko aniniã, aimarotari ikenakotari aamanaãkiti, ininiã isikapitikaua.

¹⁶Himarotakasaakiri pitari kaminiri maerekati, himisãkiretari Teoso iua ĩkapani. Ininiã Teoso makatxakari maerekati ikamakiti. Teoso kamari iua ãtipirika iuakata auini ĩkapani. Ikara maerekati makatxakiko auapitika, ininiã kona itxĩkitakari iua xinire ipinini. ãtião maerekati kãkiti kamakiti aua. Ikara maerekati makatxakiko

!auari, ininiã itxĩkitakari kãkiti xinire ipinini. Nota !õtãkikai himisãkiretiniri Teoso ikara atoko inakari maerekati kamakari ĩkapani. ¹⁷Teoso paniãtakiti amakamakaniã, iuara maerekati txaua. Iuaritika aamanainiãri Xesosi ikara maerekati imakatzakini, ininiã ikara maerekati !itxĩkitakari kãkiti xinire ipinini.

¹⁸Teoso anaakori atão inakani !inirekaikari maerekati ikaminina. Aimarotari ikara. !Inirekaikarina maerekati ikaminina, kotxi Teoso ãkiri nĩkatana ninoa. Ininiã maerekati auĩte Satanasi !iposotari imisiritinina.

¹⁹Ikini itixiti auakani auĩte itxaua Satanasi, maerekati kamakari. Iuaritika aimarotari Teoso anaakori aniniua ate.

²⁰Aimarotari, Teoso ãkiri apokapeka ĩkorapokoriti. Aimarotari iua sikaua imarore, ininiã aimarotari Teoso atão inakari. Akaikota iua atão inakarikata. Ari akaikota imi Xesosi Kristokata. Teoso atão inakari itxaua iua. Itxĩkitakaua iuakata ãtipirika aũuni.

²¹Namariteni, nota tirketakini, !hĩteosonetapiri Teoso minakatua. Ameẽ.

2 XOÃO

Iuaĩkana Xoão Iokanatsopatakiti

¹Nota Xoão, mitxipe Xesosi imarotakarino nota. Niokanatsopata hĩte Xesosi sãkire auiãkanimoni, hamariteakorimoni apaka. Teoso mereẽpekai hĩte inakitiakori hininiua ĩkapani. Nitiretai, kotxi hĩtoretari Teoso sãkire atão inakari. Kona notananini tiretai hĩte. Ikinimane atão inakari imarotakani tiretai hĩte apaka. ²Atiretai hĩte, kotxi atão inakari aua aãkixinireẽ. Atão inakari kaikotapika atekata atipirika.

³Aĩri Teoso, imi Xesosi Kristo pakini sikari ikinipoko erekari hĩtemoni. Amonĩkai hĩte. Ikamaerekaxiniretaina hĩte. Ininiãkara himarotari atão inakari. Himarotari Teoso tiraõki.

⁴Iteene nipoxokoniuata, kotxi nimarotari apanakini hĩte kĩpitapikari Teoso sãkire. Atão inakaranoka hĩkama, kotxi aĩri Teoso paniãtaua ikara atoko inakari akamini. ⁵Nota tirketakini, ia nipaniãtai: “Matiretakakaua.” Ikara Teoso paniãtakiti !amanerini. Akenakopiretapekari ikara Teoso paniãtakiti, merepitipanika Xesosi sãkire akenakotakasaaki. ⁶Kisaakipa atiraõkiuata? Teoso paniãtakiti ikiniõtika akĩpitakasaakira, iusaaki atiraõkiuata. Merepitipanika pikenakotapekari ia Xesosi paniãtakiti: “Matiraõkiuata ikiniõtika.”

Kristo Omanatakani

⁷Kaiãopokori kamisirienererini aua ikini itixiti. Ninoa sãkire: “Na kãkiti !itxaua Xesosi Kristo,” itxana isãkirena. Ikara atoko inakani misirienetari kãkiti. Kristo omanatakani itxauana ninoa. ⁸Erepaniko. !Hãuikapiri isãkirena atão minakati, kotxi ninoa

nirekari ixipokinirina hĩparĩka Teoso ĩkapani. Hinirekapitikari Teoso sikinii ikinipoko hĩparĩka ĩki.

⁹Kākiti takanapiniāri Kristo oerekakiti sākiretxiti, ikamari maerekati. Teoso nakiti !itxaua. Kākiti ātipirika auikiniāri Kristo oerekakiti, imoianatari aĩri Teoso, imi pakini. ¹⁰Kākiti apokiniã paapoko, Kristo oerekakiti mauikakati, sākiretxi atão minakati oerekakari, kona pauiritapiri ikaikotini paapoko. !Papakapapiri iua. ¹¹Iua apakapakari apaka kamari maerekati iuakata, kotxi auiritari atão minakati isãpiretini.

¹²Ninirekari ito nisãpiretini, txamari !ninirekari aãtsopaã nisãpiretakiti nitakini. Ninirekari naõkitinii hĩte. Iuasaaki asãkirauatako aãpisatoõtatakiniua, ininiã iteene apoxokoniua iuasaaki.

¹³Hĩtariakori Teoso mereẽkini uai auakani iokanapireta hĩtemoni. Ixinikamanapitaina hĩte. Ameẽ.

3 XOÃO

Iuaĩkana Xoão Iokanatsopatakiti

¹Nota Xoão, mitxi Xesosi imarotakarino, niõkatsopata pite nitiretakiti Kaiomoni. Nitiretai pite, kotxi pite tiretari atão inakari Teoso sãkire.

²Nitiretakiti, ninirekari ereka pinini pauini. Nimarotari pãkixinire ereka inini. Iua atokotxikana ninirekari piĩto ereka inini pimamianareni ĩkapani. ³Aĩtariakori mitxi hĩtemoni nota iokanatakini, apokaepka uai. Isãpiretanona pite iteene auikiniri atão inakari Teoso sãkire. Ikiniõtika pikamari Teoso sãkire iaõka. Atãonoka pikama. Ininiã ninoa minapiretakiti iteene kamapoxokonitano. ⁴Namariteni atoko hĩtxaua, ininiã nikenakopiretakasaakiri ikiniõtika hĩkaminiri atão inakari Teoso sãkire iaõka, nipoxokoniuaata. Ikara atoko inakari minapirenatxi, ninoa minapiretakiti, apia kamapoxokonitano nota.

⁵Nitiretakiti peerekai pite, kotxi ikiniõtika pimoianatana aĩtariakori ereẽ apokakani. Mitxi !pimarotana ninoa, iuaritika pimoianatana. ⁶Ninoa aĩtariakori sãpiretapekari pitiraõki Xesosi sãkire auiaĩkanimoni uai auakanimoni. Paapoko iuaĩkana ipotorikasaakina, erekari ninoa amonitakiti pisikinina, kotxi Teoso apokaerekatari ikara atoko pitiretinina. ⁷Ninoa takanapari aapokona Xesosi sãkire isãpiretinina ĩkapani. Xesosi sãkire mauiaĩkani !sikana iamonitakitina ninoamoni. ⁸Ininiãkara maãpakapana Xesosi sãkire sãpiretakani aãuapokoã. Ininiã amoianatana Teoso sãkire atão inakari iaripiretini ĩkapani.

Txiótepi, Temétxio Pakini

⁹Niökatsopatapeka Xesosi sākire auiākanimoni ereē pauiniātaā auakanimoni. Txamari Txiótepi inakori !ikīpitari nōtākikare. Iua iuikapikaua. Inirekari ninoa auītetiniri iua, ininiā limaākatari nisākire. ¹⁰Iua kamapiretapikaua ate. Kona ikarananini ikama. Apaka !apakapana aītariakori, hītemoni sikani. Apaka !auiritana apanakini apakapinina ninoa. !Auritaikari aītariakori nirekaākani apotiitiniua Teoso misākiretiko aikotiā. Ereē napokasaaki, iusaakiko nisāpiretai hīte iua apisatoō ikinika maerekati ikamakiti.

¹¹Nitiretakiti, !pikamapiri maerekani kamakiti atoko. Erekarini kamakiti atoko inakaranira pikamako. Erekarini kamakari Teoso nakiti itxaua. Maerekati kamakari !imarotari Teoso.

¹²Temétxio inakoripekana, ikinimane sāpiretari iua ereka inini. Atāo inakari Teoso sākire oerekaua Temétxio kamakiti atāo inini. Ate apaka sāpiretari iua ereka inini. Himarotari atāo inakaranoka asāpireta.

¹³Ninirekamari ito nisāpiretinii, txamari !ninirekari aātsopaā nisāpiretakiti nitakini. ¹⁴Ninirekari paītiki naōkitinii pite. Iusaaki asākirauatako aāpisatoōtakakauako.

¹⁵Ninirekari Teoso kamaerekaxiniretinii. Aītariakori uai auakani sāpiretai ixinikamanapitinii. Pisāpiretana ikinikana aītariakori ereē auakani, axinikamanapitinina ninoa.

XOTA

Xota Iokanatsopatakiti

¹Nota Xota. Xesosi Kristo nitiri amotakori nitxaua. Txiako itari nitxaua. Niokanatsopata kãkitimoni, Teoso akiritakinimoni, Teoso aĩri tiretakinimoni. Xesosi Kristo nĩkatakiniimoni niokanatsopata.

²Teoso iteene amonĩkai. Itene ikamaerekaxiniretai. Itene itiretai.

Atã Minakati Oerekakani

³Hĩte nota tiretakini, Xesosi makatxakapekari himaerekani, nota maerekani apaka. Ninirekamari niõkatsopatini amaerekani makatxakiko pirena hĩtemoni. Iuanoka ninireka niõkatsopatini, txamari nixinikari erekape ãtião niõkatsopatini. Ninirekari nõtãkikinii. Teoso oerekakiti sãkiretxiti inakitiakorimoni isikakiti hinĩkaenetariko. Teoso oerekakiti ikinika isikapekari inakitiakorimoni. !Hãuiritapiri apanakini koketiniri ikara ninoa oereẽkitikata. ⁴Hĩte Xesosi sãkire auiãkani sauaki aua Teoso mapaxitakani. Merepanika ninoa apotiitakasaakiua hĩtekata, !himarotari kamisrienererini ininiuana. Ninoa koketari isãkirena Teoso sãkirekata. Ninoa sãkire: “Ate sirĩka anireẽkitokata, kotxi Teoso katiraõkiri, ininiã iua !imisiritaua.” Ikara atokora itxana ninoa. Xesosi Kristonokara aãũite. Apiananiri itxaua. Iuaritika ninoa linirekari Xesosi. Kitxakapirĩka Teoso sãkire iõkatsopatakori sãpiretari Teoso misiritiniri kãkiti ninoa atoko inakani.

⁵Kitxakapirĩka Exito tixini auakani misiritana Xoteoakori. Himarotapekari ikara inakari. Ninirekari iuãikana hĩxinikiniri ikara inakari pirena. Teoso moianatana Xoteoakori, ininiã ninoa miteka, Exito tixini osipikinina ĩkapani. Hĩxinikariko ia: Teoso

makatxakana ninoa iusaaki imapinakanina ikapani, iuaritika mapa kasiriti napa atoko Teoso okana ninoa iua sākire mauiakani.

⁶Ātipekana nisāpiretai. Hixinikariko Teoso nitiriakori iaxitikini kitxakapirīka. Teoso txikitakana ninoa auñtetxi ininiuana, txamari linirekaikarina Teoso paniātakiti ikaminina, ininiā itakanaparina auiniātaāna Teoso tixineñ. Hixinikariko ia: Teoso paniātana ninoa ipiaā ikaikotinina ātipirika. Itixi xipokini ōtisaaki Teoso misiritanako ninoa.

⁷Ātipekana nisāpiretai. Hixinikariko Sotoma sitatxiti, Komoha sitatxiti, apanakini sitatxiti apaka iuaātaā takote auakari. Iuaā auakani linirekari Teoso paniātakiti ikaminina, ninoa Teoso nitiriakori atokokana. Maerekatinoka inirekapikana, kiki sirikini āti kikikata. Ininiā Teoso xipokari iuaā auakari sitatxiniri. Ninoa maerekani xika Teoso iokanatana ninoa arikatxi maxipokatimoni. Iuaā imisiritaākapikana. Ikara ōtākikaua maerekati amakamakani tīkane.

⁸Ninoa maerekati kamakani, kamisirienererini hīte sauaki auakani, kitxakapirīkarini atokokana itxana. Ixiniākitina maerekati xika ninoaka ito imisiritauna. !Inirekarina Teoso ninoa auñte ininiu. Imisākirepiretarina Teoso nitiriakori iaxiti auakani. ⁹Mikeo inakori Teoso nitiriakori auñte itxaua, iuaritika !imisākirepiretari āti Teoso nitiri iaxitikiri. Kitxakapirīka iua Mikeo Satanasikata itaparakienatakakaua, kotxi Mikeo nirekari Moisesini ito ikatini, txamari Satanasini nirekari Moisesini ito iua inakiti ikapani. Iusaaki Mikeo !imisākirepiretari Satanasini. Ianoka isākire: “Teoso misiritapanikaiko pite,” itxari Satanasini. ¹⁰Txamari ninoa kamisirienererini hīte sauaki auakani misākirepiretari ikinika imimarotakinina. Ninoa iikite kaxipiri itopa auakani iikite atokokana, kotxi ikamarina iitonani nirečkiti. Ikara iikitenā xipokanako ninoa.

¹¹Teoso misiritanako ninoa. Kitxakapirīka Kaii inakori kamari maerekati. Iua maerekani atokokana ninoa maerekani. Kitxakapirīka Paraō inakori kamari maerekati txineiro apakapini ikapani. Iua maerekani atokokana ninoa maerekani. Kitxakapirīka Koree inakori linirekari Moisesi iauñte ininiu. Iua atokokana ninoa !inirekari Teoso iauñtetini. Ininiā ixipokaākanako Koree xipokiko atokokana.

¹²Hāpotiitakasaakiua hinipokotini ikapani, ninoa kamisirienererini apaka nipokota hītekata. !Ipētauatana. Itxikotarina iua kiiniri imaerekanina xika. Ninoaka itiretaua. !Itiretarina apanakini. Itima anikari katxiāri iaxitikiri, ininiā katxiāri napiniātaā āparaā kipa,

takari aneini ikapani. Txamari ninoa kamisirienererini katxiãri ãki ãparaã mauakinini atoko itxa. !Erekana kãkiti ikapani. Mitaãsaaki aua txipokori, txamari ninoa kamisirienererini mitaãsaaki aamina mariti atokokana ninoa. Aamina mariti ipĩkari atoko, kotxi !iminaua. Ninoa iua atokokana, kotxi !ikamari erekari. Aamina mariti tokaãka. Ikotsa maporokaãka, ininiã atão ipĩkari itxaua. Ninoa kamisirienererini ikara aamina atoko, kotxi ipinanako. !Ikaikotana Teosokata ãtipirika.

¹³Potxoari uiniti tsakati pamonõkoniri atoko itxa ninoa kamisirienererini. Tsakati sori txiko atoko itxa ninoa maerekani. Iõriki atoko itxana. Iua iõriki sinimoni !kimarotikori. Ninoa sariko ipiãmoni ãtipirika ikaikotinina ikapani. Teoso mereẽri ikara ipiãtaã ninoa auini ikapani.

¹⁴Kitxakapirĩka Enoki inakori sãpiretapekari kamisirienererini pirena. Iua Enoki Adão apika mekaniri apika mekaniri itxaua. Enoki txari:

Hãtamatariko. Apiananiri apokako itiximoni itomaneri inakitiakorikata. Mio, apikomoni mio, apikomoni mio, itxaãpokata inakitiakori iuakata ikani.

¹⁵Iua ikinipoko misiritiko sãpiretakari itxaua. Iua apokasaaki, isãpiretanako maerekati kamakani misiritiko, Teoso manireẽkani misiritiko, kotxi Teoso lipotxitari ninoa kamakiti. Ninoa misãkirepiretapikari Teoso. Ninoa maerekani xika, Teoso imanirekakanina xika, imisiritaãkanako, itxa Enoki sãpiretakiti kitxakapirĩka.

¹⁶Ninoa kamisirienererini ãtipirika tsoatapika. ãtipirika apoĩtapikana apanakini. Iĩtona nireẽkitinanira ikamana. Iuikauana. “Peerekai pite,” itxana ãtimoni inireẽkitinani apakapinina ikapani.

Õtãkipirenatxi

¹⁷Nitiretakini hĩxinikariko aãuĩte Xesosi Kristo iokanatakini sãpiretakiti akokaxiti. ¹⁸Ninoa txai: “Xipokatxi õti kaiamapeka inini manapi apokanako kikiakori hĩte napetakani tĩkane. Ninoa kamariko ninoaka nireẽkiti, Teoso manireẽkiniti,” itxana Xesosi Kristo iokanatakini sãpiretakiti. ¹⁹Ninoa maerekani xika kãkiti txitakakaua. Ninoa kamisirienererini kamari iĩtona nireẽkitinoka. Erekari Matamatakoti !auinana ninoa.

²⁰Hĩtepekana nota tiretakini, iteene hãuikapikariko Teoso oereẽkiti. Ikara atoko hininiã, kataparaxinireiko hĩte. Hãuikariko Teoso

oereēkiti, kotxi Teoso sākire itxaua. Himisākiretariko Teoso. Erekarī Matamatakoti oerekai atāo hīsākirauatini īkapani. ²¹Maerekati kamakanii, iuaritika aāuīte Xesosi Kristo !imisiritai. Iua anikai ātipirika iuakata hāuini īkapani. Ikara hiātapakasaaki, ātipirika hīxinikapikariko Teoso tiraōki hīte īkapani. !Hītakanapapiri iua.

²²Apanakini !auikapanikari ikinika Teoso oereēkiti, iuaritika !hītxitapena. Himoianatanako ninoa iteene auikiniri īkapani.

²³Pamonōkoniri, kākiti kamakasaakiri maerekati. Xamina tirinakari atoko itxa imisiritikona imaerekanina xika. Ininiā hīsāpiretanako Teoso sākire, imisiritikona apokini apisapanika. Xamina tirinakari āki katxakakari pimakatxakini atokokana itxa, pisāpiretakasaakiri Teoso sākire ninoamoni. Apanakinipekana hiamonīkako.

Hiamonīkasaakina, erepaniko, kotxi pamonōkoniri ninoa maerekani. Homanatariko maerekati ninoa kamakiti, hīte makamakaniri īkapani.

Peerekari Teoso

²⁴Teoso kaposotiireri nīkataua maerekati amakamakani īkapani. Iua anikaua iua apisatoō apoxokoniritika. Iuasaakiko amaerekani !auaikako. Peerekari aāuini iua apisatoō. ²⁵Āti Teoso !auari. Iuanokara Teoso txaua. Iuanokara kimaroreri. Amaerekani makatxakakari itxaua, kotxi aāuīte Xesosi Kristo ipina ate īkapani. Iua iotximere aua, kotxi imaerekani !auari. Auītetxiakori auīte itxaua iua. Kaposotiireri iua. Iposotari ikinipoko ikamini. Itixi kamiko apisapanika ikara atoko itxa Teoso. Uatxa ikara atoko itxapanika Teoso. Ikara atoko itxapikako ātipirika Teoso. Ameē.

APOKORÍPISI

Xesosi Kristo Iuaka Oerekiniua Pirena

Ia Aãtsopa Oerekaua Xesosi Kamakiti

1 ¹Ia aãtsopa oerekari Teoso nakitiakori Xesosi Kristo paĩtiki kamaenetakiti. Teoso iokanatarini ititiri iaxitikiri Xoãomoni Xesosi Kristo kamaenetakiti oerekini ĩkapani. ²Ikinika Xoão atamatakiti, ikinika ikenakotakiti pakini isãpireta ia aãtsopaã. Ikara atoko isãpiretaua ate Teoso sãkire, Xesosi Kristo sãpiretakiti iuamoni. ³Ia aãtsopa atatsopatakani Teoso takariko erekari ninoamoni. Teoso takariko erekari ia isãkire kenakotakanimoni, ia isãkire kĩpitakanimoni, kotxi ikinika Xoão iõkatsopatakiti okatapaniri apokini.

Xoão Iõkatsopare

⁴Nota Xoão. Niokanatarini ia niõkatsopare Teoso mereẽkinimoni. Setxi sitatxiti Ásia inakori tixini auakanimoni niokanata niõkatsopare.

Teoso sikari ikinipoko erekari hĩtemoni. Ikamaerekaxiniretai hĩte. Uatxa iua aua. Merepitipanika kitxakapirĩka iua aua. Iua ãtipirika auapikako. Setxi matamatakoni iaxitikini Teoso topãkiniãtaã apisatoõ auakani sikari erekari hĩtemoni. ⁵Xesosi Kristo apaka sikari erekari hĩtemoni. Atão inakarinoka sãpiretakari itxaua iua. Iua merepitipanika õkitikaua ipĩkani sauaki. Apaka itixi auakani auĩteakori auĩte itxaua iua.

Iua ate tiretakari. Ipina ate ĩkapani amaerekani imakatkakini ĩkapani, ininiã isikakaua erekari akamini ĩkapani. ⁶Itxĩkitakaua auĩtetxiakori aniniua. Itxĩkitakaua sasetotxiakori aniniua, kotxi asãkirauata Teosokata. Ininiã atxari Xesosi:

“Ãtipirika peerekai pite. Ãtipirika pitenokara kaposotiireri. Ameẽ.”

⁷Hätamata, Xesosi napani. Iua inako katxiãrikata. Iuasaaki ikinimane kãkiti atamatariko. Aamina ìpiriãmitakari nopini iua tokakitakani apaka atamatariko iua. Iuasaaki ikini uãkati kãkiti atapariko iua. Ninoa atapakasaakiri iua, itxiapatana, akiripoakatana maerekati ikamakitina xika. Ikara atoko apokako. Ameẽ.

⁸Apiananiri txari:

—Iõkatxi merepitipanika auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Uatxa naua. Merepitipanika naua. Katana nota auapikako. Ikini posotiiretxi aua notamoni —itxa.

Xoão Atamatarì Aĩtari Iaxitikiri

⁹Nota Xoão, hĩtari. Nikamari Xesosi Kristo nireẽkiti, ininiã himoianari nitxaua, kotxi ãtipirika nimĩteenekari nimisiritiko, hĩte misiritiko himĩteenekini atoko. Ikara misirikaretxi apokapitika atemoni, kotxi aãuĩte Xesosi Kristo nakitiakori atxaua. Nota aua Patamosi inakori pokomiriĩti. Nitakaãka uai, kotxi Teoso sãkire nisãpireta apanakinimoni. Ikinipoko nimarotakiti Xesosi Kristo pirena nisãpiretini xika kãkiti takano nota uai. ¹⁰Kãkiti Apiananiri xinikini õtisaaki, Erekari Matamatakoti sikaimaroretano nota. Iuasaaki nikenakotari sãkiretxi nitikinimoni. Sãkiretxi apiaenetakari, trõpeta atoko nikenakota. ¹¹Itxari:

—Kãkiti apisapanika naua nota. Nota auapanika ikinipoko xipokaãka atoko. Piõkatsopata aãtsopaã patamatakiti tĩkane. Eereka piokanatarì iua aãtsopa kãkiti Teoso mereẽkinimoni setxi sitatxiti auakanimoni Ásia tixineẽ. Piokanatsopata Épeso sitatxiti auakanimoni, Esimina sitatxiti auakanimoni, Pékamo sitatxiti auakanimoni, Txiatxira sitatxiti auakanimoni, Satxima sitatxiti auakanimoni, Piratéopia sitatxiti auakanimoni, Araotxiséia sitatxiti auakanimoni pakini —itxa notamoni.

¹²Ininiã eereka nikirioka notakata sãkirauatakari natamatini ìkapani. Nikiriokasaaki, natamatari setxi tirikapi topãkini oro kamakori. ¹³Tirikapi topãkiniãtaã, natamatari kãkiti itari iaxitikiri, iuaritika ipinimoni itxaua. Iua mãka õtanori. Ikitiãpeka apoka. Ipakiomatare atoko oro kamakoro aua itorotamoni. ¹⁴Iãko iteene kasarori mapoa atoko itxa. Xamina tirinakari atoko itxa oki. ¹⁵Ikiti mẽkorĩka pirõsi xamina ãki imẽkorĩkini atoko. Isãkire ene ãparaã torõkani atoko. ¹⁶Iuako ikikomoni imaĩkaro setxi iõriki. Inamaã iouata mitari pokĩka. Iua iouata ipi uanaro aua. Atokatxi iotximere atoko itxa itoõ.

¹⁷Natamatakasaakiri, nirika ikitimoni. Koriākari atoko nitxa. Ininiã iuasaaki itakari iuako ikikomoni nota nopini. Itxano: —Kona pipīkarauatape, kotxi ikinipoko auini apisapanika nota aua. Ikinipoko xipokaãka atoko nota auapanika. ¹⁸Nota auākipika inakarino. Nota koriākaripekano, iuaritika hātamatano. Ātipirika auāki inakarino nota. Ameẽ. Kaposotiireno nota, kotxi nipaniātari kākiti ipinini. Niposotiire aua niokanatiniri kākiti maerekati kamakani misiritikoãtaã. ¹⁹Piōkatsopatari mitxi patamatakiti, uatxaika patamatakiti pakini. Apikomoni noerekakiti apaka piōkatsopata, kotxi noerekaiko katana itiximoni ĩkari. ²⁰Kiripa ninoa iōriki setxi pakini niuako nikikomoni auakani? Teoso nitiriakori itxauana. Ninoa anikari nota sãkire nisãkire auĩākanimoni ninoa setxi sitatxi auakanimoni. Kiripa ninoa setxi tirikapi topãkini oro kamakori? Nisãkire auĩākani ninoa setxi sitatxi auakani itxauana —itxa Xesosi Xoãomoni.

Xesosi Iokanapirena Épeso Auakanimoni

2 ¹Xesosi misãkiretari Xoão: —Piokanatariko ia nisãkire Teoso nitirimoni, Teoso sãkire auĩākanikata auakarimoni Épeso sitatxitiã:

Ninoa setxi iōriki maĩkarino nota. Nimaĩkari ninoa iōriki niuako nikikomoni. Ninoa setxi tirikapi topãkini oro kamakori sauaki tĩpokotakarino nota. Ia nota sãkire. ²Nimarotari ikinika hĩkamakiti. Nimarotari itori parĩkatxi pamimari hĩkama. Parĩkatxi kamimari inakasaaki, kona hĩtakanapari. Maerekati kamakani apokasaaki hĩtemoni, kona hĩte apakapana. Apokapeka apanakini kākiti hĩtemoni. Itxana: “Teoso iokanatakiniraua ate.” Txamari, kona atão ninoa sãkire. Nimarotari kona hĩte auiritana ninoa kaminiri maerekati. Hĩte atamakaerekatana. Eereka himarotari kona atão ninoa sãkire. ³Himisiritaãka nisãkire hĩsãpiretini xika, iuaritika himĩteenekari ikinipoko nota ĩkapani. Kona hĩsãpaka hĩparĩkauatini nota ĩkapani.

⁴Ikara hĩkamakiti erekari, txamari hĩtakanapari hĩtiretinino. Merepanika hĩtiretano. ⁵Hĩxinikariko merepitipanika hĩtiretinino. Uatxa poiãoka hĩtiretano. Iuaĩkana hĩkamariko merepitipanika hĩkamakiti atoko. Himatakanapakaniãri ikara himaerekani, patimari napokini hĩtemoni. Nimakatzakariko hĩtirikapite topãkini. Ininiã Teoso sãkire auĩākani !uaaika ereẽ, himatakanapakaniãri ikara himaerekani. ⁶Auapitika atão

hĩkamakiti, kotxi hĩte omanatari Nikoraito inakoni kamakiti.
Nota apaka omanatari ninoa kamakiti.

⁷Kakenakokii hĩte, ininiã hĩkenakotariko Erekar
Matamatakoti sãkire Teoso sãkire auiaãkanimoni. Maerekati
makamakati nauiritako amãtiiri Teoso tixine apanĩkaki auakari
itximini. Iua amãtiiri tximakari auapika ãtipirika Teosokata,
—itxa Xesosi Épeso auakanimoni.

Xesosi Iokanapirena Esimina Auakanimoni

⁸—Piokanatariko ia nisãkire Teoso nitirimoni, Teoso sãkire
auiaãkanikata auakarimoni Esimina sitatxtiã:

Ikinipoko auini apisapanika nota aua. Ikinipoko xipokaãka
atoko, nota auapanika. Nipĩpe, iuaritika iuaĩkana nõkitikaua.
Uatxa !nipinaika. Ia nota sãkire. ⁹Nimarotari hãtatsiire.
Nimarotari hĩte minakati !uari. Iuaritika ikinipoko erekari
aua hĩtemoni. Nimarotari apanakini misãkirepiretinii hĩte.
Ninoa txa: “Xoteoakorira ate.” Txama kona atão Xoteoni
!itxauana. Ninoa apotiitiniãtaãua Satanasi nakiti. ¹⁰Kona
hĩpĩkapiri himisiritiko ĩkapani ĩkari. Satanasi takari apanakini
hĩte kateia ãki ataekatinii ĩkapani. Himisiritaãkako tesa
pakini õti. Atxiĩti hĩpina nisãkire hãuikini xika, iuaritika
kona hĩtakanapapiri nisãkire hãuikini, ininiãkara nisikai
ãtião saporieãta. Iua saporieãta apakapakari auapika ãtipirika
Teosokata.

¹¹Kakenakokii hĩte, ininiã hĩkenakotariko Erekar
Matamatakoti sãkire Teoso sãkire auiaãkanimoni. Maerekati
makamakati kona iuaĩkana ikoriãika,
—itxa Xesosi Esimina auakanimoni.

Xesosi Iokanapirena Pékamo Sitatxiti Auakanimoni

¹²Eereka Xesosi iuaĩkana misãkiretari Xoão:

—Piokanatariko ia nisãkire Teoso nitirimoni, Teoso sãkire
auiaãkanikata auakarimoni Pékamo sitatxtiã:

Notamoni auari oa iouata ipi uana auakito. Ia nota sãkire.
¹³Nimarotari ikinika hĩkamakiti. Nimarotari hãuiniãtaã. Ereẽ
Satanasi kãkiti auĩte itxaua. Iuaritika hĩte auikari nota sãkire.
Kona hĩte takanapari nisãkire hãuikini. ãtxipa inakori auama
hĩte sauaki. Iua sãpiretapikari nisãkire kãkitimoni. Ikara xika

okapeêka ereẽ Satanasi auiniãtaã. Iuaritika kona hãsikano.
!Hítakanapari nisãkire hãuikini.

¹⁴Txamari auapitika hïkerokakiti. Aua kãkiti hïte sauaki Paraão inakori sãkire auiãkani. Kitxakapirïka iua oerekari Paraki inakori kãkiti Isaeo auakani imisirienetini. Iua Paraki xika ikamarina maerekati, kotxi inikarina xinitxi teoso kamakorimoni sikakori. Oerekana kãkiti kaminiri maerekati iïto nireêkiti ãti kãkiti ïtokata. !Apakata kãkiti auikiniri Paraão sãkire. ¹⁵Hïte sauaki aua kãkiti Nikoraito inakoni sãkire auiãkani. Nota omanatari ninoa auiãkiti sãkiretxiti. ¹⁶Hítakanapariko ikinika himaerekani. Hïkanapiriãko notamoni. Ikara atoko himakamakaniã, patimari hïtemoni napokini. Ininiã nineenamauata maerekati kamakanikata mitaro iouataã ninamaã auakaroã.

¹⁷Kakenakokii hïte, ininiã hïkenakotariko Erekari Matamatakoti sãkire Teoso sãkire auiãkanimoni. Maerekati makamakati nisikariko komiri iaxitikiri kipatakori. Apaka nisikariko kai kasarori maerekati makamakanimoni. Iua kai nopini iøkataãka kãkiti uãka amaneri apanakini mimarotakiniti. Apakapakarinani imarotari iuãka amaneri, —itxa Xesosi Pékamo auakanimoni.

Xesosi Iokanapirena Txiatxira Auakanimoni

¹⁸Eereka Xesosi iuaïkana misãkiretari Xoão:
—Piokanatariko ia nisãkire Teoso nitirimoni, Teoso sãkire auiãkanikata auakarimoni Txiatxira sitatxitiã:

Teoso ãkirirano nota. Noki xamina tirinakari atoko itxa. Nikiti mēkorïka pirõsi atoko itxa. Ia nota sãkire. ¹⁹Nimarotari ikinika hïkamakiti. Nimarotari hïtiraõki. Nimarotari iteene hãuikari nisãkire. Nimarotari iteene hïparïkauata nota ïkapani, apanakini ïkapani apaka. Hïparïka nota ïkapani pasãpaniri inakasaaki, iuaritika hïkamapanikari nota ïkapani. Uatxa apiaãpota hïparïka nota ïkapani.

²⁰Itxama, nisãpiretaiko hïkerokakiti. Hïte auiritaro sito, Xesapeo inakoro, maerekati okamini hïte sauaki. Oa txa: “Teoso sãkire sãpiretakarona nota.” Otxama, omisirienetana ninitiriakori. Oa xika, ninoa kamari maerekati iïtona nireêkiti apanakinikata isirïkinina. Apaka ninoa nikari nipokori teoso kamakori sikakori. ²¹Niãtapari otakanapiniri omaerekani, txamari kona onirekari

otakanapiniri omaerekani. ²²Ininiã nota kamariko oa amianatini. Oakata sirĩkakani matakanapakaniãro, iteene ninoa atatsirauata. ²³Oa anaakori nokapitikako. Ikara atoko inakasaaki, ikinimane Teoso sãkire auĩãkani imarotariko nimarotari ikinika kãkiti ãkixinire, ikinika ixinikakiti pakini. Ininiã erekari nisikako erekari kamakanimoni. Apaka nimisiritari maerekati kamakani. Hĩkamakiti iaõka niĩkitxitai hĩte.

²⁴Uatxa nimisãkiretai hĩte apanakini Txiatxira sitatxiti auakani. Hĩte auikari Teoso sãkire. Hĩte !auikari Xesapeo sãkire. Hĩte kona apaiaõkari Satanasi oerekakiti, iua imarore. Kona ninirekari nisikinii apikomoni parĩkatxi nota ĩkapani, kotxi uatxa iteene hĩparĩkauata nota ĩkapani. ²⁵Ianoka ninireka hĩkamini. Hĩte auikari nisãkire, ininiã hãuikiniritika nisãkire, nikanapiriãko.

²⁶Iua maerekati makamakati, ãtipirika nipaniãtakiti kamakari, iuamoni nisikariko niposotiire itixi auakani auĩte ininiua. ²⁷Teoso sãkire kitxakapirĩkari txari:

Auĩtetxi itxauako. Itapararitika ipaniãtana ninoa inireẽkiti ikaminina. Imakamakaniãrina inireẽkiti, imisiritana ninoa, tiĩtxi kamakari tii imanirekakiniti ipakauanakini atoko.

Niri posotiire napakapakiti atoko iua apakapa. ²⁸Apaka nisikariko iõriki ĩkanõkapanikero iuamoni, ininiã notaka nisikaua iuamoni, kotxi iua iõriki atoko nitxaua.

²⁹Kakenakokii hĩte, ininiã hĩkenakotariko Erekari Matamatakoti sãkire Teoso sãkire auĩãkanimoni, —itxa Xesosi Txiatxira auakanimoni.

Xesosi Iokanapirena Satxi Auakanimoni

3 ¹Iuaĩkana Xesosi misãkiretari Xoão:

—Piokanatariko ia nisãkire ninitirimoni, Teoso sãkire auĩãkanikata auakarimoni, Satxi sitatxitiã:

Notamoni aua ninoa setxi Matamatakoni Teoso nakiti. Notamoni aua ninoa setxi iõriki. Ia nota sãkire. Nimarotari hĩparĩka. Apanakini sãpiretai hĩte auãki hinini hĩxinire, txamari Teosomoni koriãkanipekarai hĩte. ²Himereka. Araõkire hĩtxapaniko. Hĩsikataparatariki erekari hãkixinireẽ auakari, kotxi iua erekari ipinaariãpota. Ininiã hĩtxĩkitakari iua erekari auãki inini iuaĩkana. Notamoni hĩparĩka Teoso apisatoõ na atão. ³Hĩxinikariko hãpakapakiti, apaka hĩkenakotakiti. Hĩkĩpitariko hĩkenakotakiti.

Hítakanapariko maerekati. Erekarí hīkamako, kotxi kiītiriri apokini atoko napokako uai. Kākiti kona imarotari kiītiriri apokini manapi. Ikara atokokana nitxako nikanapiriākasaaki.

⁴Hīte Satxi sitatxiti auakani sauaki auapanika apanakini maerekati makamakani. Ninoa auikapitikari nisākire. Ninoa kākiti imāka matxikotakani atoko itxana. Ininiā notakata isanako. Imākana kasarori. Ikara atoko nikaminana, kotxi ninoa kamari erekari nipaniātakiti.

⁵Maerekati makamakani ieretakariko mākatxi kasarori. Kona noakapaniriko iuākana naātsopateē. Kākiti iuākana ikara aātsopaā auakani ātipirika auapikako Teosokata. Ikara atoko ininiā, nisāpiretari iuākana nirimoni, initiriakori iaxitikini pakinimoni. Nitxana: “Nota nakitiakori itxauana ninoa.”

⁶Kakenakokii hīte, ininiā hīkenakotariko Erekarí Matamatakoti sākire Teoso sākire auiākanimoni, —itxa Xesosi Satxi auakanimoni.

Xesosi Iokanapirena Piratéopia Auakanimoni

⁷Iuaīkana Xesosi misākiretari Xoão:

—Piokanatariko ia nisākire Teoso nitirimoni, Teoso sākire auiākanikata auakarimoni Piratéopia sitatxitiā:

Nota maerekati makamakatirano. Atāo inakaranani sāpiretakarikarano nota. Kaposotiireri auītetxi Tavii inakori atoko nitxa, kotxi nota matakakakiti, kona āti totari. Nota totakiti kona āti matakakari. ⁸Nimarotari hīte parīka. Hātamata. Hīparīka nota īkapani aapokotxi tore matakakakori atoko itxa. Kona āti posotari iseretiniri. Ininiā kākiti liposotari iotokakinii hīte nisākire hīsāpiretini. Ikara atoko nikaminii hīte, kotxi kona kataparai hīte. Ikara atoko nikaminii hīte, kotxi hīkīpitari nisākire. Kona hīkipatari nisākire apanakini apisatoō. ⁹Apanakini txari: “Atāo Xoteoakori atxaua.” Txamari Satanasi nakitiakori itxauana. Paxirari ninoa sākire. Nikamariko ninoa kapotoreēkiniāua hīte apisatoō. Iusaaki ninoa txako: “Atāopitikara Xesosi tiretapitikai.”

¹⁰Hīkīpitapekari nisākire. Kamonōkoniri inakasaaki, kona hītakanapari nisākire, ininiākara apia maerekati ikini itixiti apokasaaki, iusaaki ninikataiko hīte. Iua maerekati kona misiritai hīte. Iua maerekati apokako itixi auakani atamakaerekatini īkapani.

¹¹Erepaniko, patimapaniriko napokini ereẽ. Ātipirika hīkamarike erekari. Hītakanapapikariko maerekati. Ininiã iuasaaki āti kona posotari imaktxakiniri auítetxi saporietane hītemoni nisīkakiti. !Imaktxakarina ikara hīparīka ĩki. ¹²Nīkamarike maerekati makamakati itīkare mina atoko inini nīTeosone misākiretiko aikoti āki. Auapika Teoso misākiretiko aikoti āki, ininiã !itakanapari Teoso sākire. Niōkatariko nīTeosone uāka iua nopini. Apaka niōkatariko Teoso sitatxine uāka iua nopini. Ininiã apanakini imarotari Teoso nakitiakori ininiuana ninoa. Iua Teoso sitatxine Xerosareẽ amaneri iua tixine katxakakari. Iua maerekati makamakati nopini niōkatariko apaka nota uāka amaneri.

¹³Kakenakokii hīte, ininiã hīkenakotariko Erekarī Matamatakoti sākire Teoso sākire auīākanimoni, —itxa Xesosi Piratēopia auakanimoni.

Xesosi Iokanapirena Araotxiséia Auakanimoni

¹⁴Iuaīkana Xesosi misākiretari Xoão:
—Piokanatariko ia nisākire Teoso nitirimoni, Teoso sākire auīākanikata auakarimoni Araotxiséia sitatxitiã:

Niuāka “Ameẽ.” Nota atão sākiretxiti sãpiretakarīkarano. Nīkamari ikinika nisãpiretakiti. Merepanika nīkamari ikinipoko. Ininiã ikinipoko auíte nitxaua nota. ¹⁵Nīmarotari ikinika hīparīka. Hītixari: “Nauikapitīkari Xesosi sākire.” Txamari kona iteene hinirekari hīkaminiri nīpaniātakiti. Apaka kona iteene hinirekari hītakanapiniri nisākire. Kona kapatakari atokoni hītixaua hīte. Kona katxīkareri atokoni hītixaua hīte. Poomari atoko hītixaua. Notamoni apiaerekata kapatakari atoko hininiua hīte. Iuasaaki iteene hinirekari hīparīkauatini nota ĩkapani. Iteene himanirekakaniāri hīparīkauatini nota ĩkapani, apiaerekata katxīkareri atoko hininiua hīte, nisākire ikinika hītakanapini. ¹⁶Notamoni hīte āparaã poomari atoko hītixa. Ininiã kona āparaã kapatakaāri atoko !hītixa. Apaka kona āparaã katxīkareēri atoko !hītixa. Ikara atoko inakasaaki !nīnīrekai. Ininiã mapara nīkanakai hīte. ¹⁷Hīte txa: “Katxineiroteua ate. Katiua ate. Apikomoni anīrekakiti !uari,” hītixa. Txama kona himarotari hākixinireẽ iteene himatinaniuatini. Hākixinireẽ minakati !uari. Hākixinireẽ mokiri atoko hītixaua. Kasarari atoko hītixaua hākixinireẽ. Ikara atoko hininiã, kona himarotari Teoso. ¹⁸Nōtākikai hīte hiamotiniri

notamoni auakari oro atoko inakari. Oa oro xamina oeretakito. Ikara atoko hīkaminiā, ikinika hinirekakiti auako hītemoni. Hiamotariko mākatxi kasarori notamonikiri hīeretakini īkapani, ininiā kona hīpētauata kasara hinini xika. Ikara atoko hīkaminiā, hākixinire !uari maerekati. Hiamotariko apaka pinītxi notamoni auakari hōki īkapani, ininiā atāo hīposota hātamarauatini.

¹⁹Nitiretakini nōtākika, apaka noerekana. Ininiā ikinipoko atāo hīkamako maerekati hītakanapini īkapani. ²⁰Hātamatako. Hākixinire toreē nota auapeka. Nota haāpoko maparakiri akiritakari atoko. Hīkenakotiniāri nakiritinii, hōsereiniāri hākixinire tore, niīroā hītekata nikaikotini īkapani. Iuasaaki ninipokota hītekata. Hīte nipokota notakata.

²¹Nauiritari maerekati makamakati topākini notakata auītetxi topanere nopini. Iua auītetxi topanere nota nakiti. Iua atokotxikana nota topāka nirikata auītetxi topanere nopini iua nakiti nopini, kotxi maerekati makamakati nota apaka txaua. ²²Kakenakokii hīte, ininiā hīkenakotariko Erekarī Matamatakoti sākire Teoso sākire auīākanimoni, —itxa Xesosi Araotxiséia auakanimoni.

Iaxiti Auītetxi Topanere

4 ¹Eereka natamatari iaxiti tore. Itore imatakakaāka. Merepanika nikenakotari trōpeta atoko inakari. Kākiti sākire atoko itxa. Imisākiretano:

—Uai pina notamoni. Noerekaiko katana auakari tīkane.

²Iuasaakipeka Erekarī Matamatakoti anikano. Iuasaaki natamatari auītetxi topanere iaxiti. Topākakari aua iua nopini. ³Iuaā topākakari kai peereri pomēkoriri atoko itxa. Iua kai satōnia inakori atoko. Apaka āti kai sátxio inakori atoko itxa iua topākakari. Kisi ākitari iua auītetxi topanere. Iua kisi kai esimeráota inakori atoko itxa.

⁴Iua itinikata aua vītxi koatro pakini topaneretxi. Vītxi koatro pakini totiakori topāka iua topaneretxi nopini. Ninoa māka kasarori. Ikiina aua saporīēta oro kamakori. ⁵Auītetxi topanereātaā atamataāka ito mēkokari. Iotxira, iokaamori aua iuaātaā. Iteene poenexitiri. Iua auītetxi topanere apisatoō aua setxi tirikapi. Setxi Matamatakoni Teoso nakitiakori itxauana ninoa setxi tirikapi.

⁶Iua auītetxi topanere apisatoō ipoa ātakaāri atoko itxa. Auītetxi topanere itinikata aua koatro Teoso tixine auakani. Ninoa okīt xinoka

xãpokaĩtotakini. Auana okina ikini iĩtoãna. Itorotaãna aua okina. Iporikiãna apaka aua okina. ⁷Okĩtxinoka xãpokaĩtotakiti ãti, ãkiti atoko itxa. Átipekana kema auĩte atoko itxa. Átipekana aua kiki toõ atoko. Átipekana kokoi araãkari atoko itxa. ⁸Ninoa ikininape aua imĩkitana seisi pakini. Imĩkitana nopini, ipatapi apaka okina aua. Kona itomatana. Ikini pokamarariti, ikini iĩkanõkati itxana:

“Erekai. Erekai. Erekai. Teoso Apiananiri pitxaua. Kaposotiireri pitxaua. Átipirika auakarii. Kitxakapirĩka auakarii. Uatxa auakarii. Katana apaka pite auapanika,”

itxana átipirika.

⁹Ninoa okĩtxinoka xãpokaĩtotakini xipoãtakasaaki, ixikaretarina Teoso paxitiko pirena. Ixikaretarina: “Ikinipoko ikamakiti ate iĩkapani erekarinoka. Peerekari iua auĩtetxi topanere topãkakari, átipirika auapika inakari.” Ninoa xikaretari ikara Teoso iĩkapani. ¹⁰Ninoa vĩtxi koatro pakini totiakori xikarauatakasaaki, ikapotoreẽkauana ixitimoni iua auĩtetxi topanere nopini topãkakari apisatoõ. “Ateosone,” itxana iua átipirika auapika inakarimoni. Itakarina isaporiẽtane Apiananiri apisatoõ, kotxi Teosonokara ikinimane auĩte. Iuusaaki itxana:

¹¹“Apiananiri, aTeosone pitxaua. Erekai pite, ininiã apakatapitika apaxitinii. Apakatapitika ikinimane sãpiretinii: ‘Peerekai.’ Apakatapitika pite apakapiniri ikini posotiiretxi. Ikara atão, kotxi pite kamari ikinika. Pite kamari ikinika, kotxi pite nirekari pikaminiri. Pite nirekari ikinipoko auini,”

itxana ninoa vĩtxi koatro pakini totiakori.

Aãtsopa Iapiriãkori Pirena

5 ¹Iuusaaki natamatari aãtsopa iapirikakori iua auĩtetxi topanere nopini topãkakari uakoã. Iuako ikikomoniakiriã aua. Iua aãtsopa auari iõka ãkiriko, inopinimoni pakini. Iua aãtsopa aua setxi popitari kãkiti makatamẽkakaniri iĩkapani. ²Iuusaaki natamatari ãti Teoso nitiri iaxitikiri. Kataparari iua. Itapasãkireritika itxa:

—Kiripa apakata imaktxakiniri ia popitari? Kiripa posotari ikatamẽkiniri ia aãtsopa? —itxa.

³Itxama, kona auari iaxiti auakari, kona auari itixi auakari, apaka kona auari itixi patapi auakari, iua aãtsopa katamẽkakarĩ !auari. Ninoa !posotari ikatamẽkinirina iua aãtsopa. !Iposotarina atamatinirina iua aãtsopa ãki.

⁴Ininiã iteene nitxiapata, kotxi iua aãtsopa iapiriãkori katamêkakari lauari. Erekarî kamakari !apokaãka ikatamêkiniri îkapani, atatsopatiniri îkapani. ⁵Iuasaaki ninoa totiakori âti txari notamoni: —Kona pitxiapatape. Patamata ikiraã. Âkiti atoko inakari iua. Xotaa apika mekaniriakori auîte iua. Tavii apika mekaniri iua. Oerekapekari Satanasi poiãori inini. Iua apiata. Ininiã iuanani posotari ikatamêkiniri iua aãtsopa iapiriãkori. Iuanani posotari imaktxakiniri ninoa setxi popitari —itxa iua toti.

⁶Iuasaaki natamatari soti auîte okakori atoko. Iua itima iua auítetxi topanere apisatoõ. Ninoa ipi ipi pakini okĩtxinoka xãpokaĩtotakini, ninoa totiakori pakini âkitari iua. Setxi iko, setxi oki pakini aua iuamoni. Setxi oki aua iuamoni, kotxi setxi Matamatakoni Teoso nakitiakori aua. Teoso iokanataka ninoa ikini itixitimoni. ⁷Iua soti auíte atoko inakari sari iua auítetxi topaneremoni. Imaĩkari aãtsopa topaneretxi nopini topãkakari uakoã auakari. Iuako ikikomonikiriã aua. ⁸Imaĩkasaakiri, ninoa koatro okĩtxinoka xãpokaĩtotakini, ninoa vĩtxi koatro totiakori pakini patimari ipamakinina soti auíte apisatoõ. Ikinikana auari arpa inakori xikari ikaminina îkapani. Imakinikana auari kopitipaki oro kamakori. Naia kopitipaki xãpoka koria atoko inakari peeremariri. Ia kamariãro Teoso sãkire auiãkani sãkire iuamoni.

Amaneri Xikariti

⁹Iuasaaki ninoa xikaretari amaneri xikariti. Ixikaretarina:

“Pitenani apakata papakapiniri iua aãtsopa iapiriãkori. Pitenani apakata pimaktxakiniri popitari, kotxi pitenanira erekari. Pite okaãka. Piarêkaã piamotaua ate Teoso îkapani. Piamotapekaua ikini uãkati kãkiti sauaki. Ikini âti uãka sãkire sãkiretakani sauaki piamotapekaua. Ikinika itixiti auakani sauaki piamotapekaua ate.

¹⁰Pite txĩkitakaua ate auítetxiakori aniniua, sasetotxiakori apaka aniniua, Teoso îkapani aparĩkauatini. Ininiã itixi auakani auíte atxauako ate.”

¹¹Iuasaaki natamatari itomaneri Teoso nitiriakori. Nikenakotari ninoa sãkire. Kaiãopokori ninoa. Seĩ mio, apikomoni seĩ mio, apikomoni seĩ mio itxaãpokatana. !Apakata ninoa iaõtiko. Ninoa âkitari iua auítetxi topanere, okĩtxinoka xãpokaĩtotakini, totiakori pakini. ¹²Itaparásãkireritika ixikarauatana. Itxana:

“Soti auíte okaãka kãkiti ìkapani. Ininiã ãtipirika apakata iua apakapiniri posotiiretxi, ikinika erekari, imaroretxi, taparãtxi pakini. Apakata ikinimane paxitiniri iua. Apakata ikinimane sãpiretiniri iua ereka inini. Apakata ikinimane iuikiniri iua.”

Ikara atoko ninoa xikarauata.

¹³Ikara eereka nikenakotari ikinika iaxiti auakani, ikinika ìkorapokoriti auakani, ikinika itixi patapi auakani, ikinika potxoari uiniti nopini auakani, ikinika potxoari uiniti ãki auakani pakini xikarauatini. Itxana:

“Ikinika erekari ãtipirika aua iua auítetxi topanere topãkakarimoni, iua soti auíte pakinimoni. Ikinika ãtipirika paxitana. Ikinika ãtipirika txari: ‘Peerekana ninoa.’ Ikinika taparãtxi ãtipirika aua ninoamoni.”

¹⁴Ininiã ninoa koatro, okítxinoka xãpokaítotakini txana: —Ameẽ.

Iuusaaki ninoa vïtxi koatro totiakori patimari pamakini. —ATEosone pitxaua —itxana iua ãtipirika auakarimoni.

Soti Auíte Makatxakari Popitari

6 ¹Natamatari soti auíte makatxakiniri ãti popitari. Ikara natamatakasaaki, nikenakotari okítxinoka xãpokaítotakiti sãkire. Isãkire ikarokirauatini atoko itxa.

—Uai pinako. Patamata —itxa.

²Iuusaaki natamatari kavaro kasarori. Kiki aua oporikiã. Iua tapotxi aua. Auítetxi saporietane sikaãka iuamoni. Iua sari ikini itixitimoni kãkiti auíte ininiua ìkapani.

Ãti Popitari Makatxakiko

³Eereka soti auíte makatxakari ãti popitari aãtsopaã, ininiã ipi auape. Iuusaaki nikenakotari ãtipekana, okítxinoka xãpokaítotakiti sãkire:

—Uai pinako. Patamata —itxa.

⁴Ikara eereka natamatari kavaro pøkamarari. Kiki aua oporikiã. Iua kiki sikaãka posotiiretxi neenamtxi ikamini ikini itixitiã, ininiã neenamtxi mauakaniãtaã !uari. Itxïkitakari kãkiti okakakiniua. Isikaãka iouata mitapoari ineenamauatini ìkapani.

Āti Popitari Makatxakiko

⁵Eereka soti auīte makatxakari āti popitari, ininiā ipi āti auape. Iuasaaki ātipekana, okīt xinoka xāpokaīt totakiti txari:

—Uai pina. Patamata —itxa.

Ininiā iuasaaki natamatari kavaro pomamari. Kavaro nopini topākakari aua minari iaōtiko iuakoā. ⁶Eereka nikenakotari āti sākirauatini okīt xinoka xāpokaīt totakini sauaki. Itxa:

—Ipixini kiro triko īki, āti ōti kākiti parīka īkitxikana. Āti, ipixini pakini kiro atarokiri atoko inakari īki, āti ōti kākiti parīka īkitxikana. Iītxiā īki, ovaā īki pakini poiāopanikako.

Āti Popitari Makatxakiko

⁷Eereka soti auīte makatxakari āti popitari, ininiā ipi ipi pakini auape. Iuasaaki nikenakotari imapotōkirekiri, okīt xinoka xāpokaīt totakiti sākire. Itxari:

—Uai pina. Patamata —itxa.

⁸Iuasaaki natamatari kavaro posētakari. Inopini topākakari uāka “Ipīkitxi” inaāka. Āti iua tikini sa. Iua akiritaāka “Maerekani Misiritikoātaā” inaāka. Isikaākana posotiiretxi kaiāopokori itixi auakani okiniua īkapani, ininiā koatro kākiti auiniātaā āti okaāka. Ninoa okana kākiti neenamatiā, natxiā, amianariā, kaxipiri kaneenamariā pakini.

Āti Popitari Makatxakiko

⁹Ininiā soti auīte iuaīkana makatxakari āti popitari, ininiā ipi ipi āti pakini auape. Iuasaaki natamatari Teosomoni sikakori takikoātaā patapi kākiti okakoni. Ninoa okaāka Teoso sākire isāpiretinina xika. Kona itakanaparina isāpiretinina Teoso kamakiti ninoa īkapani, ininiā ikara xika okaākana. ¹⁰Itapasākireritika akirikatarina Teoso. Itxana:

—Aplananiri, ātipirika erekari kamakarii pite. Atāonoka pisākire. Kirisaakipa pimisiritari itixi auakani? Kirisaakipa pixikatxitaua ate, kotxi ninoa okaua ate? —itxana.

¹¹Ininiā mākatxi kasarori sikaāka ninoamoni. Eereka isāpiretaākana:

—Hiātapariko apikomoni. Teoso nirekari apanakini hītariakori, initiriakori okiko hīte atoko iniko. Hītariakori okaāka atoko, Teoso xikatxitai hīte. Hiātapariko ikara ōti —itxa.

Āti Popitari Makatxakiko

¹²Eereka nitikari soti auīte makatxakiniri āti popitari, ininiā seisi pakini auape. Iuasaakipeka itixi iteene iakeēkata. Atokatxi mamāka, sako mata pomamari potxi iāko kamakori atoko.

Kasiri kamarāka arēkatxi atoko. ¹³Iōriki itori iaxiti auakaro irika iikorapokoritimoni. Amātiiri itima iokatxaākiti atoko otxa.

¹⁴Natamatari iaxiti aātsopa iapirikiniua atoko. Ikinika ixirata mitari, ikinika ipokomiriī pakini makatxakaāka. Ātiātaā itakaāka.

¹⁵Iuasaaki iikorapokoriti auītetxiakori, kākiti kaposotiirerini, katiirini, sotato auīteakori, kākiti katapararini, nitiritxi amotakoni, nitiritxi minakaniua pakini kipataua aarikoā, kai mitari sauaki ixirataā. ¹⁶Iuasaaki itxana ixirata auītemoni apaka kai mitarimoni:

—Hirikako ate nopini. Hikipataua, kotxi topaneretxi nopini topākakari, soti auīte pakini nirekari imisiritiniua ate. ¹⁷Soti auīte misirikare ōti manapi apopeka. Kona kākiti mīteenekari ikara misirikaretxi.

Sēto Koarēta Koatro Mio Teoso Nitiriakori Itixi Auakani

7 ¹Eereka natamatari Teoso nitiri iaxitikiri timini atokatxi pokīkinimoni, āti atokatxi ereēkokinimoni, āti atokatxi kimapore sanaremoni, āti atokatxi kimapore kikomoni. Ininiā ipi ipi pakinipe ninoa. Ninoa maīkari itima ipi ipi pakini itixi auakari itimati. Ininiā itima kona inapaika itixiā. Kona kāuaāriā !inapaika itima. Kona aaminaā !inapaika itima. ²Natapari āti Teoso nitiri iaxitikiri inaāpotini atokatxi pokīkinimoni. Teoso ātipirika auakari takaōtxikare aua iuamoni. Itapasākireritika akiritana ninoa ipi ipi pakini Teoso nitiriakori. Ninoa parīka itixi, potxoari uiniti pakini imisiritinina. ³Iua Teoso takaōtxikare auakiti txari ninoamoni:

—Uatxa kona himisiritapiri itixi, potxoari uiniti, aamina pakini. Himisiritinina apisa, ate takari Teoso takaōtxikare initiriakori itixi auakani teētaā.

⁴Eereka nimarotari Teoso takaōtxikare apakapakani. Itakaōtxikaākana sēto koarēta koatro mio kākiti. Ikini uāka Isaeo tixinikini takaōtxikaāka.

⁵Tosi mio Xotaa apika mekani takaōtxikaāka.

Tosi mio Hopē apika mekani takaōtxikaāka.

Tosi mio Katxi apika mekani takaōtxikaāka.

⁶Tosi mio Asee apika mekani takaõtxikaãka.
 Tosi mio Natarii apika mekani takaõtxikaãka.
 Tosi mio Manasee apika mekani takaõtxikaãka.
⁷Tosi mio Simião apika mekani takaõtxikaãka.
 Tosi mio Arevii apika mekani takaõtxikaãka.
 Tosi mio Isakaa apika mekani takaõtxikaãka.
⁸Tosi mio Seporõ apika mekani takaõtxikaãka.
 Tosi mio Xosee apika mekani takaõtxikaãka.
 Tosi mio Pëxamiĩ apika mekani takaõtxikaãka.

Itomaneri Kãkiti Teoso Apisatoõ

⁹Ikara eereka natamatari itomaneri kãkiti apotiitakanuia.
 !Apakata kãkiti iaõtiniri ikinikana. Aua kãkiti ikini itixitikini, kãkiti ikini sereti. Aua ikini uãka sãkire sãkiretakani. Ikinikana ninoa timanãta Apiananiri apisatoõ, soti auĩte pakini apisatoõ. Ninoa mãka kasarori. Aãtape aua iuakoãna. ¹⁰Itaparasãkireritika itxana:
 —ATEosone topãka auĩtetxi topanere nopini. Iuara, soti auĩte pakini makatxakapekari amaerekani.

¹¹Iuasaaki ikinika Teoso nitiriakori iaxiti auakani tima. Ninoa ãkitana auĩtetxi topanere, totiakori, ninoa ipi ipi okĩtxinoka xãpokaĩtotakini pakini. Ikapotoreẽkauana itoõna xitimoni, auĩtetxi topanere apisatoõ.
 “Ateosone pite,” itxana Teosomoni. ¹²Ixipoãtana Teosomoni:

—Ameẽ. Ætipirika ikinimane sãpiretai ereka pinini. Peerekai. Kimarorei. Erekarı pikamakiti ate ĩkapani. Ikinimane paxitai. Kaposotiirei. Pataparai. Ætipirika ikara atoko atxai. Ameẽ.

¹³Ininiã eereka ninoa totiakori ãti pimaãno nota:
 —Kiripa ninoa kãkiti mãkatxi kasarori ieretakakani? Namonipa inana ninoa? —itxa iua.

¹⁴Ininiã nota txari iua:

—Pitera imarotari.

Ininiã iua txano:

—Ninoa iteene misiritaãkapeka. Uatxa ixipope ninoa misiritiko. Soti auĩte makatxakapekari imaerekanina. Ininiã imãkana soti auĩte arẽkaã arokakori atoko itxauana. Uatxa kasarori imãkana, kotxi itxiko !uari. Soti auĩte makatxakapekari kãkiti maerekani ipĩkasaaki, ininiã mãkatxi kasarori atoko itxa ninoa ãkixinire.

¹⁵—Ininiã ninoa aua Teoso topanere apisatoõ. Imisãkiretiko aikoti ãki iparĩkauatana Teoso ĩkapani ikiniõtika pokamara, ĩkanõka

pakini. Ininiã iua auítetxi topanere nopini topãkakari auapikako ninoa sauaki. ¹⁶Ninoa kona natxitaika. Kona iposonataikana. Atokatxi kona arikana ninoa. Kona kapatakari kona arikana. ¹⁷Kotxi soti auíte auítetxi topanereãtaã auakari nĩkatanako ninoa. Iua anikana ninoa sõtoãrimoni. Iuaã auakari sõtoãri iãtakani ãtipirika auapikako. Teoso makatxakariko ikinika iãtsaãna. !Itxiapataikana.

Imapotõkire Popitari Makatxakiko

8 ¹Imapotõkire popitari imakatxakasaaki, ikinipoko tsorĩkaxitita Teoso tixineẽ. Ikara atoko ipixini oara. ²Eereka natamatana setxi Teoso nitiriakori, iua apisatoõ timakani. Isikaãkana setxi xikari kamiko trõpeta inakori.

³Eereka ãti Teoso nitiri apoka. Itima Teosomoni sikakori takikoãtaã. Kamariãro arikiko koanati oro kamakori iuamoni aua. Kamariãro ito sikaãka iuamoni, Teosomoni isikini ĩkapani, ikinika Teoso nakitiakori amanaãkiti sãkiretxitikata. Ininiã arikari iua kamariãro Teosomoni sikakori takikoãtaã nopini. Oro kamakori iua Teosomoni sikakori takikoãtaã auítetxi topanere apisatoõ. ⁴Ininiã iuakoã kamariãro txiã, Teoso nakitiakori amanaãkiti sãkiretxitikata kanĩka Teoso apisatoõ. ⁵Ininiã eereka iua Teoso nitiri kosekari okoana. Ixãpokakari xaminaminiki mẽkorĩkakariã, Teosomoni sikakori takikoãtaã nopini auakariã. Eereka okari itiximoni. Iuasaakipeka aua karokirauari, mẽkokari pakini. Apaka iusaaki itixi iakeẽkata.

Koatro Trõpeta Pirena

⁶Ininiã ninoa setxi Teoso nitiriakori setxi trõpeta auakini iposope itrõpetane ixõkinina ĩkapani.

⁷Ininiã ninoa Teoso nitiriakori ãti xikarauata itrõpetaneẽ. Iusaaki katxĩkareri kai soro atoko inakari, apaka xaminaminiki mẽkorĩkakari arẽkatxiã koketakori okaãka itiximoni. Ikara xika apanakini aamina itixi auakari arika, ininiã ipi ãti pakini aamina auiniãtaã ãtika arikaãka. Ikinika katsotati arika apaka.

⁸Eereka ãti Teoso nitiri xikarauata itrõpetaneẽ. Ininiã ixirata auíte atoko inakari arikatxikata okaãka potxoari uinitimoni. Ininiã ipixini potxoari uiniti arẽkatxi itxapekaua. ⁹Ininiã apanakini potxoari uiniti ãki auakani ipĩpe, ininiã ipi ãti pakini potxoari uiniti auakani auiniãtaã ãtika ipĩpe. Iusaaki apanakini maporoni apaka xipokaãka, ininiã ipi ãti maporo auiniãtaã ãtoka xipokaãka.

¹⁰Eereka āti Teoso nitiri xikarauata itrōpetaneē, ininiā ipi āti pakini initiriakori xikarauatape. Iuasaaki iōriki mitari iaxitikero katxaākata. Otirika tirikapi atoko. Oīrika ipixini uini nopini. Oīrika ipixini sōtoāri nopini apaka. ¹¹Iōriki uāka, “Kapixiro,” otxaua. Ininiā ipixini āparaā kapixiā. Ipi āti pakini sōtoāri auiniātaā, ātinoka sōtoāri kapixiā. Ito kākiti iātari iua āparaā, eereka ikoriāna, kotxi kapixiāri āparaā.

¹²Ininiā āti Teoso nitiri xikarauata itrōpetaneē, ininiā ipi ipi pakini initiriakori xikarauatape. Iuasaaki atokatxi ponikare, kasiri, iōriki pakini kona iteene !iponikaika. Imamākapeka. Ininiākara pokamara ipi ipi pakini oara atokatxi !iponikaika. Iua atokotxikana !kanōka ipi ipi pakini oara kasiri, iōriki pakini !iponikaika.

¹³Ininiā eereka nitikarauatakasaaki, nikenakotari āti Teoso nitiri sākire. Iua araaāpota Teoso tixine. Itapasākireritika itxari:

—Erepaniko. Erepaniko. Erepaniko itixi auakanii. Auapanika apikomoni ipi, āti pakini trōpeta Teoso nitiriakori xōkini !kapani.

Āti Trōpeta Xōkiko

9 ¹Ininiā āti Teoso nitiri xikarauata itrōpetaneē. Iuasaaki nitikari āto iōriki iaxitikero katxakini itiximoni. Iōrikimoni osikaāka xavi aariko mamapotōkire irikoti tore !kapani. ²Ininiā iōriki atoko inakari mataakari iua aariko. Eereka katxiāri kaiāopoko pokīka. Katxiāri tokori arikikosaaki atoko itxa. Eereka iaxiti, atokatxi pakini piāka itxiā xika. ³Iposo atoko txītxiri atoko inakari pokīka itxiā. Posotiiretxi isiākana, ininiā kaxipiro itixi auakari posotiire atoko aua txītxirimoni, kākiti ioākini !kapani. ⁴Ipaniātaākana katsotati imokakanina, apaka takari, aamina pakini imokakanina. Ipaniātaākana imisiritinina Teoso takaōtxikare iteētaā mauakini. ⁵Kona isikaākana posotiiretxi kākiti okinina !kapani. Sīko kasiritinanira ninoa paniātaāka imisiritinina ninoa. Imisiritarina kaxipiro ioākini atoko. ⁶Iuasaaki kākiti nirekariko ipinini. Itxama, kona iposotarina ikoriinina. Initarina ipīkitxi, txamari iuasaaki ipīkitxi mitekapeka.

⁷Iua txītxiri kavaro atoko itxana. Kavaro neenamatzxi kamakani atoko itxana. Ikiiāna aua saporīēta atoko oro kamakori. Itoōna kākiti toō atoko itxana. ⁸Ninoa iāko sito iāko atoko itxana. Itsiriina ākiti tsiriī atoko itxana. ⁹Itorota ipatinina koana metao kamakori atoko. Imīkitana ene kavaro itomaneri miteēkani ene atoko. Mitekaī ene atoko itxana. ¹⁰Ninoa xipi kaxipiro xipi atoko itxana. Oko aua ixipiāna. Ninoa posotari kamatsiitiniri kākiti sīko kasiriti. ¹¹Ninoa

auíte aua. Iua Satanasi nitiri. Mitxi aariko mamapotõkire irikoti åki auakari iua. Xoteo såkireẽ iua uåka Apatõ itxaua. Kreko såkireẽ iua uåka Aporioõ itxaua. Popĩkari såkireẽ “Ikinipoko Xipokakari,” itxaua.

¹²Åti misirikaretxi napapeka. Txama auapanikako apikomoni ipi misirikaretxi.

Åti Trõpeta Xõkiko

¹³Åti Teoso nitiri xikarauata itrõpetaneẽ. Iuasaaki seisi trõpeta xõkapeẽkaika. Teosomoni sikakori takikoåtaå oro kamakori aua ipi ipi pakini iko. Ikara Teoso apisatoõ. Nikenakotari iko takote auakari såkirauatini. ¹⁴Ininiå iua txari Teoso nitiri iua trõpetå xikarauatakari:

—Pisikakanako ipi ipi pakini Teoso nitiriakori iaxirikakoni Eoparatxi inakori uiniti auakani.

¹⁵Naia ipi, ipi pakini Teoso nitiriakori iposopekana ia anokanani, ia kasiriti, ia õti, ia oara manapi ĩkapani. Ininiå ninoa sikakaåka kaiåopokori kåkiti okinina ĩkapani. Ininiå ipi åti pakini kåkiti auiniåtaå auiritaåka åtika okinina. ¹⁶Åti såpiretano ninoa sotatone kavaro nopini auakani tosõtosi miråo aua. Kaiåopokori.

¹⁷Natamatari ninoa sotatoakori kavaro nopini nitaponemoni. Natamatakasaakina ia atoko ninoa. Itorotana koana metao kamakori auana. Apanakini torota koana põkamarari xamina tirinakari atoko itxa. Apanakini poporeri. Apanakini posõtakari ěxõpiri atoko. Ikiina åkiti kii atoko. Inamaåna ipokĩka xamina tirika, katxiåri, ěxõpiri pakini. ¹⁸Ikara xamina tirinakari, ikara katxiåri, ikara ěxõpiri pakini inamaåna pokĩkakari, okari kaiåopokori kåkiti itixi auakani. Ininiå ipi åti pakini kåkiti auiniåtaå ninoa okari åtika. ¹⁹Kavaro posotiire inamaå, ixipiå pakini aua. Ninoa xipi imini atoko itxa. Ixipiåna aua ito kiiri. Ninoa kii misiritari kåkiti.

²⁰Ininiå itomane kåkiti koriå ia misirikari xika. Iuaritika kåkiti mokakoni maerekati kamakani !nirekari itakanapinirina imaerekani. Ninoa kapotoreẽkapanikaua Satanasi nitiriakorimoni. Ikamapanikarina ninoa amanaåkiti. Iteosonetari aamina kamakori, oro kamakori, pirata kamakori, pirõsi kamakori, kai kamakori pakini. Ninoa teosone kona posotari atamarauatini. Kona iposotarina ikenakorauatini. Kona iposotarina itĩpokotinina. ²¹Ninoa kåkiti okapanikari apanakini. Ikamapanikarina miĩti parĩka. Isirĩkapanikana apanakinikata. Iĩtirĩkapanikarina apanakini kåkiti tii. Kona inirekarina maerekati itakanapinina.

Aätsopa Axapitiri Iapirikakori

10 ¹Iuasaaki natamatari Teoso nitiri iaxitikiri katxakini ïkorapokoritimoni. Kataparari iua. Iua katxiãri iaxitikiri ãki. Katxiãri imãka atoko itxa. Kisi ikii nopini aua. Itoõ atokatxi atoko itxa. Itapike aätsota tirinakari atoko itxa. ²Imaïkanãtari aätsopa iapirikakori axapitiri. Iuakoã aätsopa ikatamëka. Itakari ikiti ikikomonikiri potxoari uiniti nopini. Isanaremonikiri ikiti itakari imiriï. ³Akiripoakata ãkiti atoko. Iuasaaki setxi iokaamori kenakotaãka. ⁴Iuasaaki niõkatsopaaritari ninoa setxi iokaamori sãkire. Txamari nikenakotari ãti iaxitikiri sãkire. Itxano:
—Kona piõkatsopatapiri ninoa setxi iokaamori sãkire —itxa iaxitikiri.

Aätsopa Axapitiri Nikiko

⁵Iuasaaki Teoso nitiri aua ãti ikiti imiriï. Potxoari uiniti nopini ãti ikiti aua. Iua õtanõkari iuako iaxiti. ⁶Iuasaaki itxa:
—Uatxa nisãpiretakiti Teoso ãtipirika auakari sãkire. Ikamari ikinika iaxiti, iaxiti auakani pakini. Ikamari ikinika ïkorapokoriti, ïkorapokoriti auakani pakini. Ikamari potxoari uiniti, ikinika iua ãki auakani pakini. Teoso misiritinina maerekati kamakani lokananiikari apokini. ⁷Apikomoni ãti trõpeta xikarauatapanika. Iuasaaki kitxakapirïka Teoso kipatakiti oerekaãkako. Teoso sãpiretakiti initiriakori ïkorapokoritimoni, isãkire sãpiretakanimoni païtiki oerekaãkako —itxa Teoso nitiri.

⁸Eereka iuaïkana nikenakotari iaxitikiri sãkirauatini:

—Pisa. Papariko aätsopa iapirikakori, Teoso nitiri uakoã auakari. Iua ãti ikiti imiriï, ãti ikiti potxoari uiniti pakini aua kititakari.

⁹Ininiã nisa iuamoni, ininiã nitxari iua:

—Pisikano ere aätsopa iapirikakari.

Iuasaaki itxano:

—Papakapariko, nika pitxari ia aätsopa. Pitikakoã kapixiriko ia pinikakiti, iuaritika pinamaã potxoariko. Mapa atoko itxako —itxano nota.

¹⁰Ininiã nimaïkari ïkora aätsopa, nika nitxari. Ninamaã potxoari. Mapa atoko itxa. Txamari nitikakoã kapixiri iua aätsopa ninikakiti.

¹¹Iposo atoko isãpiretano:

—Iuaïkana pisãpiretariko apikomoni Teoso sãkire, kaiãopokori kãkitimoni, kaiãopokori ãti uãkamoni, kaiãopokori ãti uãka

sãkire sãkiretakanimoni, kaiãopokori auĩtetxiakorimoni pakini pisãpiretariko nisãkire —itxano.

Ipi Teoso Sãkire Sãpiretakani

11 ¹Aãke niaõrauatini ãkapani nisikaãka. Iuasaaki Teoso nitiri txano:

—Pisa. Piaõtariko Teoso misãkiretiko aikoti. Piaõtariko Teosomoni sikakori takikoãtaã. Piaõtana Teoso misãkiretakani iuaã auakani. ²Kona piaõtapiri Teoso misãkiretiko aikoti pirikere, kotxi Xoteo minakaniua apotiitiniãtaãua iuaã. Iuaã ninoa ãkapani. Ninoa misiritariko Teoso sitatxine koarëta toisi kasiriti. Ikara Teoso sitatxine, Xerosareẽ inakori. ³Nisikaposotiiretanako ipi kiki. Teoso sãkire sãpiretakani ninoa. Ninoa ieretakariko sako mata. (Sako mata kãkiti ieretakasaaki oerekari imatinaniuatini.) Ininiã mio tosëtosì sesëta õti pakini ninoa sãpiretariko nisãkire.

⁴Ninoa ipi oriva mina atoko itxana. Apaka ipi tirikapi topãkini atoko itxana. Ikini itixiti auakani auĩte apisatoõ, Teoso apisatoõ ninoa aua. ⁵Kãkiti nirekasaakiri imisiritinina ninoa, iuasaaki xamina tirinakari pokĩka inamaãna. Ininiã iuasaaki imokaiakarini xipope. Kãkiti nirekasaakiri imisiritinina, ikara atoko itxa okikona. ⁶Teoso sãkire isãpiretakasaakina, iposotarina iaxiti itotini. Ininiã iuasaaki ãparaã kona ikipaika ãkorapokoriti. Ninoa posotari ãparaã arëkatxi inĩkitakini. Iposotarina itxĩkitakiniri ikini sereti maerekati apokini ãkorapokoriti auakanimoni. Inirekasaakina, ninoa posotari ikara ikinika ikaminina.

⁷Teoso sãkire isãpiretinina xipoka atoko, monõkori aariko mamapotõkire irikoti ãki potoriãkari pokĩka. Iuasaaki iua kamari neenamatzxi ninoa ipi Teoso sãkire sãpiretakanikata. Eereka iua okapena ninoa. ⁸Ininiã ninoa ãto sirĩkako kimaporiãtaã, mitari sitatxitiã. Iua sitatxitiã Apiananiri tokakitaãka aamina ãpiriãmitakari nopini. Iua sitatzxi akiriuãkãtaãka Sotoma, Exito pakini, kotxi Sotoma, Exito pakini atoko itxa Xerosareẽ. ⁹Ininiã iuaã ikini kãkiti, ikini inirimane, ikinimane ãti uãka sãkire sãkiretakani, ikini ãti uãka atamatanako ninoa ãto kimaporiãtaã. Iuaã ikaikotanako ipi õti, ãti õti, ipixini õti pakini. Kãkiti kona auiritari ikatikona. ¹⁰Ininiã ikini kãkiti atamatariko ninoa koriãkani ãto. Ininiãkara ikinimane enenĩkako. Ninoa kamari kiiniri. Ninoa iokanatariko isikakitina apanakinimoni ipoxokoniuatini ãkapani. Ninoa kamariko ikara atoko inakari, kotxi

ninoamoni naia ipi Teoso sãkire sãpiretakani misiritana ninoa. Ininiã ninoa eneniã, kotxi Teoso sãkire sãpiretakani koriãpeka.

¹¹ Iuaritika ipi õti, ãti õti, ipixini õti pakini napaka atoko, Teoso txikitakana ninoa iuaĩkana auãki ininina ĩkapani. Õkitakauana. Iuasaaki kãkiti atamatana, ininiã ipĩkarauatana. ¹² Ikara eereka ninoa ipi Teoso sãkire sãpiretakani kenakotari iaxitikiri sãkirauatini: —Uaimoni hina.

Ininiã ninoa kanĩka katxiãriã Teoso tixinemoni. Ninoa mokaiakariakori itikana ninoa kanĩkaãpotini Teoso tixinemoni. ¹³ Iuasaakipeka itixi iteene iakeẽkata. Ininiã iua sitatxitiã kaiãopokori aapokotxi irika. Tesi aapokotxi auiniãtaã ãtika irika. Iuasaaki setxi mio kãkiti ipina. Kãkiti auapanika inakani pĩkarauata. Iuasaaki itxana: —Teoso iaxiti auakari apiatakari itxaua —itxana.

¹⁴ ĩkora misirikaretxi xipopeka. Iuasaaki ipi misirikaretxi apiari napapeka. Iuaritika erepaniko, kotxi paĩtiki ãti misirikaretxi apiari apokapanikako.

Trõpeta Imapotõkirekiri Xõkiko

¹⁵ Iuasaaki Teoso nitiri mapotõkirekiri xikarauata itrõpetaneẽ. Itomane iaxiti auakani iteene akiritari:

—Ikini itixiti auakani auĩte itxapekaua aãuĩte Teoso, Kristo pakini. ãtipirika iua ikinimane auĩte itxauako —itxana.

¹⁶ Iuasaaki vĩtxi koatro totiakori Teoso topãkiniãtaã apisatoõ topãkakani pamaka Teoso apisatoõ. Itxana:

¹⁷ “Erekapitikari ikinipoko pikamakiti. Apiananiri pitxaua. Kaposotiirei pite. Uatxa pite auapitika. Pite kitxakapirĩka aua. Katana ãtipirika pauapika. Erekapitikai, kotxi kaposotiirei, ininiã ãtipirika ate auĩte pitxaua.

¹⁸ Kãkiti ikini itixiti auakani omanãkarauata. Uatxa piteka omanãkarauatini manapi apope. Uatxa apokapeka ipĩkani misiritiko mereĩko õti. Pinitiriakori, pisãkire sãpiretakani, apaka pinakitiakori pite paxitakani pakini ĩkitxitiko õti apokapeka. Ikinimane kãkiti poiãorini, kãkiti kaposotiirerini pakini apakapariko ikamakitina ĩki. Iuasaaki pixipokariko ĩkorapokoriti xipokakani,” itxana.

¹⁹ Eereka natamatari iuaã Teoso tixineẽ imisãkiretiko aikoti tore imataakaãka. Iua aiko ãki natamatari Teoso kaixane, iua apokiniãtaã. Iuasaaki natamatari ito mẽkokari. Nikenakotari ito

okaratxirari, ito iokaamori pakini. Itixi iakeēkata. Ito āparaā kai soro katxīkareri atoko katxaka.

Imini Mitapoari, Sito Pakini

12 ¹Eereka nitaponeē nitikoka. “Kipa atxiīti?” nitxa nākixinireē. “Natokopa itxa Teoso oerekiniri kākiti?” Kotxi sito tokiā Teoso tixine. Atokatxi iotximere iakirokaro oa omāka atoko inakari. Kasiri aua okiti patapi. Okiiā aua auītetxi saporietane, tosi iōriki kamakori. ²Oa kamixiro. Oa akiripoakata oātatsiirauatini xika, kotxi kaiamapeka amarini oāuākitakini.

³Eereka iuaīkana nitikoka, kotxi imini mitapoari tokiā Teoso tixineē. Pōkamarari. Iua setxi ikii aua. Aua tesi iko. Ikininape ikii aua auītetxi saporietane. ⁴Ixipiā ikosekari kaiāopokori iōriki iaxitikero, uai ixiti oka itxaro iōriki. Itima oa sito apisatoō, kotxi paītiki amarini oāuākitaka. Inirekari iixirākiniri amarini, amarini auakasaaki. ⁵Eereka oa sito auākitakari amarini, kiki. Oa sito ākiri aneēkasaaki ikini itixiti auakani auīte itxauako. Auītetxi kataparari itxauako iua amarini. Auakasaaki, imini lixirākari amarini. Patimari maīkiko iua amarini. Teoso auinimoni anikaāka amarini. Iuaātaā Teoso topākanāta auītetxi itopanere nopini. ⁶Oa sito miteka āparaā makipakaniātaā. Teoso oerekatapekari iuaā okaikotini īkapani. Iuaā oinīkataākako mio tosetosi sesēta ōti. Ipi anokanani, āti anokanani ipixini pakini itxa.

⁷Eereka aua neenamati Teoso tixine. Teoso nitiri Mikeo inakori apanakinikata naiatari imini mitapoari initiriakorikata. Imini initiriakori pakini neenamauata apaka. ⁸Teoso nitiriakori tapara apiata, ininiā imini initiriakorikata !auritaākaika Teoso tixine ikaikotinina. ⁹Iua imini mitapoari iokanataāka maparamoni. Iua imini kitxakapirīkaripekara. Iua Txiapo inakori. Iua Satanasi inakori. Iua misirienetari kākiti ikini itixiti auakani. Maparamoni iokanatikosaaki, iua, initiriakori pakini okaākana uai īkorapokoritimoni.

¹⁰Eereka nikenakotari Teoso tixinekiri sākire kataparakieneri: —Kākiti maerekani makatxakiko apokapeka uatxa. Teoso makatxakari kākiti maerekani. Uatxa Kristo posotiire oerekaāka. Uatxa oerekari ikinimane auīte ininiua. Teoso mereēkiti ikinimane auīte itxaua uatxa, kotxi aītariakori kamapiretakari iokanatapeēkaika mapara. !Ikaikotaika Teoso tixine. Mitxi ikamapiretari aītariakori Teoso apisatoō. Pokamara, īkanōka ikamapiretana. ¹¹Aītariakori iokanatapekari Satanasi isini. Ninoa posotari iokanatiniri Satanasi,

kotxi Teoso Soti Auítene ipina ninoa íkapani. Iarêka xiketa ninoa íkapani. Ninoa posotari Satanasi iokanatinina, kotxi ninoa sãpiretari atão inakari Teoso sãkire. Ninoa iposope okikona Teoso íkapani. ¹²Híte Teoso tixine auakani hîpoxokoniatako. Txamari híte itixi auakani, potxoari uiniti auakani, erepaniko, kotxi Satanasi apopeka ereê híte sauaki. Iua iteene naiataua, kotxi imarotari paítiki Teoso !auritaikari iua maerekati apikomoni ikamini —itxa iua Teoso tixinekiri sãpirena.

¹³Uai itiximoni okikosaaki, imini mitapoari asikatikinitaro oa sito amarini auãkitakakaro okiniro íkapani. ¹⁴Oa osikaãka ipi mîkitatxi kokoi mitari mîkita, oãraini íkapani. Oa araã âparaã makipakanimoni. Teoso oerekinimoni osa. Iuaã Teoso nîkataro oa ipi anokanani, âti anokanani, ipixini pakini. Iuaã imini mitapoari !iposotari oamoni apokini. ¹⁵Oa araãkasaaki, imini mitapoari koporikaãtari âparaã inamaãkiri oa tikini. Uini atoko itxíkitakari âparaã, oa sito axãpoãtini íkapani. ¹⁶Kipatxi !auritari âparaã sini oamoni. Ixoreka. Ixorekasaaki, ikinika âparaã imini namaãkiri kipatxi âki isa. ¹⁷Ininiã imini iteene omanataro oa sito. Ininiã asikatikinitana apanakini oa anaakori inaiatinina íkapani. Kãkiti Teoso paniãtakiti kamakani oa anaakori itxauana. Kãkiti Xesosi Kristo sãkire auíãkani oa anaakori itxauana.

Monõkori Potxoari Uiniti Pokíkaãtakari

13 ¹Ininiã nitaponeê nitima ikipatxite nopini. Iuaã nitikari monõkori potxoari uiniti pokíkaãtini, kaníkiita itxa. Iuamoni auari iko tesi pakini. Apaka ikii setxi aua. Ikinika iko aua auítetxi saporietane. Ikini ikii aua uãkatxi Teoso misãkirepiretakari. ²Iua monõkori nitikakiti âkiti kaiõkari atoko itxa iito. Ikiti oso kiti atoko itxa. Inama âkiti nama atoko itxa. Iua imini mitapoari sikari iposotiire maerekati, iua potxoari uinitikirimoni. Ininiã iua auítetxi itxaua. Imini auítetxi ininiua atoko itxa. Imini txíkitakari iua potxoari uinitikiri sãkire kaposotiire inini, isãkire kãkiti auikini íkapani. ³Nota atamatarikiini. Ikii âti ipípe ikaro mitari xika. Eereka ikaro tximõka. Iuaãkana auãki itxa ikii ipinakari. Kãkiti ikini itixitikini atamatakasaakiri, itsoríkaãtana. Ininiã auikarina isãkire. Ikamarina iua nireêkiti. ⁴Ikinimane auikari imini mitapoari sãkire. Iteosonetarina iua, kotxi iua sikari iposotiire iua potxoari uinitikirimoni. Apaka ninoa auikari iua potxoari uinitikiri sãkire. Ninoa teosonetari iua apaka. Ninoa sãkire: —Âti kaposotiireri potxoari uiniti pokíkaãtakari atoko inakari !uari. Kãkiti !iposotari inaiatiniri iua —itxana.

⁵Iua potxoari uinitikiri auiritaãka isãpiretiniri maerekati sãkiretxiti. Imisãkirepiretari Teoso. Auiritaãka auítetxi ininiua koarêta toisi pakini kasiriti. ⁶Iua misãkirepiretari Teoso. Imisãkirepiretari Teoso uãka. Imisãkirepiretari Teoso auiniãtaã. Imisãkirepiretari Teoso tixine auakani. ⁷Iua auiritaãka inaiatiniri kãkiti Teoso nakitiakori. Apaka auiritaãka ninoa imaĩkini. Auiritaãka kãkiti ikini uãkati auíte ininiua, ikini itixiti auakani auíte ininiua, ikini kãkiti sãkire sãkiretakani auíte ininiua. Ikinimane auítetari iua maerekati kamakari. ⁸Ikini itixiti auakani, Teoso nakitiakori minakanuia, auikariko iua potxoari uiniti pokĩkaãtakari sãkire, kotxi iteasonetarina iua. Itixi kamiko apisapanika ninoa uãka liõkataãka Soti Auíte okakori aãtsopateẽ. Iua aãtsopaã auauãkatakani auapikako Teosokata mapĩkaninoka ininina.

⁹Híte, ia atatsopatakani kakenakokii, ininiã híkenakotariko nisãkire. ¹⁰Teoso nirekiniãri kateia ãki pitakiko, ininiã erekapitikari kateia ãki pauini. Teoso nirekiniãri pokiko iouata mitariã, erekapitikari pokiko. Ininiã pokaãkako iouata mitariã. Ininiã híte Teoso nakiti inakanuia himíteenekariko himisiritiko. Kona hĩtakanapapiri Teoso kimapore. Átipirika híkamariko Teoso nirekakiti.

Monõkori Itixiãkiri

¹¹Eereka nota itikari ãti monõkori. Itixiã ipokĩka. Aua ipi iko. Soti auíte ãkiri iko atoko itxa, iuaritika isãkirauata imini sãkire atokokana. ¹²Potxoari uiniti pokĩkaãtakari nitiri itxaua iua itixiã pokĩkakari. Potxoari uinitikiri sikaposotiiretari iua, ininiã isari ikini itixitimoni. Itxĩkitakana ikinimane teosonetiniri potxoari uinitikiri. Iua potxoari uinitikiri mitxi mita karori, eereka ikaro tximõka. ¹³Iua itixiã pokĩkakari kamari posotiiretxi mitxi mimarotakoti. Ipaniãtari xamina tirinakari iaxiti auakari íkorapokoriti apokini ikinimane amatiniri íkapani. ¹⁴Iua potxoari uinitikiri auiritari itixiãkiri kaminiri posotiiretxi iua íkapani. Posotiiretxi xika itixiãkiri misirienetari ikinimane itixiã auakani. Itxĩkitakari kãkiti kaminiri potxoari uinitikiri íto atoko inakari kai kamakori. Ikara atoko ipaxitarina potxoari uinitikiri, kotxi ikarotaãka iouata mitariã, iuaritika iuaĩkana auapanika ikii. ¹⁵Itixiã pokĩkakari auiritaãka itxĩkitakiniri potxoari uiniti pokĩkaãtakari atoko inakari kai kamakori kosekasinaniretinuia, ininiã iua kai kamakori posotari isãkirauatini kãkitikata. Ipaniãtari kãkiti okiko imanirekakanisaakiri iteosonetiniri iua. ¹⁶Itixiã pokĩkakari paniãtari ikinimane kãkiti apakapiniri

Satanasi takaõtxikare iuakoãna ikikomoni, minakaniã iteẽtaãna. Ipaniãtari ikinimane kãkiti auĩtetxi inakanuia, auĩtetxi minakanuia, katiini, matiini, nitiritxi, nitiritxi minakanuia pakini, apakapiniri Satanasi takaõtxikare. ¹⁷Kãkiti iua takaõtxikari mauakiniti !auritaãka iamotiitinina. !Auritaãkana ivẽtxirauatinina. Iua takaõtxikari potxoari uinitikiri uãka. Iuãka mauakanisaaki, aua nómero iua nakiti.

¹⁸Kimarore hĩtxako, ikara himarotini ĩkapani. Kimarore hininiã himarotari potxoari uinitikiri nomerone kiki uãka itxa. Nómero 666.

Soti Auĩte Sẽto Koarẽta Koatro Mio Kãkitikata

14 ¹Eereka nionakaãta nitaponeẽ. Natamatari Soti Auĩte. Õtanoxiratarari nopini auanãta. Ixirata uãka Sião inaãka. Kãkiti sẽto koarẽta koatro mio pakini aua iuakata. Kaiãopokori kãkiti. Iteẽtaãna Soti Auĩte iri uãka iõkatsopatapeẽkaika. ²Eereka nikenakotari ninoa xikarauatini. Itorõkani ene atoko itxa, kotxi ama eneeneri. Ikarokirauatini ene atoko itxa ninoa xikare. Viorão ene atoko itxa iua xikari ene. ³Ninoa kãkiti sẽto koarẽta koatro mio pakini tima auĩtetxi topanere apisatoõ, okĩtxinoka xãpokaĩtotakini ipi ipi pakini apisatoõ. Totiakori vĩtxi koatro pakini apisatoõ apaka itimana. Ninoa sẽto koarẽta koatro mio xikaretari xikari amaneri. Apanakini !imaĩkari iua xikari amaneri. Ninoa sẽto koarẽta koatro mio ĩkorapokoriti Teoso amotakini, ninoanoka posotari ixikaretiniri iua amaneri xikariti. ⁴Ninoa kiki !isirĩkana sitokata. !Auiritarina iĩtona kaminiri maerekati. Soti Auĩte sinimoni ninoa apaka sa. ĩkorapokoriti auakasaakina, Teoso amotana ninoa. Ninoa merepanika sikaãka Teosomoni, Teoso Soti Auĩtene pakinimoni. ⁵!Ikamarina maxikatĩka isãkirena. Atão inakarinoka isãpiretana. !Ikerokarina isãkirena Teoso iauĩtena apisatoõ.

Ipi Āti Pakini Teoso Nitiri Sãkire

⁶Eereka nitikari Teoso nitiri araaãpotini iaxiti itanoxiti. Iua sãpiretari Teoso iokanapirena erekari kãkitimoni ikini itixiti auakanimoni. Iua iokanapirenatxi kona xipoka. Isãpiretari Teoso iokanapirena erekari ikini uãkatimoni. Āti uãka sãkire ipinimoni. Āti uãka sãkire ipinimoni. Itxaãpota, itixi auakani sãkire, iuaritika isãpiretari Teoso iokanapirena ikini uãkatimoni. ⁷Itapasãkireritika itxari:

—Hĩpĩkariko Teoso. Hĩsãpiretariko, iua Apiananiri ininiua. Apokapeka kãkiti maerekati kamakani misiritiko õti.

Híteosonetariko Teoso, kotxi iua kamari iaxiti, ìkoraxiti, potxoari uiniti, sôtoãri pakini —itxa iua Teoso nitiri araãkari sãkire.

⁸Iua sãkirauataka atoko, ãti Teoso nitiri txari:

—Papirónia sitatxiti xipokapeka. Iuaã auakani kaposotiirerini, iuaritika ixipokapena. Papirónia sitatxiti auakani paniãtari imakinika itixi auakani maerekati ikaminina, maerekati ìtotxi nireẽkiti. Ininiã ninoa kamari maerekati Papirónia auakani paniãtakiti.

⁹Ninoa Teoso nitiriakori ipi sãkirauataka atoko, ãti Teoso nitiri txari itaparasãkireritika:

—Teoso misiritanako kãkiti potxoari uinitikiri teosonetakani, potxoari uinitikiri atoko inakari kai kamakori teosonetakani. Teoso misiritanako kãkiti Satanasi takaõtxikare iteẽtaãna takakani, iuakoãna takakani. ¹⁰Kãkiti iua atoko inakani misiritaãkako, kotxi Teoso iteene omanãkarauata maerekati ninoa kamakiti xika. Teoso misiritanako ninoa, ininiã atatsiirauatana xamina tirinakariã. Ëxópiri arikanako ninoa. Teoso nitiriakori erekarini, itixine auakani, Teoso Soti Auĩtene pakini itikariko ikara kãkiti misiritiko. ¹¹Iua xamina txĩkitakari kãkiti atatsiirauatini. Iua xamina tirinapikako. !Ixipoka. Itirinapika. Itxiãkapika. Ninoa misiritiko !iotoka. Pokamara, ìkanõka auapika ninoa misiritiko. Kãkiti iua potxoari uinitikiri teosonetakani, potxoari uinitikiri atoko inakari kai kamakori teosonetakani, iuaãka ìitoãna auãtõtakini misiritaãkako ikara atoko —itxa iua Teoso nitiri sãkire.

¹²Ininiã hĩte Teoso nakitiakori, hĩte ipaniãtakiti kĩpitakani, hĩte Xesosi nireẽkiti ãtipirika kamakani, kataparaxinire hĩtxako. Himĩteenekariko kãkiti misiritinii.

¹³Eereka nikenakotari Teoso tixine auakari sãkire. Itxano:

—Nisãpiretakiti piókatsopata. Kãkiti ipĩkasaaki Apiananiri ìkapani iparĩkauatakasaaki, Teoso sikari erekari iuãmoni.

Iua Erekari Matamatakoti txari:

—Ia atão. Mitxi pasãpaniri Teoso parĩka ikaminina. Uatxa itomatana, kotxi Teoso imarotapekari erekari ikamakitina.

Takari Amiko Pirena

¹⁴Eereka nitaponeẽ nionakaãta iaxiti. Iuasaaki natamatari katxiãri kasarori iuaã. Aĩtari iaxitikiri atoko inakari topãka iua katxiãri nopini. Ikiiã aua auĩtetxi saporietane oro kamakori. Iuakoã saasara atoião aua. Pauanaro. ¹⁵Iposo atoko ãti Teoso nitiri pokĩka Teoso aapoko. Iua itaparasãkireritika akiritari iua katxiãri nopini topãkakari:

—Pikosekariko pisaasarate. Pamariko takari, kotxi takari amiko manapipekara. Takari ikini itixitikiri amiko manapipekara.

¹⁶Ininiã iua katxiãri nopini topãkakarí isaasarateẽ isauakari ikini itixiti nopini auakari. Amari takari imakinika.

¹⁷Iposo atoko nitikari ãti Teoso nitiri pokĩka Teoso aapoko Teoso tixineẽ. Iuamoni apaka aua saasara ãtoĩão iuakoã. Pauanaro.

¹⁸Iuaĩkana ãti Teoso nitiri apoka. Teosomoni sikakori takikoãtaã ipotorika iua. Inĩkatari xamina tirinakari iuaã. Iua itaparásãkíreritika akiritari Teoso nitiri saasara auakiti:

—Pimaĩkaroko pisaasarate. Pimakatxakaroko ova ikini itixitikero, kotxi ova oionapeka —itxa.

¹⁹Ininiã Teoso nitiri isaasarateẽ isauakaro ova ikini itixitikero. Itsotakitataro ovatsa. Iposo atoko okaro ova ori ova iopetiko mitari ãki. Okatsonakaãka. Teoso omanãkare iua ova iopetiko atoko itxa, kotxi Teoso iteene omanãkarauata kãkiti maerekani xika. ²⁰Ova ori kãkiti kitiã iopetikoãtaã sitatxi mapotõkire. Txamari na ovapeñi ikara atoko itxa. Arẽkatxiãra ikara atoko itxa. Iua arẽkatxi uini panaã atoko itxa. Tresẽtosi kirómetro arẽkatxi aua. Arẽkatxi ãpanaã kavaro namaãpeka apoka arẽkatxi. ãti metro ipixini ãpanaã arẽkatxi.

Teoso Misirikare Mĩkani Setxi

15 ¹Eereka nitaponeẽ nitikoka iuaĩkana.

—Kipa atxiĩti? —nitxa iuaĩkana nãkixinireẽ, kotxi natamatari Teoso nitiriakori setxi itixineẽ.

Ninoa minari misirikaretxi setxi pakini kãkitimoni. Apikomoni misirikaretxi !auaika. Ia misirikaretxi setxi inokasaakiri kãkiti, Teoso misiritana ninoa imaerekanina xika.

²Eereka natamatari ipoa atoko inakari. ãtakaãri, xamina tirinakarikata koketakori atoko itxa ipoa. Kãkiti tima ipoa ãtinikata. Ninoa iokanatapekari Satanasi sini, kotxi !ikamarina iua potxoari uinitikiri paniãtakiti. Iua potxoari uinitikiri atoko inakari kai kamakori paniãtakiti !ikamana. !Apakaparina Satanasi takaõtxikare, iuãka nomerone. Ikininape aua viorão atoko inakari Teoso sikakiti.

³Ninoa xikaretari Moisesi xikare, Teoso nitiri uai itixi auakari xikare. Ixikarenãtari Teoso Soti Auĩtene xikare. Ia ixikaretana. Itxana:

“Teoso Apiananiri, ikini posotiiretxi auakitiĩ pite. Peerekari piparĩka. Pite kaposotiireri. Pite atãonani pikamakiti. Ikini uãkati auĩte pitxaua pite.

⁴Ikinimane paxitaiko pite ipĩkareritika, kotxi pite Apiananiri pitxaua. Ikinimane txaiko pite: ‘Peerekai,’ itxaina. Kotxi pitenoka !auari maerekati. Kãkiti ikini uãkati apokako pitemoni. Ninoa txaiko: ‘Ate teosone pitxaua,’ itxana kotxi ikinimane itikari erekari pikamakiti.”

Ikara atoko itxa ninoa xikaretakiti.

⁵Eereka natamatari Teoso aapoko ãki. Natamatari iua auuniãtaã. ⁶Iposo atoko ninoa Teoso nitiriakori setxi, misirikaretxi setxi mĩkani, pokĩka Teoso aapoko. Ninoa mãka katsopiri, pomẽkoriri. Ninoamoni aua oro kamakori. Itinimaĩ nopini inapa. ⁷Ninoa ipi ipi pakini okĩtxinoka xãpokaĩtotakini iuaã aua. Okĩtxinoka xãpokaĩtotakiti sikari iãtatxi setxi pakini oro kamakori ninoa setxi Teoso nitiriakorimoni. Teoso auapininiika inakari xãpokakapekari iua setxi pakini iãtatxi omanãkareẽ. ⁸Teoso iotximere xãpoka iua aapoko ãki. Katxiãri kasarori atoko itxa. Iuasaaki kãkiti !auritaãka Teoso aapoko ãroini, ninoa Teoso nitiriakori, misirikaretxi mĩkani setxi pakini, misiritakasaakina kãkiti.

Iãtatxi Teoso Omanãkare Auakiti

16 ¹Eereka nikenakotari Teoso aapoko ãki auakari sãkire. Itaparakieneritika imisãkiretana ninoa Teoso nitiriakori setxi. Itxana:

—Hĩsa. Hĩkitakari Teoso omanãkare iãtatxi ãki auakari itixi auakanimoni —itxa.

²Ininiã ninoa Teoso nitiriakori sari. Merepanika ãtika initiri kitakari iãtatxi ãkikiri itixi auakanimoni. Iuasaaki kimiti mitari, katsiiri, apoka kãkiti Satanasi takaõtxikare auakini ãtomon. Potxoari uinitikiri atoko inakari kai kamakori teosonetakani ãtomon apoka ikara atoko inakari amianari.

Ãti Iãtatxi

³Iposo atoko ãtipekana Teoso nitiri kitakari iãtatxi ãkikiri potxoari uinitimoni. Iuasaaki ãparaã arẽkatxi itxapekaua. Kãkiti ipĩkari arẽka atoko itxa iuasaaki. Ininiã ikinipoko potxoari uiniti auakani iuasaaki xipoka.

Ãti Iãtatxi

⁴Iposo atoko ãtipekana Teoso nitiri kitakari iãtatxi ãkikiri uinimoni, sãtoãri pakinimoni. Iuasaaki ãparaã arẽkatxinoka itxapekaua. ⁵Iuasaaki nikenakotari Teoso nitiri ãparaã ñikatakari sãkire. Itxari Teosomoni:

—Pite maerekati makamakatii. ãtipirika auakarii pite. Atão pikamakiti pimisiritinina maerekati kamakani ãkora atoko. ⁶Kotxi ninoa okari kãkiti pite nakitiakori. Okarina pisãkire sãpiretakani. Ninoa oxiketari ninoa arẽka. Ininiã uatxa pite sikana arẽkatxi iãtinina. Atão imisiritikona kotxi maerekati ikamana —itxa Teoso nitiri.

⁷Iposo atoko nikenakotari ãti sãkire. Teosomoni sikakori takikoãtaã auakari iua. Itxari Teoso:

—Pite Teoso Apiananiri, Kaposotiireri pitxaua. Erekapitikari maerekati kamakani pimisiritini. Pite kona kerokari pikamakiti, kotxi atão inakarinoka pikama —itxa.

Ãti Iãtatxi

⁸Eereka ãtipekana Teoso nitiri kitakari iãtatxi ãkikiri atokatximoni. Iuasaaki atokatxi apiata patakata. Auiritaãka kãkiti arikini itaparapatakaã. ⁹Ininiã kãkiti arikaãka atokatxi patakaã. Iuaritika !inirekarina maerekati ikamakitina itakanapinina. “Peerekari Teoso,” kona itxana. Teosonoka posotari iotokakiniri iua misirikaretxi, txamari ninoa maerekati pirenã akiritari Teoso uãka.

Ãti Iãtatxi

¹⁰Ininiã ipi ipi pakini Teoso nitiriakori kitakapekari iãtatxi ãkikiri itiximoni. Eereka iuaãkana ãti Teoso nitiri kitakari iãtatxi ãkikiri auãtetxi topaneremoni iua potxoari uiniti pokãkaãtakari topaneremoni. Iuasaakipeka iua potxoari uinitikiri auãtetxi ininiãtaãua patimari ipiãkini. Kãkiti iuaãtaã auakani akatsaninitaua itsii xika. ¹¹Iuaritika !inirekarina maerekati ikamakitina itakanapinina. Imisãkirepiretarina Teoso iaxiti apiko nopinixiti auakari, atatsiirena xika, kimiti xika.

Ãti Iãtatxi

¹²Eereka iuaãkana Teoso nitiri ãti kitakari iãtatxi ãkikiri mitari uinitimoni Eoparatxi inakorimoni. Iuasaaki uini auaã. Isonãka. Kimapori itxaua, auãtetxiakori atokatxi pokãkinimoni ãkani inapinina ãkapani. ¹³Iposo atoko nitikari maerekani matamatakoni

ipi āti pakini. Atiniro atoko itxana. Āto pokīka mitapoari imini namaā. Āto pokīka iua potxoari uiniti pokīkaātakari namaā. Āto pokīka iua itixi pokīkakari namaā. Iua itixi pokīkakari iua Satanasi sākire sāpiretakari itxaua. Na atāoene isākire. Poxirari ikama. ¹⁴Ninoa maerekani matamatakoni ipi āti pakini Satanasi nitiriakori. Ninoa kamari posotiiretxi. Isana auītetxiakorimoni, ikini itixiti auakanimoni. Akiritana kākiti apotiitiniua ineenamauatinina ĩkapani. Teoso kaposotiireri naiatanako ninoa itixi xipokini ōtisaaki.

¹⁵Hīte ia atatsopatakani, Apiananiri txai hīte:

—Erepaniko. Napokako kiītiriri apokini atoko, kākiti mimarotakinitipanika. Napokasaaki ereē, pikoatiniā, kamāka pininiā, pipoxokoniua. Ikara atoko pininiā, kona kasarai ikinimane apisatoō pisini, ininiā kona kapētai —itxa Apiananiri sākire.

¹⁶Eereka ninoa ipi āti pakini Satanasi nitiriakori maerekani matamatakoni, apotiitari auītetxiakori Amaketō inakoriātaā. Iuaātaā akiritaāka Amaketō Xoteo sākireē.

Imapotōkire Iātatxi

¹⁷Ninoa setxi Teoso nitiriakori, seisi kitakapekari iātatxi ākikiri. Ātinoka !ikitakapanikari. Iuasaakiika iua kitakari iātatxi ākikiri ĩtimamoni. Iuasaaki nikenakotari auītetxi itopanereātaā auakari sākire: —Ixipokapeka —itxa itaparakieneritika.

¹⁸Iposo atoko iotxira mēkoākata. Ikarokirauata. Pataparaeneri. Itixi iakeēkata. Mitxi !auari itixi iakeēkatini ĩkora atoko inakari. Iuasaakiikarako apiatako. ¹⁹Iua sitatxi apiari Papirónia inakori xoreka. Ipikata ixoreka, ininiā ipi āti pakini sitatxiti atoko itxaua. Ikini itixiti auakari sitatxi xipokaāka iuasaaki. Teoso limaxinīkaretari Papirónia sitatxiti auakani kamakiti, ininiā iteene imisiritana ninoa, kotxi iteene omanākarauata imaerekanina xika. ²⁰Iuasaaki ikini ipokomiriī !auaika. Ōtanoxiratari ikinipoko xipoka iuasaaki. ²¹Katxīkareri iaxiti auakari, kai mitari atoko inakari, katxaka itiximoni. Apanakini kai minani koarēta sīko kiro. Iua irika kākiti nopini. Ikara katxakakari pamonōkonipaniri. Iua xika kākiti iteene misākirepiretari Teoso.

Sito Potxoari Uunitikiri Nopini Topākakaro

17 ¹Ninoa Teoso nitiriakori setxi pakini iātatxi setxi auakini, seisi kaikota. Ātika ina notamoni. Itxano nota:

—Notakata pisa. Noerekai sitatxi miramaneri. Sito kanokarero kaposotiirero atoko itxa iua sitatxi. Oa topākanāta uini itori nopini. Iuaã auakani misiritiko noerekaiko pite. ²Auñtetxiakori ikini itixiti auakani kamari maerekati iua sitatxiti auakanikata isirĩkinina. Iua sitatxi auakani txĩkitakari kãkiti ikini itixiti auakani maerekati ikaminina. Kapoãroã poãtakari nirekini atokokana, ninoa nirekari iua maerekati iua sitatxiti auakani kamakiti —itxa notamoni.

³Eereka iua Erekari Matamatakoti paniātano iua Teoso nitirikata nisini. Iua Teoso nitiri anikano āparaã makipakaniātaã. Iuaã natamataro sito topākanāta iua potxoari uinitikiri nopini. Pōkamarañtori iua. Iitoã aua iōkatakori kaiãopokori Teoso imisãkirepiretini iōka. Ikii setxi aua. Iko tesi aua. ⁴Oa sito mãka pomamari ipixini. Pōkamarari itxa omãka. Pakaroneri omãka. Oitoã aua oro, pérora, kai soro pomēkoriri pakini aua. Omaĩkari iãkoanatxi oro kamakori. Iua iãkoanatxi ãki aua maerekati okamakiti itxiko atoko inakari. Maerekati oito kamakiti ikara atoko itxa. ⁵Oteẽtaã aua sãkiretxi iōkatakori. Itxari: “!Kimarotikori. Kanokareroakoro inoro itxaua Papirónia sitatxiti miramaneri. Maerekati kamakani inoro itxaua Papirónia.” ⁶Nitikaro oa sito opoãtini, Teoso nakitiakori arẽka oãtini xika. Xesosi sãkire auikinina xika, okaãkana. Natamatakasaakiro nitikoka.

—Kipa atxiĩti? —nitxa.

⁷Iua Teoso nitiri txano:

—Kininiãpa pitikoka? Nisãpiretaiko oa sito pirena. Apaka nisãpiretaiko iua potxoari uinitikiri pirena, ikii setxi, iko tesi auakiti pirena, oa porikitakari pirena nisãpiretai, kotxi kona pimarotari.

⁸Iua potxoari uinitikiri patamatakiti mitxi aua, txamari uatxa !lũaika. Iua eereka ipokĩkapanikako aariko mamapotõkire irikotiã. Eereka anikaãkako ixipokikomoni. Ikini itixiti auakani Teoso aãtsopateẽ iuãkana maiōkatakoni tikokako iua potxoari uinitikiri atamatakasaakinako. Itixi kamiko apisa iuãkana !iōkatsopataãka Teoso aãtsopateẽ. Iua aãtsopaã iōkauãkatakonioka ãtipirika auapikako Teosokata. Kãkiti tikokako iua potxoari uinitikiri atamatakasaakina, kotxi mitxi auãki itxa, eereka !ũaika, eereka iuaĩkana auãkipeka itxa.

⁹—Ikara inakari pimarotini ikapani, iteene pimixinikariko. Kinirepa ikii setxi aua? Kotxi õtanoxiratarari setxi apaka aua. Oa sito topākanāta iua õtanoxiratarari nopini. ¹⁰Kinirepa ikii setxi aua? Kotxi auñtetxiakori setxi apaka auako. Auñtetxi !itxaikauana ninoa sĩko. ãtinoka auñtetxi txapanikaua. ãti kona apokapanika. Iua apokasaaki mapaõtinoka

auítetxi itxauako. ¹¹Iua potxoari uinitikiri mitxi auãki inakari, iposo atoko !auaika inakari, iua apokako. Iuara auítetxi txauako. Iua mitxi apotiitaua ninoa setxi auítetxiakorikata. Áti õti iua xipokaãkako.

¹²—Patamatari iko tesi pakini. Kinirepa iko tesi aua?

Kotxi auítetxi tesi aua. Ninoa auítetxiakori kãkiti auíteakori !itxapanikauana. Ninoa sikaposotiiretaãkako auítetxi ininiuana iua potxoari uinitikirikata. Ninoa auítetxi itxauanako áti oaranoka.

¹³Ikininape ninoa tesi auítetxiakori parĩkauata iua potxoari uinitikiri ãkapani. Iposotiireẽna, itaparaãna iparĩkauatana iua potxoari uinitikiri ãkapani. ¹⁴Inaiatarinako Teoso Soti Auítene. Teoso Soti Auítene iokanatana ninoa isinina, kotxi iuanani Apiananiri itxaua. Auítetxiakori auíte itxaua. Átipirika iuakata sikani, iua akiritakini, imereẽkini, átipirika iua nireẽkiti kamakani, ninoa moianatari iua Soti Auíte ineenamauatini —itxa Teoso nitiri sãkire.

¹⁵Iua Teoso nitiri apikomoni txari notamoni:

—Pite atamataro oa kanokarero topãkanãta kãuaãri nopini.

Kinirepa kãuaãri nopini oãua? Kotxi iuaãtaã kãkitipokoni, ikini uãka, ikini itixiti auakani, ikini áti uãka sãkire sãkiretakani pakini. Iua kãuaãri mitari atoko itxana. ¹⁶Iua potxoari uinitikiri, ninoa tesi auítetxiakori pakini omanataroko oa kanokarero.

Ninoa makatxakariko ikinipoko oa nakiti. Imakatxakarinaroko omãka. Kasarapeka otxako. Oxini inikanako. Ninoa xipokaroko oa xaminaã. ¹⁷Teoso txĩkitakari Teoso nireẽkiti ikaminina, kotxi ninoa auítetxiakori parĩkauata iua potxoari uinitikiri ãkapani Teoso nireẽkiti iaõka. Ininiã Teoso sãkire mitxi auakari auapeka. Isãkire iaõka ikamana. Ininiã ninoa nirekari iparĩkauatinina iua potxoari uinitikiri ãkapani. Ininiã ninoa auítetxiakori itxauana iua potxoari uinitikiri ãkapani.

¹⁸—Oa sito kanokarero patamatakito kona atão sitoni. Sitatxi miramaneriã auakani oa sito kanokarero atoko itxana, kotxi iua sitatxiã auakani paniãtana ikini auítetxiakori itixi auakani maerekati inireẽkitina ikaminina.

Papirónia Sitatxiti Xipokini

18 ¹Ikara inaãka atoko nitikari áti Teoso nitiri Teoso tixine auakari katxakaãpotini ãkorapokoriti Teoso tixine potoriãkari. Iua kaposotiireri. Iotximere iopinikari imakinika itixi. ²Iua sãkirauata itaparasãkireritika. Itxari:

—Ixipokapeka Papirónia sitatxiti miramaneri. !Auaika. Uatxa Satanasi nitiriakori aua iuaã. Ikini sereti maerekani matamatakoni aua iuaã. Araãkari ikini sereti arakakari nikakani, kãkiti mapokaerekatakiniti, iuaã apoka. ³Oa sito kanokarero atoko itxa iua sitatxi, kotxi iua sitatxi auakani txĩkitakana ikini itixiti auakani maerekanitxi ninoa kamakiti iaõka ikaminina. Papirónia sitatxiti auakani kamari maerekati iitona nireẽkiti. Itixi auakani nirekari ikara maerekati ikaminina kapoãroã poãtakari nirekini atokokana. Auĩtetxiakori ikini itixiti auakani kamari ikara maerekati Papirónia sitatxiti auakanikata. Tiitxi vëtxitakani apakaparo txineiro kaiãopokoro, kotxi Papirónia sitatxiti auakani amotari tiitxipokoni —itxa Teoso nitiri sãkire.

⁴Eereka nikenakotari ãti Teoso tixine auakari sãkire. Itxari: “Hĩte nota nakitiakori inakani takanapariko iua sitatxi.

!Hĩkamapiri maerekati ninoakata. Ininiã !himisiritaãka ninoakata.

⁵Kotxi maerekati ninoa kamakiti apiaãpota. Tiitxi tsorinatakori atoko itxana ninoa maerekani. Iaxitipeka apokaãpota ninoa maerekani. Teoso xinikari ninoa maerekani, ininiã iua misiritanako ninoa.

⁶Himisiritanako ninoa. Hĩte imisiritinina atokokana, hĩte misiritana ninoa. Ipiakata himisiritanako ninoa, ninoa maerekani xika. Ninoa misiritapekari apanakini, ininiã ia imisirikarena xika ipiakata himisiritanako ninoa.

⁷Hĩtxĩkitakanako ninoa atatsiirauatinina. Hĩtxĩkitakanako ninoa maerekaxiniretinoka ininina. Ikara atoko ninoamoni hĩkaminiã, atãopitikara hĩkamakiti, kotxi iteene iuikauana ninoa. Itomaneri itiina, ininiã ninoa iarinouata. Ninoa sãkire: ‘Ate uai topãkanãta, kotxi auĩtetxi kaposotiireni atxaua. Tikinitakoro atoko !atxaua, ininiã maerekaxiniretika !atxa,’ itxana ãkixinireẽna.

⁸Ikara isãkirena xika ãti õti ninoa misiritaãkako. Amianari, maerekaxinirenitxi, natxi pakini apokako ninoamoni. Arikatxi xipokanako ninoa, kotxi Teoso iusaaki misiritanako ninoa. Imisiritanako ninoa, kotxi Teoso Apiananiri Kaposotiireri itxaua,”

itxa iua Teoso tixine auakari sãkire.

Kākiti Txiapatini Sitatxi

Xipokini Xika

⁹Auñtetxiakori ikini itixiti auakani, Papirónia sitatxiti auakanikata sirĩkakanani, ninoakata tiitxi apokaerekatakani, itikasaakirina iua sitatxi misiritiko, iteene itxiapatanako. Ninoa auñtetxiakori txiapata iua sitatxi arikasaaki, xamina txiã itikasaakina. ¹⁰Õtakoxiti itimana, kotxi ipĩkarina sitatxi auakani xipokini. Iuasaaki itxanako:

—!Erekari. !Erekari. Ia sitatxiti miramaneri !auaika. Papirónia sitatxiti !auaika. Kākiti kaposotiirerini xipokaepka. ãti oaranoka arikatxi xipokapena ninoa imaerekanina xika.

¹¹Ikini itixiti tiitxi vĕtxitakani apaka txiapatako. Ninoa maerekaxinireninoka itxanako sitatxi auakani xipokasaaki.

—Kiripa amotatari atii uatxa? —itxana.

¹²Mitxi ninoa vĕtxitari oro, pirata, kai soro pomĕkoriri, kai soro kasarori pérora inakori. Mitxi ivĕtxitarina mākaxi mata arínio inakori, mākaxi mata seta inakori, mākaxi mata pōkamarari, mākaxi mata pomamari pakini, ivĕtxitana. Ivĕtxitarina ikini sereti aamina eremari inakari. Ivĕtxitarina ikini sereti tiitxi iko kamakori, aamina pakaroneri kamakori, pirōsi kamakori, metao kamakori, kai kamakori. ¹³Ivĕtxitarina kanera, koketxi pakini. Ivĕtxitarina kamariãro miha inakori. Ivĕtxitarina kamariãro pirākisĕsi inakori. Ivĕtxitarina iãriã, aseitona iĩ, triko, triko pani pakini. Ivĕtxitarina kema auĩte, soti auĩte, kavaro, mitekaĩ kavaro anikakiti pakini. Kākiti apaka ivĕtxitana, nitiritxi ĩkapani. Kākiti ĩto, kākiti xinire apaka inirekana ivĕtxitinina. ¹⁴Ninoa tiitxi vĕtxitakani sãkire sitatximoni:

—Ikinika hĩtii erekari hinireĕkiti xipokaãkapeka. Ikinika hĩtxineirote !auaika. !Auaika hãpokaerekatakiti. Hĩtii arikapeka — itxana ninoa sãkire.

¹⁵Ninoa tiitxi vĕtxitakani katxineiroterini itxauana, kotxi kākiti iua sitatxiti auakani mitxi amotari ninoa tii. Iua sitatxi xipokasaaki, ninoa tiitxi vĕtxitakani timanãta õtakoxiti, kotxi ipĩkarina sitatxi arikini. Itxiapatana. Imatinaniuatana. ¹⁶Itxana:

—!Erekari. Sitatxi miramaneri !auaika uatxa. Mitxi ia sitatxi peerepokori sito erero atoko itxa. Oia sito mãka pakaroneri, pomamari, pōkamarari pakini. Oĩtoã aua oro, kai soro pomĕkoriri.

Pérora pakini aua. Oia sito atokokana ia sitatxi. ¹⁷Áti oara napa atoko ia sitatxiã auakani tii kakaroneri xipokapeka —itxana.

Sitatxi arikasaaki, maporo auakini, maporo ãki sikani, maporo ãki parĩkauatakani apaka õtakoxiti atamatarina iua sitatxi arikini.

¹⁸Ninoa itikasaakiri katxiãri iua sitatxi arikini, itxana:

—Ia sitatxi miramaneri atoko inakari !uari —itxana ninoa.

¹⁹Iuasaaki itakarina atapani ikiiãna imatinaniuatiniãna.

Itxiapatana iuasaaki. Imatinaniuatana iuasaaki. Itxarina:

—!Erekari. !Erekari. Kamatinanipitikari sitatxi miramaneri xipokini. Mitxi iuaã ikinimane maporo auakini apakapari kaiãopokoro txineiro, kotxi iuaã auari txineiropokoni. Eereka ãti oara napaka atoko ixipokapeka ikinika —itxana isãkirena.

²⁰Hĩtepekana Teoso tixine auakanii hĩpoxokoniuatoko iua sitatxi xipokiniã. Hĩte Teoso nakitiakori hĩpoxokoniuatoko. Hĩte Xesosi moianariakorii, hĩte Teoso sãkire sãpiretakanii pakini hĩpoxokoniuatoko, kotxi Teoso arikapekari iua sitatxiã auakani hĩte imisiritinina xika.

Kai Miramaneri Potxoari

Uinitimoni Okiko

²¹Eereka ãti Teoso nitiri kataparari maĩkari kai meraminapoari. Kai triko kamiriãkari atoko itxa iua kai. Okari potxoari uinitimoni. Iua txari:

—Itapararitika kai nokini atoko, Papirónia sitatxiti miramaneri xipokini. !Atamataãkaika sitatxi iuaã —itxa isãkire.

²²Itxari iua sitatximoni:

—Xikari !ikenakotaãkaika ereẽ. !Auaika xikari viorãokata, koitxikata, trõpeta pakinikata. Ereẽ kãkiti parĩkauatini !auaika. Atarokiri kamiko ene !kakenakotikoikari. ²³Tirikapi kamara !katamatikoikari ereẽ. Taniriuatakani kiinirite ene !kakenakotikoikari. Ereẽ mitxi vëtxirauatakani apiari itxauana. Ninoa atoko inakari !uari ikini itixiti. Kãkiti ereẽ auakani misirienetana ikini kãkiti ikini itixiti auakani, kotxi ninoa sãkire maerekatinata —itxa Teoso nitiri sãkire.

²⁴Papirónia sitatxiti misiritaãka, kotxi iuaã auakani okapena Teoso sãkire sãpiretakani kãkiti Teoso nakitiakori. Ikinimane kãkiti itixi okakoni xika Papirónia sitatxiti xipokaãka.

Areroia, Peerekari Teoso

19 ¹Eereka nikenakotari kākiti sākire, kaiāopokori kākiti Teoso tixine auakani. Itapasākireritikana itxana:
 —Areroia. Peerekari Teoso. Ate Teosone makatxakari kākiti maerekani. Kaiotximereri aTeosone. Kaposotiireri. ²Ikerokari ikamakiti, kotxi atão inakaranoka ikama, ininiã atão imisiritinina maerekati kamakani. Erekarinoka ikama aTeosone. Iua misiritari Papirónia sitatxiti. Kanokarero kaposotiirero atoko itxa iua sitatxi, kotxi iua sitatxi auakani iomatari kākiti xinire ikini itixiti auakani xinire, kotxi oerekarina maerekati itotxi nireêkiti ikaminina. Teoso misiritana Papirónia auakani, kotxi okana Teoso nitiriakori itixi auakani —itxana ninoa sākire.

³Iuaikana itxana itaparakieneritikana:

—Areroia. Peerekari Teoso. Iua sitatxi miramaneri arikapikako. Katxiãri iuaãkiri itimatxiãtapikako ãtipirika —itxana.

⁴Iuasaaki ninoa totiakori vîtxi koatro pakini, ninoa okîtxinoka xãpokaïtotakini ipi ipi pakini apaka, ipamakana Teoso apisatoõ. Iuasaaki Teoso topãkanãta auïtetxi topanere nopini. Ninoa misãkiretari iua:

—Pite aTeosone. Peerekai pite. Ameẽ, areroia —itxana ninoa.

Soti Auïte İtanorouatini Kiiniriti

⁵Eereka nikenakotari Teoso topanereẽ auakari sākire. Itxari:

—Hite Teoso nitiriakori ikini itixiti auakanii, “Peerekari aTeosone” hîtxako. Hite auïtetxi inakanii, auïtetxi minakanii apaka, hîpikiniãri Teoso, “Peerekari aTeosone,” hîtxako —itxa.

⁶Iposo atoko nikenakotari itomaneri kākiti sākire ene atoko itxa, ãparaã kai auiniãtaã auakari ene atoko itxa, ikarokirauatini ene atoko itxa. Nikenakotari ninoa sākire:

—Areroia, peerekari Teoso, kotxi aTeosone, Apiananiri, kaposotiireri, ikinimane auïte itxaua —itxana ninoa.

⁷—Mapoxokoniuata. Apoxokoniritika masãkirauata. Matxari: “Peerekari Teoso.” Teoso Soti Auïtene İtanorouatini iketo apokapeka. İtaniriuatakaro iua ikapani oãiamatapeka. ⁸Osikaãka mãkatxi ereri, kasarori oieretaãkiti tĭkane —itxana ninoa sākire.

Teoso nakitiakori kamakiti atão inakari oa mãka atoko itxa.

⁹Iposo atoko iua Teoso nitiri txano nota:

—Ia piõkatsopata. Iua Soti Auíte ãtanorouatini kiiniriti kemaĩtxitakoni poxokoniuaata —itxa notamoni.

Iuaĩkana itxano:

—Ia nisãpiretakiti Teoso sãkire atão itxa.

¹⁰Ikara nikenakotakasaaki nipamaka iua Teoso nitiri apisatoõ, Teoso apisatoõ pamaãkarino atoko nitxaua. Txamari iua txano:

—Kona pipamakape nota apisatoõ. Nota Teoso nitiri pite atoko, pitariakori Xesosi sãpiretakiti auiãkani atoko. Teoso apisatoõnani pipamakako. Xesosi sãpiretakiti iopinikari Teoso sãkire sãpiretakani ãkixinire. Ininiã ninoa sãpiretari kãkiti atão Teoso sãkire —itxa.

Kavaro Kasarori Nopini Topãkakari

¹¹Eereka natamatari Teoso tixineẽ auakari. Natamatari kavaro kasarori. Iua kavaro nopini topãkakari ikamaenetakiti kamakari itxaua. Isãkire atãonoka. Atão imereẽri kãkiti misiritiko imaerekani xika, kotxi iua imarotari ikinipoko kãkiti kamakiti, ininiã ikamari atão. Inaiatana maerekati kamakani, kotxi iua kamari atão. ¹²Oki xamina tirinakari atoko itxa. Ikiiã ito auĩtetxi saporietane aua. Iuãka iõkatakori iĩtoã aua. !Kimarotikori iua uãka. Iuanoka imarotari iuãka. ¹³Arẽkatxinoka imãkaã aua. Iua akiritaãka, “Teoso Sãkire” inakori. ¹⁴Isotatoneakori, Teoso nitiriakori Teoso tixine auakani, saãpota iuakata. Iua ãkiika. Ninoa apaka topãka kavaro kasarori nopini. Imãkana peereri, kasarori. ¹⁵Iua “Teoso Sãkire” inakori namaã opokĩka iouata mitaro neenamatchi ikamini ãkapani. Kauanaro. Iua iouataneẽ okanako imokaiakarini ikini ãti uãka, ininiã ikini ãti uãka auíte kataparari itxauako iua. Imisiritanako ninoa imaerekanina xika. Ova katxaratiko atoko itxako imisiritikona. Teoso kaposotiireri omanãkare ova katxaratiko atoko itxako. Teoso iteene omanãkarauata iusaaki kãkiti maerekani xika. ¹⁶Iua “Teoso Sãkire” inakori mãkaã, itapikeẽ apaka iõkataãka: “Auĩtetxiakori auíte. Apiananiri,” iõkataãka.

¹⁷Iposo atoko natamatari ãti Teoso nitiri. Atokatxi iotximereẽ itima. Iua itaparakieneritika akiritari ikinika itano araãkani:

—Hina. Hãpoka Teoso kiiniritemoni. Mitari ikiinirite —itxa.

¹⁸—Hina. Auĩtetxiakori xini hinika. Sotatoakori auĩteakori xini hinika. Sotato xini apaka hinika. Kavaro xini hinika. Hinikari kikiãkini kavaro nopini topãkakani xini apaka. Hinikari ikini kãkiti xini, nitiritxi iamotakoni xini, nitiritxi minakaniua xini, kãkiti apiatakani xini, kãkiti mapiatakani xini apaka hinika —itxari itano araãkani.

¹⁹Eereka nitikari iua potxoari uinitikiri. Iuakata aua itixi auakani auĩteakori, isatoneakori apaka. Ninoa apotiitaua, iua kavaro kasarori nopini topākakari isatoneakorikata inaiatinina ĩkapani. ²⁰Iua neenamtxi xipoka atoko, iua potxoari uinitikiri maĩkaãka. Isãkire sãpiretakari, atão minasãkiretakati, imaĩkaãka apaka. Mĩtxi iua kamari posotiiretxi iua potxoari uinitikiri ĩkapani. Ikara posotiiretxi xika imisirienetana ninoa potxoari uinitikiri takaõtxikare auãĩtotakini. Imisirienetana ninoa iua kai kamakori teosonetakani. Iua potxoari uiniti pokĩkaãtakari, isãkire sãpiretakari pakini, auãkipanika okaãka ipoa atoko inakarimoni, êxõpiri arikiniãtaã. ²¹Isotatoneakori okapeẽka iouataã, kavaro kasarori nopini topākakari namaãkeroã. Iuasaaki ikinika maiori nikapena ninoa xini. Kamitopekana. !Iposotaikarina ikinika okakoni xini inikinina.

Mio Anokanansaaki

20 ¹Eereka nitikari Teoso nitiri katxakaãpotini Teoso tixine ĩkari. Iuakoã iua minaro xavi iua mamapotõkire irikotimoni. Apaka iminari kohẽtxi mitari. ²Iuasaaki imaĩkari iua imini mitapoari. Kitxakapirĩkarikara iua imini. Iua maerekani matamatakoni auĩte, Satanasi inakori. Iua maĩkari Satanasi. Iaxirikari kohẽtxiã, mio anokanani imatĩpokotakani tĩkane. ³Iua Teoso nitiri okari Satanasi iua aarikoã, tota itxari itore. Ikakiriokari oa xavi itore sonaã, ininiã !apakata itore matakakiko. Ininiã mamapotõkire irikoti ãki ikaikota Satanasi. !Iposotaikari imisirienetiniri ikini itixiti auakani. Mio anokanani auako iriko ãki iua Satanasi. Mio ano napaãka atoko auiritaãka ipokĩkini. Mapaõtinoka auiritaãka mapara auini.

⁴Eereka natamatari auĩtetxiakori topanere. Kaiãopokori auari iuaã. Natamatari iua topaneretxi nopini topākakani. Ninoa txĩkitaãka auĩtetxi ininiuana. Iuasaaki natamatari apanakini kãkiti. Mĩtxi saukanopitakoni. Okapeẽkana Xesosi iokanapirena, Teoso sãkire pakini isãpiretinina xika. !Iteosonetarina iua potxoari uinitikiri. Iua kai kamakori liteosonetana. Iua potxoari uinitikiri takaõtxikare !itakana iteẽtaãna, iuakoãna pakini. Iuaĩkana auapekana. Auĩtetxi itxapekauana Kristokata. Mio anokanani auĩtetxi itxauana. ⁵Ikara ipĩkani õkitikiko merepanika ipĩkani õkitikiko. Iua mio anokanani napaãka atoko apanakini ipĩkani õkitikaãka. ⁶Ipĩkani merepanika õkitikiko iuaĩkana auãki ininina ĩkapani, Teoso nakitiakori itxauana ninoa. Teoso sikari erekari ninoamoni. !Atatsiitarina ãtião ipĩkitxi

Teoso misiritakasaakina maerekati kamakani. Sasetotxi itxauana, kotxi Teoso nireēkiti ikamana. Kristo nireēkiti apaka ikamana. Mio anokanani auítetxi itxauana Teosokata.

Satanasi Xamina Mitapoarimoni Okiko

⁷Mio ano napaãka atoko, Satanasi kateia āki auakari, sikakaãkako. Ipokīka mapara. ⁸Iuasaaki Satanasi ipirixititari itixi kākiti ikini āti uāka imisirienetini ĩkapani. Iua misākiretari āti uāka Koki inakori, Makoki inakori pakini. Txamari na atāo isākire. Inirekari ninoa neenamauatini iuakata. Apitiitana ninoa Teoso nakitiakori inaiatinina ĩkapani. Itori kākiti Satanasi apotiitakini. Uini ikipatxite atoko itxana.

⁹Īpirixititarina itixi. Iakirokarina Teoso tiretakiti sitatxiti, kākiti Teoso nakitiakori auiniātaā. Iuasaaki xamina iaxitikiri katxaka. Ixipokana ninoa ikinikana. ¹⁰Iuasaaki Satanasi, kākiti misirienetakari, okaãka arikatxi mitapoarimoni ēxópiri arikikoãtaā. Iua potxoari uinitikiri, isākire sāpiretakari pakini okapeēkaika iuaā. Iuaā ninoa atatsiirauatapikako pokamara, ĩkanōka ātipirika. !Ixipoka ninoa atatsiirauatini.

Ipinakani Apakapari Iparīkana Īki

¹¹Eereka natamatari auítetxi topanere kasarori mitari. Natamatari iua inopini topākakari. Iuasaaki patimari iaxiti, itixi pakini ereēkokini iua topākakari apisatoō. Iaxiti, itixi pakini kona katamatikoikari.

¹²Iposo atoko natamatari kākiti mitxi ipinakani timini Teoso topanere apisatoō. Kākiti apiarini, kākiti poiāorini pakini tima Teoso apisatoō. Iposo atoko itori aātsopa katamēkitataāka. Iua aātsopaā aua ikinika kākiti kamakiti. Apaka āti aātsopa katamēkaāka. Kākiti uāka aua iua aātsopaā Teosokata auakani ĩkapani. Iuasaaki ninoa mitxi ipinakani apakapari ikamakitina ĩki uai itixiā auakasaakina. ¹³Ninoa mitxi potxoari uiniti āki ipinakani apoka iuaā. Mitxi kipatxiā ikatakoni apaka apoka iuaā. Ikini kākiti ipīkani auiniātaā auakani apoka iuaā. Ikinika apakapari ikamakitina ĩki, ikamakitina itixiā auakasaakina.

¹⁴Eereka ipīkitxi, ipīkani auiniātaā pakini okaãka iua arikatxi mitapoarimoni. Iua arikatxi mitapoarimoni iuaĭkana kākiti ipina ātiāo ipīkitxi maxipokatimoni. ¹⁵Kākiti ātipirika Teosokata auakani uāka aua Teoso aātsopateē. Kākiti iuaā mauauākatakani okaãka iua arikatximoni.

Iaxiti, Itixi Pakini Amaneri Txapekaua

21 ¹Eereka natamatari iaxiti amaneri, itixi amaneri pakini. Iaxiti mitxiri ereëkokape. Ìkora itixi mitxiri ereëkokape. Potxoari uiniti !auaika. ²Natamatari Teoso sitatxine Xerosareë amaneri. Iua sitatxi Teoso tixinekiri. Teoso paniātari iua sitatxi ìkorapokoriti apokini. Natamatari ikatxakaāpotini. Iua sitatxi peereri. Sito ìtaniriuatakasaaki, omāka peereri oitanirimoni osini ìkapani. Oa sito erero atoko itxa iua sitatxi. ³Nikenakotari Teoso topanereë auakari sākire. Itapasākireritika itxari:

—Uatxa Teoso kamari iua auini kākiti sauaki. Iua ninoakata aua. Iua nakitiakori itxauana. Teosora aua ninoakata. Ninoa Teosone itxaua. ⁴Iuasaaki iua kaxipokariko ninoa oki ātsaā. !Itxiapataikana. Ipīkitxi !auaika. Matinanitxi !auaika. Ātsaātxi !auaika. Katsiiri !auaika. Ikinipoko mitxiri ereëkokapeka uatxa —itxa.

⁵Iua auītetxi topanere nopini topākakari txari:

—Uatxa nikamari ikinipoko amaneri —itxa.

Apikomoni itxari notamoni:

—Piōkatsopatari nisākire, kotxi nisākire atāo. Nisāpiretakiti apokapitikako.

⁶Apikomoni itxano:

—Uatxa nipařika xipopeka. !Auaika. Merepitipanika iōka Aopa inakori atoko nitxa, kotxi nota merepitipanika aua. Imapotōkire iōka Ómika inakori atoko nitxa, kotxi ikinipoko mapotōkire nitxaua apaka. Nisikari kākiti posonatakani iātini ìkapani. Na ninirekari ìiki. Iātarinako āparaā amomoākiri. Iua āparaā txīkitakari kākiti ātipirika Teosokata auini. ⁷Nisikariko iua āparaā kākiti Satanasi nireēkiti makamakanimoni. Ninoa Teosone nitxaua nota. Nota anaakori itxauanako ninoa. ⁸Kākiti mataparaxinireni okaākako xamina mitarimoni. Teoso sākire mauikakani apaka okaākako iua xaminamoni. Maerekati potxitakani, kokanirini, maerekati iitoāna potxitakiti kamakani apaka okaākako xamina mitapoarimoni. Miīti apaka okaākako iuamoni. Teoso kamakori teosonetakani okaākako iuamoni. Ikinika kākiti maxikatiīka sāpiretakani apaka okaākako xamina mitarimoni. Ninoa kākiti ikinikana misiritaākako arikatxi mitariā, ēxópiri arikikoātaā. Iuaā kākiti iuaīkana ipina, ātiāo ipīkitxi maxipokatimoni —itxa iua auītetxi topanere nopini topākakari sākire.

Xerosareë Sitatxiti Amaneri

⁹Ninoa Teoso nitiriakori setxi, iātatxi setxi auakini, āti ina notamoni. Iua txari:

—Uai pina. Noerekaiko pite iua Soti Auīte tiretakito ītanoro īkapani —itxa.

¹⁰Iua Erekarī Matamatakoti anikano nota. Itxīkitakari Teoso nitiri anikinino oxiratari nopini. Mitaxiratariā oerekano sitatxi Teoso nakiti Xerosareë inakori. Natamatari iua sitatxi Teoso tixine potorikakari katxakaāpotini īkorapokoritimoni. ¹¹Teoso iotximeretxikana aua iua sitatxi. Kai pomēkoriri kakaroneri xāsipi inakori mēkorīkini atoko itxa iotximere. Iua sitatxi iotximere peereri. Kristao mēkori atoko itxa. ¹²Pirikeri kai kamakori piriketari iua sitatxi. Iua pirikeri mitapoari, paītanori. Iua pirikeri tosi itore aua. Teoso nitiriakori iaxitikini tosi nīkatari iua tosi itore. Ikinika itore nopini iōkataāka Isaeo anaakori uāka, kotxi Isaeo tosi imiakori aua. ¹³Ipi āti pakini iua itore atokatxi pokīkinimoni. Ipi āti pakini iua itore atokatxi pokīkini sanaremoni. Ipi āti iua itore atokatxi pokīkini ikikomoni. Ipi āti pakini iua itore atokatxi ereēkokinimoni. ¹⁴Iua sitatxi pirikere tosi kai mitari nopini ikamaāka. Ikinika iua kai nopini Soti Auīte moianariakori uāka iōkataāka, kotxi Soti Auīte moianariakori tosi aua.

¹⁵Iua Teoso nitiri notakata sākirauatakari aua aāke oro kamakori iuakoā. Iua aāke iua sitatxi, itore, ipirikere pakini iaōtiko. ¹⁶Sitatxi tore atokatxi pokīkinimoni ipotorika. Itore atokatxi ereēkokinimoni apoka. Iaōtari ipi mio, koatrosētosi pakini kirómetro. Maioakari. Iuaīkana ipotorika sitatxi itore atokatxi pokīkini sanaremoni. Itore atokatxi pokīkini ikikomoni apoka. Iaōtari iua atokotxikana ipi mio, koatrosētosi pakini kirómetro. Eereka iaōtari sitatxi ītano timakari. Iua atokotxikana ipi mio, koatrosētosi pakini kirómetro. Iua Teoso nitiri iaōtari iua sitatxi iua aākeē. ¹⁷Iua Teoso nitiri iaōtari pirikeri timakari. Sesēta metro ītano. Teoso nitiri iaōrauata kākiti iaōrauātini atokokana. ¹⁸Iua pirikeri kai kamakori xāsipi inakori. Iua sitatxi oro kamakori. Kristao erero atoko itxa oa oro. ¹⁹Iua kai mitari pirikeri patapi auakari ipataāka ikini sereti kai soroā. Pomēkoriri, kakaroneri iua kai soro.

~ Āti iua kai mitari aua kai soro xāsipi inakori.

~Áti iua kai mitari aua kai soro sapira inakori.

~Áti aua ákata inakori.

~Áti aua esimeráota inakori.

²⁰~Áti kai mitari aua kai soro satónia inakori.

~Áti kai mitari aua kai soro sátxio inakori.

~Áti aua krisórito inakori.

~Áti aua periro inakori.

~Áti aua topásio inakori.

~Áti aua krisópraso inakori.

~Áti aua xasíto inakori.

~Áti aua ametxísita inakori.

²¹Iua tosi itore tosi kai kasarori kamakori. Iua kai kasarori pérora inakoro. Iua itore átika, pérora átoka kamakori. Oro kamakori itxaua kimapori. Peereri. Pomëkoriri. Kristao atoko itxa ahoa.

²²Kona natamatari Teoso misäkiretiko aikoti. !Auari iua aiko iua sitatxiã, kotxi Teoso Apiananiri kaposotiireri, iua Soti Auíte apaka iuaã auapikana. ²³Iuaã !nirekaãka atokatxi, kasiri pakini sitatxi iopinikini íkapani, kotxi Teoso iotximere iopinikari ikinipoko. Iua Soti Auíte sitatxi tirikapite atoko itxaua. ²⁴Kãkiti maerekanitxi mauakini ikini âti uãka auari iua kamaraã. Kãkiti ikini itixiti auakani auíteakori apokako iuaã Teoso ipaxitinina íkapani, inirekakitina Teosomoni isikinina íkapani. ²⁵Iua sitatxi tore imatakakaãkapika. Íroãpikana kãkiti. !totaãka, kotxi íkanökari !auari iuaã. ²⁶Kãkiti ikini itixiti auakani anikariko ikinipoko erekari iua sitatximoni Teoso ipaxitinina íkapani. ²⁷Kãkiti maerekati kamakani !auritaãkana íroinina. Ítotxi nireëkiti kamakani !auritaãkana íroinina. Atão masãpiretakani apaka !auritaãkana íroinina. Kãkiti Teoso iökauãkatakini aãtsopateë, ninoanokara auritaãka íroinina iua sitatxitiã. Iua Soti Auíte aãtsopateë auauãkatakani auapikako Teosokata.

Iua ãparaã Iãtakari Aua

Teosokata Átipirika

22 ¹Eereka iua Teoso nitiri oerekano sôtoãri. Iua sôtoãri mapotökire ikiitaã Teoso itopanere aua. Apaka iua Soti Auíte itopanere aua iuaã. Iua ãparaã peereëri. Kristao mëkori

atoko itxa iua ãparaã. Iua ãparaã iãtakari !ipina. Átipirika auapika. ²Iua sitatxi apanĩkaki aua ahoa mitapoari. Iua sōtoãri sa ahoa apanĩkaki. Sōtoãri itinikata aua amãtiirinape. Iua amãtiiri tximakani !ipina. Auapikana. !Ipinaikana. Kasiri iaõka iriuata iua amãtiiri. Áti kasiriti iri átião, eereka áti kasiriti átião. Iuaĩkana áti kasiriti átião. Itxaãpota iua amãtiiri iriuatini iuaxiti. Tosi pakini kasiriti amãtiiri iriuata. Amãtiiri tsopa sikataparatarari kãkiti ãto, ikinimane kãkiti itixi auakani ãto.

³Teoso misiritiniri kãkiti !auaika. Teoso, Soti Auĩte pakini auĩtetxi itxauana iuaã. Teoso nitiriakori itixi auakani kamari iua nireẽkiti. ⁴Ninoa atamatariko itoõ. Teoso uãka iteẽtaãna auako. ⁵Ĩkanõka !auaika iuaxiti. Kãkiti iuaã kona nirekaikari tirikapi, atokatxi kamara pakini, kotxi Teoso Apiananiri iopinikari ikinika iuaã. Kãkiti iuaã auakani auĩtetxiakori itxauana átipirika.

⁶Eereka iua Teoso nitiri txari notamoni:

—Atão nisãkire. Ia iaõka apokapitikako. Teoso Apiananiri sikari Erekari Matamatakoti isãkire sãpiretakanimoni. Iua paniãtari initiri itixine auakari oerekinina initiriakori itixi auakani Teoso kamakiti apokini apisapanika —itxa iua Teoso nitiri sãkire.

Xesosi Kanapiriini Pirena

⁷—Hĩkenakota —itxa Xesosi. —Patimariko napokini ereẽ. Ia aãtsopa sãpiretari ereẽ nikanapiriini pirena. Kãkiti auikiniãri Teoso sãkire ia aãtsopa sãpiretakiti, apakapari erekari Teoso sikakiti —itxa Xesosi.

⁸Nota Xoão sãpiretai hĩte nitiãkiti. Nikenakotakiti apaka nisãpiretai hĩte. Ikinika nikenakotaka atoko, ikinika natamataka atoko, iusaaki nipamaka iua Teoso nitiri apisatoõ, kotxi iua oerekari ikinipoko notamoni. Nipamaka iua apisatoõ Teoso apisatoõ nipamakini atokokana. ⁹Txamari iua Teoso nitiri txari notamoni:

—Kona pipamakape nota apisatoõ. Nota Teoso nitiri pite atokokana nitxa. Pitariakori Teoso sãkire sãpiretakani Teoso nitiriakori itxauana. Ninoa atokokana nitxa nota. Ikini kãkiti ia aãtsopa sãpiretakiti auiãkani Teoso nitiriakori itxauana. Ninoa atokokana nitxa nota. Teoso apisatoõnoka pipamakiniã atão —itxa Teoso nitiri sãkire.

¹⁰Iuaĩkana itxano nota:

—Ia aãtsopa sãpiretari Teoso kamakiti apokini apisapanika. Na pikipatapiri ia aãtsopa sãpiretakiti, kotxi paítiki Teoso sãkire iaõka apokapitikako. ¹¹Maerekati pikamapanika pinakasaaki, ininiã apikomoni maerekati pikama. Maerekati piíto nireëkiti pikamapanika pinakasaaki, ininiã apikomoni pikama. Atão inakari pikaminiã, apikomoni atão inakari pikama. Teoso nireëkitinoka pikaminiã, ininiã apikomoni Teoso nireëkitinoka pikama —itxa.

¹²—Hikenakota —itxa Xesosi. —Patimapaniriko napokini ereë. Nimiriko ikinimane paríka íki ninoa apakapini íkapani. ¹³Iõkatxi merepitipanika auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Ikinipoko auini apisapanika nota aua. Ikinipoko xipokaãka atoko nota auapanika. Itixi kamiko apisapanika naua. Itixi xipoka atoko nauapanika nota —itxa Xesosi.

¹⁴Teoso sikari erekari iua nireëkiti kamakanimoni. Ninoa kãkiti auiritaãkako Teoso amãtiirite itxminina auapika ininina tíkane. Auiritaãkanako íroinina Teoso sitatxineë. ¹⁵Kãkiti maerekati iítona nireëkiti kamakani !auiritaãka íroinina iua sitatxitiã. Míiti, ítanoro minakatokatika siríkakani, kokanirini pakini !auiritaãka íroinina iua sitatxitiã. Apaka kãkiti ikamakitika teosonetakani !auiritaãka íroinina iua sitatxitiã. Aãpirena potxitakani, atão minasãkiretakani pakini !auiritaãka íroinina iua sitatxitiã.

¹⁶—Nota, Xesosi txaua. Nota paniãtari ninitiri nitixine auakari sãpiretiniri ia nisãkire pitemoni, ininiã ikara pite sãpiretanako Teoso misãkiretikoãtaã apotiitakaniua. Tavii apika mekanirirano nota. Iõriki mitaro pokamara iatokopeka inakasaaki íkaro atoko nitxa nota —itxa Xesosi.

¹⁷Erekari Matamatakoti txari Xesosi:

—Uai pina.

Xesosi nakitiakori txari iua:

—Uai pina.

Híte ia nisãkire kenakotakanii, hítxariko:

—Uai pina.

Híte posonatakani, uai hina. Hinirekiniãri, ia ãparaã hiãtako, kotxi ia ãparaã kãkiti auapininiika iníkitaãkari. Ia ãparaã Teoso sikakiti kãkitimoni. Na piíkitxitari.

¹⁸Nota, Xoão, õtãkikari kãkiti ia Teoso sãkire iõkatsopatakori kenakotakani. Ia Teoso sãpiretakiti apokini apisapanika,

isãpiretaua. Ia aãtsopa sãpiretari kãkiti misiritiko. Ninoa misiritiko atokotxikana Teoso misiritai hïte, hïkokekiniãri hïteka sãkire Teoso sãkirekata. ¹⁹Kãkiti kipatiniãri ipixini ia Teoso sãpiretakiti iõkatsopatakori, Teoso !auritari iua tximiniri iua amãtiiri kãkiti auapininiika inïkitaãkari. !Auritari iua ãroini isitatxineẽ. Ia aãtsopa sãpiretapekari iua amãtiiri, iua sitatxiti pakini.

²⁰Xesosi txari:

—Ia niokanapirena atão. Iposopeka napokini tïkane.

Atxari iuamoni:

—Ameẽ. Ari, uai pina Xesosi, Apiananiri.

²¹Xesosi Apiananiri sikari ikinipoko erekari ikinimane Teoso nakitiakorimoni. Ameẽ.